

Yus Papí: Shuarjaj̄ Yus Yamaram Chicham Najanamu

New Testament in Shuar

This Bible is published by the Shuar Association of Evangelical Churches and is copyrighted by Wycliffe Bible Translators. It is printed with permission by the Digital Bible Society (dbs.org) for non-commercial use.

This Bible, and many others, are available for free download in a variety of digital formats at dbs.org/bibles.

MATEU	4
MÁRKUS	34
RÚKAS.....	53
JUAN	85
TÚRAMU.....	107
RÚMANAM	138
1 KURINTIUNAM	150
2 KURINTIUNAM	162
KARASEANAM	170
IPISIUNAM	175
JIRIPIUSNUM	180
KURUSENAM.....	183
1 TISARÚNIKIANAM.....	186
2 TISARÚNIKIANAM.....	189
1 TIMIUTÉUN	191
2 TIMIUTÉUN	195
TITIUN	198
JIRIMIÚÑKAN	200
ISRAERNUM	201
SÁNTIAK	210
1 PÍTIUR	214
2 PÍTIUR	218
1 JUAN	221
2 JUAN	224
3 JUAN	225
JÚTAS	226
APUKARÍPSIS	228

MATEU

Jesukrístu weątrí (Rúkas 3.23-38)

1 Jesukrístu weątrí jü ániawai. Tura ashí naŋkaamas ti uunt weąt Tawitcha Apraámsha ániawai. 2 Apraáma uchirí Isak. Tura Isaka uchirí Jakup. Jakupa uchirísha Jutá ni yachijjái. 3 Tura Jutá uchirín Páresan tura Sarancha Tamar jurermiayi. Páresa uchirísha Esrum, nuna uchirísha Aram. 4 Nuna uchirísha Aminiatáp. Nuna uchirísha Nasuŋ. Nuna uchirísha Sarmuŋ. 5 Sarmuŋka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isái. 6 Nuna uchirísha uunt akupin Tawit. Uunt akupin Tawitia uchiríncha Sarumuŋkan Patsepa jurermiayi. Patsepasha emka Uríasa nuweeyayi. 7 Sarumuŋka uchirí Rupuam. Nuna uchirísha Apías. Nuna uchirísha Asa. 8 Asa uchirísha Jusapát. Nuna uchirísha Juram. Nuna uchirí Usías. 9 Usías uchirí Jutam. Nuna uchirí Akas. Nuna uchirí Esekías. 10 Esekías uchirí Manasés. Nuna uchirí Amuŋ. Nuna uchirí Jusías. 11 Jusías uchirí Jekunías ni yachi armia nujái. Nuí Papirúnianmayá shuar Israer shuaran mesetjái nupetkar Papirúnia nuŋkanam achirar júkiarmiayi. 12 Nu ukunmaŋka Jekunías uchirí Saratiár akiiniamiayi. Tura nuna uchirí Surupapír. 13 Surupapíra uchirí Awit. Nuna uchirí Iriakím. Nuna uchirí Asur. 14 Asura uchirí Satuk. Nuna uchirí Akim. Nuna uchirí Eriut. 15 Eriuta uchirí Ereasár. Nuna uchirí Mataŋ. Nuna uchirí Jakup. 16 Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti. 17 Tuma asamtai Apraámnumiá Tawitnium Jesusa weątrí katurse (14) ániawai. Tawitniumiásha Papirúnianam jukimionma nuísha katurse weąt ániawai. Papirúnianam jukimionmayásha Krístunam ataksha katurse ániawai.

Jesukrístu akiiniamu (Rúkas 2.1-7)

18 Jesukrístu akiiniamu júnis ámiayi. Ni nukurí Marí Jusejái anajmanairuyayi. Tura tsaníatsaiŋ Yusa Wakaní ajaprumtikiamiayi. 19 Ajaprukmetaisha Jusé Marin iniatatsaatsuk nin ajapatniun enentáimpramiayi. Tura ti péŋker asa aya iniaiatniun wakerimiayi aents nékainiatatsaiŋ. 20 Nuna tu enentáimia pujái, mesekranam Yusa suntari tarí chicharuk tímiayi “Juséá, ame weątrum Tawitchakait. Tuma asam Marijái nuatnaikiatin ashamkaip. Uchin jurertatna nuka Yusa Wakaníniuiti. 21 Uchin áishmaŋkan takustatui tura nuna naari *JESUS*

anaikiattame. Ashí ni shuárjŋ ni tunaariya uwemtikiartin asa Jesus anaikiatniuiti” tímiayi.

22 Yus ni etserniurijjái yaunchu timia nu uminkiatitusa nu túrunamiayi. Juna áamtikramiayi:

23 “Nuwá natsa ajapruktatui tura uchin takustatui. Nuna náarjsha Emanuér anainiaktatui.” Tu áarmaiti. Emanuérsha nu chichamnum “Yus iijjái pujuwiti” tawai.

24 Juresha mesekranmayá shintiar Yusa suntari timia núnisan Marin nuatkamiayi. 25 Tura uchin júreatsaiŋ tsaniŋchamiayi. Tura jurermatai uchin Jesus anaikiamiayi.

Ti neka apach Jesusan eąkarmiania nu

2 Jutía nuŋkanam Pirin pépru ana nuí Jesus akiiniamiayi. Nuísha nú nuŋka akupniuri Irutisauyayi. Akiiniamtai ti neka apach nantu tátainmaaniya Jerusaréŋ péprunam táarmiayi. 2 Taar inintruiniak “¿Israer shuara úunt akupniuri tuí akiiniat? tiarmiayi. Nantu tátainmaani pujaati ni yaari wáinkiamji. Tura tikishmatratatui tusar winiaji” tiarmiayi.

3 Irutis nuna antuk nusháa enentáimpramiayi. Tuma asamtai ashí Jerusaréŋnumiá shuarsha antukar nusháa enentáimpramiayi. 4 Irutis nuikia ashí Israerpatri uuntrincha tura yaunchu akupkamun jintinnincha untsukarmiayi. Tura Kristu akiiniatniurin inintrusmiayi. 5 Tutai chichainiak “Jutía nuŋkanam Pirin pépru ana nuí akiiniatniuiti, tiarmiayi. Yaunchu Yúsnan etserin tu áaruiti:

6 “Jutía nuŋkanam, Pirin pépru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásarmatai, péŋker wáinkiatatawai,” tawai Yus.” Tu tiarmiayi.

7 Nuna tuíniakui Irutis ti neka apachin úysaŋ, urutía yaa emka wáinkiamarum tusa aniasarmiayi. 8 Nuyá Pirinnum akupeak “Nuí werum uchi péŋker inintrusrum wáinkiatarum. Tura wáinkiarum ujatkataram. Wisha werin tikishmátuutaj” tímiayi.

9 Tutai ti neka apach wearmiayi. Tura yaa, yajayá wáinkiamiania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuí ejeniarmiayi. 11 Jeá wayawar uchincha ni nukurí Marijái wáinkiamiai. Tura uchin tikishmatrarmiayi. Nuyá ni kajuntríyan kurincha, mirá kuŋkuinniasha, chíkich kuŋkuinniasha súarmiayi. 12 Nuyá mesekranam Yus “Irutisaiŋni weerap” tutai chíkich jintianam waketiarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukurjijai Ejiptu nunkanam jukim nuj pujustá. Irutis uchin máataj tusa eaktatui. Tura ukunam ankant ajas-matai ujaktajme” tímiayi.

¹⁴ Tutai Jusé kurat shintiar nú káshik uchincha nukurjijai Ejiptunam jukimiayi. ¹⁵ Irutis jáatsain nuj pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi: “Ejiptunmayan winia Uchirun untsukmajai.” Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin anaŋka yajá waketran nekáa ti kajekmiayi. Ti kajek ashí áishmanchin Pir-ignumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi. ¹⁷ Nuka Yusnan etserin Jeremías aarmia nu uminkiamiayi. Juna áarmiayi:

¹⁸ “Ramá nunkanam ti úutainiak uur ajainiawai. Raker ti uutu asa atsankrachminiaiti ni uchirí jákarmatai.” Tu áarmiayi.

¹⁹ Tura Irutis jakamtai Yusa suntari mesekranam Jusen ujakmiayi. ²⁰ “Uchin máataj tiarmia nuka jákarai. Yamaikia ataksha uchi ni nukurjijai jukim Israer nunkanam waketkitia” tímiayi. ²¹ Tutai Jusé nantaki uchincha nukurjijai jukin Ejiptunmayá Israer nunkanam waketkimiayi. ²² Túrasha Irutisa uchirí Arkiráu Jutía nunkanam uunt akupin ajasun nekáa nuj wétinian aránkámiayi. Mesekranmasha ujakma asa nuj pujutsuk Kariréa nunkanam wémiayi. ²³ Nuj jeá Nasaré t péprunam pujusmiayi. “Nasarénumiá átatui” Yusnan etserin yaunchu tu etserkamu nujai uminkiamiayi.

Imiakratin Juan atsamunam etserkamiania nu

(Márkus 1.1-8; Rúkas 3.1-9, 15-17; Juan 1.19-28)

3 Nuyá imiakratin Juan Jutía nunkanam aents atsamunam etserki támiayi. ² “Enentáim yapajjatarum. Tsawant ishichik ajasai Yus juj akupin ajastin.” Tu etserkamiayi.

³ Nú Juan kan yaunchu Yúsnan etserin Isayas juna áarmiayi:

“Shuar atsamunam aents untsumui. Untsumuk “Atumí enentáim Uunta jinti iwiarturtarum tura naka awajsatarum” tawai.” Tu áarmiayi.

⁴ Nu Juan sha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijjai yúuyayi. ⁵ Tura Jerusaré péprunmayá shuarsha tura ashí Jutía nunkanmayá shuarsha Jurtaŋ entsanam matsamiarmia nú shuarsha mash Juán kan tariarmiayi ni chichamen anturkatai tusar. ⁶ Tura ni tu-

naarín paant etserkarmatai Juan Jurtaŋ entsanam imiainiarmiayi.

⁷ Juan sha Pariséuncha Satuséuncha imiatti tusa wininian wáiniak tímiayi “Napia áaniutirmincha, zya atumniasha ti asutniátniunmayá uwempratniuncha ujatmakmarum? tímiayi. Asutiátin tsawant ishichik ajasai. ⁸ Tuma asamtai enentáim yapajjámuitkiuinŋkia péŋker wekaamurmijjai paant iniakmatarum. ⁹ Atumsha “Tikia Apraám weaitji” tu enentáimtumsairap. Nujai uwemprashtatume. Yus wakerakka ju kayan Apraáman tiraŋki najankainti, tímiayi. ¹⁰ Numi ajaktinia áintsan kampuwárin jacha atuttsamuiti. Tura numi péŋker nereatsna nuka tsupikia jinium apeamu ártatui. ¹¹ Wikia aya entsajain imiajrumé atumi enentáim yapajjáwakrumin. Antsu winia ukuruj winiana nuka péŋker awajtamataj tusa imiantinia áanis tura já áanis Yusa Wakanin enketramprattarme. Wijjai nankaamantu asamtai wikia tsuntsumpruan ni sapatrínkisha atitrachminiaitjai. ¹² Aruusa nerejai túruinia áintsan átatui. Awajtiutairin achikiuiti tura nujai saepen awajittiwai. Tura neren péŋker ikiustatui, antsu saepénka jinium apeattawai. Nu jisha tuke kajinchaiti.” Tu tímiayi Juan.

Juan Jesusan imiaimiu amia nu

(Márkus 1.9-11; Rúkas 3.21-22)

¹³ Nuyá Jesus Kariréa nunkanmayá winis Jurtaŋ entsanam támiayi Juan imiatti tusa. ¹⁴ Juan sha emka nakitai Jesusan tímiayi “Ame winia imiatminiaitme. Túrutamniaiatmesha zুরুkamtai winia tarutnium?” tímiayi.

¹⁵ Tura Jesus tímiayi “Ántsan asati yamaikia. Núnisrik ashí Yus akupkamu umirkatniuitji.” Tutai Juan iniaisiayi. ¹⁶ Tura Jesus imiani entsaya jinkimtai nayaimpi uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi. ¹⁷ Túramtai nayaimpinmayá Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

Uunt iwianch Jesusan anaŋkataj tímiania nu

(Márkus 1.12-13; Rúkas 4.1-13)

4 Nu túrunamtai Yusa Wakaní Jesusan iwianchjai nekapmamtiksattsá aents atsamunam jukimiayi. ² Nuj kuarenta (40) tsawant, káshisha tsawaisha yurumsuk pujak tsukarmiayi. ³ Nuj uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

⁴ Tutai Jesus tímiayi “Yus-Papinium áarmaiti: “Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

⁵ Tutai uunt iwianch Jerusaré péprunam jukí Yusa Uunt Jee cháikin iwiak ⁶ tímiayi “Nekas Yusa Uchirínki-umka juyá akaikim iniaata. Kame Yus-Papinium áarmaiti:

“Yus ni suntarin akatar akúptúrmaktatui. Nawemin kayanam ajiintsumniŋ wenkurmaktatui” tawai” tímiayi.

⁷ Tutai Jesus tímiayi “Núnisan Yus-Papinium áarmaiti:

“Ame Úuntrum Yus “Nekapsataj” tiip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nuṅkanmaya péprun shiira nuna iniaktusmiayi. ⁹ Tura tímiayi “Winia tikishmatru-rakminkia juna mash amastatjai.”

¹⁰ Tutai Jesus tímiayi “Werumta, uunt iwianchi. Yus-Papinium aarma awai:

“Ame Úuntrum Yúsak tikishmatrata tura Niṅki shiir awajsata” tawai” tímiayi.

¹¹ Tutai uunt iwianch Jesusan ikiuak wémiayi. Túramtai Yusa suntarij tariat atsumamuriṅ súsarmiyai.

Jesus Kariréa nuṅkanam etserkamiania nu

(Márkus 1.14-15; Rúkas 4.14-15)

¹² Juan sepunam eṅketui taman antuk Jesus Kariréa nuṅkanam wémiayi. ¹³ Tura Nasarét péprunam pujut-suk Kapernáum péprunam we pujusmiayi.

Kapernáumsha Kariréa antumiaṅka kánmatkarin pujumiayi. Ti yaunchusha Jakupu uchirij Sapuruṅsha tura Niptarisha nu nuṅkanak nuj pujustaisar achikiaruyayi.

¹⁴ Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

¹⁵ “Sapuruṅsha Niptarisha nayaantsanam tíjiuch Jur-taṅ entsa amainini nuṅkan achikiarmiayi. Nuka Kariréaiti Israer-shuarcha matsatainia nuj. ¹⁶ Nu aents kiritniunam pujuiniyataṅ ti tsáapninian wáinkiar-miayi. Jákatniunam pujuiniatí tsáapin tsáapnirmiayi.” Tu áarmaiti.

¹⁷ Nuyá Jesus étseruk tímiayi “Tunaarum enentáimtu-rum enentáim yapajjatarum. Ju nuṅkanam Yus akup-katin tsawant ishichik ajasai.”

Jesus kuaru aents namakan achinian ni unuiniamuri ajasarat tusa achikmiania nu

(Márkus 1.16-20; Rúkas 5.1-11)

¹⁸ Jesus Kariréa antumiaṅka kánmatkarin wesa jimirá áentsun nuámtak yáchinniun wáinkíamiayi. Chikichik Antresauyayi, chikichcha Semuṅkauyayi. Nu Semuṅ núnisaṅ Pitru náartiniuyayi. Namakan achin ásar namakan nekajaj naṅkiak yujaarmiayi. ¹⁹ Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáí namak achíarmena núnisaṅ shuaran-eṅau awajsatjarme.” ²⁰ Tutai ni nekarin ikiukiar Nin nemariarmiayi.

²¹ Nuyá ishichik wésaṅ ataksha nuámtak yachinniun wáinkíamiayi. Jakupu Juanjaj mai Sepetéu uchirij ármiai. Niisha kanunam eṅkemsar ni nekarin ni aparjijaj iwiarainiak pujuriarmiayi. Tura Jesus “Nemartusta” tutaí ²² nu chichamaik kanuncha tura aparincha ikiukiar Jesusan nemariarmiayi.

Jesus untsurij shuaran jintintiamiania nu

(Rúkas 6.17-19)

²³ Ashí Kariréa nuṅkanam Jesus Israer-shuar iruntainiam etserki wémiayi. Yus ju nuṅkanam akupkatin chichaman etserkamiayi. Tura untsurij sunkurjaj jáinian ashí tsuármiayi. ²⁴ Ashí Siria nuṅkanam Jesus tsuákratman nekaawar ashí nánkamas sunkurjaj wáitin armia

nuna Jesusan tsuarti tusa itiararmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiayi. ²⁵ Tura untsurij shuar Jesusan nemariarmiayi. Kariréa nuṅkanmayasha, Tekapurisnumiasha, Jerusarén péprunmayasha, Jutía nuṅkanmayasha, Jurtaṅ entsa amainiyasha Jesusan nemariarmiayi.

Náinnium Jesus etserkamu

5 Jesus untsurij shuar káunkarun wáiniak náinnium waka nuj pujusmiayi. Tura ni unuiniamuriṅsha taar pujusarmiayi. ² Nuyá Jesus júnis unuiniamiayi.

Warastin ainia nu

(Rúkas 6.20-23)

³ “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuitrume. ⁴ Kúntuts pujarum nu warastarum. Yus atsaṅtamprattarme. ⁵ Péejchach enentáimtumarmena nu warastarum. Yus ashí nuṅkan amastatrume. ⁶ Eseer wekasataj tusa aya kitiamarum nu warastarum. Yus imiktamprattarme. ⁷ Waitneṅkratniutiram warastarum. Yus waitnentramprattarme. ⁸ Péṅker enentáimniutiram warastarum. Yus wáinkíattarme. ⁹ Chicham iwiarin árum nu warastarum. Yusa uchirij turamartatui. ¹⁰ Péṅker túrakrumin yajauch awajtamainiakui warastarum. Yus akupeamunam pachiinniuitrume. ¹¹ Wíi shuar asakrumin katsekramainiakuiṅsha, itit awajtamainiakuiṅsha, tura ashí tsanumprutmainiakuiṅsha warastarum. ¹² Núnisaṅ yaunchu Yúsnan etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péṅker akinkiatarme’ tímiayi.

Ju nuṅkanam átum tsáapninia áintsarum tura weeya áintsarum árum

(Márkus 9.50; Rúkas 14.34-35)

¹³ “Átumka ju nuṅkanam wee ana áintsanṅketrume. Tura wééaitiat jeakchaitkiuṅka míchuiti. ¿Nusha itiri yuámniak atí? Antsu ántraiti. Tuma asamtai aṅ najatai tepet tusar ajapashtinkiait’ tímiayi.

¹⁴ “Átumka ju nuṅkanam shiripkia áintsanṅketrume. Náinniumka pepru úumkachminiaiti. ¹⁵ Núnisaṅ shiripik ekeemakam kajuṅnum eṅkeatsme. Antsu yakí sukúatsmek ashí jeṅam ana nu paant atí tusam. ¹⁶ Núnisaṅ atumsha Yusjaj péṅker túramu paant atí. Tura ashí aents nuna iisar niisha Yus Apan shiir awaj-sartatui’ tímiayi.

Yaunchu akupkamun pachis Jesus unuiniamiania nu

¹⁷ “Muisais akupkamuncha tura yaunchu Yúsnan etserin etserkarmia nuna ántar awajsatatawái” turutiirap. Antsu nuna Wikia umiktaj tusan táwitjai. ¹⁸ Nekasan tájarme. Ashí túrunatniua nu amúatsajin nu akupkamu ishichkisha yapajniáshtatui. Nayaimpisha tura nuṅkasha tuke amúatsajin nu akupkamusha amuukashtatui. ¹⁹ Nu asamtai shuar chikichik akupka-

mun, yúpchuch ana nunaksha, umirchakka tura chíkich shuaran umirkashtinian unuiniakka Yus nekas akupin paant ajastatna nuĭ nú shuar uunt áchattawai. Antsu ashí shuar akupkamun umiana nu tura chíkich shuaran umirkatniun unuiniana nusha Yus nekas akupin paant ajastatna nuĭ, nu shuarka uunt átatui. ²⁰ Tuma asamtai Yus akupeamunam pachiinkiatatj tákumka Pariséujajĭ nanĭkaamas tura akupkamu jintin- niujajĭ nanĭkaamas eseera wekasatniuitrumé' tímiayi.

Kajeamun pachis Jesus unuiniamiania nu (Rúkas 12.57-59)

²¹ 'Yaunchu tiniu armia nu ántichukaitrum: "Maŋkar- tuawairap. Maŋkartana nuka asutniátniuiti" tiniu ármia- ayi. ²² Tura Wisha tájarme: Shuar ni yachĭn aya kajerak- ka nusha asutniátniuiti. Ni yachĭn kátsekea nuka akup- niunam junaktiniaiti. Tura ni yachĭn "netsé" tákuŋka jiniun akupnakminiaiti.'

²³ Tuma asamtai Yus susataj tusam wakerakum tura ame yatsum ámin itit enentáimturman enentáim- pramka, ²⁴ suamu nuĭ ikiuakum emka ame yatsum werim niijjajĭ iwiarata. Turam waketkim Yus suam nu susata.'

²⁵ 'Shuar úuntnum júramkuinĭkia jintianĭ wesam niijjajĭ iwiarata úuntnum ejetamtsajĭn. Túrachakminkia úunt- num surutmaktatui tura niisha suntarnum surutmak- tatui tura sepunam enĭketmattawai. ²⁶ Tura nekas tajai, nuĭ enĭkemamka ashí rearchisha akikmachkumka jĭink- ishtatme' tímiayi.

Tsanirmatniun pachis Jesus unuiniamiania nu

²⁷ 'Yaunchu tiniu armia nu ántichukaitrum: "Tsanir- mawaip." ²⁸ Tura Wisha tájarme: Shuar nuwĕn tsanir- mataj tu iiska nuĭkia ni enentáin tsanirmayi.'

²⁹ Tuma asamtai ame jĭimi tunaanum yajauch awaj- tamkuinĭkia ukuinĭkiam yajá ajapata. Ashí ame ayashim jiniun esaatsajĭn aya chikichik ayashmi muchitmarĭ emesratin péŋkeraiti. ³⁰ Ame ewejmesha untsuurmeti- at tunaanum ajunmakuinĭkia tsupikiam yajá ajapata. Ashí ame ayashim jiniun esaatsajĭn aya chikichik ayashmi muchitmarĭ emesratin péŋkeraiti.'

Nuwĕ ajapatniun pachis Jesus unuiniamiania nu (Mateu 19.9; Márkus 10.11-12; Rúkas 16.18)

³¹ 'Núnisaŋ yaunchu tiniu ármiaiyi: "Shuar ni nuarĭn ajapatniun wakera nuka papí najana susati." ³² Tura Wisha tájarme: Shuar ni nuarĭn tsanirmachun ájapeak- ka nuwĕn tsanirmamtikiaiti. Tura ajapamujajĭ nuat- nairyakka nuka tsanirmaiti.'

Jesus aya nekasa nu titinian unuiniamiania nu

³³ 'Núnisaŋ yaunchu tiniu ármiaiyi: "Yusa naarĭ pachisan turattajai" tákumka nekas takamtsuk umik- tiniaitme." ³⁴ Tura Wisha tájarme: Áyatik "Ee" tákumka tura "Atsá" tákumka wáitruksuk nuke titiá. Támena nu nekas umiktaj takum ame nú arant pachistiniakium- ka nuka yajauchiiti, iwianchnumiĭiti. Ti nekas tajai

tusam nayaim pachischatniuitme. Nuka Uunt Yus pu- jutainti. Nuŋkasha pachischatniuiti Yusa tarimtaiĭrĭ asamtai. Jerusarenĭ péprusha pachischatniuiti Uunt Akupin pujutai nuĭ asamtai. Múukmesha pachischat- niuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.'

Iikkiatniun pachis Jesus unuiniamiania nu (Rúkas 6.29-30)

³⁸ 'Yaunchu tiniu armia nu ántichukaitrum: "Shuar máanikiar jĭi apujtukka niisha apujtuktiniaiti. Tura najĭ akarkasha ni najsha akarkatniuiti." ³⁹ Tura Wisha tá- jarme: Yajauch shuar taritraitrap. Antsu ame yapimin ijiutmamtai áatú yapimsha tsanĭkatkata. ⁴⁰ Tura pushirmin jurutramkitiaj tákuisha sakurmesha susata. ⁴¹ Tura káarkancha chikichik kirumitruk jurutkitia túramkui ámeke jimiara kirumitru ejeeta. ⁴² Seatmana nu susata. Ikiatmakuisha páchitsuk ikiasta.'

Nemasrĭ aneetniun Jesus unuiniamiania nu (Rúkas 6.27-28, 32-36)

⁴³ 'Núnisaŋ tiniu armia nu ántichukaitrum: "Ame shuarum aneeta tura nemasrumka kajerkata." ⁴⁴ Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura ya- jauch awajtamainiana nusha Yus áujtusarta.

⁴⁵ Atumsha nu túrakrum atumí Aparĭ nayaimpiniam pujana nu túrana áitkiasrumek túrarme. Iista, Yus ya- jauch shuarnumsha péŋker shuarnumsha tsáapin awajmatkiatsuk. Núnisaŋ yumincha yajauch shuar pu- juiniamunmasha péŋker shuar pujuiniamunmasha yú- tumtiktsuk. ⁴⁶ Aya atumin anenmainia nuke aneakme- sha ŷyaki akirmakat? Yajauch shuarsha nuna túrin áni- awai. ⁴⁷ Aya ame yatsumek shiir chichaakmeke ŷwarí péŋkerak túram? Yus-shuarchasha nuna túrin áni- awai. ⁴⁸ Nu asamtai atumí Aparĭ Yus nayaimpiniam pu- jana nuĭ métek ti péŋker átiniaitrume.'

Péŋker túratniun Jesus unuiniamiania nu

6 'Ashí íimiainiaĭn aya shuar iirsarti tusarum Yusna nu takasairap. Tu takaakrumniĭkia Yus Apa nayaimpiniam pujana nu penĭké akirmakchattarme.

² Nu asamtai shuar atsuma nu yayĭakmeke ashí shuar ujakairap. Anaŋkartin ainia nuka iruntainmasha tura pepru jintí wekasasha ashí íimiainiaĭn shiir túrajai tusar nuna túrin ániawai. Junasha "péŋker túrawai" tu enentáimturarti tiniu ásar Yus akíatsajĭn aya tu enen- táimturmajajĭn akinkiaruiti, nekas tajai. ³ Antsu átumka atsumainia nu yayĭakmeke penĭké úukam túrata. Chi- kichiksha nu yáinĭman nekaashti. ⁴ Úukam túrakminkia ame Apa Yus uukman wainia nu, nuna akirmaktatui.'

Yus áujsatniun Jesus unuiniamiania nu (Rúkas 11.2-4)

⁵ Atumsha Yus áujeakrumsha ántar chichamtin ainia núnis áujssairap. Nu shuarka iruntainmasha tura pepru

jintísha shuar iirsarti tusa wajakiar Yúsán áujin áini-awai. Nekasan tájarme, Yus akíatsaïn aya nu iismajain akinkiaruiti. ⁶ Tura ame Yus áujeakmekame ame kuárturmin wayam waiti epenim nuï amek ame Apa Yus áujsa-ta. Nuna ame Apa Yus yuka túramu waitma asa akirmaktatui.'

⁷ Yus áujeakmesha ánttram esaram áujsaip. Yúsán nékainiatsna nuka "Esaram áujeakuinkia Yus anturtuktatui" tu enentáimainiawai. ⁸ Niijiaï métek ajasairap. Átumka seatsrumniñ Yus Apa átum atsumamun nékawai. ⁹ Nu asamtai Yus áujkuram júnis títini-aitrume:

'Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. ¹⁰ Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisañ ju nuñkanmasha uminkiatí. ¹¹ Aparu, ii yurumkari ashí tsawant amasta. ¹² Tura winia nemasrun tsankurajna núnismek, Aparu, winia tunaaru tumashrísha tsankur-turta. ¹³ Tunáa wakeruktin tsankatrukaip. Antsu ashí tunaanumiñ uwemtikurta. Tuke ashí aents akupkam-niaitme. Núnisam Amesha tuke ti kakarmaitme. Tura ti shíiraitme. Tuma asakmin seajme. Nuke atí.'

¹⁴ Amesha chíkich shuar yajauch awajtamka nu tsankureakminkia Yus Apa nayaimpiniam pujana nu amincha tsankurtamprattawai. ¹⁵ Tura chíkich tsankureachkumniñkia Yus Apasha ame tunaarmincha tsankurtamprashtatui.'

Ijiamatniun pachis Jesus unuiniamiania nu

¹⁶ Ijiamarum Yus áujkurmesha wake mesekrum susuntrairap. Anankartin shuar chíkich shuar "ijiar-maiti" tu enentáimtursarti tusa tuma áiniawai. Nekasan tájame, Yúska akíatsaïn aya nujaï akikma áini-awai. ¹⁷ Antsu ámekame ijiarmamsha péñker temash-maram péñker jaupmitia. ¹⁸ Shuar ijiarmaiti tu enen-táimturmasaraïn. Aya Yus Apak nekaattawai. Tura asa akirmaktatui.'

Kuítian pachis Jesus unuiniamiania nu

(Rúkas 12.33-34)

¹⁹ Ju nuñkanmayá kuit ikiaunkatniujai nankaamas nayaimpiniam kuit ikiaunkata. Juñkia kayaa yúchakait tura mash meseatsuk. Tura kasasha wayá kasamtsuk. Antsu nayaimpinmanka kayaaasha yuatsui tura mash meseatsui tura kasasha wayá kasamtsui. ²¹ Kuítrum ana nuï enentáimtustatme. Tuma asam nayaimpiniam ikiaunkata.'

Ayashi tsáapnintrí

(Rúkas 11.34-36)

²² Ame jímijiaï tsáapin amiin wayamniaiti. Tuma asamtai ame jiiimi péñkeraitkiuñkia amiin tsáapin wayá tuke tsáapniiti. ²³ Antsu ame jiiimi yajauchitk-iuñkia tsáapin amiin wayachmin asamtai tuke kiritin átatui. Núnisañ yajauchia nu wakerakmekame péñkera

nu ame enentáimjin wayachmin asamtai tuke kirit ajastatui. Nu kiritcha imiá yajauchiti.'

Yussha kuitsha máimtek enentáimtuschaniaiti

(Rúkas 16.13)

²⁴ 'Shuar jimiara úuntrñ umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisañ átumka Yussha kuitcha máimtek enentáimtustin tujinkiat-tarme.'

Yus ni uchirín péñker wáinkiaiti

(Rúkas 12.22-31)

²⁵ Tuma asamtai tájarme: Wariniak yuataj wariniak umartaj tura wariniak entsartaj tusarum nuke enen-táimsairap. Yus iwiaaku átinian amasu asa yurumkan-cha amaschamniakait. Tura ju ayashniasha najana asa entsataincha amaschamniakait. ²⁶ Chikisha enentáim-pratarum. Yaki nanamainiak yurumkan arakmainiat-sui. Tura juuk yurumkan ikiuiniatsui. Tuma aiñ Yus Apa nayaimpiniam pujana nú Yusak áyureatsuk. Atumsha chiknia nú nankaamaschakaitrum. ²⁷ Nu arantcha ti enentáimkiumsha ¿nujaï tsakartatmek?'

²⁸ 'Nuikia ¿urukamtai entsartincha timiá enentáim-prum? Iistá, kukujsa takachuitiat tura najanchaitiat ²⁹ ti shíirmach áiniawai. Yaunchu uunt akupin Sarumún ti shiir iwiarmamniuitiat kukuja tímianchayayi. ³⁰ Iis, nupa yamá tsakaawai tura kashin aents tsupikiar jini-um epeenawai. Tuma aiñ Yus ti shiir áentseatsuk. Nuna tura asa atumniasha nú péñker waitmakchat-tawak. ¿Urukamtai Yus nekas enentáimtsatrum? ³¹ Ju nuñkanam ana nu pachikiairap. Chíkich shuar, Yúsán nékainiatsna nu, wariñ yuattaji wariñ umartataji wariñ entsartataji nuna ti pachiniawai. Tura atumsha tu enentáimsarum weerap. Ame Apa nayaimpiniam pu-jana nu ame atsumamurmin nékawai. ³³ Tuma asamtai Yusjaï shiir wekasatin tura Yus akupkamu ana nu umiktin emka enentáimsatarum. Túrakrumniñkia at-sumamurmin Yus suramsattawai. ³⁴ Kashin átatna nu-jaï itiurchat enentáimsairap. Kashinkia nusháa itiur-chatrijiaï tsawarchattawak. Yamái tsawanta jujaï máakchakait.'

Chíkich sumamtikiawairap

(Rúkas 6.37-38, 41-42)

7 'Chikicha tunaari ti enentáimtusairap. Núnisañ Yus atumí tunaari iirtamsashtatui. ² Chíkich wárik sumamtikiatin enentáimkiumniñkia Yus núnisañ sumamtikramattawai. Tura ame chikicha túramurj nekapmarmena nú nekapkajain amincha nekapmar-mattawai. ³ Tuma asamtai ¿itiurtsuk atumi jiiin numi enketna auk ítskesha atumi yachí jiiin tsuat enketusha iyarum? ⁴ Ame jiiimiin numi tuke enketajsha ¿itiurtsuk ame yatsumi jiiya tsuátan jurustajme tame? ⁵ Ántar shuará, ame yáintaj tákumka emka ame jiiimiin numi enketna nu jusata. Nuyá paant iistatme yatsumi jiiin tsuat enketna nu jurustin.'

⁶‘Ti shiira nuka yawá súsashtiniaiti. Nuna nakitrar amincha esatmichartimpiash. Kuítrumsha kuchi súsashtiniaiti. Aya najatrachartatuak.’

Yus seakmin suramsattawai

(Rúkas 11.9-13; 6.31)

⁷‘Yus seakrumin suramsattawai. Eḡakrumka wainkiat-tarme. “Winiajai” tákurmin awaintiamattarme. ⁸Seana núnaka suíniawai. Eḡana nuka wáiniui. “Winiajai” tuinia núnaka awḡiniawai.’

⁹‘Ame uchiram apatkun seatmakui ḡkayaash súsaintiam? ¹⁰Tura namakan seatmakui ḡnapíash súsaintiam? ¹¹Nuikia átum yajauchitirmesha atumi uchirí péñker ana nu tuke súuchakaitrum. Nuna naḡkaamas nuikia seakrumniḡkia atumi Aparí nayaimpiniam pu-jana nu péñker ana nuna suramsashtatuak.’

¹²‘Júnaka Muisaissha Yúsnan etserniusha akupe-nawai: “Chíkich ámin túrutatí tusa wakerakmekame sha núnismek túratá.” Tu akupenawai.’

Waḡkaram jintiasha tura yupikiach jintiasha

(Rúkas 13.24)

¹³‘Waḡkaram jintia awai. Wayatniusha yúpichuchiiti. Nujsha untsurí wáiniawai. Tura nusha meḡkatatnium jeawai. Túrasha chíkich jintia awai. Nusha yupikiach asa iturchataiti. Wayatniurjsha yupikchiiti. Nuḡ ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.’

Nerejaj numi nekaatainti

(Rúkas 6.43-44)

¹⁵‘Aneartarum. Wáitruiniak “Wi Yúsnan étserjai” tuinia nu írunui. Pátatek murikua áinis yúpichuch áiniawai tura ni enentáḡn nekas úunt-yawá áinis áiniawai. Pátatek shiir chichainiawai tura ni enentáḡn yajauch piakuiti. ¹⁶Atumsha túramujaj nin nekaatniuitrume. Naranmayá shuiya júukchamniaiti. ḡTsachiksha kush-ḡkiapen nerektatuak? ¹⁷Núnisaḡ péñker numia nu tuke péñkeran nereatsuk. Tura yajauch numia nu yajauchin nereatsuk. ¹⁸Péñker numi yajauchin nereatsui. Núnisaḡ yajauch numi péñkeran nereatsui. ¹⁹Yajauch numi ajakar tsupirar jinium apeashtinkiait. ²⁰Tuma asamtai wáittrin ainia nuka túramujaj nekanattawai.’

Ashikia Yus akupeana nuḡ jeachartatui

(Rúkas 13.25-27)

²¹‘Aya winia Apar nayaimpiniam pujana nuna wakeramurḡn umirin ainia nuke Yus akupeamunam pachinkartatui. Chíkichka “Uuntá, Uuntá” turutainiyat nayaimpiniam jeachartatui. ²²Amuukatin tsawant jeamtai untsurí turutiartatui “Uuntá, Uuntá, ame náaram pachisar ashí nuḡkanam etserkachmakaji. Ame náarmesha pachisar yajauch wancha jiiiki akupkamji. Tura ame náaram pachisar aentsti tujintiamu túramji” turutiartatui. ²³Nuḡ chichainiakui “Werumtarum. Peḡke nékachuitjarme. Aya yajauchitrume” títi-atjai.’

Péñker ukurma tura yajauch ukurma

(Rúkas 6.47-49; Márkus 1.22)

²⁴‘Shuar winia chichamprun antuk umirkaḡka nu shuar ti péñker enentáimniuiti. Niisha ju shuarjaj méteketete. Jeḡ jeamuk kayanam ukurmai. ²⁵Tura yumi ti yutuk entsa nujaḡkruamai tura nase ti kakaram umpuimiai. Túmaiḡ pukukachmai ni ukurmarḡ kayanam ukuamu asamtai. ²⁶Tura shuar winia chichamprun antuk umirtukchaḡka ju shuara núnisaḡ enentáimchaiti. Jeḡ jeamuk náikminiam ukurmai. ²⁷Tura yumi yutuk entsa nujaḡkruamai tura nase ti kakaram umpuimiai. Túmakui jeḡ mash saanaki iniaamai” tímiayi Jesus.

²⁸Jesus nuna tinia amukmatai ashí shuar ti enentáimprarmiyai. ²⁹“Yusa kakarmarijaj unuitiamtsujik. Israer-shuara jintinniurḡnkia núnis unuiniainiatsui” tiarmiayi.

Jesus tunamarun tsuarmiania nu

(Márkus 1.40-45; Rúkas 5.12-16)

8 Jesus muraya támatai untsurí shuar Nin nemariarmiyai. ²Nuḡ shuar tunamaru Jesusan jearin tikishmatramiyai. Tura tímiayi “Uuntá, wakerakmekatsuáramniaitme.”

³Tutai Jesus uwejajaj antiḡ “Wakerajai. Péñker ajasta” tímiayi. Tutai tunamaru ni tunamarmarḡ péñker ajasmiyai. ⁴Tura Jesus tímiayi “Pai, peḡké etserkaip. Áyatik Israer-patrḡ iniakmamsam Muisais timia nu susata ashí shuar nekaawarti tusam.”

Jesus suntara uchirḡn tsuarmiania nu

(Rúkas 7.1-10)

⁵Jesus Kapernáum péprunam wayḡmtai apachi suntara kapitántrḡ Nin tarimiyai. ⁶“Uuntá, tímiayi. Winia uchir tampemaru jeá tepes ti wait ajáa tepawai” tímiayi.

⁷Jesussha “Ayu, winin tsuartajai” tímiayi.

⁸Tutai kapitán tímiayi “Uuntá, Ame ti naḡkaamaku asam winia jeḡaruḡ wayḡchminiaitme. Áyatik “Péñker ajásti” tákumin winia uchir péñker ajatrustatui. ⁹Iista, winiasha akuptuiniatsuk tura wisha suntaran akupe-natsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umiawai.”

¹⁰Kapitán nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsán tímiatrus enentáimtin atsawai. ¹¹Maa, yajaya untsurí shuar Yus akupeana nuḡ jeawar Apraámjajsha Isakjajsha Jakupjajsha iruntrar yurumáwartatui. ¹²Tura Israer-shuar Yúsnum jeamnia áiniayat ḡḡ kiritniunam ajapnawartatui. Nuḡ ti úutin tura ti wáitsatin átatui.”

¹³Nuyá Jesus kapitánin chicharuk “Jeemḡin waketkitia. Nekas enentáimtusu asakmin uchiram péñker ajatramsattawai” tímiayi. Túramtai ni uchirḡ nu chichamtaik péñker ajatsamiayi.

Jesus Pitru tsatsarĭn tsuármiania nu
(Márkus 1.29-31; Rúkas 4.38-39)

¹⁴ Jesus Pitru jĕen we Pitru tsatsarĭn tsuemujajĭ jaa tepan wáinkiamiyai. ¹⁵ Tura ni uwejĕn antiĭmatai tsuemun michatramiayi. Tura nuwá nantakin ashí ajamsarmiayi.

Jesus untsurĭ jáinian tsuármiania nu
(Márkus 1.32-34; Rúkas 4.40-41)

¹⁶ Kashi ajasmatai yajauch wakantrukarun Jesusan itiariarmiayi. Tura nu yajauch wakanin chikichík chichamjajĭ chicharas jĭiki akupiarmiayi. Ashí jáiniancha tsuáarmiayi. ¹⁷ Yúsnan etserin Isayas "Ii pimpirmarĭncha ii sunĭkurĭncha jurutramkimiayi" yaunchu timia nu uminkiatu tusa nu túrunamiayi.

Jesus nemarsatin
(Rúkas 9.57-62)

¹⁸ Shuar untsurĭ Jesusan káutkarmatai "Entsa amain katiĭntai" tímiayi.

¹⁹ Nuĭ Israer-shuara jintinniurĭ Jesusan tarĭ tímiayi "Uuntá, Ámin páchitsuk nemarsatniun wakerajme."

²⁰ Tutai Jesus tímiayi "Kujanchmasha ni wáarĭn takaktsuk. Chiĭkisha pasuĭken takaktsuk. Tura Wi Yúsnumi-aitiatan tepestiniur atsawai."

²¹ Nin nemarniusha tímiayi "Uunta, emka winia aparun iwiarsan ikiuuttajai."

²² Tura Jesus "Nemartusta, tímiayi. Wakannium jaka ainia nu jakan iwiarsarti" tímiayi.

Nasĕsha entsasha Jesusan umirkarmiania nu
(Márkus 4.35-41; Rúkas 8.22-25)

²³ Nuyá Jesus ni unuiniamurĭjjajĭ uunt kanunam enĭkemámiayi. ²⁴ Nuĭ nasĕ ti kakaram umpuimtai antumiaĭ ti tamparintin ajasmiai. Tura entsa kanunam yaráná piákmiayi. Tuma aiĭ Jesus kanunam kanar tepemiayi. ²⁵ Nuyá ni unuiniamurĭ ĭurashim Jesusan ish-intiarar tiarmiayi "Uuntá, wayajĭ. Kakaram ajachkum-ĭnĭkia jakattajai."

²⁶ Jesus tímiayi "ĭUrukamtai timiá ashamarum, Yus enentáimtutskesha?" Nuyá wajaki nasĕncha entsancha chicharkamiayi. Tutai mash miaaku ajasmiai. ²⁷ Nuna ísar ni unuiniamurĭ ti enentáimsarmiayi. Tura tiarmiayi "Jusha ĭwarĭ áentsuit? Nasĕsha entsasha Nin umirainiatsuk" tiarmiayi.

Jatara nuĭkanam Jesus yajauch wakantrukun tsuármiania nu
(Márkus 5.1-20; Rúkas 8.26-39)

²⁸ Nuyá Jesus entsá amaini katiĭ Jatara nuĭkanam jeamiayi. Nuĭ jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen áarmiayi. Tuma asamtai shuar nu jintianam naĭkaamachu áarmiayi. ²⁹ Niisha Jesusan wáinkiar kakantar tiarmiayi "ĭWarĭ pujuram iijjajĭ, Jesusá, Yusa Uchirĭja. Tsawant jeatsajĭ in amukratkataj

tusamek taum?" tiarmiayi. ³⁰ Nuĭ arant kuchi untsurĭ shushuĭmak yujaarmiayi. ³¹ Yajauch wakancha Jesusan seainiak "Jĭiki akupkartakmeke kuchĭniam wayatĭn tsanĭkatkartukta" tiarmiayi.

³² Tutai Jesus "Pai, wetarum' tímiayi. Yajauch wakancha shuara enentáiyá jĭinkiar kuchiniam enĭkemáwarmiayi. Túramtai kuchi wáurkiar arau ut-sanamiayi. Nuyá entsá iniaĭkar jakerarmiayi.

³³ Kuchĭ wáinniusha nuna ashamkar péprunam tseke wéarmiayi. Nuĭ jeawar ashí túrunamun etserkarmiayi. Yajauch wakantrukun péĭker ajasmancha etserkarmiayi. ³⁴ Nuyá ashí nú peprunmayá shuar Jesusan ĭnĭkiuntai tusar ashinkiararmiayi. Tura ĭnĭkiuntai ni nuĭkeyá waketkiti tusar seawarmiayi.

Jesus emearun tsuármiania nu
(Márkus 2.1-12; Rúkas 5.17-26)

9 Nuyá Jesus kanunam enĭkemar antumiaĭ amaini katiĭmiayi. Tura nuĭ ni péprurĭn Kapernáumnum jeamiayi. ² Nuĭ jeamtai shuar emearu jaan patak yanakin ejeetiarmiayi. "Tsuártatui" nekas tu enentáimtuinia ásarmatai Jesus jaan tímiayi "Uchirĭ, kakaram ajasta. Ashí ame tunaarum tsanĭkuramuiti."

³ Takui Israer-shuara jintinniurĭ yajauch enentáimprar "Juka Yúsni ti yajauch chicharui" tiarmiayi.

⁴ Tu enentáimainian Jesus nekáa tiarmiayi "ĭUrukamtai imiá yajauch enentáimprum. ⁵ Tua imiá yúpchuchit. Shuara tunaarĭn tsanĭkuratin yúpchuchikiai. Tura emearun "Nantakim wekasata" títin yúpchuchikiai? ⁶ Wi Aents Ajasua núchakaitaj. Ju nuĭkanam Wi tunaan asakátratniuitjai. Wátsek, nu nekaatarum tusan juna iniakmastatjai." Nuna tinia emearun "Wajaktia, tepetairam jukim jeĕmĭin wetá" tímiayi. ⁷ Tutai emearu tsuámar nantaki ni jĕen wémiayi. ⁸ Tura nuna ashí aents wáinkiar Yus kakarman shuáran susa asamtai ashamkar Yúsni shiir enentáimtusarmiayi.

Jesus nemartusat tusa Mateun achíawai
(Márkus 2.13-17; Rúkas 5.27-32)

⁹ Nuyá Jesus wémiayi. Nuĭ wesa Mateun kuit júutainium pujan wáiniak "Nemartusta" tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jĕen yurumuk pujajĭ yajauch armia nu Israer-shuar untsurĭ káunkar Jesusa unuiniamurĭjjajĭ irunar yurumiarmiayi. ¹¹ Pariséusha nuna ísar Jesusa unuiniamurĭn aniasarmiayi "ĭUrukamtia atumí Uuntrĭ kuitia achinĭjaĭsha tunaarinniujajĭsha irunar yuruma?"

¹² Tura Jesus nuna antuk tímiayi "Péĭker ainia nuka tsuákratniun atsumainiatsui. Antsu jainia nu tsuákratniun atsumainiawai. ¹³ Werum ju aarma unuimiumtarum:

"Murik maam Winia surusum nuĭjajĭ "máakete" tátsujajĭ. Antsu waitnenĭkartutain wakerajajĭ," Yus-Papinium tu áarmaiti.

Wikia "péĭkeraitjai" tuínian untsuktaj tusan táchaitjai. Antsu tunáa shuar ni enentáin yapajĭáwarat tusan táwitjai" tímiayi.

Ijiarmatniun Jesusan aniasarmiania nu

(Márkus 2.18-22; Rúkas 5.33-39)

¹⁴ Nuyá imiakratin Juan̄ka unuiniamur̄i Jesusan tariar aniasarmiayi. “¿Urukamtai iikia tura Pariséusha ijiarmaji tura ame unuiniamurmeka ijiarmainiatsu?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ζajakra uutu wayamniakait? Yamái-nuatu pujakui úutchamin ániawai. Núnisañ Wi pujakui ijiarmashtin ániawai. Tura tsawant jeattawai nuatua áintsan Wi junaktatjai. Antsu nuj̄kia ijiarmawartatui’ tímiayi.

¹⁶ Mamuru pushí jaanakmatai yamaram tarach anuj-tukchatniuiti. Túramka nijiam yamaram tarach sumpeak mamushan chin̄kiá nuna nan̄kaamas jaaktatui.

¹⁷ Nijiamanch yamáí nawar nuap najanamun arutnum yaraachminiai. Túramka karíak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniati. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai péñker ártatui.”

Jesus Jairu nawantrin̄cha tura chíkich nuwan̄cha tsuármaniania nu

(Márkus 5.21-43; Rúkas 8.40-56)

¹⁸ Jesus nuna taj̄i Israer-shuara uuntri Jesusan tarí tikishmatar tímiayi “Winia nawantur jarutkayi, tura Ame winim ewejmij̄i antinrukakminkia ataksha nantaktiatui.” ¹⁹ Tutai Jesus ni unuiniamur̄ij̄i wajakiar nij̄i wearmiayi.

²⁰ Tura jintiá weenaj̄ nuw̄ tuse (12) uwitin numpá ajapeak wáitias pujú asa Jesusa ukurin̄i amainian̄ ni pushir̄in̄ antin̄miayi. ²¹ “Áyatik ni pushir̄in̄ antin̄naka péñker ajastatjai” tu enentaimpramiayi. ²² Nuna nekáa Jesus ayantar nuwan̄ tímiayi “Shiir enentáimprata, nawantru. Yus shiir enentáimtusú asam péñker ajasume.” Nu chichamtaik ni jáamur̄i péñker ajasmiayi.

²³ Nuyá Jesus uunta j̄eñ jeamiayi. Tura nuj̄i charaatum ajainiancha tura jakan iwiansatai tusar péeman umpuianiancha wáiniak ²⁴ tímiayi “Aa j̄in̄tratarum. Nuw̄achikia jákachai antsu aya kanarai.” Péñké jakan nekayat túratta nuna neka asa “aya kanarai” tímiayi. Takui aents Nin wishikrarmiayi. ²⁵ Tura nuna ashí j̄iir Jesus jeá wayá nuw̄achin̄ uwejun̄um achik iniantkimiai. Túram nantakmiayi. ²⁶ Nu túramu ashí nu nun̄kanam etsernarmiayi.

Jesus kusurun jímíaran tsuármaniania nu

²⁷ Nuyá Jesus wéakui jimíará shuar j̄i kusuru untsumki weriarmiayi. “Uuntá, ii Uuntri Tawit ame weatrum asamtai in waitneñkarturta” tiarmiayi. ²⁸ Jesus jeá wayamtai j̄i kusuru tariarmiayi.

Tura Jesus aniasar “¿Juna túramniai túrutrumek?” tímiayi.

Niisha “Ee, Uunta” tiarmiayi.

²⁹ Tuíniakui Jesus ni j̄in̄ antinkiar tímiayi “Átum nekas enentáimtarmena núnisañ túrunati.” ³⁰ Nuj̄aj̄ j̄i péñker ajasarmiayi. Nuyá Jesus “Etserkairap. Shuar péñké nekáwaraj̄in̄” tímiayi. ³¹ Támaitiat j̄in̄kiar Jesus túramun ashí nu nun̄kanam etserkarmiayi.

Jesus chichachun péñker awajsamiania nu

³² Nuyá wenaj̄ shuar yajauch wakantru chichachun Jesusan itiararmiayi. ³³ Tura Jesus yajauch wakanin̄ j̄iiki awemamtai nu chichachu chichakmiayi. Ashí nuna íisar ti enentáimprarmiayi. Tura tiarmiayi “Yáunchusha Israer nun̄kanam juj̄aj̄ métek túramu péñké atsuwiti.” ³⁴ Antsu Pariséuka yajauch enentáimtuiniak tiarmiayi “Nu shuar iwianchi uuntri kakarmar̄ij̄i yajauch wakanin̄ j̄iiki akupeawai.”

Jesus shuaran waitnentawai

³⁵ Jesus ashí péprunam we ni iruntair̄in̄ wayá “Yus akupeana nuj̄ en̄kemátarum” tu etsermiayi. Tura ashí náñkamas sun̄kurj̄aj̄ jáiniancha tsuármiayi. ³⁶ Shuaran íisar murik wáinchatia núnis pimpikiar tura kúntuts pujuinia asamtai waitnentrarmiayi. ³⁷ Nuyá ni unuiniamur̄in̄ tímiayi “J̄u aents Yus-Chicham ujaktiniat̄i Yus-shuar ajasarat tusar. Nu takat ti núkap awai tura takarin ishichik ániawai. Nu takatka júuktinia áintsan̄kete. Júuktin̄ tsawant jeamtai takau táasmatai takamtikin̄ ujaktin̄ átsuk takaun akupkat tusa. Atumsha núnisrumek Yus seatarum ni shuarin̄ akupak áentsun júukarat tusarum.”

Jesus tuse (12) unuiniamur̄in̄ achikmiayi tuke nemarsatniun

(Márkus 3.13-19; Rúkas 6.12-16)

10 Nuyá Jesus tuse (12) unuiniamur̄in̄ achik Yusa kakarmar̄in̄ súsarimiayi yajauch wakanin̄ shuara enentáiȳa j̄iiki akupkatniun. Núnisañ ashí sun̄kurj̄aj̄ jáinian tsuárartinian susamiayi.

² J̄u ániawai Jesus tuse (12) unuiniamur̄in̄ achikiarmia nu: Emka Semun̄ núnisañ Pitru náartiniuyayi. Nuyá ni yach̄i Antres. Nuyá nuámtak yáchintin̄ Jakupusha Juan̄sha, Sepetéu uchir̄í armia nu. ³ Nuyá Jiripi, Parturumí, Tumas, Mateu. Mateusha kuítian achiniuyayi. Arpeu uchir̄í Jakupusha. Ripiu núnisañ Tateu náartiniuyayi. ⁴ Ásump̄i Semun̄sha nuyá Jútas Iskariúti Jesusan ukunam surukmia nu. Nu tuse (12) achikma ármiayi.

Jesus ni unuiniamur̄in̄ etserkarti tusa akupkarmiania nu

(Márkus 6.7-13; Rúkas 9.1-6)

⁵ Nu tuse (12) unuiniamur̄in̄ Jesus júnis chicharak akupkarmiayi. “Israer-shuarcha matsatmanum weerap. Samaria nun̄kanam péprunam weerap. ⁶ Antsu Israer-shuar murikiua áinis Yusaj̄iȳa wáakaru ainia nu weritiarum. ⁷ “Tsawant ishichik ajasai Yus jú nun̄kanam akupin̄ ajastin̄” tu etserki wetarum. ⁸ Tunamarusha chíkich sun̄kurj̄aj̄ jainia nusha tsuartarum. Jakasha ini-

antkitiarum. Yajauch wakancha shuara enentáiya jiiiki awematarum. Nu túratin kuítchajai kakaram susamuitrume, tuma asamtai atumsha ashí ánrarmek túratarum.'

⁹ 'Kurisha ashí kuitcha jukiirap. ¹⁰ Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajam-pramsartin ániawai.'

¹¹ 'Péprunam jearmesha péñker shuar wáinkiarum nuí wayarum tuke nuí pujustarum. ¹² Nu jeanam wayamsha "Ju jea shiir atí" titiá. ¹³ Nekas péñker shuaraitkiunka shiir ajasarti. Antsu nu shuar péñker itiarumachkuñka shiir ajascharti. ¹⁴ Tura náñkamsañ atumin awáintiamainiachkuñkia anturtamainiachkuñkia nuyá jíinkitiarum. Nu shuar yajauch ásar-matai jíinkirum atumí naweyá nuñka japimiarum ikiuktiarum. Ni tunaari aents nekaawarat tusarum túratarum. ¹⁵ Nu shuaran nekapsatin tsawant jeamtai Yus asutiáshtatuak. Sutum péprunmayá shuara nañkaamas Kumura péprunmayá shuarnasha nañkaamas Yus asutiáttawai nu shuaran' tímiayi.

Yajauch awajsatniun ujakmiania nu

¹⁶ 'Aneartarum. Wisha murik yawanum akupkatniua áintsanak akupeajrume. Tuma asamtai shiir nawamkartin áyatrúm aneartarum. ¹⁷ Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui. ¹⁸ Wíi shuar asakrumin uuntnumsha tura nuyá akupniunmasha juramkiartatui. Núnisrum akupniunmasha tura Israer-shuarchancha winia chichamur ujaktrume. ¹⁹ Tura akupniunam surutmakakrumnisha wariniak títiáj tu enentáimprairap. Nuí uuntjai chichaakrumin Yus títinian jintintramatarme. ²⁰ Nuñkia átum enentáimmiájai chichaschartarme antsu atumí Aparí Yusa Wakaní atumin chichamtikramsattarme.'

²¹ 'Shuar ni yachincha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui. ²² Tura Wíi shuar asakrumin mash mujramkartatui. Tura tuke katsuntea nu uwemprattawai. ²³ Chikichik péprunam yajauch awajtamainiakui chíkich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashi ujatsrumniñ wantinkiatattajai.'

²⁴ 'Unuiniamuka nin unuiniama nuna nañkaamaschaiti. Takarniusha ni uuntriñ nañkaamaschaiti. ²⁵ Unuiniamuka nin unuiniama nujai métek ajaska maak. Takarniusha ni úuntriñ "Iwianchi uuntri" túrutainiakui atumniasha nuna nañkaamas yajauch turamtatui.'

Yúsak ashamkatniuiti

(Rúkas 12.2-9)

²⁶ 'Tuma asamtai aentska ashamkairap. Ashí yúkma nu paant nekanattawai. ²⁷ Ishishmasan kiritniunam ujaajrumna nu, tsawáj kakantrarum etserkatarum. ²⁸ Aya ayáshin main ainia nu ashamkairap. Wakanin

máachmin ániawai. Antsu wakanniasha ayashniasha mai jiniun emesramnia asamtai Yus ashamkatarum.'

²⁹ 'Jimiará chiniki péñké ishichik kuitjai surukmin ániawai. Túmaitiat Yus tsankateachkuñkia nuñká jaka iniainiatsui. ³⁰ Ame intiashmisha mash nekapmarmaiti. ³¹ Nu asamtai jákatin ashamkairap. Yusjai átumka ti untsurí chinikijai nañkaamas péñkerchakaitrum.'

Jesus natsantrashtiniati

(Rúkas 12.8-9)

³² 'Ashí shuar ashí íimiainiañ Winia natsantruiniatsna núnaka Winia Apar yakí nayaimpiniam pujana nuí natsantrashtatjai. ³³ Antsu shuar íimiainiañ Winia natsantra núnaka Wisha yakí nayaimpiniam winia Apar pujana nuí natsantrattajai.'

Jesusa chichamejai shuar akannartatui

(Rúkas 12.51-53; 14.26-27)

³⁴ 'Ashí shuar nawamnaikar shiir pujusarat tusan ju nuñkanam táchaitjai. Nuna túrat tusarum enentáimturairap. Antsu wi tamaajai shuar péñker ajasarmatai yajauch shuar nin nakitrattatui. ³⁵ Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai. ³⁶ Tuma asa shuar ni shuarijjai nemasrintin ártatui.'

³⁷ 'Shuar ni aparíncha nukuríncha Wijjai nañkaamas aneakka Wíi shuar áchamniaiti. Núnisañ ni uchiríncha nawantríncha nañkaamas aneakka Wíi shuar áchamniaiti. ³⁸ Tura ashí wáitsatniun surimiatsuk ni krúsrín yanaki jukí nemartachkuñka Wíi shuar áchamniaiti. ³⁹ Aya jú nuñkanam péñker pujustaj tana nu ni iwiaakmarín emesrattawai. Tura Winia anentu asa ju nuñkanam péñker pujustinian páchiatsna nu tuke shiir pujustatui.'

Akinkiatin

(Márkus 9.41)

⁴⁰ 'Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai. ⁴¹ Yúsnan etserniuncha Yúsnumiá winiá asamtai itiaakka etserin akínkiáttana nujai métek akínkiáttawai. Péñker shuarnasha péñker asamtai itiaakka péñker shuar akínkiáttana nujai métek akínkiáttawai niisha. ⁴² Uchincha Wíi shuar asamtai entsá michan shikirak súsanika imiá nekash nusha akínkiáttawai." Tu tímiayi Jesus.

Imiakratin Juan Jesusai shuaran akupkamiania nu

(Rúkas 7.18-35)

11 Tura tuse (12) unuiniamurín Jesus tinia akupkar Niisha nú nuñka péprunam we Yus-Chichaman jintiák etserkamiayi.

² Tura Juan sepunam enkemas Kristu túramun antukmiayi. Antuk ni unuiniamurín jíimiaran Jesusai akupkamiayi. ³ Tura Jesusan aniasarmiayi "¿Nekas ame Kristu Yus akupkamu tátinia nukaitiam. Kame chikichak nákastataj?"

⁴ Tutai Jesus tímiayi "Waketkirum ashí ántarmena nusha wáintrumna nusha Juan ujaktarum. ⁵ Kusurusha

wáinmainiawai. Shutuapsha wekainiawai. Tuna-marusha péñker ajainiawai. Empekarusha ántuiniawai. Jákarusha nantainiawai. Tura kuítrinchamasha uwempratin chicham ujakmaiti. Nu ujaktarum.

⁶ Túrasha yawętsuk Winia tuke shiir enentáimturna nú shuar shiir átatui." Jesus nuna tutai waketkiarmiayi.

⁷ Waketkiarmatai shuar káunkarun Jesus Juánkan pachis áujmatmiayi. "Shuar atsamunmasha ¿warí werimiarum? Pintiu nase umpúam atúu we juní we ajana nuka ¿íistai tusarumek wémarum? Kame Juanikka nú shuarchaiti. ⁸ Nuikia ¿warí werimiarum. Shuar péñker iwiarmampra íistai tusarmek wémarum? Warí, péñker iwiarmampraka uunta jęen pujuiniatsuk. ⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juanikka yaunchu etserniu nankaamas enentáimtustiniaiti. ¹⁰ Yaunchu Yus-Papini-um áarmaiti:

"Winia akatramurun amiini emka akupeajai ame jintimin iwiarat tusa."

Juan nu akatramuiti. ¹¹ Nekasan tájarme, shuar imiakratin Juanjají nankaamas uunt atsuwiti. Tuma aiñ Yus akupeamunam pachiinia nu shuarnaka, nekasmianchancha, Juanjají nankaamas shiir enentáimtustiniaiti. Tuma asamtai nuñ pachiinkiatin enentáimpratarum.'

¹² "Kakaram shuarka imiakratin Juan támia nú tsawantnumiá Yus akupeamunam ti pachiinkiatniun wakeruiniak kakarmajají pachiinkiatniun enentáimiaiiniawai. ¹³ Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi. ¹⁴ Yaunchu Yúsnan etserin "Kristu táatsajñ Erías tátiniaiti" tímiayi. Tura nekaatin wakerakrumka Juan nu Eríasaiti. ¹⁵ Antuktin jeakrumka nekaatarum.'

¹⁶ 'Ju áentsnasha ¿warijají métek nakumkataj? Uchijají métek áiniawai. Ni aijjají iruntrar nakurustaj táyatan tuíniawai ¹⁷ "Námpera áinis nakurustaitsar peem umpuarji túrasha jantsemáchurme. Nuyá iwiansatniua áinis nakurustaitsar íwiareakur kantamtai kantamáji túrasha átum úutcharme." ¹⁸ Atumsha núnisaitrume. Kame Juan núkap yurumtsuk nijiamchinchá úmutsuk wekaimiayi. Túmakui átumka "Yajauch wakantrukuíti" tímiarme. ¹⁹ Nuyá Wisha Aents Ajasu támajai. Tura yurumeakui tura úmakui "Ti yurumin ti nampenaiti. Ashí yajauch shuaran amikrinti" túrutrume. Wátsek, wi túramujají Yus nekas nékamu nekanattawai."

Yajauch péprunmayá shuaran chicharkamiania nu

(Rúkas 10.13-15)

²⁰ Nuyá tujintiamun túramiania nú peprunmayá shuaran pachis Jesus chicharkamiayi. Tuma aiñ nuyá shuar ni enentáin yapajjácharu asamtai juná chicharkamiayi.

²¹ "Wáinkiatá, Kurasín péprunmayátiram, Petsaitia péprunmayátirmesha. Nuñ aents tujintiamun ti túraitjai. Tiru péprunmasha Setuñ péprunmasha nu tujintiamu túramuitkiuinquia yaunchu ni enentáin yapajjáwarajayi. Túrawar kúntuts pujutai pushín entsarar yuñkunim ajakiarajayi. ²² Tura Wisha tájarme, nekapsatin tsawant jeamtai Yus atumin tí asuttiamattarme. Tirunmayá shuaran nankaamas tura Setuñnumiá shuaran nankaamas asuttiamattarme.'

²³ Tura atumsha Kapernáum péprunmayátirmesha, ashí nankaamas nankaamantu ajastin enentáimtumarme. Antsu ashí emestampartatui. Atumjijn aents tujintiamun ti túraitjai. Sutuma péprunam nu tujintiamu túramuitkiuinquia nu pepru yamaisha tuke ajayi.

²⁴ Tura Wisha tájarme, nekapsatin tsawant jeamtai Yus Sutumanmayá shuar nankaamas atumin asuttiamattarme."

"Winin ayampratarum" tímiania nu

(Rúkas 10.21-22)

²⁵ Nuyá Jesus tímiayi "Shiir enentáimtajme, Aparu, ashí nayaimpisha nuñkasha Úuntrinme. Tuma asam Ame túram nu ti unuimiaru enentáimtumainia nuyá úyukuitme antsu uchichia áinis nankaamantu enentáimtumainiatsna nú shuar paant awajtusuitme.

²⁶ Ame, Aparu, núnis wakera asam túraitme.'

²⁷ 'Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. ²⁸ Ashí pimpikniutirmesha itiurchat pujarmena nusha Winí winitiarum. Túrakrumniñkia ayamtikrattajrume. ²⁹ Wi kajechu asan tura péejchach enentáimin asamtai Winí winirum unuimiaratarum. Winia chichamur ántakrum umiákrumniñkia atumí wakaní ayamprattawai. ³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti" tímiayi Jesus.

Jesusa unuiniamurí ayampratin tsawantaj trikiu neren pakaarmiania nu

(Márkus 2.23-28; Rúkas 6.1-5)

12 Nuyá Jesus ayampratin tsawantaj ajanman ajapeniñ nankaamamiayi. Ni unuiniamurjsha tsukarar trikiu neren majusar yukí wekasarmiayi.

² Paríséu shuarsha nuna wáinkiar Jesusan aniasarmiayi "Iista, ame unuiniamuram ayampratin tsawantaj túratin surimkiamua nuna túruiniawai."

³ Tutai Jesus tímiayi "Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Yusa Uunt Jęen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemarjñ ana nunasha suritkiamuyayi. Túmaiñ yúawarmiayi. ⁵ Muisais akupkamunam aarma nu áujszakukaitrum. Israer-patrikia ayampratin tsawantaj takainiayatan nusha tunaachuiti. ⁶ Nekas tájarme, yamá Yusa Jęen enentáimtustinia nuna nankaamas Wíniaka Aents Ajasuitjiana nu, nekas enentáimtursatniuitrume. ⁷ Yus-Papinium tawai:

"Murik maam Winia surusum nuñaj "maakete" tátsujai. Antsu waitneñkartutain wakerajai." Nu chicham nekas nékaitkiurmeka yamá túrarmena núnisrum tunáa túrachu ánrarum súmamtikiachain-

trume. ⁸ Wi Aents Ajasu asan ayampratin tsawantan Úuntrintjai."

Shuara uwejé jakan Jesus tsuármiania nu
(Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi. ¹⁰ Nu j shuar ámiayi ni uwejé jaka. Tura Jesusan ántar nekapsatai tusa wakeruinia ásar aniiniak "¿Ayampratin tsawantaj jaa shuar tsuarminkiait?" tiarmiayi. ¹¹ Tutai Jesus tímiayi "Atumsha atumí murikrí ayampratin tsawantaj wáanam akaiki iniamtai jusatai tusarum wéchainrupash. ¹² Antsu shuarka murikjaj nankaamaschakait. Tuma asamtai ayampratin tsawantajsha péñker ana nu túramniaiti." ¹³ Tinia iniais áishmankan uwejé jakan tímiayi "Uwejém takuitia." Tutai uwejé takuí chíkich uwejéjaj métek péñker ajasmiai. ¹⁴ Nuna túramtai Pariséu shuarsha áá jíinkiar Jesus itiurak máawaintiaji tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jíinkimiayi tura wéakui untsurí shuar nemariarmiayi. Untsurí jáiniancha tsuámiayi. ¹⁶ Tsuar "etserkairap" tinia akupiararmiayi. ¹⁷ Yaunchu Yúsnan etserin Isayas tímia nu uminkiaiti tusa túrunamiayi. Niisha juna áarmiayi: ¹⁸ "Júiti Wi achikmaj nu. Niisha Wi tájana nuna umin asamtai ti aneakun Niijaj waraajai. Winia Wakantru kakarmarin takamtsuk susattajai. Túramtai winia uwempratin chichamprun ashí Israercha nuñkanmasha etserkattawai. ¹⁹ Jiakchattawai tura kakaram chichaschattawai. Winia anturtukarat tusa péprunam weak untsukchartatui. ²⁰ Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisañ shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui. ²¹ Tura Israer-shuarchasha Nin nekas enentáimtusartatui."

Jesusan "iwianchi uuntri kakarmarijaj túrawai" tiarmiania nu
(Márkus 3.19-30; Rúkas 11.14-23; 12.10)

²² Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant íimsamiayi tura chichakmiayi. ²³ Nuna wáinkiar shuar shiir enentáimprartiararmiayi "¿Tawitia uchirí pampañku iniañnamu uwemtikkiartin tátinia nuáshit?" ²⁴ Tura Pariséu shuarsha nuna antukar yajauch enentáimtuiniak tiarmiayi "Juka iwianchi kapitántrin Pirsepún umirniuiti. Tuma asa nuna kakarmarijaj yajauch wakanin jiiaki akupeawai." ²⁵ Jesus tu enentáimainian neka asa tímiayi "Nú nuñkanmayá shuar nuamtak kajernaiyakuñkia nú nuñka wari meserchattawak. Núnisañ nuamtak shuar ní shuarjaj mánainiakka amunaikchartatuak. ²⁶ Núnisañ íwianch nuamtak jiiaki akupnainiakka máanaikiar wárik amuukashatuak. ²⁷ Kame Wi Pirsepú

iwianchi kakarmarijaj iwianchin jiiaki akupeakuñkia atumí uchirísha ¿yana kakarmarijajin jiiaki akupena? Ni túramarijaj átum awajirma nekamaratum. ²⁸ Wi Yusa Wakaní kakarmarijaj yajauch wakanin jiiaki akupea asamtai atumsha Yusa akupeamurí atumíin jeartamar-mena nu nekaatniuitrume."

²⁹ Tista. Shuar kakaram shuara kuítrin kasarkatin wakerakka emka kakarman jinkia aya túran ni jeeñ wayá kasarkamniaiti. Wi iwianchin jíikmiajaj uunt iwianch nupetkamua nu nekaamniaiti.'

³⁰ "Wijaj tsanin pujatsna nuka winia nemasruiti. Núnisañ Winia yáintsuna nu aya itiurchat nájateawai.'

³¹ Tuma asamtai tájarme, Ashí shuar tunáa túruinia nusha yajauch chichainia nusha tsanukuratin awai. Antsu Yusa Wakanin yajauch chicharin ainia nuka tsanukurashiniaiti. ³² Winiasha Aents Ajasuitjiana nuna yajauch chichartuinia nú shuarsha tsanukuramniaiti. Tura Yusa Wakanin yajauch áujmatainia nuka penké tsanukurachminiaiti. Ju nuñkanmasha tura ukunmasha tsanukurnarchattawai' tímiayi.

Ni nerejaj numi nekaamniaiti
(Rúkas 6.43-45)

³³ Yutai numi péñkeran nereawai. Tseas numisha yajauchin nereawai. Ni nerejaj numi nekaamniaiti. Núniskete atumjaj. ³⁴ Tseas wenunniutirmesha, ¿atumsha itiurak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti. ³⁵ Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. ³⁶ Tura Wisha tájarme, nekapsatin tsawant jeamtai ashí enentáimtsuk chichakma nuna Yúsan paant ujakartatui. ³⁷ Iis, ame chichammijaj nekanattarme. Péñker chichakuitkiumka sumamashtatme. Tura péñker chichakchaitkiumka sumamattame."

Nu shuar yajauch ásar iniakmamun seawarmiania nu
(Márkus 8.12; Rúkas 11.29-32)

³⁸ Pariséu shuarsha Israer-shuara jintinniurísha Jesusan chicharuk "Uuntá, ame Yúsaiyáitjai tusam nayaimpinmayá kakarmajaj iniakmamú túrata, iisha wáinkiatái" tiarmiayi.

³⁹ Tutai Jesus tímiayi "Shuar yajauch tura Yúsan enentáimtachu ásar nayaimpinmayá iniakmamun seainiawai. Tuma asamtai, áyatik yaunchu Junas túrunamu iniakmastiniaiti. ⁴⁰ Junas menaintiu kashi menaintiu tsawantcha namaka ampujén enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nuñká jakan tepestatjai. ⁴¹ Junás Níniwi péprunmayá shuaran Yus-Chichaman Yusekterkamtai nu shuar ni tunaarin enentáimtusar ni enentáin yapa-jíawarmiayi. Tura jui yamáí Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmayá shuar juyá shuaran súmamtekiawartatui.'

⁴² "Yaunchu nuwá yajayá shuaran uunt akupniuriyayi. Nu nuwá Sarumún ti neka asamtai nin anturkataj tusa

tarimiayi. Tura juj yamá Sarumúnjaj naŋkaamas an-turkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran sú-mamtikiawartatui' tímiayi.

Yajauch wakan jiki akupkamuitiat wáketna nu
(Rúkas 11.24-26)

⁴³ Shuara enentáiyá yajauch wakan jíinkin yumi penké yútatsna nu wéawai. Tura nu penker pujustin-ian wáinkich ataksha waketkitniun enentáimui. ⁴⁴ "Wí jíinkimij nu waketkittijai" tawai. Tura waketki shuara enentáin penker iwiamu tura ankantán wáiniak ⁴⁵ ni aín siati (7) iwianchin níijjaj naŋkaamas yajauchin itia shuara enentáin enkemáwartatui. Túrunamtai nu shuar nuiki nuna naŋkaamas yajauch ajastatui. Núnisan juyá shuar túrunawartatui" tímiayi Jesus.

Jesusa yachí, Jesusa nukurí
(Márkus 3.31-35; Rúkas 8.19-21)

⁴⁶ Jesus nu shuarjaj tuke chichaak pujaj ni nukurísha ni yachísha tariarmiayi. Tura aa wajasar Níijjaj chichastaj tiarmiayi. ⁴⁷ Túramtai Jesusan ujakar "Ame nukusha yatsumsha aa wajasar chichastaj turamainiawai" tiarmiayi.

⁴⁸ Chichaman ujakmia nuna Jesus tímiayi "¿Ya ainia winia nukursha winia yatsursha?" ⁴⁹ Nuyá ni unuiniamurín iniakmas tímiayi "Ju ániawai winia nukur tura winia yatsursha. ⁵⁰ Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur ániawai" tímiayi.

Untsurí métek-taku chichamjaj Jesus unuiniamiania nu

(1) Atsaamin atsaampramiayi
(Márkus 4.1-9; Rúkas 8.4-8)

13 Nu tsawantaj Jesus ni jeeyá jíinkin antumianka kánmatkarín pujusmiayi. ² Tura ti untsurí shuar káunkarmatai kanunam enkemar nu pujusmiayi. Shuarsha antumianka kánmatkarín pujusarmiayi. ³ Túrunawarmatai untsurí métek-taku chichamjaj unuiniamiayi. "Atsaamin atsaamprataj tusa jíinkimiai, tímiayi. ⁴ Atsaamki wesa arakrí jintia písunmasha ini-aarmai. Tura chiniki tariar yuawarmai. ⁵ Chikichcha kaya írunmanum iniaarmai. Nuŋka ishichik asamtai wárik tsapainiarmai. ⁶ Tura nantu etsantramtai penker kankáprúcharu asa sukuam káararmai. ⁷ Chikichcha janjí nupanam iniaarmai. Tura janjí wárik tsakar nupetak ajakramai. ⁸ Chikichcha penker nuŋkanam ini-aarmai. Nusha penker nerekar chikich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. ⁹ Kuishim ákuinikia antuktaram" tímiayi.

"¿Urukamtai aya métek-taku chichamjaj jintiam?" ani-asarmiania nu

(Márkus 4.10-12; Rúkas 8.9-10)

¹⁰ Nuyá ni unuiniamurín Jesusan taruntar aniiniak "¿Urukamtai aya métek-taku chichamjaj ju shuar unuiniam?" tiarmiayi.

¹¹ Tutai Jesus tímiayi "Urukuk ju nuŋkanam Yus akupin ati, nuka yaunchu nekanachmiayi. Tura ya-maikia Yus ashí nuna atumin paant iniakturmawai. Antsu chikich nuna nekaachmin ániawai. ¹² Kame núkap takakna nu shuar nú nukap patatnaktatui tura ti nukap takustatui. Antsu ishichik takakna nuka ishichik takakuk juruktiniati. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiarne. ¹³ Tuma asamtai aya métek-taku chichamjaj unuiniajai. Nú shuarka íniayatan wáiniániatsui. Ántuiniayatan ántachua núnis nékainiatsui. Túmainiak Winia nekaraini-atsui. ¹⁴ Nujaj yaunchu Yúsnan etserin Isayas timia nu uminkiaiti. Juna tímiayi:

"Ti ántayatrum anturkashtatume. Wáiniatrumsha nekaashtatume. ¹⁵ Ju shuara enentáin kátsuram ásar penkera nuna nakitiainiawai. Nu asamtai penker ántu-iniatsui, jíisha pusá áinis ániawai. Túrachkuŋka paant nekaawarainti, tura nekas antukarainti, tura enentáijjaj enentáimias Winia tsuarat tusa tarutiarainti."

¹⁶ Tura átumka paant wainkia asarum penker anta asarum shíraitrume. ¹⁷ Nekasan tájarne, untsurí Yús-nan etserniusha tura penker shuarsha átum yamá wáintrum nuna wáinkiatniun wakeruiniayatan wáinkicharmiayi. Tura átum yamá ántarme nuna antuktin-ian wakeruiniayatan antukcharmiayi' tímiayi.

Jesus atsaampramu chichaman paant jintintiamiania nu

(Márkus 4.13-20; Rúkas 8.11-15)

¹⁸ Ayu, antuktaram. Atsaampramu chichaman paant jintintiatjarne. ¹⁹ Árak jintia písunam iniaararma nuka shuar Yus-Chichaman ántayatan ni enentáin ikiuiniat-sna núiti. Tura íwianch nu Yus-Chicham ni enentáin atsaampramu áinis antukman kajinmatkiawai. ²⁰ Árak kaya írunmanum iniaararma nuka shuar Yus-Chichaman antuk waras umirainia núiti. ²¹ Tura nukap kankaprur-charu ásar katsuiniatsui. Antsu iturhatan inkiuiniak tura Yus-Chichaman wakeruina ásar matai chikich yajauch áujmatam wárik iniaisar ikiuiniawai. ²² Árak janjí nupanam iniaararma nuka shuar Yus-Chichaman antuk emka umirniua núiti. Tura ju nuŋkanam írunna nuna tuke páchiniak ni kuítríncha ti enentáimtuinia ásar-matai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai. ²³ Tura árak penker nuŋkanam ini-aararma nuka shuar Yus-Chichaman antuk penker umirainia núiti. Tura penker nerenawai. Chikich sián (100) nerekarma núnis chikichcha sesenta (60) nerekarma

núnis chikichcha trainta (30) nerekarma núnis áini-
awai" tímiayi Jesus.

(2) Yajauch nupā tríkiunam atsaamkamū

²⁴ Jesus ataksha jū métek-taku chichaman áujmat-
samiayi. "Shuar Yus akupeamunam pachiinkiertin jún-
saiti. Shuar péñker arakan, tríkiun ni nuñken araamai.
²⁵ Tura ashí kanararmatai nemasrī kashi taa trikiu arak-
manum yajauch nupān aratak ikiukmiai. ²⁶ Trikiu
tsapakar nereakui nuyá yajauch nupāsha nusháa
nereku asa ti paant ajasmai. ²⁷ Nuna íisar takainia nu
ni úntrīn werí tiarmai "Uunta, ¿péñker arak araach-
makam. Itiura jūsha yajauch nupāsha tsapakuit?"

²⁸ 'Tutai nérentin timiai "Winia nemasur arakuiti."
'Takui ni takarniurī tiarmai "¿Yajauch nupān uwerat
tusam wakeramek?"

²⁹ 'Tutai timiai "Atsá, uwerairap. Yajauch nupā uweaj
tukamarum trikiu uweniirum. ³⁰ Iniaisatarum. Antsu
métek tsakakti. Júuktin tsawant jeamtai winia takartin-
ian emka yajauch nupān uwer irumar jinkiwarat tu-
san akupkartatjai. Tura áesawartatui. Tura trikiu nerēn
júukar péñker ikiusarat tusan akupkartatjai" timiai"
tímiayi Jesus.

(3) Mustasa jīñkiái

(Márkus 4.30-32; Rúkas 13.18-19)

³¹ Jesus ataksha métek-taku chichaman áujmat-
samiayi. "Shuar Yus akupeamunam pachiinkiertin mustasa
jīñkiaya áintsan̄kete. Shuar péñker nuñken araamai.

³² Mustasa jīñkiáikia imiá uchichiitiat tsapái tsakaakka
ashí numichijīai nan̄kaamas uunt ajawai. Ti uunt asam-
tai chīñki ni kanawen pasun̄mainiawai" tímiayi Jesus.

(4) Karin eñketatin

(Rúkas 13.20-21)

³³ Núnisan̄ chíkich métek-taku chichaman áujmat-
samiayi. "Shuar Yus akupeamunam pachiinkiertin
karinia áintsan̄kete. Nuwā nijiamchiriam karinia eñkea
mashi páchimiawai. Tura nu mash karimtikiaawai" tími-
ayi.

Jesus aya métek-taku chichamjājīn jintintiamiania nu

(Márkus 4.33-34)

³⁴ Ashí nuna Jesus métek-taku chichamjājī áujmat-
samiayi. Yaunchu Yúsnan etserin timia nu uminkiat
tusa túramiayi. Etserin jūna áarmiayi:

"Métek-taku chichamjājī áujmattiatjai. Yámankam-
taiknumiā nékashtain etserkattajai" tu áarmiayi.
Nu asamtai aya métek-taku chichamjājīn áujmatmiayi
Jesus.

Jesus yajauch nupā tríkiunam atsamkamun paant awa-
jsamiania nu

³⁶ Nuyá shuaran ikiukin Jesus jeá támiayi. Túramtai ni
unuiniamurī tariat "Yajauch nupā áujmatmena nu
paant awajsata" tiarmiayi.

³⁷ Tutai Jesus tímiayi "Wi Aents Ajasuitjai. Wi péñker
arakan atsaamkaitjai. ³⁸ Ashí nuñka aja áintsaiti. Péñk-
er jīñkiái Yus-shuāran Yus akupea nuna nakumeawai.
Yajauch nupā iwianchna ainia nuna nakumeawai. ³⁹ Tu-
ra íwianch ii nemasrī asa yajauch nupān arakuiti. Tura
nuñka amúamunam Yusa suntarī arakan júuktinia
áintsan̄ shuaran yaruaktatui. ⁴⁰ Yajauch nupā irur jini-
um áesatniua áanis nuñka amúamunam túrunattawai.
⁴¹ Nuī Wi Aents Ajasu asan winia suntarun akupkatta-
jai. Tura ashí tunaan túruinia nunasha tura chikichan
tunaanum útsuinia nunasha mash irurar jinium
apeawartatui. Nuīsha ti úutin ti wáitsatniusha átatui.
⁴³ Antsu péñker túruinia nuka ti shiir wincha ajasar ni
Aparī akupeana nuī etsa núnis tsáapnin ajasartatui.
Wats, kuishim átsuk. Antukta.'

(5) Kuit wáinkiamu

⁴⁴ 'Shuar Yus akupeamunam pachiinkiertin kuit nuñka
uñkma áintsan̄kete. Shuar nu kuítian wáiniak nuñ
ataksha uñkmai. Tura ti waras waketki nu kuit niiniu
atí tusa ashí ni takakman suruk nu nuñkan sumakmai.'

(6) Kaya shiirmach ti kuitia nu

⁴⁵ 'Shuar Yus akupeamunam pachiinkiertin júnisaiti.
Shuar kayachin ti shíirman eñk wekaana áintsan̄kete.

⁴⁶ Tura kayan ashí nan̄kaamas kuit jeean wáiniak
waketki ashí takakna nuna suruk nu kayan niiniu atí
tusa súmawai.'

(7) Neka

⁴⁷ 'Shuar Yus akupeamunam pachiinkiertin júnisaiti.
Shuar nekajai namakan achía áintsan̄kete. Nekan
nayaantsanam ajuntak niisháa namakaim achíawai.

⁴⁸ Tura nekanam nemarmatai kukar jīiki, nuī péñker
namaknasha chan̄kinnium chumpiniawai. Tura ya-
jauch namaknaka ajapenawai. ⁴⁹ Núnisan̄ átatui nuñka
amúamunam. Yusa suntarī taar Yus-shuaran tura
íwianch shuaran akantrattawai. ⁵⁰ Tura íwianch shuar-
naka uunt jinium apeattawai. Nuīsha ti úutin ti wáit-
satin átatui." Nuna ashí ni unuiniamurijīai áujmat-
samiayi Jesus.

Yamáí nekaamujājīsha tura yaunchu nekaamujājīsha
Yus-shuaran yáintiniaiti

⁵¹ Jesus nuna tinia amuk "¿Jū mash antukurmek?"
tímiayi.

Tutai ni unuiniamurī "Ee, Uunta, ashí antukji" tiarmi-
ayi.

⁵² Tuiniakui Jesus tímiayi "Shuar ashí Yúsnan péñker
unuimiaruka aents kuítriniua áintsan̄kete. Ni ikiutair-
ijā yamarmancha yaunchu sumakmancha jusamniaiti.
Núnisan̄ nu shuar yamáí nékamujājīsha tura yaunchu
nékamujājīsha Yus-shuaran yáintiniaiti."

Jesus Nasarétnum waketkimiania nu

(Márkus 6.1-6; Rúkas 4.16-30)

⁵³ Jesus nu métek-taku chichaman áujmatas amuk nuyá wémiayi. ⁵⁴ Tura ni péprurin Nasarétnum jeá Israer-shuar iruntainiam wayá unuiniamiyai. Tura nuyá shuar antukar tí enentaimprarmiyai. Tura “¿Jusha tuj imiá unuimiaruit, tiarmiyai. Itiurak aents tujintiamun túramniait? ⁵⁵ Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semuñ, Jútas ániatsuk. ⁵⁶ Tura ni umaísha iijíaj írutra pujuiniatsuk. ¿Nuikia itiura mash neka?” tiarmiyai. ⁵⁷ Túrawar Jesusan itiurchat enentáimturarmiyai.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nuñkeyañka ni shuarinkia nin anturainiatsui” tímiayi. ⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiyai.

Imiakratin Juan jakamu

(Márkus 6.14-29; Rúkas 9.7-9)

14 Kariréa nuñkanam Erutis akupniuyayi. Tura Jesus túramuncha antukmiayi. ² Tura ni írutramurín tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³ Akupin Erutis ni yachí jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan achik jirujaj jinikiá sepunam enkeatarum tusa akupkamiayi. ⁵ Niisha Juan kan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashamiayi. ⁶ Tura akupin Erutis akiiniamu tsawantri jeamtai nú námpertin Jirutíasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak ⁷ “Ame ashí wakeram nu seat-tia, tímiayi. Nekasan amastatjai, Yussha iirui” tímiayi.

⁸ Tutai nu nuwäch emka ni nukurí akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikrísha antukaru asamtai umikmiayi. ¹⁰ Ni suntarin sepunmayan Juan ka muuken tsupik itiarti tusa akupkamiayi. ¹¹ Tura amamkunam itiar nuwächin súsarmiayi. Tura niisha ni nukurí susamiayi.

¹² Nuyá Juan ka írutramurí tariar ayashí jukiar iwiarsarmiayi. Túrawar Jesusan ujauwearmiayi.

Jesus señku mir (5000) áishman kan ayuramiania nu

(Márkus 6.30-44; Rúkas 9.10-17; Juan 6.1-14)

¹³ Jesus nuna antuk Niñki ni unuiniamurijiañ kanunam enkem arant aents atsamunam wémiayi. Túrasha nuna aents nekaawar kukarak weriarmiayi Jesusan. ¹⁴ Kanunmayá jíiniaj tukamá untsurí áentsun wáinkiamiayi. Tura wáiniak waitnentrarmiayi. Tura jániancha tsuáramiyai. ¹⁵ Kíakui ni unuiniamurí Nin tariar tiarmiyai “Kíawai, Uunta. Tura shuar tíjiyuch pu-

jaaka atsawai. Ju aents akupkarta. Péprunam wear sumak yuuwearti” tiarmiyai.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiyai “Íikia takaktsuji. Aya señku (5) tanta-chik jimiaarchik namakchijiañ takakji.”

¹⁸ Tuíniakui Jesus “Wats, nu itiartitiarum” tímiayi.

¹⁹ Tinea aents chírichriniam pujusarti tusa akupkamiayi. Nuyá señku (5) tantancha jímiar namaknasha achik nayaimpiniam íimias Yúsán yumínsamiayi. Tura puur ni unuiniamurín aents ayuratarum tusa súsarmiayi.

²⁰ Ashí yurumáwar jémarmiyai. Tura nuyasha puunaruka tuse (12) chan kin tiármiyai. ²¹ Nuñ yurumáwarmia nusha nuwasha uchisha nekampatsuk señku mir (5000) aya áishman ármiyai.

Jesus entsá pátatek wekasamiania nu

(Márkus 6.45-52; Juan 6.16-21)

²² Nuyá Jesus ni unuiniamurín kanunam enkemprarum amain émaa ajatarum tusa akupkarmiayi. Niisha áentsun akupkarmiayi. ²³ Akupkarsha naint waka Yúsán áujumiayi. Káshisha nuñ Niñki tuke pujumiayi. ²⁴ Tura antumiañ tí wan karam asamtai kanu ajapén ajasmatai nase tukumma entsa tamparukmiayi.

²⁵ Tsawaana ají nii tuke wenaj Jesus entsá pátatek wekas pujuiniamunam jeamiayi. ²⁶ Tura ni unuiniamurí entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiyai.

²⁷ Tuíniakui Jesus tiarmiyai “Kakaram ajastarum. Wiit-jai. Ashamprukairap.”

²⁸ Takui Pítiur chicharuk tímiayi “Uunta, Ámetkumka nuñ wekasa jeatin untsurkata.”

²⁹ Takui Jesus tímiayi “Wats, winitia.”

Tutai Pítiur kanunmayá akaikin Jesus wajana nuñ jeataj tusa entsá pátatek wekasamiayi. ³⁰ Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

³¹ Nu chichamtaik Jesus uwejnun achik júak “Maa, Yus imiá ishichik enentáimtuscheme” tímiayi. ³² Tura kanunam enkemáwarmatai nasesha meñkakamiayi.

³³ Túramtai kanunam enkemarmia nusha Jesusan tikishmatar chicharuk “Nekas ame Yusa Uchirínme” tiarmiyai.

Jesus Jinisarítniumia shuaran tsuármiania nu

(Márkus 6.53-56)

³⁴ Tura amaini katinkiar Jinisarít nuñkanam jearmiayi.

³⁵ Tura nuyá aents Jesusan nekaawar nu nuñkanam ashí ujanairarmiayi. Túrawar jaancha ni pujamunam itiararmiayi. ³⁶ Ni pushirínkisha antiñtai tusar seawarmiayi.

Shuaran yajauch awajeana nuna Jesus jintintiamiania nu

(Márkus 7.1-23)

15 Nuyá Jerusarén péprunmayá Pariséusha yaunchu akupkamu jintinniurísha Jesusan tariar aniasarmiayi ² “¿Urukamtai ame unuiniamuram ii uun-

trj yaunchu jintintrarmia nuna uminiatsu? Iis, ikijmi-atskesha yurumáiniawai" tiarmiayi.

³ Tuíniakui Jesus aniasarmiayi "¿Urukamtaí atumsha Yus akupkamu umirtsuk aya aents akupkamu umi-irum? ⁴ Iis, Yus tíchamkia:

"Ame apa, nukusha shiir enentáimtustarum." Tura "Shuarsha ni aparíncha nukuríncha katsekka nu shuar jakati" tíchamkia.

⁵ Antsu átumka tárume "Shuar ashí niiniu írunna nuna mash "Yúsnaiti" takui nuikia nujaj ni aparíncha nukuríncha yáínchamniaiiti, tárume. Nin yáínntinian nakitiak ayatik "Ashí winia áiniana nu Yusna asamtai yáínchamniaitjame" títiniaiti" tárume. Núnisrum tákura Yus akupkamu iniaisarum aya aents akupkamu umiirume, tímiayi. ⁷ Antra chichamtiniaitrum. Yúsnan etserin Isayas yaunchu nekas atumin áartampramiayi juna:

⁸ "Ju aents ni wenejaj shiir awajtuiniawai, tura ni enentáí jechat pujuiniawai. ⁹ Tura tukeneasañ shiir awajtuiniawai. Aentsu chichamen jintintiainiayat "Yusa chichamente" tuiniawai." Tu áarmiayi" tímiayi Jesus.

¹⁰ Tinja shuaran untuk tiarmiayi "Ju antukrum péñker nekaatarum. ¹¹ Aents yúana nuka shuáran yajauch awajsashtatui. Antsu wenunmaya jiiinia nuka shuáran yajauch awajeawai" tímiayi.

¹² Nuyá ni unuiniamurj Jesusan tariar "Maa, Pariséu ame chichammin antukar ti iturchat enentáimpraraí" tiarmiayi.

¹³ Tuíniakui Jesus tímiayi "Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáñnam akaiki iniaawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui" tímiayi Jesus.

¹⁵ Takui Pítiur Jesusan tímiayi "Nu métek-taku chicham paant awajsata."

¹⁶ Tutai Jesus tímiayi "¿Atumsha nekaachurmek.

¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniañkastiniaiti. ¹⁸ Antsu wenunmaya jiiinia nu enentáinmaya jiiiniu asa áentsun yajauch awajeawai. ¹⁹ Enentáinmaya ashí yajauch enentáimsatin jiiiniainiawai. Mañkartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha ²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui" tímiayi.

Nuwá Israer-shuarcha Jesusan enentáimtusmiania nu (Márkus 7.24-30)

²¹ Jesus nuyá jiiinki Tiru péprunmasha Sitiun péprunmasha wémiayi. ²² Tura nu nunñkanmaya nuwá Jesusan tarí tímiayi "Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai" tímiayi.

²³ Tura Jesus ájchamiayi. Tura ni unuiniamurj tariar "Awemata, tiarmiayi. Tuke untsunki apapétmaji" tiarmiayi.

²⁴ Nuyá Jesus tímiayi "Aya Israer-shuarnum menñkaru áinia nuna eaktinian Yus akuptukuiti."

²⁵ Túrasha nuwá tikishmatar tímiayi "Uunta, waitnentrurta."

²⁶ Tutai Jesus tímiayi "¿Uchí apatkurj jurukir yawá susamniakait?" tímiayi.

²⁷ Tutai nuwá tímiayi "Nekas, Uunta, tame. Tura yawasha ni aentsrj yurumainiakui nunñká iniaarun yuínatsuk."

²⁸ Takui Jesus tímiayi "Maku, nekas Winia enentáim-tursaitme. Ame wakeram núnisañ atí" tímiayi. Tura nu chichamaik ni nawantrj péñker ajasmiai.

Jesus untsurj jáinian tsuararmiania nu

²⁹ Jesus nuyá jiiinki Kariréa antumiañka káanmatkarin wakatkimiayi. Tura naint waka nuj pujusmiayi. ³⁰ Nuñ untsurj aents Nin tariar shutuapnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi. ³¹ Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrj Israeran yáínmatai shiir yumisarmiayi.

Jesus kuaru mir (4000) áishmañkan ayuramiania nu (Márkus 8.1-10)

³² Nuyá Jesus ni unuiniamurj untsukar tiarmiayi "Ju aentsun waitnentainiajai. Warí, menaintiu tsawant Wijaj yurumtsuk yujainiatsuk. Ayurtsuk ni jeeñ akupkachminiaitjai. Jintia pimpiki wáitsartatui."

³³ Ni unuiniamurj tiarmiayi "Túrasha, Uunta, ¿shuar atsaasha tuyañ yurumak imiá sumaktaji ju aents ayurawartincha?"

³⁴ Jesus aniasarmiayi "¿Urutma tanta takakrum?" Tutai niisha "Siatí (7) tanta nuyá ishichik namak takakji" tiarmiayi.

³⁵ Nuyá aents nunñká pujusarti tusa akupkamiayi.

³⁶ Tura siati tantan achik namaknasha achik nuyá Yúsan yumisamiayi. Tura puur aents ayuratarum tusa ni unuiniamurj susamiayi. ³⁷ Ashí yurumáwar jémararmiayi. Tura puunaru siati chanñkin tiarmiayi.

³⁸ Tura nuñ yurumáwaruka nuwasha uchisha nekapmatsuk aya áishmañkak kuaru mir (4000) áirmiayi.

³⁹ Nuyá Jesus áentsun akupak kanunam enñkemar Mak-tara nunñkanam wémiayi.

Pariséusha Satuséusha iniañmamurj Jesusan sea- warmiania nu

(Márkus 8.11-13; Rúkas 12.54-56)

16 Pariséusha tura Satuséusha Jesusan nekapsatai tusar tariarmiayi. Túrawar "Ame Yúsaiyaitkiumka kakarmarmijaj nayaimpinmaya iniañmasta, iisha wáinkiatái," tiarmiayi.

² Tutai Jesus tímiayi "Átumka "Kapaaku péetar kinti-amkui kashin esatrurtatui" tíniuitrume. ³ Túrasha "Te ajas kapaaku péetar tsawakui yumi yajauch átatui"

tíniuitrome. Tura nekasaiti. Maa, átumka nayaim íisrum jü nuñkanam túrunattana nu nékarme. Antsu Yus yamá jü nuñkanam tura nuka nékatsrume. Án-traitrume. ⁴ Aents yajauch ásar tura Yusan enentáimtachu ásar kakarmajají iniakmamun wakeruiniawai. Túrasha áyatik Junas túrunamia nuke iniakmastiniaiti" tímiayi. Tinia ikiuak wémiayi.

Pariséusha Satuséusha jintintiainia nu aneartiniaiti
(Márkus 8.14-21)

⁵ Tura entsá amaini katiñkiar ni unuiniamurj tantan júkitniun kajinmatkiarmiayi. ⁶ Nuyá Jesus tímiayi "Wáinkiatarum, Pariséusha Satuséusha wakaprutai takakainia nújajsha aneartarum."

⁷ Tutai ni unuiniamurj tiarmiayi "Íi tanta itiachakrin tátsuk."

⁸ Jesus nuna antuk tímiayi "¿Urukamtai tanta itiachji tunaiyarum. Yusa kakarmarj kajinmatkintrumek.

⁹ Senku tantajají túramiaj nu kajinmatkintrumek. Senku mir (5000) áishmañkan ayuramtai untsurj chañkin tiármia nu enentáimtsurmek. ¹⁰ Tura siati tantajají kuaru mir (4000) áishmañkan ayuramtai nuna ishichik chañkin tiármia nu kajinmatkintrumek. ¹¹ Itiurak imiá nékatsrum? Wi Pariséu wakaprutairjsha Satuséu wakaprutairjsha aneartarum tákun penké tantan tátsujají" tímiayi. ¹² Nuna Jesus takui ni unuiniamurjsha nekaawarmiayi. Penké tantaa wakaprutairjñ tichamiayi antsu Pariséusha Satuséusha unuiniatairjñ tímiayi.

Pítiur Jesusan Yus anaikiamun paant ujakmiania nu
(Márkus 8.27-30; Rúkas 9.18-21)

¹³ Tura Sesaria-jiripiunam jeawar Jesus ni unuiniamurjñ aniasarmiayi "Aents Ajasuitjiana juna ¿yaiti turutainiawa Winia?"

¹⁴ Niisha ayak tiarmiayi "Chíkich, imiakratin Juáñkaiti turamainiawai. Chíkichka, Eríasaiti turamainiawai. Chikichcha Jeremíasaiti, chikichcha chíkich aents Yúsnan etserniuiti turamainiawai" tiarmiayi.

¹⁵ Tutai nincha aniiniak "¿Atumsha yaiti túrutrum?" tímiayi.

¹⁶ Semuñ Pítrusha "Ámetme Kristu, Yus Anaikiamu. Nekas iwiaaku Yusa Uchirínme" tímiayi.

¹⁷ Tutai Jesus tímiayi "Shiiraitme Junasa uchirí Semuñka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame.

¹⁸ Tura Wisha tájame, ame Pítruitme, kayach tútaim.

Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrjsha nu jeamman pukukchattawai. ¹⁹ Yus akupeamu yawincha amastatjai. Jü nuñkanam jinñkiatniusha atíatniusha amasmaiti. Tuma asamtai ame jü nuñkanam suritiam nu nayaimpinmasha suritniaktatui. Tura jü nuñkanam tsañkateam nu nayaimpinmasha tsañkatnaktatui" tímiayi. ²⁰ Nuna tinia Jesus ni unuiniamurjñ Krístuítiaj nu etserkairap tinia akupkarmiayi.

Jesus Nin máatniun etsertumakmiania nu
(Márkus 8.37-9.1; Rúkas 9.22-27)

²¹ Nuyá Jesus juna unuiniatañ nanñkammiayi. "Wi Jerusarénnum wétiniaitjai. Nuí Israer-shuara úuntrjsha, Israer-patri úuntrjsha, Israer-shuara jintinniurjsha ti wáitkiarsartatui. Nuyá mantuawartatui túrasha menaintiú tsawantají nantaktiatjai."

²² Takui Pítiur arantach jukí chicharuk tímiayi "Uunta, nuka penké áchatniuiti. Áminkia túrutmacharminiaiti."

²³ Jesus ayanmatar Pítrun tímiayi "Werumta, Sataána. Yajauch awajtame. Ámeka Yus wakeramu enentáimtsume. Antsu jü nuñkanam enentáimainia áinis enentáimme."

²⁴ Nuyá Jesus ashí ni unuiniamurjñ tímiayi "Shuar Winia nemartustaj tusa wakerakka ni wakeramurjñ ini-ais ni krusj yanaki Winia nemartusti. ²⁵ Shuar áyatik penker pujustaj tákuñka nu shuar uwemtsuk jakattawai. Antsu jákatniuitkuisha penker pujustinian enentáimtsuna nú shuar nekas iwiaakman wainkiattawai.

²⁶ Wats, shuar ashí jü nuñkanam írúnna nuna sumakka tura nujají ni wakanj émeseak ¿itiurak penker pujustaj? Shuara wakanj emesramu ¿ashí jü nuñkanam írúnna nujají iwiaramniakait? ²⁷ Wi Aents Ajasu asan, winia Aparu kakarmarjijají tura ni suntarjijají tana ashí shuáran ni takasmajají métek akiktatjai. ²⁸ Paant tájarme, shuar juí wajainia jü játsuk Wi akupin ajasmatai wáitkiartatui" tímiayi.

Jesus nushá iira ajasmiania nu
(Márkus 9.2-13; Rúkas 9.28-36)

17 Nuyá sais (6) tsawant nanñkaamasar Pítruncha, Jakupuncha, tura ni yachj Juañoñsha níniak júkiar Jesus náinnium yakí wakamiayi. ² Nuí Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirjsha ti puju jiiitsumir ajasmiai. ³ Nujsha Muisaisnasha Eríasnasha Jesusjají chichainian wáinkiararmiayi. ⁴ Nuyá Pítiur Jesusan tímiayi "Uunta, ti shiir pujají juí. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna." ⁵ Tura Pítiur tu auju wajái yurañkim ti puju amuñamiayi. Tura nu yurañminmayá chichaman antukarmiayi. "Juka winia aneamu Uchiruiti, tímiayi. Nin ti shiir enentáimtajai. Nii penker anturkatarum" tímiayi. Tu chichasmiai Yus. ⁶ Nuna ni unuiniamurjñ antukar ti ashamkar pákea ajakiarmiayi. ⁷ Túrunawarmatai Jesus táriar antiñ "Ashamkairap, nantaktiarum" tiarmiayi. ⁸ Tura pañkainiar íimij tukamá aya Jesusan wáinkiararmiayi.

⁹ Nuyá náinniumiá akainiak Jesus tiarmiayi "Átum ísurmena nu penké etserkairap. Wi Aents Ajasu asan jakamunmayá nantaatsajñ etserkairap' tímiayi.

¹⁰ Nuyá ni unuiniamurjñ Jesusan aniiniak "¿Urukamtai in jintintramin "Kristu táatsajñ Erías emka tátiniaiti" tu- inia?" tiarmiayi.

¹¹ Tuíniakui Jesus áikmiayi "Nekas Erías tátiniaiti. Tura nii mash iwarattawai. ¹² Kame nekas Erías táwiti tura nin nekaacharmái. Antsu aents wakeriarmia nuna

túrawar yajauch awajsarmiayi. Núnisañ Winiasha, Aents Ajasu ainq, wáitkiarsartatui." ¹³ Nuna takui ni unuiniamurj imiakratin Juáñkan áujmatui, tu enentáimprarmiayi.

Jesus iwianchin jjiiki akupkamiania nu
(Márkus 9.14-29; Rúkas 9.37-43)

¹⁴ Ataksha aents matsatmanum jeawarmatai shuar Jesusan tarí tikishmatramiayi. ¹⁵ Tura tímiayi "Uuntá, winia uchir waitnentrutrata. Wainchi tukum ti wáitniuiti. Jiniumsha patamniuiti. Entsasha iniainaiti.

¹⁶ Ame unuiniamurmjñcha itiarjiai túrasha tujinkiarai."

¹⁷ Takui Jesus ashí tímiayi "Maa, Yus penké enentáimtichuitrume. Imiá úmichuitrume. ¿Wi atumin kat-suntu ajatniukaitjjarum? Wats, uchi itiaritjarum' tímiayi. ¹⁸ Itiarim Jesus yajauch wakanin jjiiki akupkamiayi uchi ayashíniá. Túramtai nu chichamaik péñker ajasmiai.

¹⁹ Nuyá urum ni unuiniamurj Jesusjaj niñki pujusar áujmatainiak "¿Urukamtai yajauch wakan jjiiktin iikia tujinkiamaj?" tiarmiayi.

²⁰ Tuíniakui Jesus tiarmiayi "Yus nekas enentáimtachu asarum tujinkiarume. Túmaitiat nekasaiti mustasa jñkíái tímiá uchichitiat ti uunt tsakaatsuk. Núnisañ Yus ishichkisha enentáimtakrumka nu naint ékemkata tuta nu naint túrunattawai. Penké tujinkiashtatrumka Yus nekas enentáimtakrumka. ²¹ Kame nu yajauch wakan jjiiki akupkatniuka ijiarmam Yus áujsatniuiti."

Ataksha Jesus ni játniun ujakmiania nu
(Márkus 9.30-32; Rúkas 9.43-45)

²² Jesus ni unuiniamurijjaj Kariréa nuñkanam wekas juna ujakarmiayi. "Wi Aents Ajasu asan, aentsnum surunkattajai tura mantamnattajai. ²³ Túrutawarmatai menaintiú tsawantaj nantaktiatjai." Tura ni unuiniamurj nuna antukar ti kúntuts enentáimprarmiayi.

Jesus ankantaitiat akiktinia nuna akikmakmiania nu

²⁴ Jesus ni unuiniamurijjaj Kapernáum péprunam jeawarmiayi. Tura kuítian achin Pítrun tariar aniasarmiayi "¿Atumi uuntri Israer-patrin akiktinia nuna akíniait?"

²⁵ Tutai Pítiur "Ee" tímiayi.

Tura Pítiur jeá wayá chichaatsajñ Jesus emka tímiayi "Chíkich nuñkanmayá akupin çyana kuítrijjajñ takainia. Ni shuárñiunkek atantainia. Antsu yajayá shuárnan atantainiatsuk. Nekaschak, Semuñká?"

²⁶ Tutai Pítiur "Nekas yajayá shuárnan atantainiawai" tímiayi.

Jesus tímiayi "Nuikia ni shuarj ankant áiniawai. Iisha núnisrik nu akiktin ankantaitji. ²⁷ Túrasha itiurchat enentáimprarajñ tusar akiktai. Ame tsau jukim entsá wetá. Túram emka namak japikim iwiankam nuj kuit wáinkiatame. Nu jukim Wíniasha áminiusha akikmakta."

"¿Ya imiá nankaamantuit?" tunaiyarmiania nu
(Márkus 9.33-37; Rúkas 9.46-48)

18 Nu tsawantaj ni unuiniamurj tariar Jesusan aniasarmiayi "Yus akupeamunam pachiinia nu çya imiá nankaamantu áminiait?"

² Nuna tuíniakui Jesus uchin untsuk ajapen awajtusar ³ tímiayi "Tí nekasán tájarme, atumí enentáimtairj yajajarum uchia áinis ajachkurmeke Yus akupeamunam pachiinkiachminiaitruma. ⁴ Nu asantai ju uchia áinis péejchach enentáimtumana nuka Yus akupeana nuj nekas nankaamantu ajasminiait. ⁵ Nú arantcha Winia anentuk uchin itiaana nú shuar Winiasha itiaareawai' tímiayi.

Tsuumainti yajauch túrumtikiatin
(Márkus 9.42-48; Rúkas 17.1-2)

⁶ Shuar ju uchin Winia umirtana nuna tunaanum ajuarmatañkia nuna túratsajñ niisha kuntujén kayajaj jñkiar nayaantsanam ajapen kunanam ajunmaitkiuñka maak ainti, tímiayi. ⁷ Ju nuñkanam tunáa iniaatai írunuk tuke itieurchataiti. Antsu shuar chikichan tunaanum ajuarka ti itieurchatan inkiuntatui' tímiayi.

⁸ Nu asantai ame uwejem tura nawem tunaanum ajunmatniuitkiuñkia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti. ⁹ Núnisañ ame jjiimi tunaanum ajunmatniuitkiuñkia ukuinkiam ajapata. Kame chikichik jjiijaj pujusam nayaimpiniam wétin péñkeraiti. Antsu jinium mai jjiintiuk wétin imiá yajauchiiti' tímiayi.

Murik menkaaka áujmatsamu
(Rúkas 15.3-7)

¹⁰ Uchi ainia nu nakitraitrap. Yusa suntarj nin wáinkiatniua nu winia Aparuj tíjñuch pujuiniawai. ¹¹ Kame wi Aents Ajasu asan, menkaakarun eaktajtsan táwitjai.'

¹² 'Enentáimpratarum. Shuar siañ (100) murikiun takakuitiat chikichik menkakamtai untsurj menkakacharun náinnium matsaak, menkakan eash-tatuak. ¹³ Wáinkiasha untsurj menkakacharua nujaj nankaamas waraschattawak. ¹⁴ Núnisañ atumi Aparj nayaimpiniam pujana nu, nu uchi chikichkisha menkakacharti tawai' tímiayi.

Yus-shuarti tsankurnairatin
(Rúkas 17.3)

¹⁵ Chikich Yus-shuar ámin yajauch túrutmakuñkia nii werim áujсата. Tura ámechik werim ame yatsumjaj chichasta. Anturtamkuñkia ame yátsum yáñkiume.

¹⁶ Tura anturtamchakuñkia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam.

¹⁷ Túrasha yatsum tuke ántachkuñkia Yus-shuar iruntainiam iwainiakta. Túrasha yatsum tuke ántachkuñkia Yus-shuarcha núnisañ enentáimtusta nu shuar.'

¹⁸ Nekasan tájarme, ju nuñkanam suritiam nu nayaimpinmasha suritniaktatui. Tura ju nuñkanam tsan̄kateam nu nayaimpinmasha tsan̄katnaktatui.'

¹⁹ Núnisnak tájarme, ju nuñkanam pujusrum jimiará Yus-shuartiram métek enentáimprarum winia Apar nayaimpiniam pujana nu seakrumniñkia wakerarmena nuna suramsattarme. ²⁰ Jímiar menaintiusha Yus-shuar Winia enentáimturuk iruntrarmatai Wisha nuñ nijjajai pujajai" tímiayi Jesus.

²¹ Takui Pítiur werí Jesusan aniasmiayi "Uuntá, winia yatsur yajauch awajtakui çurutma tsan̄kuratniuitiaj. Siátikik tsan̄kuratniuitiaj?"

²² Jesus aiyak "Siátik tátsujme, antsu iniañnatsuk tsan̄kuratniuitme" tímiayi.

Takakmau tsan̄kurachun pachis áujmatsamiania nu

²³ Tuma asa Jesus Yus akupeamunam pachiinkiaru tsan̄kurnairartiniati tusa ju métek-taku chichaman áujmatuk tímiayi, "Uunt akupin takarín tumashin akirkarat tusa untsukarmai. ²⁴ Yama náñkamuk tí nukap tumashmakua nuna untsukmai. Akikmakchamnia ti tumashmakuyi. ²⁵ Tura nu takakmau kuitrj at-sakui uunt akupin "Yajasma áitkiasrum nuñrtiuk uchirtiuk ashí waririntiuk suruktarum, timiai. Nu kuitjaj akirkati" timiai.

²⁶ Tutai nu takakmau uunt akupniun tikishmatar seak timiai "Uunta, waitneasam nákarsatá. Auka, mash akikratjame." ²⁷ Uunt akupin waitnentar mash tsan̄kur an̄kant akupkamai. ²⁸ Tura nú chichamaik nú takakmau jiiñki ni añ in̄kiññmai. Nú ajsa nin ishichik tumashiyi. Tura tsékeñki suwenam achik chicharuk timiai "Wari akirkata tumashitmena nu."

²⁹ Tura ni añ nin tikishmatar timiai "Waitneasam nákarsatá. Auka, mash akikratjame" timiai. ³⁰ Túrasha nakitramai. Antsu tsan̄kurtsuk sepunam en̄keamai ashí akirkatí tusa. ³¹ Chíkich takakmau nuna wáinkiar ti kúntuts enentáimtuiniak uunt akupniun ashí etser-tukarmai. ³² Nuna antuk uunt akupin untsuk itia timiai "Yajauchiitme. çWinia "waitnentrurta" túrutkumin tsan̄kurachmakjam? ³³ Amesha núnismek ame añ tsan̄kuratniuitme" timiai. ³⁴ Tinia uunt akupin kajekmai. Tura ashí tumashin akikmatsuk asutniati tusa suntarnum surukmai." ³⁵ Jesus nuna áujmatas amúak tímiayi "Núnisañ winia Apar nayaimpiniam pujana nu atumin túrutmattarme atumi yachj nekas enentáijjaj tsan̄kureachkurminkia."

Jesus nuwá ajapatniun áujmatsamiania nu

(Márkus 10.1-12; Rúkas 16.18)

19 Jesus nuna tinia ikiuak Kariréa nuñkanmaja wémiayi. Tura Jurtañ entsa amain Jutía nuñkanam jeamiayi. ² Untsurj aents nemariarmiayi tura jáiniancha péñker awajsamiayi.

³ Nuñ Paríséu Jesusan nekapsataj tusar aniasarmiayi "çShuar ni nuwen ititurchat akui ajapamniakait?"

⁴ Tutai Jesus tímiayi "çÁtumka Yus-Papí áuj-sachukaitrum? Yámankamtaik Yuska shuáran áishman̄kan nuwancha najanamiayi tawai. ⁵ Tuma asamtai

áishman̄ ni aparín ni nukurín ikiuki ni nuweñaj tsan̄ñ chikichik ayashtinia áinis ajasartatui, tu áarmaiti, tímiayi. ⁶ Tuma asa jímiarcha antsu chikichik ayash áini-awai. Tuma asamtai shuar Yus apatkamia nuna, aents akankashtiniati' tímiayi.

⁷ Takui tiarmiayi "Nuikia çurukamta papí áarar nuwá ajapatniun Muisais tsan̄katkamia?"

⁸ Tutai Jesus tiarmiayi "Tímiá ántichu asakrumin nuwá ajapatniun tsan̄katkamiayi. Túrasha émkaka núnischauyayi. ⁹ Wi tájarme, shuar ni nuwen chíkichjaj pujuschan ajapeakka tura chikichan nuatkuñka tsanirmayi. Chíkich áishman̄sha nuwá ajapamun nuátkañka nusha tsanirmayi" tímiayi.

¹⁰ Takui ni unuiniamurj tiarmiayi "Nuikia áishman̄ ni nuwé penké ikiukchamniatkiuñkia nuátkachminiaiti."

¹¹ Jesus tiarmiayi "Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. ¹² Chíkich chíkich nuatkachmin áiniawai. Chíkich nuátkachmin akiiniawaru áini-awai. Chikichcha aentsjaj nuátkachmin najanaru áini-awai. Chikichcha nuátainiatsui Yus akupeamu takatan takastinian. Juna antuktinian jeáka antukti."

Jesus uchin shiir awajsamiania nu

(Márkus 10.13-16; Rúkas 18.15-17)

¹³ Nuyá Jesusan uchin itiararmiayi. Nin antñ Yúsar áujtusarar tusar wakermiayi. Túruiniakui ni unuiniamurj chicharkarmiayi. ¹⁴ Túruiniakui Jesus tímiayi "Uchi Winí winitin tsan̄katkatarum. Suritkiarap. Kame ju uchía áintsañ péjchach áinian nunak Yus akupkamni-aiti." ¹⁵ Tínia uchin miniakas nuyá wémiayi.

Kuítrintin Jesusjaj chichasmiania nu

(Márkus 10.17-31; Rúkas 18.18-30)

¹⁶ Shuar natsa Jesusan tarin aniasmiayi "Uuntá, péñkeraitme. Tuma asam turuttia çwarinia túrakna tuke iwiaaku átataj?" tímiayi.

¹⁷ Tutai Jesus nin enentáimtikrataj tusa tímiayi "çUrukamta péñkeraitme túrutam. Shuar péñkerka at-satsuk. Aya Yúskechukait? Wats, tuke iwiaaku pujustaj tákumka akupkamu umírkartá."

¹⁸ Tutai shuar "çTuna nekas umirkatniuitiaj?" tímiayi.

Takui Jesus tímiayi "Mañkartuawaip, tsanirmawaip, kasámkáip, chíkich shuar tsanumpruraip, ¹⁹ ame apa nukusha umírkartá, ame shuárum ame ayashim aneamna nútiksamek aneeta."

²⁰ Tutai natsa tímiayi "Núnaka úchichik mash umiki tsakaruitjai. Nuyasha çwarí táatrusa?" tímiayi.

²¹ Takui Jesus tímiayi "Nekas péñker átaj tákumka, weme ame kuítrum kuítrincha ainia nu súsartá. Tura nayaimpiniam kuítrintin ajastatme. Nuyá Winia nemártústá" tímiayi Jesus. ²² Tura natsa nuna antuk kúntuts wémiayi ti kuítrintin asa.

²³ Nuyá Jesus ni unuiniamurj tiarmiayi "Nekasan tájarme, kuítrintin Yus akupeamunam pachiinkiatin ti ititurchataiti. ²⁴ Ataksha tájarme, kamiriuka kawái nañkaamas uunt asa auja jiiñ wayachminiaiti. Núnisañ

kufrintin Yus akupeamunam pachiinkiatin ti itiurchataiti."

²⁵ Ni unuiniamurj nuna antukar antúu ajarmiayi. Túrawar aniniainiarmiayi "¿Nuikia yaki uwempramni-ait?"

²⁶ Tuíniakui Jesus ashí íisar tímiayi "Aents uwempratniun nekas tujintiainiawai antsu Yuska ashí tujintiat-sui."

²⁷ Nuyá Pítiur tímiayi "Uuntá, iikia ashí ikiukchajik Ámin nemarsatai tusar. ¿Wariñ wáinkiatatjái iisha?"

²⁸ Jesus tímiayi "Nekasan tájame, ukunmañka ju nuñka yamaram ajastatui. Aents Ajasu asan, Wisha nuj, uunt akupin ajastatjai tura atumsha winia nemartusutirmeka Wijjají métek akupin ajastatrome ashí Israershuar akupkatin. ²⁹ Tura shuar ni jeencha, yachincha, umañcha, aparincha, nukurincha, nuarincha, uchirincha, tura nuñkencha Winia anentu asa ikiukin wekaakka, nu shuar nii ikiukmia núnisan yamaisha ti untsurj wáinkiatatawai tura ukunmasha tuke shiir pujustatui Yusjají. ³⁰ Untsurj yamáí penkerj áiniana nu ukunam ukunmaani pujusartatui, tura yapajjáwar yamáí ukunmayá áiniana nu ukunam emka pujusartatui' tímiayi Jesus.

Jesus takarniun pachis áujmatsamiania nu

20 'Yus akupeamunam pachiinkiatin júnisaiti. Nuñka nérentin ni araamurjñ júuktaj tusa káshik iniartaj tusa jjiinkimiayi. ² Chikichik tenariu kuit jean tsawant takamtsuk akiktajrume tusa chichas ni araamun júuktinian akupkarmiayi. ³ Nantu takuntajsha ataksha jiinki shuar yujan wáiniak ⁴ timiai "Atumsha winia arakur júuktin yáintkiatarum. Shiir akiktajrume." Tutai wearmai. ⁵ Ataksha tutupin aj nuyá áaņkúsha jiiinki, núnisan tinia akupkarmai. ⁶ Ataksha nantu patamsaj jjiinkimiai. Tura shuaran yujan wáiniak "¿Urukamtai takakmatskesha áani pujarum?" timiai.'

⁷ "Warí, iincha iniatmainiatsj" tiarmai. 'Tuíniakui timiai "Atumsha winia nuñkaruj takautarum. Péñker akiktajrume."

⁸ Kirit ajátekiáj takatrin wáinniun timiai "Takatan takasaru untsukam akikiarta. Kíaraj naņkamawaru emka akikiarta. Túram káshik naņkamawarujají amuktá" timiai. ⁹ Takui nantu patamsa aj naņkamawaru wayawarmatai chikichik tenariu kuit jean ashí akikiarmai. ¹⁰ Mash umintramtai nuyá emka naņkamawaru wayawar "nuna naņkaamas achikchatjash" tu enentáimsarmai. Tura chikichik tenariu kuit jean achikiarmai. ¹¹ Achikiar nérenniun itiurchat enentáimturarmai. ¹² Tura tiarmai "Iikia ashí tsawant nantujají wáitsachjik. Ju shuarsha nantu patamsa aj naņkamawaruka penké ishichik takasaraí. Túrasha iijjají métek akikiarume" tiarmai.

¹³ Tutai nérentin chikichkiniak iniakmas timiai "Umpá, penké kasartsujme. Káshik chikichik tenariu kuit jeá chichasar iijjají iwiarachjik, timiai. ¹⁴ Pai, ame kufrum achikiume. Nantu patamsaj takasuncha amijjají métek akiktinian wakerajai. ¹⁵ Warí, winia kufrujají wi wakera-

mun túrachminkaitiaj. Antsu wi tsañka asamtai ¿yajauch enentáimturmek?" timiai.'

¹⁶ 'Núnisaiti Yus-shuarnum. Émkaru áinia nu uku ártatui. Tura ukuyá áiniana nu, emka ártatui. Untsurj ipi-aamu áiniawai tura ishichik achikma áiniawai." Tu áujmatsamiayi Jesus.

Jesus ataksha ni jákatniurjñ etserkamiania nu

(Márkus 10.32-34; Rúkas 18.31-34)

¹⁷ Jesus Jerusaréñnum jintiá wesa ni unuiniamurjñ akankin tiarmiayi ¹⁸ "Iistarum, Jerusaréñnum wéají. Nujsa Israer-patri úuntrin tura ni jintinniurjñcha Winia surutkartatui. Nujsa, wi Aents Ajasu ajñ, "mantamnatí" túrutiatatui. ¹⁹ Tura apachniun surutkartatui. Nuñ katsekrugar, awattiar krúsnum máawarti tusar túrutawartatui. Túrasha jakayatan menaintiú tsawantají nantaktiatjají" tímiayi.

Jakupu tura Juanka nukurj Jesusan seamiai

(Márkus 10.35-45)

²⁰ Nuyá Jakupusha Juansha, mai Sepetéu uchirj, nukurjijjají tariar Jesusan tikishmatrarmiayi. Tura nukurj Jesusan waitnentrutarat tusa seamiai. ²¹ "¿Warí wakeram?" tímiayi Jesus.

Tutai nuwá tímiayi "Ame uunt akupin ajastatmena nuñ winia uchir chikichik untsurnumaani chikichcha menaanmaani akupkarti tusam apujserta."

²² Takui Jesus tiarmiayi "Atum seatrumna nu nékat-srume. ¿Wi wáitsattajna nujají métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujají imiaitniua áintsan imiantiniaitjai. ¿Nú piniñnumiá umarminkiaitrum. Núnisan imianminkiaitrum?"

Tutai "Páchitskea" tiarmiayi.

²³ Tuíniakui Jesus tímiayi "Ayu. Winia piniñkruiyá umartatrome. Wi imiantiatjana nujají imiantiatrome. Antsu Wijjají tsaniñkia pujustinniaka Wikia íischatniuitjai, antsu winia Apar iwiarturu áinia nuna nuñ apujsertatawai" tímiayi.

²⁴ Chikich tias (10) unuiniamurj nuna antukar nu jímí-aran kajerarmiayi. ²⁵ Túmainiakui Jesus untsukar tiarmiayi "Ju nékarme, apachniunka kapitíán ajasar ni shuarjñ nérenniua áinis ti akupenawai. Ni úuntrinsha waantu enentáimsar "wítjai akupniun" tu enentáimtikiainiawai. ²⁶ Antsu atumjajjñkia núnis áchatniuiti. Naņkaamaku ajastaj tákuñka chikicha yaintrj átiniaiti. ²⁷ Ame kapitíántrum ajastaj tákuñka ashí shuara yaintrj ajástí. ²⁸ Wisha Aents Ajasuitiatan, Winia yáintkiarat tusan táchaitjai antsu shuaran yáintaj tusan táwitjai. Untsurj shuaran tunáa tumashrin akikmatkataj tusan jákatniuitjai. Nuna tarimjai" tímiayi Jesus.

Jímíar jji kusurun Jesus tsuármiania nu

(Márkus 10.46-52; Rúkas 18.35-43)

²⁹ Jirikiú péprunmayá wénakui untsurj aents Nin nemariarmiayi. ³⁰ Nuñ jintiá yantam jímíar jji kusuru pujuarmiayi. Jesus wéawai taman antukar kakantar

untsukarmiayi. “Uuntá, uunt akupin Tawitia Uchirínchukaitiam. Waitnentruurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiría, waitnentruurta” tiarmiayi.

³² Tuíniakui Jesus wajas jii kusurun untsukar ani-asarmiayi “¿Warí ititurtukat tusarum wakerutarum?”

³³ “Uuntá, iimtiaí tusar wakeraji” tiarmiayi. ³⁴ Tuíniakui Jesus nin waitnentrar ni jiiin antiñkiarmiayi. Nu chichamaik íimiar niisha Jesusan nemariarmiayi.

Jesus Jerusaréñnum wayamiania nu
(Márkus 11.1-11; Rúkas 19.28-40; Juan 12.12-19)

21 Jerusaréñnum nuntumsar Petpajái péprunam jeawarmiayi. Nusha Uriwiu náinnium ayamchiiyayi. Nuí jeawar Jesus ni unuiniamurín jímiar anaku-peak tímiayi ² “Tíjjuch péprunam wérum umpuuru umpuuruuchijjái jínkiamu wáinkiatarme. Nu atiarum itartitiarum. ³ Tura aents “Urukamtai áitkiarum” túramkurminkia “Uunt wakerawai, tura wárik awaíñkit-tiawai” titiarum” tímiayi.

⁴ Tura nusha yaunchu Yúsnan etserin aarmia nu umíntiatí tusa tímiayi. Júnis áarmiayi:

⁵ “Ashí Israer-shuarnum ju etserkatarum:

“Tistarum, atumi Akupniurj, pééjchach ajas umpuuru-chiniam ekeemak winitramprume. Pééjchach asa káarak áintstai umpuuru uchirín ekeemak winitramtrume,” titiarum.” Tu áarmaiti.

⁶ Tutai nu jímiar unuiniamurj wear Jesus timia núnisan túrawarmiayi. ⁷ Umpuuruuchin nukurtiuk itiararmiayi. Tura ni pushirín áitkiaram Jesus entsamkamiayi. ⁸ Shuar untsurj ásar ni wéamunam pushirín áitkiarmiayi. Chikichcha nuká jurukar ni wéamunam áeprurarmiayi. ⁹ Shuar untsurj eem wearmia nusha tura uku winiarmia nusha kakantar untsumi-armiayi. “Juna weatrj uunt akupin Tawit asamtai nankaamakuiti. Yusa náariin winiana ju ii Uuntrinti. Shiir atí. Nayaimpinmasha Yus shiir awajsatai.” Tu untsumiarmiayi.

¹⁰ Jesus Jerusaréñnum wayamtai ashí shuar ti enentáimainiak “¿Jusha yait?” tiarmiayi. ¹¹ Chikichcha “Yús-nan etserin Jesusaiti, tiarmiayi. Nasaré pepru Kariréa nunkanmayaiti” tiarmiayi.

Yusa Uunt Jeen suruktinian Jesus surimkiamiania nu
(Márkus 11.15-19; Rúkas 19.45-48; Juan 2.13-22)

¹² Nuyá Jesus Yusa Uunt Jeen wayá kuítian súruiñiak tura súmmainiak pujan akúprámiayi. Kuítian yapajinia misaríncha ayanturmiayi tura yampitsa súruiñia kutañkríncha núnisan ayanturmiayi. ¹³ Nuyá tímiayi “Yus-Papinium áarchamukait,

“Yusa Jeenka Yus aujtai jéaiti.” Antsu átumka kasa matsamtaiya nútikiarme” tímiayi.

¹⁴ Nuí Yusa Jeen jii kusurarusha shutuapsha Jesusan tariarmiayi. Túramtai tsuáramiayi. ¹⁵ Tura Israer-shuar pátrisha tura Israer-shuara jintinniurisha aents tujinti-amun Jesus túrakui íisar kajerarmiayi. Nu arantcha uchi Yusa Jeen “Juna weatrj uunt akupin Tawit asamtai

nankaamakuiti” untsumainiakui Jesusan ti kajerarmi-ayi. ¹⁶ Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áusachukaitrum. Júnis tawai,

“Uchisha kuírchisha Yusa náariin imiá shiir awaj-tusarat tusa Yus tsanekatkaiti.” Tu áarmaiti.

¹⁷ Nuna tinia ikiuiniak Jerusaréñnumia jiiñki Petania péprunam we nuí kanarmiayi.

Jesus iikiu numin yumíñkramiayi
(Márkus 11.12-14, 20-26)

¹⁸ Kashin tsawaar Jerusaréñnum waketas Jesus tsukaarmiayi. ¹⁹ Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiai. Túra numin tímiayi “Atakka nerechattame.” Takui nu chichamaik káarmiayi.

²⁰ Nuna wáiniak ni unuiniamurj ti enentáimprar ani-asarmiayi “¿Urukaku imiá wárik jaka?”

²¹ Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai. ²² Ashí Yus áujeakum seamna nu, Yus nekas enentáimtakum seakmeke, wáinkiat-tame” tímiayi.

Yusa kakarmarjijai Jesus takasmiania nu
(Márkus 11.27-33; Rúkas 20.1-8)

²³ Yusa Uunt Jeen Jesus wayá unuiniamiayi. Turaj Israer-patri uuntrj tura Israer-shuara úuntrisha Jesusan tariar aniasarmiayi “¿Yana chichamejai ju túram. Ya ju túratniuncha akuptamkait?” tiarmiayi.

²⁴ Tutai Jesus tiarmiayi “Wisha aniañtaj tusan wakera-jrume. Ju áirkakrumniñkia Wisha yana chichamejai túraj nuna ujaktatjarme. ²⁵ Wats, ¿ya imiakratin Juan kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túram-tatji. ²⁶ Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi. ²⁷ Nuyá Jesusan “Nékatsji” tiarmi-ayi.

Tutai Jesussha aíñniak “Wátsek, Wisha núnisnak akup-tukua nuna ujakchattajrume” tímiayi.

Jimiará uchi tiarmia nuna áujmatsamiania nu

²⁸ Jesus unuiniak tiarmiayi “Enentáimpratarum. Shuar uchin jímiar an takakuuyi. Nuna chikichkin chicharuk timiai “Uchirú, arakur júuktin yamáí wetá.”

²⁹ Tutai uchi “Atsá, nakitajai” timiai. Tayat urum enentáimiar takaumai.’

³⁰ Nuyá aparj chikichnasha werí núnisan timiai.’

‘Tutai uchi “Apawa, páchitsuk wetajai” timiai, túrasha wéchamai.’

³¹ “¿Túa ni aparj wakeramun umirkama?” tímiayi Je-sus.

Tutai “Emkaa nu” tiarmiayi.

Tuiniakui Jesus timiayi "Nekasan tajarne, yajauch shuar ainia nu tura tsanirma ainia nusha atumka pachiintsrumniñ nii emka Yus akupeamunam pachiinkartatui. ³² Iis, imiakratin Juan penker wekasatniun etserkamiayi, turasha antukchamarne. Antsu yajauch shuar ainia nu tura tsanirma ainia nu umirkarmiayi. Nusha wainkiaitiatrum atumi tunaari enentaimtur-chamarne' timiayi.

Yajauch takaun áujmatsamiania nu
(Márkus 12.1-12; Rúkas 20.9-19)

³³ Ju chikich áujmatmasha antukturum. Nunka nérentin uwa ajan ajammai. Tura wenuimiai. Uwa neketaincha najanamai. Kumpin jancha najanamai. Tura mash penker iwiar shuar wáitrukarti tusa apujkimiai. Tura ninkia yaja nunkanam wemai. ³⁴ Tura júuktin tsawant jeamtai juuk nakak akúptúrkartí tusa chikich takarniurí akupkamai. ³⁵ Tura nuí pujuinia nu, akupkamun achikiar chikichnaka katsumkar, chikichnasha máawar, chikichnasha kayajai tukurar máawarmai. ³⁶ Túrawarmatai nérentin takarniun nuna nankaamas akupramai. Ataksha nuí pujuarmia nu núnisañ túrawarmai. ³⁷ Amúamunam ni uchirín akupeak "Winia uchir asamtai umirkachartimpiash" timiai. ³⁸ Turasha nu takau nérenniu uchirín wainkiar "Nuna aparí jakamtai juna mashi júkishtatuak, tiarmai. Maatai, túrar ii nérentin ajastai" tiarmai. ³⁹ Tiar achikiar arant júkiar nuí máawarmai." ⁴⁰ Tinea Jesus aniasarmiayi "Nunka nérenniurí taa nu takaun zitiurkatin?" timiayi.

⁴¹ Tutai tiarmiayi "Nu shuar ti yajauch ásarmatai waitnentsuk máawartatui. Tura nu ajan chikich takaun neren akanak nin susannia nuna apujsettawai" tiarmiayi.

⁴² Tuiniakui Jesus timiayi "Átumka Yus-Papikia zpenkek áujchaitrum? Júnis áarmaiti:

"Jeá jeamin utsankarmia nú kaya ashí kayajai nankaamas apujsamuiti. Núnaka ii Uuntri Yus túraiti. Iisha íisar ti enentáimtaji." Tu áarmaiti.

⁴³ Tuma asamtai tajarne, Yusna írunna nu wainkiatárum tusa suramsamuitiat atumíya juna chikich aents súnastatui. Niisha awantukiartatui. ⁴⁴ Tura shuar nu kaya tukumainia nuka kupintrartatui. Tura nu kaya shuarnum iniarka tsai tsai awajsattawai auka" timiayi Jesus.

⁴⁵ Israer-patri uuntri sha Pariséusha Jesus áujmatman antukar "in túramji" tusar achiktaj tiarmiayi. ⁴⁶ Tura ashí aents "Jesus Yúsnan étserui" tuinia ásarmatai nin ashankarmiayi.

Métek-taku chichamjai nuatnaiyamun Jesus áujmatsamiania nu

22 Jesus ataksha áujmatuk juna timiayi: ² "Yus akupeamunam pachiinkartin júnis enentáimpramniaiti. Uunt akupin ni uchirí nuáteakui nampermamai. ³ Túrak ni takarniurín ipiaamautarum tusa akupkarmai. Tura ipiaamusha nakitrarmai. ⁴ Ataksha chikich takarniuncha ipiaamakrum ju titiarum tusa akupkarmai. ""Mash yurumkan iwarajai, tawai, titiarum, timiai.

"Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti," tawai" titiarum" timiai. ⁵ Tá-maitiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai. ⁶ Chikichcha ipiaakratniun achikiar yajauch awajarmai, tura chikichnaka máawarmai. ⁷ Túramtai uunt akupin ti kajek, ni suntari mash máatarum túrarum ni jeé mash ekeemáktárum tusa akupkarmai. ⁸ Nuyá ataksha ni takarniurín akupkamai. "Nuatnaikiatin jisat mash iwiaramuiti, timiai. Tura nu ipiaamu winichmin armai. ⁹ Tuma asamtai pepru jintí werum ashí shuar náñkamas wáintrum nu ipiaatarum" timiai. ¹⁰ Takui takarniurí jíinkiar pepru jintín wajainian, yajauch shuarnasha penker shuarnasha, ashí ipiaawarmai. Túramtai jeá piákmai.'

¹¹ 'Nuyá uunt akupin ipiaamun ísartaj tusa wayamai. Nuí shuaran penker iwiarmamprachun wainkiamai. ¹² Tura timiai "Umpá, zুরুamtai nuatnaiyamunam entsatai pushí entsatsuk wayam?" Tutai nu áishman tákamtak pujusmiayi. ¹³ Nuyá uunt akupin yurumka ajaaman timiai "Achikrum nawenmasha uwejnusha jíinkiarum aa jíikrum kiritniunam ajapatarum. Nujsha ti úutin ti wáitsatin átatui" timiai. ¹⁴ Kame untsurí ipiaamu áiniawai antsu ishichik achikma áiniawai."

Uunt akupin Sésar akiktinia nu
(Márkus 12.13-17; Rúkas 20.20-26)

¹⁵ Nuyá Pariséu chichaman najatawar uyumtikiatai tusar tiarmiayi. ¹⁶ Túrawar ni shuarincha tura akupin Erutisa nemarniurisha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmai. Niisha jeariar Jesusan tiarmiayi "Uuntá, amesha nekas chicham chichaame. Nu nékaji. Chikich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintíatsme, tiarmiayi. ¹⁷ Tuma asamtai ju nekaatai tusar wakeraji. zUunt akupin Sésar akikminkiait?" tiarmiayi.

¹⁸ Jesus ni yajauch enentáijiai aníam nekáa tiarmiayi "Aya shiir chichamtiniaitrum. zUrukamtai uyumatkiarkatin wakerutarum? timiayi. ¹⁹ Wats, Sésar akiktinia nú kuit itartitiarum." Takui chikichik kuítian itiararmiayi. ²⁰ Nuna iis Jesus aniasarmiayi "zJuí yana yapimpiait tura yana naarí áarmait?"

²¹ Tutai "Uunt Sésarna" tiarmiayi.

Tuiniakui Jesus chicharuk tiarmiayi "Nuikia uunt Sésarna nu, Sésar susatarum. Tura Yusna nusha Yus susatarum" timiayi. ²² Tura nuna antukar ti enentáimprarmiayi. Tura ikiuniak wearmai.

Jesusan jakamunmayá nantaktinian aniasarmiania nu
(Márkus 12.18-27; Rúkas 20.27-40)

²³ Nu tsawantak Satuséusha Jesusan tariarmiayi. Satuséuka jakamunmayá nantakchatniuiti tuiniawai. Nuna tiniu ásar juna Jesusjai áujmatsarmiayi. ²⁴ "Uuntá, Muisais juna áartampramiai, "áishman uchin yajutmatsuk jakamtainkia ni yachi nu nuwan nuatak ni

yachin yajútmátrati," tu áarmiayi, tiarmiayi. ²⁵ Ayu, íi shuarnum siati (7) yáchintin áarmiayi. Iwiajri nuatak uchin yajutmatsuk jakamiayi. Tura wajen ni yachin iki-urkimiayi. ²⁶ Tura niisha nuatak uchin yajutmatsuk jakamiayi. Tura chikichcha núnisañ jakamiayi. Tura chikichcha siati armia nu ashí nuatkar jákarmiayi. ²⁷ Nuyá nuwasha jakamiayi. ²⁸ Jakamunmaya nantakiar ¿yaki nekas ni aishri ati? Ashí nin nuatkacharmakia" tiarmiayi.

²⁹ Tuíniakui Jesus tímiayi "Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne. ³⁰ Nekaatarum. Jakamunmaya nantakiaruka nuatkachartatui. Antsu Yusa suntariñ nayaimpiniam pujuinia núnisar nuartichu pu-jusartatui. ³¹ Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujsachukaitrum. Júnisañ áarmiayi:

³² "Wiitjai Apráma Yúsrintjai, Isaka Yúsrintjai, Jakupu Yúsrintjai." Tu áarmiayi.

Watsek, Yusa jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjaj iwiaaku pujuiniak nantakmin áini-awai" tímiayi. ³³ Ashí aents nuna antukar nu jintintiam ti enentáimprarmiayi.

Yus akupkamu imiá enentáimtustinia nu

(Márkus 12.28-34)

³⁴ Satuséu Jesusan aiktiniam tujinkiamatai Pariséu nuna antukar iruntrarmiayi. ³⁵ Tura chikichik Pariséu jintintin asa Jesusan uyumtikiataj tusa aniasmiayi ³⁶ "Uuntá, ¿túa Yus akupkamu imiá nañkaamas enentáimtustiniait?"

³⁷ Tutai Jesus tímiayi "Júiti: "Ame Yúsrum ashí enentáimjaj aneeta. Ashí ame wakanmijajisha tura tuke enentáimtusam aneeta." Tu áarmaiti, tímiayi. ³⁸ Núiti emka ashí akupkamu nañkaamas enentáimtustinia nu. ³⁹ Chikichcha jujaj métek-taku awai. Nusha tawai: "Ame írutramuram ame ayashim aneamna nútiksamek aneeta." ⁴⁰ Nu jímiar akupkamu umirkam ashí Muisais akupkamia nusha tura ashí Yúsnan etserin unuiniarmia nusha umirkattame" tímiayi.

Kristu Tawit weeaitiat Yusa Uchirinti

(Márkus 12.35-37; Rúkas 20.41-44)

⁴¹ Tura Pariséu tuke irunar pujuiniakui ⁴² Jesussha aniasarmiayi "Kristu tutai ¿ya weeá átiniait. Warí enentáimtarum atumsha?"

Takui "Tawit weeá átiniait" tiarmiayi.

⁴³ Tuíniakui Jesus tiarmiayi "Nuikia ¿urukamtaí Tawit, Yusa Wakaní "titia" tutai, Kristun "winia Úuntur" tímia? Iis, Tawit juna tímiayi:

⁴⁴ "Uunt Yus winia Úuntron juna tímiayi: "Akupin puju-tainium, winia untsuruiniñ, pujusam náarsata. Ashí ame nemasrumin nupetkan Ámin umirtamkarti tusan amastatjai" tímiayi Yus." Tu tímiayi Tawit.

⁴⁵ Watsek, Tawit Kristun "winia Úuntur" tajsha ¿itiorak ni pampañmarí áti?" tímiayi Jesus. ⁴⁶ Nuna takui penke-

sha ájkcharmiai. Túrawar atakka uyumamtkiatai tusar aniascharmiai Jesusan.

Jesus Pariséuncha Israer-shuara jintiniurincha "yajau-chitrume" timiania nu

(Márkus 12.38-40; Rúkas 11.37-54; 20.45-47)

23 Jesus ni unuiniamurincha tura ashí shuárnasha tiarmiayi ² "Israer-shuara jintinniurisha tura Pariséusha Muisais akupkamun paant ujatmainiawai. ³ Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiyat nusháa túrin áiniawai. ⁴ Ti itiurchat ana nuna aku-peenak ti emeram entsaktinia áintsañ áentsun apujtuniawai. Túrasha chikichik uwejéjajisha ishichkisha takuitniun nakitiainiawai. ⁵ Aya shuar íirsarti tusar ashí túruiniawai. Ashí shuar péñker enentáimturarti tusar Yus-Papin nijiañcha tura kunturincha ti wanakaram awajsar anujak yujainiawai. Tura nu arantcha pushiriñ sasariarman ashí shuarjaj nañkaamas esaram awajas wekainiawai. ⁶ Nampernumsha péñker iwiamunam pujustinian wakeruiniawai. Iruntainmasha nañkaamantu ajasa pujustinian wakeruiniawai. ⁷ Jintiá wekainiaksha ashí aents áujtuiniak "Jintínkiartiniá" turutiarti tusa wakeruiniawai" tímiayi.

⁸ "Túrasha átumka ashí shuar "Jintínkiartiniá" turutiarti tusa enentáimsashtiniaitrum. Átumka nuámtak yáchintrume. Átumka chikichik jintínkiartin ni naarí Kristu takakrume. Nu asamtai "Jintínkiartiniá" túram-charmin áiniawai. ⁹ Ju nuñkanmasha shuar "Aparú" ti-irap. Chikichik nayaimpiniam pujana nu atumí Aparín-ti. ¹⁰ Atumi untrí aya Krístuk asamtai "Uuntrú" túram-charmin áiniawai. ¹¹ Antsu átum írutkamunmaya uunta nuka peejchach átiniait. ¹² Shuar nañkaamantu ajastaj tákuñkia Yus nin peejchach awajsattawai. Antsu peejchach ana nuna Yus nin nañkaamaku awajsattawai" tímiayi.

¹³ "Maa wáinkiatárum jintinniutirmesha, Pariséu-tirmesha. Ántrarum shiir chichamtiniaitrum. Yus aku-peamunam wayatin waiti epenniuitrum. Atumsha wayatsuk chikichcha wayataj tuinia nusha surit-niuitrum."

¹⁴ "Maa wáinkiatárum jintinniutirmesha, Pariséu-tirmesha. Ántrarum shiir chichamtiniaitrum. Wajé jee atankiurum aents enentáimturarajñ tusarum ti esaram Yus áujtiniuitrum. Túrin asarum átum ti asutniát-niuitrum."

¹⁵ "Maa wáinkiatárum jintinniutirmesha, Pariséu-tirmesha. Ántrarum shiir chichamtiniaitrum. Nuñkan-masha nayaantsanmasha yajá wekainiuitrum chikichik shuar winí nemartusat tusarum. Tura atumi nemariñ ajasmatai atumjaj nañkaamas tunáa sumamam-nia awajearme."

¹⁶ "Wáinkiatárum átumka. Jintínkiartiniaitrum nékachu asarum kusurua ániuitrum. Ju jintíarme: "Shuar nekasan tajai tusa Yusa Jeeñ páchiakka nii tana nuna umitsuk ikiukminiait. Antsu nekasan tajai tusa Yusa Jeeñ kuri ana nuna páchiakka ti nekas umiktini-aiti" tñiuitrum. ¹⁷ Nétsetrum. Yúsjajñkia ashí kuri án-

trachukait. Antsu Yusa Jeeen írunna nuka aya nuñ ikiusma asa Yusna ajasuiti. Tuma asamtai kurijjaj nañkaamas Yusa Jee enentáimtustiniaiti. Enentáimcha asarum kusurua áinin wáakuitrume. ¹⁸ Nu arantcha tñiuutrume: “Shuar nekasan tajai tusa namañ-maar-Yus-sútain páchiakka nii tana nuna umitsuk ikiukmini-aiti. Antsu Yús-sutainiam namañ patasman páchiakka ti nekas umiktiniaiti” tñiuutrume. ¹⁹ Nétsetrume. Penké namañ Yusjaj ánrachukait. Aya Yús-sutainiam patasma asa nu namañ enentáimtuschatniukait. Enentáimcha asarum kusurua áinin wáakuitrume. ²⁰ Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaincha tura nuñ patasmancha máimetek páchiawai. ²¹ Núnisañ shuar Yusa Jeeen páchiakka aya nunak páchiatsui antsu Yus nu jeanam pujú asamtai nunasha páchiawai. ²² Núnisañ shuar nayaimpin páchiakka Yus pujutainchsetrume. Penké namañ Yusjaj ánrachukait. Aya Yúa tura Yus nuñ pujana nunasha páchiawai.’

²³ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniatrume. Kumintsu nukésha, anisa nukésha, menta nukésha tias (10) akantram chikichik akankamu Yus súwitrume. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrume. Yus nekas enentáimtustincha, waitnentáimturincha tura tuke péñker túratniusha enentáimtsuk ikiuwitrume. ²⁴ Átumka jintinkiertiniatitrum nékachu asarum kusuru áiniuitrume. Kutanam yajasmach eñketu wáinkiumeka júwitrume. Túrayatrum kamiriu wáinkiumekakawai nañkaamas úunt aiñ takamtsuk kújawitrume.’

²⁵ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniatrume. Átumka tsapasha pininsha initiaaniñ nijiatsuk aya pátatek nijiawitrume. Núnisrum pátatek shiir awajmamniuitrume tura enentáimkia kasamkatniusha tura chikichna wakeruktincha nujaj piákuutrume. ²⁶ Kusuru áiniuitrume, Pariséutirmeá. Antsu emka initiaani tsapasha pininsha nijiaktarum. Túrakrumniñkia pátatkesha mai péñker átatui. Núnisrum atumsha atumi enentáin ana nu shiir awajsarum pátatkesha shiir áatrume.’

²⁷ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniatrume. Iwiarsamu pújujaj yakarar shiir awajsamua áiniuitrume. Aanñ shiir áiniawai. Tura initkia jaká ukunchijjaj piákuuti. ²⁸ Núnisaitrume atumsha. Chikich shuar íismaka ti shiira áiniuitrume. Túrasha atumi enentáinkia ashí mujmiat piákuuti.’

²⁹ ‘Maa wáinkiatarum jintinniutirmesha, Pariséutirmesha. Ántrarum shiir chichamtiniatrume. Yaunchu Yúsnan etserin iwiarsamunam átumka shiir enentáimtakrum jea jeamkaitrume. Tura péñker shuar yaunchu jákarusha shiir enentáimturtañ tusarum ni iwiarsamu shiir awajearme. ³⁰ Túrakrum ju tñiuutrume: “Íikia yaunchu ii weatrijjaj pujaitkiurkia Yúsnan etserin máatin yáimkiachajjaj.” ³¹ Nujaj ti paant chichaarme atumsha. “Íi weatrij Yúsnan etserniun máawar tunáa

túrin ármiayi” tárume. Tura “Yáimkiachajjaj” táyatrum, atumsha métek túrin asarum “Niijaj méteketjaj” tárume. ³² Wats, atumi weatrij nañkamawarmia nu átum amuktatrume’ tñiayi Jesus.

³³ ‘Napia áiniuitrume. Shuar aya yajauch awajniuitrume. Túmatirmesha Yus tunáa shuaran jiniun akupkartatna nuyá žitiurak uwempratarum? ³⁴ Untsurí shuaran akuptuktatjarme. Yúsnan etserniuncha, ti nekancha, jintinkiertiniasha akuptuktatjarme. Tura atumsha chikich máattarme, chikichcha krúsnum ajin-truarum máattarme, chikichcha iruntai jeanam asutiáttarme, tura chikichcha ashí nuñkanam áinratarme. ³⁵ Nu tura asarum péñker shuara numpé puarma nujaj átum sumamattarme. Yámankamtaik Apir ti péñker shuáraitiat máamuyayi. Tura ukunam Perekíasa uchirí Sakarías atumi uuntri Yusa Jee ámanum namañ-maar-Yús-sutaiñ ajapén aténkamunam máawarmiyai. Wats, Apir máamunmayá Sakarías máamunam ashí péñker shuar ti untsurí máamujaj sumamattarme. ³⁶ Nekasan tájarme, yamá pujuiña nú shuar ashí nujaj sumamawartatu’ tñiayi Jesus.

Jerusaréñnumiá shuaran Jesus aneak úutmiania nu (Rúkas 13.34-35)

³⁷ ‘Jerusaréñnumiáirmeá, Yúsnan etserin máini-aitrume. Yus akatar akupturmakmasha kayajaj tukuram máiniatrume. Túrin árumniñ waitnentajrume. Atash ni uchirín weana áitkiasnak weartinian wakerimjarme, tura nakitramarme. ³⁸ Iistarum. Ame pépruram ajapamuiti. ³⁹ Tura “Yusa náariñ winiana nu, shiir atí” títiatrumna nu tsawant jeatsajñ penké wáitkiashtatrume. Nuna tájarme” tñiayi Jesus.

Yusa Uunt Jee saanaktinian Jesus ujakmiania nu (Márkus 13.1-2; Rúkas 21.5-6)

24 Jesus Yusa Uunt Jeeñiá jiinki weaj ni unuiniamurí nin tariar jeañ iniaktusar áujmatsarmiyai. ² Tura Jesus tiarmiayi “Nu mash yamá wáinrume. Tura nekasan tájarme ukunmañka mash saanaktiatui. Chikichik kayaksha ekenramurí atsuttawai” tñiayi.

Amúamu tsawant nekaatin (Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear niñki nuñ pujasar ni unuiniamurí Jesusan aniasarmiyai “¿Nusha urutaik túrunatí. Tura ame tátincha tura nuñka amuukatin tsawant jeakuisha warijjajñ nekaattají? Nu ujatkata” tiarmiayi.

⁴ Tuñiakui Jesus tñiayi “Aneartarum, anañkramawairap. ⁵ Untsurí shuar winia náarun pachisar “wi Krístuitjaj” tiar untsurí shuaran anañkawartatuí. ⁶ Ti untsurí meset chicham antuktatrume túrasha sapijmikairap. Núnisañ átiniaiti nuñka amúatsajñ. ⁷ Apachcha chikich nuñkanmayá apachjaj máaniawartatuí. Tura ti tsukasha átatui. Suñkursha ti pampartatuí. Uyusha ti uyurkartatuí. Nuka untsurí nuñkanam ashí túrunawartatuí. ⁸ Nujaj ti wáitsatin aya yama nañkamui’ tñiayi.

⁹ Nuyá atumniasha yajauch awajsarti tusa surut-makartatui. Tura mantamawartatui. Tura winia naar pachia asakrumin ashí shuar mujramkartatui. ¹⁰ Nu tsawantaj untsurj shuar Yúsan iniaisartatui. Túrawar nuamtak mujniainiak surunairartatui. ¹¹ Untsurj shuar wáitruiniak “wi Yúsnan etserniuitjai” tiartatui. Túrawar untsurj shuáran nusháa enentáimtikrartatui. ¹² Tura tunáa ti ákui nuamtak anenaichartatui. ¹³ Tura shuar ashí nuna tuke katsuntra nu uwemprattawai. ¹⁴ Ashí aents nekaawarat tusa Yus-Chicham ashí nuñkanam etsernaktatui. Túramtai amuukatin tsawant jeattawai’ tímiayi.

¹⁵ Shuar juna áujea nu enentáimprati. Kame Jesus tímiayi “Yúsnan etserin Taniar mujmiamtik tuke emes-ratin ana nuna yaunchu aar etserkamiayi. Nuka Yusa Jeen wantinkiamtai ¹⁶ ashí shuar Jutía nuñkanam írruna nu, muranam pisararti. ¹⁷ Ti wárik pisartin asamtai shuar jeə yakí pujaksha tura shuar ajanam wekaakusha jeá waketki warirj jukitijá tichati. Antsu nuyaj wárik pisarti. ¹⁹ Nu tsawantaj nuwə ajamtincha tura kuírchin takaku ainia nusha ti wáitsartatui. ²⁰ Ayampratin tsawantajsha tura michá nántutincha nu pisartin tsawant áchatu tusarum Yus seatarum. ²¹ Maa, nu tsawantaj ti wáitsatin átatui. Ti yáunchusha núnisañ wáitsatin atsuuyayi. Ukunmasha atsuttawai. ²² Nu wáitsatin ti esarmaitkiuñkia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai’ tímiayi.

²³ “Tura atumin “Júiti Kristu,” tuíniakuisha tura “Nui pujawai” tuíniakuisha anturkairap. ²⁴ Untsurj shuar Kristuitjai tusar wantinkiertatui. Untsurjsha “Yúsnan etserniuitjai” tiartatui. Tura shuáran anañkataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin ániakuñkia anañkawarainti. ²⁵ Túrunatsañ nuna emka ujaajrume. ²⁶ Tuma asamtai “Iis, Kristu nui aents atsamunam pujawai” túramainiakuisha nui wéerap. “Jui úymak pujawai” tuíniakuisha anturkairap. ²⁷ Núnisañ úymkan táchattajai. Peem péetuk ti wárik ashí nuñkanam wáinkiachminkiait. Núnisnak wi Aents Ajasuka winiakun paant wantinkiertajai. ²⁸ Wats, jaka tepaana nui chuañ káutkachartatuak’ tímiayi.

Kristu tátrinj

(Márkus 13.24-37; Rúkas 21.25-33; 17.26-30, 34-36)

²⁹ Ti wáitsatin nañkaamasmatai ti wárik tsawáj nantu kajinkiattawai. Tura kashí nantusha etsantrastatui. Yaasha ashí muchitrattawai. Nayaimpiniam kakaram ainia nusha peantrartatui. ³⁰ Nuñkia Wi Aents Ajasuka, táiniur paant átatui. Tura ashí nuñkanmaya aents Wi winiáj wáitkiar asuttiamattaji tusar útiartatui. Wisha ti kakaram tura Yusa wincharijjaj yurañminiam winiáj wáitkiartatui. ³¹ Yusa suntarjñ kachu kakaram umpuarterum tinia akupkamtai nu suntar ashí nuñkanmaya ashí Yús-shuaran, Yus achikma ásarmatai, irurartatui’ tímiayi.

³² Tikiu numirj nakumea nu nekaatarum. Ni nuken eteakui “esat nantu jeatemayi” tátsurmek. ³³ Núnisañ ashí ju wáinkiurmeka “amuukatin tsawant nekas jeatemayi” tíiniatrumek. ³⁴ Nekasan tájarme, yamá aents pujuinia nu amúatsañ ashí túrunattawai. ³⁵ Nuñkasha nayaimpisha amuukartatui antsu winia chichamur amuukashtatui’ tímiayi.

³⁶ Tura nu túrunatin tsawant nekanachminiaiti. Yusa suntarjsha nékainiatsui. Wisha Yusa Uchirjñtiatnak nékatsjai. Antsu aya winia Aparuk nékawai’ tímiayi.

³⁷ “Wi táiniur jeamtai yaunchu Nuai pujumia nú tsawantin túrunamia núnisañ átatui. ³⁸ Nu tsawantin, tuke amaartsañ, aya júnisañ aa asamtai yurumuk umarar pujuarmiayi. Nuatnainiarmiayi. Ni nawantrjñcha nuatmamtikiarmiayi. Tura tumá pujuiniaj Nuai uunt kanunam enkemamtai ³⁹ nu aents tuke nékainiatsañ ama amaarak mash amuukarmiayi. Núnisañ átatui Wi táin jeamtai. ⁴⁰ Nu tsawantaj jimiara shuar ajanam pujuttawai. Chikichik junaktiatui tura chí-kichkia ikiunkittiwai. ⁴¹ Núnisañ jimiara nuwə shana nekeak pujuttawai. Chikichik junaktiatui chikichka iki-unkittiwai’ tímiayi.

⁴² “Nu asamtai atumsha iwiarnarum pujustarum. Nekaachminiaiti uruk ájintsuk taritjarum. ⁴³ Tuma asamtai aneara pujustarum. Wi nekaachmanum tátin júnisañ enentáimpramniaiti. Shuar ju kashi kasa tátinian nekaañka kánutsuk kasa táawaj tusa iwiarnar nákasainti. Núnisrum aneara pujustarum.’

Pénker takamtikniuncha yajauch takamtikniuncha Jesus áujmatsamiania nu

(Rúkas 12.41-48)

⁴⁵ “Shuar pénker uminian tura pénker enentáimniun áujmatsattajai. Nuna uuntri yajá irauweak “Yurumátin jeamtai winia takartin ayuratarum” tichanpiash. ⁴⁶ Nu takamtikniuncha ni uuntri taa takatrin tímiatrusañ túran tariñkia shiir enentáimtusainti. ⁴⁷ Nekasan tájame, umin asamtai ni uuntri ashí ni warirjñ wáitrukát tusa takatan susattawai. ⁴⁸ Antsu úuntur wau táchat-tawai tusa takamtikin ni uuntri yáintrin yajauch awajeak tura takatsuk aya yurumátniun tura nampektinian wararkuñka nu takamtikin yajauchiiti. ⁵⁰ Turaj ni uuntri aya aneachma taa nu takamtikniun, yajauch asamtai, ⁵¹ ti kakaram asutiattawai. Yajauch shuar pujuinia nui akupkattawai. Nuñsha ti wáitiak ti úttiatiui’ tímiayi Jesus.

Jesus tias (10) nuwə áujmatsamiania nu

25 “Yus akupeamunam pachinkiatin júnis átatui. Nuatnaikiatin jísat akui tias nuwə natsa kantiran akaawar nuátkattana nu áishmañkan inkiuñ jeá itiatu tusar wearmai. ² Senku nuwə enentáimcha armai. Tura chíkich senku nuwə enentáimin armai. ³ Enentáimcha arma nú nuwə aya akaamunak juíniak amuukamtai yaraatniun asutin júkicharmai. ⁴ Antsu chíkich senku núwəka akaamuncha juíniak tura ataksha amuukamtai yaraatniun asutin júkiarmai. ⁵ Tura jinkiarmatai nu-atkatin áishmañ wari taachkui karj pujakui kanarar-

mai. ⁶ Nuyá kashi ajapén shuar untsukum “Pai nu-
atkatín winiawai. Werirum inkiuntarum” timiai. ⁷ Tu
untsumon antukar nantakiar kantiran akaatai tusar
pujursarmai. ⁸ Nuyá seṅku nuwá enentáimcha arma
nu, chíkich nuwá enentáimniun tiarmai “Incha atumi
asutirij ishichik ajamprusaitia. Ii kantirisha kajiniawai.”

⁹ Tutai chíkich seṅku nuwá tiarmai “Atsá, warí incha
jeartamchattaji. Tura atumnia penké jeashtatui.
Nekaska surutainium werum sumaka utumtarum”
tiarmai.’

¹⁰ Tura nuyá seṅku nuwá enentáimcha arma nu,
asutian sumak utitai tusar wéaraj ukunam nuatkatín
áishmaṅ tamai. Túramtai enentáimin nuwá arma nuka
nuatnaikiatin námpernam nuatkatniujaj wayawarmai.
Túramtai wáitin epeniarmai. ¹¹ Tura epeniaraj enen-
táimcha nu táarmai. Tura tiarmai “Úuntá, waiti uratri-
tia.”

¹² Tu untsumainiakui nu uunt kajerak chichak “Cha,
zyátsukaitrum? Penké nékatsjarne” tiarmai.” ¹³ Jesus
nuna áujmatas umik tímiayi “Aents Ajasuitjai tura tátin
tsawantrusha tura uruk aiṅ tátaj nusha nékatsrume.
Tuma asarum tuke iwiarnarum pujustarum’ tímiayi.

Kuit susamun áujmatsamiania nu

¹⁴ Núnisan Wi tátin júnisaiti. Shuar chíkich
nunṅkanam wéak_u ni takarniurjṅ untsukar ni kuítrjṅ
akanak súsarmai. ¹⁵ Chikichkiniak seṅku mir (5.000)
kuítian susamai. Chikichnasha jimiará mir (2.000) kuít-
ian susamai. Tura chikichnasha chíkichik mir (1.000)
kuítian susamai. Nii takastin jearma nujaj métek súsar-
mai. Tura ikiuak yajá wemai. ¹⁶ Takarjṅ seṅku mir kuít-
ian achikmia nujaj takakmas ataksha seṅku mir kuítian
patakmai. ¹⁷ Chikichcha núnisaṅ jimiará míran achik-
mia nujaj takakmas ataksha jimiará míran patakmai.
¹⁸ Tura chíkich shuar ni uuntrí kuítrjṅ chíkichik míran
achikmia nuna wáṅ taur úúkmai.’

¹⁹ Nuyá ukunam nu shuara uuntrí támai. Tura kuítian
súkiarma nujaj itiurkarmakit tusa untsukarmai. ²⁰ Em-
ka seṅku mir kuítian achikmia nu tamai. Nuyá ni úun-
trjṅ chíkich seṅku mir patakman suak timiai “Uuntá,
seṅku mir kuit surusmame. Pai, atak seṅku míran
patasmajai.”

²¹ Takui ni uuntrj timiai “Ti penker takakmauwitme.
Nekas uminiaitme. Ishichkijjajsha ti penker takakma
asakmin ti núkap yamaikia amastatjai. Winí wayam wi-
jjaj ti shiir warasta” timiai.’

²² Nuyá chíkich shuar jimiará míran achikmia nu tarí
timiai “Uuntá, jimiará mir surusmame. Pai, ataksha
jimiará míran patasmajai.”

²³ Takui ni uuntrj timiai “Ti penker takakmauwitme.
Nekas uminiaitme. Ishichkijjajsha ti penker takakma
asakmin ti núkap yamaikia amastatjai. Winí wayam wi-
jjaj ti shiir warasta” timiai.’

²⁴ Nuyá chíkich shuar chíkichik míran achikmia nu
tarí timiai “Uuntá, ti kajen asakmin tura araachiatam
tura atsaamprachiatam júurtuktarum tiniu asakmin
²⁵ sapijmiakun ame kuítrumniaka nunká táutran úúk-
majai. Pai, juíiti ame surukmiam nu” timiai.’

²⁶ Takui ni uuntrj timiai “Ámeke yajauchiitme. Aya
nákiitme. Wi araachiatan tura atsaamprachiatan júur-
tuktarum tíniuitme túrutsumek. ²⁷ Tu enentáimkiunka
zurukamtai kuit-iruntainiam ikiirtuschamam? Nuikia
wi táakun patasan achikiájaj” timiai. ²⁸ Nuna tinia nuj
wajainian tiarmai “Ju shuar chíkichik mir kuit
atankirum tias mir kuítian takaka nu susatarum.

²⁹ Kame núkap takakna nú shuar ataksha patatnasta-
tui tura ampiniartatui. Antsu ishichik takakna nusha
ishichik takakuiat jurunkittiwai. ³⁰ Ju umichu shuar-
sha ṅṅ kiritniunam ajapatarum. Nu ti wáitiak ti úuttia-
tui” timiai”. Tu áujmatsamiayi Jesus.

Akantratin átatna nu

³¹ Jesus áujmatuk tímiayi ‘Aents Ajasuitjiana nu ashí
akupin ajasan Yusa suntari éṅkekma winittijai. Tura
Uunt Akupin asan shiir pujutarij pujustatjai. ³² Túram-
tai ashí nunṅkanmayá aents Winia irunturartatui.
Túrunawarmatai akantrartatjai. Murikiu wáinin
kachurtinian tura kachurtichujaj akanea nútisanak
shuáran akantrattajai. ³³ Tura kachurtichunka, penkera
nuna, untsuuruinj awajsartatjai. Tura kachurtinniaka,
yajauchia nuna, menaruinj awajsartatjai. ³⁴ Túran
nekas Uunt Akupin asan untsuuruinj wajainian títiatjai
“Atumniaka winia Apar shiir awajtamaitrume. Wi aku-
peajna nuj winitiarum. Yus nunṅkan najanamia tími-
anaik átum nuj warastinian tsanṅkatramkiamiarme.

³⁵ Kame Wi tsukamá wekaj ayurtuamiarme. Kitiama
wekajsha umartin surusmiarme. Wait ajá wekajsha iti-
aararum ajamprusmiarme. ³⁶ Pushir atsajsha átumka
surusmiarme. Jaa tepajsha íiráiamiarme. Sepunam
enketajsha tarum íiráiamiarme” títiatjai. ³⁷ Tutai untsuu-
ruinj wajainia turutiartatui “Uuntá, zurutia tsukamá
wekaamnisha ayuramaji. Urutiá iisha kitiama wekáa
wainkiarsha umartincha amasmaji. ³⁸ Tura urutia wait
ajá wekaamnisha tura pushiram mamurmataisha iisha
amasmaji. ³⁹ Urutia iisha jaa tepamin tura sepunam
enketmin wainkiarsha winitir íimijai?” turutiartatui.’

⁴⁰ Turutainiakui Wi Uunt Akupin asan tiartatjai
“Nekasan tájarne, ashí ju wii shuar péejchachisha
waitnentramarum nu Winia anentakum túraitrume”
tiartatjai’ tímiayi.

⁴¹ Wi Uunt Akupin asan menaruinj wajainian tiartat-
jai “Atumsha yajá wetarum. Yajauchijjaj yuminkra-
muitrume. Yus uunt iwianchi ni suntarijjaj tuke kajinki-
ashtin jinium apeatniua nuj wétatrume atumsha.

⁴² Átumka Wi tsukamá ayurtuachmarme. Kitiamaisha
umartin suruschamarme. ⁴³ Wait ajá wekajsha ikiatra-
chmarme. Pushirun imiamprajsha entsartin sur-
uschamarme. Jaa tepajsha tura sepunam enketajsha íi-
raichmarme” tiartatjai.’

⁴⁴ Tutai niisha turutiartatui “¿Urutia, Uuntá, tsuka-
makmesha, kitiamakmesha, wait ajaknísha, pushiram
imiampramsha, jáakmesha, tura sepunam wait ajá pu-
jamnisha íisha winitir yáinṅchamaji?” turutiartatui.’

⁴⁵ Wi Uunt Akupin asan tiartatjai “Nekasan tájarne,
Ashí Wii shuar, péejchachisha waitnentrachmarum nuj
Winiasha túrutachuitrume” tiartatjai. ⁴⁶ Nu shuarka

tuke wáitsatniunam weartatui. Tura Yus achikma ainia nusha tuke iwiaaku Yusjái pujustinnium weartatui" tímiayi Jesus.

Jesus achiktin chichaman jurusarmiania nu
(Márkus 14.1-2; Rúkas 22.1-2; Juan 11.45-53)

26 Jesus ashí nuna tinia umik ni unuiniamurijn tiarmiayi ² "Atumsha nékarme, Paskua jisat jeatin jimiarchik tsawant ajasai. Nuí Wi Aents Ajasu asamtai krúsnum máawarti tusar surutkartatui" tímiayi.

³ Nuyá Israer-patri uuntrijsa Israer-shuara jintinni-urjsa Israer-shuara úuntrijsa Kaipiasa jeen áarin iruntrarmiayi. Kaipiasa Israer-patri uuntriya. ⁴ Nuí anan̄katin chichamjái Jesus achikar maatai tusar chichaman jurusarmiayi. ⁵ Tura tiarmiayi "Jístatin túrachminiaiti aents téetet ajaraj̄n tusar."

Nuwá Jesusan kuñkuinian ukatramiania nu
(Márkus 14.3-9; Juan 12.1-8)

⁶ Jesus Petania péprunam pujus tunamaru Semuñka jeen pujumiayi. ⁷ Nuí pujaí nuwá ti kuit jeá kuñkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kuñkuinian ukatramiayi. ⁸ Túramtai ni unuiniamurj̄ nuna íisar kajerkar tiarmiayi "¿Urukamtai au kuñkuin imiá kuítniasha áantrasha wasurea? ⁹ Antsu ti kuitj̄ai suruk shuar kuítrincha ainia nuna yáítskesha" tiarmiayi.

¹⁰ Jesus tuinian anturak tiarmiayi "¿Urukamtai ju nuwá yajauch enentáimtarum? Túrutana ju ti péñkeran túrayi. ¹¹ Kuítrincha tuke atumj̄ai pujushtatuak. Antsu Wikia atumj̄ai tuke pujushtatjai. ¹² Ju nuwá kuñkuinj̄ai ukatruarai juka, Wi iwianastin asamtai áitkiarayi. ¹³ Nekasan tájarme, ashí nuñkanam uwempratin chicham etsernakui tuke ju nuwá pachinias etsernaktatui. Túramtai ni túramurj̄ kajinmankishtatui" tímiayi.

Jútas Jesusan surukmiania nu
(Márkus 14.10-11; Rúkas 22.3-6)

¹⁴ Nuyá Jesus tuse (12) unuiniamunmayá chikichik ni naarj̄ Jútas Iskariúti Jesusan suruktaj tusa Israer-patri uuntriijn wémiayi. ¹⁵ Tura jeari tímiayi "Jesusan achikia amakui çurutmá akirkaintrum?" Takui trainta (30) kuítnian akikiarmiayi. ¹⁶ Nu akikiam Jútas itiurak Jesusan súsaraintiaj tu enentáimias wekaimiayi.

Kristu jakamu enentaimtustin námper
(Márkus 14.12-25; Rúkas 22.7-23; Juan 13.21-30; 1 Kurintunam 11.23-26)

¹⁷ Wakapruachu tantan yurumáinia nú námper yama nan̄kamkui Jesusa unuiniamurj̄ tariar aniasarmiayi "¿Tuí paskua námper iwiaarakrin yurumáttam?" tiarmiayi.

¹⁸ Tuíniakui Jesus tímiayi "Péprunam wetarum. Nuí chikichik shuara jeen jearum titiarum "Uunta chichaak "Winia tsawantur ishichik ajasai. Tuma asan paskua

namperan winia unuiniamurj̄ai ame jeemijn yurumátajai" tawai" titiarum" tímiayi. ¹⁹ Tutai ni unuiniamurj̄ wear Jesus timia nuna umikiar paskua nampertin yurumátniun iwiararmiayi.

²⁰ Tura kashi ajasái Jesus ni tuse (12) unuiniamurij̄ai misanam yurumuk pujumiayi. ²¹ Nuí yurumáiniaí Jesus tiarmiayi "Nekasan tájarme, átum pujarmena juýá chikichik Winia surutkattawai."

²² Nuna takui ti kúntuts enentáimprar mai aní awajarmiayi "Uuntá, ¿wiáshitiaj?"

²³ Mai tu awajenam Jesus tiarmiayi "Wi nú pininnuman̄ jimiartukan yuajna ju Winia surutkattawai. ²⁴ Wi Aents Ajasu asan Yus Chicham tana nujaí métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti" tímiayi.

²⁵ Nuyá Jútas suruktaj tana nu Nin tímiayi "Uuntá nuikia ¿wiáshitiaj?"

Takui Jesus tímiayi "Ee, nekas ámetme."

²⁶ Tura yurumuk pujuiniaí Jesus yurumkan achik Yúsan yumingsamiayi. Tura puur ni unuiniamurj̄in suiniak tímiayi "Ju uatarum. Juka winia ayáshruiti." ²⁷ Nuyá pinin̄kian achik Yúsan yumingsamiayi. Tura suiniak tiarmiayi "Júsha ashí umartarum. ²⁸ Juca winia numparuiti. Tura winia numpar puármatai, yamaram chicham nekas uminkiattawai tawai. Tura puármatai untsurj̄ shuara tunaarj̄n tsan̄kurattawai. ²⁹ Tura ataksha átum Yus akupea nuí jeatsrumniñ ju uwa yumirj̄n umarchattajai. Tura tsawant jeamtai atumj̄ai Yus akupeana nuí yamarman umartatjai" tímiayi Jesus.

Pítiur natsantratniua nuna Jesus ujakmiayi
(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearmiayi. ³¹ Nuí Jesus tímiayi "Ju kashi átum Winia ashí natsantrurtatume. Kame Yus-Papinium áarmaiti "Murikiu wáinnium mantuattajai túram murik pisarar-tatui." Tu áarmaiti. ³² Tura nantakin Kariréa nuñkanam Wi émkattajai átum wéatsrumin."

³³ Takui Pítiur tímiayi "Chíkich natsantramainakuisha wikia túrashtatjai."

³⁴ Tutai Jesus tímiayi "Nekasan tájame, ju kashi atash shiniatsaj̄n menaintiú natsantrurtatme."

³⁵ Pítiur tímiayi "Maa, Ámijj̄ai métek mántuiniakuisha pen̄kesha natsantrashtatjame." Ashí ni unuiniamurj̄ núnisan̄ tiarmiayi.

Jesus Jitsemaní ajanam Yúsan áujsamiania nu
(Márkus 14.32-42; Rúkas 22.39-46)

³⁶ Nuyá Jesus ni unuiniamurij̄ai Jitsemaní náartin ajanam jeá tímiayi "Juí pujusrum nákarsatarum. Aranta aj̄ wena Yúsan áujsatjai." ³⁷ Tinia Pítruncha tura mai Sepetéu uchirj̄ jukí wémiayi. Nujsa ti kúntuts enentáimiu wake mesekmiayi. ³⁸ Nuyá Jesus tímiayi "Ti kúntuts jakamnia enentáimjai. Atumsha juí pujusrum Wijj̄ai métek iwiaáa pujutarum." ³⁹ Tinia Jesus arantach we nuí tikishmar tsuntsuma Yúsan áujeak tímiayi "Winia Aparú, Wi túrunatniua nu nusháa iwiamni-aitkiuñkia ju wáitsatniua nu tsan̄katrukaip. Tura Wi

wakeraj núniska áchatí antsu Ame wakeram núnis atí" áujuk tímiayi.

⁴⁰ Nuyá ni menaintiu unuiniamurí pujuiniamunam waketki kanúu pujuinian jeariar Pítrun tímiayi "Átumka chikichik úraksha Wijjají iwíáa pujutin ¿tujinkíarmek?

⁴¹ Iwíáa pujusrum Yus áujsatarum. Tunáa nupet-tamkairap. Enentáimin ti wakeriniaitrumé túrasha ayashim pimpiruiti."

⁴² Tinia ataksha we Yúsán áujeak tímiayi "Winia Aparú, Wi imiá nekas wáitsatniuitkiuñkia nuñkia Ame wakeramna nu atí." Tu áujsamiayi.

⁴³ Nuyá ataksha taa ni menaintiu unuiniamurí tarimiayi. Tura karí ti nupeteam ataksha kanúu pujuarmiayi.

⁴⁴ Túmainiakui nin ikiukin ataksha áujmia núnisan Yúsán áujsataj tusa waketkímiayi. ⁴⁵ Áujas umik ni unuiniamurí pujamunmañ wémiayi. Tura tiarmiayi "Antsu yamaikia kanarum ayampratarum. Ura jeayi. Wi Aents Ajasu aiñ, tunaarintin shuarum surunkatin jeayi.

⁴⁶ Wari nantaktiarum. Wéartai. Súrutna nu winiawai" tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

⁴⁷ Jesus tu chichaj Jútas támiayi. Nusha ni unuiniamuríyayi. Nujajísha untsurí shuar puniajajísha tura numijjajísha winiarmiayi. Nu shuaran Israer-patri uuntrísha Israer-shuara úuntrísha akupka ármiayi. ⁴⁸ Jútas, Jesusan sura, tuke Jesusaj jeatsuk nu shuaran tiarmiayi "Wi miniakkan mukunattajna núiti. Nu achiktaram."

⁴⁹ Nu asamtai Jesusan tarí "Winiyajai Uuntá" tinia mukunamiai.

⁵⁰ Takui Jesus tímiayi "Amikrú, ¿warí winitiam?" Nuyá achikiar Jesusan júkiarmiayi.

⁵¹ Nuñ chikichik Jesusa tsaníakmarí ni puniarñ ukuiniak shuara kuishñ tsupirkamiayi. Nu shuarsha Israer-patri uuntrí takarniuriyayi. ⁵² Túramtai Jesus tímiayi "Puniarum enkeata. Ashí puniajají máanainia nusha puniajají mantamnashtuak. ⁵³ Wi wakerakna winia Aparun timiá untsurí suntarñ seakui páchitsuk akup-turkainti. ¿Nu nékatsmek? ⁵⁴ Tura nuna túramtañkia Yus-Chichamnum tana nu uminkichainti" tímiayi.

⁵⁵ Nuna tinia Jesus nu shuaran tiarmiayi "Átum kasá achiktaj tawa nútiksarum puniajajísha numijjajísha tarutniurme. Kame ashí tsawantaj Yusa Jeñ atumjají pujusan Yus-Chichaman etsermiajai. Nuñsha achirkach-marme. ⁵⁶ Antsu yamaikia yaunchu Yúsán etserin áararmia nu uminkiatí tusarum jútikrarme." Tu tímiayi Jesus.

Nuyá ni unuiniamurí Jesusan Níniak ikiuniak pis-ararmiayi.

Israer-patri uuntriñ Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uuntríyayi. Nuñsha Israer-shuara jintinniurísha Israer-shuara uuntrí armia nusha irunar matsamarmiayi. ⁵⁸ Tura Pítiur árantak Je-

susan nemarkin uuntri jeñ aari jeamiayi. Tura suntar-jají tsaniñ pujusmiayi Jesusan itiurkartin tusa.

⁵⁹ Tura Israer-patri úuntrísha Israer-shuara úuntrísha tura ashí naamka uunt armia nusha Jesusan wait-chichamjají súmamtikiatai tusar áujmatiarmiayi.

⁶⁰ Untsurí shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak ⁶¹ tiarmiayi "Ju áishmañ chichaak "Yusa Uunt Jeñ yumpuan ataksha menaintiú tsawantin jeamminiaitjai," tu chichamai" tiarmiayi.

⁶² Nuyá Israer-patri uuntrí wajaki Jesusan tímiayi "¿Áimtsmek. Turamainia nusha anturmammek?"

⁶³ Túrasha Jesus tuke áimchamiayi. Túmakui Israer-patri uuntrí chicharuk "Nekas iwíaku Yusa náariñ tá-jame nekasa nu táchakminkia Yus írmastatui. ¿Ame Krístukaitiam. Yusa Uchiríñkaitiam? Paant etsérkatá" tímiayi.

⁶⁴ Tutai Jesus tímiayi "Ee, ame támena nútjai. Tura ataksha atumin tájarme, wi Aents Ajasu asan ti kakaram Yusa untsuríñ pujají wáitkiáttarme. Tura yurañminiam winiajisha wáitkiáttarme" tímiayi.

⁶⁵ Nuyá Patri uuntrí nuna antuk ti kajek ni pushirí jajak tímiayi "Ju áishmañ ni chichamejají Yúsán nekas yajauch chicharniuiti. Nuyásha ¿warí atsumají? Atumsha Yúsán yajauch chicharu antukcharumek.

⁶⁶ ¿Waritia enentáimprum?"

Tutai "Sumamayi. Mantamnatí" tiarmiayi. ⁶⁷ Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi

⁶⁸ "Ame Krístuchukaitiam. ¿Ya awattama? Ítsuk nekaa-ta." Tu chichariarmiayi.

Pítiur Jesusan natsantramiania nu

(Márkus 14.66-72; Rúkas 22.56-62; Juan 18.15-18, 25-27)

⁶⁹ Nu túmaiñ Pítiur aaj pujají nuwá chikichik jeari tímiayi "Amesha ju Kariréanmayá Jesus tutajjají wekaichamkam."

⁷⁰ Tutai Pítiur ashí ántuiniamunam tímiayi "Nékatsjai. ¿Warittsuk chichaam?"

⁷¹ Nuna tinia jíinkitaj tusa wéaj chikich shuar wáiniak nuñ pujuinian tiarmiayi "Au áishmañsha Nasarénumiá Jesusají wekainiuiti."

⁷² Tutai Pítiur ataksha tímiayi "Nekasan tájarme, ju áishmañkan penké nékatsjai."

⁷³ Árusañ nuñ pujuarmia nu Pítrun tariar tiarmiayi "Nekas amesha aujají wekaimiame. Warí, chichammijjají páantaiti."

⁷⁴ Tutai Pítiur "nekas Yus írui" taku tímiayi "Nu áishmañkan penké nékatsjai." Nuna taj atash shiniukmiayi.

⁷⁵ Túramtai Pítiur Jesus nuik tímia nuna enentáimpramiayi. "Atash shiniatsajñ menaintiú natsantruratme" tímiayi Jesus. Pítiur nuna enentáimiar jíinki we ti útmiayi.

Piratuj Jesusan júkiarmiania nu

(Márkus 15.1; Rúkas 23.1-2; Juan 18.28-32)

27 Kashin tsawarmatai Israer-patri uuntrísha Israer-shuara úuntrísha Jesus maatai tiarmiayi.

² Tiar Jesusan jin̄kiawar apachi uuntriñ Punsiu Piratuj júkiarmiayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntriñcha Israer-shuara úuntriñcha awan̄tukiarmiayi. ⁴ Tura tímiayi “Nu áishman̄ tunaarinchan máatarum tusan surukan wi sumamajai.”

Takui tiarmiayi “Nusha íijjaj̄isha warí urukatiñ. Nuka amek íschatniukaitiam.” ⁵ Tina Jútas nūi Yusa Uunt Jeē kuítian utsañ ikiuak nuyá we kajempramiayi. ⁶ Nuyá Israer-patri uuntriñ nu kuítian júukar tiarmiayi “Jū kuit shuar sumakma asamtai Yusa kuítrijjaj̄i irurchamniati.” ⁷ Tura nuamtak áujmatsar “nuñka sumaktai” tiar Nuwe Najantai nuñkan sumakarmiayi yajaya shuar nūi iwiansatniun. ⁸ Shuar sumakma kuitjaj̄i sumakma asamtai yamaisha Numpá Nuñka tuke tuíniawai. ⁹ Nujaj̄i yaunchu Yúsnan etserin Jeremías timia nu uminkiamiayi:

“Uunt Yus turutmia núnisan̄ túrawarmiayi. Israer-shuar trainta kuítian seawarmatai nuna akantrar nujaj̄i Nuwe Najantai nuñkan sumakarmiayi.” Tu áarmiai.

Piratu Jesusan anásmania nu

(Márkus 15.2-5; Rúkas 23.3-5; Juan̄ 18.33-38)

¹¹ Jesusan apachi úuntriñ ejeniarmatai nii aniasmiayi “¿Nekasmek Israer-shuara uunt akupniur̄ntiam?”

Tutai Jesus “Ame támena núitjaj̄i” tímiayi.

¹² Nuyá Israer-patri úuntriñcha Israer-shuara úuntriñsha súmamtikia Jesus pachischamiayi. ¹³ Nuyá Piratu tímiayi “Ashí yajauch chichartamainia nu çanturmam-mek?” ¹⁴ Tútaisha Jesus pen̄ké áimkiachmiayi. Túmakui akupin ti enentáimiar títinian nekaachmiayi.

Piratu Jesusan “mantamnati” tímiania nu

(Márkus 15.6-20; Rúkas 23.13-25; Juan̄ 18.39-19.16)

¹⁵ Jísat tsawantin apachi uuntriñ Israer-shuar shiir enentáimprarat tusa sepunam en̄ketun shuar wakera-mun j̄iki an̄kant akupniuyayi. ¹⁶ Nūi sepunam tunáa shuar Parapás náartin pujumiayi. Ashí shuar nékarmiayi. ¹⁷ Tuma asamtai Piratu Israer-shuar iruntrarun aniasmiayi “¿Yana an̄kant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi. ¹⁸ Kame Israer-shuar ántar kajerainiak ni itarmian nekaamiayi.

¹⁹ Tura Piratu nuna inintrak pujaj̄i ni nuar̄i chichaman akuptukmiayi. “Jū pen̄ker áishman̄ súmamtikiatniujaj̄i pachiiñkiaip. Mesekranam nii áitkiatniun nekaan wáitsan tsawarjaj̄i” tímiayi.

²⁰ Túrasha Israer-patri úuntriñcha Israer-shuara úuntriñsha “Parapás an̄kant wetí, tura Jesus mantamnati” titiarum tusar shuáran akatrarmiayi. ²¹ Apachi akupniur̄i ataksha aniasarmiayi “Jū jimiará áentsun çyana an̄kant akupkat tusarum wakerarum?”

Tutai “Parapás” tiarmiayi.

²² Tutai aniasarmiayi “Jesusnasha. Yusa Anaikiamur̄i Kristu tuinia nunasha, çitiúrkáttaja?”

Tutai ashí “Krúsnum máatá” tiarmiayi.

²³ Tuíniakui Piratu tiarmiayi “¿Warí yajauchinia túrait?”

Tutai kakantar untsukum “Krúsnum máatá” tiarmiayi.

²⁴ Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí íimiainiañ̄ ikijmiak tímiayi “Jū pen̄ker áishman̄ máatniunam wikia pachiiñtsujai. Antsu atumek íistarum.”

²⁵ Tutai ashí shuar tiarmiayi “Íik ii shuaríjjaj̄i jū áishman̄ máatin íistaji.”

²⁶ Nuyá Piratu Parapásan an̄kant akupkamiayi. Tura Jesus asutiárum krúsnum máatárum tusa akupkamiayi. ²⁷ Nuyá akupin pujutai jeñam akupniu suntarīi Jesusan júkiar ashí suntaraim irunturarmiayi. ²⁸ Tura pushirīi áitkiar akupin entsatain kapāaku pushin áentsrarmiayi. ²⁹ Múuknúmsha tawaspan jan̄ki najanamun etsemtikiarmiayi. Tura karisun akupniu numir̄ja áaniun untsuúr̄nīi ataksarmiayi. Túrawar wishikiainiak tikishmatrar tiarmiayi “Israer-shuara uunt akupniur̄in-me.” ³⁰ Tiar usukiarmiayi. Tura karisun jurukiar múuknum awatiarmiayi. ³¹ Tura núkap wishikrar kapāaku pushin áitkiar ni pushiriñ̄īi áentsrarmiayi. Nuyá krúsnum maatai tusar júkiarmiayi.

Jesusan krúsnum máawarmiania nu

(Márkus 15.21-32; Rúkas 23.26-43; Juan̄ 19.17-27)

³² Jesusan jukí wésar Serini nuñkanmayá shuaran, ni naarī Semun̄, Jesusa krúsriñ̄īi jurukit tusar achikiarmiayi. ³³ Nuyá Kúrkutanam ejeniarmiayi. Kúrkutaka, shuar chichamjaj̄iñ̄kia, muuka ukunch tútainti. ³⁴ Nūi Jesusan umutai yapájaj̄i pachimpra najanamun áartaj tusar súsararmiayi. Tura Jesus apas iis umarchamiayi.

³⁵ Krúsnum ajinrurur suntar yáki Jesusa pushiriñ̄īi jukit tusar nakurusar awakmakua nuna súsararmiayi. Nú-jaj̄iñ̄kia yaunchu Yúsnan etserin áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsararmiayi.” Tu áarmiai.

³⁶ Nuyá wáinkiatarīi tusar pujursarmiayi. ³⁷ Tura urukamtai máamuit ashí aents nekaawarti tusa áarman muuknumaani anujtukarmiayi. *JŪITI JESUS, IS-RAERA UUNT AKUPNIUR̄I* Tu áarmauyayi.

³⁸ Núnisan̄ Niijjaj̄i métek jimiará kasa chikichkin untsuurnuman̄īi tura chikichnasha menaanman̄īi krúsnum máawarmiai. ³⁹ Shuar nūi nan̄kaamainiak muuke pēatar wishikiainiak ⁴⁰ tiarmiayi “Ame Yusa Uunt Jeē sáakim menaintiú tsawantin jeamtatjaj̄i tichakaitiam. Nekas Yusa Uchir̄iñ̄kiumka krúsnumiã akaikim uwemprata” tiarmiayi.

⁴¹ Núnisan̄ Israer-patri úuntriñsha, Israer-shuara jintinniur̄jsha, Pariséusha, Israer-shuara úuntriñsha, Jesusan wishikiainiak nuamtak tiarmiayi ⁴² “Chikichnaka

uwemtikraiti tura Nínkikia uwemtsui. Israera Uunt Akupniuríntkiuŋka krúsnumiá akaikimtai nekas enentáimtustatji. ⁴³ “Yúsan nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchiríntjai” turamchamkaji” tiarmiayi. ⁴⁴ Kasá shuarsha Niijjají ajintruamu armia nusha Nin wishikrarmiayi.

Jesusa jakamurj

(Márkus 15.33-41; Rúkas 23.44-49; Juan 19.28-30)

⁴⁵ Nuyá tutupin aji tee ajasmiayi. Túrunayat ataksha aŋku tsáapin ajasmiayi. ⁴⁶ Nuni aji Jesus kakantar untsumkamiayi. “Eri, Eri, rama sapaktani’ tímiayi. Nusha shuar chichamjajíŋkia “Yusrú, Yusrú, ¿urukamtai ajapa ikiurkiniam?” tawai. ⁴⁷ Shuar nuji wajarmia nusha nuna enentáimtsuk antukar tiarmiayi “Yaunchu Yúsnan etserniun Eriasan untsuawai.” ⁴⁸ Tura chikichik tsékeŋki we uruchin itiamiayi. Tura churuinian ajamper sapapjají ijiú mukunati tusa susamiayi. ⁴⁹ Tura chikichcha wishikeak tiarmiayi “Iniáisatá, Eriás tarí uwemtikratpiash.”

⁵⁰ Jesus ataksha kakantar untsumak nuyá jakamiayi. ⁵¹ Nu chichamaik Yusa Uunt Jee tarach ajamu yakiiniya achik nuŋkaani tsey jaanakmiayi. Nuŋkasha úrkamiayi. Kayasha jakukarmiayi. ⁵² Núnisaŋ iwiarsamusha uraniarmatai untsurí Yus-shuar jákarusha nantakiarmiayi. ⁵³ Nusha emka Jesus nantakmiatai niisha nantakiar iwiarsamun ikiukiar Yusa péprurjñ Jerusarénum wayawarmatai untsurí shuar wáinkiarimiayi.

⁵⁴ Nuyá suntar Jesusan wáinkiarimia nusha tura ni kapitiantrisha nuŋka úrkamtai nuyá chikichcha ashamaí ajasmatai ti sapijmiakarmiayi. Tura tiarmiayi “Ju áishmaŋ nekas Yusa Uchirínti.”

⁵⁵ Nujsa nuwá Jesusan nemariarmia nu, arant wajasar, ii wajaarmiayi. Nusha Kariréanmayá pataatukiari Jesusan yaiŋki ejeniarmiayi. ⁵⁶ Nujají Máktaranmayá Marisha, Sepetéu nuwésha, tura chíkich Marisha ármiai. Chíkich Marikia Jakupuncha tura Jusenchá nukuríyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiarají shuar ti kuítrintin Arimatéu péprunmayá ni naarj Jusé támiayi. Nusha Jesusan enentáimtinuiyayi. ⁵⁸ Nii Piratují we Jesusa ayashin seamiayi. Nin súsarát tusa Piratu akupkamiayi. ⁵⁹ Túram Jusé Jesusa ayashin krusnumiá jusa ti péŋker tarachjají penuarmiayi. ⁶⁰ Tura kaya wáá táurmanum yamaram amia nuji iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjají etektuk ikiuak wémiayi. ⁶¹ Nujsa Máktaranmayá Marisha tura chíkich Marisha iwiarsamunam naka ii pujuarmiayi.

Jesus iwiarsamun suntar wáinkiarimiania nu

⁶² Nú kiarají ayampratin tsawantna mash iwiarnakui Israer-patri úuntrisha Pariséusha Piratují wearmiayi.

⁶³ Tura tiarmiayi “Uuntá, nu wáitrin áishmaŋ iwiaku

pujus “Menaintiú tsawant jakan nantaktiatjai” tíniuyi. ⁶⁴ Nu asamtai iwiarsamunam menaintiu tsawant suntar wáinkiarat tusa akuptukta. Ni unuiniamurj kashi tariar tura ni ayashin kasamkar “Pai, nantakni” shuáran tiarají. Jujajíŋkia nuna naŋkaamas shuáran anaŋkawarainti” tiarmiayi.

⁶⁵ Tutai Piratu tiarmiayi “Nuji suntar takakrume. Werum iwiarsamu urakchamnia péŋker wáinkiatárum.” ⁶⁶ Tutai wear iwiarsamun urankashti tusar etektukma iŋkiuŋmanum serajají yakarar ni áarmarjñ anujtukarmiayi. Tura suntarnasha awajtukarmiayi.

Jesusa nantakmiarij

(Márkus 16.1-8; Rúkas 24.1-12; Juan 20.1-10)

28 Ayampratin tsawant naŋkaasmatai tumiŋtin yama tsawaana aji Máktaranmayá Marisha chíkich Marijjají iwiarsamu iyutai tusar wearmiayi. ² Tumaj Yusa suntarj nayaimpinmayá iwiarsamun tarí kaya atutkamun urak nuji pujusmiayi. Túmakui nuŋka ti úrkamiayi. ³ Yusa suntarjsha péemia tímatrus wíŋchayayi. Pushirjsha ti puju áuyayi. ⁴ Tura iwiarsamun wáiniarmia nú suntarsha nuna wáinkiar ashamainiak ti kuranŋkarmiayi. Jaká áinis ajasarmiayi.

⁵ Nuyá nayaimpinmayá suntar nuwáŋ tímiayi “Ashamkairap. Jesus krúsnum máawarmia nu eát-srumek. ⁶ Juŋkia pujatsui. Nii timia núnisaŋ nantakniuiti. Pai, áepsarma nu ítiarum. ⁷ Wárik wérum ni unuiniamurj “Jesus jakamunmayá nantakni tura wari Kariréanam wétatui. Nuji werirum wáinkiatarme” titiarum. Wats, nunak tájai” tímiayi. ⁸ Tutai nu nuwá iwiarsamunmayá wárik jíinkiar ashamainiayat ti warasar tseké waketkiarmiayi ni unuiniamurjñ ujaktai tusar. ⁹ Tumaj Jesus wantintiukarmiayi. Tura “pujarmek” takui Jesusan tariar tikishmatrar nawenchá miniakrusar shiir awajsarmiayi. ¹⁰ Túram Jesus tiarmiayi “Ashamprukairap. Werum winia yatsur ujaktruktarum. Kariréanam weartí. Nuji wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuwá wéarmatai iwiarsamu wáinin suntarsha péprunam wéar Israer-patri úuntrjñ ashí túrunamun ujakarmiayi. ¹² Niisha nuna antukar Israer-shuara úuntrjají áujmatsatai tusar wearmiayi. Áujmatsar suntaran ti kuít akikiar ¹³ tiarmiayi “Atumsha étserkuram “Kashi kanararin ni unuiniamurj taar Jesusa ayashin kasamkarmai” titiarum. ¹⁴ Tura akupin átum kanarman nekamtaisha niijjají ii iwiarattaji atumin yajauch awaj-tamsají tusar” tiarmiayi.

¹⁵ Nuyá suntarsha kuítian achikiar tiarmia nuna tímitrusají titiái tusar wéarmiayi. Tura tuke yamaisha Israer-shuar tu túrunaiti tuíniawai.

Jesus ni unuiniamurjñ akatar akupkamiania nu

(Márkus 16.14-18; Rúkas 24.36-49; Juan 20.19-23)

¹⁶ Nuyá ni auntse (11) unuiniamurj Kariréanam wéarmiayi. Tura Jesus timia nú nainnium jearwar ¹⁷ nuji

Jesusan wáinkiar tikishmatrarmiayi. Kame chíkichka Jesusashit tuíniayat Nin wáinkiar tikishmatrarmiayi.

¹⁸ Nuyá Jesus tíjiuch tantá tímiayi “Ashí nayaimpin-masha nuṅkasha akupkatniun kakarman surusuiti.

¹⁹ Tuma asamtai ashí nuṅkanam werum ashí shuar jintintiarum Wíi shuar awajsatarum. Túrarum Yus Apa

náarijiaí, Yus Uchi náarijiaí, tura Yus Wakaní náarijiaí imiaitiarum. ²⁰ Ashí atumin Wi akatramajrum nu nútik-sarmek umiktin unuiniartarum. Tura ju nekaatarum: Tuke tsawantaj ikiutsuk atumjaí pujuttajai” tímiayi Jesus.

MÁRKUS

Imiakratin Juan̄ka etserkamur̄i
(Mateu 3.1-12; Rúkas 3.1-9, 15-17; Juan̄ 1.19-28)

1 Jūi Jesukristunu shiir chicham nán̄kameawai. Jesukristu Yusa Uchir̄inti.
2 Yuska imiakratin Juan̄kan pachis ni etserniur̄in Isayasan ti yaunchu ni Papir̄in̄ juna áamtikramiayi: “Tisiana, ame wéamurm̄in emka wetí tusan winia akatramurun akupeajai. Niisha ame jintimin iwiarattawai.
3 Niisha aents atsamunam untsumuk juna títiatui: “Uunta jint̄i iwiarturtarum; naka awajsatarum.”
 Nuke áarmaiti.
4 Wats, aents atsamunam imiakratin Juan̄ imiaittsa pujus étseluk, “tunaarun Yus asakatrurat” tusarum, enentáim yapajjár̄um imiantiarum” tímiayi. **5** Anturkatai tusar ashí Jutía nuñkanmayá shuar tura Jerusarén peprunmayá shuarsha Niin tariarmiayi. Taar, ni tunaar̄in ujakarmatai, Juan̄ Jurtañ entsanam imiainiarmiayi.
6 Juan̄sha kamiriu ure najantramun entsauyayi. Emenmamkesha nuapeyayi. Tura chinij̄ī yutai-títikriatsnasha yuuyayi. **7** Niisha áentsun ujaak tímiayi “Wij̄īinkia nañkaamas ana nu winia ukurūj̄ winittiwawai. Niisha nekas ii Uuntrīi asamtai, wikia tsunsumpruan ni sapatr̄i j̄inkiamur̄inkisha atitrachminiaitjai. **8** Wikia entsaj̄īn aya ayashmin imiaajrume, antsu Niñkia imiantinia áanis Yusa Wakan̄i atom̄i enentáin enketramprattarme” tímiayi.

Juan̄ Jesusan imiaimiania nu
(Mateu 3.13-17; Rúkas 3.21-22)

9 Juan̄ áentsun imiak pujurainiaj, Jesuska Nasarét pepru Kariréa nuñkanam ana nuyá j̄iinki Juan̄kan tarimiayi. Tura Juan̄ Jurtañ entsanam Jesusan imiaimiayi. **10** Nuiñ, Jesus entsaya j̄iiniuk, nayaimpin uranniun wáinkiamiayi. Tura Yusa Wakan̄in̄ yámpitsa núnin najanar Niin̄ taarun wáinkiamiayi. **11** Tura nayaimpinmayá chichaamun juna antukmiayi, “Ámeka winia aneamu Uchiruitme. Ámin shiir enentáimtajme.”

Uunt iwianch Jesusan anañkataj tímiania nu
(Mateu 4.1-11; Rúkas 4.1-13)

12 Nuyá wárik Yusa Wakan̄i Jesusan atsamunam jukimiayi. **13** Tura nui, yajasma yujamunam, kuarenta tsawant pujumiayi. Nuīīī pujaj̄ī uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatai tusar nayaimpinmayá suntar tariarmiayi.

Kariréa nuñkanam ni takatr̄in̄ Jesus nañkammiania nu
(Mateu 4.12-17; Rúkas 4.14-15)

14 Ukunam, Juan̄kan sepunam enkeawarmatai, Jesuska Kariréa nuñkanam Yusa akupeamur̄in̄ pachis shiir chichaman etserki tímiayi. **15** “Tsawant jeayi. Shuar-num Yusa akupeamur̄i jeatemai. Tuma asamtai, yaunchu enentáimsamuram yapajjár̄um, Uwempratin Chicham umirkatarum” tu etserkamiayi.

Jesus namakan achinian ni unuiniamur̄i ajasat tusa kuatru achikmiania nu
(Mateu 4.18-22; Rúkas 5.1-11)

16 Jesus Kariréa antumiañka kánmatkar̄in̄ wekas, namakan achinian Semuñnasha ni yach̄i Antresnasha nekan ajuntuk pujuinian wáinkiamiayi. **17** Wáiniak “Nemartustarum, tímiayi. Namak achiarmena nútiksanak áentsun-ēau Yusna arti tusan awajsatjarme” tímiayi. **18** Tura nuyañka ni nekar̄in̄ ajapa ikiuiniak Jesusan nemarsarmiayi.

19 Nuyasha Jesus ishichik arantach wesa, Sepetéu uchir̄in̄ Jakupun ni yach̄in̄ Juáñnasha kanunam ni nekar̄in̄ apáa pujuinian wáinkiarimiayi. **20** Wáiniak, nemartusta tusa untsukarmiayi. Tutai ni apar̄in̄cha, ni apar̄i takarniur̄in̄cha kanunam ikiuiniak Jesusan nemarsarmiayi.

Jesus iwianchin áishman̄numīa j̄iiki akupkamiania nu
(Rúkas 4.31-37)

21 Nuyá Kapernáum péprunam jeawarmiayi. Nuīīī Israer-shuara ayampratin tsawantr̄ī jeakui Jesus Israer-shuar iruntainiam wayá Yus-Chichaman unuiniamiayi.

22 Tura ni jintinniur̄ī jintintiar̄mia nuna iniañkas uunt chichamj̄ī Jesus jintīakui ni chicham̄en anturkar ti enentáimprarmiayi. **23** Nuīīsha nu iruntainiam áishman̄ iwianchruku ámiayi. Niisha untsumuk **24** “¿Warí itiertamkattsamea incha taum, Nasarénumīa Jesusa? Wikia nékajme. Ámetme Tunaartichu Yúsaj̄ȳa winiamna nu. In emestamprataj tusam táchamek” tímiayi.

25 Tutai, Jesus kakantar chicharuk “Takamátsatá. Ni enentáiȳa j̄iinkitia, tájame” tímiayi.

26 Tutai iwianch áishman̄kan ukurak ajakñ̄n̄kiar untsamak kakaar̄ āa j̄iinkimiayi. **27** Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí chichamait? Jūīī Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi. **28** Tura ti wárik nu túrunamu ashí Kariréa nuñkanam antunkiamiayi.

Jesus Semunka tsatsariñ tsuármiania nu

(Mateu 8.14-15; Rúkas 4.38-39)

²⁹ Nuyá Israer-shuara iruntai jeeniã jiinki Jesuska Jakupujaj Juanjajsha we, Semuñ ni yachi Antresjaj pujuarmia nuñ jeawarmiayi. ³⁰ Semuñka tsatsariñ tsuér peaknum jaa tepemiayi. Núnaka wárik Jesusan ujakarmiayi. ³¹ Nuñkia Jesus werí uwejnun achik ini-antkimiayi. Tura nu chichamaik michatramiayi. Michatar, péñker ajas, Jesusnasha ni nemarniurincha ayurawarmiayi.

Untsurí jaan Jesus péñker awajsarmiania nu

(Mateu 8.16-17; Rúkas 4.40-41)

³² Nu tsawantaj kiaraj, ashí jáinian, iwianchrukuncha Jesusan itiararmiayi. ³³ Tura ashí nú péprunmaya shuar taar wáitiniam Jesusan káutkarmiayi. ³⁴ Untsurí shuáran chíkich suñkuraim jáinian Jesus tsuararmiayi. Tura iwianchruku armia nuna enentáiyã iwianchin jíirkiarmiayi. Jesuska íwianch nékamu asa, winia náarun ántar pachisarajñ tusa suritkiarmiayi.

Kariréa nuñkanam Jesus Yus-Chichaman etserkamiania nu

(Rúkas 4.42-44)

³⁵ Nuyá kashin káshik tsawaãtsajñ Jesus nantaki Yúsan áusataj tusa jiinki atsamunam wémiayi. ³⁶ Tura Semuñ ni amikrijajñ Jesus wemaanum wéarmiayi. ³⁷ Nin wáinkiar “Ashi shuar Ámin eãtmainiawai” tiarmiayi.

³⁸ Tutai Jesus chichaak “Chíkich péprunmasha arantach wetai. Nuñ Yusa chichame etserkatai; nuna túrattsan táwitjai” tímiayi.

³⁹ Nuna ti ashí Kariréa nuñkanam Israer-shuar iruntai jeãnam etseras wekaimiayi; tura núnisañ iwianchni-asha jíiki akupkini wekaimiayi.

Tunamaru shuaran Jesus tsuármiania nu

(Mateu 8.1-4; Rúkas 5.12-16)

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmekasuaratin tujinratsme.”

⁴¹ Jesus nin waitnentak uwejejajñ antiñmiayi. Antiñ “Wakerajme. Péñker ajasta” tímiayi. ⁴² Nu chichamaik, Jesus chichakmatai, ni suñkurj meñkakamiayi. Tura péñker ajasmiayi. ⁴³ Túrunamtai Jesus kakantar chicharuk ⁴⁴ akupeak “Wáinkiatá, náñkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi. ⁴⁵ Tura etserkaip támaiat, jiinki ni túrunamurjñ mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aã atsamunam pujumiayi. Tura ashí nuñkanmayã Jesusan tariarmiayi.

Jesus emearun péñker awajsarmiania nu

(Mateu 9.1-8; Rúkas 5.17-26)

2 Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. ² Tuma asamtai shuar wárik ti untsurí káutkarmiayi. Ti untsurí asamtai, jeã piakmiayi; wáitnimasha ankantchayuyai. Jesuska Yus-Chichaman nu aentsun ujaak pujurmiayi. ³ Nuñkia ni amikriñ emearun kuaru shuar tampumpuawar júkiar Jesusan itiararmiayi. ⁴ Tura jeawar, untsurí shuar írunu ásamtai jeã wayãtni-un tujinkiarmiayi. Tuma ásar, yakinini wakar jeã urakar, áãñkawar, tampunam ni amikriñ Jesus pujamunam awaintiuawar itiararmiayi. ⁵ Tura niisha Jesus nekas tsuártatui tu enentáimmarjñ Jesus nekáa emearun chicharuk, “Uchirú, ame tunaarumka tsãñkuramuiti” tímiayi.

⁶ Israer-shuara jintinniurjsha nuna antúu pujuarmiayi. Tura ni enentáijajñ enentáimsar, ⁷ “¿Jusha urukamtai emearun tu chichara? Yúsan imiã yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

⁸ Jesuska ni enentáimmarjñ nekarawar “¿Urukamtia átum tu enentáimprum? tímiayi. ⁹ Emearu, tunaarum tsãñkuramuiti títinjajñ, emearu, wajakim tampuram entsakim wekasata títinjajñ ¿tuã imiã yúpichuchit?

¹⁰ Wats wi, Aents Ajasu asan Yusa kakarmarijjajñ shuara tunaari tsãñkuramniaitjiana nuna paant iwiaintiuktajrume” tímiayi. Nuna tinia emearun chicharuk ¹¹ “Wajaktia, tájame; túram tampuram jukim jéemijn wetá” tímiayi. ¹² Nu chichamaik emearu wajakí, tampurjñ jukí, ashí ímiainiañ jínkimiayi.

Nuna túrunamtai ashí ashamkarmiayi. Tura “jútikiamu peñké wáinchaitjñ” tiar Yusa náarjñ uunt awajsarmiayi.

Jesus Riwin untsukmiania nu

(Mateu 9.9-13; Rúkas 5.27-32)

¹³ Nuyá ukunam Jesus antumiañnum waketkimiayi. Tura ashí shuar káunkarmatai jintintiwarmiayi. ¹⁴ Tura jintintiwari amuk, akupin akitiai jeãnam nañkaamak, Arpeu uchirjñ Riwin pujan wáinkiamiayi. Wáiniak “Nemartusta” tímiayi. Tutai Riwi wajakí Jesusan nemarsamiayi. ¹⁵ Chíkich tsawant, Riwishã Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjajñ ni unuiniamurijjajñ ashí nuim misanam pujuarmiã. ¹⁶ Tura kuítian-juu shuarsha yajauch shuarsha Jesusjajñ irunar yurumáinian wáinkiar, Pariséu jintinniurjsha Israer-shuara jintinniurjsha Jesusa unuiniamurjñ aniasarmiayi. “¿Urukamtai ame úuntrum Jesus, kuítian-juu shuarjajñ tura yajauch shuarjajñ yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratni-un atsumainiatsui. Antsu jaa ana nu tsuákratniun atsumainiawai. Wats, “péñkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

Yurumtsuk Yus áujsatniun Jesusan aniasarmiania nu
(Mateu 9.14-17; Rúkas 5.33-39)

¹⁸ Juan̄ka unuiniamur̄isha Pariséu unuiniamur̄isha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juan̄ka unuiniamur̄isha, Pariséu unuiniamur̄isha yurumtsuk Yúsan áujainiat-suk; ¿ame unuiniamurmeka urukamtai yurumtsuk áu-jainiatsu?” tiarmiayi.

¹⁹ Tutai Jesus chichaak, “¿Nuatma nampernum ipiaa-mu ainia nu ijarmawartiniak ainia? Yama nuatu pu-jakui ni amikr̄i warainiak ijarmachartin ainiawai. Núnisañ winia unuiniamur̄, Wi pujakui, warainiak yu-rumtsuk pujuschartin áiniawai. ²⁰ Tura tsawant jeat-tawai, Winia jurukiartin. Nuiñkia winia unuiniamur̄ ijarmawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam ya-maram tarach sumpeak mamushan chin̄kiá nuna nan̄kaamas jáǵktatui. ²² Nijiamanch yamáí nawar nuap najanamu arutnum yaraachminiaiti. Túramka wakaprúa karíak nuap najanamu ijiakratniuiti. Tura ni-jiamanch ukarattawai. Nuap najanamu yajauch ajasta-tui. Antsu yamaram nijiamanch yamaram nuap na-janamunam yaraatniuiti’ tímiayi.

Trikiu nerēn yuawarmiania nu

(Mateu 12.1-8; Rúkas 6.1-5)

²³ Chíkich ayampratin tsawantaj̄ Jesus ajanman̄ ajapén nan̄kaamarmiayi. Tura ni unuiniamur̄i trikiu nerēn majukiari wearmiayi. ²⁴ Nuna wáinkiar Pariséu Jesusan chicharainiak “¿Warí, urukamtai ame unuini-amuram ayampratin tsawant takastin surimkiamu aǵsha takainia?” tiarmiayi.

²⁵ Tutai Jesus tímiayi “Ti uuntrī Tawitia túramur̄i Yús-Papinium áujsachukaitrum. Niisha ni nemarniur̄isha tsukamainiak, ni yurumkar̄i atsakui, túrawarmia nu áujsachukaitrum. ²⁶ Apiatár Yusnan pujurniu uuntrī pujaǵi Uunt Tawit Yusa Jeēn wayamiayi. Tura Tawitkia, patri nan̄kaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniur̄incha ajamsamiayi. Nu áujsachukaitrum, tímiayi. ²⁷ Ayam-pratin tsawantaj̄ túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. ²⁸ Wisha, Aents Ajasu asan imia ayampratin tsawantan Nerenni-ur̄int̄jai’ tímiayi.

Uweje jakan Jesus tsuármiania nu

(Mateu 12.9-14; Rúkas 6.6-11)

3 Ataksha chíkich tsawantaj̄ Israer-shuar iruntaini-am Jesus wayamiayi. Nuǵi shuar ámiayi, ni uweje jaka. ² Tura tunáan túrayi titiai tusar wakeruiniak “ayampratin tsawantaj̄ tsuártimpiash” tusar, Pariséu shuarsha Jesusan ii pujuriarmiayi. ³ Nuiñkia Jesus uwe-je jaka shuaran chicharuk “Ajapén wajasta” tímiayi. ⁴ Nuiñkia mamikmaun chicharuk “¿Ayampratin tsawantaj̄ péñker túratin yajauch túratniuj̄ai tuá imiá

péñkerait. Shuar uwentikratin máatniuj̄ai tuá imiá péñkerait?” tímiayi.

Nuna takui niisha pachischarmiayi.

⁵ Tura Jesus kajek nin íyarmiayi; tura ni enentájn kát-suram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniak-masmatai ni uweje jaruku ataksha péñker ajatsamiayi.

⁶ Nuyá Pariséu shuar jíinkiar, Jesus maami tusar Erutis shuarj̄ai áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamur̄ij̄ai antumiannum wémi-ayi. Kariréa nuñkanmaȳa untsurí shuarsha Jesusan ne-mariarmiayi. ⁸ Untsurí nuñkanmaȳasha káunkarmiayi. Jutía nuñkanmaȳasha, Jerusarén péprunmaȳasha, Itiumía nuñkanmaȳasha, Jurtañ entsa amainiǵsha, Tiru tura Setuñ pepru pujuinia nú nuñkanmaȳasha, untsurí shuar ni túramur̄in nekaawar, Jesusan káutkarmiayi.

⁹ Untsurí káunkar chanuntawar̄iñ tusa Jesus ni unuiniamur̄in kanuram inianáastarum tusa seamiai.

¹⁰ Kame untsurí shuaran Jesus nuik tsuaru asamtai, jaa shuar nuǵi káunkarmiania nu Jesusan antint̄taj̄ tusar shi-tianainiakui nuna seamiai. ¹¹ Tura iwianchrukusha Je-susan wáinkiar tikishmatrarmiayi. Untsumainiak “Ame nekas Yusa Uchir̄inme” tiarmiayi. ¹² Tura nuna et-serkairap tusa Jesuska kakantramiayi.

Jesus tuse shuaran anaikiarmiania nu

(Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesu-san weriarmiayi. ¹⁴ Tura Niiǵai wekasar Yus-Chichaman unuiniartinian tuse shuáran anaikiarmiayi. ¹⁵ Tura suñkur tsuártinian, iwianchcha jíiki akupkatniun ni kakarmar̄in súsarimiayi nú shuaran. ¹⁶ Ju shuáran anaikiamu ármiayi: Semuñ, Jesus chíkich naarin Pítiur apujtusmiania nu; ¹⁷ Sepetéu uchir̄i Jakupu, ni patai Juáñsha; ipiamtaj̄ai métek kakaram ásarmatai nuna mai “Puanérjis” naar̄i susamiayi. Nusha shuar chichamj̄aiñkia “ipiamta nuke” tawai. ¹⁸ Nuyá Antressha, Jiripi, Parturumí, Mateu, Tumas, Arpeu uchir̄i Jakupu, Tateu, ásump Semuñ, ¹⁹ Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

Yusa Wakan̄in yajauch chicharna nu

(Mateu 12.22-32; Rúkas 11.14-23; 12.10)

²⁰ Waketkiarmatai, ti untsurí shuar taarmatai takatr̄i ti akui, yurumátniun jeacharmiayi. ²¹ Jesusa shuár̄isha nuna nekaawar Jesus ti itiurchat pujus wáurtsuash tu enentáimsar jukitiai tusar nu jeñam jeariarmiayi.

²² Nuyá Israer-shuara jintinniur̄i Jerusarēñnumiǵ táarmiania nu, Jesusan áujmatainiak “Pirsepú en̄kea asa iwianchrukuiti. Tuma asa uunt iwianchi kakarmar-j̄iǵai iwianchin jíiki akupeawai” tiarmiayi.

²³ Tutai Jesus winitiarum tusa nin untsukmiayi. Tura enentáimtikrataj̄ tusa juna tímiayi: “¿Iwianch Sa-

tanáskesha itiuur ajapmamatiñ? ²⁴ Chikichik nú nuñkanmaya shuar nuámtak kajernaiyakuñkia, nu nuñka wari meserchattawak. ²⁵ Nuámtak shuar ni shuarijijai kajernaiyakuñkia nu shuarsha amunaikchartatuak. ²⁶ Núnisañ ¿Satanáskesha ni suntarijijai máaniakka itiuurak tuke pujusarat? Amunaikiartatui. ²⁷ Nánkamas shuar kakaram shuara jeen wayá, nérenniun jinñkiatsuk ni kuítrñ kasarkachminiati. Antsu nérenniun jinñkiá ni kuítrñ kasarkamniati. ²⁸ Nekas tájarme, shuar tunáa ashí túruiniana nuka tsanñkuramniati. Winiasha winia Aparnasha yajauch áujmatusha tsanñkuramniati. ²⁹ Antsu Yusa Wakanñ yajauch áujmatna nuka tsanñkurachminiati; antsu nu shuar niñki tuke sumamat-tawai.” ³⁰ “Jesuska iwianchrukuiti” tuñiakui Jesus nuní tímiayi.

Jesusa yachj Jesusa nukurj

(Mateu 12.46-50; Rúkas 5.19-21)

³¹ Nuyá ni yachj ni nukurjijai taar aa wajasar, Jesusan untsukat tusa akupkarmiayi. ³² Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

³³ Tutai Jesus chichaak “Ya ainia winia nukursha yatsursha” tímiayi. ³⁴ Nin téntakar pujuarmia nuna iis “Júiti winia nukurka, yatsurka, tímiayi. ³⁵ Shuar Yusa wakermurñ uminiana nu winia yatsuruiti, winia umaruuti, winia nukuruiti” tímiayi.

Atsaamin atsaampramiania nu

(Mateu 13.1-9; Rúkas 8.4-8)

4 Nuyá jiinki antumiañka yantamēn Jesus ataksha unuiniartianian juarkimiayi. Tura untsurj shuar iruntrarmatai, kanunam enñkempramiayi. Shuarsha antumiañka káanmatkarñ pujuarmiayi. ² Jesuska métek-taku chichamjaj ti jintintiarmiayi. Jintintiuk juna tímiayi: ³ “Antuktaram. Atsaamin atsaamprataj tusa jíinkimiai. ⁴ Atsaamkui ni arakrñ jintiá iniararmai. Chínki yakiya káutkar yuawarmai. ⁵ Chikichcha kaya írmanum iniararmai, nuñka ishichik ámanum. Tura nuñka ishichik asamtai wárik tsapainiarmai. ⁶ Tura etsa etsantar sukuám kanñkape atsá asamtai káararmai. ⁷ Chikichcha jañkí nupanam iniararmai. Jañkisha tsapainiar kanñkar ajakrarmai; túram nerecharmai. ⁸ Chikichcha péñker nuñkanam iniararmai. Tura tsapainiar nerekarmai, chikich trainta, chikich sesenta, chikich siañ nerekarmai. ⁹ Kuíshim ákuñkia antuktaram” tímiayi.

(Mateu 13.10-17; Rúkas 8.9-10)

¹⁰ Untsurj wearmatai, ishichik Niijijai juakarmiania nu, ni tuse unuiniamurijijai aniasarmiayi “¿Ame jintintiamna nusha warimpiait?” tiarmiayi.

¹¹ Tutai Jesus chichaak “Yuska ni akupeamurñ atumin paant nekantikramattsa wakerutmarme. Antsu chikich shuarka aya métek-taku chichamjaj jintintiawartatui. ¹² Íniayatañ wáinkiacharat tusa, antukar-

sha nekaacharat tusa, umirtsuk ni tunaari tsanñkur-nacharat tusa túrattawai’ tímiayi.

(Mateu 13.18-23; Rúkas 8.11-15)

¹³ Tura tímiayi ‘Wi jintintiajrumna nú métek-taku chicham nekaachurmek. Nu nékachurmeka zitiurak chikich métek-taku chichamsha nekaatarum? ¹⁴ Atsaamniua nuka Yus-Chichaman étserna nuna nakumui. ¹⁵ Jinñkiá jintiá iniaarua nuna chikich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáñ atsaampramun jurawai. ¹⁶ Chikich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. ¹⁷ Tura ni kanñkape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chikich itiuurchatan wáinkiar Yúsaiya kanainiawai. ¹⁸ Chikich ántuiniamuka jañkí nupanam atsaampramua núniskete. Nu shuar Yus-Chichaman ántuiniawai. ¹⁹ Ántuiniayat ju nuñkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáñ Yus-Chicham ana nuna kanñkar emenkatui. Tuma asamtai nerektinian tujintiainiawai. ²⁰ Tura chikich ántuiniamusha péñker núñkanam atsaampramua núniskete. Nú shuarsha Yus-Chichaman antukar uminiawai. Tura nerenawai, chikich shuar trainta, chikich shuar sesenta chikich shuar siañsha nerenawai.’

Uyukma ana nu paant nekanattawai

(Rúkas 8.16-18)

²¹ Nuyá Jesus juna tímiayi ‘¿Shuar shiripkin ekeemak itia pitiaknum enñkeattawak. Peaknum wakenam ikus-tatuak? Atsá. Antsu misanam ekentsashtinkiait.

²² Núnisañ ashí uyukma ana nu ukunam paant nekanattawai. Tura núnisañ yamá ishishmasa chichasmasha ukunam paant nekanattawai. ²³ Kuíshim ákuñkia antuktaram.’ ²⁴ Tura nuyá tímiayi ‘Ántarmena nu esetrarum enentáimsarum antuktaram. Urutá péñkerak enentáimsatarum, núnisañ Yuska ámin nekaatniun suramsattarme, tura nú núkap patatramsattarme. ²⁵ Tuma asamtai shuar núkap takakna nu patatnastatui. Antsu chikich shuar ishichik takakuk jurunkittiawai.’

Yusa akupeamurj júnisaiti

²⁶ Nuyá Jesus chichaak juna tímiayi ‘Yusa akupeamurj júnisaiti. Shuar jinñkain atsaampratniua núniskete.

²⁷ Jinñkiáin atsaamar, untsurj kanar, tsawar, uruksanpi tusa nákwai. Tura itiuura tsapainia núnaka nékatsui.

²⁸ Kame jinñkiá nuñkanam init aku niñki tsapaatsuk; emka nukareawai, nuyá tuyureawai tura nujamar katsuawai. ²⁹ Túruna káakmatai júuktin tsawant jeayi tusar juíniawai.’

(Mateu 13.31-32; Rúkas 13.18-19)

³⁰ Ataksha Jesus tímiayi ‘¿Yusa akupeamurj warijijainki nakumkataj. Warijijainki métek-takuit? ³¹ Mustasa jinñki-ái araamua nujaj métek-takuiti. Nu jinñkiaisha ashí nañkaamas ishitiupchichiti. ³² Tura araam tsapaj ashí

naŋkaamas uunt ajawai; tura tseŋkeakmarjsha kámpuram asamtai nuĵi mikintranam chĩkisha shiir aya-mainiawai.”

(Mateu 13.34-35)

³³ Núnisanĵ Jesus untsurĵi métek-taku chichamĵajĵi Yus-Chichaman ujaamiayi. Nii nekaatniun jearmia nunak ujaamiayi. ³⁴ Chíkich shuaran aya métek-taku chichamĵajĵi ujaamiayi; antsu ni unuiniamurĵijĵajĵi Niŋki pujus ashí paant jintinrarmiayi.

Nasencha, entsanĵa Jesus imiĵiánmia nu

(Mateu 8.23-27; Rúkas 8.22-25)

³⁵ Nu tsawantajĵ etsa akaikimtai Jesus ni unuiniamurĵin chicharainiak “Entsa amain katiŋtai” tímiayi. ³⁶ Tutai kanunam eŋkemprarmiayi. Chíkich shuarnaka káanmatkanam ikiukiar Jesusan kanunam puĵan júkiarmiayi. Chíkich kanunmayasha atampriarmiayi. ³⁷ Tura naseŋsha ti nasenkatasa naŋkammiayi; chíchimi kanunam yaráná piáktasa ajamiayi. ³⁸ Jesuska kanú seŋkarĵin atamprus kanúu tepemiayi. Tura, ni unuiniamurĵi Jesusan ishintiak chicharuk “Uunta ii wayajnia juĵka pachitmatmek” tiarmiayi.

³⁹ Tutai Jesus nantaki nasen kakantramiayi. Entsanĵa chicharuk “Takamatsata. Miaku ajasta” tímiayi. Tutai naseŋsha meŋkakamiayi, entsasha miaaku ajasmiai. ⁴⁰ Túrunamtai Jesus ni unuiniamurĵin chicharainiak “¿Urukamtai ashamarum? Itiura Yus nekas enentáim-tatsrum” tímiayi. ⁴¹ Tura imiá ashamainiak “¿Maa juŋsha yait? Nasesha entsasha nin umirainiatsuk” tunaiarmiayi.

Jataranmayan iwianchrukun Jesus tsuármiania nu

(Mateu 8.28-34; Rúkas 8.26-39)

5 Nuyá antumiaŋ amaini Jatare nuŋkanam jeawarmiayi. ² Jesus kanunmayá jiinkimtai áishmaŋ iwianchrukun, shuar jakáa iwiartainiumiá wárik taa Jesusan iŋkiuŋmiayi. ³ Nu shuar iwiartainium tuke puĵuyayi. Tura jirujajĵinĵa nin jinkiaatniun tujinkiararmiayi. ⁴ Jirujajĵi nawenmasha, uweĵnumsha tuke jĩŋkiau ármiai. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi. ⁵ Tuke tsawajsha káshisha, iwiartainiumsha murasha kayajajĵi ijiumak untsumu wekainiuyayi. ⁶ Tura yajayaŋ wáiniak Jesusan tseke tarimiayi; tura tikishmatramiayi. ⁷ Túrunamtai Jesus chicharuk “Iwianchiá, ni enentáiyá jiinkitia, tájame” tímiayi.

Takui íwianĵa kakantar chichaak “¿Winiasha urukamtai tarutnium, Uunt Naŋkaamaku Yusa Uchirĵi Jesúsá? Yus iirmanum wáitkiarsaip, tájame” tímiayi.

⁹ Takui Jesus tímiayi “¿Ame náarmesha yait?”

Tutai niisha ayak “Untsurĵi ásar wikia Untsurĵi-suntar tu anaikiamuitĵai” tímiayi.

¹⁰ Nuna ti amik, nu nuŋkanmayá akuptukajĵi tusa Jesusan ti seamiayi. ¹¹ Nuĵsha nainnium nuntumas untsurĵi kuchi shushuŋmak matsamarmiayi. ¹² Tuma asamtai, kuchiniam eŋkemátin tsaŋkatrukta tusar Jesusan seawarmiayi.

¹³ Tuiniakui Jesus “ayu” tímiayi. Takui íwianĵa áishmaŋkaĵniá jiinkiar kuchiniam eŋkemáwarmiayi. Kuchisha ti untsurĵi, jimiará mir (2.000) áchiawash. Ashí mash nánatanam iniaawar antumiaŋnum iniaŋkarmiayi. Nuĵsha entsá kĵakar jakerarmiayi.

¹⁴ Túrunamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi. ¹⁵ Túrawar Jesusajĵi jeawarmiayi. Jeawar áishmaŋ yaunchu iwianchrukun yamaikia péŋker ajasun pushirĵin entsar puĵan wáinkiararmiayi. Wáinkiar ashamkarmiayi. ¹⁶ Tura waketiak kuchi túrunamunĵa iwianchrukun péŋker ajasmanĵa mash etserkarmiayi. ¹⁷ Tuma asamtai ni nuŋkeyá jiinkia wetá tusa seawarmiayi. Jesus kanunam eŋkemamtai áishmaŋ nuik iwianchrukun amia nu Jesusan chicharuk ¹⁸ “Wi Ámijĵajĵi tuke tsaniŋkian wekasatĵai” tímiayi.

¹⁹ Tura núnaka Jesus suritkiamiayi. “Antsu ame jeemĵin, áminiumĵin weme, ashí Uunt Yus túrutma nu tura waitnentrampa nusha ujakarta” tímiayi.

²⁰ Tutai áishmaŋsha wémiayi. Tura antsu Tekapuris nuŋkanam Jesus nin péŋker awajsamia nuna ashí shuaran ujakmiayi. Nu nuŋkanmayá shuarka nuna antukar ti enentáimprarmiayi.

Jimiará jaan Jesus tsuármiania nu

(Mateu 9.18-26; Rúkas 8.40-56)

²¹ Ataksha Jesus kanujajĵi katiŋmatai, aents untsurĵi Nin irunturarmiayi. Jesuska antumiaŋka káanmatkari wajamiayi. ²² Tura Israer-shuar iruntajĵi jeá náampruku, ni naari Jairu, támiayi. Taa, Jesusan wáiniak, piniakum tepersamiayi. ²³ Piniakumar ti seak, “Winia nawantur jarutui. Winitia, túram péŋker ajasat tusam uweĵmijĵajĵi antintrukta. Nuiŋkia jarutkashtatui” tímiayi.

²⁴ Tu tímiatai Jesus niĵijajĵi wémiayi. Tura untsurĵi shuar wena ásar Nin chánuarmiayi.

²⁵ Nuĵ pachitkia nuwá ti jaa wémiayi. Niisha tuse uwi numpan ajapeak wáitias puĵuyayi. ²⁶ Ti untsurĵi tsuakratin ninĵa iisu armiayi. Tura iyamsha ti wáitias puĵuyayi. Tura ni kuĵtrĩnĵa ashí ajapaitiat tsuámarĵauyayi; antsu tsuamsha nu arant ajauyayi. ²⁷ Nu nuwásha, Jesus túramun antuku asa, ni ukuurĩn amainiŋ ni pushirĵin antiŋmiayi. ²⁸ “Wi aya ni pushirĵin antiŋnaka péŋkerapi ajasaintĵia” tu enentáimiar túramiayi. ²⁹ Tura Jesusa pushirĵin antiŋ nú chichamaik numpa ájapman meŋkakamiayi. Péŋker ajasman ayashĩn nekapramiayi. ³⁰ Tura nuĩn Jesuska, ni kakarmarĵijajĵi tsuarman nekapmampramiayi. Tura nuna nekáa, ayantar chichaak “¿Yaki winia pushirun antintruĵka?” tímiayi.

³¹ Tutai ni unuiniamurĵi tiarmiayi, “Untsurĵi Ámin antinmainiasha ĵurukamtai “yaki winia antintkia” tame?”

³² Tura Jesus, yaki túruta tusa ashí íimpramiayi.

³³ Nuiŋkia nuwásha, ni ayashin túruna nuna nekáa, ti ashamak kuraimiayi. Tura Jesusan jearĵi tikishmatramiayi. Tura ni túrunamurĵin ashí paant ujakmiayi. ³⁴ Takui Jesus nin chicharuk “Nawantru, Winia nekas enentáim-tursa asakmin, péŋker awajtamsaitme. Shiir wetá, tura tuke péŋker puĵusta” tímiayi.

³⁵ Tura Jesus nuna tuke chichas pujaj, iruntai jea uuntri jeenia tariarmiayi. Tariat chicharainiak "Ame nawantrum jakayi. ¿Urukamtai Unuikiartin tuke itit awajsatam?" tiarmiayi.

³⁶ Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk "Ashamkaip; áyatik nekas enentáimtursata' tímiayi. ³⁷ Tura Niiijaí wéтинian aya Pítruncha, Jakupuncha ni yachi Juanjaí tsankatkarmiayi. ³⁸ Iruntai jea uuntri jeen jeawar, áentsun charaatum ajainian, útainian untsukum ajainiancha Jesus wáinkiamiayi. ³⁹ Tura nuwach penké jakan nékayat, wayá nin chicharuk "¿Urukamtai timiá útrum, tura wa wa ajarum? Nuwach jákachai, antsu kanarai" tímiayi.

⁴⁰ Nuna takui wishikrarmiayi. Tura Jesus ashí jiiir akupkarmiayi. Áyatik nuwachí aparín, nukuríncha tura Niiijaí táaruncha nuwachí tepamurín jukimiayi. ⁴¹ Tura wayawar Jesuska nuwachí uwejen achik tímiayi "Taritia kumi." Nusha shuar chichamjaínkia "nawantrú nanták-tiá" tawai. ⁴² Nuwach tuse uwí takakuya nu, nú chichamaik nantaki wekasamiayi. Túramtai nuí pujuarmiania nu ti enentáimprarmiayi. ⁴³ Jesuska chichaak "Atumsha penké etserkairap' tímiayi. Tura "nuwach ayuratarum" tímiayi.

Jesus Nasarénum pujusma

(Mateu 13.53-58; Rúkas 4.16-30)

6 Jesus nuyá jiínki ni nuñken waketskimiayi. Ni unuiniamurísha nemariarmiayi. ² Nuísha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. "¿Jusha tuí unuimiaruit. Ni nekaatniuríncha yaki susait. Tura aentsti tujintiajnina nuna Niisha itirak tura? ³ Jusha karpintírchukait; Maríi uchirínchukait. Ni yachísha Jakupusha, Jusesha, Jútassha, Semuñsha nékatsjik. Tura ni umaísha juí iijíají pujuiniatsuk" tiarmiayi. Túrawar Nin nekas enentáimtustinian tujinkiarmai-

ayi. ⁴ Túrassha Jesus nin chicharuk "Yúsnan etserniun chíkich nuñkanmayanka shiir anturainiwai. Antsu ní nuñkeyanka, ní shuarsha anturainiatsu" tímiayi.

⁵ Tura nuísha, ni nuñkenkikia aentsti tujintiamun túratniun tujinkiamiayi. Antsu jaancha aya ishichik ni uwejejaí antiñ tsuármiai. ⁶ Tura nekas enentáimtacham "¿urukamtai nusha?" tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

Yus-Chicham etserkatarum tusa Jesus ni unuiniamurín akupkarmiania nu

(Mateu 10.5-15; Rúkas 9.1-6)

⁷ Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarín súsarmai. ⁸ Tura chicharuk "Jintiá yurumátniusha jukiirap, uyuntrumíincha kuitcha enkearum jukiirap. Antsu aya áanik mashtun jukiirum wetarum. ⁹ Sapat uwekatarum, tura entsartincha jímiar jukiirap, tímiayi.

¹⁰ Tura jea wayarmena nuñ pujustarum; pujá-pu-jakuarum nuyá chíkich peprunmasha wetarum. ¹¹ Tura náñkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch áiniawai tusarum, atumí nawe nuñka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmayá shuarjaí tura Kumura péprunmayá shuarjaí nankaamas nin asutiattawai" tímiayi Jesus.

¹² Nuyá Jesusa unuiniamurí jíinkiar enentái yapajiar Yúsai enentáimtumartinian etserkarmiayi. ¹³ Tura iwianchraku enentáiyá iwianchin jíirki akupkarmiayi, tura asutiijaí yakarar untsurí jáinian tsuararmiayi.

Juanka jakamurí

(Mateu 14.1-12; Rúkas 9.7-9)

¹⁴ Jesusa náarín tura ni túramurín ashí aents áujmatin ásarmatai, uunt akupin Erutis nuna antukmiayi. Erutiska "Imiakratin Juan jakamunmayá nantakni. Tuma asa ti kakaram takaawai" tímiayi. ¹⁵ Tura chíkich shuar "Eriásaiti" tiarmiayi. Chikichcha "Yúsnan etserniuiti, yaunchu etserniuya núkete" tiarmiayi.

¹⁶ Erutis nuna antuk "Nekas Juánkaiti. Ni muuken tsupiktinian akupkamiay nu, jakamunmayá nantakniuiti" tímiayi. ¹⁷ Kame Uunt akupin Erutis, ni yachi Jiripi nuarín nuatkamiayi. Nu nuwá naari Jirutíasaiti. Juansha uunt akupniun Erutisan chicharuk "Yatsumi nuarí akintrukchatniuitme' tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrassha uunt akupin Erutis nuna surimkiamiayi. Antsu Juan achikrum sepunam enkeatarum tusa akupkamiayi. ²⁰ Juansha tuke enentáijíají Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías wakeramurín túrawajín tusa suritkamiayi. Kame Erutis Juan étserman nékachuitiat antuktinian wakerimiayi.

²¹ Jirutías, itirak máawaj tu pujaj, uunt akupin Erutis, ni akiiniamu tsawantri jeamtai, ni suntaríncha, Kariréa nuñkanmayá úuntrincha, kuítrintin armia nunasha untsukar, namperan najanamiayi. ²² Nuísha Jirutías nawantri wayá jantsemámtai Erutis tura niijaí nampernum matsamarmia nusha shiir enentáimsarmiayi. Túramtai uunt akupin nuwachin chicharuk "Ame wakeram nu seattia. Wi amastatjai. ²³ Nekas tájame, ashí ame seatmena núnaka amastatjai. Wats, seatkumnínkia takakjana nuna jímiapetek nakakan, amastatjai" tímiayi.

²⁴ Tutai nuwach jiínki ni nukurín Jirutíasan chicharuk "¿Wariniak seattaj?" tímiayi.

Tutai "Imiakratin Juan ka muuke seata" tímiayi.

²⁵ Nu chichamaik nuwach wari wayá Erutisan chicharuk "Yamaikia uunt amamkunam Juan ka muuken wakerajai" tímiayi.

²⁶ Nuna takui uunt akupin ti kuntuts enentáimpramiayi. Tura nii tiniu asa ni amikrj matsatainia nu antukaru ásarmatai surimkiatniun tujinkiamiayi. ²⁷ Tuma asa uunt akupin Juan ka muuke itiatata tusa ni suntarín wárikmas akupkamiayi. ²⁸ Túramtai suntar wari we,

sepunam Juan̄ka muuken tsupikmiayi. Tsupik, amamkunam itia, nuwan susamiayi. Túram achik ni nukur̄n susamiayi. ²⁹ Juan̄ maamun antukar ni unuini-amur̄ ni ayash̄n iwiansatai tusar júkiarmiayi.

Seṅku mir áishmaṅkan Jesus ayuramiania nu

(Mateu 14.13-21; Rúkas 9.10-17; Juan̄ 6.1-14)

³⁰ Tura Jesusa unuiniamur̄ Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniarmia nunasha ujakarmiayi. ³¹ Tura untsur̄ shuar tániakui, niisha ankant ajastinniasha yurumátniuncha tujinkiararmiayi. Tuma asamtai Jesus chichaak “Tij̄j̄i wemí aents atsuiniamunam; nu ishichik ayamprarmi” tímiayi. ³² Nuyá Jesus ni unuiniamur̄ij̄j̄i kanunam eṅkemprar, aents atsuiniamunam jeatai tusar jíinkiararmiayi. ³³ Túrasha shuar ni wéenan wáinkiararmiayi. Tura “Jesusaiti” tiarmiayi. Tuma ásar ashí péprunmayá untsur̄ shuar tseke ashintiukar, ni jeatniunam nákakarmiayi. ³⁴ Jesus kanunmayá jíinki ti untsur̄ aents iruntrar matsatun wáinkiamiayi. Murik péṅker wáinchataiya núnisaṅ matsatu ásarmatai Jesus nin wáitnentrarmiayi. Tura núkap unuiniarmiaayi. ³⁵ Nuyá k̄akui ni unuiniamur̄ Jesusan tariar chicharainiak “Atsamunam pujatsjik; tura yamá k̄át-suk. ³⁶ Shuar wari akupkarta. Tíjiyuch péprunmasha, shuarnumsha wearti, ni yurumkar̄ sumarmakarati” tiarmiayi.

³⁷ Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sian̄ kuit-jai yurumak sumaktai tusar wétinkiaitai?” tiarmiayi.

³⁸ Tura Jesus ni unuiniamur̄n chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka séṅkuchikiiti, tura namaksha jímiarchikiiti” tiarmiayi.

³⁹ Tutai Jesus tímiayi “Ju shuar chírichriniam pujusarti tusar akupkatarum.” ⁴⁰ Aṅkant aṅkant sian̄ sian̄sha, seṅkueta seṅkueta iruntrar matsamsarmiayi. ⁴¹ Jesuska seṅku tantancha, jímiar namaknasha jusa, yakí nayaimpinmaani ímias Yúsan yuminsarmiayi. Tura yurumkan púurmiayi. Puur ni unuiniamur̄n súsararmiayi. Namaknasha puur súsararmiayi, ashí shuáran ajamsarat tusa. ⁴² Ashí yurumáwar ejemarmatai, ⁴³ puunaruncha, namak ampirmancha achikiar, tuse chaṅkinian áimkiar júkiarmiayi. ⁴⁴ Nu yurumkan ti untsur̄ yurumáwarmiayi. Aya áishmaṅkak seṅku mir (5.000) ármiayi.

Jesus entsá pátatek wekasamiania nu

(Mateu 14.22-27; Juan̄ 6.16-21)

⁴⁵ Nuyá Jesus ni unuiniamur̄n chicharainiak “Kanunam eṅkemprarum, kat̄nkrum amain émaa ajatarum, Petsaitia péprunam. Wisha ju shuaran áusjan̄ ikiuktatjai” tímiayi. ⁴⁶ Shuáran áujas ikiuki Yusj̄i chichastaj tusa náinnium wémiayi.

⁴⁷ Tura kirit ajasmanum kánuka antumiaṅnum ajapén nanammiayi. Jesuska niṅki juakmiayi. ⁴⁸ Jesusa unuiniamur̄sha wia-wiantainiakua ti pimpikiarmiayi, nasé tukumma ásar. Nuna Jesus wáiniak tsawartin

ishichik ajasmatai entsá pátatek wekas nin jeariarmiayi. Tura naṅkaamaktiasa wea núnisaṅ wémiayi. ⁴⁹ Jesus entsá wekaan ni unuiniamur̄ wáinkiar, wakan-chashit, tu enentáimprarmiayi. Túrawar ti untsumkarmiayi. ⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíit-jai Jesus; ashamprukairap” tímiayi. ⁵¹ Nuiṅkia entsaya kanunam waka eṅkempramiayi. Túramtai nasesha ma-jaantmiayi. Ni unuiniamur̄n k̄ia enentáí kiritia áintsan̄ ásarmatai Jesus yurumkan núkap awajsamia nuna paant nekaatniun tuke tujinkiararmiayi. Tuma ásar yamá túrunamu itiurak aankia tusar ti enentáimprarsapijmiakarmiayi.

Jinisarítnumiá shuáran Jesus tsuármiania nu

(Mateu 14.34-36)

⁵³ Nuyáka kat̄nkiar, Jinisarít núṅkanam jeawarmiayi. Jeawar kanun ajuiniarmiayi. ⁵⁴ Kanunmayá jíintrar-matai, nu nuṅkanmayá shuar Jesusan nekaawarmiayi. ⁵⁵ Tura “Jesus pujawai” táman antukar, ashí jean̄mayá jaan ni peakrintiuk Jesus pujamunam itiaarmiayi. ⁵⁶ Tura Jesus wekaak wémia nujsa, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antiṅtaj tusar seawarmiayi. Tura ashí antiṅkiarmia nuka péṅker ajasarmiayi.

Jesus Pariséun áujmatsarmiania nu

(Mateu 15.1-20)

7 Pariséusha, Israer-shuara jintinniur̄sha Jerusarēnnumiá Jesusan tariarmiayi. ² Tura Jesusa unuiniamur̄n ikijmiatsuk yurumun wáinkiar “Israer-shuara túrutair̄n túruiniatsui” tiarmiayi. ³ (Kame Pariséusha, tura ashí Israer-shuarsha, ni uuntrī jintintiamur̄n umikiar ti núkap ikijmiarar yurumin ármiai. ⁴ Péprunmayá tari “ikijmiatsuk yurumáshtiniaiti” tiniu ármiai. Tura ti untsur̄ ni uuntrī túrutair̄ núnisaṅ ármiai. “Tsapancha, ichiṅnasha, jiruncha, peaknasha ni-jiaktiniaiti” tiniu ármiai.) ⁵ Tuma asamtai Pariséusha, Israer-shuara jintinniur̄sha Jesusan chicharainiak “¿Urukamtai ame unuiniamur̄m ii uuntrī jintintramniuitai nuna túruiniatsu. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtinaitrume. Isayas yaunchu nekas atumin áartampramiayi juna: Ju aents ni wenej̄i Winia “ti péṅkeraiti” turutainiawai, tímiayi Yus, tura ni enentáṅkia jeachat pujuiniawai. ⁷ Tura tukeneas Winia shiir awajtuiniawai. Aents chichame jintinaiyat, “Yus-Chichamaiti” tuiniawai.” Tu áarmaiti. ⁸ Tura átum Yusa chichame iniaisarum, aentsu jintintiamur̄ umirkarum, ichiṅnasha, tsapancha nijaktin, tura chíkich túrutaisha áintsarmek untsur̄ túrarme. ⁹ Túrákrum Yus-Chichamka tsukintiaani ikiusurme atumí uuntrī chichame umirkatai tusarum. ¹⁰ Kame Muisais yaunchu aar juna tíchamka: Ame apa nukusha shiir enentáimtustarum. Tura ataksha áarmiai:

Shuarsha ni aparín, nukuríncha yajauch chichareaka, nu shuar jákatniuiti.

¹¹ Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáiníntian takakjana nu Kurpanaiti” takuinkia, atumsha péñkeraiti, aparíncha nukuríncha yáinchatí” tarume. (Kurpan tana nuka, Yus susamu, tawai.) ¹³ Nekaatarum, Pariséutiram. “Í yaunchu uuntri chichame tuke umiki wétiniaitji” tákorum, Yus-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, timiayi. ¹⁵ Aya ayashnium wayaana nu, shuáran yajauch awajsachminiaiti; tura antsu ni enentáiniá jinia nu, yajauch awajsattawai. ¹⁶ Shuar nuna ántakka enentáimprati” timiayi.

¹⁷ Nuyá áentsun ikuiak, jeá wayamtai, ni unuiniamurí aniasarmiayi “¿Nu métek-taku chicham warintuia?” tiarmiayi.

¹⁸ Tutai Jesus timiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti. ¹⁹ Antsu wakenam wayá, nañkaamas menkaatsuk” timiayi. Nuna taku, ashí yurumak páchitsuk yuamniaiti, timiayi. ²⁰ Nuyá timiayi “Shuara enentáiniá jinia nu, yajauch awajsamniaiti. ²¹ Shuara enentáiniá, inia, yajauch enentáimsatniusha, tsanirmatniusha, natsa tsanirmatniusha, shuar máatniusha, ²² kasamkatniusha, chikichna wakeruktincha, péñkercha túratniusha, anañkatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka inia wininiatsuk. ²³ Ashí nu tunáa ainia nu, shuara enentáiniá jiniu asa, shuáran yajauch awajainiawai” timiayi.

Serupinísianmayá nuwá Jesusan nekas enentáimtusmiania nu

(Mateu 15.21-28)

²⁴ Tiru pepru, Setún péprusha Serupinísia nuñkanam ámiayi. Nuka Israer-shuara nuñkenchayuyai. Nu nuñkanam Jesus wémiayi. Tura jeá, jeá wayáá pujusmiayi. Tura nuj pujamun nu nuñkanmayá shuar nekarawarajin tusa nakitmiayi; túrasha uumkatniun tujinkiamiayi. ²⁵ Wárik nu nuñkanmayá nuwá Jesus pujan nekaamiayi. Nu núwaka nawantri iwianchrukuyai. Tuma asa Jesusan tarí ni nawen piniakum tepersamiayi. ²⁶ Nu nuwá Israer-shuarcha, Serupinísianmayáuyuyai. Túmaitiat, nawantru enentáiyá iwianchin jirturkitia tusa Jesusan seamiayi. ²⁷ Tutai Jesus nuwán chicharuk “Uchi emka ejemartí. Uchi apatkuri atankir yawach súsatin péñkerchaiti” timiayi.

²⁸ Tutai nuwá ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumak juyumak kákeamun yuiniatsuk” timiayi.

²⁹ Tutai Jesus timiayi “Péñker tame. Tuma asam, shiir wetá; ame nawantrumí enentáiyá iwianch jinkiyi” timiayi.

³⁰ Takui niisha wémiayi. Tura ni jeen jeá, ni nawantrin iwianch jinkimtai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmayá jinki Setún péprunam nañkaamarkutak, Tekapuris nuñkanmaani nañkaamaki, Kariréa antumiañnum ataksha jeamiayi. ³² Nu chichachu ámiayi, kuishin empeku. Nu shuáran Jesusan itiarar, ni uwejejai antinikat tusar seawarmiayi. ³³ Shuar matsatmanumiá Jesus nin akanki juki kuishin tsara uwejejai tsutsukruamiayi. Tura usukia, nu shuara iniajn antinkiamiayi. ³⁴ Tura nayaimpinmaaní ímias súkaska mayati “Epata” timiayi. Nuka, shuar chichamnumka “chinkiatí” tawai. ³⁵ Nu chichamaik ni kuishisha chinkiamiayi, iniajsha séermiayi. Tura paant chichasmiai. ³⁶ Tura Jesus chicharainiak “Péñké etserkairap” timiayi. Jesuska surí-suritiamaitiat, nu nañkaamas etseriarmiayi. ³⁷ Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

Kuatru mir shuáran Jesus ayuramiania nu

(Mateu 15.32-39)

8 Nu tsawantá shuar timiá untsurí iruntrarmiayi. Yurumkarí atsakui Jesus ni unuiniamurín untsukar juna timiayi: ² “Ju shuáran waitnentajai. Menaintiú tsawant Wijjái pujuinia ásarmatai ni yurumkarí amuukachaik. ³ Tura ni jeen ayurtsuk akupeamka, tsukarjin jintiá pimpikiartatui, yajayá káunkaru ásar” timiayi.

⁴ Tutai ni unuiniamurí chichainiak “Túrasha juí atsamunam, ju aents ejemarat tusar ¿tuyá yurumkak wáinkiatjái?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuñkia ashí áentsun “nuñká pujustarum” tiarmiayi. Tura tantan achik, Yúsan yumisamiayi. Tura puuk, áentsun ajamsatarum tusa ni unuiniamurín susamiayi. ⁷ Tura uchich namaksha ishichik aan achik, Yúsan yuminkias, ni unuiniamurín chicharuk “Jysha shuar ajamsatarum” timiayi. ⁸ Turam ashí yurumáwar ejemarmiai. Ampirma púnaruncha siati chañkinnium áimkiarmiayi. ⁹ Kuatru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi. ¹⁰ Tura ni unuiniamuríjjái kaunam enkemprar Tarmanúta nuñkanam wearmiayi.

Pariséu Jesusan iniakmasta tiarmiania nu

(Mateu 16.1-4; Rúkas 12.54-56)

¹¹ Pariséu Jesusjai áujmatsatai tusar tariarmiayi. Nekapsatai tusar wakeruniak Nin chicharuk “Nayaimpinmayá kakaram iniakmasta” tiarmiayi.

¹² Tuíniakui Jesus kúntuts enentáimias, súkaska mayati “¿Urukamtai, yamaiya aentstiram, nayaimpinmayā kakarman iniakmasat tusarum wakerarum? Nuka peṅké sunaschattarme, paant tájarne” tímiayi.

¹³ Nuyá nin ikiukiar ataksha kanunam eṅkemar amain katiṅmiayi.

Pariséu túramurijjaj aneartarum, tímiayi Jesus

(Mateu 16.5-12)

¹⁴ Tura ni unuiniamurj yurumak jukitai tukamá kajinmatkiarmiayi. Kanunmaṅka aya chikichik tantanak takaku ármiayi. ¹⁵ Jesussha ni unuiniamurj enentáimtikiuk tímiayi “Wáinkiatarum; Pariséusha Erutissha wakaprutain takakainia nújajsha aneartarum” tímiayi.

¹⁶ Tutai ni unuiniamurjsha tunaiyarmiayi “Tanta kajinmatkin asakrin nuna túramtsujjash” tiarmiayi.

¹⁷ Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Peṅké enentáimtsurmek. Atumí enentáṅ tuke kiritkiai? tímiayi. ¹⁸ Jimi aṅsha itiura wáintsurmea. Kuíshim aṅsha itiura ántatsrum. Ashí kajinmatkintrumek. ¹⁹ Nekaatarum, nuik, seṅku tantan púuran seṅku mir áishmaṅkan ayurachmakaj. ¿Tura ampirma urutmá chaṅkinnium chumpiamarum?” tímiayi.

Niisha tiarmiayi “Tuse chaṅkinnium chumpiamji.”

²⁰ Ataksha Jesus tímiayi “Tura siati tantajaj kuaru mir shuaran ayuramtaí, ¿ampirmasha urutmá chaṅkinnium chumpiamarum?”

Niisha “siati” tiarmiayi.

²¹ Tuma asamtaí Jesus tímiayi “¿Itiura imiá nékatsrum?”

Jesus kusurun íimtiksamiania nu

²² Nuyá Petsaitia péprunam jeawarmiayi. Jeawarmatai, áishmaṅ jii kusurun Jesusan itiararmiayi. Túrawar antiṅta tusar seawarmiayi. ²³ Tuma asamtaí Jesus uwejnum achik péprunam aṅani eṅkeki júkí jiiin usukijjaj kuérmiayi. Tura uwejéjaj antiṅ “¿íimmek?” tímiayi.

²⁴ Tutai kusuru íimi tímiayi “Aentsun iijajai, túrasha paantcha. Numi wekainian áaniun iijajai” tímiayi.

²⁵ Nuyá ataksha Jesus ni uwejéjaj kusuru jiiin antiṅmiayi. Tura kusurusha úmamkes iis, péṅker ajas, ashí paant íimpramiayi. ²⁶ Jesus chichaak “Jeemjijn weakum péprunam wayawaip tura shuar ujakaip” tímiayi.

Pítiur Jesusan “Yusa Anaikiamurinme” tímiania nu

(Mateu 16.13-20; Rúkas 9.18-21)

²⁷ Jesus ni unuiniamurijjaj uunt pepru Sesaria-jiripinam jeatsuk, tíjjuch uchich péprunam irasarmiayi. Jintia wésar Jesus ni unuiniamurj chicharainiak, “¿Yaiti turutainiawa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juanakaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

²⁹ Tutai Jesus tímiayi “Atumsha, ¿waritrume. Yáitij?” tímiayi.

Tutai Pítiur tímiayi “Ámeke Krístuitme; Yúsaiya akupkamuitme.”

³⁰ Tutai Jesus chichaak “Peṅké etserkairap” tímiayi.

Jesus ni jákatniurj ujakmiania nu

(Mateu 16.21-28; Rúkas 9.22-27)

³¹ Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntrjsha, Patri úuntrjsha, ii jintin-niurjsha Winia nakitrurar mantuawartatui. Túrasha menaintiu tsawant naṅkaasmatai nantaktinaijtai” tímiayi. ³² Nunasha paant ujakmiayi.

Tura Pítrusha Jesusan arantach júkí kakantramiayi. “Tu chichasaip” tímiayi.

³³ Tutai Jesus ayantmatar, ni unuiniamurj iis, Pítrun kakantar chicharuk “Satanása, werumta. Ámeke Yusna ana nu enentáimtatsme, antsu aya áentsnak enentáimtame” tímiayi. ³⁴ Nuna tuasua amik tura nuṅ mat-samarmia nunasha, ni unuiniamurjcha untsuk tímiayi, “Shuar Winia nekas nemartustasa wakerakka ni wakeramurjnia iniaisati; tura ni krusj yanakí nemartustí. ³⁵ Kame shuar ju nuṅkanam aya niṅki anemamkuṅka nu shuar ni iwiaakmarj emeṅkaktatui.

Antsu Winia anentu asa tura winia chichamprun anea asa, shuar aya péṅker pujustinniak enentáimtsuna nu, nekas iwiaakman wáinkiatatai. ³⁶ Nekaata, shuar ashí ju nuṅkanam írúna nuna sumaksha túrasha ni wakanj jinium wéakuisha, ¿itiurak péṅker pujusaint? ³⁷ Shuarka wakanj uwemtikrataj tusa wakerak ¿urutmak akikmakaint? ³⁸ Antuktarum. Yamaiya aents Yúsan nakitjar ajapawaru yajauch ainia nu íimiainiamunam shuar Winia natsantrakuṅkia tura winia chichamprun-cha natsantakuṅkia, wi, Aents Ajasuitjiana ju, winia Aparu kakarmarjijjaj tura nayaimpinmayā péṅker sun-tarjaj atak taakon, nú shuaran natsantrattajai Wisha.’ Tu tímiayi Jesus.

9 Ataksha Jesus nin chicharuk, ‘Nekas tájarne, shuar játsuk Yus ni kakarmarjijjaj aentsu enentáin akupkattana nú tsawantan wáinkiatatna nu juṅ iijjaj pujuiniawai’ tímiayi.

Jesus nusháa iira ajasmiania nu

(Mateu 17.1-13; Rúkas 9.28-36)

² Nuyá sais tsawant naṅkaasmatai, Jesus Pítrun-cha, Jakupuncha, Juánnasha uunt náinnium júkiarmiayi. Nuṅsha Jesus nusháa iira ajasmiai. ³ Ni pushirjsha ti puju jíitsumir ajattsarmiayi. Nuṅjaj métek puju awaj-satin ju nuṅkanam atsawai. ⁴ Túruna nuṅ Erías, Mui-saisjaj wantinkiar Jesusjaj chichainian wáinkiararmiayi. ⁵ Nuyasha Pítiur Jesusan chicharuk “Uuntá, ii juṅ pu-justin ti péṅkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi. ⁶ Jesusa unuiniamurj sapijmainiak, Pítiur wariniak titi nekaachmiayi. Nékachu asa nuna tímiayi.

⁷ Tura yuraṅkim tara mikintiu awajsamiai. Yuraṅminmayā chichaak “Júiti winia aneamu Uchir. Nii anturkatarum” tímiayi.

⁸ Nuyanka ni unuiniamurij ayantmar iijaj tukamar aya Jesusnak wáinkiararmiayi. Chíkichkia atsuarmiayi.

⁹ Nuyá náinniumiá akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmayá nantaatsajin nu etserkairap” tímiayi.

¹⁰ Tutai ni tímian ímiatrusan úukarmiayi. Tura “jakamunmayá nantaatsajin tana nu, ¿wariniak ta?” nuamtak tunainiarmiayi. ¹¹ Tura Jesusan aniasarmiayi “¿Urukamtai Israerti ii jintinniurisha, Erías emka tátini-aiti, tuinia?” tiarmiayi.

¹² Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintia?”

“Ti wáitsattawai; Nin nakitrartatui.” Tu áarmaiti.

¹³ Wi tájarme, Erías nekas táwiti. Támatai, shuar ashí ni wakeriarmia nuna nin túrawarmiayi. Yusa Papirijn Eríasa túrunatniurj aarma amia tímiatrusan túrawarmiayi” tímiayi Jesus.

Jesus iwianchin jiki akupkamiania nu

(Mateu 17.14-21; Rúkas 9.37-43)

¹⁴ Tura ni unuiniamurij matsatmanum atak wáketuk, ti untsurj aents káutkar Israer-shuara jintinniurisha ni iijaj tunai pujuinian wáinkiamiayi. ¹⁵ Tura aencha, Jesusan wáinkiar warainiak, tsékeñki weriar, áusarmiayi. ¹⁶ Túrunawarmatai, Jesus chicharainiak, “Warí tunai-yarum?” tímiayi.

¹⁷ Tutai chikichik ayak “Uuntá, winia uchirun Ámin itiarjame. Iwianchruku asa chichachuiti. ¹⁸ Túmakui íwianch enkemtakun paat ajar áepeawai; túram uchisha saun kaput apak najn kátetete awajeawai. Túram kakaakcha ame unuiniamurmin seamjai, jirtuk-ti tusan, túrasha tujintrutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsu-trataj! Uchi itiatarum” tímiayi. ²⁰ Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

²¹ Túrunamtai Jesus ni aparj aniasmiayi “¿Urutá yaunchu áinkiait?”

Tutai ni aparj tímiayi “Úchichik áinkiaiti. ²² Tuma asa tuke jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiumka wait-neasam yainrukta” tímiayi.

²³ Tutai Jesus chicharuk “¿Urukamtai, yaintrukmini-aitkiumka, tame? Nekaata, shuar Winia nekas enentáimturna nu ashí túramniaiti” tímiayi.

²⁴ Tutai uchi aparj kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

²⁵ Tura shuar untsurj káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi. ²⁶ Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsurj shuar “jakayi” tiarmiayi.

²⁷ Támanak Jesus uwejen achik awajkimiayi, tura uchi nantaki wajakmiayi.

²⁸ Tura Jesus jeá wayamta, niñki pujusar, ni unuiniamurj aniasar “¿Urukamtai iisha jíiktin tujinkiamaj?” tiarmiayi.

²⁹ Tutai Jesus tímiayi “Ju iwianchkia jiararm Yus áukur jíikminiaiti” tímiayi.

Jesus ataksha ni jákatniurj in ujakmiania nu

(Mateu 17.22-23; Rúkas 9.43-45)

³⁰ Nuyá jíinkiar Kariréa nunkanmaani nankaamarmiayi. Ni unuiniamurj unuinia asa nu nankaamamun nekaawarajin tusa Jesus nakitmiayi. ³¹ Unuiniak juna tímiayi: “Wi Aents Ajasuitjaj juna mantamnati tusar achirkar surutkartatui. Tura máamuitiatnak, iwiarsamunmayan menaintiú tsawantaj nantaktiatjai” tímiayi. ³² Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

³³ Nuyá Kapernáum péprunam jeawarmiayi. Tura Jesus jeá pujus ni unuiniamurj aniniak, “¿Atumsha jintiá winisrum warí áujmatmiarum?” tímiayi. ³⁴ Tura natsarar pachischarmiai. Kame jintiá wésar “iijaj zyaki imiá nankaamantu ajasat?” tunainiarmiayi. ³⁵ Ni unuiniamurj pachischarmatai, Jesus pujus ashí tuse unuiniamurj irur chichaak “Shuar nekas nankaamantu ajastajtsa wakerakka, peejchachia nuke enentáimturna shuara yáintrj atí” tímiayi. ³⁶ Tura uchin itiaa miniakas chichaak: ³⁷ “Shuar uchin winia naaruj shiir awajeakka Winia shiir awajatawai. Tura Winia akuptukua nunasha shiir awajeawai” tímiayi.

“Shuar in nakitramachkuŋka in páchitkiawai”

(Rúkas 9.49-50; Mateu 10.42)

³⁸ Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijaj irutkachu asamtai nu túratin suritkiamji” tímiayi.

³⁹ Tutai Jesus tímiayi “Antsu suritkairap. Shuar winia náarun pachis tujinkiamun túrakka, nu shuar wari tsanumprutatniun tujinkiattawai. ⁴⁰ Shuar in nakitramachkuŋka, in páchitkiawai, tímiayi. ⁴¹ Winia nemarka asakrumin shuar yumiichinkesha ajampramkuka ántar túratsui; akikma átatui” tímiayi.

(Mateu 18.6-9; Rúkas 17.1-2)

⁴² Tura shuar ju uchin Winia umirtuinia nuna yajachin túrumtikiamtaŋkia, ti asutniattawai. Tuma asamtai uchin yajachin túrumtiktsajin kuntujen kaya-jaj jinkiar nayaantsanam ajunmaka maak ainti. ⁴³ Ame uwejmek yajachin túrumtikramamniaitkuŋkia tsupikta. Mai uwejtuk wáitsatniunam jeatniujajŋkia chikichik uwejjaj ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai, ⁴⁴ jákaru akarisha jáiniatsui tura jisha tuke kapawawai. ⁴⁵ Nawemsha yajachin túrumtikramamniaitkuŋkia nusha tsupikta. Mai nawentuk wáitsatniunam jeatniujajŋkia chikichik

nawejaj̄ ju nuṅkanam pujusar tuke iwiaaku pujustinnium jeatin ti shiiraiti. Wáitsatniunmaṅka ji kajinkiashtin awai, ⁴⁶ jákaru akarisha jániatsui tura jisha tuke kapāawai. ⁴⁷ Jímisha yajauchin túrumtikramamni-aitkuṅkia ukuṅkiata. Mai j̄j̄intiuk wáitsatniunam jeatniujaj̄ṅkia chikichík j̄j̄ij̄ij̄aj̄ ju nuṅkanam pujusar Yus akupeana nūj̄ jeatin ti shiiraiti; ⁴⁸ wáitsatniunmaṅka jákaru akarisha jániatsui tura jisha tuke kapāawai.

⁴⁹ Namaṅ Yus susamu weakinia áintsan̄ aentstirmesha j̄j̄ij̄ij̄aj̄ nekapnastatume. ⁵⁰ Weesha ti peṅkeraitiat michumarka, ¿itiurak jea-jeat átink'? Wats, wee jeakua áintsarmek atumek shiir enentáimtunaistarum" tímiayi Jesus.

Nuwā ajapatniun Jesus áujmatsamiania nu

(Mateu 19.1-12; Rúkas 16.18)

10 Jesus Kapernáumnumiā j̄iinki, Jutía nuṅkanam naṅkaamaki, Jurtaṅ entsa amain jeamiayi. Nūj̄ pujaj̄, aents ataksha Nin irunturarmiayi. Iruntrarmatai tuke túrin asa ataksha unuiniamiayi. ² Tura Pariséu Jesusan nekapsatai tusar wakeruiniak, Nin chicharainiak "¿Áishmaṅ ni nuar̄j̄ ajapatin tsaṅkamkamukait?" tiarmiayi.

³ Tutai Jesus tímiayi "¿Muisais wariniak timia?"

⁴ Tutai "Pap̄j̄ij̄aj̄ in ajapatniun tsaṅkatramkamiaj̄i" tiarmiayi.

⁵ Tutai Jesus tímiayi "Atumí enentaj̄ kátsuram asamtai nu chichaman atumin tsaṅkatramkamiarme. ⁶ Tura Yus yámankamtaik ashí najanamia nūj̄, áishmaṅnasha nuwan̄cha najanamiayi. ⁷ Tuma asamtai áishmaṅ ni apar̄in̄cha nukur̄in̄cha kanaki ikiuki, ni nuar̄j̄ij̄aj̄ tsan̄in̄tiniaiti. ⁸ Warí, áishmaṅ nuar̄j̄ij̄aj̄ j̄imiaraitiat chikichik ajasartatui. Tuma asamtai yamá j̄imiaraitiat, antsu chikichik ajasuiti. ⁹ Tuma asa, Yus atsaṅkiania nuna, aents akankashtiniaiti" tímiayi.

¹⁰ Tura urum jeá wayawar, Jesusa unuiniamur̄j̄ nu chichaman ataksha aniasarmiayi. ¹¹ Tuiniakui Jesus tímiayi "Shuar ni nuar̄j̄in̄ ajapa ikiuak chikichan nuátkaṅka, emka nuar̄j̄in̄ yajauch awajas, ikiuak, tsanirmayi. ¹² Nuwasha ni áishr̄j̄ ajapa ikiuak, chikichj̄aj̄ niinurtukka, niisha tsanirmayi" tímiayi.

Jesus uchin shiir awajsamiania nu

(Mateu 19.13-15; Rúkas 18.15-17)

¹³ Antin̄kiarat tusar uchin Jesusan itiararmiayi. Túruiniakui Jesusa unuiniamur̄j̄ "itiairap" tiarmiayi.

¹⁴ Tura Jesus nuna wáiniak, kajek j̄una tímiayi "Uchi Winí winitin tsaṅkatruktarum. Suritkiairap. Iis, shuar jū uchía núnisan̄ peejchach enentáimtumainia nu Yusa akupeamur̄j̄in̄ pachiinkiamniaiti. ¹⁵ Nuní asamtai tájarme, uchi umiana núnisan̄ Yusa akupkamur̄j̄in̄ shuar umíachkuṅka nuna pachiinkiachminiaiti. ¹⁶ Nuyá uchin miniakas, "Yus yáinmakarti" tímiayi.

Kuítrintin Jesusan áujsamiania nu

(Mateu 19.16-30; Rúkas 18.18-30)

¹⁷ Ukunam, Jesus nuyá weaj̄, shuar tseke Nin tarimiayi. Tarí tikishmatar chicharuk "¿Uuntá, Amesha ti

peṅkeraitme. Tuma asam, turuttia, ¿warinia túrakna tuke iwiaaku átataj̄?" tímiayi.

¹⁸ Tutai Jesus tímiayi, "¿Urukamtaí Winia, peṅkeraitme, túrutam? Shuarka chikichkisha peṅkerka at-sawai. Aya Yúsak peṅkeraiti. ¹⁹ Yus akupkamu nékatsmek. Jū ániawai: tsanirmawairap, maṅkartuawairap, kasamkairap, chíkich shuar tsanumprurairap, anaṅkartuawairap, apasha nukusha umirkatarum. Nu ániawai" tímiayi.

²⁰ Tutai kuítrintin chichaak "Uunta, núnaka úchichik mash umiki tsakaruitj̄aj̄" tímiayi.

²¹ Tutai Jesus iis waitnenmai tímiayi "Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaṅkattme. Túram winitia, krus yanaktinia áintsamek itiuarchatrum aṅ̄ nemartusta" tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

²³ Nii wématai, Jesus ashí ni téntakmar̄in̄ iis, ni unuiniamur̄j̄in̄ chicharuk, "Kuítrintin ainia nu Yusa akupeamur̄j̄in̄ pachiinkiatin ti itiuarchaiti" tímiayi. ²⁴ Takui ni unuiniamur̄j̄in̄ nuna antukar niisháa enentáimprarmiayi. Túramtai Jesus tímiayi "Uchiru antuktarum. Shuar kuítrin̄iak enentáimtuinia nuka, Yusa akupeamur̄j̄in̄ pachiinkiatin peṅké itiuarchataiti. ²⁵ Uunt kamiriu auja j̄j̄in̄ wayatin ana nú naṅkaamas, kuítrintin Yusa akupeamur̄j̄in̄ pachiinkiatin itiuarchataiti" tímiayi.

²⁶ Nuna antukar nú arant niisháa enentáimprarmiayi. "¿Nuṅkia yaki uwempramniait?" tunaiyarmiayi.

²⁷ Tura Jesus nin iisar chichainiak "Aents niṅki túrachminiaiti, antsu Yus túramniaiti. Yuska ashí túramniaiti" tímiayi.

²⁸ Nuyá Pítiur Nin chicharuk "Iis, iikia ashí ikiukir né-martsujik" tímiayi.

²⁹ Tutai Jesussha tímiayi, "Nekas tájarme, shuar Winia nemartak Yus-Chichamnasha ipiampartasa wakerak ni j̄eēn̄cha, yach̄in̄cha, umain̄cha, apar̄in̄cha, nukur̄in̄cha, nuar̄in̄cha, uchir̄in̄cha, nuṅken̄cha uyumatsuk ikiuakka, ³⁰ nu shuar jū nuṅkanam sian̄ patatnas j̄eēn̄cha, yach̄in̄cha, umain̄cha, nukur̄in̄cha, uchir̄in̄cha, nuṅken̄cha, jū nuṅkanam wáitiatatui. Tura ukunam, nuṅka amuukamtaí, nu shuarsha jáchatain̄ium tuke peṅker pujustatui. ³¹ Tura untsur̄j̄ shuar yamá peṅkeri ainia nu, ukunam ukunmaan̄j̄ pujusartatui, tura íksan̄ untsur̄j̄ shuar yamá ukunmayā ainia nu, ukunam eem pujusartatui" tímiayi Jesus.

Jesus ni jákatniur̄j̄ ataksha ujakmiania nu

(Mateu 20.17-19; Rúkas 18.31-34)

³² Nuyá arak Jerusarēṅnum wéenak, jintiak wearmiayi. Jesuska émak wémiayi. Ni unuiniamur̄j̄in̄sha niisháa enentáimprarmiayi. Ashamainiayatan̄ Jesusan nemarsarmiayi. Túmainiaj̄ atak ni nekas unuiniamur̄j̄in̄ akankiar, ni túrunatniur̄j̄in̄ ujakmiayi. ³³ Ujaak tímiayi "Antuktarum, arak Jerusarēṅnum wéaji. Nūj̄ Winia, Aents Ajasuitj̄iana j̄una, Patr̄j̄ uuntr̄j̄in̄cha, jintinnium masha surutkartatui. Niisha apachnium mantamnati tusar surutkartatui. ³⁴ Nusha Winia wishikrurar, kat-

sumprukar, usukruawar mantuawartatui. Túramaitiat-nak menaintiú tsawantaj nantaktiatjai" tímiayi.

Jakupu Juanjaj seawarmiania nu
(Mateu 20.20-28)

³⁵ Sepetéu uchirí Jakupusha Juansha Jesusan tarun-tarmiayi. Taruntar "Uuntá, ii seattajnia nu túrak tusar wakeraji" tiarmiayi.

³⁶ Tutai Jesus tímiayi "¿Warí itiurtukat tusam wakerutam?"

³⁷ Tutai "Ame nupetmaktin tsawantrum jeamtaí, iisha Ámijjaj pujustaitсар wakeraji, wi untsuurumini, winia yatsursha menaarmini. Nu tsankatrukta" tíarmiayi.

³⁸ Tura Jesus tímiayi "Átum seatrumna nu nékat-srume. Wi umartatjana nu umarminkaitrum. Tura Wi imiantiatjana núnisrum imianminkaitrum" tímiayi.

³⁹ Niisha tiarmiayi, "Túramnaitji, páchitskea."

Tuiniakui Jesus tímiayi "Wats, Wi umartatjana nu umartatrum, tura Wi imiantiatjana núnisrumek imiantiatrum. ⁴⁰ Túrasha winia untsuuruini, menarunisha átum pujustinian Wikia súsashtiniaitjarme, antsu Yus wakerana nu nuin apujsattawai" tímiayi.

⁴¹ Tura chíkich tias unuiniamurí nuna anturkar Jakupuncha, Juánnasha ti kajerkarmiayi. ⁴² Tura Jesus ni unuiniamurín irur tímiayi "Ju nékarme; Yus-shuarchanum akupniuitjai tuinia nu, waantu enen-táimtumás, ni shuarín ti akupeawai; tura uunt ainia nusha ashí shuar ti takamtikiainiawai. ⁴³ Antsu atumjaj núnisan atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastini-aitrume. ⁴⁴ Shuar atumí penkerj ajastajtsa wakerakka, takarniua nuke ajas, umirtamkatí. ⁴⁵ Wisha, Aents Aja-suitjiana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwemtikratajtsan táwitjai" tímiayi.

Jesus Partimiásan tsuármiania nu
(Mateu 20.29-34; Rúkas 18.35-43)

⁴⁶ Jesus ni unuiniamurijjaj, tura chíkich untsurí aents-jaj Jirikiú péprunam jeawarmiayi. Nuyá Jirikiún-mayasha jíinkiar weenaj, Timiasa uchirí Partimiás, kusuru amia nu, jintiá yantam kuítian seamu pujumi-ayi. ⁴⁷ Niisha, Nasarénumiá Jesusaiti táman antuk, untsumuk "Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta" tímiayi.

⁴⁸ Tura untsurí nuí matsamarmia nu nin chicharainiak "Takamatsata" tiarmiayi.

Niisha nú nankaamas untsummiayi "Tawit weeá Jesusá, winia waitnentrurta."

⁴⁹ Nuna antuk Jesus wajas, chichaak "Untsuktarum" tímiayi.

Takui shuar kusurun untsuiniak "Kakaram ajasta. Wajaktia; untsurmawai" tiarmiayi.

⁵⁰ Tuiniakui niisha esekmatairín ajapa ikiuak wajaki Jesusan tseke tarimiayi.

⁵¹ Tura Jesus nin chicharuk "¿Winia itiurtukat tusamea wakerutam?" tímiayi.

Tutai kusuru chicharuk "Uunta, íimtiasan wakerajai" tímiayi.

⁵² Tutai Jesus chichaak "Shiir wetá. Winia nekas enen-táimtura asam penker ajasume" tímiayi. Tura nu chichamaik ímpramiayi. Tura Jesusan nemarki wémi-ayi.

Jesus Jerusarénum wayamiania nu
(Mateu 21.1-11; Rúkas 19.28-40; Juan 12.12-19)

11 Wésar Jerusarénum tura Petpajái péprusha Petania péprusha Uriwiu naint ínkiuasmak ámanum jeawar, Jesus jimiará unuiniamurín ujuikimi-ayi. ² Ujuiak tímiayi "Aatunini pépruchiniam werum nuin umpuuru uchich jíinkiamu wáinkiatarme. Nu umpuuruka tuke entsamprukchamuiti. Nu atiarum uti-tiarum. ³ Tura "¿Urukamtia áitkiarum?" turamaini-akuisha, "ii Uuntrí wakerawai" titiarum" tímiayi. ⁴ Tutai wearmiayi. Tura umpuurun wáitiniam aani jíinkiamun, jintiá yantamnum wajan wáinkiar atiawarmiayi. ⁵ Nuí pujuarmia nu "¿Warí áitkiarum. Urukamtai umpuuru atíarum?" tiarmiayi. ⁶ Takui, niisha Jesus timia nu ujakam suritkiacharmiayi. ⁷ Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi. ⁸ Tura untsurí shuarsha pushirín jintianam ayapar áinkiararmiayi. Chíkichcha jintiá yantamnumián nukan juuk jintianam áintrarmiayi. ⁹ Eem wearmia nusha, uku winiarmia nusha warainiak "Jusanna" untsumkarmiayi. "Yusa náarín winiana nu imiá penkeraiti. ¹⁰ Ii uuntrí Tawitia akupeamurí tátatna nu imiá penker atí. Ii Yusrj naari shiir ati." Tu untsumki wearmiayi. ¹¹ Tura Jesus Jerusarénum jeamiayi. Jeá, Yusa Uunt Jeeen wayamiayi. Tura ashí iiyasua amik, kintiamprajj tusa ni tuse unuiniamurijjaj tíjiuch Petania péprunam wearmiayi.

Jesus iikiu numin yuminkramiania nu
(Mateu 21.18-19)

¹² Kashin tsawar, Petanianmaya jintia wesa, Jesus tsukammiayi. ¹³ Tura arant wajan iikiu numirín núken-niun wániak, nereatsuash tusa iyumiayi. Tura neresh-tairín asamtai neren penké wáinkiachmiayi. ¹⁴ Nuyá iikiu numin yuminkeak: "Ame nerem penké yunaashti" tímiayi. Ni unuiniamurísha nuna táman antukarmiayi.

Yusa Uunt Jeeen suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)

¹⁵ Nuyá atak Jerusarénum jeawarmiayi. Nuí Jesus Yusa Uunt Jeeen wayá suruktai tusar pujuarmia nuna jíiki akupkatasa nankammiayi. Kuítian yapajín armia nuna misarín tura yampitsan súrin armia nuna kutankríncha ayanturmiayi. ¹⁶ Tura káarak entsaki Yusa Uunt Jeeen nankaamaktinian suritkiarmiayi. ¹⁷ Nuyá "Yus áujasatai tusar ashí shuar Yusa jeeen wayamnia áatui" tú aarchamukait Yusa Papiríin. Antsu átumka Yusa jee kasa matsamtaiya nútikiarme" tímiayi. ¹⁸ Aents nuí matsamarmia nu Jesusa chichamen antukar ti enen-táimprarmiayi. Tuma asamtai Israer-patri úuntrisha, Israer-shuara jintinniurisha, nuna nekaawar, Jesusan

ashamainiak mantamnati tusar chichaman jurusarmi-
ayi. ¹⁹ Nuyá kiąkui Jesus Jerusarénumiá jiiinkimiayi.

Iikiu numin káarun wáinkiarmania nu
(Mateu 21.20-22)

²⁰ Kashin káshik nańkaamainiak iikiu numin kańkap-
tuk jaka wajan wáinkiarimiayi. ²¹ Tura Pítiur enen-
táimias Jesusan tímiayi “Uunta, iista, iikiu Ame yu-
mińkramam nu kańkaptuk káarchaik.”

²² Tutai Jesus tímiayi “Yus nekas enentáimtustarum.
²³ Iis, nekas tátsujrumek, shuar “Yus nekas túratpiash”
tútsuk, tura “wi tájana nuna Yus nekas túratpawai” tu
enen-táimisar, ju náintian “jiiinki nayaantsanam iniánti”
tákuńkia, páchitsuk iniańtatui, tímiayi. ²⁴ Tuma asam-
tai tájarme, ashí Yus áujkuram searmena nuna suram-
sattarme. “Wi seajna nuna yamá takakjai” tu enen-
táimkiurmeka, wáinkiatarme. ²⁵ Tura Yus áujkuram
pujarmena nu, kajernaiyamuram ákuńkia tsanńkurnái-
ratarum. Atumí Aparí nayaimpiniam pujana nu atumí
tunaarın tsanńkurturti tusarum túratarum. ²⁶ Atumsha
tsanńkurnáiyachkurminkia, núnisań atumí Aparí
nayaimpiniam pujana nu atumí tunaarın tsanńkurtám-
prashtatrumé” tímiayi Jesus.

Yusa kakarmarijia Jesus takasmania nu
(Mateu 21.23-27; Rúkas 20.1-8)

²⁷ Ataksha Jerusarénum waketkiarmiayi. Jesus Yusa
Uunt Jeeń wekai, Israer-patrı úuntrısha, Israer-shuara
jintinniurısha, Israer-shuara iruntai-jee úuntrısha Nin
káutkarmiayi. ²⁸ Káutkar Jesusan tiarmiayi “¿Yana
kakarmarijia ju túram. Ame túramna nuna ya tsanńka-
trama?” tiarmiayi.

²⁹ Tuiniakui Jesus tímiayi, “Chikichkiniak aniastat-
jarme. Áirkatarum. Túrakrumńkia Wisha winia takas-
tinian tsanńkatrukmi nuna ujkattjarme. ³⁰ Wats, turu-
tiarum, ¿ya Juan imiaitniun tsanńkatkama? ¿Shuar
tsanńkatkamka? ¿Yus tsanńkatkamka? Áirkatarum” tími-
ayi.

³¹ Tura niisha enentáimprar “Yus akupkaiti”
tákurńkia, “¿urukamtia umirkachuram?” turamchat-
tajik. ³² Antsu “shuar tsanńkatkaiti” tákurkia, ashí shuar
ashamaji” tunainiarmiayi. Ashí aents Juan nekas Yús-
nan etserniuiti, tu enentáimainiakui ashammiarimiayi.
³³ Nuyá Jesusan tiarmiayi “Tikia nékatsji.”

Tutai Jesus tímiayi “Wisha núnisnak yana kakarmar-
ijia takaaj nuna ujakchattajrume.”

Yajauch takau armia nu
(Mateu 21.33-46; Rúkas 20.9-19)

12 Jesus ju métek-taku chichaman unuiniamiayi:
“Shuar uwa ajan ajam wenuimiai. Nuyá uwa ne-
keetain najanamai. Tura kumpin jeeń najanamai. Na-
jana takartusti tusa shuáran ikuak nińkia jeachat wé-
mai. ² Neretai tsawant jeamtai, ni takarniurın júukman
akankat tusa akupkamai. ³ Tura ajanam takau arma
nu, nu takarniun achik, katsumkar, áyatik awaińkiar-
mai. ⁴ Ataksha chíkich takarniun akupkamai, tura
nunasha kayajai tukurar, múuknum katsumkar, kat-

sekar awaińkiarmai. ⁵ Tuma aiń ataksha chíkichan
akupkamai, tura nunasha máawarmai. Ti untsurın
akupramai. Chikichnasha katsumkarmai, chikichan
máawarmai.

⁶ Tura niijia chikichik tuke ámiayi, nuka ni aneamu
uchiri. Nu uchina ukunam akupkamai. Akupeak
“Winia uchirnaka shiir awajsartatui” tímiayi. ⁷ Tura ni
uchiri winian wáinkiar, takau shuar nuámtak chichaini-
ak “Ju ka ajá nérenniu uchirinti. Wátsek, maatai; túram-
ka ájaka iiniu átatui” tiarmiayi. ⁸ Túsar achikiar máawar-
mai. Ayashincha ajanmaya ajapawarmai” tímiayi.

⁹ Tura nuyá aniasmiayi, “¿Wats, warı enentáimsarum;
ajá nérenniurı iturkattawa? Jeashtanmayá taa, ajá
takainia nú shuaran amuktatui. Ni ajarıncha chikichan
ikiastatui. ¹⁰ Ju, Yus-Papinium aarma ana nu áu-
jsachukaitrum:

Kaya péńkernak, jeammin “yajauchiiti” tusar
ajapawarmia nu ashı kayajai nańkaamas péńker apu-
jsamuiti. ¹¹ Nusha Yus túramuiti. Iisha ísar ti enen-
táimtaji.

Nuke áarmaiti” tímiayi.

¹² Tura nú metek-taku chichamjai nin áujmatma asa
achiktai tusar chichaman jurusarmiayi. Túmainiyat
shuáran ashamainiak Jesusan ikuiniak wearimiayi.

Uunt akupin súsatin tura Yus súsatin
(Mateu 22.15-22; Rúkas 20.20-26)

¹³ Tura wear, imiaamtikiar yaja chichakmatai nújai ya-
jauch titiai tusar Pariséu shuarnasha, Erutisa nemarkarın
shuarnasha akatar Jesusan akuptukarmiayi. ¹⁴ Túram
Nin jeariar chicharainiak: “Uuntá, aents nakitiainiań
tuke nekas chicham páchitsuk chichaame, nu nékaji.
Aents pátatek iiyatsme, antsu nekas Yusa jintı unuini-
ame. ¿Waritia enentáimiam, ii kuitrı uunt Sesar súsatin
péńkerkait. Susattajik. Suritkiattajik? Nu nekaatai tusar
wakeraji” tiarmiayi.

¹⁵ Tura Yus ni yajauch enentáimmarın nekara
“¿Urukamtai Winia yajauch titi tusarum wakerutarum?
Kuit ititarum, Wi ístaj” tímiayi.

¹⁶ Tutai kuítian itiarimiayi.

Jesus nuna iis tímiayi, “¿Juısha yana yapı tura yana
naarı áarmait?” tímiayi.

Tutai “Uunt Sésarna” tiarmiayi.

¹⁷ Nuyá Jesus tímiayi “Uunt Sésarna ana nu susa-
tarum; túrarum Yúsnaka Yus susatarum” tímiayi. Tura
ni áimkiarurın antukar ti enentáimprarmiayi.

Aents nantaktinian Satuséu anintrusarmiania nu
(Mateu 22.23-33; Rúkas 20.27-40)

¹⁸ Nuısha Satuséu aents, jakamunmaya nantaktin
penké atsawai tiniu armia nu, Jesusan tariarmiayi. Taar
Jesusan chicharainiak: ¹⁹ “Uuntá, Muisais juna áatram-
pramijai:

“Áishman ni nuarı júreatsajın jakamtainkia, yachin ya-
jutmatratsa, ni yachi nu wajen nuátkatniuiti.”

²⁰ Wats, siati yachi árimiayi. Iwiarı nuwan nuatak ya-
jutmatsuk jakamiayi. ²¹ Ni yachi wajen akinkiamiayi.
Nusha núnisań yajutmatsuk jakamiayi. Nuna yachısha

núnisan̄ tura nuna yach̄isha núnisan̄ túramiayi. ²² Tura ashí siati patainman̄, patainman̄ nu nuwan̄ nuátkarmiayi. Yajutmatsuk, yajutmatsuk jíiniawarmiayi. Tura ukunam nuwasha jakamiayi. ²³ Nuiñkia nantaktin tsawantaj, nantakiarmatai, ¿yana nuar̄in̄ ati? Ashí siati nuátkacharmaka” tiarmiayi.

²⁴ Tutai Jesus tímiayi “Jakamunmayā nantaktin atsawai” tátsurmek. Yusa chichamē tura Yusa kakarmari nékachu asarum awajiarme, tímiayi. ²⁵ Iimiatarum, aents jakamunmayā nantakiarmatai, nuatnaikiatin atsuttawai, antsu nayaimpinmayā suntara núnisan̄ pu-jusartatui. ²⁶ Tura jakamunmayā nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmayā Muisaisan chicharuk “Wikia Apraáma Isaaka tura Jakupu Yúsr̄int̄jai” Yus tímiayi. ²⁷ Yaunchu jákaru ain̄, Yus nuna taku, ayash̄nium jakayat iwiaaku pujuinia nuna Yusr̄int̄jai, tawai. Nekas jaka ainia nuna Yus-r̄inchuiti. Nantaktin atsawai tau asarum awajirurme” tímiayi Jesus.

Yus akupkamu imiá péñker ainia nu

(Mateu 22.34-40)

²⁸ Jesussha Satuséusha áujmatnainian Israer-shuara jintinniur̄i taa anturkamiayi. Anturak, Jesus ti péñker áimkiui, niisha Jesusan juna aniasmiayi: “¿Yus akupkamu tuá imiá péñkerait’? tímiayi.

²⁹ Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusr̄i úuntaiti, tura Niñki nekas Yúsaiti. ³⁰ Tuma asamtai, tuke enentáimj̄aj̄ ti enentáimsam Uunt Yus aneeta. Túram ame iwiaak-marmesha, kakarmarmesha Yus íiktusta. Núiti nekas péñker akupkamu, tímiayi. ³¹ Nuyasha chikichcha awai, “ame ayash̄im aneamna tímiatrusmek ame írutramur̄isha aneamna aneeta.” Chíkich nu nan̄kaamas péñker akupkamu atsawai’ tímiayi.

³² Tutai jintintin tímiayi “Ee, péñkeraiti, Uunta. Nékas-mek tame. Chíkichík Yus awai, chíkichkia atsawai. ³³ Tura tuke enentáij̄aj̄ ti enentáimsar, ii kakarmar̄isha Yus íiktusar Nin aneakrikia, ii ayash̄j̄ aneajnia núnik ii írutramur̄isha aneatniuitji. Nusha ashí Yus sutai ana nuj̄aj̄ nan̄kaamas péñkeraiti’ tímiayi.

³⁴ Nuna tiniu asamtai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan anias-tinian arantukarmiayi.

Kristu tutai ¿yana uchir̄impait’?

(Mateu 22.41-46; Rúkas 20.41-44)

³⁵ Jesus Yusa Uunt J̄een unuiniak pujumiayi. Tura chichaak “¿Urukamtai ii jintinniur̄i “Yus anaikiamu Krístun Tawitia shuari’? tuinia?” ³⁶ Tawit, antsu, Yusa Wakani aarta tutai, Yus-Papinium juna áarmiayi:

Uunt winia Úuntrun tímiayi “Ame nemasrumin nu-petkatin amuats̄aj̄in̄ winia untsuuruin̄in̄i pujusta”.

³⁷ Kame Tawitkia, Krístun áujmatuk, “winia Uuntru” taisha, ¿itiura ní shuar̄isha átiñk’?” tímiayi Jesus. Tuma

asamtai untsur̄i shuar nuj̄ matsamarmia nu ti shiir antukarmiayi.

“Israer-shuara jintintin ainia nuj̄aj̄ aneartarum” Jesus tímiania nu

(Mateu 23.1-36; Rúkas 11.37-54; 20.45-47)

³⁸ Jesus unuiniak tímiayi, “Israer-shuara jintinniur̄i ainia nuj̄aj̄ aneartarum. Niisha waantu enentáimtu-masar, esaram pushin entsarar wekasatajtsar wakeru-iniawai. Pérunmasha shuar shiir áujtusarat tusa wakeruiniawai. ³⁹ Israer-shuar iruntainiam péñker̄i pu-jutainium pujustinian wakeruiniawai. Nampernumsha péñker̄i pujutainium pujustinnisha wakeruiniawai. ⁴⁰ Tura wajé j̄eencha atantainiawai. Túrawar aents nekaracharat tusar ti esaram chichamj̄aj̄ Yúsan áujaini-awai. Nincha chikichj̄aj̄ nan̄kaamas Yus asutiawartatui” tímiayi.

Wajé kuítr̄in̄ susamiania nu

(Rúkas 21.1-4)

⁴¹ Jesus Yusa Uunt J̄een kuit enketainiam naka pujus áents kuítr̄in̄ chumpian wáinkiamiayi. Untsur̄i kuítr̄intin núkap enkeawarmiayi. ⁴² Nuyá wajé kuítr̄in-cha taa jimiará uchich kuítian, reara áantsan̄, enkeami-ayi. ⁴³ Jesuska unuiniatur̄in̄ untsuk “Nekas tájarme, j̄u wajé kuítr̄inchaitiat, ashí enkeena nú nan̄kaamas núkap enkeayi. ⁴⁴ Iis, kuítr̄inniusha nii ampirma nuna enkeenawai, tura antsu j̄u nuwā kuítr̄inchaitiat, ampirmatsuk ni yurumatniur̄in̄ takurmakman ashí enkeayi” tímiayi.

Yusa Uunt J̄een yumpuntratniun Jesus ujakmiania nu

(Mateu 24.1-2; Rúkas 21.5-6)

13 Yusa Uunt J̄eeniā Jesus jiinkimtai, unuiniatur̄i Nin tímiayi “Iisia, Uunta, kayasha ti shiir áini-awai. J̄easha imiá úuntchakait.”

² Tutai Jesus tímiayi “J̄u imiá uunt j̄eā wáinmek. Kaya ekenramu au ashí mash yumpuntrartatui” tímiayi.

Amuukatin tsawantin uruku átatna nu

(Mateu 24.3-28; Rúkas 21.7-24; 17.22-24)

³ Nuyá Uriwiu náinnium wakar, Yusa Uunt J̄ee naka pujusar, Pítrusha, Jakupusha, Juangsha, Antressha, níñkimias Jesusan aniiniak ⁴ “Uuntá, tímiam nu, ¿urutia túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵ Tutai Jesus tímiayi “Aneartarum, anañkramawairap. ⁶ Nekaatarum, untsur̄i winia naarun pachisar winiartatui. Chíkich chíkich “Wiitjai Kristu” taku, untsur̄in̄ anañkawartatui. ⁷ Tura meset chicham ántakrumka, yajayā meset chicham ántakrumsha sapijmiakairap. Nekas túrunashtinkiat. Nuj̄aj̄isha amuukatin tsawant-ka tuke jeatsui, tímiayi. ⁸ Shuar chíkich shuarj̄aj̄i mese-tan najanawartatui; apachcha chíkich apachj̄aj̄i núnis-arañ mesetan najanawartatui. Untsur̄i nuñkanam úyr̄kattawai. Tsukasha ártatui, charatum ajamusha núnisan̄ átatui. Tura nuj̄aj̄i itiurchatka aya yama nan̄ka-mui.’

⁹ Túmaitkui atumsha aneartarum. Akupin iruntainumsha surutmakartatrume, tura íi shuar iruntainumsha katsumpramkartatrume. Wíi shuar asakrumin, kapitíannium, akupniunmasha juramkittiarme. Nuj jearum, Winia chichastatrume. ¹⁰ Nu túruntsajin ashí áentsnum Yus-Chicham etsernaktiniati. ¹¹ Atumin surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Iis, atumí enentájjijai tíchattarme, antsu Yusa Wakaní jintintiam títiatrume. ¹² Nu tsawantin shuarsha ni yachin mantamnati tusa suruktatui. Apasha ni uchirin suruktatui. Uchisha aparincha nukurincha kajerak, jakati tusa suruktatui. Núnisan untsurí shuar túrawartatui. ¹³ Nuinkia Wíi shuar asakrumin ashí nakitramprartatui. Tura shuar yawetsuk katsuntrańka uwemprattawai" tímiayi.

¹⁴ Nuyá Jesus tímiayi "Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainam pujan wáinkiumesha, ashí Jútia nuńkanam pujarmena nu, náinnium pisartarum. ¹⁵ Jeǵa yakiini pujana nu akaiki wariri achiktajtsa, jeen wayashti. ¹⁶ Ajanam pujana nusha ni pushirin jukitiajtsa waketkishti. ¹⁷ Tura ajamtin áiniana nusha, kuirchin umuntsainia nusha, nu tsawantin timiá itirchatan wáinkiertatui. ¹⁸ Tuma asamtai átum pisaarmena nu juyumitin achati tusarum Yus seatarum. ¹⁹ Nu tsawantinkia ti wáitsatin átatui. Yama nańkamtaik Yus nuńkan najanama nuńsha, yamaisha ukunmasha timiu wáitsatin penké atsuttawai. ²⁰ Tura Uunt Yus wáitsatin tsawantan ishichik awajstatajai tíchaitkuinkia, uwempratin penké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajstatawai. ²¹ Nu tsawantai "Júiti Kristu" túramkuinkia anturkairap. ²² Kame "Kírituitjai" ántar tuinia nu, tura "Yúsnan etserniuitjai" ántar tuinia nusha wantinkiertatui. Wantinkiar Yus anaikiamu shuárnasha anańkatai tusar wakeruiniak, ni kakarmarin iniakmainiak aentsti tujintiamun túrartatui. ²³ Tura átum aneartarum. Aetak, túruntsajin ujakchajrumek' tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴ Jesus tuke unuiniak juna tímiayi: "Tura nu wáitsatin nańkaasmatai, etsaasha nantusha etsantrashtatui. ²⁵ Yaasha nayaimpinmaya kakekartatui, tura nayaimpiniam kakaram ainia nu muchitrrartatui. ²⁶ Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yurańminiam winiáj wáitkiartatui. ²⁷ Nu j nayaimpinmaya suntarun akupkattajai, Wíi shuaran ashí nuńkanmayan irurarat tusan. Arakaaniya, nuńkaaniya, ashí nuńka nánkatkamunmayan Wíi shuaran irurartatui."

²⁸ "Iikiu numi nakumea nu nekaatarum. Ni chinķimprí punķak nuké jeakuí, "ju nuńkanam esat jeatemai" tátsurmek. ²⁹ Núnisrumek Wi tájarmena nu wáinkiumesha, ni tátintri jeatemai tu nekaattarme. ³⁰ Nekas tájarme, yamaí aents pujuinia nu kajin amuiniatsajin,

ashí Wi tájana nu túrunatniuiti. ³¹ Nayaimpisha nuńkasha amuukatniuiti. Tura winia chichampruka amuukashtiniati. ³² Tura tsawantcha nekanachminiati. Nayaimpinmaya suntarsha nékainiatsui; Wisha Yusa Uchirintiatan nékatsjai. Aya winia Aparuk nékawai. ³³ Atumsha anearum enentáimprarum Yus aujsa pujustarum, tsawant nékachu asarum."

³⁴ "Tura Wikia ju shuarjai méteketjai. Ju shuarsha jeachat weak, ni jeen ikiuawai. Ikiuak ni shuarin wáitrukarti tusa apujas ikiuak ashí shuaran takatrin súawai. Tura wáitin wáinnium, "ameja penķer wáinkia-ta" tímiayi. ³⁵ Wikia nu jeǵa nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátatjai. ³⁶ Nérentin aya aneachmak taa, kanúu tepai wáitkijai tusarum aneartarum. ³⁷ Wi atumin tájana nu, ashí shuáran tajai, anearum pujustarum" tímiayi Jesus.

Jesusan chichaman jurusarmiania nu

(Mateu 26.1-5; Rúkas 22.1-2; Juan 11.45-53)

14 Jímiarchikí tsawant ajasmiai paskua tutai námpertincha wakapruachu tantan yuatin námpernasha métek najanin ármiai. Israer-patri uuntrińsha, Israer-shuara jintinniurńsha Jesusan anańkar achikiar maatai tusar wakeriarmiai. ² Túrasha "Jista tsawantin túrachmi, aents charaatum ajarajin tusar" tiarmiai.

Nuwa kuńkuinian Jesusan ukatramiania nu

(Mateu 26.6-13; Juan 12.1-8)

³ Jesussha Petania péprunam tunamaru Semuńka jeen misanam pujan, nuwa tarimiayi. Nartu kuńkuinian arapástru tutai kaya najanamunam piakun itiamiayi. Nu kuńkuin ti kuitiati. Mutí chuchuké kupik Jesusa muuken kuńkuinian ukatramiai. ⁴ Tura nu j pujuarmia nu, kajerar tunaiarmiai "¿Urukamtai ju kuńkuinian ántar wasurea? ⁵ Junasha súrakka, menaintiú sian kúitnium surukminiuyi. Nu kuitcha kuńtrinchan súsańka maak" tiarmiai. Tusa nuwan kajerarmiayi.

⁶ Antsu Jesus chicharainiak "Iniaisatarum. ¿Urukamtai au kajerarum? Winia shiir túrutayi, tímiayi. ⁷ Kuńtrincha atumjai tuke íruntsuk. Wakerakrumka tuke penķer awajsatniuitrume. Antsu Wikia atumjai tuke pujushtatajai. ⁸ Ju nuwa ashí nii túramnia núnaka umikiai. Wi jákatin jeatsajin, iwarsatin kuńkuinian shiir ukatrurai. ⁹ Nekas tájarme, ashí nuńkanam Yus-Chicham etsernaktatna nu j, ju nuwa túramurńsha etsernaktatui, nin kajinmatkiarajin tusa" tímiayi.

Jútas Jesusan suruktaj timiania nu

(Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniaturintiat, Israer-patri uuntrin werimiayi, Jesusan suruktaj tusa. ¹¹ Niisha nuna antukar, warasar "Kuit amastatj" tiarmiai. Jútassha Jesusan iturak yúpichuch tsanķamkattaj tusa enentáimias wekamiayi.

Jesujai iruntrar yurumáwarmia nu

(Mateu 26.17-29; Rúkas 22.7-23; Juan 13.21-30; 1 Kurintiumam 11.23-26)

¹² Wakapruachu tantan yuatin jísat nan̄kama tsawant tsawarmatai, paskua námpertin yúatin murik máatin jeamtai, Jesusa unuiniamurj̄ iniasarmiayi “Paskuatin murikiu yúatin iwiaratai tusar ζtūj̄ wétataj̄. Tūj̄ yuru-mattam?” tiarmiayi.

¹³ Tutai Niisha jimiará unuiniamurj̄n akatar akupeak “Péprunam wetarum. Nūj̄ áishman̄ yumin jukí wéa wáinkiatarme. Nu áishman̄ nemarsatarum. ¹⁴ Wayana nūj̄ jeá nérenniurj̄ títiarum “Uunt túramui, ζwisha, unuiniamurj̄aj̄ tūj̄ yurumáttaj̄?” ¹⁵ Nu nérentin, yakí pí-sunam uunt tesamunam ashí iwiaramun iniakturmas-tatrum. Nūj̄ jísat ii najanatin iwiaratarum” tímiayi.

¹⁶ Ni unuiniamurj̄ wear, péprunam jeawar, Jesus timia núnisan̄ wáinkiarimiayi. Tuma ásar paskua námperan iwiararmiayi.

¹⁷ Nuyá k̄jakui Jesus ni tuse unuiniamurj̄ij̄aj̄ wayawarmiayi. ¹⁸ Niisha misanam pekaamak, yurumáiniak pujasar, Jesus tímiayi. “Nekas tájarme, chikichík shuar Wij̄aj̄ yurumna nu, surutkattawai.”

¹⁹ Nuj̄aj̄ kúntuts enentáimprarmiayi. Chíkich chíkich Jesusan aniasar “wáshitiaj̄” tiarmiayi.

²⁰ Jesus tímiayi “Jū misanam tuse irunar yurumprum nu, chikichik surutkattawai. Wij̄aj̄ piniñnum yurumkan ayak yuana núiti. ²¹ Nekas Wi, Aents Ajasuitjiana jū, jákatniunam wéajai, áarturma áintsanak. Tura áishman̄ súrutna nu ti wáitsattawai. Niisha akiinmainchu ajakuiti” tímiayi.

²² Yurumainiak Jesus Yúsan yuminkias, yurumkan achik, puuk, chicharainiak “Achiktarum, jūsha winia ayashruiti” tímiayi. ²³ Piniñnasha achik, Yúsan yuminkias, ni unuiniamurj̄n súsarmiayi. Ashí umararmiayi. ²⁴ Umararmatai Jesus tímiayi “Júiti winia numpar, untsurj̄n yáintaj̄tsa puártinia nu. Nuj̄aj̄ Yamaram Chichaman Yus najanaiti. ²⁵ Nekas tájarme, uwa yumiri ataksha jūj̄ umarchattajai. Tura tsawant jeamtai, ukunmasha, Yus akupeana nūj̄ yamarman umartatjai” tímiayi.

Pítur natsantratniua nuna Jesus ujakmiania nu

(Mateu 26.30-35; Rúkas 22.31-34; Juan 13.36-38)

²⁶ Yus-kantan kantámawar, jíinkiar, Uriwiu náinnium wearimiayi. ²⁷ Nuiñkia Jesus nin tíarmiayi “Jū kashi átum natsantrurtatrum. “Murikiu wáinnium máattajai, túramtai murik tsakin̄makartatui” tu aarchamukait.

²⁸ Tura ukunam Wi nantakin atumin Kariréanam émtuktiajrume” tímiayi.

²⁹ Tutai Pítur chicharuk “Ámin ashí natsantramaini-akuisha, wikia natsantrashtatjame” tímiayi.

³⁰ Tutai Jesus tímiayi “Nekas tájame, jū kashi atash jimiará shiniatsaj̄n, natsantrurtatme. “Núnaka nékats-jai” menaintiú turuttatme” tímiayi.

³¹ Tutai Pítur kakaram chichaak “Ámij̄aj̄ métek máantuiniakuisha, núnaka pen̄ké tíchattajai” tímiayi. Ashí ni unuiniamurj̄ núnisan̄ tiarmiayi.

Jesus Jitsemaní ajanam Yúsan áujsamiania nu

(Mateu 26.36-46; Rúkas 22.39-46)

³² Nuyá Jitsemaní ajanam wearimiayi. Jeawar Jesus ni unuiniamurj̄n tímiayi “Jūj̄ pujustarum, Yúsan áujsatasa pujaí”. ³³ Pítrun, Jakupuncha, Juáñnasha jukimiayi. Tura Jesuska ti kuntuts enentáimiar wake mesek nekapsatasa nan̄kammiayi. ³⁴ Tura nin chicharuk “Wi ti kuntuts enentáimjai, tura jakamnia nekapeajai. Jūj̄ iimia puju-tarum” tímiayi. ³⁵ Jesussha ishichik arantach we, nuñká piniakumar tepes Yúsan aujmiayi. “Jū wáitsatin átatna nu, túrutatniuitkuñkia iniaitiusta” tu seamiai. ³⁶ Tuke áujuk tímiayi “Apawá, ashí tujinchaitme. Piniñnumiá ashí umartinia áantsan̄ ti nekapsatajna nú wáitsatni-un, jurutkitia. Antsu Wi wakeraj nucha, ame wakera-muram túrunati.” ³⁷ Tura ni unuiniamurj̄n tarin, kanúu tepenan wáinkiamiayi. Pítrun tímiayi “ζSemuñka ká-namek. Kanutsuk ishichkisha iimia pujustin tujinkiamek? ³⁸ Anearum Yus áujsatarum, tunaanum iniaaraj̄j̄ tusarum. Atumí wakanj̄n kakarmaitrume, antsu atumí ayashj̄n kakarmachuitrume” tímiayi.

³⁹ Ataksha we, nuik Yúsan áujsama núnisan̄ áujsami-ayi. ⁴⁰ Ataksha waketruki, ni unuiniamurj̄n kanúu tepenan tarimiayi. Karj̄ ti pujaí asamtai, Jesusan áujsatni-un tujinkiarimiayi. ⁴¹ Jesus ataksha we, tarj̄ tímiayi “Kanarum ayampratarum. Máakete. Jeayi. Wi, Aents Ajasuitjiana jū, tunáa shuarnum surukmaitjai. ⁴² Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu

(Mateu 26.47-56; Rúkas 22.47-53; Juan 18.2-11)

⁴³ Jesus nuna chicháa pujaí unuiniamurj̄ Jútas tarimi-ayi. Niij̄aj̄ untsurj̄ aents puniá takaku, tura numincha takaku káutarmiayi. Israer-patri uuntrj̄, Israer-shuara jintinniurj̄, tura Israer-shuara úuntrj̄ akupkarma asa káutkarmiayi. ⁴⁴ Káuntsaj̄n Jútas chicharainiak, “Wi mukunattaj̄ áujkin núiti Jesus. Achirum, pen̄ker emetarum jukitiarum” tímiayi. ⁴⁵ Tura Jesusan tarj̄, mukunuk áujas “Uuntá, Uuntá” tímiayi. ⁴⁶ Túramtai aencha Jesusan achikiar emetawarmiayi. ⁴⁷ Túruiniakui nūj̄ wajatusha puniarj̄ úkuitsan̄, patri uuntrj̄ takarni-urj̄n awati ni kuishj̄n tsupirkamiayi.

⁴⁸ Túram Jesus áentsun tímiayi “Kasakaitiaj̄. Puniaj̄aj̄ numij̄aj̄, kasá nútiksarmek achirkatai tusarum tarutni-urme. ⁴⁹ Ashí tsawant atumj̄aj̄ Yusa Uunt Jeen wayan unuiniakun pujuchmakaj̄. Túmaj̄ nūj̄ achirkachwarme. Tura Yus timia nu uminkiat tusa jū túrunayi.” ⁵⁰ Nuiñkia ni unuiniamurj̄ Niniak ikiuniak pisararmiayi.

Natsa pisarmiania nu

⁵¹ Tura áishman̄ nátsaach aya tarachin penumas Jesusan atamprimiayi. Tura natsaach suntar achikiam ⁵² tarachrj̄n ajapa ikiuak misú tsékenkimiayi.

Patri uuntriin Jesusan júkiarmiania nu

(Mateu 26.57-68; Rúkas 22.54-55, 63-71; Juan 18.12-14, 19-24)

⁵³ Patri uuntriin Jesusan ejeniarmiayi. Nuĵ Patri uuntriŷsha, Israer-shuara jintinniurĵsha, Israer-shuara uuntriŷsha irunturarmiayi. ⁵⁴ Tura Pítiur ĵikian nemarki Patri jeen aach jeá, Patri suntarĵĵai jinia anamuk pujumiayi. ⁵⁵ Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiai. ⁵⁶ Túrasha untsurĵ shuar Jesusan tsanumpruiniayatan yapajjá yapajjá chichainia ásarmatai wáinkiacharmiai. ⁵⁷ Nuyá chíkich wajakiar wáitruiniak juna tiarmiayi ⁵⁸ “Yusa Uunt Jeen, aents jeamarmia nuna yumpuntiatjai. Túran menaintiú tsawantai, chikichan, aents jeamchamun jeamtatjai” tau antukmaji” tiarmiayi. ⁵⁹ Tura tuke yapajjáwar tiarmiayi.

⁶⁰ Nujsha Patri uuntri ajapén wajaki Jesusan chicharuk “¿Áimsatin penké tujintiamek. Warinia tura-mainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaiki-amurĵnkaitiam. Ii Yusrĵ Uunt tajinia nuna Uchirĵnkaitiam?”

⁶² Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurĵni pujai wáitkiattarme. Tura nayaimpinmaya yuraĵminiam winiaĵ wáitkiattarme” tímiayi.

⁶³ Tutai Patri uuntri kajek, ni pushirĵn jaak tímiayi “¿Chíkich títincha warí atsumaji? ⁶⁴ Nii tana nujai Yúsan kátsekeamu antukurme. ¿Warintia enentáimprum?” tímiayi.

Takui “Jakamniaiti” ashí tiarmiayi. ⁶⁵ Chíkich chíkich Jesusan usukiáwarmiai. Jiĵin epetkar awatiar “¿Ya áitkiarma? etserkata” tiarmiayi. Patri suntarĵsha yapini-am awatiarmiayi.

Pítiur Jesusan natsantramiania nu

(Mateu 26.69-75; Rúkas 22.56-62; Juan 18.15-18, 25-29)

⁶⁶ Núnaka túruiniaĵ Pítru nunká, jea aani pujan, nuwa Patri uuntri takarniuriya nu tarimiayi. ⁶⁷ Niisha Pitrun jinia anamu pujan wáinkiamiayi. Wáiniak, “Amesha Nasaretnumĵ Jesusĵai wekaichukaitiam” tímiayi.

⁶⁸ Tutai Pítiur chicharuk, “Nékatsjai. Ame támena nuna nékatsjai” tímiayi. Tura aĵ wáitiainiam jiinkimiayi. Tumai atash shiniukmiayi.

⁶⁹ Nu núwasha Pitrun ataksha wáiniak, shuáran nuĵ pujuinian tímiayi “Júiti ni shuarĵ.”

⁷⁰ Tura ataksha “atsá” tímiayi.

Ishichik árusan, shuar nuĵ pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auyá shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmaĵnaka átum tárugna núnaka nékatsjai. Wáitrakuĵkia Yus ĵirsati” tímiayi. ⁷² Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus

nuik tíchamka “Atash jimiar shiniatsain, ame, núnaka nékatsjai, menaintiu turuttiatme” tíchamka. Pítru nuna enentáimias ti úutmiayi.

Jesusan Piratuĵ ejeniarmiania nu

(Mateu 27.1-2, 11-14; Rúkas 23.1-5; Juan 18.28-38)

15 Tura kashin káshik Patri uuntri, Israer-shuara úuntriĵĵai, Israer-shuara jintinniurĵĵai, ashí naamka armia nujai irunturar, chichaman jurusarmiayi. Túrawar Jesusan jinĵkiamun apach kapitíán Piratuĵin ejeniarmiayi. ² Ejeniar matai Piratu aniasmiayi “¿Amesha Israer-shuara Uuntriĵnkáitiam?”

Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi. ⁴ Ataksha Piratu aniasmiayi “¿Áimsatin penké tujintiamek? Ti untsurĵ etserturmainiatsuk.” ⁵ Tura Jesus nunasha áikchamiayi. Túmakui Piratu ti enentáimpramiayi.

Jesusan, mantamnati, tarmiania nu

(Mateu 27.15-31; Rúkas 23.13-25; Juan 18.38-19.16)

⁶ Shuar ámiayi, ni naarĵ Parapás. Niisha ni shuarĵĵai meset ámanum, shuaran maa asamtai sepunam enkeamuyayi. Tura námper tsawantai Piratu sepunmaya chikichík shuarnak jĵiki akupniuyayi, aents seawarmia nuna. ⁸ Nujsha untsurĵ shuar Piratun káutkar tiarmiayi “Ame ju námpertin tuke túramna nu túratá. ⁹ Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram zatumí akupniurĵn jĵiki akupkattajak? ¿Nu wakerarmek?” tímiayi.

¹¹ Tutai Patri uuntri áentsun chichainiak “Antsu Parapás jĵikim akúpkatá” titiarum” tiarmiayi.

¹² Tutai Parapásan seawarmatai Piratu ataksha chicharainiak “Jesusnasha, átum ii akupniurĵ tarumna nuna, ¿itiurkattaja?” tímiayi.

¹³ Ataksha ni kakantar tiarmiayi “Krúsnum mantamnati.”

¹⁴ Piratusha nin tiarmiayi “¿Warí tunaana túriniat?” tímiayi.

Takui niisha nú naĵkaamas kakantar tíarmiayi “Krúsnum mantamnati.”

¹⁵ Tuma asamtai, aents shiir enentáimprartí tusa, Piratu tunáa shuaran, Parapásan jĵiki akupkamiayi. Tura Jesusnasha katsumkarum krusnum ajinrurtarum tusa suntaran tsanĵkatkamiayi. ¹⁶ Tiniu asamtai suntar Jesusan jukiar, kapitíáni jeen awayawarmiayi. Nu jea naarĵ Piritiúriuiti. Túrawar untsurĵ suntaran untsukarmiayi.

¹⁷ Ashí káunkar, pushin kapáĵnniun Jesusan áentsrarmiayi. Tawasap janĵki najanamun et-senkrumtikiarmiayi. ¹⁸ Nujsha Jesusan áujsar “Shí-raitme, Jesúsá, Israer-shuara akupniuriya” wishikiainiak tiarmiayi. ¹⁹ Muuknumsha sapapĵai awatiarmiayi; nuyá usukiawarmiayi, túrawar ántar tikishmatrarmiayi. ²⁰ Tura Jesusan wishikrar amukar, kapáĵntin pushin áitkiar, ni pushirĵn áentsrarmiayi. Túrawar krúsnum ajinrurtarai tusar jĵikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

²¹ Semun Serini núŋkanmayá shuárauyayi. Ari-jantruncha, Rupuncha aparíyayi. Semun kan takatnumiá winian suntar emetawarmiayi, Jesusa krusrin yanaki jukiti tusar. ²² Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

²³ Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi.

²⁴ Nantu yaki jatemsamtaí krúsnum ayapar ajintrurar ikiusarmiayi. Túrawar suntar yaki jukit tusar nakurutaijjai nakurusar Jesusa pushirín yaruakarmiayi.

²⁶ Urukamtaí máamuit, ashí aents nuna nekaawarat tusa, ni krusrin ju armauyayi: *ISRAER SHUARA AKUP-NIURI*

²⁷ Nu náinnium jimiará kasa shuaran Niijjai máawarmiayi. Chikichik Jesusa untsuuriní krúsnum, chikichik ni menarini krúsnum máawarmiayi. ²⁸ Yus-Papinium aarma ana nujai uminkiauyayi. Nuí "tunáa shuarjai nekapmarmauyayi" tu áarmaiti.

²⁹ Shuar nankaamainiak, muuke pearar, Jesusan katsekainiak tiarmiayi "Íisia, amesha, "Yusa Uunt Jeen yumpuntiatjai, tura menaintiú tsawantai ataksha jeamkattajai" tíchakaitiam, tiarmiayi. ³⁰ Amek krúsnumiá akaikim uwemprata." ³¹ Núnisan Patri uuntrisha, Israer-shuara jintinniurisha Jesusan wishikrar chichar-naisarmiayi "Chikichan uwemtikraitiat, Niŋki uwempratniun tujintiawai. ³² Yusa anaikiamuri Krístuashit, ii akupniuriniashit, tiarmiayi. Wats, yamáí krúsnumiá akáikití, iisha nu ísar Yus-shuar ajastai" wishikiainiak ántar nuna tiarmiayi. Jesusjai krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtaí ti kiritin ajasmiai ashí nunkanam. Tura, nantu nunkaach ajasmatai ataksha tsaapnirmiyayi. ³⁴ Nuin Jesus kakantar untsukum tímiayi "Iruí, Iruí, rama sapaktani." Nuka shuar chichamjainkia, "Yusrú, Yusrú, ¿urukamtaí ajapa ikiurkiniam?" tawai. ³⁵ Shuar nujuarmia nu, nu chichaman nékachu ásar, nuna antukar "Eríasan untsúawai" tíarmiayi. ³⁶ Chikichik shuar churuinian uruchjai ajamper, sapapjai ijiú mukunati tusa susamiayi. Tura tímiayi "Wajastarum, Erías Nin jukitaj tusa winishtimpiash. Iistai" tímiayi.

³⁷ Nuiŋkia Jesus kakaram untsamak jakamiayi.

³⁸ Túramtaí Yusa Uunt Jeen ejamu niŋki jaanakmiayi, yakiyá nunká. ³⁹ Suntara kapitántrisha Jesusan ayamtus wajamia nu, Jesus kakaram untsamak jaamun iis tímiayi "Nuka ti nekas Yusa Uchiriyayi."

⁴⁰ Nuwasha arant ii pujuarmiayi. Nu nuwajai Máktara péprunmayá Marí, chikich Marisha, Sarumáisha pujuarmiayi. Chikich Marisha uchich Jakupuncha Jusenchá nukuríyayi. ⁴¹ Nu núwaka, Kariréa nunkanam Jesus wekaimia nu, Nin nemarsar yáintaitar wekasarmiayi. Untsurí chikich nuwasha Jesusjai Jerusarénnum wear, nu nuwajai arant ii pujuarmiayi.

Jesusan iwiansarmiania nu

(Mateu 27.57-61; Rúkas 23.50-56; Juan 19.38-42)

⁴² Kiatemamtaí, ayampratin tsawant jeatsain, námper iwiaratin tsawant asamtaí, ⁴³ Arimiatianmayá Jusé arantutsuk, kakaram ajas, Piratuí jeá Jesusa ayashin seatajtsa utuamiayi. Nu Jusenchá ashí irunin ainia nu anturin ármiayi. Niisha Yus ju nunkanam akupin ajasat tusa nákasmiayi. ⁴⁴ Tura Jesusa ayashin seam, Piratusha "wárik jaka" tímiayi. Tuma asa suntara kapitántrín untsurak "¿Nekas jakayik?" tímiayi. ⁴⁵ Tutai kapitán "Ee" takui, Jesusa ayashin Jusén tsanatkamiayi. ⁴⁶ Juse-sha puju tarachin péŋkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi. ⁴⁷ Tura Máktaranmayá Marí, Jusé nukurí Marijjai ni ikiuamun ii wajarmiayi.

Jesus nantakmiania nu

(Mateu 28.1-10; Rúkas 24.1-12; Juan 20.1-10)

16 Tura ayampratin tsawant nankaasmatai, Máktaranmayá Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi. ² Tura kashin Tumiŋtin, ti káshik, nantu yáma jiniiai, iwiansamunam jeariarmiayi. ³ Wésar chichainiak "Iwiansamu wáitirí kayancha ¿yaki akanke-tramkattajai?" tiarmiayi. ⁴ Jear uunt kaya akankekman wáinkiarimiayi. ⁵ Iwiansamunam wayawar, natsan esaram puju pushin entsar, untsuurnumaan pujan wáinkiar ti ashamkarmiayi. ⁶ Túmainiakui natsa tímiayi "Ashamkairap. Nasarénumiá Jesus krúsnum jakama nu éarme. Iniantkimiuiti. Juí pujatsui. Wátsek, ju ikiusmanum íistarum. ⁷ Túrarum werum Pítrusha, chikich unuiniamurisha ju ujaktarum. Kariréanam atumin émkiyi. Turammarumna núnisan túruna wáinkiat-tarme" tímiayi. ⁸ Niisha ti ashamainiak purushniarar iwiansamunmayá tseke wearmiayi. Ti ashamainia ásar, chikichinkesha ujakcharmiai.

Máktaranmayá Marin Jesus wantintiúkmiania nu

(Juan 20.11-18)

⁹ Émkaka Tumiŋtin ti káshik Jesus nantaki, Máktaranmayá Marin wantintiúkmiayi. Nu María enentáiyá siati iwianchin Jesus yaunchu ajapruyayi. ¹⁰ Marisha Jesusa nemari kúntuts uutu matsatainian werí, "Jesus iwiaakui, imia wi wainkijai" tímiayi. Támaitiat anturkacharmiayi.

Jesus jimiará shuaran wantintiukmiania nu

(Rúkas 24.13-35)

¹² Tura urum jimiaara shuar Jerusarénnumiá tsanin weenan, Jesus nusháa iira ajas tarimiayi. ¹³ Niisha Jesusan wáinkiar waketiari, unuiniamurín ujakarmiayi, tura ni chichamencha anturkacharmiayi.

Jesus ni unuiniamurĭn akupkarmiania nu

(Mateu 28.16-20; Rúkas 24.36-49; Juan 20.19-23)

¹⁴ Nuyasha Jesusa auntse unuiniamurĭ misanam pekaamkar pujuinian Jesus tarimiayi. “¿Atumí enentáĭ urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiarĭn wáinkiaru chichamen anturkacharu ášarmatai kakantramiayi. ¹⁵ Nuyá chichaak “Ashí nuṅkanam wetarum. Túrarum ashí shuarnum Yusa shiir chichame etserkatarum. ¹⁶ Shuar anturak imiani uwemprartatui. Shuar antukcharka, tuke sumamawartatui. ¹⁷ Shuar winia náarun pachis, Yúsan nekas enentáímtakka, juna túrawartatui, Yusa kakarmarĭn iniakmastaj tusa:

iwianchin jĭiki akupkartatui; chíkich chichamjĭi chichasarukamtai Winia nekas enentáímturtatui; ¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejĭi antĭn, nu shuaran péṅker awajsartatui.” Tu tímiayi.

Jesus nayaimpiniam wakamiania nu

(Rúkas 24.50-53)

¹⁹ Jesus chichas amukmatai, Yus nayaimpiniam jukimiayi. Túruna Yusa untsuurĭnĭ pujusmiayi. ²⁰ Ni unuiniamurĭsha jĭinkiar, ashí nuṅkanam Yus-Chichaman etserkarmiayi. Tura Uunt Yus nin yáĭṅmiayi. Tura etserainiakui, ashí aents ni kakarmarĭn nekaawarat tusa, aentsti tujintiamun túratniun susamiayi. Nuke atí.

RÚKAS

1 Nekas iiní Jesus túramia nuna “ímiatrusan̄ áartajai” untsurí aents tiarmiayi. 2 Yámankamtaikniumi- an̄ íisarmia nú shuar, tura Yus-Chichaman etserkatni- un yáinkiarmita nusha in unuitiamprarmia nútiksaran̄ áartinian wakeriarmiayi. 3 Wisha núnisnak esetsaran enentáimsan, yámankamtaikniumiā nuna nekaamjai. Tuma asan túrunamia nuna ímiatrusnak amincha áa- tratajtsan wakerimjiame, winia úuntur Tiupiru. 4 Jintin- tramawarma nú nan̄kaamas nekaata tusan wakerakun áatjame.

Imiakratin Juan̄ka akiiniatniur̄n ujakmiania nu

5 Jutía nuñkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwēsha Irisapít Aruñ weeauyayi. Irisapítia úuntriṣha Israer-shuar Yús- nan pujurin ámiayi. 6 Yúsjaṣha Sakaríassha Iris- apítcha máí-metek péñker ámiayi. Yus akupkamia nunasha umirin ámiayi. Tuma asamtai péñkesha chí- kich nin yajauch chicharkatin atsuarmiayi. 7 Yusjaṣi péñker wekainiyat Irisapít júrechuyayi. Túrashā mai úuntach ámiayi.

8 Israer-shuar Yúsnan pujurin chíkich weeanmayā nuyá chíkich weeanam, aṅkant aṅkant Yusa jēen takáu ámiayi. Chíkich tsawant, Sakarías weeá takastin amia nuṣ, Sakaríaska kuñkuinian ekeemaktaj tusa inít wayat- niuyayi. 10 Inít kuñkuinian ekeemaj untsurí aents aani matsamsar Yúsān áujtak pujuarmiayi. 11 Sakarías inít pujaṣ kuñkuin ekeematainiam untsuurnumaan̄i aya aneachma nayaimpinmayā suntar wajamiayi. 12 Nuna wajan wáiniak Sakaríaska purushnairmiayi. 13 Túrashā nayaimpinmayā suntar chicharuk tímiayi “Sapijmiakaip Sakaríasā. Nekaata. Ame seamna nuna Yus antur- tamkayi. Tura ame nuwem Irisapít uchin takustatui. Nii akiiniamtai, “Juan̄” anaikiata. 14 Ame uchiram akiiniat- tana nuka Yusjaṣha nan̄kaamantu átatui. Tuma asam- tai akiiniamtai, amesha shiir enentáimsam waras- tatme. Tura chíkich aents untsurí warasartatui. Ame uchirmesha karía ainia nuna umarchattawai. Tura áe- tak akiinchanak Yusa Wakan̄i pimiutkattawai, tímiayi. 16 Tura ni shuar̄n Israer-shuar áiniana nuna, ii Uuntr̄i Yusjaṣi ataksha nawamtikiartatui. 17 Uunt Yúsaiyā aka- tramū átatui. Yaunchu Yúsnan etserin Erías kakaram etserkamia núnisān niisha etserkattawai. Nujai shuaran ni uchir̄jjaṣi nawamtikiartatui. Tura umichu áinia nuna eseer enentáimtikrartatui. Ni Uuntr̄i taaku ni enentái iwiaramu arti tusa etserkattawai” tímiayi nayaimpinmayā suntar.

18 Nuna takui Sakarías nayaimpinmayā suntaran tími- ayi “¿Nunasha warijjaṣi paant nekaataj? Wishā nuarjai máí-metek ti úuntchichukaitaj” tímiayi.

19 Tutai nayaimpinmayā suntar tímiayi “Wikia Kapri- iraitjai, Yusa suntar̄ntjai. Nii akatturmatāi chichastá- jam tusan tura nu shiir chichaman ujaktájam tusan tarijme, tímiayi. 20 Túrashā wi tájamna nu “nekasaiti” tu enentáimprachume. Tura asam uchiram akiintsaiñ muut ajastatme. Chichastin péñké tujinkiatame. Tura wi tajana nu, tsawant jeamtai túrunattawai.”

21 Nuna tumai Yusa jēen aani pujusar, Sakaríasan nákas pujuarmiayi. “¿Urukamtaik inít we imiá meñka- ka?” tu enentáimprarmiai. 22 Nuyá Sakarías jiiinkimtai, áujstaj tukamá tujinkiarmitai. Sakaríaska, muut aja- su asa, aya úwijmiasan̄ chichamiayi. Túmakui, Sakarías inít pujus Yúsai wáimiakun nekaawarmiayi.

23 Yusa jēen takastin tsawantri amuukamtai Sakarías- ka ni jēen waketkimiayi. 24 Nuyá ukunam ni nuar̄i Iris- apít ajaprukmiayi. Tura seṅku nantutin aya jēan̄ pujus- miayi. 25 Jeá pujus, “Aents wishikruiniakui natsantan ju- rutkitaj tusa uchi takustinian Yus tsan̄katrukai” tu enentáimpramiayi Irisapít.

Jesusa akiiniatniur̄n nayaimpinmayā suntar et- serkamiania nu

26 Nu seṅku nantu nan̄kaasmatai Yus ni suntar̄n Kapriiran Nasarét péprunam akupkamiayi. Nu pepru Kariréa nuñkanam pujawai. 27 Nasarétnumiā nuwan, naari Marí, iyutí tusa akuptukmiayi. Nu núwaka áish- man̄jai pujuchuyayi. Niisha Jusejai nuatnaikiatsa anaj- manair pujumiayi. Juseka uunt Tawit weeauyayi. 28 Wats, nayaimpinmayā suntar Marí pujamunam wayá tímiayi “Yus péñker enentáimturma asamtai, ámin winitjiame, Mariya. Yuska ámin nemartamuk ashí nuwā nan̄kaamas péñker awajtamui” tímiayi.

29 Tura Marisha nayaimpinmayā suntaran wáiniak, chichaamun nékatsuk “Urukamtaik tu chicháa” tu enentáimpramiayi. 30 Nuyá nayaimpinmayā suntar chicharuk tímiayi “Mariya, sapijmiakaip. Yus shiir enen- táimturmawai. 31 Antukta. Amesha ajapruktatme. Túram Uchi takustatme. Nusha “Jesus” anaikiata. 32 Ni- isha uunt átatui. Nincha “Uunt Nan̄kaamaku Yusa Uchir̄i” tiartatui. Tura Uunt Yuska yaunchu Tawitian uunt akupniur̄i awajsamia núnisān ame Uchirmin ame shuárumin Israer tutain Uunt akupin awajstatawai. Ni akupeamur̄isha Yus susamu asa péñké amuukashtini- aiti” tímiayi.

³⁴ Nayaimpinmayá suntar nuna tutai Marí tímiayi “Nusha winia áishur atsaisha, ¿itiurak túrunataj?”

³⁵ Tutai nayaimpinmayá suntar Marín tímiayi “Yusa Wakaní tarutramtatui. Tura yurañmia núnisañ Uunt Yusa kakarmarí ijirmattawai. Nu tuma asamtai Uchi akiiniattana nu Yúsaiyá asamtai, “Yusa Uchirínti” tiartatui, tímiayi. ³⁶ Tura Irisapít ame kaná kaimia nusha núnisañ weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. ³⁷ Yúsjañkia itirchatka penké atsawai” tímiayi.

³⁸ Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmayá suntarka wémiayi.

Irisapítian Marí iyumiania nu

³⁹ Nu tsawant Marí wárikmas muranam Jutía nunkanam ni kaná kain Irisapítian iyutaj tusa wémiayi. Sakaríasaj jeá, ni jeen wayá, Irisapítian áujسامiayi.

⁴¹ Marí áujeamun antukmatai Irisapítia ampujén uchirí muchitkiamiayi. Tumañ Yusa Wakaní ni enentáin pimiutkamiayi. ⁴² Nuiñkia kakantar chichaak Marin tímiayi “Yus amincha ti shiir awajtsamaiti. Tura Uchiram akiiniattana nusha Yus shiir awajtsamuiti. ⁴³ Kajrua, ame winia Uuntru nukurí áminiñ, Yus winia ti waitnentra asa, áujtsata tusa ámin akuptamkachaik, tímiayi.

⁴⁴ Warí, wisha ame áujtamna nuna ántakui ampujruñ uchi waras muchitrutkayi. ⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtai Marí juna tímiayi:

“Wikia tuke enentairjaj “Yus timiá úntaiti” tajai. ⁴⁷ Tura Uunt Yuska winia Uwemtikruru asamtai ti waraajai.

⁴⁸ Wisha péejchach añ ni wakeramurñ umiktajtsan wakerakui winia enentáimturayi. Tuma asamtai ashí aents, “Marincha Yus shiir awajtsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajtsaiti” turutiartatui. Núnaka yamáñ nankamamunak tuke turutú ajartatui. ⁵⁰ Tura Nin umirkatniun wakerana nunasha Yus tuke waitnentrartatui. ⁵¹ Ti itirchatan páchitsuk túraitii Nii. “Nankaamantuitjai” tu enentáimtumainia nuna nupetkaiti. ⁵² Ashí akupin ainia nuna awakkaruiti. Tura íksañ péejchach ainia nuna uunt awajtsaruiti. ⁵³ Péñker ana nuna kitiainiakui Yus péñkeran súsaruiti. Tura antsu “ashí takakjai” tuinia nuna aya júnik awajtsaruiti. ⁵⁴ Israer-shuar Niiniu ájnia núnaka waitnentratniun kajinmattsuk yáinmákuitji. ⁵⁵ Yaunchu ii Uuntrí Apráaman tura ní shuar-nasha “túrattajai” timia nuna ímiatrusañ tuke túraitii.” Nuní tímiayi Marí.

⁵⁶ Marikia Irisapítjaj menaintiú nantu pujus ni jeen wakatkimiayi.

Imiakratin Juanka akiiniamurí

⁵⁷ Nuyasha ni jurertin tsawantrí jeamtai Irisapítcha uchin áishmankan takusmiayi. ⁵⁸ Tura ni shuarísha, ni

írutramurísha “Irisapítian Yus ti shiir yáinmiayi” tuíniak, nin iyuwarmiayi. Tura máimetek warasarmiayi.

⁵⁹ Israer-shuar túrutai júnisaiti: uchi akiiniamurí uchu tsawant jeamtai, shunichirí nuapen tsupiktin awai, sirkunsisiún tutai. Yus nuna tú tiniu asamtai tuke túrin ármiai. Wats, Irisapítia uchirí akiiniamuríñia uchu tsawant jeamtai tsupirkatai tusar ni jeen jearmiayi. Nuiñkia ni aparí naarí Sakarías anaikiataitsar wakeriamiayi. ⁶⁰ Tura ni nukurí tímiayi “Atsá. Antsu ni naarí Juan átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. ⁶² Nuiñkia uchi aparíñ “¿Warí anaikiatajtsam wakeram?” tusar aya úwejejañ iniasarmiayi.

⁶³ Tutai uchi aparísha “Nakash surusta; áartaj tusan wakerajai” tusa aya úwejejañ iniakmamiayi. Takui nakash susam, ni naarí Juáñkaiti, tu ármiai. Nuna wáinkiar “Ayawá urukakun ta” tu enentáimprarmiayi. ⁶⁴ Nú chichamaik Sakarías chichatsuk pujamun chichakmiayi. Tura nuiñ Yusa náaríncha shiir awajtsamiayi. ⁶⁵ Nuiñkia ni írutramurísha ashamkarmiayi; tura ashí Jutía nunka murá amia nuñ nu túrunamun ujakam ashí nekaawarmiayi. ⁶⁶ Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tímiania nu

⁶⁷ Uchi aparí Sakarías, Yusa Wakaní pimiutkam tura Yus jintintiam, juna tímiayi:

⁶⁸ “Israer-shuartí ii Yusrí naarí shiir awajtsaniuitji. Ii Yúsrísha tarutmaitji. Tura uwemtikrampraitji.

⁶⁹ Yaunchu ii uuntrí Tawit Yusa wakeramuríjjaj uunt akupin áchamkia. Tura ni ukuríñ ti kakaram Uwemtikiartinian suramsaitji. ⁷⁰ Yuska ii nemasriyá tura in nakitramainiajnía nuyá uwemtikrampratniun enentáimsamia nuna, yaunchu ni etserniuríñ péñker armia nuna ujakmiayi. “Winia ti penker chichamprun tájana nuna yapajtsuk umirkan tuke wáitnentratjume” yaunchu ii uuntríñ tímiania nunasha ni etserniuríñ ujakarmiayi. Yaunchu nu ujakma yamáñ iisha waiñji. ⁷³ Nu ujakman Yuska yámankamtaik imiá yaunchu ii uuntrí Apráaman tíchamkia. Apráaman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriyá uwemtikrat-tajai. Sapijmiatsuk winia tuke takartusarat tusan túrat-tajai” Yus tímiayi Apráaman. Iisha ni shuarí asakrin, nuna taku incha túramaji. ⁷⁶ Tura amincha, uchiru, “Uunt Yusna etserniuiti” turamartatui. Amesha ni tátin-trí iwiarataj tusam Uuntaj émkim wétatme. ⁷⁷ Ni shuarí, ni tunaarí tsañkurnar uwemprarat tusam túratatme. ⁷⁸ Yuska ashí shuaran anea asa, incha wáitnentrakam ni pujamunmayá ni tsáapnintríñ suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsáapnintrí jeat’ tusa túraitii. Tura ashí incha ii enentáin imiatkinchanum wekasarmí tusa túraitii.” Nuní tímiayi Sakarías.

⁸⁰ Uchisha tsakarmiayi. Tura Yúsán nekaki-nekaki wémiayi. Israer shuarnum etserkatin tsawantri jeat-sajinkia atsamunam pujuyayi.

Jesusa akiiniamuri
(Mateu 1.18-25)

2 Wats, Juan akiiniamia nú uwitin uunt akupin Akustu ashí nuñkanam áentsun nekapmarartí tu chichakmiayi. ² Nu nekapmartinian yaunchu túrush-tain yamáí túriarmiayi. Siria nuñkanam Seriniu akupin pujáí túrawarmiayi. ³ Ni naari áartaj tusa ashí shuar ni nuñkeniñ wétin ármiayi. ⁴ Tuma asamtai Jusé Nasarét péprunmayá Kariréa nuñkanam amia nuyá jiinki Piriñ péprunam Jutiá nuñkanam amia nuí wémiayi. Juseka Tawit weenam akiinia asa, ni nekas nuñkenka Piriñkauyayi. ⁵ Nu asamtai, ni náarín áartaj tusa Jusé wémiayi Marijjáí. Marisha Jusé núweyayi. Tura tsan-incharuyayi. Túmaitiat Marisha Yusa Wakaní kakarmar-ijjáí ajamtiniuyayi. ⁶ Tura nuí Piriñnum pujuiniaí Marí takustintri jeamiayi. ⁷ Nuí iwiajriñ uchin áishmankan takusmiayi. Tura uchi penutaijjáí penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

Murikiun wáinniun nayaimpinmayá suntar Yus akatar akuptukmia nu

⁸ Tura Piriñnum tíjiuch murikiun wáinin kashi murikriñ wáiniuk pujuarmiayi. ⁹ Túmainiaí nayaimpinmayá suntar murikiun wáinin matsatainian wantintiukmiayi. Tura Yúsnumiá tsáapnin ni matsatainiamunam etsantramiayi. Túrunamtaí murikiun wáinniuka ti ashamkarmiayi. ¹⁰ Túrusha nayaimpinmayá suntar tímiayi “Ashamprukairap. Ashí áentsnum ti warastin atí tusan ti penker chichaman itiarjarme. ¹¹ Júiti: yamáí tsawantáí uunt Tawitia pépruriñ Piriñnum yaunchu Yus anaikiamu KRISTU tutai, uwentikramprataj tusa akiinturmarme. Nu Uchisha ashí áentsun akupniuiti, tímiayi. ¹² Tura jujáí nekaattarme: uchi penutaijjáí penuar-ma waaka yurumtainiam tepá wáinkiatarme. Nu wáinkiarum nekas júiti, tu nekaattarme.” ¹³ Nu chichamaik nayaimpinmayá suntar ti untsurí, nayaimpinmayá káunkarmiayi. Túrawar Yusa naariñ shiir awajainiak juna tiarmiayi:

¹⁴ “Nayaimpinmasha Yus nañkaamantuiti tu enentáimtusarti. Tura ju nuñkanmasha Yusjáí nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntariñ nayaimpiniam waketkiarmataí murikiun wáinin tiarmiayi “Wats, Piriñnum wárik wetáí. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marinha Jusenchá wáinkiarimiayi. Tura uchinchá waaka yurumtainiam tepan wáinkiarimiayi. ¹⁷ Wear nuna wáinkiar, nayaimpinmayá suntar uchi túrunamuriñ timia nuna etserkarmiayi. ¹⁸ Tura murikiun wáinin tiarmia nuna antukaruka ti enentáimtusarmiayi. ¹⁹ Túrusha Marikia ashí túrunamia nuna ni enentáijjáinkia enentáimtu pujumiayi. ²⁰ Tura murikiun wáinniuka antukarmia nuna

enentáimtusar, tura ísarmia nunasha enentáimtusar “Nayaimpinmayá suntar ujatmakmajnia tímiatrusañ túrunayi” tiarmiayi. Tuma ásar Yusa náariñ shiir awasjar kantampruawar waketkiarmiayi.

Uchin Jesusan Yusa Uunt Jeen itiarmania nu

²¹ Tura uchi akiiniamu uchu tsawant jeamtaí, ni túru-tairiñ túrin ásar, ni shunichiriñ nuapen tsupirkarmiayi. Túrawar Marí ajapratsajin nayaimpinmayá suntar tímia nútiksañ “Jesus” anaikiarimiayi. ²² Tura Muisais akiiniatniunam akupkamia núnisañ, tsawantri jeamtaí, Yusa Uunt Jeen Jerusarénum uchin Yus iiktustai tusar júkiarmiayi. ²³ Kame Yus-Papinium ju aarma awai:

“Ashí uchi iwiajri áishman akiinkiuñka Yusna átatui.”

²⁴ Tuma asamtaí, Marí Yusa Uunt Jeen wáitsuk pujamu wayatniuriñ jeamtaí, uchin Yus iistí tusa Yusa Uunt Jeen Jerusarénum pujana nuí itiarimiayi. Tura yampitsan jímiaran súsarmiayi. Muisáis akupkamun umiiniak nuna túrawarmiayi.

²⁵ Nu túmai Semeúñ naartin áishman Jerusarénum pujumiayi. Semeúñsha Yusa Wakaní pujurma asa penker áishmankauyayi. Yúsán nekas enentáimtinuiyayi. Yusa anaikiamurijjáí Israer-shuar ankant ajastin jeati tusa nákauyayi. ²⁶ “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi. ²⁷ Nú Semeúñ Yusa Wakani “wetá” tutai, Yusa Uunt Jeen wémiayi. Tura nú tsawantáí Muisáis tímia núnisañ umirkataí tusar Marisha Jusesha uchin Jesusan Yusa Uunt Jeen itiarimiayi. ²⁸ Itiarimataí Semeúñ uchin jusa miniakas Yúsán áujuk juna tímiayi:

²⁹ “Yamaikia, Uunta, Amijn wi jeatin ankant atí. Turutmiamna nu ímiatrusmek umikiume. ³⁰ Ju Uchi ashí aents uwentikartá tusam susamna nuna yamáí imia winia jírujái wáinkiajai. ³² Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájiniá nuna ashí aents shiir enentáimtikartí tusam ju Uchi akuptukmaiti. Nuna wáinkian shiir enentáimsan jákatniuitjai.”

³³ Tura Semeúñ Uchiniun tu chicharkui Jusesha Jesusa nukurísha ti enentáimprarmiayi. ³⁴ Semeúñsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurí nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmariñ ti paant iniakmstatui. Tuma aijn untsurí Aun yajauch chichari-artatui. ³⁵ Nujái shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiayi Semeúñ.

³⁶ Nuwasha Ana naartin nuí Yusa Uunt Jeen pujumiayi. Niisha Yúsán etserniuyayi. Ni aparísha Panuíruyayi tura Aser shuarauyayi nu nuwá. Niisha ti úuntchiyayi. Niisha yama nuatnaikiamujái siati uwi ni áishrijjáí tsaniñ pujusarmiayi. ³⁷ Tura wajemamiayi. Tura uchenta kuaru uwi takakuyayi. Tura niñkia Yusa Uunt Jeeniá jíintsuk káshisha tsawajsha tuke Yúsán áujniuyayi. Tura yurumtsuk Yúsán áujniuyayi. ³⁸ Semeúñ

tuasua amikmatai Anasha taa, Uchin wáiniak Yúsan yumingsamiayi. Tura Jerusarénum Yus uwemtikram-pratai tusa nákarmia nuna áujkuŋka uchin áujmat wémiayi.

Nasarénum waketkiarmiania nu

³⁹ Nuyá Yus tímia nuna ashí túrawar amikiar Kariréa nuŋkanam, kame nii pujumia nú peprunam Nasarénum Jusesha Marisha Uchisha waketkiarmiayi. ⁴⁰ Uchi Jesus tsakaki, kakaram ajaki tura nú naŋkaamas neka-ki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamurí

⁴¹ Jusesha, Jesusa nukurísha tuke uwitin paskua námper jeakui Jerusarénum weu ármiayi. ⁴² Ni túrutairí túruiniak, Jerusarénum weak Jesusan tuse uwí jeamtai júkiarmiayi. ⁴³ Námper amuukamtaí ni nukurísha Jusesha nékachmanum Jesuska Jerusarénum juákmiayi. ⁴⁴ Marisha Jusesha “wíi shuarjají winiawai” tusa, nú naka eątsuk chikichík tsawant wekasarmiayi. Nuyá wáinkiataj tukamá, ni shuarjín tura ni nékamunam eąkarsha, ⁴⁵ wáinkiacharmiaayi. Nuŋkia Jerusarénum ataksha waketrukiarmiayi, eąktai tusar. ⁴⁶ Tura menaintiú tsawant eąkar Yusa Uunt Jeen Yus akupkamun jintinnian anturak anintrú pujan wáinkiararmiayi. ⁴⁷ Tura nuí ashí Jesusan anturkarmiania nu, niisha ti nékakui tura áimtanash ti péŋker áimkiui, ti enentáimturarmiayi. ⁴⁸ Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiayi “Uchiru, ąasha urukamtaí itiurchat enentáimtikrurmam? Ame apasha wisha urukayik tusar ti eąkjame” tímiayi.

⁴⁹ Tutai Jesus tímiayi “¿Urukamtaí eątrum? Winia Aparnan túratniuitjiana nuka nékatsrumek” tímiayi.

⁵⁰ Tura timia nú naka péŋké nekaacharmiayi. ⁵¹ Nuyá Jesus niijjají Nasarénum waketkimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. ⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

Imiakratin Juanka etserkamurí

(Mateu 3.1-12; Márkus 1.1-8; Juan 1.19-28)

3 Tipiriu uunt akupin pujamu kiŋse uwí jeamtai, Jutía nuŋkanam Punseu Piratu akupin pujumiayi. Tura Kariréa nuŋkanam Erutis akupin pujumiayi. Itiurea nuŋkanmasha Trakuniti nuŋkanmasha ni yachí Jiripi akupin pujumiayi. Tura Apirinia nuŋkanam Risarias akupin pujumiayi. ² Tura nu uwitin Anassha Kaipíssa Israer-patri uuntri pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi. ³ Nuyá Jurtaŋ entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajíarum imiantiarum.” Tu ujakmiayi. ⁴ Nu ujakman Isayas yaunchu juna áarmiayi:

Atsamunam wekaana nu untsunmun ántuiniawai. Nii untsunmuk juna tawai: Atumí enentáí Uunta jintí iwiar-

turtarum; naka awajsatarum. ⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pu-jutrin ainia nusha métekrak paka awajsamu arti.

⁶ Túrunamtaí ashí nuŋkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ąya ujatmakuram? tímiayi. ⁸ “Iikia Apraám weeitji, tuma asakrin Yus shiir enentáimturmají” tu enentáimtumasairap. Antsu enentáim yapajíamuitkiuŋkia péŋker wekaamurmijjají paant iniakmatarum. Warí, Yus wak-erakka, ju kayan Apraáma shuarín páchitsuk najankainti, tímiayi. ⁹ Aneartarum. Numi ajaktinian kam-puwarín jacha atuttsamuiti. Numi péŋker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuŋkia itiurkatjik?” tiarmiayi.

¹¹ Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹² Uunt akupniu kuítrín juu armia nú shuar imiantiaj tusar Juáŋkan weriar aniasarmiayi. “Uunta, ąiisha warí itiurkatjik?” tiarmiayi.

¹³ Tutai Juan tímiayi “Kuit uunt akupin tana nu ini-ąŋkasrum achikiairap.”

¹⁴ Suntarsha aniasarmiayi “Uunta, ąiisha warí itiurkatjik?”

Juąsha tímiayi “Ame kakarmarmijjají chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

¹⁵ “Ju Juan Yusa anaikiamurínchuashit” tu enentáim-sar paant nekaataitsar nákarmiaayi.

¹⁶ Tumai Juan tímiayi “Wikia aya ayąshmin entsanam imiajrume. Tura wijjají naŋkaamas ana nu tátatui. Ni sapatrí jŋnkiamurínkisha atitrachminiaitjai. Niisha taa, imiantinia áanis tura jíiya áanis Yusa Wakanín eŋke-tramprattarme. ¹⁷ Shuar aruusan awąjtia núnisan, nusha yajauch ana nuna ajapa aya péŋkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

¹⁸ Juan nu arant shiir chichaman áentsun ti núkap ujakarmiayi. ¹⁹ Tura nuyasha akupin Erutisan chicharkamiayi. Ni yachí Jiripi nuąrín Jirutíasan kasarakuatkuí tura chíkich yajauchincha túrakui chicharkamiayi. ²⁰ Tura Erutis nú naka ántutsuk chíkich yajauchin túramiayi. Juáŋkan achik sepunam eŋkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsajín, Juąsha ashí nú nuŋkanmaya áentsun imiak pujurainají Jesussha imianmiayi. Niisha Yúsan áujuk pujaí nayaimpisha uranmiayi. ²² Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

Jesukrístu shuari

(Mateu 1.1-17)

²³ Jesus trainta (30) uwí takaku asa ni takatrín nan̄kamamiayi. “Jusé uchirínti” tiniu armiayi. Jusésa Iría uchiríyayi. ²⁴ Irísha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi; ²⁵ Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi; ²⁶ Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi; ²⁷ Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi; ²⁸ Neri Mirkí uchiríyayi; Mirkí Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi; ²⁹ Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi; ³⁰ Matat Riwi uchiríyayi; Riwí Semeún̄ka uchiríyayi; Semeún̄ Jutáa uchiríyayi; Jutá Jusé uchiríyayi; Jusé Junañka uchiríyayi; Junañ Iriakímia uchiríyayi; ³¹ Iriakím Mirea uchiríyayi; Mirea Mainián̄ka uchiríyayi; Mainián̄ Matata uchiríyayi; Matata Natan̄ka uchiríyayi; ³² Natan̄ Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramún̄ka uchiríyayi; Saramún̄ Naa-sun̄ka uchiríyayi; ³³ Naasun̄ Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi; ³⁴ Jutá Jakupa uchiríyayi; Jakup Isaka uchiríyayi; Isak Apráama uchiríyayi; Apráam Tarea uchiríyayi; Taré Nakura uchiríyayi; ³⁵ Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi; ³⁶ Sara Kainián̄ka uchiríyayi; Kainián̄ Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi; ³⁷ Ramik Matusarín̄kia uchiríyayi; Matusarín̄ Euka uchiríyayi; Euk Jaritia uchiríyayi; Jarit Maararíira uchiríyayi; Maararíir Kainián̄ka uchiríyayi; ³⁸ Kainián̄ Enusa uchiríyayi; Enus Seta uchiríyayi; Set Atañka uchiríyayi; tura Atañ Yus najanamuyayi.

Jesusa nekapsamuri

(Mateu 4.1-11; Márkus 1.12-13)

4 Jesusa enentáin̄ Yusa Wakaní pimiutkamiayi. Jesussha Jurtan̄ entsanmayá waketkimtai Yusa Wakaní aents atsamunam jukimiayi. ² Tura nujsa kuarenta tsawant pujusmiayi. Tura íwianch Nin tuanaanum ajuaraintajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiayi. ³ Nuiñkia íwianch chicharuk “Amesha nekas Yusa Uchirín̄tkiumka jū kaya apatuk najanata” tímiayi.

⁴ Tutai Jesus tímiayi “Yus-Papí tawai:

“Aya apatkujañ̄ shuar iwiaaku pujuschamniaiti. Antsu ashí Yus-Chicham tana nujañ̄ nekas iwiaaku pujusmini-aiti,” tawai” tímiayi.

⁵ Tura nuyá íwianch naint yakí wájakmanum jukí, ashí nun̄ka ainia nuna jū chichamaik iniaktusmiayi. ⁶ Tura chicharuk tímiayi “Ashí jū nun̄ka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia jū nun̄kanam ashí akupkatniun susattajme. Tura nuñ̄ ni warirí ainia nusha áminiu átatui” tímiayi.

⁸ Tutai Jesus tímiayi “Yus-Papí tawai:

“Aya Niñki Yus ame Úntrum tikishmatram enentáim̄tustiniaitme.”

Tau asamtai, werumta, iwianchi” tímiayi.

⁹ Ataksha íwianch Jesusan Jerusarēñ̄ péprunam jukimiayi. Tura Yusa Uunt Jēē yakiini iwiak tímiayi:

¹⁰ “Yus-Papí tatsuk:

“Yuska ni suntarín̄ wáinkiatá tusa akupturmaktatui.

¹¹ Kayanam ajintrañ̄ tusa wen̄kurmakatui.”

Tuma asamtai nekas Yusa Uchirín̄kiumka juyá akaikim iniaata” tímiayi. ¹² Tutai Jesus ámiuk tímiayi “Yus-Papí junasha tawai:

Yus ame Úntrum nekapsataj tiip.”

¹³ Tuma asamtai íwianch pen̄ké tujintiak ishichik tsawant Jesusan iniaisamiayi.

Kariréa nun̄kanam Jesus ni takatrín̄ nan̄kamamiania nu

(Mateu 4.12-17; Márkus 1.14-15)

¹⁴ Jesus ni enentáin̄ Yusa Wakaní kakarmari pimiutkama ajas Kariréa nun̄kanam waketkimiayi. Nu nun̄kanam nan̄kaamantu túramurín̄ áujmatiarmiayi.

¹⁵ Nu nun̄kanam ashí péprunam Israer-shuar iruntai jēē armia nuñ̄ unuiniarmiayi. Tura anturkarmia nuka ni náarín̄ shiir awajsarmiayi.

Jesus Nasarétnum pujumiania nu

(Mateu 13.53-58; Márkus 6.1-6)

¹⁶ Ni tsakarmariñ̄ Nasarétnum Jesus wémiayi. Tura Israer-shuar ayampratin tsawantin iruntai jēanam wayamiayi, tuke turin asa. Tura wayá Yus-Papin áujsatat tusa wajakmiayi. ¹⁷ Nuñ̄kia Yúsnan etserin Isayasa áarmarín̄ súsarmiayi. Nuna urak, nuñ̄ juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáim̄iar wake mesek pujuinian tsuártinian akuptukuiti. Tura jñ̄i kusuruncha ímtiktinian, tura yajauch awajsamu ainia nuna péñker awajsatniuncha, ¹⁹ tura Uunt Yus, shuáran yaintin tsawantrí jeán etserkatniuncha akuptukuiti.

²⁰ Nu áarman aujsua amik papin nukukmiayi. Tura iruntai jēanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. ²¹ Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

²² Jesusan ashí péñker áujmatiarmiayi. Tura Jesus ti shiir chichaakui ti enentáim̄prar “Juka Jusé uchirín̄chukait” tiarmiayi. ²³ Tu enentáim̄iainiakui, Jesus chicharuk “Atumsha shuar tuke tuinia núnisrumek,

“tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek jujsha túrata tusarum nu turuttiatrume.

²⁴ Túrasha nekas tájarne, Yúsnan etserniun ni nuñkenkikia nii tana nuna anturainiatsui. ²⁵ Nuyasha tájarne, Irías pujumia nú tsawantin, menaintiú uwí nañkaamas yumi yutukcha asamtai ashí Israer núñkanam ti tsuka amia nuí ti untsurí waje irunmiayi. ²⁶ Tuma aiñ nu wajen yañti tusa Yus Iríasan akup-tukchamiayi. Antsu chíkich nuñkanmayá wajen Sarepta péprunam pujumia nuna yañti tusa akuptukmiayi. Sarepta pepru Sitiún péprunam tíjiyuch pujawai.

²⁷ Núnisañ ii nuñkeshá Iriséu pujumia nu tsawantin ti untsurí tunamaru iruniarmiayi. Tura núnaka tsuár-charmiayi. Antsu chíkich nuñka, Sírianmayá Naa-manñkan tsuármiayi” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajerarmiayi. ²⁹ Tura wajatkíar Jesusan jjiiki péprunmayá akupkarmiayi. Tura pepru amia nuí naint yakí nánkatkamunam, nuyá akaki ajuatai tusar júkiarmiayi. ³⁰ Túrasha Jesuska irunar matsatainiamun-man etempraktak jiinki wémiayi.

Iwianchrukun Jesus tsuármiania nu

(Márkus 1.21-28)

³¹ Nuyá Jesus Kariréa nuñkanam Kapernáum pepru amia nuí wémiayi. Tura Israer-shuara ayampratin tsawanriin tuke etserki wémiayi. ³² Yusa kakarmarín takaku asa nujají etserkamiayi. Tuma asamtai “Yusa kakarmaríjjají unuitiamtsujik” tiar ti enentáimprarmi-ayi.

³³ Chíkich tsawantají áishman iwianchruku Israer-shuar iruntai jeñam pujumia nu untsukum tímiayi, ³⁴ “Inikiartusta. Iikía Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeka ti penker Tunaarincha nútme” tímiayi.

³⁵ Tutai Jesus iwianchin kakantar chicharuk “Takamat-sata. Ju áishman ikiuktia” tímiayi.

Tutai nu chichamaik íwianch áishmannumiá jiinki weak nuñká ajuant ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman Yusa kakarmaríjjají iwianchin jjiiki awematsuk” tiarmiayi.

³⁷ Tura ashí nú nuñkanam Jesusa túramurín áujma-tiarmiayi.

Semuñ Pitru tsatsarín Jesus tsuármiania nu

(Mateu 8.14-15; Márkus 1.29-31)

³⁸ Jesussha Israer-shuara iruntai jeñiá jiinki Semuñka jeen wémiayi. Semuñka tsatsari tsuer ti jáamiayi. Ti jaakui Jesusan “tsuárturtá” tiarmiayi. ³⁹ Jesussha jaa tepan tsunsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

Untsurí jaan Jesus tsuármiania nu

(Mateu 8.16-17; Márkus 1.32-34)

⁴⁰ Etsa akaikin ají ni shuari nánkamas sunkurjají jaarmia nuna Jesusan ikiaatkarmiayi. Jesussha jáinian chíkichkiniak chíkichkiniak uwejejjají antiñkiar tsuáarmiayi. ⁴¹ Ti untsurí iwianchruku armia nunasha iwianchrín jjiirkarmiayi. Jiinkiar íwianchkia untsumainiak “Ámeka Yusa Uchirínme” Jesusan tiarmiayi. Tura ni-isha “Jesuska Yusa anaikiamurínti” tu nékainiakui Jesus kakantar chicharak itiatmamtiarmiayi.

Kariréa nuñkanam Jesus etserkamiania nu

(Márkus 1.35-39)

⁴² Kashin káshik tsawaak Jesus péprunmayá jiinki at-samunam Niñki wémiayi. Tura shuarsha eñkiar ni puja-munam jeariarmiayi. Tura iijjají tuke pujusat tusar emetataitsar wakeriarmiayi. ⁴³ Túmain Jesus tímiayi “Yus ii enentáin akupkatajtsa wakera nú shiir chíchaman chíkich péprunam matsatainia nunasha ujaktiniaitjai. Nu túrata tusa akupkamuitjai” tímiayi. ⁴⁴ Tuma asamtai Kariréa nuñkanam Israer-shuar irun-tai jeñam Jesus tuke etserki wémiayi.

Namakan ti untsurín achikiarmiania nu

(Mateu 4.18-22; Márkus 1.16-20)

5 Chíkich tsawantají Jesus Jinisarít antumianka tu-tainium káanmatkarí pujají ti untsurí shuar, Yusa chíchamen antuktai tusar wakeruiniak Jesusají káunkarmiayi. Antuktai tusar wakeruiniak kaé ajattsarmiayi. ² Tura jimiará kanun antumiankan káan-matkaríin tepan wáinkarmiayi. Ni nérenniuríñkia jiinkiar ni nekarín nijjá pujuinia asamtai kánuka añkant ármiayi. ³ Tuma asamtai Jesus Semuñka kanuríin enkempramiayi. Tura Semuñkan chícharuk “Ishichik ajapén juruktía” tímiayi. Nuñkia kanunam eñkemas áentsun káanmatkanam pujuinian unuiniamiayi. ⁴ Un-uiniasia amik Semuñkan chícharuk “Kanu kunanam jukim neka ají ajunatarum” tímiayi.

⁵ Tutai Semuñ tímiayi “Túrasha, Uuntá, káshisha tuke aju-junkuar tsawarji. Túrasha penké achikchaji. Kame áankisha Ame támajají ajunatjai” tímiayi.

⁶ Tura ajunkar namakan ti untsurín achikiarmiayi. Túram nekasha jaanaki wémiayi. ⁷ Tuma asamtai ni írutkamurín chíkich kanunam pujuinian uwejejjají “wini-tia, yáintkiamniuram” tusar untsukarmiayi. Niisha táarmiayi. Túrawar jimiará kanunam métej awajsarmi-ayi. Tura kanusha init wayastatuk ajamiayi. ⁸ Nuna túramtai Semuñ Pítiur Jesusan tikishmatar tímiayi “Uuntá, wikia ti tunaitjai. ¿Wíjjajísha itirak pujustam?”

⁹ Semuñsha ni írutkamuríjjají namakan timiá untsurín wáinkiar ashamkarmiayi. Tuma asa Semuñsha nuní tímiayi. ¹⁰ Tura Sepetéu uchirí Jakupusha Juansha Semuñjají pujuarmia nusha ashamkarmiayi. Tura Jesus Semuñkan tímiayi “Ashamkaip. Yamaikia namaka-achinia áintsamek aents-eñu ajastatme.” ¹¹ Nuyasha kanurín kukar júkiar, ashí takakmaríncha ikiukiar Jesu-san nemarki wearmiayi.

Tunamaru áishmanġan Jesus tsuármiania nu

(Mateu 8.1-4; Márkus 1.40-45)

¹² Ukunam Jesus chíkich péprunam pujaj tunamaru áishmanġ taa Jesusan wáiniak tikishmatar nuġká shushuma pankái Jesusan tímiayi “Uuntá, wakerutak-meka páchitsuk tsuáramniaitme.”

¹³ Nuna tutai Jesus antiġ tímiayi “Wakerajai. Tsuaajme.” Tura nú chichamaik tunamarusha péñker ajasmiaiyi. ¹⁴ Túrasha Jesus chicharuk “Ámeka nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkama núnismek susata. Nuġġá ashí shuar ame péñker ajasmarmín nekaawartatui” tímiayi.

¹⁵ Tura Jesusa túramurj ti etsernamiaiyi. Túmakui untsurj aents anturkataj tusar káutkarmiaiyi. Tura ni sunġkurincha tsuámartaj tusar káutiarmiaiyi. ¹⁶ Núnisan Jesuska aents atsuiniamunam we ni Aparjín áujmiaiyi.

Emęarun Jesus tsuármiania nu

(Mateu 9.1-8; Márkus 2.1-12)

¹⁷ Chíkich tsawantaj Jesus unuiniak pujaj Pariséu aents tura Israer-shuara jintinniurjsha Kariréa péprunmayasha, Jutía péprunmayasha tura Jerusarénnumiasha káunkarmia nu antúu pujuarmiaiyi. Jaa tsuártin-ian Yusa kakarmarjín takakuyayi Jesus. ¹⁸ Nuiñkia emęarun tampumpua kuaru shuar itiararmiaiyi. Jesus pujamunam inít awayattsar wakeriarmiaiyi. ¹⁹ Tura shuar ti untsurj piaku asamta wayamnia atsumiaiyi. Túmaitkui yakiiñj wear jeęan urakar, aents kaę ajas mat-satmanum Jesus pujamunam emęarun tampunam nená itiararmiaiyi. ²⁰ Nin itiarmania nu, Jesus Yusa kakarmarjín takakui, tú enentáimtamun Jesus nekáa emęarun tímiayi “Ame tunaarum tsanġkuramuitme.”

²¹ Nuiñkia Israer-shuara jintinniurjsha, Pariséusha ni enentáin enentáimsar “Ķjusha yait Yúsa náarjín yajauch awajtin? Warí, aya Yúsak tunaan tsanġkurachminkiait” tu enentáimsarmiaiyi.

²² Tura Jesus ni enentáimsamurjín nekáa tímiayi “ĶUrukamtaí tú enentáimprarum átum? ²³ Nuiñkia Ķwarí imiá yúpichuchit, tsuártiniak, ni tunaari tsanġkuratniuk? ²⁴ Wats, Aents Ajasu tutai Wisha tunaan tsanġkuratniun Yusa kakarmarjín takakjai. Jujaj nekaatarum tusan wats iturchat tárugna nuna túrat-tajai.” Nuyá emęarun chicharuk tímiayi “Amesha wajakim, tampuram achikiam ame jeęemjín wetá.”

²⁵ Nú chichamaik emęaru niisha íimiainiamunmanġ tampurjín achik wajakí ni jeęan Yúsan wararki wémiayi. ²⁶ Túmakui ashí shuar ti enentáimprar Yusa náarjín shir awajsarmiaiyi. Tura ashamainiak “aentsti tujinkiamu yamáí wáinkiaij” tiarmiaiyi.

Riwin Jesus untsukmiania nu

(Mateu 9.9-13; Márkus 2.13-17)

²⁷ Ukunam Jesus wekas akupniu kuítrjín-juu, naari Ri-wí, ni chíkich naari Mateu, akupin akitiai jeęanam pujan wáinkiamiaiyi. Wáiniak “nemartusta” tímiayi. ²⁸ Tutai Ri-wí wajakí takakmarjínkia ikuak Jesusan nemarsamiaiyi.

²⁹ Nuyá ukunam Ri-wí namperan Jesusan najatamiaiyi. Tura untsurj akupniu kuítrjín-juu tura chíkich shuarsha káunkar misanam pujuarmiaiyi. ³⁰ Tura Pariséusha Israer-shuara jintinniurjsha Jesusan tsanumpruiniak Jesusa unuiniamurjín tiarmiaiyi “ĶMaaj, urukamtaí atumsha akupniu kuítrjín-juu ainia núĶajsha tura chí-kich yajauch shuarĶajsha iruntrarum yurumprum?”

³¹ Tutai Jesus áimkiamiaiyi “Shuar jaachu péñker aini-ana nu Ķtsuákratniun atsumainiawak? Antsu jaa ainia nu tsuákratniun atsumainiawai. ³² “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

Yurumtsuk Yus áujsatniun Jesusan aniasarmiania nu

(Mateu 9.14-17; Márkus 2.18-22)

³³ Nuyá Jesusan aniak tiarmiaiyi “Juañka unuiniamurjsha, Pariséu unuiniamurjsha yurumtsuk Yúsan áujainiatsuk. Tura ame unuiniamurmeka Ķurukamtaí ijiarma Yúsan áujainiatsu?” tiarmiaiyi.

³⁴ Tutai Jesus tímiayi “Nuatma nampernum, Ķipiaamu ainia nu ijiarmamniakait, yamáí-nuatu pujaj? ³⁵ Atsá. Wats Wisha ukunam junaktiatjai; nuiñkia ijiarmatin átatui” tímiayi.

³⁶ Tura junasha nujaj métek-taku unuiniamiaiyi: “ĶYamaram pushí tsupikiar nujaj arut pushiniam anujtukminkiait? Nu túramka yamaram pushí yajauch ajasaintui; túrasha shiir anujkamu arut pushijjaj mai metek yamaram wáinkiachminiaiti. ³⁷ Núnisanġ nijiamanch yamáí nawamu nuap najanam arutnum yaraachminiaiti. Túramka nijiamanch karíak ijiakratniuiti; túmak nijiamchisha nuap najanamusha mai metek meñkainiawai. ³⁸ Tuma asamtaí nijiamanch yamáí nawamu yamaram nuap najanamunam yaraatniuiti. Nu túramka mai metek péñker átiniaiti. ³⁹ Yaunchu nawamu úmana nuka yamarman nakitrattui. “Yaunchu nawamu imiá peñkeraiti” tiártatui” tímiayi Jesus.

Ayampratin tsawantaj trikiu neren achikiarmiania nu

(Mateu 12.1-8; Márkus 2.23-28)

6 Ayampratin tsawantaj Jesussha unuiniamurjijaj araamunam wekasar, unuiniamurjsha trikiu neren majurkutak wekainiarmiaiyi; tura tishisar neren yuawarmiaiyi. ² Nuna túruiniakui Pariséu tiarmiaiyi “Maaj, atumsha ayampratin tsawantaj takaschatniua nuj, Ķurukamtaí takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Tawit Yusa Jeęan wayá, Yus iniaktusma tantan yuámiaiyi; tura nemarniuncha ajamsamiaiyi. Tura nu tantancha aya Israer-shuara Pátrirj yúatin ármiaiyi. Tuma aiġ Tawitcha yajauchin túrutsuk achikmi-ayi, tímiayi. ⁵ Wisha Aents Ajasuitkiun ayampratin tsawantan Nérenniurjntjai” tímiayi Jesus.

Shuara uweje jakaan Jesus tsuármiania nu

(Mateu 12.9-14; Márkus 3.1-6)

⁶ Chíkich ayampratin tsawantaj Israer-shuar iruntai jëanam Jesus wayá unuiniartasa nan kamamiayi. Nuj shuar uweje untsuurja nu jakaa pujumiayi. ⁷ Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi. ⁸ Túrasha Jesuska ni enentáimmiarjin nekariarmiayi. Túmayat uweje jakaan chicharuk “Juí ajapén wajas-ta” tímiayi. Tutai áishman ajapén wajasmiayi. ⁹ Nuinkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujaj ztuá péñkerait? zUwemtikratin, máatniujajisha tuá péñkerait?” tímiayi. ¹⁰ Nuyá téntakarmia nuna iis áishman kan tímiayi “Uwejem takuitia.” Áishman sha uwejen takuimtai nú chichamaik péñker ajasmiayi. ¹¹ Tura chíkichkia ti kajerarmiai. Túrawar “Jesus warí itiurkamniakit” tusar aniniaisarmiayi.

Tuse unuiniamun Jesus anaikiamiania nu

(Mateu 10.1-4; Márkus 3.13-19)

¹² Nuyá Jesus Yúsan áusataj tusa náinnium wakamiayi. Tura nu kashi Yúsan au-aujkua tsawarmiayi. ¹³ Tsawarmatai unuiniamurjin ikiankar tuse anaikiamiai. “Winia akatramuruitrume” tímiayi. ¹⁴ Ju ármiai: Emka, Semuñ chíkich naarí Pítiur apujtusmia nu; tura nuyá ni yachí Antres, Jakupusha, Juansha, Jiripisha, Parturumísha, ¹⁵ Mateusha, Tumassha, Arpeu uchirí Jakupusha, Ásump Semuñsha, ¹⁶ Jakupu yachí Jútassha, tura Jútas Iskariúti Jesusan ukunam surukmia nu. Nu tuse achikma ármiai.

Untsurí shuaran Jesus yáinkiamiania nu

(Mateu 4.23-25)

¹⁷ Niijajaj Jesus náinniumiã pakanam taawarmiayi. Nuj pujusarmiayi. Nujsa untsurí unuiniamurjsha, tura Jutía nuñkanmaya, tura Jerusaréñnumiã tura nayaantsanam ayamach Tiru, tura Setuñ péprunmaya ti untsurí aents antuktaitsar pujuarmiayi. Jesus tsuarati tusar káunkarmiayi. ¹⁸ Iwianchrukusha tsuámararmiayi. ¹⁹ Jesus tsuártinian tujinkiachu asamtai ashi shuar antiñtaj tusar wakeriarmiayi.

Náinnium Jesus etserkamu

(Mateu 5.1-12)

²⁰ Ni unuiniamurjin Jesus iis juna tímiayi: “Yusan atsumajai” tárugna nu, Yus akupeamunam páchitkai-trume; tuma asamtai warasminiaittrume.’

²¹ ‘Yamáí tsukamarmena nu ukunam ejemartatrume. Tuma asamtai warasminiaittrume. Yamái úutrumna nu, ukunmanka wishirtatrume. Tuma asamtai warasminiaittrume.’

²² ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkrarmataisha warasminiaittrume.’

²³ ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsnan etserniun nútiksaran yajauch awajsacharmakia.’

²⁴ ‘Tura kuítrinniutiram atumsha atumí waratairí aya yamaik waintrume. Ukunmanka waraschattarme.’

²⁵ ‘Atsumatsjai, tu enentáimprumna nu, ukunmanka atsumattarme. Nuinkia waraschattarme. Yamái wishíarmena nu, ukunmanka wáitiakrum úuttiatrume. Nuinkia waraschattarme.’

²⁶ ‘Ashí aents atumin shiir awajtamkurmin aneartarum. Nujaj waraschatniuitrume. Warí nuna uuntri ántar-yusnan etserin armia nuna nútiksaran yaunchu shiir awajsarmiayi.’

Ii nemasri aneatniun Jesus unuiniamiayi

(Mateu 5.38-48; 7.12)

²⁷ ‘Winia anturtarmena nuna juna tájarme: Ame nemasrum aneata, nakitramainia nusha shiir awajsata; ²⁸ yajauch chichartamainia nusha shiir enentáimtusarta; katsekramainia nusha Yus áujtusarta. ²⁹ Ame yapimin ijiutmamtai áatú yapirui sha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata. ³⁰ Seatmana nu susata, tura áminiun jurutramainiakuisha ataksha awanturkitia tiip. ³¹ Chíkich winia túrutati tusam wak-eramna nútiksamek chíkichcha túrata.’

³² ‘Iista, aya atumin anenmainia nuke aneakmesha, z nusha warí péñkera túrarum? Yajauch shuarsha nuna túrin ániawai. ³³ Tura atumniasha péñker awajta-mainia nuke péñker awajkurmesha z nusha warí péñkera túrarum? Yajauch shuarsha nuna túrin ániawai. ³⁴ Awanturkimniaiti tu enentáimtarum nuke iki-akrumsha z nusha warí péñkera túrarum? Yajauch shuar nuamtak yajauch shuarajaj awanturkimniaiti tu enentáimsar ikianainiawai. ³⁵ Tura atumsha nemasrum aneatniuitrume, tura péñker túratniuitrume, tura awanturkittiwai tu enentáimtsuk ikiastiniaittrume. Túrakrumñkia Uunt Yus péñker akirmaktatrume; tura ni uchiríñtaj tu iniakmastatrume. Yuska, “yumiñsajme” ticha nunasha tura yajauch shuarnasha shiir awajeawai. ³⁶ ‘Ii Aparí waitnentrarniua nútiksarmek atumsha waitnentratarum.’

Chikicha túramurí ti enentáimtusairap

(Mateu 7.1-5)

³⁷ ‘Chikicha túramurí ti enentáimtusairap. Núnisañ Yuska atumí tunaarín iirtamsashtatui. Chikicha tunaarín “nuke asutniatniuiti” tiirap. Núnisañ Yus atumin sumantikramashtatrume. Tsan kurnairatarum. Núnisañ Yus tsan kurtamprattawai. ³⁸ Chíkichcha susata. Núnisañ Yus atumin surasattarme. Niisha péñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksaj atumniasha túrutmattarme.’

³⁹ Tura nuyasha juna métek-taku chichaman ujakarmiayi: “Jij kusurusha zitiurak chíkich kusuruncha jukimniait. Mai metek wãnam iniaashtatuak? ⁴⁰ Un-

uiniamua nu unuiniana nuna nankaamas áchatniuiti. Túrasha niisha ti unuimiatar unuiniana nujaj métek nekaamniaiti.'

⁴¹ '¿Itiurtsuk atumi jjiin numi enketna auk íitskesha atumí yachí jjiin tsuat enketusha iyarum? ⁴² Ame jjiimiiin numi tuke enketasha ¿itiurtsuk ame yatsumi jjiya tsuátan jurustajme tame? ¿Ántrairume! Emka ame jjiimiiin numi enketna nu jusata. Nuiñkia paant wáinkiatame yatsumi jjiin tsuat enketna nu jurustin.'

Nerejaj numi nekaatainti

(Mateu 7.17-20; 12.34-35)

⁴³ 'Pénker numi yajauchin nereatsui; tura yajauch numi péñkeran nereatsui. ⁴⁴ Numisha ni neren nékanui. Tsachikniumiasha kushiñkiap júukchamniaiti. Tura naranmayá shuinia júukchamniaiti. ⁴⁵ Núnisañ péñker shuar ni enentáj péñker asamtai péñkeran chichaawai; tura yajauch shuar, enentáj yajauch asamtai yajauchin chichaawai. Páantchakait. Enentáin pimiutkamu ana nuyañ ni wenejaj chichaawai.'

Jimiará jea ukurtin

(Mateu 7.24-27)

⁴⁶ 'Wi tájana nu túrachiatrumsha ¿urukamtai Winia, Uunta, túrutrum? ⁴⁷ Shuar winia chichamprun ántuinia nu jea jeammajaj méteketete. Winia anturtuk umiana nu jujaj méteketete: ⁴⁸ Shuar jeañ jeamuk emka init taur kayanam ukurmai. Tura yumi ti yutuk, entsa nujanakrua tukummaiat pukukachmai kayanam ukuamu asa. ⁴⁹ Antsu Winia anturtukiat umiatsna nuka jujaj méteketete: Shuar jeañ jeamuk aya naikminiam jeammai. Tura entsa nujanakrua tukumpram nu jeaka pukukamai. Tura mash sántramai." Tu unuiniamiyai Jesus.

Suntara yáinrjn Jesus tsuármiania nu

(Mateu 8.5-13)

7 Jesus áentsun unuiniasua amik Kapernáum péprunam wémiyai. ² Nui Rúmanmayá suntara kapitánrjn pujumiyai. Nu kapitánrjn takarniurj, ti aneamurj, jakamnia jaamiyai. ³ Tura Jesusan pachis áujmataanian antuk, ame shuarum Jesusan itartiti tura winia takarniun tsuárturti tusa Israer-shuara úunrjn akupkamiyai. ⁴ Niisha Jesusan weriar, umirtukat tusa ti seainiak tiarmiayi "Ju kapitán nekas yáinrjn péñkeraiti. ⁵ Niisha yajayá apachitiat in shiir enentáimturmajai. Tura iruntai jeañ jeamtinniasha niñki chicharkaiti, tura yayawai."

⁶ Nuyá Jesus niijaj wémiyai. Tura ni jeen jeastatuk jatemsamtaí kapitáncha ni amikrjn akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi "Uuntá, ánttram wayataj tu enentáimsaip. Ame ti nankaamaku asam winia jearu wayachminiaitme. ⁷ Tuma asakmin imia wiki Amiin jeatniun arantukjame. Ayatik "pénker ajastí" tákumin winia takarniusha péñker ajatrustatui. ⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi "wetá" takui wéawai. Tura chikich-

nasha "winitiá" tutai winiawai. Tura winia takartinian "ju túratá" tutai umíawai." Tu tímiyai.

⁹ Jesus nuna antuk ti enentáimias ni nemarainian tímiyai "Nekas tájarne Israer-shuar Yúsan tímiatrus enentáimtinian wáinchaitjai."

¹⁰ Tura kapitánrjn akatramurj jeá waketkiar, takarniurj péñker ajasun wáinkiarimiayi.

Wajé uchirjn Jesus iniantkimiania nu

¹¹ Nuyá ukunam chikich pepru Naín tutainium ni unuiniamurjiaí tura chikich untsurj aentsaj Jesus wémiyai. ¹² Tura péprunam nuntumas jakaan iwiansatai tusar juínian wáinkiamiyai. Jakáa nukurj wájeyayi, tura uchirj jakamia núchikiyai. Tura ti untsurj nu peprunmayá nin nemarsarmiayi. ¹³ Jesus nu wajen wáiniak tura waitnentar "úutip" tímiyai.

¹⁴ Nuiñkia Jesus jakaa enkerman tarunt antiñmiyai; nuna juíniasha wajasarmiayi. Nuiñkia Jesus jakaan chicharuk "Umpa nantaktia, tájame" tímiyai.

¹⁵ Tutai niisha nantaki pujus chichaamiyai. Tura Jesus ni nukurjn "Jujú uchiram" tímiyai.

¹⁶ Tura matsamiarmia nu, nuna wáinkiar ashankarmiayi. Tura Yusa náarjn shiir awajarmiayi. Tura chichainiak, "Yúsnan etserniuchukait Niisha. Ataksha Yúsnan etserin uunt ana nu tarutramji" tiarmiayi. Tura "Israer-shuarta Niiniu ájinia nuna yáinmaktai tusa Yus tarutramji" tiarmiayi.

¹⁷ Tura ashí Jutía nunkanmayásha tura ni írutkamu nunka ármia nuyásha Jesus túramia nuna nekaawarmiayi.

Imiakratin Juan sepunam pujak ni amikrjn akatar Jesusan akuptukarmiania nu

(Mateu 11.2-19)

¹⁸ Juan ni írutkamurj ujakam Jesus túramun nekaamiyai. Nekáa ni írutkamurjn jímiaran untsukmiyai. ¹⁹ Tura Jesusaj akupkarmiayi. "Atumsha Jesus aniastrarum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa iki-uutarum' tímiyai.

²⁰ Tutai niisha Jesusan weri jeariar tiarmiayi "Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji" tiarmiayi.

²¹ Wats, nii jeawarmia nui Jesus untsurj jaan tsuár-tasa pujurmiyai. Iwianchrukuncha iwianchrjn jjiirki akupkatasa pujurmiyai. Tura kusuruncha íimtikmiyai.

²² Tuma asa Jesus akatramun juna tímiyai: "Waketkirum ashí átum antukurmena nusha, wáinkiarumna nusha ujaktarum. Kusurusha wáin-mainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchanumsha uwempratin chicham ujakmaiti. Juan nu ujaktarum. ²³ Yawetsuk Winia tuke shiir enentáimturna nú shuar shiir átatui" tímiyai Jesus.

²⁴ Waketkiarmatai Jesus Juánkan pachis áujmatman antuk shuar matsamarmia nui juna tímiyai: "Shuar at-

samunmasha ḡwarí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti. ²⁵ Nuiḡkia ḡwarí werimiarum. Shuar péḡker iwiarmampra íistai tusarmek wémarum? Warí, péḡker iwiarmampraka uunt akupniu jeen pujuiniat-suk. ²⁶ Nuiḡkia ḡwarí werimiarum. Yúsnan etserniuk werimiarum? Maa, nú naḡkaamas wáinkiarne.

²⁷ Yaunchu Yus-Chichamnum ju áarmaiti:

“Winia akatramurun amiḡni emka akupeajai ame jin-timin iwiarat tusan.”

Juan nu akatramuiti. ²⁸ Nekasan tájarme, Yúsnan et-serin imiakratin Juanḡai naḡkaamas uunt atsuwiti. Tú-maitiat Yus akupeamunam páchinia nu shuarka nekas imianchaitiat, Juanḡai naḡkaamas átatui” tímiayi.

²⁹ Peḡké shuarsha, kuítian-juusha, Juan imiaimujai imi-anirmia nu, Jesus timian antukar Yusa náarḡn shiir awajarsarmiyai. ³⁰ Túrasha Pariséusha Israer-shuara jintinniurḡsha Yus yáinḡtaj támaítaiat Juan imiaamujai imiancha ásar nakitrarmiyai. ³¹ Nuiḡkia Uunt Jesus tímiayi “Yamaiḡ áentstiram, wariḡḡaiḡ métek árum nuna paant títiatjarne. ³² Uchijḡaiḡ métek árum. Ni aijḡaiḡ iruntrar nakurustaj tukamá tuíniawai “Námpera áinis nakurustaitsar peem umpuarḡi, túrasha jantsemáchurme. Nuyá iwiarsatniua áinis nakurustait-sar íwiareakur kantamḡai kantamáaji, túrasha átum úutcharme.” Tu tuíniawai. ³³ Atumsha núnisaitrume. Kame Juan núkap yurumtsuk úmutsuk wekaimiyai. Tú-makui átumka “iwianchrukuiti” tímiarme. ³⁴ Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume. ³⁵ Wats, nekas neka ainia nu, Yusa nekatairḡn iniakmainiawai.” Tu tímiayi.

Pariséu Semuḡ náartin Jesusan ni jeen ipiaamiania nu

³⁶ “Winí yurumáitia” tusa Pariséu Jesusan ipiaamiayi. Tutai Jesus ni jeen werí misanam pujusmiayi.

³⁷ Nuiḡkia nu péprunmayḡ yajauch nuwḡ, Jesus Pariséu jeen yurumáttsa weyi táman antuk, kayá mutinium kunḡuin asuiti áimkiamun takukí jearmiayi.

³⁸ Tura úutki Jesusa nawen pujuras neḡajḡiḡaiḡ niḡjarmiyai. Tura intiashijḡaiḡ japirmiayi; nuyá nawenam mukuta kunḡuinian ni nawen ukatramiyai. ³⁹ Pariséu Jesusan ipiaamia nu, nuna wáiniak juḡna enentáimsamiayi: “Ju nekas Yúsnan etserniuitkiunḡa, ju yajauch nuwḡ án-tiana nuna nekaawainti. Warí, niisha netse nuwḡchukait” tu enentáimsamiayi.

⁴⁰ Nuiḡkia Jesus Pariséun chicharuk tímiayi “Semuḡká, ámin titiaḡ tusan wakerajai.”

Tutai Pariséu chichaak “Turuttiá, Uuntá” tímiayi.

⁴¹ Tutai Jesus tímiayi “Kuítian ikiamniun jimiará áish-manḡ tumashmakarmiyai. Chíkich kiniantus (500) tura chíkichka aya seḡkuentak tumashmakmiayi. ⁴² Akiktin tsawant jeamtai máí-metek takakcha ármiyai. Tuma asamḡai kuítian ikiamin ni tumashrḡn máí-metek asakátrarmiyai. Wats, turuttiá ḡtú áishmanḡa ikiamni-un nekas aneamia?” tímiayi.

⁴³ Tutai Semuḡ tímiayi “Enta, núkap tumashrḡn tsanḡkuramia nu.”

⁴⁴ Tutai Jesus tímiayi “Nekas tame.” Nuiḡkia nu nuwḡn iis Semuḡkan tímiayi “Ju nuwḡ wáintsumek. Ame jeemḡin wayamḡtai winia nawer niḡjartin entsa sur-uschamame; antsu ju nuwḡka nawerun neajḡiḡaiḡ ni-jiarturai, tura intiashijḡaiḡ japirturai. ⁴⁵ Mukutam áuj-tuschamame; antsu niḡkia nawerun tuke mukutui.

⁴⁶ Winia muukaruḡsha asuiti ikiurtuschamame; antsu niḡkia naweruḡ kunḡuin asuitin ukatrurai. ⁴⁷ Nu tuma asamḡai tájame, niisha Winia ti anentu asamḡai ni tunaarḡ untsurḡ ana nu tsanḡkuramuiti. Tura tunaar ishichik awai tau tsanḡkuramu ana nuka ishichik aneḡkratniuiti.” Tu tímiayi Jesus.

⁴⁸ Nuiḡkia nuwḡn tímiayi “Ame tunaarum tsanḡkuramuitme.”

⁴⁹ Tura chíkich ipiaamu Jesusḡai misanam pujuarmiania nu “ḡJusha ya asaḡ tunaancha tsanḡkurea?” nuamtak tunainiarmiyai.

⁵⁰ Tura Jesus nuwḡn chicharuk ““Uwemtikiartiniaiti” tu enentáimturú asam uwempraitme. Shiir wetá” tímiayi.

Nuwḡ Jesusan yáinḡkarmiania nu

8 Nuyá untsurḡ péprunam Jesus wekaráktak Yus akupeana nuna shiir chichaman etserkini wekaimiyai. Tura ni unuiniamurḡ tuse ármia nu nemarsarmiyai. ² Yaunchu untsurḡ nuwḡ jaa armia nuna tura iwianchruku armia nunasha Jesus tsuáarmiyai. Nu nuwḡsha Nin nemarsarmiyai. Nusha ju ármiyai: Maktaranmayḡ Marí, siati íwianch jḡrkimiuyḡnia nusha ³ tura uunt akupin Erutisa takarniurḡ Chusa nuwé Juan-cha, tura Susancha; tura chíkich untsurḡ ni takakmarḡn súsar Jesusan yáinḡkarmiyai.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

⁴ Untsurḡ péprunmayḡ Jesusan iistai tusar jḡinḡkarmiyai. Tura untsurḡ káunkarmatai ju métek-taku chichaman Jesus unuiniamiayi:

⁵ “Atsaamin atsaamprataḡ tusa jḡinḡkimiayi. Atsaamki wesa jinkiáí jintiá iniaararmiyai. Túrunamḡai weenak najakarmiyai. Nuyá chinḡki tariar yuawarmiyai. ⁶ Chíkich jinkiáí kaya írunmanum iniaararmiyai. Nu jinkiáí tsapainiar, wárik nantu sukuam káarmiyai. ⁷ Chíkich jinkiáí janḡkiam iniaararmiyai. Tura janḡkisha jinkiáísha máí-metek tsapainiar, janḡki kanḡkar ajakramiyai. ⁸ Tura chíkich jinkiáísha péḡker nuḡkanam iniaararmiyai. Tura tsapainiar, péḡker nerekar chíkichkia siansha (100) nerekararmiyai.” Tuasua amik kakantar chichaak Jesus tímiayi “Kuishim ákuinḡkia antuktarum.”

(Mateu 13.10-17; Márkus 4.10-12)

⁹ Nuyá ni unuiniamurḡ Jesusan aniak tiarmiyai “Ju métek-taku chicham tamena nu ḡwarintkumeḡa tame?”

¹⁰ Tutai Jesus tímiayi “Atumnia Yus ni akuptairḡn nekaachma ana nuna nekamtikramprume. Tura chikichnaka, wáiniainiyat kusurua núnin árti tusan, tura

ántuiniayat nekaacharat tusan aya métek-taku chichamjaj jintintiatjai," tímiayi.

Atsaampramu chichaman Jesus paant jintintiamiania nu

(Mateu 13.18-23; Márkus 4.13-20)

¹¹ Wats, ju nekaatarum, tímiayi. Jinkiáisha Yusa chichamen nakumui. ¹² Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa iwianch wárik taa nu chichaman ni enentáiyaj júawai. ¹³ Kayanam iniaaru tana nuka shuar antuk waras umiana nuna nakumui. Tura nú shuar kankepe atsá asamtai, ishichik tsawantiniq umikar iturchatan wáinkiar wárik kanainiawai. ¹⁴ Jankiniam iniaaru tana nuka tuke enentáijijaj umiat-sna nuna nakumui. Nu shuarsha ántuiniawai, túrasha ni wakeramurijijaj wekainiawai. Ju nuñkanman ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujaj kan karma ásar nerektinian tujintiainiawai. ¹⁵ Tura jinkiái péñker nuñkanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.'

Ashí iwiniakma átatui

(Márkus 4.21-25)

¹⁶ '¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yakí ekentsatniuiti. ¹⁷ Núnisan ashí nekaachma ana nu paant átatui. Tura úukma ana nu nekanattawai. Tura iwiniakma átatui. ¹⁸ Tuma asamtai anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiwai." Tu timiayi.

Jesusa nukurí, Jesusa yachi

(Mateu 12.46-50; Márkus 3.31-35)

¹⁹ Jesus pujamunam nukurí ni yachísha tariarmiayi. ²⁰ Turamtaí Jesusan tiarmiayi "Ame nukusha yatsumsha aq wajasar untsurmainiawai." ²¹ Tutai Jesus tímiayi "Ee, nukuruiti, yatsuruiti, tura Yus tana nuna antuk umiana nusha winia nukuruiti, winia yatsuruiti."

Nasesha entsasha Jesusan umirkarmiania nu

(Mateu 8.23-27; Márkus 4.35-41)

²² Chíkich tsawantai Jesus ni unuiniamurijijaj kanunam enkemprar "Antumian amaini wetai" tímiayi. ²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi. ²⁴ Túram nuñkia Jesusan ishintiainiak "Uuntá, iisha entsá wayajji" tiarmiayi. Nuñkia Jesus nantaki nasencha entsanacha chicharkamiayi. Nú chichamaik nasesha menkakamiayi, tura entsasha miaaku ajasmiayi. ²⁵ Nuyá ni unuiniamurijn chicharuk "¿Urukamtaí Winia enentáimtursachuram?" tímiayi.

Tura niisha ashamainiak, ti enentáimprar "¿Ausha warí áishmankait? Nasesha entsasha Nii chicharkam umirainiatsuk" tiarmiayi.

Jatara nuñkanam Jesus iwianchrukun tsuármiania nu

(Mateu 8.28-34; Márkus 5.1-20)

²⁶ Kariréa nuñka amaini Jatara nuñkanam jeawarmiayi. ²⁷ Kanunmayá Jesus jiinkimtai nu péprunmayá áishman Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiansamunam pujuyayi. ²⁸ Íwianchkia nu aishman kan ti kakaram nupet wémiayi. Tura emetatai tusar uwejencha nawencha jirujaj jinkiá wearmiayi. Túrasha tujinkiarmiayi. Niisha jiruncha tsurí wémiayi. Tura iwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk "¿Urukamtaí winiisha tarutnium, Uunt Nan kaamaku Yusa Uchirí Jesusa? Winia wáitkiarsaip tusan seajme" tímiayi. Íwianch niin pujurun Jesus jiki akupeam tu tímiayi. ³⁰ Jesus nu áishman kan anias "¿yáitiam?" tímiayi.

Tútai nii chichaak "Wikia Untsurintjai" tímiayi. Untsurí iwianch niin pujurma asa nuna tímiayi. ³¹ "In uunt wáanam ii jiinkimijaj nuñ akuptukam amutkaip" iwianch seawarmiayi Jesusan. ³² Nuí ishichik arantach náinni-um untsurí kuchi shushunmak yujaarmiayi. Tura iwianch chichainiak, "Antsu kuchiniam wayatin tsankatrukta" tiarmiayi.

Tutai Jesuska "Ayu, wetarum" tímiayi.

³³ Nuna takui iwianch áishman numia jinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

³⁴ Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi. ³⁵ Etserkarmatai, iyutai tusar untsurí shuar wearmiayi. Tura Jesus pujamunam jeawar, iwianch jini-tiukiarmia nú áishman kan péñker ajas pushí entsar Jesusa nawen pujan wáinkiar miayi. Tura ashamkarmiayi. ³⁶ Íwianchruku áishman tsuármian wáinkiar miia nu yama taan ujakarmiayi. ³⁷ Tura ti ashamainiak Jatara nuñkanmayá aents ashí Jesusan "Wetá" tiarmiayi. Tutai Jesus kanunam enkemar wémiayi. ³⁸ Íwianch jini-tiukiarmia nú áishman Jesusan, wisha ame wéamunam winitiaj tusa seamiayi. Tutai Jesus nuna suritiak, ³⁹ "Antsu ame jeemiin weme Yus ámin túrutma nu ashí etserkata" tímiayi. Tutai áishman we Jesus nin túramia nuna ashí nu péprunam etserkamiayi.

Jairu nawantrincha tura chíkich nuwancha Jesus tsuármiania nu

(Mateu 9.18-26; Márkus 5.21-43)

⁴⁰ Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áujarmiayi. ⁴¹ Tumaj Israer-shuara iruntai jeá uuntri Jairu naartin támiaiyi. Nii taa, Jesusa nawen tikishmatar "Winia jearuñ waitneasam winítritiá"

tímiayi. ⁴² Ni nawantrí chikichik amia nu, tuse uwí takaku, jakatasa pujakuí nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaę ajas weena ásar chanu-awarmiayi.

⁴³ Nuí nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuísha ni kuítrín ashí ajapaitiat tsuámarchauyayi. ⁴⁴ Jesusa úkuriiní winiá weantuk ni pushirí nánkatramurín antiñmiayi. Nuna tura nú chichamaik numpé ajapeamuncha péñker ajasmiai. ⁴⁵ Nuiñkia Jesus chichaak “¿Ya Winia antintkia?” tímiayi.

Tura “peñkesha antiñchajme” tuíniakuí Pítiur ni tsani-akmaríjiaí Jesusan chicharuk “Uuntá, ti untsurí antiñmasha, tura ti untsurí chanunmainiasha žitiura “ya Winia antintkia” tame?” tiarmiayi.

⁴⁶ Tútaisha Jesus tímiayi “Nekas Winia antintkiayi. Winia kakarmarjái tsuárajna nuna nékajai” tímiayi.

⁴⁷ Nuyá nu nuwásha, nekarayapi tusa kurañki taa Jesusa nawen tikishmatramiayi. Tura ashí aents ántuini- amunam urukaku antiñkia tura itiura wárik péñker ajasmia nuna ujakmiayi.

⁴⁸ Nuiñkia Jesus nuwan tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujai uunt Jairu jeę, ti untsurí antiñmasha, turenia taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

⁵¹ Jeá jeawar Jesussha Niiijaí untsurí wayatniun surimkiayi. Antsu aya Pítrun, Jakupun, Juáñnasha tura nuwáchi aparín nukuríncha wayatniun tsanatkamiayi. ⁵² Ashí úutainiak atakka wáinkiashtatjapi tu úutiarmiayi. Túmainiakui Jesus peñké jakaan nékayat tímiayi “Úutirpa. Nuwáchkia jákachai, antsu kanarai” tímiayi.

⁵³ Jakaancha urukaku ta tusar wishikrarmiayi. ⁵⁴ Nuyá Jesus nuwáchi uwején achik, kákantar chicharuk “Nawantru nantaktia” tímiayi. ⁵⁵ Túram niisha jakayat atak iwiaaku ajasmiai. Tura nú chichamaik nantakmiayi; túrunamtai Jesus “ayuratarum” tímiayi. ⁵⁶ Nuwáchi aparí nukurísha ti enentáimprarmiayi. Tura Jesus “Ju túramu peñké etserkairap” tímiayi.

Jesus ni unuiniamurín etserkati tusa akupkarmiania nu
(Mateu 10.5-15; Márkus 6.7-13)

9 Ni tuse unuiniamurín ikiaanank ni chichamejái iwianchrukun enentáiyān iwianchin jiiirki akupkatniun tura suñkurjái jaa tsuártinnisha ni kakarmarín súsarmiayi. ² “Yus akupin ajastin ujaktarum, tura jaa tsuártarum” tinia akupkarmiayi Jesus. ³ Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha peñké jukiirap. Aya chikichík pushí jukitiarum. ⁴ Nánkamas jeanam jearum wayarmeka nuiñ pujustarum. Nuiñ pujusrumek chíkich péprunam wéakrum jíinkitiarum, tímiayi. ⁵ Tura

atumin awaintiamatniun nakitiana nú péprunmaya jíinkitiarum. Awaintiamachma paant ati tusarum nu túratarum” tímiayi.

⁶ Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

Erutis “Jesusan ístaj” tímiania nu
(Mateu 14.1-12; Márkus 6.14-29)

⁷ Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asamtai Erutis peñké nekaachmiayi.

⁹ Tura tímiayi “Wiki, Juanka muuke tsupirkatarum, tíchamkaj. Tuma aisha, žju shuar, ni túramurí ashí shuar chichainia nusha yátsukait?” Tu enentáimiuk “iistaj” tímiayi.

Señku mir áishmanġkan Jesus ayuramiania nu
(Mateu 14.13-21; Márkus 6.30-44; Juan 6.1-14)

¹⁰ Atak Jesusa akatramurí waketki taar ni túramurín Jesusan ujakarmiayi. Nuiñkia aents atsamunam Petsaitia péprunam tíjiyuch weak nuí júkiarmiayi. ¹¹ Tura peñké shuar nuna nekaawar nemariarmiayi. Túram Jesus nin shiir áujsamiai. Tura Yusa akuptairí pachis unuiniamiayi. Tura jaa armia nuna tsuáarmiai.

¹² Tura kíakui, tuse unuiniamu Jesusan wériar tiarmiayi “Uuntá, shuar akupkachminiashit. Tíjiyuch péprunmasha, shúarnumkesha wear ni yurumátniurín sumarmakarti, tura kanartintrín wáinkarti. Juí pujajnia juíñkia peñké atsawai” tiarmiayi.

¹³ Tutai Jesus tímiayi “Atumsha ayuratarum.” Tutai chichainiak “Íisha aya seņku tanta tura namaksha jímiarchik takakji. Ju shuar ayuratin sumaktai tusar wétinaitji” tiarmiayi.

¹⁴ Áishmanġsha ti untsurí seņku mir (5000) jeeá ámiayi. Tura Jesus ni unuiniamurín chicharainak “seņkuenta seņkuenta kanaarum anġkant anġkant pujustarum,” titiarum” tímiayi.

¹⁵ Túrawarmatai ashí pujusarmiayi. ¹⁶ Nuyá seņku tantan tura jimiará namaknasha Jesus achik, yakiiní íimias Yúsán yumínsamiayi. Nuyá ajamsarat tusa ni unuiniamurín súsarmiayi. ¹⁷ Ashí yurumáwar ejemarmarmiayi. Tura ampirman tuse chanġkinnium áimkiarmiayi.

Jesus Yusa anaikiamurínti ujakma amia nu
(Mateu 16.13-19; Márkus 8.27-29)

¹⁸ Jesus ni unuiniamuríjiaí áentsnumiā kanaki pujuarmiayi. Jesus Yúsán ajsua umik ni unuiniamurín tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Ímiakratin Juáñkaiti” turamainiawai; chikichcha “Íríasaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

²⁰ Tutai “Tura atumsha zyáiti túrutrum?” tiarmiayi. Takui Pítiur chichaak “Ámeke Yusa Anaikiamurj, Kris-tu tutai, núitme” tímiayi.

²¹ Tutai Jesus “Peńké etserkairap” tímiayi.

Ni jákatniurjñ Jesus ujakmiania nu

(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti wait-satniuitjai. Wíi shuara uuntrj, tura ni Pátrirj únurjsha tura ni jintinniurjsha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

²³ Nuyá ashí áentsun chicharuk ju na tímiayi “Shuar Winia nekas nemartustajtsa wakerakka ni wakeramur-ijñkia iniaisati. Tuke tsawant ni krusrj yanaki nemar-tusti. ²⁴ Kame shuar ju nuńkanam aya peńker pujustaj tákuńka nu shuar uwemtsuk jakattawai. Antsu Winia anentu asa peńker pujustinniak enentáimtsuna nú shuarka nekas iwiaakman wáinkiatstawai. ²⁵ Iimiata, shuar ashí ju nuńkanam ana nuna súmakui tura jinium wétin ákuisha žitiurak peńker pujusat? ²⁶ Wi Aents Aja-suitjiana ju Winiasha tura winia chichampruncha shuar natsantraikuińkia, winia wincharujaj, winia Aparu win-charijjaj tura nayaimpinmayá peńker suntara winchar-ijjaj atak táakun shuar natsantrurmia nuna natsantrat-tajai Wi. ²⁷ Tura shuar Yusa akuptairjñ wáintsuk jákachartatna nu juj pujuiniawai. Nuna nekas tájarne” tímiayi.

Jesus nusháa iira ajasmiania nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsan áujstaj tusa Jesus náinnium wakamiayi. Pítiur, Jakupu, Juanjaj nemariarmiayi. ²⁹ Jesus auju pujus nusháa iira ajattsarmiayi. Ni pushirjsha ti puju jíitsumir ajasmiai. ³⁰ Nuńkia jimiará áishmań Niijjaj chicháa wajarmiayi. Nuka Muisáis Eríasjaj ármiayi. ³¹ Níincha wincha jíit-sumir téntakarmiayi. Tura Jesus wáitias Jerusaréńnum jákatniurjñ amia nuna áujmatarmiayi. ³² Pítiur ni tsani-akmarijjaj karj ti pujainiajñ iwíáa pujuarmiayi. Tuma ásar Jesusan tura jimiará áishmańjaj jíitsumir ajas wa-jainian wáinkiarimiayi. ³³ Tura nu áishmań Jesusan ikiu-ki weenaj Pítiur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisais-nasha, Eríasnasha áakmaktai” tímiayi. Tura Pítrusha enentáimtsuk nuna tímiayi. ³⁴ Nuna chicháa pujaj yu-rańkim tarj kaput amuawarmiayi. Tura yurańkim amuam ti ashamkarmiayi. ³⁵ Nuńkia yurańminmayá ju chichaamun antukarmiayi: “Juka winia aneamu Uchiruiti. Nii anturkatarum.” ³⁶ Chichaamun antasua amikar Jesus nińki wajan wáinkiarimiayi. Nuńkia takamtak pujuarmiayi. Tura wáinkiarimia nuna peńké etserkacharmiayi.

Uchi iwianchrukun Jesus tsuármiania nu

(Mateu 17.14-21; Márkus 9.14-29)

³⁷ Kashin tsawantaj, náinniumiá táarmatai, ti untsurj shuar Jesus ińkiuntai tusar wearimiayi. ³⁸ Nu shuarnu-

miá chikichik áishmań Jesusan untsuak tímiayi “Uuntá, waitneasam uchir íirtústá. Uchirsha júchikiiti.

³⁹ Íwianch achik núpeteam niisha náńkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas ańkant awa-josatniun nakitiawai. ⁴⁰ Túmakui ame unuiniaturmin iwianchin jíirtukit tusan seamjai. Túrasha tujinkiarmai” tímiayi.

⁴¹ Tutai Jesus tímiayi “Yus enentáimtsuchitirmin, tu-tupnik wekaichatirmin žurutmá tsawanttsuk atumjaj pujustaj. Urtumá katsuntratjatsuk? Uchiram juj itiatá” tímiayi.

⁴² Tura uchi winiaj íwianch nuńká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin peńker awajas ni aparjñ awańtuki susamiayi. ⁴³ Tura ashí pujuarmia nu ti enen-táimprar “Yuska imiá úuntchakait” tiarmiayi.

Jesus ni jákatniurjñ ataksha ujakmiania nu

(Mateu 17.22-23; Márkus 9.30-32)

Jesus túramun ti enentáimtu pujuiniaj Jesus ni unuiniaturjñ tímiayi ⁴⁴ “Wi tájarmena ju peńker antuk-tarum. Winia Aents Ajasu tútain surutkartatui.”

⁴⁵ Tura Nii timia nuna unuiniaturjñ nekaacharmiayi. Nekaawarajñ tusa paantcha awajsamuyayi. Tura war-ijñkit tusa anintrustinniasha arantukarmiayi.

“ŽYaki imiá nańkaamantuit?”

(Mateu 18.1-5; Márkus 9.33-37)

⁴⁶ Nuyá ni unuiniaturj, yaki imiá nańkaamaku ati tusa, nuamtak mai tunai ajarmiayi. ⁴⁷ Tura ni enen-táimtsamurjñ Jesus nekaamiayi. Tuma asa uchin achik ni pujamunam itiamiayi. ⁴⁸ Itiá tímiayi “Winia anentuk ju uchin shiir awajeana nuka Winiasha shiir awajtawai. Tura Winia shiir awajtana nuka Winia akuptana nunasha shiir awajeawai. Kame átum nańkaaman-tuchu tárurnu nu ti nekas nańkaamantuiti” tímiayi.

(Márkus 9.38-40)

⁴⁹ Nuyá Juan tímiayi “Uuntá, shuar ame náarmin pachis iwianchin jíiki akupea nu wáinkiamj. Tura in pá-chitkiachu asantai nuka suritkiamj.”

⁵⁰ Tutai Jesus tímiayi “Antsu suritkiarap. Shuar in nakitramachkuńka in páchitkiawai.”

Jesus Jakupun Juáńnasha chicharkarmiania nu

⁵¹ Jesus, nayaimpiniam waketkitniurj jeatemamtai, enentáimtia ímiatrusań Jerusaréńnum we-wémiayi. ⁵² Wesa, kanartinian wáinkiarat tusa akatar émtikiarmi-ayi. Tura niisha Samaria péprunam jeawarmiayi. ⁵³ Tu-ra Samarianmayá aentska, Jerusaréńnum wéenan nekaawaru ásar itiaatniun nakitramiayi. ⁵⁴ Jesusa unuiniaturjñ Jakupusha Juanjsha nuna nekaawar, Jesusan tiarmiayi “ŽUuntá, Erías yaunchu túramia núnisrik iisha túrat tusam wakeramek. Nayaimpinmayá ji tara Samarianmayá aentsun amukarti, titiatjik?”

⁵⁵ Tutai Jesus nin íisar kakantar chicharuk tímiayi “Atumsha atumi enentáj urukukit nuka nekamat-srume. ⁵⁶ Wi Aents Ajasu áentsun emesrattsan táchait-

jai. Antsu uwemtikratajtsan táwitjai" tímiayi. Nuyá chíkich péprunam wearmiayi.

Jesus nemarsatin
(Mateu 8.19-22)

⁵⁷ Jintia weenaj, chíkich áishman Jesusan chicharuk "Uuntá, tuj wétatam nujsa nemarsatjame" tímiayi.

⁵⁸ Tutai Jesus tímiayi "Kujanchmasha ni wágrin takaktsuk. Chínkisha pasunken takaktsuk. Tura Wi Yusa Uchiríntiatan tepesan ayampratniur atsawai."

⁵⁹ Chíkich áishmankan Jesus "Nemartusta" tímiayi.

Tutai nii chichaak "Antsu, Uuntá, winia apar jakamtai, iwiarsa ikiuakun nemarsatjame. Nu tsanákátrúktá" tímiayi.

⁶⁰ Tutai Jesus tímiayi "Jakaa ainia nu ni shuarin iwiarsatniunka enentáimtusarti. Tura ámeke weme Yus-shuar átin urukukit nu etserkata" tímiayi.

⁶¹ Nuyá chíkich tímiayi "Uuntá, nemarsataj tusan wakerajme. Túrasha wíi shuaran emka áujsan ikiuweartaj tsanákátrúktá" tímiayi.

⁶² Tutai Jesus tímiayi "Shuar arayata ukunmaaní apajas iimna nu, Yus akupeana nuj takaschamniaiti."

Ni unuiniamurj setenta armia nuna Jesus etserkatarum tusa akupkarmiania nu

10 Nuyá ukunam chíkich unuiniamurj setenta anaikiarmiayi Jesus. Tura jímiar jímiarana apatak émkitarum tusa ashí péprunam ashí nuñkanam ni wétin amia nuj akupkamiayi. ² Akupeak tímiayi "Nekas tájarme, Yus-Chicham étserkum, júuktinia núnisan, aents Yus-shuar awajsatin ti awai. Tura zyaki júukat, aya ishichik takainiasha? Tuma asamtai ni takarniurí akupkat tusarum Nerentin seatarum. ³ Wetarum. Átumka murikua núninaitrume. Uunt yawá yujama núninnium tsuumai ámunam akupeajrume. ⁴ Yurumkasha, kuitcha, sapatcha júkiirap; shuarjai jintia áujmamsatai tusarum wajasairap. ⁵ Jeá wayakrum emka ju titiarum: "Ju jeanam pujuinia nuna Yus shiir awajsarti." ⁶ Nérentin "Ee, nuna wakerajai" tákuñkia túrunattawai. Tura "Atsá, wakeratsjai" tákuñkia, "nuñkia túrunashti" titiarum. ⁷ Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nuj werum nuj werum ajairap. ⁸ Awaintiamawartatna nú peprunam jearmeke ajampramsartatna nu yuatarum. ⁹ Jaa ainia nu tsuárтарum. Túrarum "Yus ju nuñkanam akupin ajastin ishichik ajatemsai" nu peprunmayá shuar titiarum. ¹⁰ Íksarmek itiaarmachartatna nú peprunam jearum, jintia wajasrum ju titiarum, ¹¹ "Yusna nakitra asakrumin, atumi pépruriniá nuñka ii nawen peema japirar akakekji. Túrasha ju paant nekaatarum: Yus ju nuñkanam akupkatin ishichik ajatemsai." ¹² Yusa nekapsatin tsawantri jeamtai nu peprunmayá shuaran ti asutiáttawai. Yaunchu

Sutumanmayá shuaran asutiámia nujai nankaamas asutiáttawai. Núnaka paant tájarme tímiayi.

(Mateu 11.20-24)

¹³ "Wáinkiatá, Kurasin péprunmayatiram. Wáinkiatá Petsaitia péprunmayatirmesha. Atumí péprurijn aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuñkia yaunchu ni enentáin yapajíawarajai. Túrawar kúntuts pujutai pushin entsarar yuñkunim ajakiarajai. ¹⁴ Tura atumsha aents tujintiamu túramu wáinatrum yapajjachu asakrumin Tirunmayá tura Setunnumia aentsjai nankaamas asutiáttarme. ¹⁵ Tura atumsha Kapernáumnumiatirmesha, "ti nankaamantu ajasar nayaimpiniam jeattaji" tu enentáimtsurmek. Maaj, antsu jaka matsamtainium jeattarme, auka" tímiayi.

¹⁶ Tura Jesus ni unuiniamurj junasha tímiayi: "Atumin anturtamainiakka Winiasa anturtuiniawai; atumin nakitramainiakka Winiasa nakitruiniawai; tura nú arant, Winia nakittrakka Winia akuptukua nunasha nakitiawai." Tú áujas Jesus nin akupkarmiayi.

Setenta unuiniamu wakетки táarmiania nu

¹⁷ Ukunam nu setenta unuiniamu warasar wakетки táarmiayi. Tura chichainiak "Uuntá, ame náarmijn iwianch jiki akupeam umirtamkamji" tiarmiayi.

¹⁸ Tutai Jesus tímiayi "Ee, Wisha nayaimpinmayá peem peetna núnisan, uunt iwianch Satanásan akaiki iniaan wáinkiamjai. ¹⁹ Atumniaka winia kakarmarun susamjarme, napi najarmasha titiñ najarmasha ya-jauch awajtamsajirum tusan; tura ii nemasri kakarmari nupetkatniuncha susamjarme. ²⁰ Túrasha iwianch umirtamkui nu enentáimsam warasairap. Antsu atumí naari nayaimpiniam aarma aa asamtai warastarum" tímiayi Jesus.

Jesus warasmiai

(Mateu 11.25-27; 13.16-17)

²¹ Nuñkia ni enentáin Yusa Wakaní waramtiksam Jesus juna tímiayi: "Aparú, ashí nayaimpijaj nuñka Úntrinme; tuma asam ju túrunamu ti unuimiaru enentáimtumainia nuyá úyukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú" tímiayi.

²² "Winia Apar ashí surusuiti. Wisha ni Uchiri asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai." Tu tímiayi Jesus.

²³ Nuyá ni unuiniamurj iis tímiayi "Wi tájarme, untsurí Yúsnan etserniusha tura uunt akupniusha átum yamá wáintrum nuna wáinkiatniun wakeruiniayatañ wáinkiacharmiai. Tura átum yamá ántarme nuna antuktinian wakeruiniayatañ antukcharmiai. Tura Yus achirmaku asakrumin, wáintrumna nu ti péñkeraiti" tímiayi.

**Samarianmayá áishmaṅ katsumkamun yaiṅmia nuna
Jesus unuiniamiania nu**

²⁵ Nuyá akupkamun jintinkiaṅtin Jesus warintiaṅ chichakat tusa wajaṅki werimiayi. Werí iniimiayi “Uuntá, wi tuke iwiaaku áṅaj takun ḡwarinia túratniuitiaṅ?” tímiayi.

²⁶ Tutai Jesus ayáḡ “ḡYús-Papinium Muisáís áarmanum waritia áarmait. Waritia enentáimiam?” tímiayi.

²⁷ Akupkamun jintinkiaṅtin ayáḡ tímiayi “Juna tawai: Ti enentáimsam, tuke enentáimjaṅ Uunt Yús aneeta. Ame kakarmaram, iwiaakmarmesha Yús íktusta. Tura ame ayáshim aneamna núnismek ame írutramurmesha aneeta. Núchakait” tímiayi.

²⁸ Tutai Jesus tímiayi “Péṅker áimsame. Nu túrakme-ka tuke iwiaaku áṅatme.”

²⁹ Tutai akupkamun jintinkiaṅtin ni anintramun kíish-tumaktajṅtsa wakerak “Winia írutramursha ḡya ainia?” tímiayi.

³⁰ Takui Jesus tímiayi “Jerusaréṅnumiáṅ jintia Jirikiú péprunam jeana nú jintianam áishmaṅ wean, kasa áishmaṅ tariar ni warirṅin, pushirṅincha kasarkarmiayi. Tura katsumkar mayáṅ ashirak ajuantar ikiukiarmiayi.

³¹ Tura Israer-shuar Patri ukunmaṅ winis nu áishmaṅkan wáiniak aya íikiaṅ iis ikiukmiayi. ³² Nuyá ukunam Patri yáinṅriṅsha nu jintianam wesa, nu áishmaṅkan wáiniak, áyatik iis ikiuak wémiayi. ³³ Tura nuyá Samaria nuṅkanmayá áishmaṅsha nu jintianmaṅ wesa, nu áishmaṅkan wáiniak ní shuárinchunak wáitnéntramiayi. ³⁴ Nuyá nu áishmaṅkan weantuk ni numpamamurṅin asuitijjaṅ tura wíniuajaṅ tsuar jaanchjjaṅ pen-uarmiayi. Tura ni kawairṅin ekenak jukimiayi. Tura írar kanutainiam jukí ejé nu áishmaṅkan péṅker wáinkiamiayi. ³⁵ Tura kashin tsawármatai Samarianmayá áishmaṅ weak jimiará kuítian jusa jeá nérenniurṅin susamiayi. Susa tímiayi “Jṅ áishmaṅ péṅker wáitrukta. Tura wi amaajna jṅ táasmataisha wi wáketkun akikṅtame” tímiayi. ³⁶ Ayu, ámiijjaṅsha, nu menaintiu áiniana nu, ḡtuá imiá nekas katsumkamun waitnentrámia?” tímiayi Jesus.

³⁷ Takui akupkamun jintinkiaṅtin chichaak “Entá, katsumkamun wáitnentrámia nú” tímiayi.

Tutai Jesus tímiayi “Amesha weme núnismek túrata.”

Marta ni kajijaṅ Marí jeṅ Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmayá nuwá naari Marta ni jeṅ itiaamiayi.

³⁹ Marta kaj ámiayi ni naari Marí. Marisha unuiniamun anturkataṅ tusa Jesusa nawṅen pujursamiayi. ⁴⁰ Tura Mártaka ni takatṅin ti enentáimtak Jesusan weantuk tímiayi “Uuntá Jesusá, ḡwinia kajr takatan winiak íktursainia nuka enentáimtsumek? Winia yáinṅtá turuttia” tímiayi.

⁴¹ Tutai Jesus tímiayi “Maaj Martá, untsurṅ túratin ana nu ti enentáimsam itit awajtamui. ⁴² Tura aya chíkichik

nekas túratniuiti. Marikia nekas péṅker ana nuna achikiai. Nusha peṅké jurunkishtatui” tímiayi.

Jesus Yus áujsatniun unuiniamiania nu

(Mateu 6.9-15; 7.7-11)

11 Chíkich tsawantaj Jesus Yúsán áujsatat tusa atsamunam pujumiayi. Áujsa amikmatai ni unuiniamurṅ chikichik Nin tímiayi “Uuntá, imiakratin Juaṅ ni unuiniamurṅin unuiniamia núnismek Yus áujsatin unu-uitiurta.”

² Tutai Jesus tímiayi “Yus áujkuram jṅ titiarum: Aparu Yus, nayaimpiniam pujamna nu, ii Aparṅnme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisaṅ jṅ nuṅkanmasha uminkiatí. ³ Aparú, ii yurumkarṅ ashí tsawant amasta. ⁴ Tura winia nemasrun tsanṅkurajna núnismek, Aparú, winia tunaaru tumashriṅsha tsanṅkurturta. Tunáa wakerukṅin tsanṅkatrukaip. Antsu ashí tunaanumiá uwemtikurta.”

⁵ Nuyá Jesus juna tímiayi. “Wats, jṅ titiái. Kashi ajapén amikrum werishtameash. Tura “Winia amikiur yajaya winia jeṅruṅ yama tayi. Tura ajamsatniun peṅké takakt-sujai. Tuma asamtai amikru, menaintiu apatuk ajampustá” tíchatameash. ⁷ Tura nii init pujusaṅ chichaak “Warí, wáitisha epenmaiti, tura winia uchirsha wijaṅ ashí tepeenawai. Itiur nantakniak amastaj. Itit awajtipia” turamchanpiash. ⁸ Wats, paant tájarme, niisha amikrum asa, nantaki ikiatmastinian nakitiat, itit awajṅin tusa nantaki ashí wakeramna nuna suramsattawai. ⁹ Tuma asamtai tájarme: Yus seatarum; túrakrumin suramsattarme. Eṅakrumka wáinkiatarme. “Winiajai” tákurmin awajntiamattarme. ¹⁰ Seana núnaka súniatsuk. Eṅa nuka wáintsuk. “Winiajai” tuinia núnaka awajniatsuk.”

¹¹ “Wats, áṅtum uchirtintiram, ame uchiram apatkun seatmakui ḡkayaash súsaintiam? Namakan seatmakui ḡnapíash súsaintiam? ¹² Nujintian seatmakuisha ḡtitiṅkiash súsaintiam? ¹³ Warí, áṅtum imiá yajauchitirmesha atumí uchirṅ péṅker ana nu tuke súchakaitrum. Atumí Aparṅ nayaimpiniam pujana nu, seakrumniṅkia nú naṅkaamas ni Wakanṅin suramsattawai.” Tu unuiniamiayi.

Jesusan “iwianchi kakarmarijjaṅ túrawai” tiarmiayi

(Mateu 12.22-30; Márkus 3.19-27)

¹⁴ Shuar iwianchraku asa chíchachu ámiayi. Nuna enentáiyen nu iwianchin Jesus jiji akupkamiayi. Íwianch jinkimtai chíchachu chíchasmiayi. Túramtai shuar nuṅ pujuarmia nu ti enentáimprarmiayi. ¹⁵ Tura chíkich tiarmiayi “Juka iwianchṅ kapitánṅri Satanásan, ni chíkich naari Pirsepún umirniuiti. Tuma asa nuna kakarmarijjaṅ iwianchin jiji akupeawai.”

¹⁶ Tura chíkichkia, nekas Yúsnumiáṅ taawashit tusar “Nayaimpinmayá kakaram ana nu iniakmasam aents tujintiamu túrata” Jesusan tiarmiayi.

¹⁷ Tura Jesus tu enentáimianian neka asa tímiayi “Núu nuṅkanmayan shuar nuamtak kajernaiyakuṅkia

nú nuŋka wárik meserchattawak; nuamtak shuarsha ni shuarijijaj kajernaiyaksha amunaikchartatuak. ¹⁸ Wíniaka “Pirsepú iwianchi kakarmarijijaj iwianchin jjiiki akupeawai” túruttsurmek. Tuma asamtai tájarne, uunt iwianch Satanás naartin, ni suntarijijaj kajernaiyaksha žitiur tuke kakaram átink? ¹⁹ Tura Wi Pirsepú kakarmarijijaj iwianchin jjiiki akupeakuŋkia, atumi shuarisha žyana kakarmarijijaj iwianchin jjiiki akupena? Niisha “iwianchi kakarmarijijaj túrichuitji” tuliniajša žitiura Winiaša, “iwianchi kakarmarijijaj túrait” turutminiaitrum? ²⁰ Wikia Yusa kakarmarijijaj iwianchin jjiikin akupeajai. Nu nekaarum Yus atumi enentáin akupin ajasuana nu nékarme.’

²¹ ‘Kakaram áishmaŋ kíishtumaktajtsa iwiarnar wajas jeen wáinkui, ni wariri init ana nusha tímiatrusaŋ áiniawai. ²² Antsu niijijaj naŋkaamas kakaram ana nu winiakka nupetkashtatuak. Tura kíishtumaktiniam iwiar takakman jurawai. Tura kasamkámun ni amikriŋ súawai. Kakaram áishmaŋ iwianchin nakumeawai. Tura nujaj naŋkaamas kakaram áishmaŋ Winia nakumprawai. ²³ Iista. Winia nemartatsna nu winia nemasruiti. Núnisaŋ Winia yáintsuna nuka aya itiurchat nájateawai.’

Iwianch jjiiki akupkamuitiat wáketna nuna ujakmiania nu

(Mateu 12.43-45)

²⁴ Nuyá Jesus juna tímiayi: ‘Shuara enentáiyá iwianch jjiinki ayamprataj tusa yumi penké yútatsna nu wéawai. Tura ayampratniun wáincha asa ataksha waketkitniun enentáimui. “Wi jjiinkimijaj nuŋ waketkitjai” tawai. ²⁵ Tura waketki penker iwiamun tura aŋkant aan wáiniui. ²⁶ Nuna wáiniak, ni aŋin siati iwianchin niijijaj naŋkaamas yajauchin itia eŋkemáwartatui. Túrunamtaí nu shuar nuiki nuna naŋkaamas yajauch ajastatui.” Tu tímiayi Jesus.

Nekas warastin

²⁷ Shuar iruniarmia nuí Jesus nuna chichaa pujaj, nuwá untsukum “Ame nukun Yus ti yáŋkia. Ni ampujén ame pujuschamkam. Ámin amuntstamachmakam” tímiayi.

²⁸ Tutai Jesus tímiayi “Antsu ni chichamen antukar umirainia nuna, nukurjaj naŋkaamas Yus ti yáŋkiaru áiniawai, tajai” tímiayi.

(Mateu 12.38-42; Márkus 8.12)

²⁹ Shuar untsurí Njin káunkarmatai Jesus tímiayi “Yamaiyá shuarka yajauch áiniawai. Yajauch ásar, chichartuiniak “Nekas Yúsnumiŋitkiumka aents tujintiamua nu túram Yusa kakarmarijijaj iniakmasta” turutainiawai. Túrasha áyatik yaunchu Junas túrunamujaj iniakmasmia nujaj nekaartin áiniawai. ³⁰ Kame Junas túrunamujaj Níniwi péprunmayá shuaran yaunchu Yus ni kakarmarijijaj iniakmasmia núnisaŋ yamaisha Aents Ajasu tutaŋjiana nu Wi túrunamujaj Yuska ni kakarmarijijaj iniaikturmastatrum. ³¹ Yaunchu Sarumún uunt akupin pujaj Sepa núnkanmayá nuwá akupin Sarumuŋka chichamen nekaataj tusa ti jeashtanmayá támiayi. Tu-

ra yamaikia Sarumuŋaj naŋkaamas pujaj átumka anturtatsrume. Tuma asamtai Wi tájarne, Yus ashí shuaran nekapsattana nu tsawant jeamtaí nu nuwá, akupniun penker anturka asamtai, Yus íimianum penker átatui. Antsu atumsha Winia anturtukcha asakrumin Yus íimianum yajauch átatrum. ³² Tura Yúsnaŋ etserin Junas Níniwi péprunmayá shuarum Yus Chichaman etserkamtaí nu shuar ni tunaariŋ enentáimtusar enentáin yapajíawarmiayi. Tura juí yamáí Junasjaj naŋkaamas etserin pujajai. ¡Tuma asamtai nekapsatin tsawant jeamtaí Níniwinmayá shuar yamaiyá shuar árumna nuna sumamtikramattarme!’

Ayáshi tsáapnintrí

(Mateu 5.15; 6.22-23)

³³ ‘ŽShirikip ekeemakar úuktinkiait? Pitiaknumsha eŋkeashtiniati. Antsu shuar jeá wayana nu paant íimsat tusar yakí ekensatniuiti. ³⁴ Ame jjiimijaj wáinkiam nujaj wekasatin nekaattame. Tuma asamtai ame jjiimijaj penker ana nu wáinkiumka penker wekasattame; antsu ame jjiimijaj yajauch ana nu wáinkiumka, kiritniunam wekasatniua núnisaŋ yajauchiniam wekasattame. ³⁵ Anearta. Enentáimin tsáapin ana nu kiritin ajaschati tusam anearam wekasata. ³⁶ Ame ayáshmiin kirit ajatsuk aya tsáapniniatkiuŋkia, shirikip paant awajea núnisaŋ ashí paant wáinkiaittame” tímiayi.

Pariséuncha, Israer-shuara jintinniurisha “yajauchitrum” tímiayi Jesus

(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Pariséu shuar, winia jearui yurumáitia tusa untsukmiayi. Tutai Jesus wayá misanam pujusmiayi. ³⁸ Tura Israer-shuar ikijimartin ana nuna túrutsuk aya pujakui Pariséusha nuna wáiniak “maa žurukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumi yurumtairi aya pátatek niijaktin ti wakeriniaitrum. Atumsha nu yurumtaijijaj méteketrum. Pátatek penker túrarme. Tura atumí enentáinkia kasamkatniusha tura yajauchia nusha piakuiti. ⁴⁰ ¡Enentáimcha! Warí, ashí pátatek wáiniayi nuna Yus najanachmakia; tura init paantcha ana nunasha Yúsak najanachmakia. ⁴¹ Aneararum, Pariséutirmesha. Aya nuka méntasha, anisha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaŋit tatsurmek. Tura antsu nu túratin iniaitsuk penker wekasatniusha, Yus anenmarmena nusha penker enentáimsatniuitrum. Wats init, enentáimin ana nútiksarmek jusam susarta. Nuŋkia ashí chamir átatui.’

⁴³ ‘Tura aneararum Pariséutirmesha. Yus áujtai jeanam penkeri pujutanium pujustin wakerarme. Tura jintiá aents íimiainiamunam ti shiir áujtusarat tusarum wakerarme.’

⁴⁴ ‘Jintinniutirmesha, Pariséutirmesha máí-metek aneararum. ¡Antar shiir chichamtinia! Iwiarsamu paantcha núniniaitrum. Shuar nu naŋkaamaksha ná-

jamiat nékatsui. Núnisañ shuar atumí chichame an-tukar yajauchia nuna nekartamtsurme.”

⁴⁵ Nukia Israer-shuara jintinniurí chikichik Jesusan chicharuk tímiayi “Uuntá, nu tákum incha yajauch chichareame.”

⁴⁶ Tutai Jesus tímiayi “Atumsha jintinniutiram an-eartarum. Atumí akupkamurijjají káarak ti kijin entsakchamnia súarme. Tura átumka yáintaj tusarum atumí uwejejjajsha penké ántiatsrume.”

⁴⁷ Aneartarum tájarme. Yaunchu atumí uuntri Yús-nan étserniun máawarmia nuna iwiarsamurí átum jeamniuitrume nu etserin ti péñker ásarmatai kajin-matkishtin. ⁴⁸ Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niijjají méteketrume. Warí, Yúsnan etserniun iwiarsamurín jeamkuram atumek sumarme.”

⁴⁹ Atumí túramurín nekáa Yus júna yaunchu tímiayi: “Winia etserturniun tura winia akatramurnasha niin akuptukartajai. Túramtai chikichnaka máawartatui, tura chikichnaka pataatukartatui.” ⁵⁰ Tuma asamtai ashí ni etserniurín maamu ainia nuna, yamaiya áent-stirmin Yus sumamtikramattarme. Nuñka najanamun-maya júkí ⁵¹ yamáí ímiajají maamu ainia nuna, kame Apir maamunmayá júkí yamáí Sakarías maamua tímia-jají anintrustatui. Namañ maar Yus sutai ámanum tura Yus-jeá ámanum ajapén atenkamunam máawarmia nú Sakaríasan tajai. Nu tuma asamtai tájarme, ni et-serniurí maantamwarmia nuna yamáí matsatrumna nútirmin aninmasartatui.”

⁵² Jintinniutiram aneartarum. Waiti asakatniua núnis-rumek nekas nekaatin surimiarme. Atumkesha nékat-srume. Tura nekaataj tana nusha suritiarme” tímiayi.

⁵³ Jesus nuna takui Pariséusha, jintinniusha ti ka-jerkarmiayi. Tura nii tana nujají “yajauch túrame” titiai tusar wakeruiniak untsurí anintriarmiayi.

12 Nu tumaj shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamurín tútan juarkimiayi. “Pariséu ántar chichamtin ániawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamniaiti. ² Núnisañ ashí paantcha ana nu iwiainiakma átatui. Uykma ana nusha nekaamu átatui. ³ Nu tuma asamtai, kiritniunam tímiarmena nusha tsawái tsáapin ajasmanum an-tunkattawai. Tura jeá inít pujusrum ishishmasrum tímiarmena nusha áá ti paant etsernaktatui.”

Yusak ashamkatniuiti

(Mateu 10.28-31)

⁴ Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui. ⁵ Tura ya nekas ashamkatniuitrum, nuna paant jintintiattajrume. Ame ayashmí maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.”

⁶ Jimiará chiniki ishitiúpchich ishichik kuitjají su-rukchatniukait. Túrasa Yussha nu chinikin penké ka-

jinmatkishtatui. ⁷ Wats, ashamkairap. Untsurí chinikijjají nankaamas Yuska atumin enentáimturmarme. Warí, ame intiashmin mash Yus nekapmaruiti.”

(Mateu 10.32-33; 12.32; 10.19-20)

⁸ Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntarí ímiainiamunam natsantrashtajai; ⁹ antsu shuar ímiainiamunam Winia natsantrana núnaka Wisha Yusa suntarí ímiainiamunam natsantrattajai.”

¹⁰ Winia, Aents Ajasu tutain, shuar yajauch chichar-takuñkia nusha tsankuramniaiti, tura Yusa Wakanín-cha yajauch chicharkuñkia nuka penké tsankurach-miniaiti.”

¹¹ Wats, Israer-shuar iruntai jeañmasha, tura Israer-shuar kapitánniumsha, uuntnumsha juramainiakui, aninmainiakui sha warintajak tusam ti enentáimsáip.

¹² Ame áimkiatin jeamtai, Yusa Wakaní ame títiatmena nuna jintinramattawai,” tu timiayi.

Kuítia enentáimtuschatniuiti

¹³ Chikich áishmañ Jesusan tímiayi “Uuntá, ii aparí iki-urtamkimiaj nuna yatsur winiasha nakak surustí, titia” tímiayi.

¹⁴ Tutai Jesus tímiayi “Áishmañka, atumin nu túratin anaikiamukaitiaj.”

¹⁵ Nuyá tímiayi “Péñker enentáimsatarum. Nii takak-na nújajín shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

¹⁶ Nuyá júna métek-taku chichaman unuiniak tímiayi: “Kuítrintin áishmañ ni ajariyan arakan ti nukap juuk-mai. ¹⁷ Tura “¿Ti nukap asamtai tuiñ ikiustaj. Itiurkat-jak?” tu enentáimsamiai. ¹⁸ Wats, wi nékajai. Winia iki-utái-jeárun ashiran nú nankaamas úuntan najanatjai. Tura nuí ashí ikiustajai. ¹⁹ Nuiñkia untsurí uwitin shiir-pujustinian ikiusman takustajai. Tuma asamtai, ayam-pran, yurumán, umaran shiir pujustajai” timiai.”

²⁰ Tura Yus nin chicharuk timiai “Netse. Yamái kashi jakattame. Nuiñkia imiá núkap ikiusumna nusha zyana áтата?” timiai” tímiayi.

²¹ Nuyá Jesus tímiayi “Shuar niñki kuítrín ikiauntum-na nu, núnisaiti. Túrasa Yusjají íismaka kuítrinchaíti.”

Yus ni uchirín péñker wáinkiaiti

(Mateu 6.25-34)

²² Nuyá ni unuiniamurín Jesus júna tímiayi: “Warí yuarik pujustají tura wariñ entsartají tusarum nuke ti enentáimsairap. ²³ Yus iwiaaku átinian amasu asa yurumkancha amastatui. Tura jú ayashniasha najana asa entsataincha amastatui. ²⁴ Chinikisha enentáimsatarum. Niisha arakmainiatsui. Juuk yurumkan ikiuiniat-sui. Tuma aiñ Yuska ni yurumátniurín tuke súawai. Atumsha chinikia nú nankaamaschakaitrum. ²⁵ Tura ya shuarak, ti enentáimtana nujají nú naya ajasminiait.

²⁶ Kame yúpichuch ana nusha túrachminiaitiatrumsha, ¿urukamtai chikich ainia nusha ti enentáimtarum?”

²⁷ Íístá, kukujsha takaachitiat tura nájanchitiat ti shíirmach ániawai. Yaunchu akupin Sarumún ti shiir iwiamamniuitiat kukujja tímianchauyayi. ²⁸ Iis, nupa

yamá tsakaawai tura kashin aents tsupikiar jinium apeánawai. Tuma aĩn Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtaí Yus nekas enentáimtatsrum? ²⁹ Ju nuñkanam ana nu ti pachiiirap. Chíkich shuar, Yúsan nékainiatsna nu, wariñ yuataji, wariñ umartaji nuna ti pachiiiniawai. Tura atumsha tu enentáimsairap. Urukátjak, tiirap. Ame Apa nayaimpiniam pujana nu, ashí atsumarmena nuna nékawai. ³¹ Antsu emka Yusna nu enentáimtustarum. Túrakrumniñkia atsumamna nuna Yus suramsattawai.'

Kuítian pachis Jesus unuiniamiania nu (Mateu 6.19-21)

³² 'Winia murikrutiram ashamkairap. Untsuríchuitrume. Túrasha atumí Aparí ni akuptairiñ pachitmarktasa ti wakerutmarme. ³³ Kuítium tuí aa, nuí tuke enentáimtittiarme. Tume asamtaí takakrumna nu surukrum atsumainia nu susatarum. Nuka enketai arut ajatsna nuí enkeatniua núniskete. Túrakrum nayaimpinmayá kuit amuatsna nu íkiaywearme. Nuísha kasa nu kuitian kasamkataj tusa wayachmini-aiti, tura kayáasha nu kuitian yúatniun tujintiawai.'

Anearar wekasatniuitji

³⁵ 'Ju enentáimsatarum. Ni uuntri nuatnaikiatin námpernumiá taa, "uraitia" takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumi Uuntri támatai, shiir itiaatai tusarum anearum wekasatarum. ³⁷ Ni uuntri taak iwiáa pujuinian wáinkiarai nuka shiir pujuiniawai. Nu úntak iwiar, "misanam pujustarum" ni takarniuriñ títiatui tura yurumkan sústartatui. ³⁸ Kashi ajapén taaksha tura tsawáana aj taaksha ni takarniuriñ iwiáa pujuinian wáinkiuñka, nu takariñ shiir pujuiniawai. ³⁹ Tura jusha nekaatarum. Jeñniua nu, kasa tátinian nékaitkiuñka, iwiáa pujusáayi. Kasa wayá kasamkatniun suritkiáayi. ⁴⁰ Atumsha núnisrumek, anearum pujustarum. Wi Aents Ajasu tutai aya aneachmanum tá-tatjai" tímiayi.

Pénker takarin yajauch takarniuají (Mateu 24.45-51)

⁴¹ Nuyá Pítiur aniasmiayi "¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?" tímiayi.

⁴² Tutai Jesus tímiayi "Atumsha péñker takatan wáiniua núnisketrume. Takatan wáinin ni uuntri takatrin takainia nuna, yurumátin jeamtaí, ayurkamna núiti ni úuntriñ shiir umirna nu, tura péñker enentáimtana nu. ⁴³ Ni uuntri taa, takatrin tímiatrusañ túran wáinkiuñkia nu wáinniusha shiir enentáimsamniaiti. ⁴⁴ Umirin asamtaí, ni uuntri ashí ni waririñ wáitrukat tusa apusattawai. Nuna paant tájarme. ⁴⁵ Tura nu takatan wáinniusha "úuntur wau táchattawai" tu enentáimias, ni uuntri takarniuriñ yajauch awajeakuñkia tura niñki ti yurumá, ti umar nampeakuñkia, ⁴⁶ nuiñkia ni uuntri

ni nákachmanum aya aneachma taa ti asutiáttawai. Umichu pujuinia nuí akupkattawai.'

⁴⁷ 'Takarín ni uuntri wakerá nuna nékayat, iwiartsuk umitsuk pujakka ti awatramu átatui. ⁴⁸ Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisanñ nañkaamas seawartatui.'

Jesusjái shuar akannartatui (Mateu 10.34-36)

⁴⁹ 'Jijíai nekapsatniua nútiksanak nuñkanam jinia ikia-partaj tusan tamajai. Tura túrunat tusan ti wakerajai. ⁵⁰ Imiantinia núnisan itiurchat ukatruktatui. Nusha wárik amuukat tusan ti wakerajai. ⁵¹ "Ashí shuar shiir pujusarat tusa táwiti" tu enentáimturumek. Núchaiti. Antsu shuar tesanairat tusan táwitjai. ⁵² Yamái jukimiu-tak chikichík shuarnum senku ainia nu akannakartatui; menaintiu shuar ni shuariñ jímiaran nakitrartatui. Jímiarsha ni shuariñ menaintiun nakitrartatui. ⁵³ Apasha ni uchiriñ nakitrattawai. Núnisanñ uchisha ni aparíñ nakitrattawai. Nukusha ni nawantriñ nakitrattawai, nawantriñsha nukuriñ nakitrattawai. Tsatsariñsha ni najatiñ nakitrattawai; najatiñsha tsatsariñ nakitrattawai." (Mateu 16.1-4; Márkus 8.11-13)

⁵⁴ Jesus áentsun chicharuk junasha tímiayi "Atumsha nantu akaatainmaani kjar matai "yutuktatui" tátsurmek. Nusha nekas tárume. ⁵⁵ Tura anaaraniá nase násenkamtaí "séejik átatui" tárume. Tura nekas tárume. ⁵⁶ Yurañminmasha nuñkanmasha túruna nu nékarme. Túmaitiatrumsha ju tsawantai túrunattana nusha ¿itiura nékatsrum? ¡Maaj, ántraitrume!"

Nemasrumjái sha nawamnaikiata (Mateu 5.25-26)

⁵⁷ 'Túrasha péñker ana nusha ¿urukamtaí atumek enentáimsarum wáintsuram? ⁵⁸ Irutramuram úntnum júramkuñkia jintia wésamek "nuamtak iwiartai" titiá. Túrachkumniñkia akupniunam juramkittiamé. Tura niisha suntarnum akuptamkattame. Tura niisha sepunam enketmattawai. ⁵⁹ Tura nekas tajai, nuí enkemamka ashí rearchisha akikmachkumka jíinkishtatme" tímiayi.

Ii enentái yapajíatniuitji

13 Nu tsawantin chícham ujaktai tusar Jesusan tariarmiayi. Kariréa nuñkanam Israer-shuar ni waakarín máawar Yus susatai tusar pujuiniái, Piratu nin maa, nuna numpen waaka numpejái pachimpramun ujakarmiayi. ² Tura Jesus tímiayi "¿Warí enentáimsarum? Kariréanmayá áishmanñ tárumsna nu, chíkich Kariréanmayá áishmanñjai nañkaamas yajauch ásar túrunawarai ¿tu enentáimprumek? ³ Atsá; atumí enentái yapajíáchkurmeka núnisrumek atumsha jakatarme. Nuna paant tájarme, tímiayi. ⁴ Tura tiasiúchu áishmanñ yakí jeá Seruí kupiniak iniaak nekenkarmiania nu, ¿warí enentáimtarum? Chíkich Jerusaréñnumiá shuarjai nañkaamas tunáa ásar túrunawarai ¿tu enen-

táimprumek? ⁵ Atsá, tájarme. Atumí enentáí yapa-
jáchkurmeka núnisrumek atumsha jakattarme.”

Iiki numi nereatsna nu

⁶ Júnasha Jesus métek-taku chichaman tímiauyi. Júiti:
Shuar ni ajarín iikiu numin araamun takakuyi.

Nerekchiashtusa iyumai. Túrasha nere atsumai.

⁷ Nuiñkia ni ajarín wáinniun timiai “Antukta, maintiú
uwitin júna nere átai tusan waketrú pujajai; túrasha
penké wáinkiachjai. Ajakta. ¿Urukamtai ánrash wajas-
tata?”

⁸ Tutai ajá wáinin timiai “Atsá, uuntá; jú uwitin wa-
jastí. Wajamurín takarsatjai tura péñker nuñkan mat-
satkatjai. ⁹ Nujaj nerekchampiash. Tura tuke
nereachkuñkia nuñkia ajakta” timiai”, tímiayi.

Nuwan punuá kaarun Jesus tsuármiania nu

¹⁰ Ayampratin tsawantaj Israer-shuar iruntai jeenam
Jesus unuiniak pujumiayi. ¹¹ Nuñsha nuwá pujumiayi.

Nu nuwasha tiasiúchu uwitin tuke jaa pujumiayi.

Íwianch nin yajauch awajas apuna tuke ikiaramiayi.

Túramu asa pañkái nakuenkataj tukamá penké tujin-
miayi. ¹² Jesus nuna wáiniak, chicharuk “Nawantrú,
ame jaamurmiya ankant ajasume” tímiayi.

¹³ Nuna tinia ni uwejejai antinmiayi. Tura nú
chichamaik nuwasha pañkái nakuenkamiayi. Tura Yusa
náarín uunt awajsamiayi. ¹⁴ Tura Jesus ayampratin
tsawantaj tsuaru asamtai, iruntai jea uuntri kajek irun-
trarmia nuna tímiayi “Sais tsawantin takaschatniukait;
ayampratin tsawantaj tsuámartaj tusarum táchat-
niuitrume. Sais tsawant ana nuj tátiniaitrume.”

¹⁵ Tura Jesus tímiayi, “¿Antar chichamtinia! ¿atumí
waakarisha atumí umpuururisha yumi aartai tusarum
ayampratin tsawantin atiarum júatsrumek? ¹⁶ Tura jú
nuwasha, atumí shuari Apraám shuarnumiá akiiniaiti.
Nii tiasiúchu uwí Satanás yajauch awajsamujaj jinkia-
muyayi. Nincha ayampratin tsawant aín yajauch awa-
jsamunmayá atíachminkiait” tímiayi.

¹⁷ Jesus nuna takui ni nemasrisha natsaárrarmiayi. Tu-
ra penké shuar ni péñker túramurín wáinkiar
warasarmiayi.

Mustasa jinkiaí

(Mateu 13.31-32; Márkus 4.30-32)

¹⁸ Nuyá Jesus tímiayi “¿Yusa akupeamurí warijjain
métek-takuit? ¹⁹ Mustasa jinkiaíjjaj métek-takuiti. Mus-
tasa jinkiaíncha shuar ni ajarín araamiayi. Tsapái,
tsakaak, uunt numi ajasmiayi. Ti uunt asamtai chin-
ki ni kanawen pasunmarmiayi.”

(Mateu 13.33)

²⁰ Tura júnasha tímiayi: “¿Yusa akupeamurí warijjain
métek-takuit? ²¹ Tanta wakaprutaia métek-takuiti.
Arinia núkap ana nuj nuwá wakaprutain ishichik
enkeámiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

²² Jesus Jerusarénum jeatts weak untsurí
peprunam wayá unuiniarkutak wémiayi. ²³ Weaj chí-
kich shuar aniasmiayi “Uuntá, ¿uwemainia nu
ishichikiait?”

²⁴ Tutai Jesus tímiayi “Yupikiach wáitiniam wayataj
tusam ti wakeritiarum. Kame untsurí wayataj tusar
wakeriartatui, túrasha tujinkiatatui, tájarme. ²⁵ Jeá
nérenniurí wáitin epenmiatai, atumsha aa wajarum
nu, wáitiniam wajasrum untsúakrum “Uuntá, uratritia”
títiatrume. Túrasha “Nékatsjarme. ¿Tuyantskaitrum?”
turamtatrume. ²⁶ Nuyá átum títiatrume “Túrasha, uun-
tá, iisha ámijjaj yurumámji, ámijjaj umarmaji. Tura ii
pépruríncha unuiniamame.” ²⁷ Túrasha nii títiatui
“Tuyantskaitrum, nékatsjarme, tátsujrumek. Yajauch
túrintirmeka winiyañka kanaktiarum.”

²⁸ ‘Nuyá Apraámsha, Isaksha, Jakupsha tura ashí Yús-
nan etserin Yus akupeana nuj wayawaru wáinkiarum
tura aa ajapam pujusrum ti úutkuram naim tásarara
ajattarme. ²⁹ Tura Yus akupeana nuj, nantu tatain-
maaniyasha nantu akaatainmaaniyasha, arakiasha,
nuñkaaniasha taar, imia Israer-shuarchaitat yurumá-
tai tusar pujusartatui. Tura atumsha, “Apraám
shuáraitjai” táyatrum, wayashtatrume. ³⁰ Nuñsha yamá
ukunmaani ainia nusha emka ártatui; tura yamá emka
ainia nusha nuñsha ukunmaani ártatui.”

Jerusarénumaani Jesus wémiayi

(Mateu 23.37-39)

³¹ Nu tsawantaj Pariséu aents Jesusan tariar tiarmiayi
“Erutis mantamatts wakerutmawai. Tuma asamtai
juyañka wetá.”

³² Tutai Jesus tímiayi “Werum nu kujancham jú
titiarum: “Ístá. Yamaisha ishichik tsawant iwianchin
jii kin akupkartajai; túran jaancha tsuáartajai. Tura
ukunam amuktatjai.” ³³ Tura Jerusarénumaani
ishichik tsawant tuke wétiniatjai. Yúsnan etserin aya
Jerusarénuma jákatiuiti.”

³⁴ ‘Jerusarénumiáitiram, Yúsnan etserin máini-
aitrume; tura Yus akatar akupturmakmania nusha
kayajaj tukurum máiniaitrume! Tuma aín atash ni shi-
amprín etektana núnisnak Wisha weaktasan waker-
imjiarme, túrasha nakitramarme. ³⁵ Iistarum. Atumni-
asha Yus ajapramaitrume. Tura “Yusa náarín winiana
nu, shiir atí” títiatrumna nú tsawant jeatsajín penké
wáitkiashtatrume. Nuna tájarme” tímiayi Jesus.

Áishman eaak-jaan Jesus tsuármiania nu

14 Ayampratin tsawantaj Pariséu uuntri jeen Jesus
yurumátsa wémiayi. Tura chikich Pariséu
wariniak túrat tusar ii pujuarmiayi. ² Nuñ áishman
eaak-jaa Jesus pujamunam naka pujumiayi. ³ Jintinni-
uncha Pariséuncha Jesus aniasmiayi “¿Warí tárur?
¿Ayampratin tsawantaj jaa tsuárminkiait. Tsuárchamni-
akait?” tímiayi.

⁴Tura niisha áimtsuk pujuarmiayi. Nuiŋkia jaan antin tsuáirmiayi. Tura “shiiir wetá” tímiayi. ⁵Nuyá Pariséun chicharuk, “Atumí umpuuararisha, waakarisha wā táurmanum akaiki iniamtai, ayampratin tsawant aín nu chichamaik júatsrumek” tímiayi.

⁶Takui áimkiatniun penké tujinkiarimiayi.

Nuátnaikiatin nampernum ipiaamu ármia nu

⁷Ipiaamusha penkeri pujutainium pujustaisar ti wakeruiniakui, Jesus nuna wáiniak juna jintinramiayi:

⁸“Nuátnaikiatin nampernum penkeri pujutainium pujusaip. Nui pujakminkia, chíkich ámijjaj naŋkaamas penkéri táchatpiash.’

⁹Tura ipiatmania nu chichartamuk “Chíkich iiktusta” turamchatpiash. Nuiŋkia chíkich náŋkatkamu pujutainium wéakum natsartatme. ¹⁰Antsu ipiatmakmin, náŋkatkamu pujutainium pujustá. Nuiŋkia ipiatmanianu nu chichartamuk “Amikru, ámeke juí penkeri pujutainium pujustá” turamtatui. Nujaj chíkich ipiaamua inia nu, “nekas penkerinti” turamartatui. ¹¹Iimiata, “penkerintjai” tu enentáimtuma nuka péechach awaj-nastatui. Tura ímianchach enentáimtúmana nuka waantu ajastiniati.”

¹²Nuyá Nin ipiaamua nuna chicharuk tímiayi “Ame-sha yurumáití tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujaj akikma átatme. ¹³Antsu yurumáití tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta. ¹⁴Niisha akirmaktinian tujintiainiawai. Péŋker shuar nantakiartatna nuí akinkiatame. Nu tuma asamtai warastatme” tímiayi.

Uunt namperan Jesus nekapmá chichasmiania nu

¹⁵Nu misanam pujuarmia nuyá, chikichik Jesus chichaamun antuk, Jesusan tímiayi “Yus akupeamunam pachiiniak, yurumkuŋka ti shiir ainti.”

¹⁶Nuna takui Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai. ¹⁷Yurumátin jeamtai “Winitiarum, yurumátin jeayi” tu tiarta tusa ni takarniurín akupkamai. ¹⁸Tura winichiniati tusa ashí ujakarmai. Chíkich timiai “Nuŋkan yamá sumarmakjai. Iyutaj tusa wéakun winishtatjai. Tsanŋkurturti” timiai. ¹⁹Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsanŋkurturti” timiai. ²⁰Tura chíkich chichaak “Yamá nu-atnaikijai. Tuma asan winishtatjai” timiai. ²¹Takarín waketki ní untrín ashí nuna ujakmai. Nuna antuk ni-isha kajekmiayi. Tura ni takarniurín timiai “Ju péprunam péŋker jintianmasha tura uchich jintiachinmasha weme, kuítrincha tura wekaichasha, shutuapsha, kusurusha itiaarta.” ²²Nuyá ukunam ni takarniurít taa chicharuk “Uuntá, ame turutmiamna nútíksanak túramjai; túrasha tuke anŋkant awai” timiai.’

²³Tutai ni uuntrí chichaak “Jintianam weme, chíkich jintiachiniam weme, wáinmena nu ashí awayawarta. Winia jearui piakat tusan wakerajai. ²⁴Emka ipiaawarmajnia nuka penké chíkichkíksha winiŋkia yurumáchartatui, tajarme’ tímiayi.”

Kristu nemarsatin yúpichuchichuiti

²⁵Untsurí aents Jesusjaj irunki wearmiayi. Niisha nuna apajás iis juna tímiayi:

²⁶“Shuar ni aparíncha, ní nukuríncha, nuaríncha uchiríncha, yachíncha, umajíncha Wijjaj naŋkaamas enentáimtakka, tura shiir pujustinian wakerak Winí winitniun nakitiakka winia unuiniatur ajaschamniati. ²⁷Ni wakeramurín ajakeak ní krusrj yanakj nemartat-sna nu winia unuiniatur ajaschamniati.’

²⁸Jeá yakí jeamtaj tusam wakerakmeke, kuítian urut-mak ajapawaintaj tusam tura urutmajajnk’ amukainti-aj tusam emka enentáimsashtatmek. ²⁹Túruitsuk aya ukura iniaisam amuktin tujinkiakminkia, nuna wáini-ainia nu, wishikiainiak juna tiartatui: ³⁰“Tiskua. Nu shuar jeamtinian naŋkamamiayi. Túrasha amuktinian tujinkiamiayi.”

³¹Tura uunt kapitán chíkich kapitánjaj mesetan nanatin áchatpiash. Emka, niisha pujus, tias mir (10.000) suntarjaj painti mir (20.000) suntar winiana nuna nupetkaintjash tusa enentáimsashtatuak. ³²Tujintiakka, chíkich kapitán jeachat pujaanak, nawamnaikiatai tusa akatar akupkashtatuak. ³³Wats, “Kristu unuiniaturj ajastinjaj, wi takakjana juna warí winia itiurtawa” tu enentáimsatniuitume. Túrachkurmeke winia unuiniatur ajastin tujinkiar-me.’

Wee michumarka yajauchiiti

(Mateu 5.13; Márkus 9.50)

³⁴‘Weeka jeaku péŋkeraiti. Tura michumarka žitiurak atak péŋker ati? ³⁵Wee michumarka araaamatniun-masha yayaatsui. Tura tsuatnum ikiusmasha ántraiti. Aya ajapatniukete. Kuishim ákuinŋkia antuktatum” tími-ayi.

Jesus murik meŋkakamu chichaman unuiniamiania nu

(Mateu 18.10-14)

15 Akupniu kuítrín-juu tura yajauch shuarsha Jesusan anturkatai tusar tarú wearmiayi. ²Tuma asamtai Pariséusha, Israer-shuara jintinniurisha Jesusan áujmatainiak “Jysha tunáa shuaran itiaawai tura niijjaj yurumáiniawai” tiarmiayi.

³Nuna tuiniakui Jesus ju métek-taku chichaman jintintiwarmiayi:

⁴“Shuar sian (100) murikiun takuschampiash. Nu siánnumiá chíkichik meŋkakamtai nuwintia nuíwinkia ní matsatmariin ikiuak, meŋkaka nuna ti eakchat-tawak. Wáintsuk iniaisashtatui. ⁵Tura wáiniak yakaini-um awanŋkek waras jeen wáketui. ⁶Tura jeen jeá ní amikrín, írutramuríncha ikiaanak “Wijjaj warastarum. Murikiur meŋkaka nuna wáinkijaj” tawai. ⁷Wats, nuwintia nuiwi péŋker shuar akui nayaimpiniam

warastin awai. Tura antsu chikichík yajauch shuar ni enentáin yapajám-tainkia, nú nankaamas warastin áta-tui, tájar-me' tímiayi.

Kuit emenkakman Jesus unuiniamiania nu

⁸ Nuyá chíkich enentáimsatai. Nuwá tias kuítian takakna nuna chikichik menkakamtai, wáinkiatatj tusa jinia ekeemak, jean japimiak émamkes eakchattawak. ⁹ Tura wáiniak ni amikrín, írutramuríncha ikiaanak, "Wijjaj warastarum. Kuit menkakamia nuna wáinkiajai" tawai. ¹⁰ Núnisan yajauch shuar ni enentáin yapajám-tai, Yusa suntarj matsatmanum ti warastin awai" tímiayi.

Uchi ni aparjijn waketitniun Jesus unuiniamiania nu

¹¹ Nuyá Jesus juna unuiniamiayi:

"Áishman jimiará uchin takakuyi. ¹² Tura pátatka uchi ni aparjijn timiai "Apawá, surustiniaitmena nu yamá surusta."

"Tutai ni aparjijn ni kuítrjijn jímiapetek nakak mai uchin susamai. ¹³ Ishichik tsawant nankaamasaj pátatka uchi ni warirjijn irur jukí jeachat chíkich núnkanam wémai. Nujsa nánkamas yajauchin túrak kuítrjijn ashí ajapamai. ¹⁴ Ni kuitrjijn ashí amuuka ajn nu nunkanam ti tsuka ámai. Niisha núnisan tsukarijijn wáitsamai. ¹⁵ Túmak takatan eaktajtsa nu nunkanmayá apachjijn werimiai. Nu áishmansha kuchirjijn wáitrukta tusa akupkamai. ¹⁶ Uchi ti tsukamak kuchi ukatramun niisha yuátajtsa ti wakerimiai. Túrasha penké súcharmai. ¹⁷ Tumáa pujus nuinikia enentáimpramai. "Winia aparuj takau shuar penkeran ti yurumáiniawai. Tura wikia juj tsukaruj wáitajai. ¹⁸ Wats, aparuj waketitjai. Tura aparun chicharkun "Apawá Yúsjaisha ámijjajisha tunaan túrajai, titiajai. ¹⁹ Ame uchiram áchamniaitjai yamaikia. Ame takarniurmea áantsanak átaj tusan wakerajai" titiajai" tu enentáimsamai. ²⁰ Tura wajaki ni aparjijn waketitkimi-ai' tímiayi.

"Tura ni aparjisha jeachat winian wáiniak waitnentra-mai. Aparj tsékenki inkiun miniakak mukunámai.

²¹ Nuinikia uchirjisha timiai "Apawá, Yúsjaisha ámijjajisha tunáan túrajai. Ame uchiram áchamniaitjai."

²² Túrasha ni aparjinka ni takarniurjijn chicharuk "Ti penker pushí itiarum áentsratarum, timiai. Tura uwe-jnum aweetaisha aweemtikiatarum. Tura sapatcha aweemtikiatarum. ²³ Túrarum waaka nueram ana nu maatarum. Námpen nájankur shiir enentáimsar yurumámi. ²⁴ Warí, ju winia uchir jakaapitia tu enentáimsamjai. Túrasha iwiaakui. Menkakama nuna wáinkiajai." Nuinikia ti warasarmai' tímiayi.

²⁵ Tumaj iwíaj úchikia takatnum pujumai. Tura wáketuk, jeá nuntumas jantsemáiniak túntuyiamun antukmai. ²⁶ Nuinikia yaintrjijn matsatun chikichiniak untuk "¿Warimpait?" timiai.'

²⁷ Tura nii chichaak "Ame yátsum tayi. Túramtai ame apa waaka nueram maatai tawai, ame yatsum penker tau asamtai" timiai.'

²⁸ Tura iwíaj uchi kajek wayatniun nakitramai.'

'Tuma asamtai ni aparjijn timiai.'

²⁹ Tura uchisha aparjijn chicharuk "Wisha ámin umirkun untsurj uwitin ame takatrumin túraitjai. Nu nékame. Túrasha winia amikrujaj námpen najanatin chiipiuksha penké surichuitme. ³⁰ Tura ju ame uchiram nuwajaj yajauchin túrak ame kuítrumin wasurkania nu támatai, waaka nueram máachumek" timiai.'

³¹ Takui aparjijn chicharuk "Uchirú, ámeke wijjaj tuke pujame. Tura wi takakjana nusha ashí áminuiti. ³² Tura ame yatsum jákaiti tu enentáimsamiai nu iwiaakuiti. Menkaka nu yamaikia wáinkiajai. Tuma asamtai námpen najanar waraschatniukaitiaj" timiai' tímiayi.

Takatan wáinin

16 Ju métek-taku chichamnasha Jesus ni unuiniamu7 'Tura nii chichaak "Ame yátstrjijn unuiniami-ayi.

"Kuítrintin áishmanka takatrjijn wáinniurj ámai. Tura nérenniun ujainiak "Ame wáinniuram ame kuítrumin nánkamas ajapeawai" tiarmai.'

² "Nuna antuk ni wáinniurj untsuk "¿Warinia jujsa turamainia? timiai. Yamaikia winia wáinniur áchat-tame. Tuma asamtai winia kuítrujaj ititurkamea nu ini-aktursata" timiai.'

³ "Tutai takatan wáinin enentáimsamai. "Maaj, wisha ititurkatjak, timiai. Nunka táurtinniasha jeatsjai. "Kuit surusta" títtinniasha natsamajai. ⁴ Winia takatur atsakui yurumkan ajamprusarat tusan túratajna nuna nekajai" tu enentáimsamai. ⁵ Nuyá nérenniun tumashmaku armia nuna ankant ankant untsukarmai. Emka tamia nuna chicharuk "¿Winia úuntur urutma tumashmakuitiam?" timiai.'

⁶ "Niisha ámiuk "Asuitin sian taru tumashiitjai" timiai.'

"Tutai takata wáinin chicharuk "Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta" timiai.'

⁷ "Nuyá chíkich tumashmaku támatai "¿Amesha urut-má tumashiitiam?" timiai.'

"Tutai nii chichaak "Shana sian taru tumashiitjai" timiai.'

"Tutai "Pai. Papinium tumashrum ana nu júiti. Chíkich papinium aya uchentak aarta" timiai.'

⁸ "Nuyá takata wáinniu uuntrjijn nuna nekáa "Nii yajauch túriniaitiat imiá enentáimniuiti" timiai' tímiayi.

Nuyá Jesus tímiayi 'Yus-shuarjaj nankaamas Yus-shuarcha ajjajaj ni túratniuriniak takainiak imiá enentáimkia ániawai.'

⁹ "Ju nunkanam anankatin átsuk. Tura kuitsha aya ju nunkanmayan ketete. Tuma asamtai atumsha kuitrumjaj "shuaran yaintaj" tu enentáimsatarum. Kuitjaj yaintin amuukamtai atumsha amuicha jeanam ipiaamu átaj tusarum túratarum."

¹⁰ "Shuar ishichik takakna nujaj penker túrakka, núkap takakna nujajisha penker túrattawai. Tura ishichik takakna nujaj penker túrachkunka, núkap takakna nujajisha penker túrashtatui. ¹¹ Tuma asamtai ju nunkanmayá anankartin kuitjaj penker

túrachkurmeka, tuke átin ana nujaj takastincha žitiur takastarumek? ¹² Takakme nuna Yus ikiatmasuiti. Nujaj péñker túrachkurminkia, atumnia átinia nuna žitiurak suramsat?'

¹³ 'Takarniurj jimiara úuntrintin ajastinian tujintiawai. Warí, chikichnaka aneak chikichnaka nakitrashta túrat-tawai. Turya señkuentachik aarta" timiaituak. Chikichan umiruk chikichnaka umirkashtatui. Yussha kuitcha má-metek enentáimtuschamniaitrumé" tími-ayi Jesus.

¹⁴ Pariséusha kuítian anen armia nu, ashí ni táman antukar Jesusan wishikrarmiayi. ¹⁵ Túmakui Jesus nin tímiayi "Atumsha aents íimmianum péñker awajmam-prume. Túrasha atumí enentáincha Yus péñker nékawai. Kame winia "nañkaamantuiti" turutit tusa wakera nuna Yuska nakitiawai.'

Yaunchu etserkamu, yamá etserkamu

¹⁶ 'Juan étsertsain Muisáis aar akupkama nunasha tura Yúsna etserin unuiniarmia nunasha antuktin ár-miayi. Tura yamaisha tímianiaj ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiinkiataj tusar ni kakarmar-ijiaj ti takainiawai.'

¹⁷ 'Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nuñkasha amukatnujaj nañkaamas itiurchatai.' †

¹⁸ 'Áishmañ nuarjñ ajapa chikichan nuátkuñka tsanir-mawai. Tura nuwá ajapamu niiniurtakka nusha núnisañ tsanirmawai.'

Kuítrintin áishmañ Rásaruaj

¹⁹ 'Áishmañ kuítrintin ámai. Niisha imiá shiir pushin ti kuit ainia nujaj iwiarmamniuyi. Tura tuke tsawant yurumak ti kuit amia nujaj namperan najanniuyi. ²⁰ Tura kuítrincha ámai ni naarj Rásaru. Niisha kuchapruku tunamaruyi. Tuke tsawant kuítrinniu wáitirijn pujuyi. ²¹ Ti tsukamak kuítrinniu misariniñ kakekan yuattsá wakerimiai. Tura yawasha ni kuchaprijñ nukatiarmai. ²² Kuítrincha jakamai. Jakamtaí jaka shiir pujutainium, Apraám pujumia nuj nayaimpinmayá suntar júkiarmai. Kuítrinniu sha jakamai. Jakamtaí iwiarsarmai. ²³ Jaka pujutainium wáitias pujus, pañkái íimias, Rásarun Apraámjaj pujuinian wáinkiamai. ²⁴ Wáiniak untsukum "Apawá Apraamá wáitnentrurta, timiai. Rásaruka tsara uwejejaj entsan uchupir winia iniairun imichturat akupturkata. Wisha juj jinium pujusan ti waitiajai" timiai.'

²⁵ 'Tutai Apraám timiai "Uchirú enentáimpratá. Ame nuñká iwiaku pujusam ti shiir pujumame. Antsu Rásaruka nuj ti yajauch pujumai. Tura niisha yamaikia juj áyamui tura ámeká wáitame. ²⁶ Tura nú arant ná-nata ti uunt awai. Tuma asamtaí juyá aj wétinian wakeruiniayat tujintiainiawai. Tura aiyá juj tátinian wakeruini nusha tujintiainiawai.'"

²⁷ 'Nuñkia kuítrintin timiai "Nuñkia apawá Apraamá, juna seajme. Winia aparú jeen Rásaru akupturkata.

²⁸ Nuñsha winia yatsur señku matsatainiawai. Niisha ju wáitsatniunam tácharat tusa ujákartí, tájame" timiai.'

²⁹ 'Tutai Apraám timiai "Muisáis áarman tura Yúsna etserin áarman takakainiawai. Nuna umikiarti.'"

³⁰ 'Tutai kuítrintin áimkiamai "Túrasha apawa Apraamá, antsu jakamunmayá nantaki, shuar we ujakam enentáin yapajjáwarainti.'"

³¹ 'Tura Apraám timiai "Muisáis áarman tura Yúsna etserin áarman anturainiachkuñka jaka nantaki we ujakmasha antukchartatui" timiai." Tu áujmatsamiayi Jesus.

Yajauch túrumtikiatin ti tsúumainti

(Mateu 18.6-7, 21-22; Márkus 9.42)

17 Jesus ni unuiniamurjñ juna tímiayi, "Aentsun yajauchin túrumtikiattana nu tuke átatui. Tura shuar ni ajñ tunaan wakerumtikna nu aneartí. ² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtaí nuna túrat-sajñ uunt kayajaj kuntuñnum jinkíá nayaantsanam ajunkam maak ainti. ³ Túrasha atumek íimiastarum. Ame yatsum ámin tunáa túrutmamtañkia chicharkata; tura niisha "tsañkurturta" túramkuñkia tsañkurata. ⁴ Chikichík tsawantiniñ siati túrutmamtaí, tura "tsañkurturta, atakka túrashtatjai," siati túramkuñkia, tuke tsañkurata."

Yus nekas enentáimtakrikia tujinkiashtajj

⁵ Jesusa unuiniamurjñ Nin chicharuk "Yus enentáimtaj-nia nú nañkaamas enentáimtustin yáinmaktá" tiarmi-ayi.

⁶ Tutai Jesus tímiayi "Mustasa jinkíái ti ishitiúpchich ana núnisañ ishichkisha Yus enentáimtaitkiurmeka, sikiumuru numi wajana nu, "Wajamurmiyañka ukuini-akam nayaantsanam wajasta" tákurmin nú numi umir-tamkainti.'

Yusa takatrj takasar "ti péñker túraitji" tíchatniuitji

⁷ 'Atumí takarniurj arakmasua amik, waakanha iis támatai, žnú chichamaik amesha, "Winitia, yurumáitíá" tíintmek? ⁸ Atsá. Antsu, "yurumak iwiarturata. Wi yurumáin tura umartincha surusminiam iwiarnarta. Nuyá ame yurumátá." Nu tíchaintmek. ⁹ Nii túratin ana nunak túratsuk. Tuma asamtaí yumisashatme.

¹⁰ Atumsha núnisrumek Yus túramna nu ashí umikiam "ti péñker túraitjai" tíchatniuitme. Antsu "aya ii túratni-urj ana nuke tura asar iikia ántrajtji" títiniaitme." Tu tímiayi Jesus.

Tias áishmañkan tunamarun Jesus tsuáarmiania nu

¹¹ Jesus Jerusaréñnum wesa Kariréa nuñka ikiuki Samaria nuñkanam nañkaamakmiayi. ¹² Tura péprunam jeamtaí, tias áishmañ ripra suñkurjaj tunamaru armia nu, arant wajasarmiayi. ¹³ Tura untsumainiak "Uunt Jesúsá, waitnentrurta" tiarmiayi.

† Mateu 19.1 ya señkuentachik aarta" timiai-12; Márkus 10.1-12

¹⁴ Jesus nin wáiniak, “Pátrij werirum iniaktumas-tarum” tímiayi.

Tura wésar péñker ajasarmiayi. ¹⁵ Nuyá chikichik ni tsuamarman nekáa kakantar chichaki Yusa náarjñ uunt awajki waketki Jesusan tarimiayi. ¹⁶ Yuminsataj tusa Jesusan tikishmatar piniakumar tepesmiayi. Nu áishmañka Samarmanmayayayi.

¹⁷ Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia? ¹⁸ ¿Jy yajaya áishmañ níñkik Yusa naari uunt awajstataj tusa waketki tai?” ¹⁹ Nuyá áishmañkan tímiayi, “Winia nekas enentáim-tursa asam péñker ajasume. Wajakim shiir weta” tímiayi Jesus.

¿Yusa akupeamuri urutaik ati?

(Mateu 24.23-28, 36-41)

²⁰ Pariséu aents Jesusan aniak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkia-achminiaiiti. “Yamaí nañkamnaya” tichamniaiiti. ²¹ “Juj awai, nuisha awai” tíchamniaiiti. Warí, Yusa akupeamurinkia atumiñ pujawai” tímiayi.

²² Nuyá ni unuiniamuriñ chicharuk juna tímiayi: “Tsawant jeattawai atumsha Winia Aents Ajasu tutain “aya chikichik tsawantkesha Nii wáinkiarikia mak” turuttiatrume. Túrasha tujinkiattarme. ²³ Aents Ajasu tutai “juj pujawai, nuisha pujawai” tuíniakui weriirap. Tana nu nemariirap. ²⁴ Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisañ wi taamu paant átatui. ²⁵ Tura nu túruntsajñ yamai pujuinia nu Winia nakitruiniakui ti wáitsatniuitjai. ²⁶ Winia atak tátinur jeamtai, yaunchu Nuái pujumia nú tsawantin túrunamia núnisañ túrunattawai. ²⁷ Yurumáwarmiayi, umararmiayi, nuatnaikiarmiayi, ni nawantri nuatnakat tusa surukarmiayi. Tumáa pujuiniñ Nuái uunt kanunam enkemprantai, amarak nu aentsnasha mash amuukarmiayi. ²⁸ Tura Sutuma péprunmasha Rauta írutramurisha núnisarañ Yusa asutiátniurí enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajarmarmiayi, jeancha jeammarmiayi. ²⁹ Tura Raut Sutuma péprunmayá jinkimtai asupri tutai kaya keek yútana áintsañ nayaimpinmayá kakeetuk nu áentsun mash máawarmiayi. ³⁰ Núnisañ winia atak tátinur jeamtai enentáimtsuk pujusartatui.’

³¹ ‘Nu tsawant jeamtai jeñ yakiñ pujana nú shuar ni warirñ achiktaj tusa akaikishti. Jeá wayashti. Tura kampunniunam wekaana nú shuar ni jeñ waketkishti. ³² Rauta nuarí túrunamu enentáimpratarum. ³³ Aya jñ nuñkanmayañ enentáimias “iwiaaku átaj” tana nu ni iwiaakmarñ emeñkátatui. Tura jñ nuñkanam ni iwiaakmarñ emeñkana nu nekas iwiaakma ana nuna wáinkiatatawai. ³⁴ Paant tájarme. Nú káshitin jimiará áishmañ nuu peaknumañ kanúu tepeartatui. Chikichik junaktiatui, chíkichkia ikiunkittiwai. ³⁵ Jimiará nuwá mái-metek nekée pujuartatui. Chikichik junaktiatui, chíkichkia ikiunkittiwai. ³⁶ Jimiará áishmañ kampuniu-

nam wekainiartatui. Chikichik junaktiatui, chíkichkia ikiunkittiwai.” Tu tímiayi.

³⁷ Nuna antukar “Uunta ¿tuj túrunatta?” tiarmiayi. Tutai ni chichaak “Jaka tepana nuñ chuan káutkartatui.”

Shuar yawetsuk Yusan tuke áujsatniuiti

18 Shuar yawetsuk Yusan tuke áujsatniua nuna unuiniartaj tusa Jesus jñ métek-taku chichaman tímiayi:

² “Chíkich péprunam shuaran akupin amai. Nú áishmañ Yúsnasha ashamchayui; shuárnasha péñker enentáimtichuyi. ³ Tura nú péprunam wajé amai. Ni-isha shuáran akupniun chicharuk “Áishmañ winia yajouch awajtusmania nu írtusta” tusa tuke waketru pujuyi. ⁴ Yámankamtaikkia nin anturkatniun nakitmai. Tura ukunam enentáimias “Wisha Yusan ashamachiatnak shuárnasha péñker enentáimtichuitatnak jñ wajé tana nuna túrattajai. ⁵ Warí niisha tuke taa itit awajtatsuk. Tuma asamtai nin kajerkañ tusan wárik túrattajai” timiai” tímiayi.

⁶ Nuyá uunt Jesus tímiayi “Shuaran akupin yajauchitiat nuna timiai. ⁷ Tura Yus ti péñker asa, ni achikmarin tsawajsha, káshisha untsuamka nú nañkaamas anturkashtatuak. ¿Yáitsuk meñkakatuak? ⁸ Atsá, wárik yáinkiaratui, tájarme. Tura Wi Aents Ajasuitjiana jñ atak támatatui, ¿shuaran tuke Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yusan áujsarmia nu

⁹ “Péñkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

¹⁰ “Jimiará áishmañ Yusa Uunt Jeñ Yus áujstataj tusar wearmai. Chíkichkia Pariséuuyi, chíkichkia kuítian-juuyi. ¹¹ Pariséusha wajakí Yusan áujuk júnis tímiayi: “Yusrú, chíkich áishmañ kasa, yajauch, tsanirmau ainia nuñ métekcha asan yuminsajme. Tura jñ kuítian-juu wajana jujajisha métekchaitjai. ¹² Warí, Ame akupkamna nuna iniañkasan wisha chikichik semanatiniñ jimiará tsawant ijarman áujeajai; tura wi achajna nuna tiásnumiñ chikichkiniak Yúsnaiti tusan akankan súajai.” Tu timiai.’

¹³ “Tura kuítian-juusha arant wajas, nayaimpinmañ pankáñ íimsatniunkesha natsaamak, tsunsuma, ni netsepen awatí “Yusá, ti tunaitjai. Waitnétrurtá” timiai.’

¹⁴ “Wats tájarme, nu kuítian-juu shuar Yus íimmianum ni enentáñ péñker awajnas ni jeñ waketkimiai. Tura Pariséuka tamia núnisañ waketkimiai. Nekaatarum. Shuar nañkaamantu enentáimtumana nuka péechach awajnastatui. Tura antsu péechach enentáimtumana nu, nañkaamantu awajnastatui” tímiayi Jesus.

Uchisha Jesusna áminiaiiti

(Mateu 19.13-15; Márkus 10.13-16)

¹⁵ Jesus antiñkiarat tusar uchin itiararmiayi. Tura Jesusa unuiniamurisha nuna wáinkiar suritkiarmiayi.

¹⁶ Tura Jesus nin untsukar tímiayi “Uchi Winí winitin tsan̄kamkatarum, surimkiairap. Enentáimsatarum. Uchichia áintsan̄ enentáimtumana nú shuárak Yus ni enentáin akupin ajasminiaiti. ¹⁷ Uchi ni únun̄tr̄in umira núnisan̄ shuar Yúsan umíachkunka Yus ni enentáin akupin ajaschamniaiti.” Tu tímiayi Jesus.

Kuítrintin áishman Jesusjaj̄ áujmatsamiania nu
(Mateu 19.16-30; Márkus 10.17-31)

¹⁸ Shuara uun̄tr̄j Jesusan tarí áujsamiaiyi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁹ Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti.

²⁰ Tura Yus akupkamu ana nu péñker nékame. Tsanir-mawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

²¹ Tutai áishman̄ tímiayi “Uuntá, úchichik mash umiki tsakaruitjai.”

²² Jesus nuna antuk “Chikichik taatramsai, tímiayi. Ame takakmena nu ashí surukam kuítrincha ainia nu susarta. Nuñkia nayaimpiniam kuítrum átatai. Túram nemartustaj tusam winitia.”

²³ Tura nuna antuk, nu áishman̄ ti kuítrintin asa ti kuntuts enentáimpramiayi. ²⁴ Tura kúntuts enentáimpramtai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi.

²⁵ Kamiriuka, uunt ana nu, auja j̄in̄ wayatin̄ itiurchataiti. Tura shuar kuítr̄in̄ ti enentáimtana nu Yus akupeamunam pachiinkiatin nú nan̄kaamas itiurchataiti.” Tu tímiayi.

²⁶ Tura nuna antukarmia nu tiarmiayi “¿Nuñkia yaki uwempramniaiti?”

²⁷ Tutai Jesus tímiayi “Aents tujintiaiania nuna Yuska páchitsuk túramniaiti.”

²⁸ Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

²⁹ Tutai Jesus tímiayi “Shuar Yus akupeana nuna túratat tusa ni j̄en̄ ikiuakka tura núnisan̄ ni apar̄in̄cha, nukur̄in̄cha, yach̄in̄kisha, nuw̄en̄kesha, uchir̄in̄kisha ikuiakka j̄u nuñkanmasha núkap wáinkiatatawai nu shuar. Tura tuke iwiaaku pujustinniaasha wáinkiatatawai.”

Ataksha ni jákatniur̄in̄ Jesus ujakmiania nu
(Mateu 20.17-19; Márkus 10.32-34)

³¹ Jesus ni tuse unuiniamur̄in̄ akanki ikiaan̄ak j̄una tímiayi:

“Jerusar̄en̄num jeatemaji. Jūisha Jerusar̄en̄num Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiatatawai. ³² Apachin̄um surutkartatui. Túrawar wishikrurar, katsekrurar usukruawartatui. ³³ Awatiar mantuáwartatui. Túramaitiatnak maintiú tsaw̄antaj̄ nantaktiatjai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

Jirikiúnmayá áishman̄kan Jesus ímtikmiania nu
(Mateu 20.29-34; Márkus 10.46-52)

³⁵ Jesus Jirikiú péprunam nuntumsaj, nūj̄ áishman̄ j̄ii kusuru, kuítian surusarat tusa jintiá pujumiayi.

³⁶ Untsur̄j̄ aents nan̄kaamainian antuk “¿warin̄kit?” tímiayi.

³⁷ Tutai, “Nasar̄étnumiá Jesus nan̄kaamawai” tiarmiayi.

³⁸ Kusurusha nuna antuk untsukum “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrurta” tímiayi.

⁴⁰ Nuñkia Jesus wajas “ítitarum” tímiayi. Tura nii tá-matai, ⁴¹ “¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “Ímtia. Winia nekas enentáim-tursa asam péñker ajasume” tímiayi.

⁴³ Nu chichamaik kusuru íimmiayi. Tura Yusa naar̄j̄ uunt awajki Jesusan nemarmiayi. Tura ashí aents nuna wáinkiar̄mia nusha Yusa náar̄in̄ uunt awajsarmiayi.

Sakíu Jesusjaj̄

19 Nuyá Jirikiú péprunam wayá nūj̄ wekaikini ajamiayi. ² Nūj̄ kuítrintin áishman̄ ni naar̄j̄ Sakíu pujumiayi. Nu Sakíu kuítian-juu únun̄tr̄iyayi. ³ Aents ti káunkámtai, Sakíu ti sítarach asa, Jesusan ístaj tukamá tujinkiamiayi. ⁴ Tuma asa Jesus nuke nan̄kaamaktin asamtai, eemki tsékin̄gi sikiumuru numi waja-munam wakamiayi iistaj tusa. ⁵ Jesus nūj̄ nan̄kaamak pan̄kaj̄ ímias chicharuk “Sakíu wárik akáikitiá. Ame j̄em̄in̄ yamá kanartiniaitjai” tímiayi.

⁶ Tutai Sakíusha wárik akaiki, shiir enentáimias Jesusan itiaamiayi. ⁷ Ashí aents nuna wáinkiar̄ “Maaj, Jesus tunáa áishman̄ka j̄en̄ pujawai” tusa mai tunaim ajarmiayi.

⁸ Nuyá Sakíu wajaki Jesusan chicharuk “Ístá Uuntá, wi takakjana j̄una jímiapetek nakakan kuítrincha ainia nuna susartatjai. Tura wáitruan chikichan kasarkaitki-uncha maintiu patatsan awain̄kittiajai” tímiayi.

⁹ Tutai Jesus tímiayi “J̄ū áishman̄ Apraáma shuár̄intiat yamá niisha níiniuj̄aj̄ uwempra asa nekas Apraáma shuar̄j̄ ajasuiti. ¹⁰ Wisha Aents Ajasu asan men̄kakar̄u ainia nuna ēakan uwemtikrartaj̄ tusan táwitjai.” Tu tímiayi.

Kuítian nekapmá chichasmiayi

¹¹ Nu aents Jesusan anturkarmia nu “Jerusar̄en̄num jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusar̄en̄num nuntumsaraj̄, nuna enentáimsar̄aj̄in̄ tusa Jesus j̄una métek-takun chichasmiayi:

¹² “Áishman̄ peñkerj̄ amai. Nu áishman̄sha jeachat chíkich núnkanam kapitíán náamkan tátaj tusa wemai. ¹³ Tura wétsuk ni takarniur̄in tias armia nuna untsukar-mai. Tura aṅkant aṅkant kuit kuriñj̄aj̄ nañkaamas peñker armia nuna suñiak “Ju kuitj̄aj̄ wi táatsaj̄in takakmá ajatarum” timiai.’

¹⁴ Tura ni nuñkénia shuarka nakitiarmai. Túmainiak “nu áishman̄ ii kapitíantr̄i ajasaj̄in tusar nakitij̄i” nu titiá tusar áishman̄kan akatrar akuptukarmai.’

¹⁵ Tuma aṅ kapitíán náamak ni nuñkén wakетки tamai. Taa “winia kuítruj̄aj̄ warí túrarum” títiáj tusa ni takarniur̄in kuitia súsarman̄ nuna untsukarmai.’

¹⁶ “Ni takarniur̄i emka chikichik taa “ame kuítrumj̄aj̄ takakmasan tias patasan achikmajai” timiai.’

¹⁷ Tutai kapitíán chichaak “Peñker túrame. Ishichik susamjamna nújaj̄in k’i wi tímiajna tímiatrusmek túrame. Tuma asakmin tias péprun akupin awajsattajme” timiai.’

¹⁸ “Chíkich taa “Ístá Uuntá, ame kuítrumj̄aj̄ takakmasan seṅku patasan achikjai” timiai.’

¹⁹ “Nunasha chicharuk “Amincha seṅku péprun akupin awajsattajme” timiai.’

²⁰ “Nuyá chíkich taa “Uuntá, ame kuítrumin panij̄aj̄ ijian ikiusmajai. ²¹ Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

²² Tutai kapitíán timiai “Maaj, amesha ti yajauchiitme. Ame támena nuke makurmawai. Wi kakaram chichau aṅsha, ikiuschiatan achin aṅsha tura araknasha arakmachiatan juu aṅsha, ²³ nuñkia ḡurukamtia kuit-ikiutainiam ikiuschamam? Nuñkia wi atak táakun patasan achikiaajna” timiai. ²⁴ Tura nuñ wajarmia nuna chicharuk “Kuítian takakmar̄i juruktiarum; túrarum tias takakna nú shuar susatarum” timiai.’

²⁵ “Tura niisha chichainiak “túrasha Uuntá, tias takakja” tiarmai.’

²⁶ Tutai kapitíán chichaak “Takakna nuñj̄aj̄ takaakuñkia patatnastatui tájarme. Tura takakna nuñj̄aj̄ takaachkuñkia ishichik takakuisha jurunkittiwai.

²⁷ Tura winia nemasur kapitíán ajasaj̄in tusar nakitru-rarmania nu itiatarum. Tura wisha íimiaiñ máatárum” timiai.” Tu tímiayi Jesus.

Jerusarēnum Jesus wayamiayi

(Mateu 21.1-11; Márkus 11.1-11; Juan 12.12-19)

²⁸ Nuna tuasua amik Jesus Jerusarēnumaan̄i wémi-ayi. ²⁹ Petpajá pepru tura Petania péprusha Uriwiu náinnium tíjiuchi-yi; nuñ jeastatuk ajatemas ni unuiniamur̄in jímiar̄an chicharuk, ³⁰ “Tíjiuch péprunam wetarum. Túrarum nuñ umpuuruch ekemtukchamu jin̄kia-mu waja wáinkiatarme. Nu atíarum itiatarum. ³¹ Tura “ḡurukamtai atíarum?” turamainiakui, “ii uuntri wakerawai” títiarum” tímiayi.

³² Tutai unuiniamur̄i wear, Jesus timia ímiatrusan̄ wáinkiarmai ³³ Tura umpuuruchin atíakui nérentin chichainiak “ḡurukamtai umpuuruchsha atíarum?” tiarmai.

³⁴ Tutai unuiniamusha “Ii uuntri wakerawai” tiarmai.

³⁵ Tura umpuuruchin Jesusan itiararmiayi. Túrawar ni pushir̄in umpuuruchiniam awantkar Jesusan ekenkarmiayi. ³⁶ Tura Jesus wétinnium ni pushir̄in jintianam ayaparar áintrarmiayi. ³⁷ Tura Uriwiu naint awaṅkénamunam tíjiuch ajasarmatai untsur̄i aents Jesusan nemariarmia nu warainiak kakantar untsumainiak aents tujintiamun untsur̄i túran wáinkiaru ásar Yusa náar̄in uunt awajsarmiayi. ³⁸ “Yusa náar̄in winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náar̄in uunt awajsati” tiarmai.

³⁹ Tura Pariséu aents nuñ páchitra pujuarmia nu Jesusan chicharainiak “Uuntá, nemartamainia nu “takamat-sata” tiarta” tiarmai.

⁴⁰ Tutai Jesus tímiayi “Nuñkia ju takamatsarmatañkia, kayasha untsumkarainti. Nuna paant tájarme” tímiayi. ⁴¹ Jerusarēnum tíjiuch ajatemas péprun wáiniak úutuk júnis tímiayi: ⁴² “Jerusarēnumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nañkaamasai. ⁴³ Kame ti itirchat tsawant jeartamtatrume. Atumí nemasri nuñkaj̄aj̄ aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrume. ⁴⁴ Túrutma nuñká ajuñmartatrume. Tura atum̄in pujuinia nuna máawartatui. Tura ashí emesarmatai ishichk-isha kaya irumpramusha peñké atsuttawai. Wi Yusa anaikiamur̄in tarijrumna nu nekaachu asakrumin túrutmattarme.” Tu tímiayi.

Yusa Uunt Jeen suruktinian Jesus surimkiamiania nu

(Mateu 21.12-17; Márkus 11.15-19; Juan 2.13-22)

⁴⁵ Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha jíiki awe-marmiayi. ⁴⁶ Túrak juna tímiayi:

“Yús-Papinium yaunchu aarma awai: “Winia jearka Yus áusatin jeaiti” tu áarmaiti. Túrasha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeen Jesus uwempratin chichaman unuiniamur̄i puñj̄aj̄ Israer-patri úuntriṅsha, Israer-shuara jintinniur̄isha, tura pepru úuntriṅsha, itieur máamniakit tusar ti enentáimsarmiayi. ⁴⁸ Túrasha ashí aents émamkes anturainiakui máatniun tujinkiarmai.

Yusa kakarmarjijaj̄ Jesus takasmiania nu

(Mateu 21.23-27; Márkus 11.27-33)

20 Yusa Uunt Jeen Jesus uwempratin chichaman unuiniamur̄i puñj̄aj̄ Israer-patri úuntriṅsha, Israer-shuara jintinniur̄isha, Israer-shuara úuntriṅsha táarmi-ayi. ² Taar Jesusan chicharainiak “ḡYana chichamej̄aj̄ ju túram? ḡYa ju túratniuncha akuptamkai?” tiarmai.

³ Tutai Jesus tímiayi “Wisha anistajrum tusan waker-ajrume. ⁴ ḡYa Juáñnasha imiaktarria tusa akupkamia? ḡYusak? ḡAentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajarmiayi. “Yus akupkaiti” tákurniñkia, “ḡurukamtai enentáimtuscharum?” turamtatji. ⁶ Túrasha “aents akupkaiti” tákurnisha ashí aents kayaj̄aj̄ tukurmar

mantamattaji. Warí “Juan Yúsna etserniuiti” tuíniat-suk” tiarmiayi. ⁷ Nuiñkia Jesusan áiniak “Iisha nékatsji, Juan imiakratinniasha yátsuk akupkama” tiarmiayi.

⁸ Tutai Jesus tímiayi “Wisha núnisnak winia akup-tukua nuna tichattajrume” tímiayi.

Pénker-takachu armia nu
(Mateu 21.33-44; Márkus 12.1-11)

⁹ Nuyá Jesus ju métek-taku chichamjaj̄ aentsun jintintiamiayi:

“Áishmañ ni ajarj̄in uwa araa amuk, shuaran takar-tusti tusa ikiukmiai. Tura niñkia wau táchataj tusa jeachat wémai. ¹⁰ Tura júuktin tsawant jeamta juuk-man akanak jurumkit tusa takarniurj̄n takau shuarj̄in akuptukmai. Tura takarniurj̄ncha katsumkar áyatik awaiñkiarmai. ¹¹ Nuyá nérentin chíkich takarniurj̄n akupkama; tura nunasha núnisañ katsekkar, awatjar, sútsuk akupkarmai. ¹² Nuyá ataksha chikichan akupkama. Tura nunasha takau shuar katsumkar akupkarmai.’

¹³ Nuyá ukunam ajá nérenniurj̄ “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

¹⁴ Túrasha takau shuar nuna wáinkiar, nuamtak chichainiak “Juka ajá nérenniurj̄ ajastatui. Maatai. Nuikia aja iiniu átatu” tiarmai. ¹⁵ Nuna tuíniak ajan-maya j̄j̄iki máawarmai.’

Nuyá Jesus aniasmiayi “Wats ¿warí enentáimsarum, ajá nérenniurj̄ itirukattawa? ¹⁶ Niisha taa, nu takau shuáran máawartatui. Tura núnkanka chikichan susat-tawai” tímiayi.

Nuna anturkar “Yus núnaka tsankatkashti” tiarmiayi.

¹⁷ Tura Jesus nin émamkes ísar tímiayi “¿Nuikia Yus-Papinium áarma nu warintiu? Ju áarmaiti:

Kayan péñkernak jea jeamin “yajauchiiti” tusar ajapawarmia nu ashí kayajaj̄ nañkaamas péñker apu-jsamuiti. ¹⁸ Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

Pariséu achiktai tusar wakeriarmiania nu
(Mateu 21.45-46; 22.15-22; Márkus 12.12-17)

¹⁹ Israer-patri uuntrj̄ tura Israer-shuara jintinniurj̄sha “nu métek-taku chichamjaj̄ in túramji” tu nekaawar nuikí Jesusan achikjar emetatai tusar wakeriarmiayi. Tura untsurj̄ shuar Jesusan wakeruiniakui, ashamainiak túracharmiayi. ²⁰ Tura Kapitáñnium suruktai tusar wakeruiniak mamikmau shuaran Jesusan akup-tukarmiayi. Nu shuar péñker shuara núnisañ jeariar, Jesus nékatsuk yajauch chichakak tusar, aniastaj tusar wearmiayi. Ni chichakmarij̄j̄aj̄ uuntnum suruktai tusar túrawarmiayi. ²¹ Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pá-tatek íiyatsme, antsu nekas Yusa jintj̄ jintintiamé. ²² Wats turuttia, ¿Rúmanmaya uunt akupin ii kuitrj̄ akiktin péñkerkait? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamurj̄n nekáa chicharainiak, ²⁴ “Kuit itiatarum. ¿Yana yapi tura yana naari juí áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmarij̄j̄aj̄ achiktinian penké tujinkiarimiayi. Antsu aya íimprarmiayi tura takamtak pujusarmiayi.

Satuséusha achiktai tusar wakeriarmiania nu
(Mateu 22.23-33; Márkus 12.18-27)

²⁷ Nuyá Satuséu “jakamunmaya penké nantakcham-niaiti” tuinia nu, Jesusan aniastai tusar tariarmiayi.

²⁸ Aniiniak tiarmiayi “Uuntá, Muisáis juna áartam-pramiayi: “Áishmañ ni nuarj̄ júreatsaj̄n jakamtañkia ni yachj̄ nu wajen nuátkatí, yachj̄n yajutmatratsa.” Tu áarmaiti, tiarmiayi. ²⁹ Wats, siati yachi ármai, tiarmiayi.

Iwiaj̄ri nuwan nuatak yajutmatsuk jakamai. ³⁰ Ni yachj̄ wajen akintiak, nuátak, niisha yajutmatsuk jakamai.

³¹ Nuna yachj̄sha núnisañ nu wajen nuátkamai; tura núnisañ ashí siati nuna patañkí nuátkarmai. Yajutmatsuk yajutmatsuk kajinñkiarmai. ³² Tura ukunam nuwasha jakamai. ³³ Nantaktin tsawantaj̄, nantakiarmatai, ¿yana nuarj̄n atí? Ashí siati nuátkacharmaka” tiarmiayi.

³⁴ Tutai Jesus tímiayi “Ju nuñkanmañ nuatnaikiatin awai. ³⁵ Tura nantakiar atak iwiaaku ámin ainia nuka nuatnaikiachartatui. ³⁶ Warí, jákashtin áiniatsuk.

Nayaimpinmaya suntara áintsañ ajasartatui. Tura nantakiaru ásar Yusa uchirj̄ ajasartatui. ³⁷ Tura jákaru nantakiarin ainia nuna imia Muisáis jintfamiayi. Warí, numichiniam ji wajái keamunan Yus niij̄j̄aj̄ chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura Jakupu Yúsrj̄nti, tímiayi. Nú áishmañ yaunchu jákaru aij̄ “ni Yúsrj̄nti” tímiayi. Nuna taku nantaktin awai tu jintfamiayi. ³⁸ Kame jaka menkakatiunam pujuinia nuna Yúsrj̄nchuiti. Tuma asamtai jakáa Yúsrj̄nti tichamniaiti. Antsu iwiaaku ainia nuna Yúsrj̄nti. Ashí Niiniun iwiaarkainiawai” tímiayi.

³⁹ Nuna antukar Israer-shuara jintinniurj̄ “pénker tame, Uuntá” tiarmiayi.

⁴⁰ Tura nuyánka aniastinian arantukarmiayi.

¿Kristu tutai yana uchirj̄mpiait?
(Mateu 22.41-46; Márkus 12.35-37)

⁴¹ Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárurum? ⁴² Warí, Sarmu papinium Tawit niñki juna tátsuk:

“Uunt winia Úuntrun “Akupin pujutainium Winia untsuuruinj̄ pujustá, tímiayi. ⁴³ Ame nemasrumin núpeteatsaj̄n nuí pujustá” tímiayi.” Tú áarmaiti.

⁴⁴ Kame Tawitkia, Krístun chicharuk, “winia Úuntrun” taj̄sha, ¿itiurak Kristu tutai Tawitia pampanmarj̄ átiñkí?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniaj ni unuinia-murjñ Jesus jyna tímiayi:

⁴⁶ "Israer-shuaran jintintin ainia nuyá aneartarum. Niisha esaram pushin entsasar wekasataisar wakeru-iniawai. Tura jintiá ti shiir áujtusarat tusar wakeruini-awai; tura iruntai jeanam penkerj pujutainium pujus-tinian wakeruiniawai. Tura nampernumsha uunt puju-tainium pujustaj tusa wakeruiniawai. ⁴⁷ Túrasha wajé jeencha atantainiawai. Túrawar aents nekaracharat tusar ti esaram chichamjaj Yúsan áujainiawai. Nincha chíkichjaj nankaamas Yus asutiáwartatui."

Wajé ni kuítrjñ susamia nu

(Márkus 12.41-44)

21 Yusa Uunt Jeen kuítrintin kuit enketainiam kuít-ian enkeenan Jesus wáinkiamiayi. ² Tura waje kuítrjñcha jimiará uchich kuítian, reara áaniun, enkean wáinkiamiayi. ³ Wáiniak tímiayi "Nekas tájarme, jñ waje kuítrinchaítai, ashí enkeena nú nankaamas núkap enkeayi. ⁴ Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi."

Yusa Uunt Jeen saanaktinian Jesus ujakmania nu

(Mateu 24.1-2; Márkus 13.1-2)

⁵ Yusa Uunt Jeen kaya shíirmach armia nuna tura chí-kich shíirmach susamu armia nunasha chíkich shuar áujmatuk pujuarmiayi. Nuyá Jesus tímiayi:

⁶ "Átum yamáí shiir wáintrumna nu ashí emesnarta-tui. Kaya ekentramusha mash yumpuuntrartatui" tími-ayi.

Amuukatin tsawantin uruku átata nu nekaatin

(Mateu 24.3-28; Márkus 13.3-23)

⁷ Nuyá Jesusan chicharainiak "Uuntá, nusha ¿urutaik túrunat? ¿Kame jñ túrunatin jeatemamtaisha warijjajñ nekaattaj?" tiarmiayi.

⁸ Tutai Jesus tímiayi "Aneartarum; anañnawairap. Nekaatarum. Winia náarun pachisar, "wi Krístuitjaj" tau ti untsurj jñintrartatui. "Nuñka amuukatin jeayi" tu et-serkartatui. Tuíniakui anturkarum nemariirap. ⁹ Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.'

¹⁰ Nuyá tuke chicharuk tímiayi 'Shuar chíkich nuñkan-mayá shuarjajñ mesetnum ti nekas maaniawartatui.

¹¹ Ti uyrkattawai; untsurj nuñkanam tsukasha, suñkur-sha ti átatui. Nayaimpinmasha ti ashammai náñkamas túrunattawai. Nuñjajñ Yus ni kakarmarjñ iniakmastatui.'

¹² Tura jñ túruntsajñ atumin pataaturmakar achir-makartatui. Iruntai jeanamsha makurmartai tusar ju-ramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. ¹³ Nuñkia atumin túrutmakrumin wi túramu etserkatin arutmattarme. ¹⁴ Tura atumjñ nemas-

rjñ nakitramainiak "wáitaiiti" títinian tujinkiarat tusan, winia nekatairjajñ chichastinian amastatjarme. Tuma asamtai "Jurakuisha warinia tiniak kíishtumaktaj tusan áetak enentáimsashtatjai" titiarum.'

¹⁶ Tura imia atumí aparjsha surutmakartatui. Atumí yachjsha, atumí shuarjsha amikrumsha núnisarañ su-rutmakartatui. Tura máamunka máawartatui. ¹⁷ Tura Winia ajasaru asakrumin ashí aents nakitramprartatui. ¹⁸ Tura penké ishichkisha yajauch awajtamsachartatui. ¹⁹ Katsuntrarmeka iwiaaku átin wáinkiatarme.'

²⁰ Jñ pepru Jerusarénka aaj tanishrijñ suntar téntakar matsatu wáinkiumeka, emesratin jeá nekaattarme.

²¹ Nuikia jñjñ Jutía nuñkanam pujuinia nu, náinnium pis-artin áiniawai; tura jñjñ Jerusarénnum pujuinia nusha juyañka jñjñ wéitin ainiawai. Tura ajanam pujuinia nusha, péprunam waketkishtin áiniawai. ²² Nu tsawan-tincha Yus asutiámun wáinkiatatui. Yús-Papinium nu túrunatin yaunchu aarma nu uminkiatatui nu tsawantin. ²³ Nuñkanam ti wáitsatin átatui. Tura jñ aents ti asutniawartatui. Tuma asamtai nuwá ajamtin ainia nusha, tura uchi kuírchin takakainia nusha imiá itiurchatan wáinkiatatui. ²⁴ Tura juyá aents mesetnum jákartatui. Tura chikichnaka ashí nuñkanam misaawar júkiartatui; tura yajayá apach, Yúsnan enentáimtuiniat-sna nu, jñjñ Jerusarénnum wayawar najakartatui. Nu túratniunka Yus tsañkatkana nuññ túrawartatui.'

Aents Ajasu tutai tátintri

(Mateu 24.29-35, 42-44; Márkus 13.24-37)

²⁵ Nuñkia etsanmasha, nantunmasha, yáanmasha Yuska ni kakarmarjñ iniakmak nusháa túrattawai.

Nuñkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. ²⁶ Tura túrunatin ana nuna enentáim-sar mayáí ashinkiatatui. Warí, nayaimpiniam kakaram ainia nusha peantrartatui. ²⁷ Nuyá Winia, Aents Ajasu tutain, yurañminiam ti shiir ajasan winiaj wáitkiartatui. ²⁸ Nu túrunatin náñkamkui uwempratin jeatemayi tusarum kakaarum shiir enentáimsatarum.'

²⁹ Tura jñ chichamnasha nekampamiayi. 'Ikiu numi tura náñkamas numisha enentáimsatarum. ³⁰ Jñ nuñkanam ni nuké yama puñkakmatai "esat jeatemayi" tátsurmek. ³¹ Núnisarañ Wi tájana nu wáink-urmeka, Wi jñ nuñkanam akupin ajastin jeatema nu nekaatarum.'

³² Tura aents yamáí pujuinia nu jáatsajñ nusha ashí túrunattawai. Núnaka paant tájarme. ³³ Nayaimpisha nuñkasha amuukartatui. Tura winia chichampruka amuukachminiaiti. ³⁴ Nu tsawant aya aneachma jeat-tawai. Ashí aents jñ nuñkanam pujuinia nu, nuna enentáimtsuk pujuiniajñ jeattawai. Tuma asamtai atumsha anearum wekasatarum. Yajauchiniam emet-narum, aya yurumátniuk, aya umartiniak enentáimtus-urum, jñ nuñkanam ana nu ti wakerakrumniñkia péñker enentáimsatin tujinkiatarme. Nu atsutí tusarum tura nu tsawant aya áwaktamkajñ tusarum péñker wekasatarum. ³⁶ Anearum wekasatarum. Túrunattana nuññ kat-suntrataj tusarum Yus aujsa pujustarum. Túrarum

Aents Ajasu tutai íimmianum péñker átaj tusarum túratarum."

³⁷ Tuke tsawant tsawajsha Yusa Uunt Jeen Jesus unuiniamiayi. Tura káshikia Uriwiu náinnium we-wémiayi. ³⁸ Tura tuke tsawant Yusa Uunt Jeen Jesus chichaamun anturkatai tusar káshik tariarmiayi.

Jesus achiktin chichaman jurusarmiania nu
(Mateu 26.1-5, 14-16; Márkus 14.1-2, 10-11; Juan 11.45-53)

22 Wakaprutai enketaachma tanta yuatin námper, paskua tutai, jeatemamiayi. ² Israer-shuara Pátrirjsha Israer-shuara jintinniurjsha áentsun ashamainia ásar, itiurak máawaintiaji tusar ti enentáimsarmiayi.

³ Nuiñkia Iskariúti Jútasen enentáin íwianch wáinti-amiayi. Nú Jútaska Jesusa unuiniamurjñ páchitki-ayuyai. ⁴ Israer-patri úuntrñ tura Yusa Uunt Jee kapi-tián pujuarmia nuna werimiayi. Tura Jesusan tu suruk-miniaiti tusa niijjaj chichasarmiayi. ⁵ Niisha nuna antukar warasar "kuit amastatji" Jútasen tiarmiayi. ⁶ Ni-isha "ayu" tinia, aents nékachmanum suruktaj tu enentáimsamiayi.

Kristu jakamu enentáimtustin námper
(Mateu 26.17-29; Márkus 14.12-25; Juan 13.21-30; 1 Kurintianam 11.23-26)

⁷ Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai. ⁸ Tura Jesus Pitruncha, Juáñnasha akupeak "Paskua tutai námper iwiatarum" tímiayi.

⁹ Tutai niisha chichainiak "¿Tuí iwiarat tusamea wakeram?" tiarmiayi.

¹⁰ Tutai Jesus juna tímiayi "Péprunam wetarum. Jearum áishmañ yumin takaku wekáa wáinkiatarme. Nú áishmañ nemarsatarum. Tura jeá wayaakui, ¹¹ nú jea nérenniurj chichareakrum "Uunt chichartamuk unuiniamurjaj paskua yurumátin ¿tuí aa? turamui" titiarum, tímiayi. ¹² Tákurmin nu nérentin yakí písunam uunt kuártun ashí iwiaramun iniakturmastatrum. Nui ii yurumátin iwiatarum" tímiayi.

¹³ Tutai niisha wear Jesus tímiania tímiatrusañ wáinkiarimiayi. Tura paskua namperan nuí iwiararmi-ayi.

¹⁴ Yurumátin jeamtai ni unuiniamurjijaj Jesus misanam pujusarmiayi. ¹⁵ Pujusarmatai, Jesus chichaak "Wisha játsuk atumjaj ju paskua najanatniun ti wakerimjai, ¹⁶ atakka ju nunkanam atumjaj najanashtin asan. Tura antsu Yus akupeana nuí jear atak najanattaji" tímiayi.

¹⁷ Nuyá piniñkian achik, Yúsán yumiñkias, ni unuiniamurjñ tímiayi "Ju piniñ achikrum sunaisatarum. ¹⁸ Atakka ju nunkanam uwa yumirñ atumjaj umarchattajai, tajarme. Tura antsu Yus akupin ajastin jeamtai atak iijjaj umartatji" tímiayi.

¹⁹ Nuyasha yurumkan achik, Yúsán yumiñkias puuk susarmiayi. Tura chicharainiak "Juka winia ayashruiti. Winia ayashur atum péñker pujustinnium surunkat-tana núiti. Winia enentáimtursarum yuatarum" tímiayi.

²⁰ Tura yurumsua amikiarmatai piniñkian achik, "Ju piniñ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai' tímiayi.

²¹ 'Túrasha winia surutkattana nu Wijjaj métek ju misanam pujawai. ²² Kame Wi, Aents Ajasuitjiana ju, Yus iwiaramua nútiksanak jakattajai. Túrasha Winia surutkana nu nekaatí. Ti asutniattawai" tímiayi. ²³ Nuna antukar "Wíashitiaj, yákit" tunaim ajarmiayi.

Nañkaamantu ana nu

²⁴ "¿Iijjaj yaki imiá nañkaamantu aint?" tunaim ajarmi-ayi. ²⁵ Tura Jesus tímiayi "Ju nunkanam akupin ainia nu, waantu enentáimtumasar akupenawai. Tura akupe-nakuí "péñker túrin ániawai" tuñiawai. ²⁶ Tura atum-jajñkia nuka atsutí. Antsu nañkaamantu ana nu, uchichia núnik ajastiniaiti; akupeana nusha takarniua núnik ajastiniaiti. ²⁷ Enentáimsatarum. Misnam pujus yurumna nu, yurumkan ajamana nujaj ¿tuá imiá nekas nañkaamantuit? ¿Yurumna nu nekas nañkaaman-tuchukait? Tura Wisha atumin yurumkan ajamna núnisnak pujajai.'

²⁸ 'Winia itiurchatrun wáinmiaj nuí atumsha Wijjaj tuke pujumarme. ²⁹ Tuma asakrumin akupin ajastinian winia Apar surusu asamtai Wisha nútiksanak akupkat-niun súajrume. Wi akupkatjana nuí atumsha Wijjaj yurumáttarme, tura Wijjaj umartatrum, tájarme. ³⁰ Tura akupin pujutainium pujusrum, Israer-shuar tuse írutkamu akupkattarme tajai." Tu tímiayi.

Pítur "atsá nékatsjai" títinian Jesus ujakmiania nu
(Mateu 26.31-35; Márkus 14.27-31; Juan 13.36-38)

³¹ Nuyá Uunt Jesus tímiayi, "Nekaata, Semuñká. Trikiu neré tsatsamátniua áintsañ Satanás atumi enentáin páchim enentáimtikramprataj tusa seayi. ³² Tuma aij Yus enentáimtustinian kajinmatkiñ tusan Wisha Yúsán seamjai. Tura Yúsnum waketkim ame yatsum iki-akárarta" tímiayi.

³³ Tutai Semuñ tímiayi "Uuntá, sepunam enketmaini-akuisha wisha nemarsatajme. Tura mantamaini-akuisha métek jakattajai" tímiayi.

³⁴ Tutai Jesus tímiayi "Pitrú, nekas tájame, yamaik atash shiniatsañ ame menaintiú natsantrurtatme" tímiayi.

Itiurchat winiawai

³⁵ Nuyá Jesus tímiayi "Wisha yurumkajajñchu, kuít-jajñchu, sapatjajñchu akupkamjarmena nuí ¿táatram-samkarum?"

Niisha "Atsá penké táatramsachmaj" tiarmiayi.

³⁶ Tutai Nii tímiayi "Antsu yamaikia yurumkan takakkuñka takustí, kuítñiasha núnisañ; tura punian-cha takakchakka ni pushirñ suruk punian sumakti.

³⁷ Nekaatarum. Yus-Papinium yaunchu aarma ana nu wi túrunamujaj uminkiattawai. Juíti aarma:

Yajauch shuarum pachikiarmiayi.

Warí, Yus-Papinium ashí Winia aarma ana nu uminkiat-niuiti."

³⁸ Tutai ni unuiniamurí tiarmiayi "Uuntá, juí jimiariá puniá awai."

Tutai Niisha "Asati" tímiayi.

Jitsemaní ajanam Jesus Yúsan áujsamiania nu

(Mateu 26.36-46; Márkus 14.32-42)

³⁹ Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurísha nemariarmiayi.

⁴⁰ Aj jeá nin chicharuk "Itiurchat winiakui iniarajj tusarum Yus áujsatarum" tímiayi. ⁴¹ Tuasua amik arantach, kaya nankimiam jeana núnik Jesus wémiayi. Tura Yúsan áujsataj tusa tikishmarmiayi. ⁴² Tikishmar juna tímiayi "Apawá, piniñnum yapá umartinia ántsañ Wi wáitsattajna nu wakerakmeke jurutkitia. Tura Wi wakerajna nucha antsu Ame wakeramna nu atí, tajai" tímiayi.

⁴³ Nuyá, ikiakártaj tusa Yusa suntarií nayaimpinmayá tarimiayi. ⁴⁴ Tura Jesus imiá wáitias pujak nú kakaram Yúsan áujsamiayi. Tura ni seǎrmarísha numpá ántsañ nunká kitiawarmiayi.

⁴⁵ Yúsan augsua amik wajaki ni unuiniamuríj werimiayi. Tura kúntuts enentáimmaríjjajj ti pimpiki kanúu tepenan tarimiayi. ⁴⁶ Nuiñkia chicharainiak "¿Urukamtai kanúu teparum? Itiurchat winiakui iniarajj tusarum nantakrum Yus áujsatarum' tímiayi.

Jesusan achikiarmiania nu

(Mateu 26.47-56; Márkus 14.43-50; Juan 18.2-11)

⁴⁷ Jesus tuke chichaa pujaj, untsurí shuar táarmiayi. Tura nuní eemka Jesusa unuiniamurí Jútas naartin winimiayi. Tura Jesusan mukunatajtsa tarunmiayi. ⁴⁸ Tá-matai Jesus chicharuk "Jútasá, ¿Aents Ajasu tutai mukunamek surutkattam?" tímiayi.

⁴⁹ Jesusajj pujuarmia nu, túmamun wáinkiar "¿Uunt puniabajj íjjuartatjik?" tiarmiayi. ⁵⁰ Tura chikichik Patri uuntri takarniurí kuishin untsuurin tsupirkamiayi.

⁵¹ Tura Jesus tímiayi "Iniaisatarum." Nuna tinia ni kuishin antiñ tsuármiai. ⁵² Nuyá Israer-patri úuntrin, Yus-jeǎ úuntrincha, tura pepru úuntrincha, Nin achik-taj tusa tariarmia nuna chicharuk "¿Wisha kasakaitiaj. Urukamtai puniabajjisha numijjajjisha tarutniuram?"

⁵³ Nuik Yusa Uunt Jeǎn tuke tsawant atumjajj pujumaj nuí achirkachmarme. Túrasha átum kiritniumiǎ kakarmajajj nupetkatin yamá tsawantin tsañkatka-muitrume" tímiayi Jesus.

Pítiur "Jesusnaka nékatsjai" tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuiñkia Jesusan achikiar emetawar Israer-patri uuntri jeǎn júkiarmiayi. Tura Pítrusha íkiañ nemarki wémiayi. ⁵⁵ Tura aǎch jinia ikiapármiai. Túrawar anamuk pujuarmiayi. Pítrusha nijjajj pujusmiayi. ⁵⁶ Tura nuwǎ, Patrj takarniurí amia nu, Pítiur jinia anamuk pujan wáiniak "Ju áishmansha Nijjajj pujumiayi" tímiayi.

⁵⁷ Tutai Pítiur chichaak "Nuwá, Nin nékatsjai" tímiayi.

⁵⁸ Tura árusañ chíkich nin wáiniak "Amesha Nijn pá-chitkaiatme" tímiayi.

Tutai Pítiur tímiayi "Atsá. Wikia áñkia páchitkiatsjai" tímiayi.

⁵⁹ Chikichik ura nankaamasmatai chíkich apach chichaak "Nekas ju áishmansha Nijjajj pujumiayi. Warí, niisha Kariréanmayañchakait" tímiayi.

⁶⁰ Tutai Pítiur chichaak "Ame támena núnaka nékatsjai" tímiayi. Nú chichamaik Pítiur chicháa pujajñk' atash shiniukmiayi. ⁶¹ Tura nuñkia Uunt Jesus Pítrun apajas íismiayi. Túra "atah shiniatsañ ame menaintiu natsantrurtatme" Uunt Jesus timia nuna enentáimpramiayi. ⁶² Nuyá Pítiur jiiñki ti útmiayi.

Jesusan wishikrarmiayi

(Mateu 26.67-68; Márkus 14.65)

⁶³ Áishman Jesusan wáiniarmiania nu ti wishikiainiak awattiarimiayi. ⁶⁴ Jjin epetkar yapiniam awattiar chicharainiak "Nekamata, ya awatama" tiarmiayi. ⁶⁵ Tura katsekainiak ti untsurí chikichnasha náñkamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan 18.19-24)

⁶⁶ Tsawarmatai, Israer-shuara úuntriñsha, Israer-patri úuntriñsha, Israer-shuara jintinnurísha iruntrar ni iruntairjin ejeniarmiayi. Nuí chicharainiak ⁶⁷ "Paant titiá. ¿Yus anaikiamu Kristu tutaia núkaitiam?" tiarmiayi.

Tutai Jesus tímiayi "Wi "ee" tákuisha, "nekasaiti" tíchattarme. ⁶⁸ Tura Wi aníamsha áirkashtatrume, túrasha akuptukchattarme. ⁶⁹ Tura wárik Wisha Aents Ajasuitjiana nu, ashí nankaamaku ajasan, Yusa untsurinj pujustajjai" tímiayi.

⁷⁰ Tutai niisha tiarmiayi "¿Nuiñkia amesha Yusa Uchirñkaitiam?"

Tutai Jesus tímiayi "Ee, Wítjai, átum Winia túrutrum núnisnak."

⁷¹ Tutai niisha tiarmiayi "Warí, ¿iisha chíkich ujatkat tusar atsumajik? Imia niñki chichaamu antukchajik" tiarmiayi.

Piratuí Jesusan júkiarmiania nu

(Mateu 27.1-2, 11-14; Márkus 15.1-5; Juan 18.28-38)

23 Nuyá ashí Uunt iruntrarmia nu wajakar Rúmanmayá akupin Piratuí Jesusan júkiarmiayi.

² Nuí jeawar, Piratun chicharainiak "Ju áishman íi shuara awajimtkiar enentáimtkiainia nu nekaamji. Rúmanmayá uunt akupin Séseran kuit akiktinian suritramaji. Tura nu arant Niñki, akupin Kristu tutaintjai, tawai" tiarmiayi.

³ Tutai Piratu Jesusan chicharuk "¿Ame Israer-shuara akupniurñkaitiam?" tímiayi.

Tutai Jesus tímiayi "Ee, núitjai, ame támena núnisnak."

⁴ Nuyá Israer-patri úuntrincha tura aents nuí iruntrarmia nunasha Piratu chicharainiak "Ju áishman tu-naan túran penké wáinkiachuitjai, tajai" tímiayi.

⁵ Túrasha niisha nú kakantar chicharainiak “Antsu nekas ashí Jútía nuṅkanmayá aentsun ni unuiniana nu-jají akajenawai. Kariréa nuṅkanmayá naṅkaamas ímia-jajísha tayí” tímiayi.

⁶ Piratusha nuna antuk “Nu áishmaṅ ¿Kariréan-mayaṅkát?” tímiayi.

⁷ “Ee” tuiniakui, Erutisa akuptukarmiayi. Erutiska Kariréanmayá aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurín áujmatman ti antukmiayi. Tuma asa, “Wi íimiaí aents tujintiamun túrashtimpiash” tusa Jesusan wáiniak warasmiayi. ⁹ Jesusan ti nukap aniasmiayi; túramsha peṅké áimkiachmiayi. ¹⁰ Nuísha Israer-patri úuntriísha, tura Israer-shuara jintinniurísha yajauchiiti tusar charaatum awajiarimiayi. ¹¹ Tura Erutissha ni sun-tarijijai Jesusan yajauch enentáimtuiniak Nin wishiki-ainiak ti peṅker pushin, akupniu entsatairiya ánniun, áentsarmiayi. Nuyásha Erutis ataksha Piratuín akup-kamiayi. ¹² Túram nu tsawant Piratu Erutisjai nawamnaikiarmiayi. Kame yáunchuka nemasnaikiau árimiayi.

Jesusan “mantamnati” tiarmiania nu

(Mateu 27.15-26; Márkus 15.6-15; Juan 18.39–19.16)

¹³ Nuyá Israer-patri úuntriin aentsu úuntriijai tura peṅké aentsjai Piratu ikiaanak tímiayi ¹⁴ “Ju áishmaṅ aentsu awajimtikuii tusarum itiartintrume. Túrasha átum ímprumniṅ anintrusan yajauch átum tárumna nuna peṅké nekarachjai. ¹⁵ Erutissha núnisaṅ yajauchin nekaachai. Warí, juí awaiṅkichmaka. Nuikia páantchakait jú áishmaṅ jakamnia tunaanka túrichuiti” tímiayi.

¹⁶ Túraitiat tuke túrutai asamtai, jísat jeakui sepun-mayaṅ chikichik áishmaṅkan Piratu aṅkant akupkatin ámiayi. Tuma asamtai, nii chichaak “juna asutián awe-matjai” tímiayi.

¹⁸ Tura aencha iruntrar ti unsumainiak “Atsá; júcha. Ju nakitiaji. Antsu Parapás akupkata” tiarmiayi. ¹⁹ Nu Parapássha akupniun nakitiak mesetan najana asa tura maṅkartin asa sepunam eṅkeamuyayi.

²⁰ Piratuka Jesusan akupkattsa wakerak ataksha aentsun áujarmiayi. ²¹ Túrasha nú arant unsumainiak “Atsá. Krúsnum mantamnati” tiarmiayi.

²² Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachiashtusan, aniasan peṅké nekarachjai. Asutián akupkatjai” tímiayi.

²³ Tura niisha kakaram unsumainiak “Jesus mantamnati” tiarmiayi. Kame aencha tura Patri úuntriísha ti unsumaina ásarmatai ni wakeramurí tsanṅkatnakarmi-ayi. ²⁴ Nii wakerarmia nuna Piratu “túrattajai” tímiayi.

²⁵ Tuma asa Parapásan, mesetan najanin tura maṅkartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

Jesusan krúsnum ajintrurarmiania nu

(Mateu 27.32-44; Márkus 15.21-32; Juan 19.17-27)

²⁶ Jesusan jukitiasa pujuiniaí Serini nuṅkanmayá Semun ni pépruriya Jerusarénum yama jeamiayi. Nin achikiar, Jesusa krusí ayantkar “ni ukurí wetá” tiarmi-ayi.

²⁷ Untsurí aents Jesusan nemariarmiayi. Tura untsurí nuwasha ti kuntuts enentáimainiak úutkiar tura wa-wa ajakiar wearmiayi. ²⁸ Túmainiakui Jesus nin iis, “Jerusarénumiá nuwatiram Winia enentáimtursarum úuttiirap. Antsu atumniak tura atumí uchirí enentáim-tusarum úuttiarum. ²⁹ Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chikich aentsjai naṅkaamas peṅker pujuiniawai” tiartatui. ³⁰ Nu tsawantai aents chicharainiak “Náint in nekent-mak yuturmaartaí” tiartatui. ³¹ Warí, numi sameka áinis yajauch aya náṅkamna aṅsha ju iturchat átsuk. Tura numi kukaru ainkiamtai iturak nú yajauch túrunachatí.” Tu timiayi Jesus.

³² Tura Jesusjai krúsnum maatai tusar jímiar yajauch áishmaṅkan júkiarmiayi. ³³ Karawír nain tutainium jeawar Jesusan krúsnum ajintrurarmiayi. Tura Jesusa untsurini chikichik yajauch áishmaṅkan tura ni menariní chikich yajauch áishmaṅkan núnisaṅ krús-num ajintrurarmiayi.

³⁴ Tura Jesus krúsnum ajintraku pujuram, chichaak “Apawá, tsanṅkurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushirí jukit tusar nakurusarmiayi. ³⁵ Péprunmayá aents ii waja-tiarmiayi. Tura uunt armia nusha Nin wishikiainiak “Chikichnaka uwemtikiuiti. Wats, yamá nekas Yusa anaikiamurí Kristu tútainkiunṅka imia Niṅki uwémpatí” tiarmiayi.

³⁶ Suntarsha Nin wishikrarmiayi. Tariar churuínian aartai tusar awajiarimiayi. ³⁷ Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. ³⁸ Tura muuknumaani, Kriaku chichamjai, Rúmanmayá apach chichamjajísha tura Israer chichamjajísha ju árar anujkamú ámiayi: *JÚITI IS-RAER-SHUARA UUNT AKUPIN*

³⁹ Chikichik yajauch áishmaṅ nuj ajintruamu amia nu kátsekeak chicharuk “Amesha nekas Yusa anaikiamurinkiumka amek uwemprata tura incha uwemtikramprata” tímiayi. ⁴⁰ Tura chikich ni tsaniak-marín kakantar chicharuk “¿Amesha Niijíai métek asut-niátasa pujayatam, Yus ashamatsmek? tímiayi. ⁴¹ Iikia yajauch asar wáitsatniuitji; ii tunaarí akikmakur wáitia-ji. Antsu ju áishmaṅka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pu-jutainium yamá tsawant Wijíai pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin aĵ ashí nuŋkanam ti kirit ajasmiayi. Tura menaintiú ura naŋkaamasu aĵ, nantu nuŋkaach ajassha tuke kirit ámiayi. ⁴⁵ Tsawái nantusha mushat-marmiyai. Tura Jerusaréŋnum Yusa Uunt Jeencha tarach ajamu aa jímiapetek nakaakamiayi. ⁴⁶ Nuyá Jesus untsukum “Apawá, winia wakantrun Amjĵin ikiuajai” tímiayi. Nuna tinia jakamiayi.

⁴⁷ Suntara kapitiantri nu túrunamun wáiniak, Yusa náarĵn shiir awajeak “Jusha imiá nekas péŋker áish-maŋkuyi” tímiayi.

⁴⁸ Tura untsurĵ aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi. ⁴⁹ Tura Jesusa amikrĵsha tura nuwá Kariréanmayá Nin nemariarmia nusha íkiaĵ wajasar ii wajarmiyai.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin péŋker áishmaŋ ámiayi ni naarĵ Jusé. Arimatéa pepu Jutía nuŋkanam ana nuyauyayi. Israer-shuara Uunt Iruntaĵin páchitkiauyayi. ⁵¹ Yus ju nuŋkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. ⁵² Tuma asamtai Piratuĵ we Jesusa ayashin seamiyai. ⁵³ Piratu “ayu” takui, Jesusa ayashin krúsnumiá jusa tarachjajĵ penuar kaya táurmanum iwiarsamiayi. Nu táurmanum chíkich iwiarsachmauyayi. ⁵⁴ Iwiaratin tsawantaj, ayampratin tsawant tsawastatuk ajasmatai túrunamiayi.

⁵⁵ Tura nuwá Kariréanmayá jukiniutak Jesusan nemarsarmia nusha iwiarsamunam weriar, Jesusa ayashĵi itiur ikusmait nuna iisarmiayi. ⁵⁶ Iisar ikiuak ni jeen waketkiarmiayi. Tura Jesusa ayashĵi mejeeniĵ tusar kuŋkuinian iwiararmiayi. Tura ayampratin tsawantaj, Israer-shuar akupkamun umikiar ayamprarmiyai.

Jesus nantakmiania nu

(Mateu 28.1-10; Márkus 16.1-8; Juan 20.1-10)

24 Tumiŋtin káshik kuŋkuinian iwiamun júkiar nu nuwá Jesus iwiarsamunam weriarmiayi. Tura chíkich nuwásha atampriarmiayi. ² Tura iwiarsamu kaya atutkamu urani aan wáinkiarimiayi. ³ Tura wayawar uunt Jesusa ayashin wáinkiacharmiyai. ⁴ Wáinkiachu ásar ashamkarmiayi. Tura “itiurkatjik” tiarmiayi. Tumaj jimiará áishmaŋkan pushin win-charpatniun entsaru nin ayaamach wajainian wáinkiarimiayi. ⁵ Nuna wáinkiar ti sapijmiainiak tsuntsumawarmiyai. Túmakui nu áishmaŋ chicharainiak “¿Iwiaakusha urukamtaĵi jakaantumsha eĵarum? tiarmiayi. ⁶ Juĵi pujatsui. Antsu nantakni. Nékatsumek. Niisha Kariréanam tuke pujus ⁷ “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantajĵ nantaktiat-jai” turamchamkarum” tímiayi.

⁸ Nuna takui Jesus timian enentáimprarmiyai. ⁹ Tura iwiarsamunmayá waketki taar, Jesusa unuiniamurĵin auntse armia nuna tura chikichnasha ashí nu túrunamun ujakarmiayi. ¹⁰ Jesusa unuiniamurĵin ujakarmia nu ju áiniawai: Maktaranmayá Marí, Juánasha, Jakupu nukurĵ Marisha, tura chíkich nuwájajĵ. ¹¹ Tura Jesusa unuiniamurĵisha nuwá tuíniakuisha nekasaiti tu enentáimtsuk “wáuruk tuíniawai” tiarmiayi.

¹² Túrasha Pítrusha jiinki Jesus iwiarsamunam tsékeŋki werimiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiyai.

Emaús wetai jĵintianmaani túrunamia nu

(Márkus 16.12-13)

¹³ Nu tsawantajĵ Jesusa nemarniurĵi jímiar Emaús péprunam wéarmiayi. Emaúska Jerusaréŋnumiá auntse kirumitru jeá pujawai. ¹⁴ Túrunamia nuna chichaki wearmiayi. ¹⁵ “Itiurkit” tu aujmatki weenaj imia Jesus taa nuĵ páchiniak niĵijajĵ wearmiayi. ¹⁶ Tura wáinkiarat nekaashtin asamtai yait nekaacharmiyai.

¹⁷ We-wénakua Jesus chicharainiak “Jintiasha ¿warĵi áujmatkirum wéarum? ¿Urukamtaĵi kúntuts enentáimprum?” tímiayi.

¹⁸ Chikichik, Kreupas náartin chicharuk “Jerusaréŋnum túruna nuna ashí nékainiawai. ¿Ámeka ameké túrunamia nu nékachu páchitkiam?” tímiayi.

¹⁹ Tutai Jesus tímiayi “¿Warĵi urukait?”

Tutai tiarmiayi “Entá, Nasarénumiá Jesusa túrunamurĵi taji. Niisha Yúsnan etserin asa Yusa kakarmarĵijajĵ chichasmiayi tura nuna kakarmarĵijajĵ takasmiayi. Núnaka ashí aents nékainiawai. ²⁰ Tura ii Pátrirĵi uuntri tura ii péprurĵi uuntri “tunáa jakamnia túrayi” tusar “krúsnum mantamnati” tiarmiayi. ²¹ Tura ii Israer-aentstin uwentikrampratin tu enentáimsamji. Tura ni maa-musha menaintiú tsawant naŋkaamasai. ²² Túrasha ii nuwá ni iwiarsamunam yamaí káshik weriar ni ayashin wáinkiacharmai. Tura “Yusa suntarĵi wáinkiaĵi tura “Jesus iwiakuiti” túramji” tiarmi. Nuna tu uĵatmakakrin ti enentáimpraji. ²⁴ Nuyá ĵi shuar iwiarsamun weriar, nuwá tiarmiia tímiatrusaŋ wáinkiarimiayi. Tura Jesusnaka wáinkiacharmai.” Tu ujakarmaĵi Jesusan.

²⁵ Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtat-rume. ²⁶ ¿Yusa anaikiamurĵi, Kristu tutai, shiir awajnat-suk ti wáitsashtinkiait?” tímiayi.

²⁷ Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurĵin áararmia nuna jintintiatasa naŋkamamiayi.

²⁸ Ayu, nii wearmia nú peprunam jeawarmiyai. Tura Jesuska nuĵ naŋkaamaki wétaj tau ajamiayi. ²⁹ Tura ni-isha chicharainiak “Weep. Iĵijajĵ pujustá. Warĵi, nantu akaikiyi, kirit ajatemsai” tiarmiayi.

Tutai Jesus niĵijajĵ pujustaj tusa wayamiayi. ³⁰ Tura ni-ĵijajĵ irunar misanam pujus, yurumkan achik, Yúsan yu-minkias nincha puuk súsarmiayi. ³¹ Nu chichamaik, ni ĵijĵ urannia núnikiarmataĵi Jesusan nekaawarmiyai. Tura Niisha nú chichamaik meŋkakamiayi. ³² Tura nu

shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaj” tiarmiayi.

³³ Nuyá, Emaúsnumiá wárik jíinkiar Jerusarénum waketkiarmiayi. Nuj Jesusa unuiniamurin auntse armia nuna tura chíkich shuar Jesusan nemariarmia nunasha iruntrar pujuinian wáinkiararmiayi. ³⁴ Auntse armia nusha tiarmiayi “Uunt Jesus nekas nantakni. Semuñ Nin wáinkiaiti.”

³⁵ Tutai niisha jintiá túrunamun ujakarmiayi. “Jesus yurumkan ajaamakui nuñ nekaamji” tiarmiayi.

Ni unuiniamurin Jesus wantintiu kmiania nu

(Mateu 28.16-20; Márkus 16.14-18; Juan 20.19-23)

³⁶ Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

³⁷ Nuna antukar, ti sapijmiakar, wakanchashit, enentáimsarmiayi. ³⁸ Tura Jesus chicharainiak “¿Urukamtai sapijmiakrum wakanchashit, tu enentáimsarum?”

³⁹ Winia uwejrusha, nawersha íirtustarum. Wíkiitjai. Takarsa íirsatarum. Warí, wakancha ayashtinkiait, ukunchtinkiait” tímiayi.

⁴⁰ Nuna tinia ni uwejencha nawencha iniaktusarmiayi. ⁴¹ Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi. ⁴² Takui, namaknasha, míshkincha súsarmiayi. ⁴³ Tura Jesus nuna achik niisha íimiainiamunmañ yuamiayi. ⁴⁴ Tura nin tiarmiayi “Winia túrutawarma nuna, Wi atumjai nuik pujusan

tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiwarmiayi.

⁴⁶ Jintintiuk juna tímiayi: “Yusa anaikiamurj Kristu tutai jaka menaintiú tsawantaj jakamunmayá nantaktinia nu yáunchuk áarmauyayi. Tura Wi nú Krístuchukaitiaj.

⁴⁷ Winia náarun pachisar, Jerusarénumiá nañkama ashí nuñkanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapajjátniuiti. Tura tu etserkatniua nusha yaunchu áarmauyayi. ⁴⁸ Tura wi túrunamu neka asarum etserkatniuitrume, tímiayi. ⁴⁹ Tura winia Apar, winia Wakantrun susartatjai, turammarumna nuna akuptuktatjarme. Tura nayaimpinmayá táatsajñ jui Jerusaréñ péprunam pujústárum. Taa ni kakarmarñ suramsattarme.” Tu tímiayi.

Jesus nayaimpiniam wakamiania nu

(Márkus 16.19-20)

⁵⁰ Nuyá Jesus Jerusaréñ péprunmayá júkiar Petania péprunam ejeniarmiayi. Tura nuñ ni uweje takuí, “Yus yáinmakarti” tímiayi. ⁵¹ Nuna tu pujus, niijá kanakmiayi. Tura nayaimpiniam junakmiayi. ⁵² Ni unuiniamurjsha Nin imiá shiir enentáimtusarmiayi. Tura nuyá ti warasar Jerusarénum waketkiarmiayi. ⁵³ Tura Yusa Uunt Jeen pujusar Yusa náarñ shiir awajú pujuarmiayi. Áukete.

JUAN

Chícham aents ajasmiania nu

1 Ashí naŋkamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tíminiati. Chichamsha Yusjaj pujuyayi. Chichamsha Yúsauyayi. ² Yámaŋkamtaik Niisha pujuyayi Yusjaj. ³ Ashí najanamu ainia nu Niijjaj najanamuiti. Nii najanachmaka peŋké atsawai. ⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniati. ⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

⁶ Áishmaŋ ámiayi, Yus akupkamu, ni naari Juan. ⁷ Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. ⁸ Juansha nu tsáapnincha uyayi. Áyatik akupkamuyayi tsáapnin chichaman etserkat tusa. ⁹ Nu tsáapninkia nekas tsáapniniaiti. Ju nuŋkanam taa ashí shuaran enentáin tsáapniartiniati.

¹⁰ Chichamsha taramiayi ju nuŋkanam. Tura nuŋkasha ni najanamu ain, nuŋkaya aents Nin nekaacharmiayi. ¹¹ Támiayi ni nuŋkén tura ni shuarsha ni enentáin itiaacharmiayi. ¹² Tuma ain chíkich shuar Nin enentáimtuiniak ni enentáin itiaawaru nuna Yusa uchirí ajastinian Yus tsaŋkatkamiayi. ¹³ Niisha Yusa uchirí ajasar ataksha númpentin ayashímkiacharmái. Áentsnúmiá akiiniachu áiniawai niisha. Áishmaŋ wakera mujajsha akiiniacharmái. Antsu Yúsnumiá akiiniawaru ásar Yusa uchirí áiniawai.

¹⁴ Nú Chichamsha ayashtin ajas iijjaj núkap tsawant pujumiayi. Yusa aneŋkratairijjaj piakuyi. Aya nekasa nunak chichaamiayi. Núnisaŋ ni péŋkerin, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji. ¹⁵ Juansha Nin neka asa, étseruk tímiayi “Júiti wi tímiaj nu: “Winia ukuruiní winitiana nu wíjjajŋkia émkaiti. Maa, wi atsajsha tuke pujuyayi” tiniujai.” Tu etserkamiayi.

¹⁶ Chichamsha ti aneŋkartin asa ashí péŋker ana nuna iniaitsuk súramji. ¹⁷ Yusa akupeamurín Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti. ¹⁸ Chikichkia Yúsan peŋké wáinkiachuiti. Tura ni Uchirí chikichkia nu tuke Niijjaj tsaniaku asa Yúsan paant awajturmasuitji.

Imiakratin Juan Jesukrístunun etserkamiania nu

(Mateu 3.11-12; Márkus 1.7-8; Rúkas 3.15-17)

¹⁹ Jerusaréŋnumiá Israer-shuar ni Pátriríncha Riwíshuarjaj Juan kaj akupkarmiayi yákit túsar.

²⁰ Inintruiniakui paant ujakmiayi. “Wikia Krístuchitjai” tímiayi.

²¹ Takui ataksha aniasarmiayi “¿Nuikia yáitiam. Yúsnan etserin yaunchu amia nú Eriaskaitiam?” tiarmiayi. Juansha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

²² Takui “¿Nu arantcha yáitiam. In akuptamkajnia nusha warí títiataji. Warintia enentáimiam?” tiarmiayi.

²³ Juansha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nuŋkanam shuar untsumui “Ti uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

²⁴ Juanjaj chichainiakka Pariséu akupkarma áarmiayi.

²⁵ Niisha tiarmiayi “Nuikia Krístuchitiatmesha, Eriashaitiatmesha, Yúsnan etserin tátinia núchaitiatmesha ¿urukamtaim iakiakratam?” tiarmiayi.

²⁶ Juansha tímiayi “Wikia entsajaj imiakratjai. Tura átum írutramunam shuar átum nékatsrumna nu wajaawai. ²⁷ Niisha winia ukuruiní winiyat wíjjajŋkia ti naŋkaamantuiti. Nii ti péŋker asamtaim wisha ni sapatrí jŋkiamuríncha atitrachminiaitjai” tímiayi.

²⁸ Nuka Petapara peprunam túrunamiayi. Peta-parasha Juan imiakratmia nuj Jurtaŋ entsa amain amai.

Jesus Yusa Murikrínti

²⁹ Nuyá kashin Juan Jesusan winian wáiniak tímiayi “Íistarum. Núiti Yusa Murikrí ashí aentsu tunaarín júana nu. ³⁰ Núiti wi timiaj nu, “Winia ukuruiní winiana nu wíjjajŋkia naŋkaamantuiti. Tura wi atsajsha tuke pujuyayi” tímiajai. ³¹ Wisha Nin nekaachmajai. Tura ashí Israer-shuar Nin nekaawarat tusan imiakín támajai” tímiayi.

³² Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekem-samai. ³³ Nu túruntsajin tuke Nin nekaachmajai. Tura Yuska winia imiakrattinian akuptak turutmiai “Chikichik shuarum Yusa Wakaní tara ekemsa wáinkiam, nujaj nekaattame. Yusa Péŋker Wakaníjjaj imiakratniua núiti” túrutmiayi. Tura nujaj Nin nekaamjai. ³⁴ Yamaikia

wainkia asan ti paant nékajai tí nekas Yusa Uchirínti” tímiayi Juan.

Jesusa unuiniamurj emka armia nu

³⁵ Kashincha ataksha Juan nuj wajasmiaiyi ni unuiniamurj jímiarjaj. ³⁶ Jesussha nuj nankaamakui Juan tímiayi “Iistarum, Yusa Murjkrj áuwiti.”

³⁷ Juanka unuiniamurj nuna antukar mai Jesusan pataatukarmiaiyi. ³⁸ Jesussha úkumur ímias nu jímiaran wininian wáinkíamiayi.

Tura tímiayi “¿Ya eḡarum?”

Niisha “Uuntá, ¿tuḡ pujam?” tiarmiaiyi.

³⁹ Jesussha tímiayi “Wats, iitiarum.”

Niisha wear ni pujutairin wáinkiamiaiyi. Tura áanḡú ajasmatai nu tsawantaḡ nuḡ kintiamprarmiaiyi.

⁴⁰ Juanka chichamēn antukar Jesusan pataatukaruka jímiar ármiaiyi. Chikichik Antresauyayi. Niisha Semuḡ Pitru yachijiyayi. ⁴¹ Antressha wárik ni yachj Semuḡkan eḡaktajtsa wémiayi. Tura wáiniak “Misías wáinkiaji” tímiayi. Misíaska ni chichamēn “Kristu” tawai. Krístuka Israer-shuaran yaḡḡkiarat tusa Yus anaikiamuiti.

⁴² Nuyá Antres ni yachj Semuḡkan Jesus pujamunam jukimiayi. Jesussha wáiniak tímiayi “Ámetme Semuḡ, Junasa uchirj. Túrasha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesus Jiripijaj tura Natanaérjaj chichasmiania nu

⁴³ Kashincha Jesus Kariréa nuḡkanam wétajtsa pujumiayi. Tura Jiripin wáiniak “Nemartusta” tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi. ⁴⁵ Nuyá Jiripi Natanaéran eḡakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirj. Nasarét péprunmayaiti.”

⁴⁶ Natanaérsha tímiayi “¿Nasarénumiḡ péḡker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjiuch winian wáiniak tímiayi “Ju shuar iistarum. Ti péḡker Israer-shuaraiti. Peḡké anaḡkartichuiti.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsajin wáinkíajme iku numirin ejamkam wajamin.”

⁴⁹ Natanaér nuikia tímiayi, “Uunta, nekas Yusa Uchirjime. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Iku numirin ajamkam wajamin wáinkíajme” takui Winia enentáimturamek? Antsu nuna nankaamas nekaachmin ana nusha wáinkíattame” tímiayi. ⁵¹ Nuyasha Jesus tímiayi “Wi nekas tájarne, Aents Ajasu asan atumsha nayaim uranmianum Yusa suntarj Winin tara waka ajainia wáinkíattarme.” Tu tímiayi.

Nuatnaikiatin jísat Kaná péprunam ámiania nu

2 Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nuḡkanmauyayi. Jesusa nukurjsha nuḡ pujumiayi. ² Jesussha ni unuiniamurjsha nu nuatnaiyamunam ipiaamu ármiaiyi.

³ Umutai amuukamtaí Jesusa nukurj tímiayi “Umutai amuukai. Peḡké takakainiatsui.”

⁴ Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastin jeaatsui.”

⁵ Nuyá umutain wáinmainia nuna ni nukurj tímiayi “Ashí ni tana nu umiktárum.”

⁶ Nuḡ kayajaj najanam yumi-yaraatai sais (6) ámiayi. Nu yaraatainmayá Israer-shuar ni ewejéncha ni nawéncha nijiamau ármiaiyi Yus shiir enentáimtursatí tusar. Chíkich chíkich yaraatainiam uchenta (80) rítrusha, siaḡ (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiaiyi. ⁸ Áimprarmatai Jesus tímiayi “Pai, ishichik shikikrum námper chicharu suutarum.” Tutai nútiksḡ túrawarmiaiyi.

⁹ Jista chicharusha nu umutai ajasun nekáprámiayi. Yaraatainmayá yumi jusamun nekaachmai niisha tura umutai ajamau jusaru ásar nékarmai. Jista chicharusha nuwḡtun untsuk ¹⁰ tímiayi “Jístanmaḡka péḡker umutain emka suíniatsuk. Tura jémararmatainkia tímianchan suiniatsuk. Túrasha ámeke péḡker umutai ikusam yamá jíkchamek” tímiayi.

¹¹ Jesus túramu Kananum Kariréa nuḡkanam túrunamiayi. Nújajinkia Jesus emka ni kakarmarin paant iniaktusmiayi. Nuna íisar ni unuiniamurjsha Nin enentáimtusarmiaiyi.

¹² Nuyá Kapernáum péprunam wémiayi. Ni nukurjsha ni yachjsha ni unuiniamurjsha nemariarmiaiyi. Nuḡsha untsurj tsawant pujusarmiaiyi.

Yusa Uunt Jeen suruktinian Jesus surimkiamiania nu
(Mateu 21.12-13; Márkus 11.15-18; Rúkas 19.45-46)

¹³ Israer-shuara namperj, paskua tutai, ishichik ajasmatai Jesus Jerusarénum wémiayi. ¹⁴ Nuḡ jeá Yusa Uunt Jeen súruinian wáinkíamiayi. Turuncha murikniasha yampitsnasha súrin ármiaiyi. Chikichcha ni misarin pujusar kuítian yapajjñiancha wáinkíamiayi.

¹⁵ Nuna wáiniak yaraḡken chapikmar asutkiartutain najana nuḡaj ashí waakartiuk murikrintiuk aḡ jíirmiayi. Kuítian yapajniu misarincha ayantar ni kuítrin nuḡká utsḡḡkarmiaiyi. ¹⁶ Yampitsan súrinniasha tímiayi “Nuka juyá jíitiarum. Winia Aparu Jeen surutai jeḡ nanawairap” tímiayi.

¹⁷ Nuna íisar ni unuiniamurj yaunchu Yus-Papinium áarman enentáimprarmiaiyi. Ju áarmaiti: “Ame Jeem shiir atí tusan ti wakerukuitjai.”

¹⁸ Nuikia Israer-shuara uuntri Jesusan aniasarmiaiyi “Juna túramniaitjai tusam ¿warí kakarmak iniakmastatam?”

¹⁹ Jesussha tímiayi “Ju Jeḡ sáḡkiakrumin menaintiú tsawantaḡ iniantaittiai Wikia.”

²⁰ Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantai jeamtámeash.” ²¹ Kame Jesus “Jeá” chichayat ni ayashin tímiayi. ²² Tuma asamtai Jesus ukunam jakamunmayá nantakmiatai ni unuiniamurí ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashí shuara enentáin nékawai

²³ Paskua námpertin ti untsurí Jerusarénum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi. ²⁴ Tuma ain Jesus ashí neka asa ninkia enentáimtuscharmiayi. ²⁵ Niñki ashí shuara enentáin neka asa chíkich ujatkat tusa atsumchamiayi.

Jesus Nikiutémujaí

3 Shuar ámiayi ni naarí Nikiutému. Niisha Pariséu asa nii tuinia áintsan Yúsnan takauyayi. Niisha Israer-shuara uuntriyaí. ² Niisha kashi Jesusaí irastajtsa wé tímiayi “Uuntá, shuáran unuinariat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

³ Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

⁴ Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampújén enkempramniakait atak akiiniatniuna?”

⁵ Ataksha Jesus tímiayi “Tí nekas tájame. Shuar entsayasha tura Wakanniumiásha akiiniachuka Yus akupeamunam penké pachiinkiashtatui. ⁶ Ayashniumiá akiinia nuka ayashchakait. Núnisan Wakanniumiá akiinia nuka wakanchakait. ⁷ Wi “atak yamaram akiiniatniuiti” takui itiurchat enentáimpraip. ⁸ Nase enentáimpratá. Nase náñkamsan umpúawai. Amesha ántame tura tuyan winiá túrasha tuiñ weti nékatsme. Núniskete ashí Wakanniumiá akiinia nu.”

⁹ Tuma asamtai Nikiutémuasha atak anias “¿Jusha itiuurak áminiat?” tímiayi.

¹⁰ Jesus áikmiayi “Ame Israer-shuara jintinniurinti-atmesha ¿itiura nékatsmea? ¹¹ Ti nekasan tájame. Nekas nékakur chichaaji. Íismajnia nusha ujaaji. Tuma ain ii chichame ántatsrume. ¹² Aya ju nunkanmayá túramu ujaam ántachkurmeka ¿itiurak nayaimpinmayá túramusha antuktaram?”

¹³ Shuar chikichkisha nayaimpiniam waka atsawai. Aya Wiki, nayaimpinmayá taran Aents Ajasu asan, túraitjai. Tura Wikia nayaimpinmayaitjai. ¹⁴ Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijiaí ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai. ¹⁵ Nújainkia ashí Winia enentáimturna nuka jinium wétsuk Yusaí tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchirín chikichik ana nuna shuáran uwemtikrarat tusa tsan̄katkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmaji. ¹⁷ Yus áentsun kajerak jiniun surukat tusa ni Uchirín akupkachmiayi. Antsu uwemtikrarat tusa akupkamiayi.

¹⁸ Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. ¹⁹ Yusa Uchirí tsáapninia áintsan ii tunaari paant awajturmají. Nu tsáapnisha ju nunkanam taraiti. Shuar tunáa ti tura ásar tsáapninian nakitrar kiritniun wakeriarmái. Nuna tura ásar jinium surunkaruiti. ²⁰ Ashí tunaan túruinia nuka tsáapninian muíjainiawai. Túrawar yupitainiawai ni tunáa túramu paant ajasáí tusa. ²¹ Antsu ashí nekas túratniun umiini-ana nuka tsáapninian weantainiawai. Yus ni enentáí pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmania nu

²² Nuyá Jesussha ni unuiniamurijiaísha Jutía nunkanam wear nuí pujusar imiakratiarmiayi.

²³ Juansha Enun nunkanam, Sarim tíjiuchia nuí, imiakratuk pujumiayi entsa nuí núkap aa asamtai. Tura aents táarmatai imiainiarmiayi. ²⁴ Nusha Juánkan sepunam enkenatsain túrunamiayi.

²⁵ Tura Juanka unuiniamurí Israer-shuarjai jianaiktinian nan̄kamawarmiayi. “¿Ya imiakratma imiá penkerait?” tusar áujmatiarmiayi. ²⁶ Juánkaí inintrustai tusar wéarmiayi. “Uunta, ame nuik Jurtan̄ entsa amain pujakum shuar nuí pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

²⁷ Tutai Juan tímiayi “Ashí kakarmaka aya Yúsaiyanchakait. ²⁸ Wisha paant tímiajai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme. ²⁹ Kame shuar nuwan nuatna nuna áishrinti. Nuatnaiyak áishman̄ nuwejai áujnainiakui, ni amikrisha nuna antuk ti waraatsuk. Wisha núnisnak aents Jesusaí wénakui ti waraajai. ³⁰ Niisha tuke nan̄kaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiayi.

Nayaimpinmayá tara nu

³¹ Nayaimpinmayá tara nuka ashí nan̄kaamakuiti. Nun̄kayá nuka, nun̄kayá asa jú nunkanmayan̄ak áujmatui. Nayaimpinmayá tara nuka ashí nan̄kaamakuiti ³² tura nuí antukmancha íismancha áujmatui. Túrasha ni chichamen ántuiniatsui. ³³ Antsu ni chichamen ántana nuka “Yusa chichame imiá nekasaiti” tawai. ³⁴ Yus akupkamuka Yusa chichamen étserui. Yuska ni Wakan̄in ementutsuk susa asamtai tu étserui. ³⁵ Yus Apa ni Uchirín anea asa ashí ana nuna iistí tusa atak-saiti. ³⁶ Shuar Yusa Uchirín enentáimta nuka yamaram

iwiaakmanum akiinia asa tuke Yusaj̄ shiir pujustiniaiti. Antsu Yusa Uchir̄n enentáimtsatsna nuka nu iwiaakmanum akiiniachuiti antsu Yus tuke nin kajerkaiti.

Jesus Samaria nuṅkanmayā nuwaj̄aj̄ chichasmiania nu

4 “Jesus untsur̄j̄ shuaran ni nemarkin awajeawai; kame Juan̄j̄aj̄ naṅkaamas untsur̄j̄ imiaawai” taman Pariseu shuar antukarmiayi. ² Nekaska Jesus imi-akratchamiayi, antsu ni unuiniamur̄j̄ túrawarmiayi. ³ Pariséu nu chichaman antukarman Jesussha nekáa Jutía nuṅkanmayā jiinki Kariréa nuṅkanam waketkimiayi.

⁴ Wáketuk Samaria nuṅkanmaan̄j̄ naṅkaamaktiniuyayi. ⁵ Samaria nuṅkanam wéak Sekar péprunam jeamiayi. Nu pepru jeastatuk Jakupa nuṅkē ámiayi. Jakupsha nu nuṅkan ni uchir̄n̄ Jusen tí yaunchu susamiayi. ⁶ Nuisha yumirmat ámiayi. Jakup taurma asamtai “Jakupa yumirmat̄r̄” tiarmiayi. Tutupin jeamtai Jesussha pimpiki winis yumirmat ayamach pujusmiayi. ⁷ Nūj̄ pujaj̄ Samarianmayā nuwā yumí shikiktajtsa támiayi. Tura Jesus “Entsa surusta” tímiayi. ⁸ Jesusa unuiniamur̄j̄sha yurumkan péprunam sumaktajtsa wéaru asamtai aya Jesusak pujumiayi.

⁹ Samarianmayā nuwā Jesusan tímiayi “¿Itiura Israer-shuaraitatmesha Samarianmayā nuwā āisha entsa seatam?” Kame Israer-shuar Samarianmayā shuar-j̄aj̄n̄kia peṅkē chichachu ásar nuna tímiayi.

¹⁰ Jesussha tímiayi “Yus súamu nékakmeka tura entsa surusta tájam nusha nékakmeka ame antsu seattínme tura Wikia iwiaaku entsan amasant̄j̄aj̄.”

¹¹ Nuwāsha tímiayi “Uunta, entsasha ti iniait̄i tura shikiktincha takaktsume. ¿Tuyaṅ iwiaaku entsasha surustam? ¹² Ii uuntr̄j̄ Jakup j̄u yumirmatan taur j̄uṅak niisha ni uchir̄j̄sha ni waakar̄j̄sha umararmiayi. Nuyá ikiurtamkimiayi. ¿Amesha Jakupj̄aj̄ naṅkaamas kakarmakaitiam?”

¹³ Jesussha tímiayi “Ashí shuar j̄u entsan umarka ataksha kitiamt̄iat̄ui. ¹⁴ Antsu Wi súaj̄na nú entsan umarka peṅkē kitiatchattawai. Antsu nu entsa Wi susamuka ni enentáin̄ púkun̄ia áintsan̄ tuke pajamt̄iat̄ui nuj̄aj̄ tuke iwaaku pujustí tusa.

¹⁵ Tutai nuwā tímiayi “Uuntá, winiasha nu entsa surusta. Wisha kitiatcha átaj. Tura j̄u entsan̄cha shikiktin̄ian táchataj̄” tímiayi.

¹⁶ Nuyāsha Jesus tímiayi “Áishrum untsukam utitia, turam j̄ūj̄ tatá.”

¹⁷ Nuwāsha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. ¹⁸ Kame ame áishrum seṅku (5) takusitme. Yamái takamena nusha ame áishrumchaiti. Nekas tame.”

¹⁹ Nuna antuk nuwāsha tímiayi “Uunta, ame Yúsnan etserniuchukaitiam. ²⁰ Ii úntr̄n̄kia tuke Samarianam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarēnum Yus tikishmátrat̄niuiti tárume.”

²¹ Jesus tímiayi “Nuwá, enentáimsata. Tsawant jeat-tawai átum jú náinniumsha tátsuk tura

Jerusarēnumsha wétsuk Yus Apa tikishmatratin.

²² Átum tikishmatrum nuka nékatsrume. Iikia tikishmatr̄nia nu nékaj̄i. Israer-shuar̄numiā Uwemtikiartin winiakui nékaj̄i. ²³ Tsawant winittiana nu yamá̄i jeayi. Ashí shuar Yus Apan nekas tikishmat̄ainiakka tuke wakan̄j̄aj̄ tuke enentáij̄aj̄isha awajitsuk tikishmatrart̄at̄ui. Núnisan̄ tikishmatrurat tusa wakerawai Yus Apa. ²⁴ Yuska Wakaniiti tura ashí Nin tikishmat̄ainia nuka tuke wakan̄j̄aj̄ tura tuke enentáij̄aj̄ awajitsuk tikishmatratin ániawai.”

²⁵ Nuwāsha tímiayi “Anaikiamua nu tátiniaiti. Nusha Krístuiti. Niisha taa ashí jintinramattaj̄i.”

²⁶ Jesus tímiayi “Wit̄j̄aj̄. Ámin chichaaj̄mena nú Kristu-it̄j̄aj̄.”

²⁷ Nuin̄ ni unuiniamur̄j̄ táarmiayi tura nuwaj̄aj̄ chichaa pujan wáinkiar ti enentáimprurarmiayi. Tumaitiat “¿Warí wakerakmea nuwaj̄aj̄ chichaam?” títinian arantukarmiayi. ²⁸ Nuyānka nuwā ni yumir̄n̄ ikiuki péprunam we ashí áentsun tímiayi ²⁹ “Winiirum íi-tiarum, shuar ashí wi túramun júruta nu. ¿Juka Krístuittiya?” ³⁰ Tutai péprunmayā j̄iinkiar Jesus pujamunam wearmiayi.

³¹ Jeainiats̄aj̄n̄ ni unuiniamur̄j̄ seak tiarmiayi “Uunta, yurumáta.”

³² Tura Jesus tímiayi “Wi yúatniunka takakj̄i átum nékachman.”

³³ Ni unuiniamur̄j̄sha nuámtak anniasarmiayi “¿Chíkich shuar yurumak itiarím tátsuash?” tiarmiayi.

³⁴ Tura Jesus tímiayi “Winia akuptukua nuna wakermur̄j̄ túrakun tura ni takatr̄n̄ takaakun Wíj̄aj̄n̄kia yurumátniua áintsan̄ ikiakáatui. ³⁵ Átumka “Tuke kuaru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentáin̄ araamuiti. Tura júuktin tsawant jeayi.

³⁶ Arakan júaka akinkiat̄niuiti. Júukmataisha nu shuar uwemprar tuke iwiaaku pujusartatui. Núnisan̄ arakan araana nusha júana nusha mai metek warasartatui.

³⁷ Tiniu armia nuka nekasaiti: “Chíkich araawai chíkichcha júawai.” ³⁸ Iis, chíkich araakmamu júuktinian akupkaitjarme. Átum araachiatrumek chíkich takasmanum atumsha pach̄iintiukuitrume” tímiayi.

³⁹ Tura núwāka péprunam jeá “Ashí wi túramun ujat̄kaȳi” takui untsur̄j̄ shuar Jesusan ti shiir enentáimtusarmiayi. Niisha Samarianmayā shuar ármiai. ⁴⁰ Nu asamtai ashí Jesusaj̄ taar niij̄aj̄ pujusát tusa seawarmiayi. Tutai Jesus jimiará tsawant nūj̄ pujusmiayi. ⁴¹ Nú shuar untsur̄j̄ ni chichamen antukar Jesusan ti shiir enentáimturarmiayi. ⁴² Nuyá nuwān tiarmiayi “Yamaikia aya ame chichammij̄aj̄n̄ Jesus enentáimtsats̄j̄ antsu imia iisha ni chichamen anturkaj̄i. Tura nékaj̄i nekas Krístuiti, ashí shuaran Uwemtikin.”

Jesus akupniu takarniur̄j̄ uchir̄n̄ tsuármiania nu

⁴³ Jimiará tsawant naṅkaasmatai Jesus Samaria nuṅkanmayā jiinki Kariréa nuṅkanam wémiayi.

⁴⁴ Kariréasha Jesusa nuṅkē asamtai, āin̄sha Jesus timia áintsan̄ ámiayi: “Yúsnan etserniun ashí shuar peṅker anturainiawai antsu nuna nuṅkeyānka nin anturainiat-

sui.”⁴⁵ Tuma aṅ Kariréa nuṅkanam jeamtai auyá shuarsha Jerusarénum paskua námpernum wearu ásar tura ashí ni túramun nuṅ wainkia ásar ti shiir awajarmiayi.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajarmiayi. Jesussha nuṅ pujají yajá péprunam Kapernáumnum akupniu takarín ámiayi. Ni uchirísha jaa tepemiayi.

⁴⁷ Niisha Jesus Jutíanmayá Kariréa nuṅkanam taman antuk Jesusají wémiayi. Tura ni uchirí jákatin tepakui ni jeen we ni uchirín tsuarat tusa Jesusan seamiai.

⁴⁸ Jesussha tímiayi “Aya aents túrachminian túrakui ísrum aya nújajín Winia enentáimtarne.”

⁴⁹ Tura takarín tímiayi “Uunta, winia uchir jáatsajín wari winitia.”

⁵⁰ Nuiṅkia Jesus tímiayi “Jeeṁiṅn waketkitia. Yamaikia ame uchiram péṅker ajasai.” Tutai nú aishmanṅ Jesus táman antuk wémiayi.

⁵¹ Ni jeen jeátemámtai ni takarniurí inkiuṅ tiarmiayi “Yamaikia uchiram péṅker ajasai.”

⁵² Apasha inintrusmiayi nantu urukaim péṅker ajasma.

Niisha tiarmiayi “Yau, nantu pukuntamtai, tsuemun michatramai” tiarmiayi.

Nuna antuk uchi áshirsha enentáimsamai.⁵³ Nantu pukunta aṅ Jesus “Ame uchiram péṅker ajasai” timia nuní aṅ michatraití. Tuma asamtai niisha ashí ni shuarísha Jesusan nekas enentáimturarmiayi.

⁵⁴ Jesus nu túramujají ni kakarmarín jimiará iniakmasmiayi. Nunasha Jutíanmayá jiinki Kariréa nuṅkanam jeá túramiayi.

Petesta amia nuṅ tampemarun Jesus tsuármiania nu

5 Nu naṅkaasmatai, Israer-shuar namperan nanainiakui Jesus ataksha Jerusarénum waketkimiayi.² Jerusarén yama wayámunam murik wayátin waiti tíjiyuch amia nuṅ entsa pajamtai jeam-mauyayi. Nu pajamtain Petesta tiarmiayi. Nuna wáitirísha seṅku (5) ármiai.³ Nuṅ untsurí jáiniak nuṅkanam teparmiayi. Kusurusha shutuapsha tampemakusha tepesar entsa miartukat tusa nákasarmiayi.⁴ Kame ni tátaj taku Yusa suntarí táuyayi entsan umuchkiattsa. Nuyáṅka emka shuar entsá wayá nu ni jáamuriyá tsuármarmiayi.⁵ Áishmanṅ traintiúchu (38) uwi jaa tepá nuṅ ámiayi.

⁶ Jesussha nu shuaran nuṅ tepan wáinkíamiayi. Tura untsurí uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiui ¿winia yaki eṅkétát? Kame wi eṅkemátaj tai chíkich emka eṅkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishmanṅ shiir ajasmiayi. Tura ni peakrín jukí wémiayi. Nusha ayampratin tsawantají túrunamiayi.¹⁰ Tuma asamtai Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

¹¹ Áishmanṅsha tímiayi “Winia tsuara nu “Peakrum jukim wetá” turutni” tímiayi.

¹² Nuiṅkia aniasarmiayi “¿Ya “Peakrum jukim wetá” túramam?” tiarmiayi.¹³ Tura áishmanṅsha Nin tsuárun nekachmiayi. Untsurí shuar nuṅ aa asamtai tura Jesus weu asamtai nin nekaachmiayi.

¹⁴ Atak Jesus Yusa Uunt Jeen áishmanṅkan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi.¹⁵ Nuiṅkia áishmanṅ Jesus nin tsuárman nekáa Israer-shuaran ujakmiayi.

¹⁶ Tuma asamtai ayampratin tsawantají túramtai Israer-shuar Jesusan maatai tusar áintrarmiayi.¹⁷ Tura Jesus tímiayi “Wina Apar tuke yamaisha takawiti. Núnisnak Wisha takaajai.”¹⁸ Tutai Israer-shuar nuna naṅkaamas maatai tusa wakeriarmiayi. Ayampratin tsawantají takaakui kajerarmiayi. Tura nu arantcha “Yus winia Aparuiti” takui Yusají métek enentáimtumawai tusar nu arant kajerarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínkia ni enentáijiaṅn takaatsui. Antsu aya winia Apar takaana nuna ísan métek takaajai. Ashí winia Apar túramun Wisha ni Uchirí asan métek takaajai.

²⁰ Ni Uchirí asamtai winia Apar anentui tura ashí tura nuna iniakturui. Tura nuna naṅkaamas tujinkiamnian iniaktursattawai Wisha túratniun. Tura nuna túrakui ashamkattarme.²¹ Winia Apar jakamunmayáṅ iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai.²² Winia Aparka súmamtiksui antsu shuar súmamtikiatniun ni Uchirín súsaiti.²³ Tuma asamtai ashí shuar Yus Apan shiir awajainia áintsanṅ ni Uchiríncha métek shiir awajatin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

²⁴ ‘Ti nekasaiti. Winia chichamprun ántana nú shuar-ka Winia Akuptukun enentáimtak ni iwiaakmarín tuke amuukashtinian takakui. Nu shuarsha ayáshí iwiaakuitiat jákauyi antsu yamáí nekas iwiaakuiti. Tuma asa sumamashtatui.²⁵ Ti nekasaiti. Tsawant winitiana nu jeayi. Nu tsawant jaka ainia nu Wi untsuman antukar umirkarka iwiaaku ajasartatui.²⁶ Iis, winia Apar iwiaaku awajatsniun takakui. Tura Wini-asha, ni Uchirí asamtai, iwiaaku awajatsniun surusuiti.²⁷ Nu arantcha wi Aents Ajasu asamtai, shuaran súmamtikiatniun surusuiti.²⁸ “Ju chicham itiurchataiti” enentáimprairap. Atak tsawantají wi untsuman ashí jákaru ainia nu antukartatui.²⁹ Tura ashí iwiansamunmayá jíinkartatui. Péṅker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsajiyaiti” tu áujmatainia nu

³⁰ ‘Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asam-

tai, awajitsuk súmamtikjai. ³¹ Aya Wiki “Yúsaiyaitjai” tákunka winia chichamur ántar ainti. ³² Chikichcha awai. Niisha “Yúsaiyaiti” túrutui. Ni chichamesha imiá nekasaiti. ³³ Atumsha Juan̄kaḵ wi túramu inin-trusmarme tura nii timia nu nekasaiti. ³⁴ Tuma aḵ aents táman atsumatsjai. Antsu Juan̄ka chichame enentáimkiuram uwempratarum tusan tájarme. ³⁵ Juan̄sha jiya núnis keemai. Atumsha ishichik tsawantin nú tsáapninnium warastin enentáimpramarme. ³⁶ Tura Winia “Yúsaiyaiti” túrutna nu, Juan̄jai naḵkaamas péḵkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupkamuitjai. ³⁷ Winia Aparsha, akuptuku asa, ayamprutui. Túrasa átumka ni chichamesha an-tukchaitrume tura wáintiash wáinkiachuitrume. ³⁸ Yus Apa akuptukuiti. Tuma asamtai Winia enentáimtur-chakrum winia Aparu chichamesha atumi enentáin wayachuiti. ³⁹ Átumka Yus-Chicham yaunchu aarma nuḵ iwiaaku átinian wáinkiataj tusarum ti unuimiaruitrume. Nu chichamsha Wínian áujmatui. ⁴⁰ Tuma aḵ nekas iwiaaku átaj tusarum Winí tátin nakitiarme” tímiayi.

⁴¹ “Shuar Winia “shíiraiti” túrutainiakuisha nuna páchiatsjai. ⁴² Maa, Wi nékajrume. Átumka Yus aneat-srume. ⁴³ Winia Apar akuptukmatai táwitjai túrasa nakitrarme. Antsu chíkichka ní enentáijjaj̄ jeartamkuḵkia nuka átum wakerarme. ⁴⁴ Átumka nuámtak “Shiir enentáimtursatí” tu enentáimtunai-yarme. Tura Yus enentáimturma nuka páchiatsrume. Nújaj̄ḵkia ḵitiurak Yus enentáimtustam? ⁴⁵ “Ti tunaarḵn Yusaj̄ etserturmaktaj̄i” turutiirap. “Muisais akupka-mun umirkan uwemprattajai” tátsurmek. Antsu Mui-sais aarma nujaj̄ atumí tunaarḵ etsernaktatui. ⁴⁶ Iis, Muisais Winia áatrurmiayi. Atumsha ni timia enen-táimtakrumka Winiasha enentáimturaintrume. ⁴⁷ Tura ni aarma enentáimtachkurmeka ḵitiurak wi tama enentáimtustarum?” tímiayi Jesus.

Jesus senku mir (5.000) áishmaḵkan ayurawarmiania nu

(Mateu 14.13-21; Márkus 6.30-44; Rúkas 9.10-17)

6 Nu naḵkaasmatai Jesus Kariréa antumiaḵnum amain katiḵmiayi. Nu antumiaḵsha Tipirias antumiaḵ tuiniawai. Jimiará náartiniaiti. ² Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. ³ Israer-shuara paskuanamperḵ ishichik ajasmatai Jesussha ni unuiniamurijjaj̄ náinnium waka nuḵ pujusmiayi. ⁵ Jesussha untsurí aents wininian wáiniak Jiripin tímiayi “Timiá untsurí shuar ayurat-niusha ḵtuyaḵ yurumak sumaktaj̄i?” tímiayi. ⁶ Kame Jesuska Nii túrattana nuna neka asa Jiripi warittḵn tusa tímiayi.

⁷ Jiripisha nuyá tímiayi “Timiá nukap kuitjaj̄ tanta sumakmesha ashí ishichik susamsha jeachaintjaj̄” tímiayi.

⁸ Nuyá chíkich unuiniamurḵ Antres, Pitru yachi, tímiayi ⁹ “Uchi juḵ seḵku (5) tantan jimiará namakjaj̄ takakui. Ausha timiá untsurḵnmasha jeatpiash” tímiayi.

¹⁰ Nuyāḵka “Ashí pujustarum” titiarum” tímiayi Jesus. Áishmaḵsha nuwasha uchisha irunmiayi. Tura chírichri núkap aa asamtai nuḵsha seḵku mir (5.000) áishmaḵ pujusarmiayi. ¹¹ Jesussha nu tantan achik Yúsan yumḵḵkias ni unuiniamurḵn susamiayi. Niisha ashí nuḵ pujuinian súsararmiayi. Namaknasha núnisaḵ ashí ni wakeriarmiania nuna súsararmiayi.

¹² Jémararmataisha Jesus ni unuiniamurḵn tímiayi “Ampirma júukrum chaḵkinnium chumpiatarum. Wasúrḵakaj̄.” ¹³ Niisha seḵku (5) tantanmayá ampirman júukar tuse (12) chaḵkinnium áimkiarmiayi.

¹⁴ Nu shuarsha Jesus túramun íisar tiarmiayi “Ju nekas Yúsnan etserin tátinia núchakait.” ¹⁵ Shuar Jesusan uunt akupin awajsataj tutai Jesus nekáa Niḵki náinnium wémiayi.

Jesus entsá pátatek nanamas wekasamiania nu
(Mateu 14.22-27; Márkus 6.45-52)

¹⁶ Kíakui Jesusa unuiniamurḵ antumiaḵnum wearmiayi. ¹⁷ Káshisha Jesus tuke táchamtai uunt kanunam eḵkemáwar Kapernáum péprunam wéenak jíinkiar-miayi. ¹⁸ Tura nase ti umpúakui chíchimi ti wajaimiayi. ¹⁹ Ajapén ajaras Jesus entsá pátatek nanamas tíjiyuch winian wáinkiar ashamkarmiayi. ²⁰ Tura Jesus “Wíitjai. Ashamprukairap” tímiayi. ²¹ Nújaj̄ḵkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

Shuar Jesusan eḵk wekainiawai

²² Kashincha chíkich shuar amain ayuramunam kanararu nekaawarmai. Jesusa unuiniamurḵ Jesusjaj̄nchu chikichik kanu amia nujaj̄ wéarun nekaawarmai. ²³ Nuḵ chichak matsataj̄ Tipirias péprunmayá chíkich kanu táarmiayi. Yau Jesus Yúsan yumḵḵkias tantan ayuramunam tíjiyuch táarmatai ²⁴ nu shuar, Jesussha ni unuiniamurḵsha nuḵ atsuiniakui, nu kanunam eḵkemáwar Kapernáum péprunam Jesusan eḵaktaj̄tsa wearmiayi.

Jesus apatkua áintsanḵete

²⁵ Entsa amain Jesusan wáinkiar aniasarmiayi “Uunta, ḵurutía juḵsha támam?”

²⁶ Jesussha tímiayi “Ti nekas tájarme. Aents tujintiamu nekáa asarum éḵtsurme. Antsu tanta yuarum jémaru asarum éḵtrume. ²⁷ Juḵyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juḵka shuáran Yáinḵkiartini-aiti” túrutui” tímiayi.

²⁸ Tutai inintrusarmiayi “ḶWarí túratniuitiaj̄i Yus wak-erana nu umiktin?”

²⁹ Jesussha tímiayi “Yus akupta asa Winia enentáim-tursarat tusa wakerawai.”

³⁰ Tutai aniasarmiayi “ḶAentsti tujintiamuka warí túrattam ii íisar Ámin nekas enentáimtustin? Chikichcha túratá. ³¹ Yaunchu ii uuntrḵ aents atsamunam maná yurumkan nayaimpinmayá susamun yu-

rumáwarmiayi. Yus-Chichamnum núnik áarmaiti: “Nayaimpinmayá yurumkan Yus susamiayi.” Tu áarmaiti” tiarmiayi.

³² Jesussha tímiayi “Wi tájana nu nekasaiti. Muisais atumí úuntrín nayaimpinmayá yurumkan súsachmiayi. Antsu winia Apar yamá nekas apatkun nayaimpinmayá súramui. ³³ Iis, Yusaiyá apatkunka, nayaimpinmayá tára nu súramui tura nekas apatuk asa ashí shuaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jesussha tímiayi “Witjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. ³⁶ Túrasha wi túramu wáinkiumesha winia chichamur enentáimtatsrume. ³⁷ Ashí shuaran winia Apar tsan̄katrukarmiana nu, Wíi shuar ajasartatui. Winin winiana núnaka penké nakitrashtatjai. ³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai. ³⁹ Winia Apar akuptukuiti tura júna wakerawai. Ashí winia tsan̄katrukman emen̄kátsuk amuukatin tsawantaj iniantkiarat tusa wakerawai. ⁴⁰ Yus Apa wakerana nu júiti. Ashí shuar Winia “Yusa Uchir̄inti” tu enentáimturkui yamaram iwiaakman tuke takusat tusa wakerawai. Nú shuarna ka amuukatin tsawantaj iniantkittijai” tímiayi Jesus.

⁴¹ Tura Jesus “Witjai, nayaimpinmayá apatuk akupkamu” takui Israer-shuar Jesusan áujmatiarimiayi.

⁴² Tura tiarmiayi “Ju Jesuschakait, Jusé uchir̄iya nu. Iikia ni apar̄isha nukur̄isha nékatsjik. ¿Itiurak “Nayaimpinmayá taraitjai” ta?” tiarmiayi.

⁴³ Jesussha tímiayi “Tu áujmatrukairap. ⁴⁴ Shuáran winia Apar akúpturkachuitkiuinka penké wean̄turkachainti. Tura Winia akupturna nuna amuukatin tsawantaj iniantkittijai. ⁴⁵ Yúsnan etserniu áarmar̄in tawai “Ashí Yus jintintiamu ártatui”. Núnisañ ashí Yusa chichamen antukar unuimiatainiakka Winí táiniawai” tímiayi.

⁴⁶ Aya Wiki Yúsaiyá tau asan Yúsan wáinkiaitjai. Chikichka penké wáinkiachuiti. ⁴⁷ Ti nekas tájarme. Winia enentáimturna nú shuarka yamaram iwiaakman amuukashtinian takakui. ⁴⁸ Wikia iwiaakman súana nú apatkuitjai. ⁴⁹ Iis, atumí uuntr̄i aents atsamunam maná yurumkan yúawariatcha ashí jákarmiyai. ⁵⁰ Antsu Wi tájana nú apatkun shuar yúakka jákachartatui. ⁵¹ Wikia nayaimpinmayá iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashrui. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayash̄inkesha ayurtamattaj?” tiarmiayi.

⁵³ Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume. ⁵⁴ Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniantkittijai. ⁵⁵ Winia ayashruka nekas yurumkaiti tura winia numparsha nekas umutainti.

⁵⁶ Winia ayashruncha yúaka tura winia numparnasha úmaka Wijjai tsaniñ pujawai tura Wisha nu shuarjai tsaniñkian pujajai. ⁵⁷ Yus Apa, Winia akuptukuka, nu iwiaakma nérenniuiti. Tuma asamtai ni iwiaakmar̄in iwiaaku pujajai. Núnisañ Winia yurakka winia iwiaakmaruj iwiaaku pujustatui. ⁵⁸ Nayaimpinmayá apatkun tajai. Ju apatuk maná yurumka áintsachuiti. Atumí uuntr̄i maná yurumkan yuawarsha ashí jákarmiyai. Antsu ju apatkun shuar yúakka tuke iwiaaku pujustatui” tímiayi Jesus. ⁵⁹ Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰ Nu chichaman antukar Jesusa unuiniamur̄i chicharainiak “Nii tana nu ti iturchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “ju chicham iturchataiti” tárumek. ⁶² Wátsek, Wi nayaimpiniam pujumiaj nūi waketkimtaisha ¿urukawaintrume? ⁶³ Warí, aya wakanik iwiaakman súwaiti. Ayashkia penké áantrai nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus. ⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamur̄in tímiayi “Atum̄incha winia chichamprun enentáimtachu tuke awai. ⁶⁵ Nu asamtai tímiajrumek “Shuáran winia Apar akupturkachmaitkiuinka penké wean̄turkachainti” tímiajai” tímiayi Jesus.

⁶⁶ Nuyasha ni nemarniur̄i untsur̄i armia nu Jesusan ikiukiar atakka Nijjai wekasacharmiayi. ⁶⁷ Nuyá Jesus ni tuse (12) unuiniamur̄in chicharainiak “¿Atumsha wétin wakerarmek?” tímiayi.

⁶⁸ Semun̄ Pítrusha áikmiayi “Uunta, ¿yáiniñ wetaji? Ame chichammijai nekas iwiaaku áminiaiti. ⁶⁹ Ame Kristu asam nekas iwiaaku Yusa Uchir̄inme. Nuka enentáimtusar ti paant nékaji” tímiayi.

⁷⁰ Jesussha tímiayi “Ashí tuse (12) árumna nu achikuiitjarme nekas Wíi shuar ajastin. Tuma aiñ atum̄in chikichik iwianchiiti” tímiayi. ⁷¹ Nuna taku Jútas Iskar-iútin, Semun̄ka uchir̄in, enentáimtus tímiayi. Jútassha ni unuiniamur̄intiat Jesusan ukunam surukmiayi.

Jesusa yach̄isha Nin enentáimtuscharm̄iyai

7 Nu nan̄kaamasmatai Jesus Kariréa nun̄kanam wekaimiyai. Jutía nun̄kanam wéchamiayi Israer-shuara uuntr̄i nūi máataj tutai. ² Tura Israer-shuar aak aakmatai namper̄i jeatemamtai ³ Jesusa yach̄i wishikiainiak tiarmiayi “¿Urukamtai jūisha pujam? Jutía nun̄kanam wetá, aisha ame unuiniamur̄am túram nuna íisarat. ⁴ Ashí shuar nekaawarat tákumka úukam túrawaip. Ti tujintiamu túriniaitkiukma ashí shuar íimianum túratá” tiarmiayi. ⁵ Ni yach̄isha ishichkisha Nin enentáimtachu ásar tiarmiayi.

⁶ Tura Jesus tímiayi “Winia tsawantur nampernum wétin jeatsui. Atum̄jainkia nan̄kamas tsawant wétin pen̄keraiti. ⁷ Ju nun̄kanmayá aents atumniaka kajertamatsrume. Antsu ni tunaar̄in etsertin asamtai Wíniaka

kajertuiniawai. ⁸ Átumka nampernum wetarum. Wikia tsawantur jeachkui wéatsjai." ⁹ Juna tinia Jesuska Kariréa nuṅkanam juákmiayi.

Aak aakmatai nampernum Jesus timia nu

¹⁰ Ni yachj wearmatai Jesussha nampernum wémiayi. Tura nekarawarajin tusa úumak wémiayi. ¹¹ Israer-shuara úuntriṣha námper irunturmanum eakar "Nu aishmaṅsha žtuinj pujá?" tiarmiayi. ¹² Ashí shuarsha Nin áujmatiarmai. Chíkich "pénkeraiti" tiarmiayi. Tura chikichcha "Pénkerchaiti. Aya anaṅkartawai" tiarmiayi. ¹³ Tura Israer-shuara úuntrin ashamáiniak uuk áujmatiarmai.

¹⁴ Nampersha ajapén ajasmatai Jesus Yusa Uunt Jeen wayá shuáran unuiniamiayi. ¹⁵ Israer-shuara úuntriṣha nuna íisar ti enentáimsar chichaak "Jusha unuimiátrachiattha žitiurak imiá neka?" tiarmiayi.

¹⁶ Jesussha tímiayi "Wi unuiniaina nu winia chichampruchuiti antsu Winia akuptukua Núnan unuiniajai.

¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiṅkia, nuna nekaattawai. Aya wi enentáimmiyajaj chichaakuisha, nuna nekaattawai. ¹⁸ Ni enentáimmiyajaj chichaana nuka ashí shiir enentáimtursarti tusa chichaawai. Antsu nin akupka nuna shiir awajarsarti tusa wakerak, nekas wáitratsuk tawai. ¹⁹ Muisais Yusa akupkamurj atumí uuntrin amaschamka. Tuma aij nu umitsuk mantuatin wakerutarme" tímiayi Jesus.

²⁰ Nu shuarsha tiarmiayi "Wáurtsmek. žYa mantamataj tusa wakera?"

²¹ Jesussha tímiayi "Ayampratin tsawantaj chikichkí túramtai ti enentáimtsurmek. ²² Muisais ashí tsupirnaktinian akupkachmiayi. Antsu ni uuntrinṅkia nuna akupka ániawai. Tuma aij átumka Muisais akupkamu umiktai tsarum ayampratin tsawantajsha uchi áishmaṅ tsúpirnaitrume. ²³ Wátsek, Muisais akupkamu uminkiatí tsarum ayampratin tsawantajsha uchi áishmaṅ tsúpirkurmekaka žurukamtai Wi ayampratin tsawantaj áishmaṅka ayashí takamtsuk tsuármatai kajertarum? ²⁴ Shuar túrana nu íisam wárik súmamtikiawaip. Antsu ininrusam paant nekaam, nekasa nu enentáimtusta" tímiayi Jesus.

Jesus Yúsnumiā akupkamuiti

²⁵ Nuyá Jerusareṅnumiā shuar tiarmiayi "Maatai tinia núchakait. ²⁶ Tura nuj ashí ántamunam étserui tura suntar páchiniatsui. žIi uuntriṣha "Nekas Krístuiti" tu enentáimtuiniawash? ²⁷ Antsu nekas Kristu taa tuyaj winiá nekanashtatui tura ju pujamuka ashí nékaji" tiarmiayi.

²⁸ Jesus nuna antuk, Yusa Uunt Jeen wajá kakaram chichaak tímiayi "Winia nekararum tuyá winiaj nu nékarme. Kame núnisrum enentáimprume. Tura winia enentáirjaj táchaitjai antsu winia Apar akuptukuiti. Ni isha ti nekas akupniusha átumka nékatsrume. ²⁹ Antsu Winia akuptukuitkiui aijya tau asan Wikia nékajai" tímiayi. ³⁰ Nuyá sepunam eṅkeataj táyat achikcharmiayi ni

tsawantri jeachu asamtai. ³¹ Tura untsurj shuar Nin enentáimtusar "Kristu ta žnuna naṅkaamas aentsti tujintiamun túratpiash?" tiarmiayi.

"Eátkáttarme tura wáitkiashtatrume" tímiayi Jesus

³² Pariséusha Israer-patri úuntriṣha Jesusnan timian antukar suntaran akupkarmiai Jesusan achikar sepunam eṅkeawarat tusar. ³³ Nuyá Jesussha tímiayi "Aya ishichik tsawant atumjaj pujustatjai. Nuyá ataksha Winia akuptuku pujana nuj waketkittijai. ³⁴ Átumka eátkáttarme tura Wi wéajna nuj wéchamniaitkiuram wáitkiashtatrume."

³⁵ Israer-shuarsha nuamtak aniniaisarmiayi "žJusha tuj wéakuinj iisha wáinkiashtataj. Israer-shuar apachni-um pujuinia nuj we apachin unuiniartatuak. ³⁶ Nii timia nu itiurkit. "Átumka eátkáttarme tura Wi wéajna nuj wéchamniaitkiuram wáitkiashtatrume" tana nu itiurkit?" tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantaj Jesus wajaki kakaram chichaak tímiayi "Shuar ni enentáin kitiamakka Winin taa umar kitiakén imíkráti. ³⁸ Winia enentáimturna nuka ni enentáijya entsa wa áintsaj yamaram iwiaakman súana nú entsa jiinkittiwai."

³⁹ Nuna taku Jesus "Ashí Yúsan enentáimtusarun Yusa Shiir Wakanj súsatniuiti" tímiayi. Tura núnisaj Yus-Papiniumsha áarmaiti. Antsu Jesus tuke nayaimpiniam wéatsajin Yusa Wakanj shuar súsachmauyayi.

Shuarsha niisháa niisháa enentáimprarmiania nu

⁴⁰ Chíkich shuarsha nuna antukar "Ju nekas Yúsnan etserin tátinia núiti" tiarmiayi. ⁴¹ Chikichcha "Juka nekas Krístuiti" tiarmiayi. Tura chikichkia Jesus Kariréanmayajti tu enentáimiainiak tiarmiayi "Warí, žKariréa nuṅkanmayaj Kristu áminkiait? ⁴² Yus-Papinium paant tawai "Krístuka yaunchu uunt akupin Tawit weeanmayaj akiiniatniuiti, tawai. Tura Tawitia pépruriyā Piriṅnumiā átiniaiti" tawai" tiarmiayi. ⁴³ Tuma asamtai shuar niisháa niisháa enentáimprarmiania kanakiarmiayi. ⁴⁴ Chíkich aijya nuka "sepunam eṅkeatai" tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵ Suntarsha waketkiarmiayi. Tura Pariséusha Israer-patri uuntriṣha "žUrukamtai itiachuram?" tiarmiayi.

⁴⁶ Suntarsha tiarmiayi "Chikichkisha ju áishmaṅ chichaa áanis chichaschaiti" tiarmiayi.

⁴⁷ Nuyá Pariséu tiarmiayi "Atumsha anaṅnarume.

⁴⁸ Pariséutisha uuntcha nuna enentáimtuiniawash.

⁴⁹ Peṅké shuarka yaunchu akupkamun nékachua nuka yajauchiniam yuminkramu ániawai" tiarmiayi.

⁵⁰ Nikiutémusha, kashi Jesusan tarimia nu, Pariséuiti-at tímiayi ⁵¹ “Ii shuartikia, shuar ni túramun etserkamu ántutsuk súmamtikiachminiaiti” tímiayi.

⁵² Nuiñkia niisha tiarmiayi “Wats, amesha Kariréan-mayanchuashitiam. Yus-Chicham áujсам nekaattame. Kariréanmayá Yúsnan etserin penké táiniatsui” tiarmiayi.

Nuwá wáinmakman Jesusan itiariarmiania nu

⁵³ Nuyá ashí ni jeen waketkiarmiayi.

8 Tura Jesuska Uriwiu náinnium wémiayi. ² Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuariarmiayi. ³ Nuyá Israer-shuara jintinniurjsha Pariséusha nuwān wáinmakman Jesusan itiariarmiayi. Tura ashí iruntramunam ajapén awajsarmiayi. ⁴ Tura Jesusan tiarmiayi “Uunta, ju nuwá tsanirma pujá achinkiyai. ⁵ Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi. ⁶ Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsunsumá ni uwejéjaj nuñká áarmiayi. ⁷ Tura tuke iníam wajaki tímiayi “Ayu, atumiyá tunáa túrichu ákuñka kayan achik nin emka tukuti” tímiayi.

⁸ Tura nuna tj, ataksha tsunsumá nuñká áimiayi.

⁹ Tura ni chichamen antukar ni enentáin sumamawar úuntnumia jukí chikichik chikichik jiinki wéarmiayi.

Ashí wéarmatai Jesus Niñki nuwájaj juákmiayi. ¹⁰ Jesussha wajaki aya nuwānak wáiniak tímiayi “¿Ámin súmamtikramainia nusha tuiñ pujuinia. Chikichiksha áwak?” tímiayi.

¹¹ Niisha “Atsá, Uunta. Chikichiksha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

Jesus tsáapnia áintsan̄kete

¹² Ataksha Jesus Yusa Uunt Jeen iruntrarun tímiayi “Ju nuñkanam Wí tsáapnia áintsan shuara enentáin tsáapniajai. Ashí Wijijaj tsaniñ wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujaj wekasattawai.”

¹³ Pariséu nuikia tiarmiayi “Ame penkerum tau asam támēna nu áantrai.”

¹⁴ Jesus tímiayi “Tuyá winiaj tura tui weaj nu nékat-srume, tura Wikia nékajai. Tuma asan winia penkerun táyatnak tájana nu penkeraiti. ¹⁵ Ju nuñkanmayá aents enentáimmiyajaj enentáimtakrum ti súmamtikrume. Tura Wikia chikichikinkesha súmamtiksujai. ¹⁶ Tura súmamtikkiunka awajitsuk túrajai. Iis, Wiki shuar túramun penkerashit tusan enentáimtsujai antsu winia Apar Winia akuptukua nusha Wijijaj métek shuar túramun nékawai. ¹⁷ Atumí akupkamurjñ áarmaiti: “Jimiará shuar mai nú chichamnak tákuñkia nu chicham nekasaiti.” ¹⁸ Wátsek Wisha winia Aparsha mai métek taji. Winia Aparsha akuptukuiti” tímiayi.

¹⁹ Tutai “¿Ame apasha tuj pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” ²⁰ Nuna Yusa Uunt Jeen Yusa kuítrñ suinia nuj tímiayi. Tuma aiñ sepunam enkeatniun achikcharmiayi ni tsawantrñ jeachu asamtai.

“Wi wéajna nuj wéchamniaitrume’ tímiayi Jesus

²¹ Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaarjñ jakattarme.”

²² Israer-shuarsha tiarmiayi “Wi wéamunam wéchamniaitrume” tutai, nuñkia máamatpiash” tiarmiayi.

²³ Nuiñkia Jesus tímiayi “Átumka nuñkayaitrume antsu Wikia nayaimpinmayaitjai. Ju nuñkayaitrume tura Wikia juyanchuitjai. ²⁴ Tuma asamtai tájarme “Atumi tunaarjñ jakattarme.” Nekas Wi tájana núitjai. Tura nu enentáimtachkurmeka atumi tunaarjñ jakattarme” tímiayi.

²⁵ Niisha aniasarmiayi “¿Amesha yáitiam?”

Jesussha tímiayi “Yaunchu tájarme. ²⁶ Nu arantcha atumin súmamtikiatjarum tusan ti tímniaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. ²⁷ Tuma aiñ ni Aparñ áujmatman penké nekaacharmiayi. ²⁸ Tuma asamtai tímiayi “Aents Aja-suitjiana ju, numiniam ajintruarum yakí takuriakrumin nújñkia nekarattarme. Wi tájana núitjai tura winia enentáirjñ takatsuk aya winia Apar unuitiurmanak tájai. ²⁹ Winia akuptukua nuka tuke Wijijñ pujawai. Winia Apar wakeramun tuke shiir túrakui ikiurkichuiti” tímiayi. ³⁰ Tutai untsurñ shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmēna nu yawetsuk túrakrumka nekas winia unuiniamur átatrume. ³² Nújñshā timiá nekas ana nu nekaattarme tura nekas an̄kant ajastatrume” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penké emetachmaitji. ¿Urukamtai “An̄kant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajaj emetamuiti. Tuma asa takarniua núnisañ ajasuiti. ³⁵ Takarniusha ajapnamnia asamtai Yus atumin ajapramamniaitrume. Tura Akupniu Uchirñkia ni Aparjñ tuke pujawai. ³⁶ Tuma asamtai Akupniu Uchirñ an̄kant awajtamsamtañkia imiá nekas an̄kant pujustatrume. ³⁷ Átum Apraám weeitrume nékajai. Túmaitiatrum winia chichamur ántachu asarum mantuataj tárume. ³⁸ Winia Apar iniaktursamun áujmatjai. Átumka atumí uuntrñ timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii untrñkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume. ⁴⁰ Nekas ana nuna Yus iniaktursamtai nuna ujakjarme, tuma aḡḡ mantuataj tarume. Apraámka nuní túrachmiayi. ⁴¹ Antsu atumí uuntrí túrana áintsarum túrarme” tímiayi.

Tutai niisha tiarmiayi “Warí, tsanirnumiḡ akiini-achuitji. Ii uuntrí Yúskete. Niisha ii Aparínti.”

⁴² Tura Jesus tímiayi “Yus nekas atumi Aparíntkiuḡkia Winiasha anentíntrume Yúsnumiḡ tau asamtai. Wisha winia enentáimmiarjaj juj táchaitjai antsu Yus akup-tukuiti. ⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. ⁴⁴ Atumí aparíḡkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke maḡkartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntrí asa tuke wáitriniaiti. ⁴⁵ Tura Wikia nekas takui átum enentáimtursume. ⁴⁶ ¿Yaki chikichkí tunaajaj súmamtikruamniat? Nuikia Wi nekas nuna tau aḡsha ¿urukamtai enentáimtursume? ⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsajin Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmayá shuáraitme. Tuke yajauch áni-awai nusha. Nu arantcha iwianchrुकuitme amesha” nekas taji” tiarmiayi.

⁴⁹ Jesussha tímiayi “Iwianchrुकchaitjai. Áyatik winia Aparun shiir enentáimtikiajai. Tura átumka yajauch chichartarme. ⁵⁰ Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun pēḡkerashit tusa nekaattawai. ⁵¹ Ti nekasaiti. Wi tájana nuna enentáimta nú shuarka pēḡké jákashtiniaiti” tímiayi.

⁵² Nuiḡkia Israer-shuar tiarmiayi “Pai, yamaikia ti paant iwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka pēḡké jákashtiniaiti” tátsumek tiarmiayi.

⁵³ ¿Nuiḡkia ii uuntrí Apraám naḡkaamaskaitiam. Niisha tura Yúsnan etserniusha jákacharuk áinia. Itiurak imiá naḡkaamantu enentáimtumam?” tiarmiayi.

⁵⁴ Jesussha tímiayi “Wiki shiir enentáimtumaknaka pēḡké áantrai. Antsu Winia shiir enentáimturna nu winia Aparuiti. Nusha átumka “winia Yúsruti” tárumna núiti. ⁵⁵ Nusha táyatrum Nin nékatsrume. Wikia Nin nékajai. “Nin nékatsjai” tákunka atumjaj métek wáitrin áintjai. Tura Nin neka asan Nii tana nuna tuke túriniaitjai. ⁵⁶ Apraámka, atumí uuntrí, imiá yaunchu jákaitiat Wi ju nuḡkanam tátinian wararas nákasmiayi. Tura wáitjak ti shiir warartusmiayi” tímiayi.

⁵⁷ Nuyá Israer-shuar Jesusan tiarmiayi “Warí, seḡkuenta (50) uwí takaksume túmaitiatam Apraám wáinkiamjai tame.”

⁵⁸ Jesussha tímiayi “Ti nekas tájarme, Apraámka pujatsajin Wikia pujajai” tímiayi Jesus.

⁵⁹ Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapéniḡ weak Yusa Uunt Jeḡniḡ jiinki wémiayi.

Kusuru akiinian Jesus tsuármiania nu

9 Jesus ni unuiniamurijaj wesa áishmaḡkan kusuru akiinian wáinkiamiayi. ² Ni unuiniamurisha aniasarmiayi “Uunta, juḡsha ¿urukamtai kusuru akiiniawit. Yana tunaarijajin kusuru akiiniait. Niiniuajimpiash, aparíniuajimpiash túrunawit?” tiarmiayi.

³ Jesus tímiayi “Ni tunaarijajinchusha ni aparíniuajinchusha túrunaiti. Antsu Yus ni ayashín túratniua nu paant atí tusa túrunaiti. ⁴ Tsawajkia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai. ⁵ Juḡ nuḡkanam pujakun shuara enentáin tsáapnimtikratniuitjai” tímiayi. ⁶ Nuna chichas nuḡká usukmi nuḡkajaj pachimiar kusuru jiiḡ yakarmiayi. ⁷ Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar pēḡker ímiiar támiayi.

⁸ Nuyá ni írutkamurisha nuik wáinin ármia nusha tiarmiayi “Juḡka pujus tuke kuítian seamniuya núchakait.” ⁹ Chikich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niḡki “Ee, wiitjai” tímiayi.

¹⁰ Tutai aniiniak “¿Itiurak yamaikia íimiam?” tiarmiayi.

¹¹ Niisha tímiayi “Áishmaḡ Jesusa nu tsakusan jiiḡrun yakartur “Siruí pajamtai entsanam nijiamauta” turut-miai. Takui wena nijiamaran paant iimpramjai” tímiayi.

¹² Tutai “Nu áishmaḡsha tuiḡ pujá” tiarmiayi.

Niisha “Cha, nékatsjai” tímiayi.

Pariséu kusuru tsuárman inintrusarmiania nu

¹³ Nuyá kusuru tsuárman Pariséunam júkiarmiayi.

¹⁴ Kame Jesus kusurun tsuarmia nuḡ ayampratin tsawantauyayi. ¹⁵ Tuma asamtai Pariséusha itiurak íimnium tusar aniasarmiayi.

Niisha tímiayi “Jiiḡruin tsakusan yakaarámtai, nijiamaran paant iimjiai.”

¹⁶ Nuyá chikich Pariséu shuarnumiḡ nuamtak tunaiyar “Juḡna tsuáruka Yúsajanchuiti. Kame ayampratin tsawantaj túrait” tiarmiayi.

Tura chikichcha “Tunáa shuaraitkiuḡkia júnisan túratniun tujinkiaḡayi” tiarmiayi. Nujaj akannaikiarmiayi.

¹⁷ Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” taji” tímiayi.

¹⁸ Tura Israer-shuar nekas kusuruiat yamá íimiui tu enentáimtuscharmiayi Pariséu. Tuma ásar ni aparíncha untsukar ¹⁹ inintrusarmiayi “¿Ame uchiram kusuru akiinia tárumna nukait. Itiurak yamaikia iimia?” tiarmiayi.

²⁰ Ni aparísha tiarmiayi “Ti uchirḡkia kusuru akiinia ma nu nékaji. ²¹ Tura iisha nékatsji itiurak yamaikia iimia. ¿Yátsuk pēḡker tsuárui? Niisha úuntchakait, nii

aniastarum. Niŋki ujatmakarti" tiarmiayi. ²² Sapijmiak tiarmiayi. Israer-shuara úuntriŋkia "Jesus Yus akupkamu asa nekas Krístuítí" tuinia núnaka Israer-shuara iruntainmayá jiiŋki akupnakti tiniu ásarmatai tsuarma aparí ashamkarmiayi. ²³ Nu asamtai ni aparí "Niisha úuntchakait, nii aniastarum" tiarmiayi.

²⁴ Nuiŋkia Israer-shuara uuntri kusuru tsuárman ataksha untzuk tiarmiayi "Yus íimmianum nekasa nu titiá, ju áishmaŋkka tunaarinniuiti nékaji" tiarmiayi.

²⁵ Tutai tímiayi "Kame tunaarinchashit. Nékatshajai. Antsu junak nékajai. Yaunchu kusuruitiatan yamaikia íimjiai."

²⁶ Ataksha aniiniak "¿Itiurtámkama. Itiur íimtikrammia?" tiarmiayi.

²⁷ Niisha tímiayi "Yaunchu tájarme tura anturtat-srume. ¿Urukamtai ataksha titi tusa wakerarum. Niiniu ajastin enentáimprumek?" tímiayi.

²⁸ Nuiŋkia katsekkar "Ámeke ní shuarinme. Tura iikia Muisaisa shuáríntji, tiarmiayi. ²⁹ Yus Muisaisan akupkaiti iikia nékaji antsu nu áishmaŋ nékatsji. ¿Tuyantskait?" tiarmiayi.

³⁰ Áishmaŋ tsuarma tímiayi "¿Ausha itiurtsuk ámini-ait? Winia íimtikruma nu átumka nékatsrume tuyank-it. ³¹ Paant nékaji tunaarinniu Yus anturtsui. Tikishmatar ni wakeramun túruinia nunak anturui.

³² Yáunchusha kusuru akiinian tsuáruka tuke atsuwaiti.

³³ Ju áishmaŋ Yúsaiyanchuitkiunŋka penké túrachayá" tímiayi.

³⁴ Nuiŋkia tiarmiayi "Ámeke tunaarintin akiiniaiti-atmesha ¿in jintintin átaj tamek?" Nuna tiar jiiŋki awemarmiayi.

Wakaníin kusurua nu

³⁵ Kusuru tsuárman jiiŋki awemarma nuna Jesus nekaamiayi. Tura wáiniak "Yusa Uchirjá nu enentáimtamek" tímiayi.

³⁶ Tsuarma tímiayi "Uunta, turuttia wisha nekaan enentáimtustaj."

³⁷ Jesussha tímiayi "Wainme. Wiitjai ámijjái chichaaj-na nu."

³⁸ Tutai, tikishmatar "Uunta, enentáimtajme" Jesusan tímiayi.

³⁹ Nuyá Jesus tímiayi "Shuara enentáin nekaan, akantratajtsan táwitjai. Ni enentáin kusuru aín iimtik-tinian tura anaŋmamuk "Yusnan nekaan paant íimjiai" tana nuna ukusturtinian táwitjai" tímiayi.

⁴⁰ Tutai Pariséu shuar nuí pujuarmia nu nuna antukar "¿Nuiŋkia iikia kusurukaitiaji?" tiarmiayi.

⁴¹ Jesussha tímiayi "Átum kusuruitkiurmeka atumí tunaari wáinchakrum sumamachu áintrume. Tura "paant íimjiai" tau asarum sumamaitrume" tímiayi.

Iikia murikiua áintsar aji

10 Jesus tímiayi "Wi tájana nu ti nekasaiti. Shuar murikiun takakna nu ni murikrín wenuimiumam kashi ikiuawai. Tura murik wenuimiumam pujuiniakui yajauch shuar murikiun kasamkatniun wakerakka wái-

tiniam wayachmin asa tanishnum waruk yajá wayawainti. ² Antsu murikiu wáinniuka wáitiniam wayawawai. ³ Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrín chikichik chikichik náarín anaitius untsúawai. Tura tsawajkia ni murikrín jiiŋki ayurtainiam yarumui. ⁴ Tura ashí ni murikrín jiiŋ émtuki wéawai. Muriksha ni chichamen ántuiniak untsuam nemarainiawai. ⁵ Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai." ⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi "Ti nekasán tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayámin ániawai. ⁸ Wi táatsáin ashí táaruka kasa ániak winia shuarun kasamkatai tusa wakeriarmiayi. Tura winia murikiur Wíi shuar ániak nu shuaran anturkacharmiayi. ⁹ Wikia wáititjai. Ashí Winin wayáaka uwemprattawai. Tura murikiua áintsan wenuimiummayá jiinki pénker yurumáttawai tura atak wayá ayamprattawai" tímiayi.

¹⁰ Kásaka aya kasamkatniuncha máatniuncha emes-ratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai.

¹¹ Wikia pénker wáinniuitjai. Pénker wáinniuka ni murikrín uwemtikrartaj tusa jakattawai. ¹² Antsu aya kuitjai takauka ni murikrín ániakui tura nekas wáinniuchu asa pénker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakimawawai. ¹³ Nu shuarsha akikiam takáa asa murikiun enentáimtatsui. Nu asamtai aya pisaawai" tímiayi.

¹⁴ Wikia pénker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrataj tusan jakattajai. ¹⁶ Chíkich muriknasha takakjai. Nusha ju wenuimiummayanchu ániawai. Nunasha itiattajai. Nu muriksha Winia umirtukar ashí métek matsamsar chikichik wenuimiummayá ajasartatui tura chikichik wáinin átatui" tímiayi.

¹⁷ Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui. ¹⁸ Wi wakerakun jakattajai. Wi wakerachkuinŋkia chíkichkia mantuachminiaiti. Jákatniuncha tura nantaktin-niasha winia Apar surusuiti" tímiayi Jesus.

¹⁹ Israer-shuarsha nuna antukar niisháa enentáimprar kanakiarmiayi. ²⁰ Untsurí tiarmiayi "¿Urukamtai ántarum wáuruk tausha. Yajauch wakanin takaktsuk?" ²¹ Tura chikichcha tiarmiayi "¿Yajauch wakantrinniusha núnisan chichasminkiait. Yajauch wakantrinniusha kusurun íimtikramniashit?" tiarmiayi.

Israer-shuarka Jesusan nakitiarmiania nu

²² Micha nantutin Israer-shuar Jerusarénum namperan najananiawai. Nu nampernumsha Yusa Uunt

Jee atak jeamman enentáimtuiniawai. ²³ Jesussha Yusa Uunt Jee áachiniam wekasamiayi Sarumúnka wáitirja nuj.

²⁴ Israer-shuarsha Nin téntakar tiarmiayi “¿Ame nekas Krístukaitiam? Ju chichamaik etserkata. ¿Urukamtia nekas paant tátsum?” tiarmiayi.

²⁵ Tutai Jesus tímiayi “Yaunchu tiniu aijn enentáimturachmarme. Winia Apar akupkamun takaajna nu ti paant awajtawai. ²⁶ Tura átumka winia murikruchu asarum enentáimturtsurme. ²⁷ Wisha winia murikrun untsuam anturtuiniak nemartuiniawai. Wisha wínianak mash nékajai. ²⁸ Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? ²⁹ Winia Apar murikrun surusuiti. Niisha ashí nankaamas kakaram asamtai ¿yaki uwejéyan atankit? ³⁰ Wisha winia Aparjaj iisha aya chikichkiitji” tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesussha tímiayi “Winia Aparu kakarmaríjaj ti untsurj péñkera nuna takasuitjai. ¿Tújajmpia mantuat-tarum?”

³³ Israer-shuarsha Nin tiarmiayi “Pénker túra asakmin máataj tátsuji antsu Yus yajauch chicharkumin túrattaji. Ámeke shuáraitiam Yusa nuke enentáimtumame” tiarmiayi.

³⁴ Nuyá Jesussha tímiayi “Atumí akupeamuriin Yus timia nu áarmaiti: “Átum yúsaitrume” tawai. ³⁵ Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait. ³⁶ Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitiaj. Nújajinikia wi “Yusa Uchiríntjai” takui ¿itiurak “Yusan yajauch chicharui” túrutrum?

³⁷ Winia Apar túramu túrachkuinikia enentáimtur-sairap. ³⁸ Tura nekas túrakuinikia enentáimtursatarum. Tura Winia nakitrakrumsha nuikia wi túramu enentáimtustarum. Nujajinikia winia Apar Winin pujamu ashí nekaattarme. Núnisnak Wisha Niin pujajai. Iisha chikichkiitji.” ³⁹ Tutai ataksha sepunam enkeatai tiarmiayi. Túrasha Jesus uwempramiayi.

⁴⁰ Nuyá Jesus Jurtañ entsa amain wé yaunchu Juan imiakrattainium pujusmiayi. ⁴¹ Ti untsurj shuar iyumar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi.

⁴² Nujsha untsurj Jesusan enentáimtusarmiayi.

Rásaru jakamu

11 Petania péprunam áishman, ni naarj Rásaru, jaa pujumiayi. Nu péprunam Marí ni kajijaj Már-tajaj pujumiayi. ² Niisha Rásaru umai ármiayi. Nu Marisha ukunmanka kunkuinian sumak Jesusan kuer ni intiashíjaj japirmiayi. ³ Tura Rásaru jaaku ni umaj Jesusan chichaman akuptuiniak tiarmiayi “Uunta, ame amikrum jaawai.”

⁴ Jesussha nuna antuk tímiayi “Tuke jakataj tusa jaatsui. Antsu Yusa kakarmarísha tura ni Uchirí kakarmarísha jú sunkur tsuármanum paant atí tusa jaawai.” ⁵ Je-

sus Mártañcha ni kajincha tura ni umaj Rásaruncha nekas aneemiayi. ⁶ Túmaitiat Rásaru jaawai taman antukiat ni pujamunam jimiará tsawant pujusmiayi. ⁷ Nuyá ni unuiniamuriñ “Ataksha Jutía nunkanam wetái” tímiayi.

⁸ Tura ni unuiniamuriñsha tiarmiayi “Uunta, nuiksha Israer-shuar kayajaj tukurmar mantamatai tícharmaka. ¿Nuñ ataksha wétai támek?”

⁹ Jesussha ju métek-taku chichaman tímiayi “Tsawajikia páantchakait. Tsawaj wekaana nu paant asamtai tukumkashtatui. ¹⁰ Tura kashi wekaana nusha kirit asamtai tukumkáttawai. Núnisañ Wíi tuke pujakun winia takatrun takastiniaitjai. Túraknasha iturchatan wáinkiashtatjai.” ¹¹ Nuyásha Jesus atak tímiayi “Ti amikrj Rásaru kanarai. Wi ishintiartatjai.”

¹² Tutai ni unuiniamuriñ tiarmiayi “Uunta, aya kanarka nuñkia péñker ajastatui.” ¹³ Jesuska Rásaru jakamu nékayat “kanarai” tímiayi. Tura ni unuiniamuriñ Rásaru kéjinmakua áintsañ kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi. ¹⁵ Tura nuñ pujuscha asan kúntuts pujatsjai. Jean túrattajna nu ísrum ti nekas enentáimtursattarme. Nuna nekaan shiir enentáimjai. Wátsek, iyutai.” ¹⁶ Nuyá Jimiampramu Tumas chíkich unuiniamuriñ nuñ armia nuna “Iisha weri Niijjaj métek jakatai” tímiayi.

Iwiaaku átinniasha jaka nantaktinniasha Jesus nérenniuiti

¹⁷ Nuñ taa, Rásarun kuaru tsawant ikiusman wáinkiamiai. ¹⁸ Petania pépruka Jerusarénnumia menaintiú kirumitru áinis tíjiuchiiti. ¹⁹ Tuma asamtai untsurj Israer-shuar Mártañcha Marísha, ni umaj jakamtaí uutkui atsañkrataj tusa weriarmiayi. ²⁰ Mártañcha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi. ²¹ Tura Marta Jesusan inkiun tímiayi “Uunta, Ame pujakminkia winia umar jákachajaj.” ²² Tura tuke nékajai ashí Yus seamna nuna súramui.”

²³ Jesussha tímiayi “Ame umaimisha nantaktiatui.”

²⁴ Mártañcha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

²⁵ Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui. ²⁶ Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

²⁷ Niisha “Ee, Uunta, ame Yusa Uchirínme. Krístuitme, uwemtikkiartin jú nunkanam tátinia nu” tímiayi.

Jesus Rásaru iwiansamunam taa útmania nu

²⁸ Mártañcha nuna ti, ni kaj Marin untsuk úukan tímiayi “Uunt juñ taa untsurmawai.” ²⁹ Marisha nuna antuk wárik wajaki Jesusa iyuttsa wémiayi. ³⁰ Jesussha péprunam jeatsuk Marta inkiunmanum pujumiayi.

³¹ Marí wari wajaki wématai Israer-shuar nu jeñam atsañkrattsa pujuiniasha nuna íisar weriarmiayi. Iwiansamunam úuttiasa wéatsush tusa weriarmiayi.

³² Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

³³ Jesussha Marincha tura niijjaj útuncha wáiniak wáitnentaimta asa ti kúntuts pujusmiayi. ³⁴ Tura “Tui iwiarsamarum” tímiayi.

Niisha “Uunta, iitia” tiarmiayi.

³⁵ Jesussha útmiayi. ³⁶ Israer-shuarsha “Ti aneatsuk” tiarmiayi. ³⁷ Tura chíkich “Kusuru tsuáruuchukait. Nii pu-jakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kuntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi. ³⁹ Tura Jesus “Kaya jurustarum” tímiayi.

Rásaru umaj Marta tímiayi “Uunta, kuaru tsawant jákai. Mejeatsuk’ tímiayi.

⁴⁰ Tura Jesus tímiayi “Yus enentáimtakmeke Yusa kakarmarj wáinkiattame tíchamkajam.” ⁴¹ Nuikia kayarin uratiarmatai Jesus nayaimpin iis tímiayi “Aparu, Winia anturtakmin yumisajme. ⁴² Winiasha tuke anturtame tura ju shuaran péñker enentáimtikrataj tusan tajai. Ame akuptukuitmena nuna nekarmawarti.”

⁴³ Nuna tinia kakaram untsuak “Rásaru jíinkitia” tímiayi. ⁴⁴ Nujajinkia penuarmartiuk jiinkimiayi. Yapin-masha jajanchjijaj ijamuyayi. Tura Jesus “Atirtarum. Wéti” tímiayi.

Jesusan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsurj Israer-shuar Marin nemariaru Jesus túramun íisar enentáimtusarmiayi. ⁴⁶ Tura chíkichkia Pariséunam wear Jesus túramun ujakarmiayi. ⁴⁷ Nuna antukar Pariséusha Israer-patri úuntrijsa ashí naamka uunt armia nujaj iruntrar tiarmiayi “¿Warí itiurkamni-ait? Nu shuarka aentsti tujintiamun ti túratsuk. ⁴⁸ Aya júnik iniaiyakrinkia ashí shuar Nin enentáimtuschartat-uak. Nuyá Rúmanmayá apach taar mesetan najanawartatui tura in amutmakar Yusa Uunt Jeencha emesartatui.”

⁴⁹ Nu uwitin Kaipias Israer-patri uuntriayayi. Niisha tímiayi “Átumka nékatsrume. ⁵⁰ ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi. ⁵¹ Kaipiaska aya ni enentáim-miajajin tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújajinkia Israer-shuar Jesus jaruktinian ujakmiayi. ⁵² Tura aya Israer-shuarnakcha antsu niijjajisha ashí nunkanam Yushuar ajasarun irurtajtsa jákatniuyi. ⁵³ Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuar-num wekaichmiayi. Antsu Jutía nunkanmayá jiinki at-samu nunkanam Eprain pepru tíjiuch wémiayi. Tura nuj pujusmiayi ni unuiniamurijjaj.

⁵⁵ Israer-shuara namperj paskua ishichik jatemsam-tai untsurj shuar yajá péprunmayá Jerusarénum káunkarmiayi. Kame paskua jeatsajin Muisais timia

núnisanñ ni ayashisha enentájsa iwiarnarat tusa wake-riarmiayi. ⁵⁶ Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi. ⁵⁷ Pariséusha Israer-patri uuntrijsa akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

Marí Jesusan kunkuinian kuérmiania nu

(Mateu 26.6-13; Márkus 14.3-9)

12 Paskua jísat jeatin sais tsawant ajasmatai Jesus Petania péprunam wémiayi. Jesus jakamunmayá iniantkimia nú Rásaru nuñ pujumiayi. ² Jesus jeamtai ayurawarmiayi. Rásarusha niijjaj yurumámiayi. Már-tasha yurumkan iwiasmakmiayi. ³ Tura Marikia kunkuinian ti kuitjaj ritru ajapén sumak itiamiayi. Tura Jesusa nawen kuer ni intiashijjaj japirmiayi. Jeasha nu kunkuinjaj ti shiir kunkuñmiayi. ⁴ Jútas Iskariúti, Semu-ñka uchirj, nuj pujumiayi. Niisha Jesusa unuiniamurj-in-tiat ukunam Jesusan surukmiayi máawarat tusa. Ni-isha tímiayi ⁵ “¿Urukamtai nu kunkuinian ti kuitjaj su-rukchama kuítrinchan súsatniun?” ⁶ Kame kuítrinchan enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératni-un sumak ikiurtusuiti. ⁸ Kuítrincha tuke atumjaj íruntsuk. Antsu Wikia atumjaj tuke pujuschattajai” tímiayi.

Rásaruncha máataj tiarmiania nu

⁹ Israer-shuarsha Jesus Petania péprunam pujan antukar Jesus íistaitсар weriarmiayi. Rásaruncha Jesus jakamunmayá iniantkimia nusha iyutai tusar wear-miayi. ¹⁰ Túramtai Israer-patri uuntriñkia chichaman ju-rusarmiayi Rásaru maatai tusar. ¹¹ Untsurj Israer-shuar Rásaru iniantkimiu nekaawar Israer-patrin ikiukiar Je-susan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusarénum shiir wayamiania nu

(Mateu 21.1-11; Márkus 11.1-11; Rúkas 19.28-40)

¹² Paskua namperan pachiiintuktajtsa ti untsurj shuar Jerusarénum wearmiayi. Kashin tsawar Jesus nú peprunam tátinian nekaawarmiayi. ¹³ Niisha tintiuki nuké áinis nukan júurar Jesusan inkiuntai tusar jíinkiarmiayi. Túrawar untsumainiak “Shiir tati, tiarmi-ayi. Yusa kakarmarijjaj winiana nu tí péñkeraiti. Israer-shuara uuntri asa shiir at” tu untsumiarmiayi. ¹⁴ Je-sussha umpuurun wáiniak entsamkamai. Núnisanñ áar-maiti Yus-Chichamnum:

¹⁵ “Señ péprunmayá shuara, ashamkairap. Atumí Akupniurj umpuurunam entsamak winiawai.”

¹⁶ Nu chichamaik Jesusa unuiniamurj nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisanñ túrunamiayi.

¹⁷ Jesus Rásarun iwiarsamunmayá iniantkimiun wáinkiarua nú shuar nuna áujmatiarmaiya. ¹⁸ Tuma asamtai shuar Jesus nu tujintiamun túramtai nekaawar Jesusan inkiunktaj tusar jíinkiarmaiya. ¹⁹ Tura Paríséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

Kriaku apach Jesusjaj chichastinian wakeriarmiania nu

²⁰ Paskua nampernum Yus shiir awajsatniun Jerusarénnum weriaruka untsurí nunkanmayá shuar ármiaiya. Kriaku apachcha ármiaiya. ²¹ Niisha Jiripin weantukarmiayi. Kame nu Jiripi Petsaitia péprunmayáuyayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjaj chichastaitisar wakeraji” tiarmiayi. ²² Jiripisha Antresan werí ujakmaiya. Nuyá niijaj métek tsaninkiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástajai. ²⁴ Wi tájana nu ti nekasaiti. Jínkiaia ántsanketjai. Araachmaka níngi pujatsuk. Antsu araamka tsapain jinkiaichirí kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui.

²⁵ Shuarsha jinkiaia nuke aya ju nunkanam pénger pujustinian enentáimkiunka ántar pujak nekas iwiaakmarín emenkkattatui. Tura ju nunkanam pénger pujustinian enentáimtsuk jákatniuncha ashamchaá nú shuarka nekas iwiaakman wáiniak tuke iwiaaku átatui. ²⁶ Shuar winia átaj takunka nemartusti. Túranka Wi pujajna nuí Wíi shuar tuke átatui. Núnisañ Wíi shuar winia takatrun takáa nuna winia Aparsha shiir enentáimtustatui’ tímiayi.

Jesus ni jákatniun étserei

²⁷ Yamaikia enentáiruí ti itiurchat pujajai. ¿Warittiajak. “Aparu, ju túrunatniunmayá uwemtikrurta” titiajash? Antsu jú túrunatniun táwitjai. ²⁸ Aparu, wi túramujaj ashí shuar ame náarmin shiir enentáimturarti’ tímiayi Jesus.

Tutai nayaimpinmayá chichaman antukarmiayi. “Winia náarun shiir awajsaitjai tura ataksha shiir awajsatjai” tímiayi.

²⁹ Shuarsha nui pujuinia “ipiamtachuashit” tiarmiayi. Tura chikichcha “Nayaimpinmayá suntar Nin chichasai” tiarmiayi.

³⁰ Jesussha tímiayi “Wi antuktinian chichaschayi antsu átum nekaatarum tusa chichasai. ³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. ³² Tura numiniam awajnaintai ashí nunkanmayánka shuar enentáimturartatui’ tímiayi. ³³ Juna taku krúsnum jákatniun ujakmaiya.

³⁴ Shuarsha awajrirar tiarmiayi “Yaunchu Yus akupkamu papiniumiá áujsar nékaji. Kristu tutai tuke jáatsuk iwiaaku pujustiniati. ¿Itiurak nuikia “Aents Ajasu numiniam awajnaitniuiti” tame? Aents Ajasuka Krís-

tuchukait, Yus anaikiamu. Núchaitkiunkia Aents Ajasuka yait?” tiarmiayi.

³⁵ Nuínkia Jesus tímiayi “Wi tsáapninia áintsanketjai. Tsáapnisha atumín aya ishichik tsawantin tsáapniartatui. Tsáapin ana juík wekasatarum kirit ajatsajin. Kame kiritniunam wekaana nusha nékatsui itiuranimpia wea. ³⁶ Tsáapnin wáinkiuuram nin enentáimtustarum.

Túrakrum winia tsáapnintruí wekasattarme.” Jesussha nuna tí wémiayi uumak pujustaj tusa.

Untsurí Israer-shuar Jesusan enentáimtuscharmiania nu

³⁷ Jesus aentsti tujintiamun ti untsurí túramtaisha Nin enentáimtuscharmiaiya. ³⁸ Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

³⁹ Nuna uminiak Jesusan enentáimtuscharmiaiya. Tura nu arantcha Isayas áarmiaiya:

⁴⁰ “Yus nin kusuru awajsaiti tura ni enentáincha kát-suram awajsaiti. Ni jijijaj ímsajin tusa tura ni enentáijijaj nekaawajin tusa túrait. Kame ni tunaarí isar enentáimtuiniakui Yus nin tsúarainti” tu áarmaiti.

⁴¹ Isayas yaunchu Jesusan nayaimpiniam ti shiir pujan wáiniak nuna tímiayi.

⁴² Tuma ajin untsurí Israer-shuarsha tura ni uuntrinmayasha Jesusan nekas enentáimtusarmiaiya. Tura ni isha Paríséun ashamainiak paant tícharmiaiya. Israer-shuara iruntairiya jiki awetamajj tusa ashammiamiaiya. ⁴³ Yus shiir enentáimtursati tutsuk antsu shuar shiir enentáimtursati tusar túrawarmiayi.

Shuaran sumamtikiatniun táchaitjai antsu uwemtikratniun táwitjai, timiania nu

⁴⁴ Jesus kakantar untsukum tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. ⁴⁵ Winia wáitkiusha Winia Aparnasha wáinui. ⁴⁶ Wikia tsáapnin asan Winia enentáimturainia nuka kiritniunam wekasajin tusan ju nunkanam táwitjai. ⁴⁷ Shuaran sumamtikiatniun táchaitjai antsu uwemtikratniun táwitjai. Tuma asamtai shuar winia chichamprun antuk umíachkunka sumamaiti. Tura Wikia sumamtikiachuitjai. ⁴⁸ Winia nakitruur chichampruncha enentáimtachu-ka sumamtikiamuiti. Wi timiaj nuka amuukatin tsawantaj nin sumamtikiattawai. ⁴⁹ Wi enentáimmiajajin chichaatsjai. Winia Apar akattur akuptukuiti. Tura chichastinia nuna surusuiti. ⁵⁰ Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asamtai winia Apar túrutmia núnisnak tajai” tímiayi Jesus.

Jesus ni unuiniamurí nawen nijiatramiania nu

13 Paskua jísat jeatin chikichik tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa

amúamunmasha yapajitsuk tuke aneemiayi. ² Nu tsawantajsha murikiun yúatin ármiai. Tura yurumáin jeatsáin, uunt iwianch Semunka uchirí Jútas Iskariúti enentáin Jesusan surukat tusa enentáimtikramiai. ³ Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa ⁴ chíkich yurumuk pujuiniaj wajakmiayi. Tura pushirín áimiak awanékéman emenmamamiayi. ⁵ Nuyá nijiaamatainiam entsan yará ni unuiniamurj nawen nijiatramiai. Tura awanékémjaj japirmiayi. ⁶ Semun Pítrunam jeamtai Pítiur tímiayi "Uunta, ¿Winia nawer nijiatraj tamek?"

⁷ Jesussha tímiayi "Wi túrajna nu yamáí nékatsme tura ukunam nekaattame."

⁸ Tura Pítiur tímiayi "Peñké winia nawer nijiarchat-tame."

Jesussha tímiayi "Wi nijiaachkuinkia Wijiaj tsaninkia pujuschamniaitme."

⁹ Tutai Semun Pítiur tímiayi "Nuiñkia, Uunta, aya nawerkechu antsu uwejrusha tura muukarsha nijia-trurta."

¹⁰ Tura Jesus tímiayi "Yamáí mainkia ayashí shiir asamtai aya nawenij nijiamártiniaiti. Atumí enentáin ashí péñkeraitrume. Túrasha ashí shuarcha" tímiayi.

¹¹ Kame Jútas Nin suruktinian nekáa "ashí shuarcha" tímiayi.

¹² Jesussha nijiar umik ni pushirín entsarmiayi. Tura atak pujus tímiayi "¿Atumsha Wi túrajna nu nekaarmek? ¹³ Wi atumí Uuntri asamtai nekas "Uunta" túrutrume. Nusha péñkeraiti. ¹⁴ Tura Jintinniuitiatan tura Úuntaitiatan atumí nawen nijiarachajak. Atumsha núnisrumek nuamtak nánem nijiatnairatarum. ¹⁵ Atumin nekapruatsan túramjai. Atumsha núnisrumek túratarum. ¹⁶ Ti nekas tajai. Takarniuka ni uuntri nankaamaschaiti. Akupkamusha akupea nuna nankaamaschaiti. ¹⁷ Nu nekaarum túrakrumka shiir átatrume."

¹⁸ Tura tájana nuna ashí tátsujrume. Anaikiaitaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

"Wijiaj yurumna nu winia nemasur ajasai."

¹⁹ Nuka túmatsáin ujaajrume. Nuyá túrunamtaí Yusa Uchiríntjai nusha paant nekaattarme. ²⁰ Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai" tímiayi.

Jesus Jútas Nin suruktinian étserei

(Mateu 26.20-25; Márkus 14.17-21; Rúkas 22.21-23)

²¹ Nuna tj, Jesus ni enentáin ti itirchat enentáimpramiayi. Tura paant tímiayi "Nekas tajai, chikichik juj atumjaj pujana nu Winia suruktattawai."

²² Tutai ni unuiniamurj nuamtak íniaisar "¿Yanak ta?" tiarmiayi. ²³ Chikichik unuiniamurj, Jesus ti aneamu, Nijiaj tsanin yurumuk pujumiayi.

²⁴ Tuma asamtai Semun Pítiur ni uwejéjaj iniakmas "Aniasta, ¿yanak áujmata?" tímiayi.

²⁵ Tutai Jesusan áyanmatsan aniasmiayi. "¿Yait, Uunta?" tímiayi.

²⁶ Jesussha ayak "Tantan túumnium ajuñkan susattaj núiti" tímiayi. Nújajin tantan túumnium ajuñ Semunka uchirín Jútas Iskariútin susamiayi. ²⁷ Tura wárik Jútas tantan achikmatai íwianch ni enentáin wayamiayi. Nuyá Jesus tímiayi "Túratamna nu wárik túrata."

²⁸ Tura ashí nuj yurumainiak pujuarmia nusha warinik ta tusa nekaacharmiayi. ²⁹ "Kuítrincha kuit súserta" tátsuash tu enentáimprarmiayi. Tura chikichcha "nampernum yurumáin atsumajnia nu sumakta" tátsuash, tu enentáimprarmiayi. Jútas kuítian wáinin asamtai tu enentáimprarmiayi. ³⁰ Jútas tantan yua kashi ajasmanum jíinkimiayi.

Yamaram akupkamu

³¹ Jútas jíinkimtai Jesus tímiayi "Wi Aents Ajasu asamtai winia kakarmar yamaikia paant átatui. Tura wi túramujaj Yusa kakarmarisha ti paant átatui. ³² Wi Yusa kakarmarín paant awajeakui Wisha ni Uchirí asamtai winia kakarmarnasha Yuska wárik paant awajsattawai. ³³ Uchichiru, atumjaj ti untsurj tsawant pujuschattajaj yamaikia. Wi Israer-shuaran tímiay nútiksanak atumin tájarme. Atumsha Winia éátkáttarme tura wi wéamunam winishtatrume. ³⁴ Ju yamaram akupeamun amaa-jaj nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume. ³⁵ Anenaiyakrumniñkia nujaj ashí shuar "Kristu unuiniamurj ániawai" túramartatui.

Pítiur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

³⁶ Semun Pítiur Jesusan aniasmiayi "Uunta, ¿tua wéam?"

Jesussha tímiayi "Wi wéajna nuj yamaikia winichmini-aitrume. Tura ukunam winittiarume."

³⁷ Nuyá Pítiur tímiayi "Uunta, ¿urukamtaí yamaikia winichminiaitaj? Ámin yáingajtsan jakataj tajai."

³⁸ Jesussha tímiayi "¿Nekasmek táme? Ti nekas tájame, atash shiniatsáin Winia menáintiú natsantrur-tatme" tímiayi.

Jesus Yus-jintiaiti

14 "Kúntuts pujusairap. Yus enentáimtustarum, Winiaasha enentáimtursatarum. ² Winia Aparuí átum pujustin ti ankant awai. Tura nuna iwiarataj tusan Aparuí wéajaj, nekasaiti. Nekaschaitkiuinkia žitiurak ujakaajrum? ³ Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan. ⁴ Wi wéaj nu nékarme tura jintiasha nékarme" tímiayi Jesus.

⁵ Tumas tímiayi "Uunta, Ame weam nu nékatsji. ¿Jintiasha itirak nekaattaj?"

⁶ Jesussha tímiayi "Wi nekas jintiaitjai. Wijiajinchu wekaana nuka winia Aparuí jeatniun penké tujintiawai. Tura Wisha tuke nekas tiniu asan nekas ana nuna shuáran nékamtikiajai. Wisha shuáran yamaram iwiaakman tuke amuukashtinian súwitjai. ⁷ Winia

nekarkurmeka winia Aparsha nekaawaintrume. Yamaisha Nii wáinkia asarum nékarme" tímiayi.

⁸ Nuiñkia Jiripisha tímiayi "Uunta, Apasha wáinkiaraka maak."

⁹ Jesussha tímiayi "Jiripi, atumjají ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, "Apasha wáinkiaraka maak" tame? ¹⁰ Winia Aparjají tsaniñkian pujakun tura winia Aparsha Wijjají pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai.

¹¹ Nekaatarum. Wisha winia Aparjají tsaniñkia pujakur nekas chikichkiitji. "Nu chicham itiurchataiti" enentáimkiurmeka wi túramu nuikia enentáimpratarum. Wi túramujají chikichik ájini nu páantchakait. ¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparují wéakui nuna nañkaamas tujintiamun túrattawai. ¹³ Ashí Winia enentáimtusarum seatrumna nuna amastatjai. Nújajinñkia winia Apar shiir awajnastatui. ¹⁴ Winia enentáimtusarum seakrumñinñkia ashí túrattajai' tímiayi.

Jesus Yusa Wakanín akupkattawai

¹⁵ Atumsha anentkurmeka winia chichamur umiktarum. ¹⁶ Tura wéakun winia Aparun chikichan akup-turmakti tusan seattajai. Niisha atumjají tuke pujak at-santamprartatui. ¹⁷ Nusha Yusa Wakaníinti. Yus-shuar-cha Nin nekaachmin ániawai. Tuma asamtai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui. ¹⁸ Mitiaikia áitkiasnak ikiukchattajrume. Atumíin atak tátatjai. ¹⁹ Ishichik tsawant nañkaasmatai chí-kich shuar irunna nu wáitkiachartatui. Tura Wi iwiaaku asamtai átumka nu iwiaakmajají pujustatrume. Tuma asarum wáitkiattarme. ²⁰ Tura nu tsawantaj jü nekaattarme. Wisha winia Aparjají tsaniñkia pujakur chikichkiitji. Núnisnak Wisha atumjají tsaniñkian pujajai. Tura atumsha Wijjají tsaniñkia pujarme. ²¹ Shuar Winia anentuka wi akupkamun nekáa umíawai. Nú shuarna-ka winia Aparsha aneawai. Wisha nin aneajai tura nekarati tusan iniaktustatjai." Jesus nuna tímiayi.

²² Chíkich Jútas, Iskariútichu, tímiayi "Uunta, ¿urukamtai ashí shuarum iniaktutskesha aya in iniaktustatam?"

²³ Jesus tímiayi "Winia anentuka tájana nuna enentáimtwai. Winia Aparsha nu shuaran aneattawai. Tura Wisha winia Aparnum nu shuarjají tsaniñkia pujustatji. ²⁴ Antsu Winia anentchaka tájana nuna enentáimtat-sui. Átum ántarmena nú chichamka wíniachuiti, antsu Yus Apa Winia akuptukua Núnaiti' tímiayi.

²⁵ Atumjají tuke pujakun nuna tájarme. ²⁶ Yus Apa ni Shiir Wakanín atumin yáinmak at-santamprarat tusa akup-turmaktatrume. Wi seam túrattawai. Nu Wakan-cha ashí Wi ujakjarmena nuna atak enentáimtikram-prar ashí unuitiamprartatui' tímiayi.

²⁷ Imiatkinchanum pujustarum. Imiatkinchanum pu-jajna núnisrumek pujustarum tusan amaajai. Jú nuñkanmanñka warastin wáinkiashtatrume. Antsu itiur-

chatnum pujayatrume Wíjají imiatkinchanum pu-justatrume. Ashamtsuk pujustarum. Itiurchat enentáimprairap. ²⁸ Nuik timiaj nu antukmarme. Aparují we-na atak atumíin tátatjai. Winia Aparka Wijjají nañkaamas úuntaiti. Tuma asamtai ti nekas anentkurmeka "Aparují wéajai" takui ashí warasáarme. ²⁹ Nuka túmat-sajin ujaajrume. Túrunamtai nuyá Winia enentáimtur-sattarme" tímiayi.

³⁰ Jú nuñkanmayan akupin winiakui atumjají núkap chichaschattajai yamaikia. Wíniaka nupettukchamni-aiti. ³¹ Tura Wikia winia Aparun aneajai tura Nii akup-turkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetáí' tímiayi.

Numi arakma áintsanñketjai

15 'Winia iwiaakmarun amaakun numi arakma áintsanñketjai. Wikia kampuintjai atumsha kanawentrumek. Winia Aparsha arakan wáiniua núnis-saiti. ² Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. ³ Wi ujakjarmena nujají puruarmaitrume. ⁴ Numí kanawesha kampuin áchitkiachkuñka niñki nerechamniaiti. Núnisrumek atumsha Winí áchitki-achkurmeka nerechamniaitrume. Wi atumjají áchitkiaj núnisrumek atumsha Winí tuke áchitkia atarum' tími-ayi.

⁵ 'Wikia kampuintjai atumsha kanawentrumek. Kam-puñkia kanawen áchitkia núnisnak achiakjarme. Tura kanawe ni kampuinin áchitkia núnisrum Winí áchitkia atarum. Túrakrumka núkap nerektatrume. Antsu Wíjajinñchuka péñker túratin péñké tujintiarume. ⁶ Winí áchitkiachuka ajapam kukartatui. Kanawesha kukar-matai shuar irumkar áesawartatui' tímiayi.

⁷ Tuke Winí áchitkiatkiurmeka tura winia chicham-prusha kajinmattsuk emetarmeka átum wakerarmena nu seakrumin amastatjai. ⁸ Átum núkap nereakrum-ñinñkia ashí shuar "Nekas Jesusa unuiniamurinti" túra-martatui tura winia Aparnasha shiir awajsartatui. ⁹ Winia Apar anenna nútiksanak Wisha atumin aneaj-rume. Winia aneamur tuke atarum. ¹⁰ Winia Aparu akupkamurín umiakun tuke ni aneamurintjai. Núnis-rumek winia akupkamur umiakrumka tuke winia aneamur átatrumek' tímiayi.

¹¹ 'Wi waraajna áintsarmek warastarum tusan nuna tájarme. Tura ti shiir warastatrume. ¹² Wi akupkamu júiti: "Wi aneajrumna nútiksarmek ashí anenaitiarum."

¹³ Shuar ni amikrín yáinñtaj tusa jakañka ti aneñkar-tichukait. ¹⁴ Wi akupeamu takaakrumka atumsha winia amikruitrume. ¹⁵ Takarniuka ni uuntrí takaana nuna nékatsui. Tuma asamtai "winia takarniuruitrume" tát-sujrume. Antsu ashí winia Apar táman ujaku asan "winia amikruitrume" tájarme. ¹⁶ Aya atumí enentáim-samurijjajin Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum péñker túrat-niuitrume nerektinia áintsarmek. Tura nu nere amuut-suk tuke átiniaiti. Tuma asamtai winia Apar searmena

nuna amastatui. ¹⁷Júnaka akupeajrume: Nuamtak mai anenai ajatarum' tímiayi.

Yus-shuarcha Jesusnasha Níniuncha nakitiainiawai

¹⁸Ju nuñkanmayá shuar Winia emka nakitrurar atumniasha nakitramarme. ¹⁹Atumsha ju nuñkanmayá shuaraitkiurminkia niiniua nútiksañ anenmaintrume. Antsu Wíi shuar ajastarum tusan ju nuñkanmayá achikmajrume. Túramtai nekas ju nuñkanmayáñchuitrume yamaikia. Nu asamtai nu shuar nakitramainiawai. ²⁰"Takarniuka ni uuntrí nañkaamaschaiti" tíchamkajrum. Shuar Winia yajauch awajtusaru ásar atumniasha yajauch awajtamsartatui. Chichichcha umirtukaru ásar atumniasha umirtamkartatui. ²¹Winia Akuptukun nékachu ásar Winia enentáimturkurmin yajauch awajtamsartatui' tímiayi.

²²"Wi tana Yus-Chichaman nin ujakchamtañkia tunaanum sumamacharañyi. Antsu ujakma ásar "Nékachkun túraitjai" tíchamin ániawai. ²³Winia nakitruinia nuka winia Aparnasha nakitiainiawai. ²⁴Aents peñké túrachman túrachuitkiuñkia tunaanum sumamacharainti. Antsu wi túramun wáinkiaru ániay-at Winiasha tura winia Aparnasha nakitiainiawai. ²⁵Yaunchu Yus akupkamunam áarmaiti: "Peñké ántar nakitruarmai."

Nu chicham uminkiatu tusa túrunaiti' tímiayi.

²⁶Tura atsantamprattsa yáinmana nuna winia Aparuñya akuptuktatjarme. Niisha tuke nekas tiniu Wakaniiti. Niisha Yusajya taa atumin nekamtikrampratarme. ²⁷Atumsha yaunchu Wijjají pujusu asarum nekamtikiatarme' tímiayi.

16 'Átum kanartukajrum tusan júna tajarne. ²Israer-shuar iruntainiumiá jiki akuptamkattarme. Nu arantcha mantamainiaksha "Yúsan shiir awajtsatsan túrajai" tírtatui. ³Nu shuar Winiasha tura winia Aparnasha nékachu ásar túrutmawartatui. ⁴Núnaka yamá tajarne. Tura túrunamtai "núnisañ átiniaiti" timiaj nu nekaarum itiurchat enentáimprairap' tímiayi.

Yusa Wakaní túrana nu

'Atumjají tuke pujá asan núnaka yaunchu ujakchamarume. ⁵Antsu yamaikia wáketjai winia Akuptukmia nujají pujustaj tusan. Tuma áññ wéajna nu ininratrume. ⁶Antsu nuna takui ti kuntuts enentáimprarme. ⁷Tura Wi wématai atumjajíñkia nuna nañkaamas péñker átatui. Iis, Wi wéaknaka atumin yainmaktinia nuna akupkattajai tura wéachkuiñkia táchattawai. Nuka ti nekasaiti. ⁸Yusa Wakaní taa ashí jú nuñkanmayá aentsun ju menaintiun nekamtikiatawai. Ni tunaarj aan nekamtikiatawai. Péñker tunaajajínchu wekasamiana nunasha nekamtikiatawai. Tura Yus tunaanum súmamtkiamniana nunasha nekamtikiatawai. ⁹Winia enentáimturainiachu tunáarintin ániawai. ¹⁰Winia Aparuñ wáketkui wáitkiashtatrume. Tuma asamtai ashí shuar wi péñker tunaajajínchu wekaamun nekaawartatui. ¹¹Tura ju nuñkanam akupniunka Yus tunaanum

súmamtkia asa shuarnasha súmamtkiamniaiti. Nuna paant nekaawartatui' tímiayi.

¹²'Nu arantcha núkap tíntjarme túrasha átumka nekaachaintrume. ¹³Yusa Wakaní ashí nekas tiniu asa ashí nekasa nuna unuitiamprattarme. Ni enentáimmi-ajají tíchattawai antsu winia Aparuñ antukma nuna ujatmaktatui. Ukunam átatna nunasha ujatmaktatui.

¹⁴Ashí Wínian ujatmak Winia shiir awajtustatui. ¹⁵Ashí winia Apar takakna nusha Wíniaiti. Nu asamtai "ashí Wínian ujatmaktatui" tajai' tímiayi.

Kúntuts pujuiniayat ukunam warasartatui

¹⁶'Ishichik pujusrum Winia wáitkiashtatrume. Nuyá ataksha ishichik pujusrum ataksha wáitkiattarme. Wisha winia Aparuñ wéajai" tímiayi.

¹⁷Nuyá ni unuiniamurí nuamtak aniniaisarmiaiyi "¿Jú chichamsha warimpait? "Ishichik pujusrum wáitkiashtatrume tura ataksha ishichik pujusrum wáitkiattarme tura Aparuñ wéajai" tátsuk. ¹⁸"Ishichik pujusrum" tana nusha ¿warimpait? Nii tana nu ántatsji" tiarmiayi.

¹⁹Jesussha nin aniaistai táman nekáa tímiayi "Ishichik pujusrum wáitkiashtatrume nuyá ataksha ishichik pujusrum wáitkiattarme" tímiajai. ¿Núchakait átum inintrustin wakerarmena nu? ²⁰Ti nekas tajarne: Átumka kúntuts pujusrum úttiatrume tura Yus-shuarcha warásártatui. Tuma ajñk' átum kúntuts pujayatrume ukunam warastatrume. ²¹Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. ²²Atumsha núnisrumek yamaik kúntuts pujarme. Tura atak íitjarum tusan winiakui ti shiir atumí enentájn warastatrume. Nu warastinian jurutramkichminia ániawai.'

²³'Nu tsawantinkia peñké ininsashtatrume. Ti nekas tajarne Winia enentáimtursarum winia Apar searum nuna ashí amastatui. ²⁴Yamaisha Winia enentáimtur-sarum winia Apar seachurme. Seakrumniñkia amastatui ti shiir warasaruk tusa' tímiayi.

Jesus jú nuñkanmayan nupetkaiti

²⁵'Métek-taku chichamjají nakumkan nuna tímiajai. Tura ukunmanka nujají chichatsuk winia Aparnan paant ujaktatjarme. ²⁶Nu tsawantají átumka Winia enentáimtursarum winia Apar seattarme. Winia Aparsha atumin anea asamtai Wi Nin áujsatin atsumashtatrume. Winia anentu asarum tura winia Aparuñya taman enentáimtakrumin Niisha anenmawai. ²⁸Winia Aparuñya jíinkin jú nuñkanam táwitjai. Yamaikia jú nuñkanmayá jíinkin ataksha Aparuñ wáketjai" tímiayi.

²⁹Nuyá ni unuiniamurí tiarmiayi "Yamaikia métek-taku chichamjajínchu chichaame. ³⁰Mash nékaitme. Shuar Ámin ininmatsajín péñker áimkiatin nékame. Nu nekaar Ame nekas Yúsnumiáitme tu enentáimtaji" tiarmiayi.

³¹Tura Jesus tímiayi "¿Nekasash enentáimtarum? ³²Ti warik átumka ashamkarum niisháa tsakíñmaktatrume tura Winiak ikiurkittiarne. Antsu winia Apar pujakui Wiki pujatsjai. ³³Winia enentáimturkuram imiatkin-

chanum pujusarat tusan tájarme. Jú nuṅkanam ti wáit-sattarme. Tura Wi jú nuṅkanmayan nupetka asamtai warastarum" tímiayi Jesus.

Jesus ni unuiniamuriṅ Yúsan áujtawai

17 Nuna ti Jesus nayaimpinmaanṅ íimias tímiayi "Aparu, yamáí jeayi ame Uchiram shiir awajsatin. Núnisanṅ ame Uchirmisha péṅker awajtsamsattawai. ² Ashí shuara Akupniurṅ najataitme. Nujáṅkia Winia surusumna nú shuaran yamaram iwiaakman tuke amuukashtinian súsaitjai. ³ Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.'

⁴ 'Ashí túratniun akuptukmamna nuna amukuitjai. Túran ju nuṅkanam shiir awajsaitjame. ⁵ Nuna túramtai, Aparu, ti yaunchu jú nuṅka atsajsha Ámijjajai pujakui shiir awajtusmamna núnismek yamaisha shiir awajtus-ta.'

⁶ 'Ashí jú nuṅkanmayá surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti. ⁷ Ashí Wi takaajna nu Amek surusuitme. Niisha nuna nékainiawai.

⁸ 'Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.'

⁹ 'Nin yaṅkiarta tusan seajme. Jú nuṅkanmayá shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yaṅkiarta tusan seajme. ¹⁰ Ashí Winia ainia nuka Áminiuiti. Tura ashí Áminiu ainia nuka Winia áiniawai. Winia péṅkerusha ni túramunam paant awajsaiti.'

¹¹ 'Wikia yamaikia jú nuṅkanam pujuschattajai. Tura nu shuarka juṅ pujuartatui. Antsu Ámijjajai pujustajtsan winiakui ashí surusumna nuka, Aparu, ti shiir asam ame kakarmarmijjajai wáinkiata. Wisha Ámijjajai chikichik ájinia núnisanṅ niisha ashí iruntrar chikichik ajasarti. ¹² Juṅ niijjajai pujakun ame kakarmarmijjajai ti péṅker wáinkiamjai. Antsu Yus-Chichamnum aarma uminkiatitusa aya chikichik meṅkakaiti. Niisha tuke emesnar-tinia núiti.'

¹³ 'Yamaikia Amiini winiajai. Tura juṅ tuke pujakun ju-na tájame. Niisha Wi waraajna núnisar ti shiir warasarat tusan tajai. ¹⁴ Wi jú nuṅkanmayanchuitjai. Niisha núnisanṅ jú nuṅkanmayanchu áiniawai. Tuma asamtai ame chichammin Wi susamtai jú nuṅkanmayá shuarka nin nakitiainiawai. ¹⁵ Jú nuṅkanmayá jjúki tusan seatsjame. Antsu íwianch nin nupetkaṅ tusan seajme. ¹⁶ Wi juyanchuitiaj áintsanṅ niisha juyanchu áiniawai. ¹⁷ 'Ame chichammin ti nekasa nuna ántuiniakui péṅker awajsata. ¹⁸ Juyá shuarnum akuptukmam áintsan Wisha nin chíkich shuarnum akupeajai. ¹⁹ Aya Áminiuinak takastaj tusan enentáimtimjai. Túra asamtai niisha aya Áminiuinak takastinian enentáimpratin áiniawai' áujtak tímiayi.

²⁰ 'Aya níiniunkeka seatsjame antsu ashí ni chichamen antukar Winia enentáimtursartatna nusha

ame yaṅkiarta tusan seajme. ²¹ Ashí niisha chikichikini-ak enentáimtusarti tusan seajme. Wisha Amesha, Aparu, chikichik ájinia núnisanṅ niisha Iijjajai iruntrar chikichik ajastai tusan seajme. Wíi shuar chikichik najanata tusan seajme. Nuyá ju nuṅkanmayá shuar akuptukuitmena nuna nekaawartatui. ²² 'Ame shiir awajtusamna núnisnak Wisha nin shiir awajsaitjai. Iikia chikichik ájinia núnisanṅ niisha chikichik ajasarti tusan túraitjai. ²³ 'Wi ni enentáin pujakui Amesha Winin pujakmin péṅké chikichik ajasarti. Túramtai ashí shuar ju-na nekaawartatui: 'Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajajai ashí shuar nuna nekaawartatui.'

²⁴ 'Aparu, shuar surusmam nu, Wi pujustajana nuṅ pujusarti tusan seajme. Tura ti shiir awajtusmamna nuna íisarti tusan nuna seajme. Ju nuṅka najan-chamunman tuke anentin asam ti shiir awajtusuitme. ²⁵ 'Aparu, ti péṅker áminin ju nuṅkanmayá shuar nekarmainiatsui. Antsu Wi nékajme. Ju shuarsha ame akuptukman nékainiawai. ²⁶ 'Nú shuaran Ámin nekarmawarti tusan jintintiaitjai. Tura nu arantcha jintintiat-tajai. Nujáṅkia Wisha ni enentáin pujurkui Winia anenmena áintsanṅ niisha aneṅkratin ajasartatui' áujtak tímiayi Jesus.

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

18 Jesussha nuna tinia amuk ni unuiniamurijjajai Setruṅ entsá katiṅ numi arakmanum wémiayi.

² Jútassha Nin suruktajtsa pujumia nuka nu ajan nekaamiayi. Untsurṅ tsawant Jesus ni unuiniamurijjajai nuṅ iruntramtai Jútas Jesusan nuṅ wáinkiatniun enentáimpramiayi. ³ Tura untsurṅ suntarjajsha Jesusan tariarmiyai. Pariséusha Israer-shuar Patri uuntrisha suntarnasha Yusa Jeeṅ wáiniuncha Jesusan achikiarat tusa akuparmiyai. Niisha machitniasha nanṅincha rámparancha jiniasha júkiar weriarmiyai. ⁴ Jesussha ashí átinia nuna neka asa jiintiuki "¿Ya eṅarum?" tímiayi.

⁵ Niisha "Nasarétnumiá Jesus" tiarmiayi.

Jesussha "Wíitjai" tímiayi.

Jútassha Jesusan surukua nu niijjajai pujuarmiyai. ⁶ Tura Jesus "Wíitjai" takui ti ashamkar úkumur waketainiak iniaararmiyai.

⁷ Ataksha Jesus "¿Ya eṅarum?" tímiayi.

Niisha "Nasarétnumiá Jesus" tiarmiayi.

⁸ Nuṅkia Jesus tímiayi "Wíitjai, tájarme. Winia eṅatkurmeka Wíi shuar ainia júka waketkiarti" tímiayi.

⁹ Jesus nuik aujuk "Winia Apar surusma nu meṅkakacharai" timia nu uminkiatitusa Jesus "waketkiarti" tímiayi. ¹⁰ Nuyá Semuṅ Pítiur machitian jusa Marku kuíshin untsuurnumaanṅ tsupirkamiayi. Markusha Israer-patri uuntrṅ takarniuriyayi. ¹¹ Túramtai Jesus Pítrun tímiayi "Machitrumka awaiṅki ikiusta. Winia Apar wáitsatniun surakuṅkia ¿wáitsashtinkaiti-aj?"

Israer-patri úuntrĩniam júkiarmiania nu
(Mateu 26.57-58; Márkus 14.53-54; Rúkas 22.54)

¹² Nuiŋkia apach suntarsha ni kapitiantrĩsha Yusa Jeen wainniusha Jesusan achikiar jĩŋkiawarmiayi.

¹³ Nuyá Anasa jeen júkiarmiayi. Anassha Kaipiasa wearĩyayi. Tura Kaipias nu uwitin Israer-patri uuntriyaayi. ¹⁴ Kaipiasa nuik “¿Ashĩ Israer-shuar mesertin penkerkait. Antsu aya chikichik shuar jákatin penkerchakait?” timia núiti.

Pĩtiur Jesusan natsantramiania nu
(Mateu 26.69-70; Márkus 14.66-68; Rúkas 22.55-57)

¹⁵ Semuŋ Pĩtiur chíkich unuiniamujai Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi. ¹⁶ Tura Pĩtiur aa wáitiniam wajaamiayi. Túramtai chíkich unuiniamu jiinki wáitin wáinia nú nuwajai chichas Pĩtrun awayamiayi. Nuĩ nékanu asa yúpichuch awayamiayi. ¹⁷ Waiti wáinniusha Pĩtrun aniasmiayi “¿Amesha nuna unuiniamurĩnchukaitiam?”

Pĩtrusha “Atsá, núchaitjai” tímiayi. ¹⁸ Tsetsek asamtai suntarsha tura nuĩ takarniusha jinia ikiapárar ni nawen anaak pujuarmiayi. Pĩtrusha nuĩ pachiiniak anamuk pujumiayi.

Kaipias Jesusan aniasmiania nu
(Mateu 26.59-66; Márkus 14.55-64; Rúkas 22.66-71)

¹⁹ Israer-patri uuntri Jesusan aniasmiayi “Ame unuini- amurmesha ¿ya ainia. Tura warĩ nin jintintiaitiam?”

²⁰ Jesussha tímiayi “Ashĩ íimiainiaĩn tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuĩ arantutsuk tuke etserkaitjai.

²¹ ¿Urukamtai Winia inintiam? Winia chichamprun antukua nu aniastrarum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jeen wáiniua nu nuĩ pujá Jesusan yapiniam awati tímiayi “¿Núnisaŋ nekas úunt- num chichastinkait?”

²³ Jesussha tímiayi “¿Warinmampa yajauch aa? Turut- tia. Tura tájana nu penkeraitkiuĩŋkia ¿urukamtai awat- tiniam?” ²⁴ Nuyá Anas Jesusan jinkia Kaipias takaamu- nam akupkamiayi Kaipias Patri uuntri asamtai.

Pĩtiur ataksha Jesusan natsantramiania nu
(Mateu 26.71-75; Márkus 14.69-72; Rúkas 22.58-62)

²⁵ Tuke Anasa jeen chichainiaĩ Pĩtiur jinia anamuk pu- jaiŋ shuar aniaak “¿Amesha Jesusa unuini- amurĩnchukaitiam?” tiarmiayi.

Pĩtrusha “Atsá, wíchaitjai” tímiayi.

²⁶ Chíkich takarin, Marku shuari, nuĩ pujumiayi. Pĩtiur Marku kuishĩn tsupirkamia nuna shuari asa tímiayi “¿Ajanam Jesusjai wekaamin wáinkiachmakajam?”

²⁷ Pĩtrusha ataksha “atsá” taiŋ atash shiniukmiayi.

Piratu Jesusan aniasmiania nu
(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasaiya Jesusan júkiar tsawant tsawaa- munam apach kapitian Piratu takatai jeenam eje- niarmiayi. Israer-shuarsha ni uuntri akupkamia nunis- ar wapik ajasaij tusar nu jeenam wayacharmiayi. Wayawarka paskua nampernum yurumáchmin ármi- ayi. ²⁹ Nu asamtai Piratu niijjai chichastaj tusa jiinki tímiayi “¿Jú aishmansha warĩ tunáa túrait?”

³⁰ Niisha “Tunaarinchaitkiuĩŋkia amiini itichajai” tiarmiayi.

³¹ Tutai Piratu tímiayi “Atumek júkirum atumí akup- tammarijjai ni tunaari nekaatarum.”

Israer-shuarsha tiarmiayi “Antsu iikia Israer-shuar- tikia tunáa shuarsha máachminiaitji.” ³² Yaunchu Jesus ni jákatniurĩn enentáimtus “Wi awajnaitniuitjai” tímiayi. Niisha krúsnum awajnain asamtai apach máataijjai Nii timia nu uminkiamiayi.

³³ Piratusha atak jeá wayá Jesusan untsuk “¿Ámeka Israera Uunt Akupniurĩnkaitiam?” tímiayi.

³⁴ Jesussha tímiayi “¿Amekek nu inintram. Kame chí- kich túramainiatsuash?”

³⁵ Piratusha tímiayi “¿Wi Israer-shuarkaitiaj? Ameer shuarak Israer-patri uuntriijjai winin itiarmarai. ¿Warĩ tunáa túraitiam?”

³⁶ Nuiŋkia Jesus tímiayi “Wi jú nuŋkanam akupni- uchuitjai. Juyaitkiuĩŋkia Winia nemartuiniana nu máanaikiaraayi. Túrawarmatai Israer-shuarnum su- rutkachaarayi. Antsu juyun akupniuchuitjai.”

³⁷ Piratusha “¿Nuikia ame nekas uunt akupniukaiti- am?” tímiayi.

Jesussha tímiayi “Ee, ame támena nu nekasaiti. Jú nuŋkanam akiinian ashĩ shuuran nekas ana nuna ujak- tinian táwitjai. Ashĩ shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)

Piratusha nuna tij, atak Israer-shuarjai chichastajtsa jiinki tímiayi “Jú aishmanka tunaarĩn penké wáittsujai.

³⁹ Tura ashĩ uwitin paskua nampernum sepunmayá shuar ankant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurĩn ankant akupkattajak?” tímiayi.

⁴⁰ Nuiŋkia ashĩ kakantar untsumainiak “Jú akupkaip; antsu Parapás akupkatá” tiarmiayi. Nu Parapássha kásauyayi.

19 Nuyá Piratu suntaran akupkamiayi Jesusan asu- tiáwarat tusa. ² Suntarsha Jesusan wishikrar tawasap jaŋki najanamun etsenkrumtikiarmiayi. Ya- makai pushincha uunt akupniua áintsan áentsrarmi- ayi. ³ Nuyá “Israera Uuntria, kakaram ajasta” tiar yap- iniam awatiarmiayi. ⁴ Nuyá Piratu atak jiinki tímiayi “Átum wáinkiarum nekaatarum tusan Jesusan jĩktia- jai. Wikia tunaarĩnka penké wáittsujai.” ⁵ Tímiatai Je- sussha jaŋkin etsenkroku tura pushin yamakairman

entsaru j̄inkimiayi. Tura Piratu nūj káunkarun tiarmiayi “Pai jūiti, iistarum.”

⁶ Israer-patri uuntrīsha suntarsha Jesusan ísar ataksha ataksha kakantar unsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaar̄in penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchir̄in-tjai” takui jákatniuiti. Iiniu akupeamu aarma nūj núniskete” tiarmiayi. ⁸ Nuna antuk Piratusha nu naŋkaamas ashamakiamiyi. ⁹ Ataksha inít wayá Jesusan aniasmiaiyi “¿Tuyampaitiam?” Tura Jesussha penké ájkchamiayi. ¹⁰ Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura aŋkant akupkatniuncha jeajai.”

¹¹ Tutai Jesussha tímiayi “Yus nuna amaschaitkiuñkia penké tujinkiaintme. Nu asamtai amīin surutka nu ámin naŋkaamas tunaar̄inniuiti.”

¹² Piratusha nú chichamtaik Jesusan aŋkant akupkattsa wakerimiayi. Antsu Israer-shuar unsumainiak tiarmiayi “Jū aŋkant iníakmeke ame úunt akupniui amikr̄inchuitme. Jūka “úunt akupniuitjai” taku atumí uunt akupniur̄i nemasrinti” tu unsumkarmiayi.

¹³ Piratusha taman antuk akupin pujutainium pujus Jesusan unsumkarmiayi. Nūj kaya ukatkamu asamtai Israer-shuara chicham̄en Kapata anaikiarmiayi.

¹⁴ Paskua jisat jeats̄aj̄in nantu tutupin ajats̄aj̄in Piratu Israer-shuara tímiayi “Uunt akupniuram íistarum.”

¹⁵ Tura ashí “Jakati, jakati, krúsnum máatá” tu unsumkarmiayi.

Tura Piratu “¿Atumí uunt akupniur̄in krúsnum máat-tajak?” tímiayi.

Tura Israer-patri uuntrī tiarmiayi “Atumí uunt kapi-tiántrumek in akuptamji. Chíkichka atsawai.”

¹⁶ Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

Jesusa krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussha ni krus̄i yanaki Kúrkuta náinnium wémiayi. Kúrkuta naar̄isha Israer-shuara chicham̄en “muuka ukunch” tawai. ¹⁸ Nūj krúsnum ajintrur̄ar awajainiarmiayi. Tura mai pāe jimiará shuara chikichik chikichik awajainiarmiayi. Tura Jesus ajapén ámiayi.

¹⁹ Piratusha Jesusa krús̄r̄in uunt áarman anujkamiayi.

NASARETNUMIĀ JESUS, ISRAERA UUNT AKUPNIUR̄I
Tu áarmauyayi. ²⁰ Israer chicham̄j̄aisha Kriaku chicham̄j̄aisha Rúmanmaȳa chicham̄j̄aisha áarmauyayi. Menaintiu chicham̄num aarma asamtai tura Jesusar̄eñ pepru t̄ij̄iuch asamtai Israer-shuar ti untsur̄i áujiarmiayi. ²¹ Nu asamtai Israer-patri uuntrī Piratun jeariar “Israera Uunt Akupniur̄i” áaraip. Antsu “Israera Uunt Akupniur̄intjai tawai” tu aarta” tiarmiayi.

²² Tura Piratu nincha áikiar “Wi áaraj nuke átataui” tímiayi.

²³ Suntarsha Jesusan krúsnum awajainiar ni entsarmar̄in kuátru akankar aŋkant aŋkant júkiarmiayi. Tura ni pushir̄in apatsuk najanamu asamtai jáaktinian naki-

trarmiayi. Kame yakíya nuñkaanī apaiyiachma takamt-sukuyi. ²⁴ Tuma asamtai suntar tiarmiayi “Jūka jáakchatai. Antsu nakurakrin yának ati nu jukiti.” Nú-j̄āñkia yaunchu Yus-Chicham̄num aarma nu uminkiamiaiyi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

²⁵ Krúsnumsha Jesusa nukur̄isha Kriúpasa nuar̄i Marisha tura Máktaranmaȳa Marisha wajaarmiayi. ²⁶ Jesus ni nukur̄incha tura ni ti aneamu unuiniamur̄incha nūj wajan wániak ni nukur̄in tímiayi “Nukuru, jū ame uchirmea áintsan̄ atí.” ²⁷ Nuyá ni unuiniamur̄incha tímiayi “Jū ame nukua áintsan̄ atí.” Nu tsawantaik nu unuiniamur̄i ni j̄ēen jukí awayámiayi.

Jesusa jakamur̄i

(Mateu 27.45-56; Márkus 15.33-41; Rúkas 23.44-49)

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiaiti tusa “kitiamajai” tímiayi. ²⁹ Nūj̄isha piniñnum churuín ámiayi. Tura shuar nuna uruchj̄aj̄i ejampar sapapj̄aj̄i ijiu mukunaati tusa susamiayi. ³⁰ Jesussha churuínian najekaa “ashí túrunatniua nu mash uminkiai” tímiayi. Nuna tī muuken nená jakamiayi.

Suntar Jesusan paenam nan̄kij̄aj̄i ijiumiania nu

³¹ Nu tsawantai, kashinkia paskua námper uunt tsawantrī asamtai tura ayampratin tsawant aa asamtai, Israer-shuar jaka ayashí nūj paant āiñ tusa nakitrarmiayi. Nu asamtai Piratun seainiak “Krúsnum ajintrurma ainia nuna kaŋkajin suntar kupirkarti. Nuyá wari jákarmatai krúsnumīa júkiarti” tiarmiayi. ³² Nuyá suntarsha weriar emka krúsnum amia nuna kaŋkaj̄in kupirkarmiayi. Nuyá chikichnasha Jesusj̄aj̄i atsankiar ajintrurma nuna kaŋkaj̄incha kupirkarmiayi. ³³ Tura Jesusan weantuk yaunchu jákaiti tusa kaŋkaj̄in kupirtsuk

³⁴ suntar aya paenam ijiumiayi. Ijiumtaisha nu chichamtaik numpa yumij̄aj̄i puarmiayi. ³⁵ Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai. ³⁶ Yaunchu Yus-Chicham̄num aarma uminkiaiti tusa túrunaiti:

“Ni ukunch̄in kupirkachartatui” tu áarmaiti.

³⁷ Tura chikichcha:

“Ijiuarmiania nuna wáinkiertatui” tu áarmaiti.

Jesusa iwarsamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmaȳa Jusé Jesusa ayash̄in jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrīn ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayash̄in jukimiayi. ³⁹ Nikiutémusha Jesusj̄aj̄i chichastaj tusa kashi tarimia nu jimiará kuñkuin pachimpramun ti nukap sumak itiamiayi. Mira kuñkuinniasha aruí kuñkuinniasha sumakmiayi.

⁴⁰ Nuyá Jusé Nikiutémujaj Jesusa ayashín júkiar kunkuinian kuérar jaanch esarmajaj penuararmiayi. Israer-shuar tuke nunisar ikiúu ármiai. ⁴¹ Jesus krúsum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuí ikiuschamuyayi. ⁴² Nu waaasha tíjiuch asamtai tura Israer-shuara ayampratin tsawantrí jeatemamtai Jesusa ayashín nuí iwiarsarmiayi.

Jesus nantakmiania nu
(Mateu 28.1-10; Márkus 16.1-8; Rúkas 24.1-12)

20 Tumintincha káshik kirit ajn Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjaj waa atutkarmiayi. Tura Marí nuí jeá nu kaya uraimiun wáinkiamiayi. ² Nuna wáiniak Semuñ Pítiur pujamunam tsékenki wémiayi. Chíkich unuiniamurí Jesus ti anemia nusha nuísha pujumiayi. Tura Marí tímiayi “Iwiarsamunmaya ii Úuntrín júkiarai. Tura ¿tuínsuk ikiusara?” ³ Pítrusha chíkich unuiniamuríjjaj jíinkiar iwiarsamunam iyuwarmiayi. ⁴ Mai métek tsékenkiar Pítiur jeatsaj chíkich unuiniamurí iwiarsamunam emka jeamiayi. ⁵ Niisha wayatsuk tsuntsumá iis penuarmarínkia nuí tepan wáinkiamiayi. ⁶ Nuyá Semuñ Pítiur ukunam jeá iwiarsamunam wayá penuarmarí nuí tepan wáinkiamiayi. ⁷ Chíkich jaanchcha Jesusa muukén penuarma nusha nanerma niisháa tepan wáinkiamiayi. ⁸ Nuyá chíkich unuiniamurí emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi. ⁹ Nuna wáintsuk Yus-Chichamnum “Jesus jakamunmaya nantaktiniaiti” áarman áujsariat nekaacharmiayi. ¹⁰ Nuyá mai ni jeen wakеткиarmiayi.

Máktaranmaya Marincha Jesus wantintiukmiania nu
(Márkus 16.9-11)

¹¹ Tura Marikia iwiarsamunam juak úutu pujumiayi. Niisha úutiatañ tsuntsumá iwiarsamunam ímsamiayi. ¹² Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chíkichik múuknumaaní tura chíkichka nawenmaaní pujumiayi. ¹³ Nayaimpinmaya suntarsha “¿Urukamtai úutam?” tiarmiayi. Marísha tímiayi “Winia Úuntrun jurutkiarai tura ¿tuínsuk ikiusara?” ¹⁴ Nuna tí ayanmar Jesusan wáiniak Nin nekaachmiayi.

¹⁵ Jesus aniak “¿Urukamtai úutam. Ya eaañ?” tímiayi. Marísha ajan wáinnua nuiti tusa tímiayi “Uunta, ame ni ayashí jukimkia, tui ikiusmam ujatkata wi jurumkiti-aj” tímiayi.

¹⁶ Nuyá Jesus “Mariya” tímiayi. Tutai niisha ayanmar “Rapuni” tímiayi. Nusha Israerchichamnum “Uuntá” tawai.

¹⁷ Jesussha tímiayi “Emetruawaip. Winia Aparuñ wáatsaj. Antsu weme Wíi shuar titiá “Winia Aparuñ nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

¹⁸ Nuyá Máktaranmaya Marísha Jesusa unuiniamurín wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

Jesus ni unuiniamurín wantintiukmiania nu
(Mateu 28.16-20; Márkus 16.14-18; Rúkas 24.36-49)

¹⁹ Nu tsawantaj, tumintin, ni unuiniamurí Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiir pujustarum” tímiayi. ²⁰ Nuna tí, nuyá ni uwejen ajintruamuncha ni paen ijiumuncha iniakmasmiayi. Ni unuiniamurísha Úuntrín wáinkiar shiir warasarmiayi. ²¹ Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. ²² Nuyá ni matsatmanumaaní umpuú tímiayi “Yusa Shiir Wakaní atumí enentáin wayati. ²³ Shuara tunaarínkia átum “asakárti” tákurminkia tsankurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampramu Tumas, Jesus tamia nuí pujuchmiayi. ²⁵ Tura ukunam chikich unuiniamurí ujainiak “Ti Untrí wáinkiaji” tiarmiayi.

Tura Tumas tímiayi “Ajintruamurí wáinkian uwejrún awaintiuanitjai. Tura paenumsha awaintiuanitjai. Penké jaka asamtai aya nujaj iniantkimiun enentáim-
tustatjai” tímiayi.

²⁶ Chíkich tumintin ataksha Jesusa unuiniamurí iruntrarmiayi. Nuínkia Tumassha níjjaj pujuarmiayi. Tura waiti epenmianuman Jesus wayá ajapén wajas “Shiir pujustarum” tímiayi. ²⁷ Nuyá Tumasán tímiayi “Winia uwejur ísam ame uwejem awaintiua. Núnismek winia paeruj uwejem awaintiua ístá. Tura arantutsuk nekas enentáimtursata.”

²⁸ Nuyá Tumas “Winia Úuntrua, nekas winia Yúsruitme” tímiayi.

²⁹ Jesussha tímiayi “Winia wáitkiam nuín enentáim-
tursame. Antsu Winia wáittsuk enentáimturaru nekas shiir ániawai” tímiayi.

**Shuar Yusa Uchirín enentáimtusarti tusa ju papí áar-
maiti**

³⁰ Aentsti tujintiamuncha Jesus túramu ti untsurí ju papinium áarchamu ániawai. Tura ni unuiniamurí mash wáinkiarmai. ³¹ Antsu Jesuska Kristu asa Yusa Uchirínti tu enentáimtustarum tusan júnaka áarmajai. Tura enentáimtakmin Jesus ni iwiakmarín yamarma nuna amastatui.

**Entsá yantamnum Jesus siati (7) unuiniamurín wanti-
ntiukmiania nu**

21 Tipirias antumiañka káanmatkariín Jesus ni unuiniamurín wantintiukmiayi. Júnisañ ámiayi. ² Semuñ Pítrusha Jímiampramu Tumassha Kananmaya Natanaérsha Sepetéu uchirísha tura chíkich jímiar unuiniamurísha métek iruntrar pujuarmiayi. ³ Semuñ

Pítrusha “Namakan nekajaj naŋkiattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam eŋkemprar nu kashi achitsuk tsawararmiayi. ⁴ Káshik aŋ Jesús entsá káanmatkaríŋ wantinkiamiayi tura ni unuiniamurísha Jesusan nekaacharmiayi. ⁵ Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

⁶ Tutaí Jesús tímiayi “Neka untsuurnumaanĭ ajunkatarum. Nuĭ achiktatume.”

Nii timia núnisaŋ túrawar namakan ti achikiar nekan júsatniun tujinkiararmiayi. ⁷ Nújajĭŋkia Jesusa unuiniamurĭ Jesús ti aneemia nu Pítrun tímiayi “Ti Úuntrĭnti.” Takui Pítrusha áimiaku asa ni pushirĭŋ entsar entsá ini-aŋmiayi yukuak jeataj tusa. ⁸ Chíkich unuiniamurísha jeachat pujuiniachuk nekan japiki kanujaj káanmatkanam jeawarmiayi. ⁹ Káanmatkanam jeawar ji kajir ámanum namakan jámun wáinkiararmiayi. Tantan-cha wáinkiararmiayi. ¹⁰ Jesussha “Átum achikiurmena nuyá jíatin itiatarum” tímiayi. ¹¹ Tutaí Semuŋ Pítiur kanunam we nekan nekartiuk káanmatak japiki itiamiayi. Itiar namaknasha siaŋtu seŋkuenta nuyá tres (153) nekapmararmiayi. Ti untsurĭ áyat nekasha jáankachmiayi. ¹² Nuyá Jesussha “Yurumáitiarum” tímiayi. Ni unuiniamurísha “aya ii Uuntri áminiaiti” tusar inintrustin-ian natsantiarmiayi. ¹³ Nuyá Jesús wajakí tantan jukí súsararmiayi. Núnisaŋ namaknasha súsararmiayi.

¹⁴ Jesús jakamunmayá nantaki jujaj menaintiu ni unuiniamurĭŋ wantintiukarmiayi.

Jesus Semuŋ Pítrujaj chichasmiania nu

¹⁵ Nuyá yurumáwar Jesús Semuŋ Pítrun aniasmiayi “Junasa uchirĭ Semuŋka, ¿ju shuar naŋkaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiŋkia winia murikiur ayuratniua áintsam Winia enentáimturainia nu yaŋtá” tímiayi. ¹⁶ Ataksha aniasmiayi “Junasa uchirĭ Semuŋka, ¿Winia anentmek?” Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. ¹⁷ Nú ataksha aniasmiayi “Junasa uchirĭ Semuŋka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. ¹⁸ Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakmin chíkich aentstamp Prattawai tura ame wétin nakitiam nuĭ juramkiartatui.” ¹⁹ Jesús nújajĭŋkia Pítiur máatniun ujakmiayi. Tura núnisaŋ jakam-tai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pitiur Jesusan aniasmiania nu

²⁰ Pítrusha ayanmar chíkich unuiniamurĭŋ Jesús ti anea nuna némarun wáinkiamiayi. Kame nu unuiniamuka nuik Jesús jáatsajĭŋ yurumáiniakui “Uunta, ¿ya surutmaktata?” timia núiti. ²¹ Nincha Pítiur wáiniak Jesusan aniasmiayi “Uunta, ¿yusha warí urukatniuit?”

²² Jesussha ayak “Wi wakeraknaka iwiaaku pujajĭŋ tá-tatjai tíminiaitjai. Nuna tákuisha ¿warí itiuertama? Áme-ka nemartusta” tímiayi. ²³ Nújajĭŋkia “Nu unuiniamurĭ jákashtatui’ tusa Yus-shuarnum áujmatiararmiayi. Túrasha Jesús “jákashtatui’ tíchamiayi antsu áyatik “Wi wakeraknaka iwiaaku pujajĭŋ tá-tatjai takuisha ¿warí itiuertama?” tímiayi. ²⁴ Wikia nú unuiniamurĭntjai. Ju papincha aaru asan “mash nekasaiti’ tajai. Ashí shuarsha núnisaraŋ tuíniawai.

²⁵ Nu arantcha juĭ áarchamusha ti awai. Kame ashí áamka ti untsurĭ papí asa ashí nuŋkanam ikiuschamnia ainti. Nuke atí.

TÚRAMU

Yusa Wakanín nákasarmiania nu

1 Amikiur Tiúpiru:
 Nuik akupkamaiaj nú papinium ashí Jesus túramia nuna áatramiajme. Tura unuitiampramiaj nunasha áatramiajme. Yámankamtaiknumia,
 2 nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakaní kakarmarijiaj túratniua nuna ni akatramurín jintintiaawarmiaiyi. 3 Tura jaka nantaki, Jesus tímiajajik wantintiukmiyai ni akatramurín. Tura kuarenta (40) tsawant nin wantintiukarmiaiyi. Nuna tura nekas iwiakjai tusa iniakmasmiyai, nekaawarat tusa. Tura Yusa akupeamurí urukukit nuna mash ujakmiyai.
 4 Jesuska ni akatramurijiaj tuke pujus, nin chicharuk “Jerusarénumia wéerap, tímiaiyi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiaiyi. 5 Tuke enentáimsatarum. Juan entsajaj atumí ayashin imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentáimiantin áintsangete” tímiaiyi.

Jesus nayaimpiniam wakamiania nu

6 Tura Jesusjaj irunar matsamas anintriarmiaiyi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiaiyi. 7 Jesus ámiuk tímiaiyi “Winia Apar túrattana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmarijiaj túrattawai. 8 Tura atumsha Yusa Wakaní kakarmarín sunastatrume. Nii taa enkemprutmamtaí kakaram ajasrum, Wíi túramu etserkattarme. Emka juj Jerusaréñ péprunam etserkattarme. Nuyá ashí Jutía núñkanam, tura arant Samaria nuñkanmasha, tura nú arant ashí núñkanam werum, Wíi túramu etserkattarme” tímiaiyi Jesus.

9 Nuyá chichas amir, ashí ni akatramurí ii wajainiaj, Jesus nayaimpinmaanj junakmiyai. Wéa-wéakui yurankim mash Nin amuámiyai. Tuma asamtai ni akatramurí Nin wáinkiacharmiaiyi. 10 Tura Jesus waakkui ni akatramurísha yakí ii wajainiaj, jimiara áishman puju entsaru nuj wantintiukarmiaiyi. Tura ayamach wajattsarmiaiyi. 11 Nu áishmansha Jesusa akatramurín tiarmiaiyi “Kariréanmayá áishmanka, zurukamtaí nayaimpinmaanj imiá íimprum? Ju Jesusak atumíyá nayaimpiniam wea wáinkiarumna núnisan ataksha winittiawai” tiarmiaiyi.

Matíasan anaikiarmiania nu

12 Tuasua amikmatai Jesusa akatramurí Uriwiu náinnumia akaikiar Jerusarénum wakettiarmiaiyi. Uriwiu naincha Jerusarénumsha tíjiuchiiti, chikichík kirumitrua núnisan. 13 Tura Jerusarénum jeawarmiaiyi. Nu j jeawar, jeá wayawar yakí wákararmiaiyi. Nu Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachí Jútassha, tímian wayawarmiaiyi. 14 Jusha mash tuke iruniarmiaiyi Jesusa yachijiaj. Tura Jesusa nukurí Marijiaj, nuyá chikich nuwajajisha tuke iruniarmiaiyi, Yus áujstai tusar. 15 Nu siántu painti (120) aents iruntrarmia nu Pítiur chichastaj tusa wajakmiyai.

16 Pítiur juna tímiaiyi “Yatsurtírmesha, umarutírmesha antuktarum. Yuska yaunchu ni Papirijn Jutasnan áamtikramiaiyi. Jútas akiintsajin Tawitkia, Yusa Wakaní jintintiam Jutasnan áarmiaiyi. Jesusan achik surukarmia nú shuaran nekapruamia núiti. Kame Tawitia áarmarí Yus-Chicham asa tímianak uminkiatniuyi. 17 Nú Jutaska ii íruramuitiat, ii takaamurín páchitkiaiat, 18 tunáa tura nujaj kuítian achik nuñkan sumakmiyai. Tura piniakum iniañ tantané páttimiyai. 19 Tuma asamtai ashí Jerusarénum pujuarmia nu, nuna nekaawar nú nuñkan “Numpa Nuñka” anaikiarmiaiyi. 20 Kame Sarmu papinium Tawitkia juna áarchamkia:

“Ni jješha itiarak atí.

Nu jjanmanka penké pujuschartí.” Tura “Ni takatrí chikich atankiti.”

Tu aarmaití” tímiaiyi.

21 Tuma asamtai yamaikia chikich anaikiatniuitji. Tura náñkamas achikchatniuitji. Antsu ii nemartamkau atí. Uunt Jesus iijaj pujumia nuj tuke Nin nemarsamia nu atí. 22 Juan Jesusan imiaimiania nú tsawantnumiajukí, Jesus nayaimpiniam wémiania nú tsawantan tímianu ejé tuke Niiijaj wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmiarij etserkamí tusar túramí” tímiaiyi Pítiur.

23 Tura nuyá jimiara shuaran anaikiarmiaiyi. Matíasan anaikiarmiaiyi. Tura chikichnasha Jusén, ni chikich naarí Parsapas, tura apach náarinkia Justu, nunasha anaikiarmiaiyi.

24 Tura nuyá Yus-shuar Yúsan áujainiak juna tiarmiaiyi “Tí Uuntrí, Amesha ashí shuara enentáí nékame. Ju awai jimiara áishman. Jútas tunáa túrak jákatniunam wéak akatramu takatan ikiukmiyai. Yamaikia Jútas

takatrí achikiat tusam, ¿tuá achikium, Uunta? Paant iniakmasta." Tu aujsarmiayi.

²⁶ Tura Israer-shuara túrutairí núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtaí Matíasnak pachikiarmiayi.

Yusa Wakaní taramiania nu

2 Pintikiustís náartin jísat jeamtaí, chikichík jeanman nuiñ Yus-shuar tuakarmiayi. ² Tumaj aya aneachma nayaimpinmayá nasea áintsan téter ajaki winian antukarmiayi. Ashí mash jeá pujuarmia nuka antukarmiayi. ³ Tura nuí pujuiniájí jí wajaí kea áaniun wáinkarmiayi. Túruna ankant ankant puunak tarurarmiayi. ⁴ Tuma asamtaí Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairí súsarmiayi. Tuma asamtaí nujaí niisha chíchichichichaman chichasarmiayi.

⁵ Nuí Jerusaréñnum Yus táman umirin Israer-aents ármiai. Ashí nunkanmayá Jerusaréñnum taar matsamarmiayi. ⁶ Tura túrunamia nuna antukar káunkarmiayi. Tura ashí shuar ni chichamejajín chichaamun antukarmiayi. Tuma ásar, warinkit, tu enentáimsarmiayi. ⁷ Nekaachar ashamkarmiayi. "Warinkit, tunaim ajararmiayi. Ju aents chíchich chíchichichichaman chichainia nu, ashí Kariréanmayanchukait, tiarmiayi. ⁸ Tura iisha ankant ankant ii chichameñka ántatsjik. Ausha urukainiakua, nunak chichainiawa, tiarmiayi. ⁹ Juí ashí nunkanmayá aents pujuiniatsjik. Partianmayá, Eramnumiásha, Misiuputámianmayásha, Puntanmayásha, tura Asia nunkanmayásha, ¹⁰ Príjianmayásha, Pampirianmayásha, Ejiptunmayá tura Áprikanmayá Serinia nú nankaamasnumiásha pujuiniatsjik, tiarmiayi. Nuyásha ii shuarsha Ruma péprunmayá yaunchu taar juí matsatainiawai. Chikichcha tuke Israer-shuar ániawai. Tura chikichcha Israer-shuar ajastaj tusa Israer túrutairín mash túruiniawai. ¹¹ Kritianmayásha Arapianmayá pujuiniáji. Tura ashí mash ii chichamejajísha Yusa péñker túramurí ántají" tiarmiayi.

¹² Ashí aents nuna nékachu ásar ashamkarmiayi. Tura nuámtak aniniaisarmiayi "¿Warinminiait ju?" ¹³ Tura chikichcha wishikiarmiayi. "Nampeku ániatsuash" tiarmiayi.

Pítiur ujakmia nu

¹⁴ Nuñkia Pítiur, chíchich áuntse Jesusa akatramuríjjí wajaki, kakantar chichasmiayi. Chichaak tímiayi "Jutianmayá shuartiram, Jerusaréñnumiáqirmesha antuktarum. Wi títiatjana nu antukrum péñker enentáimpratarum. ¹⁵ Ju áishman, nampekarai, tárugna nu, nampekcharai. Warí, nantu imiá ishichik takuni. ¿Áisha iturak? ¹⁶ Antsu Yúsnan etserin, ni naari Juér, yaunchu áarmia nu, yamáí túrunayi, tímiayi.

¹⁷ Juna áarmiai: "Yus tawai "Jú nunka amuukatin jeatemamtaí, winia Wakantrun ashí áentsnum akupkattajai, yumi yaraanua áintsan. Atumí uchirí, atumí nawantrísha Yusa chichamen áujmatíartatui. Tura nát-

saka íimiarartatui. Tura uuntka mesekramíartatui.

¹⁸ Tura áishmansha nuwasha winia takartin ainia nuna-ka winia Wakantrun akuptukartatjai. Túram niisha Wíi túramun áujmatíartatui. ¹⁹ Yaki nayaimpiniam, aents túrachminian iniakmastaj tusan numpancha, jiniasha, mukuintiuncha yuranmia áintsan akupkattajai. ²⁰ Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmi-ajna nu jeatsajín, túrunattawai. Nú tsawantcha imiá nekas uunt átatui. ²¹ Nuñkia ashí shuar nekas winia kakarmarun seana nuka uwemprartatui" tímiayi Yus." Núnis Juér áarmiai' tímiayi Pítiur.

²² Tuke chichaak: 'Israernumiá shuartiram, wi títiatjana nu antuktarum. Nasaréñnumiá Jesusnan tajai. Nú Jesusan Yus shiir enentáimtaí. Yuska, átum ti enentáimprarun ni kakarmarín paant nekaatarum tusa, nú Jesusan ti ikiakármiayi. Tura Jesusají aentsti túrachminian Yuska túramiai, átum íimian. Nuka ti paant nékarme, tímiayi. ²³ Tura Jesus surunkamia nuna Yuska yaunchu, túruntsajín, paant nekaamiayi. Túrasa Yus enentáimtia nujaí métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. ²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtaí. ²⁵ Iimiata, ii uuntri Tawit Jesusnan kantamprua juna áarmiai:

Úntan tuke pujurtan wáinmiajai. Winia pujurtakui awajkamu áchattajai.

²⁶ Tuma asamtaí winia enentáirjajísha Nin shiir enentáimtusmiajai. Tura wenurjajísha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschatame. Wi ame Uchirmetjai, Tunaaríncha. Túmaitkui anentu asam ayashur káurtin tsankatrukchattame.

²⁸ Tura iwiaaku átin jintia jintinrutamame. Tura tuke pujurtakum waramtikrustatme. Tu áarmiai Tawit' tímiayi.

²⁹ Pítiur tuke chichaak: 'Páantchakait. Ii uuntri Tawit yaunchu jákai. Tura iwíarsamuiti. Ni iwíarsamurí iini pujatsuk. ³⁰ Túrasa Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniañnamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi. ³¹ Neka asa, túruntsajín Tawit, wainkia nútiksan, Kristu nantaktintriñ áarmiai. Kristu túrunatniurín chicharuk tímiayi "ni wakaníncha jákatniunam ikiukchatniuyi. Ayashíncha káurtinian tsankatkashtiniuyi." ³² Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar ét-sereaji. ³³ Yuska, Jesus nankaamantuiti tusa ni untsurínj apujsaiti. Tura ni Wakanín Jesusan súsaiti, Nii yaunchu tímia nútiksan. Tuma asamtaí jusha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wákachmiayi. Tura nú Tawitiak juna áarmiai:

“Uunt Yus winia Úuntrun tímiayi “akupin pujutainium, winia untsuuruñin pujustá.

³⁵ Ame nemasrumin nupetkattajai. Nu túruntsaïn jui pujustá tímiayi.”

Nuní áarmaiti Jesusnan, tímiayi. ³⁶ Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jessusha in uwemtikkiartin Krístuiti. Ashí áentstíram nu péñker nekaatarum” tímiayi Pítiur.

³⁷ Nuna antukar wake mesekarmiayi. Tura Pitruncha chíkich akatramuncha aniasarmiayi “Yatsuru, ¿nuñkia itiurkatjik?” tiarmiayi. ³⁸ Tutai Pítrusha chichaak “Atumí tunaari ikiuktiaj tusarum Yus nekas enentáimtus-tarum. Tura ashí shuartiram Jesukrístu naari pachis-rum imiantiarum. Nuñkia atumí tunaarin Yus tsañkur-tamprattarme. Túrunawakrumin Yuska ni Wakanin suramsattarme, tímiayi. ³⁹ Yus tímia nuka atumin túramprume. Atumí uchiríncha tura ashí arant matsa-tainia nunasha tawai. Kame ii Yusrí áentsun untsuktaj tusa wakerana nuna tawai” tímiayi.

⁴⁰ Nú chichamjaj tura nuyasha Pítiur tuke jintintiuik tímiayi “Yajauch shuara asutiátniurí átatna nuyá uwempratarum” tímiayi. ⁴¹ Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi. ⁴² Ashí nu shuar Jesusa akatramurí jintintiarum nuna tímiatru-sañ antukarmiayi. Tura irunar shiir enentáimtunaisar yurumin ármiai. Túrawar, Kristu enentáimtustin nam-perin najanin ármiai. Túrawar Yúsan áujiarmiayi.

Yus-shuar pampararmiania nu

⁴³ Tura Yuska aentsti túrachminian Jesusa akatramurijaj túramiayi ni kakarmarin iniakmastaj tusa. Tuma asamtai ashí aents nuna wáinkiar ashamkarmiayi. ⁴⁴ Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nuñken surukar, ni takakmaríncha surukar, atsumainia nuna súarmiayi. ⁴⁶ Tuke tsawantak Yusa Uunt Jeen káuniararmiayi. Tura ni jeencha iruntrar warainiak Kristu enentáimtustin námper najanin ármiai. Tura nañkaamantu enentáimtumatsuk, yurumkan ajamnainiarmiayi. ⁴⁷ Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuara uwemtikiar Yus-shuar írun-manum íkiaunñki wémiayi.

Wekaicha wekasamiania nu

3 Chíkich tsawantaj, nantu nuñkaach ajasmatai, Pítiur Juanjaj, Yusa Uunt Jeen Yus áusatai tusar wearmiayi, Israer-shuar tuke turin armia nútiksaran. ² Tura áishman, ni akiiniamuríniya wekaicha amia nu, nuñ áá wáitiniam tuke tsawant pujumiayi. Nu áishman-nasha ni shuarí entsakí júkiar nú wáitiniam apujin ármiai, nuñ shuar wayan kuítian seat tusar. Nú wáitisha, Shiir Waiti, tutajyayi. ³ Tura nú shutuapsha Pitrun Juanjaj wayan wáinkiamiayi. Wáiniak kuítian seamiai. ⁴ Tura Pítiur Juanjaj apajas ísarmiayi. Tura nú áishman-

nasha chicharuk “Íirsata” tímiayi. ⁵ Aishmansha, surus-tatuapi, tu enentáimias, ímsamiayi. ⁶ Nuyá Pítiur chichaak “Kuíttrusha atsawai, tímiayi. Kurisha atsawai. Antsu kuítjaj nañkaamas takakjana nuna amastajai. Wats, Nasarénumia Jesukrístu kakarmaríjjaj wajakim wekasata” tímiayi.

⁷ Tinia iniais, Pítiur ni untsuuruñin achik awajkimiai. Túram ni nawesha, wanusesha kakaram ajasmiai.

⁸ Tura niisha wajaki nantent ajakmiayi. Nuyasha wekasamiayi. Tura Pítrujajsha Juánjajsha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi. ⁹ Ashí aents pujuarmia nu, nin wekaan wáinkiararmiayi. Tura ni chichamen anturkarmiayi. ¹⁰ Tura chichainiak “Nuik Yusa Uunt Jeen wáitirín, Shiir Waiti tutainium, nu áishman tuke pujuuya núchakait” tiarmiayi. Tura ni túrunamurín nekaawar, ti ashamkar nusháa enentáimsarmi-ayi.

Pítiur ujakmiania nu

¹¹ Shutuapka péñker ajasu asa Pítrujaj Juánjajsha penké tsurachmiayi. Tura aents nuñ pujuarmia nu, warinkit tusar, jeáshkirí tsékeñki wearmiayi. Nuka Sarumúñna tiniu ármiai. ¹² Aents káunkarun Pítiur wáiniak, chicharuk “Israer-shuartiram, ¿urukamta winiasha imiá írum? tiarmiayi. ¿Íisha péñker asarikí tsuarmaj? ¿Íi kakarmaríjjajnikí ewekamsamaj? ¹³ Atsá. Antsu Yuska ni Uchirín Jesusan ashí nañkaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus naki-trarum kapitán Piratúí surukmarme. Tura Piratu akup-kataj tau atumsha suritkiamarme. ¹⁴ Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimi-arme. ¹⁵ Túrarum iwiaaku átinian Amaana nu maa-marme. Tuma añ Yuska Nin jakamunmayá iniantkimi-ayi. Nuka iisha neka asar étsereaji. ¹⁶ Tura ju aishman jui wajaana ju tura nékarmena ju, Yusa Uchirí naari enentáimta asa kakaram ajasuiti. Jesus enentáimtusu asa nekas péñker ajasuiti. Nusha wáinni asarum nékarme’ tímiayi.

¹⁷ Wats, yatsurtiram, wi nékajai. Atumsha atumí ún-tríjjaj Jesusan túramarmena nu nékatsuk túramarme.

¹⁸ Tura nu túramurmíjjaj Yus yaunchu tímia nu tími-anak umikiurme. Ni Krísturí wáitsatniuya nuna Yuska ashí ni etserniurín áamtikramiai. ¹⁹ Wats, yamaikia tunaaruminiya kanaktiarum. Túrarum Yúsnumaaní ayan-tártarum, tunaarun asakárat tusarum.

Túrunawakrumniñkia, atumin uwemtikramprarat tusa Yus yaunchu anaikiamia nuna akupturmaktatrum. Nusha Jesukristuiti. Tura Niíjjaj enentáimin ayampratin átatui. ²¹ Tura yamaikia Jesukrístu nayaimpiniam pujus-tiniati, ashí iwiarnatsaïn. Yuska ukunam ataksha nuñkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiai.

²² Tuma asa Muisais ii aparín tímiayi:

“Atumi Uunt Yusrí ukunam etserniun akupturmaktatrum, winia akuptukmia núnisañ. Nuámtaktiriniya

achik akupturmaktatrum. Tura nii títiatna nu umirkatarum" tímiayi. ²³ Nánkamas aents nu etserniun chichamen umíachkuṅka emesnartatui. Tura Israer-shuarnum páchitkia áchattawai.

Núnisan áarmiayi Muisaissha' tímiayi.

²⁴ Pítiur tuke chichaak 'Íimiata, Yúsnan etserin Samuer ju tsawantin túratniurj etserkamiayi. Nuyá ashí Yúsnan etserniusha tuke nuna etseriarmiayi. ²⁵ Etseriarmia nuka atumin túramprume. Tuma asa átum péṅker pujustinian Yuska ii uuntri Apráaman ju chichaman susamiayi. "Nekas tájame, ame shuarum akiiniattana nujaj ashí áentsnasha shiir awajsattajai' tímiayi. Tura ii uuntrin tímia núnaka incha túramji, tímiayi. ²⁶ Iimiata, Yus ni Uchirín iniantkimia nu, atumin emka akupturmakmiarme. Atumsha, atumí tu-naariya kanaktiarum tusa, tura atumin shiir awajtam-satniun wakerak túramiayi." Nunak tímiayi Pítiur.

Pitruncha Juánnasha kajerkarmiania nu

4 Pítrusha Juanjaj Yusa chichamen áentsun jintintianiak pujuarmiayi. Jesus nantakin asamtai aencha nantaktin ániawai, tiarmiayi. Tura chichaak pujuiniaj Israer-patri táarmiayi. Tura Yusa Uunt Jeen wainniu uuntrijsa Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiari chichaman jintintinia asamtai. ³ Yamaikia kíawai, kashin iismí tusar achik sepunam enkea iniais-armiayi. ⁴ Tura Pitrun nuik anturkarmia nú aents untsurj Yus-shuar ajasarmiayi. Nuik Yus-shuaraim tura yamaiyaim iruram ti untsurj ajasarmiayi. Aya áishmaṅkak, seṅku mir (5000) aents áarmiayi.

⁵ Kashin tsawarmatai Israer-shuara akupniurj, ni uuntrijsa, tura ni jintinniurjsa Jerusarénum irun-trarmiayi. ⁶ Nujsha Anassha, Israer-patri uuntri anaiki-amu amia nu, tura Kaipiassha, Juansha, Arejantrusha, tura Israer-patri kapitíantri shuarjsa tímian irun-trarmiayi. ⁷ Iruntrar Pitruncha Juánnasha utitiarum tusar akupkarmiayi. Tura itiarmatai, ajapén awajsarmi-ayi. Tura aniasarmiayi "Kame zyana kakarmarijjaj, yana chichamejaj túrarum?" tiarmiayi. ⁸ Tutai nuyá Pítiur, ni enentáin Yusa Wakanj pimiutkamu asa tímiayi "Akupniutiram, tura úuntirmesha antuktarum. ⁹ Ju áishmaṅ nuik shutuap amia nu péṅker ajasmarj anintrarme. Kame itiurak péṅker ajasuit tátsurmek. ¹⁰ Urukamtia úuktataj. Anintrakrumin iisha paant títiatji, Israernumi-á shuar ashí nekaawarat tusar. Ju áishmaṅ Jesukrístu kakarmarijjaj péṅker ajasuiti. Nasarénumiá Jesukrís-tun, átum máamurmena nuna, tura Yus jakamunmaya iniantkimiania nuna tajai, tímiayi. ¹¹ Nú Jesuska kayaa áintsangete. Atumsha jeamniutiram, nú kaya yajauchi-iti, tímiarme Jesusna. Túrasa túramaitiataṅ Niisha jea-nam emka apujsamua núnisan ajasuiti, tímiayi. ¹² Tura chíkichjaj uwempratin penké atsawai. Ju nunkanam ii chikicha naari pachisar uwempratin atsaji. Jesuskete ii uwemtikrampratniun Yus suramsamiaj nu" tímiayi Pítiur.

¹³ Pítrusha Juansha nánkamas shuara áintsan ármia-ayi. Núkap unuimiarcharu ármiaayi. Tura unuimiar-

chaitiat, arantutsuk etseriarmiayi. Aentsu uuntri núna-ka nekaawar "Nékachuitiat, itiura sapijmiatskesha chichainia" tiarmiayi. Tura, jusha Jesusa nemarkin ármia núiti tiar nekaawarmiayi. ¹⁴ Nuyasha áishmaṅ péṅker ajasmia nu nijjaj nuj wajamiayi. Tuma asamtai, niisha ajaj wajakui, Israer-shuara uuntriṅkia, péṅker ajaschaiti títiat tukamá tujinkiarmiayi. ¹⁵ Tuma ásar, iik nuamtak áujmatsatai tusar, Pítrusha Juansha shutuapsha áá awemartai, tiarmiayi. ¹⁶ Tura áujmataniak tiarmiayi "Ju Pítrusha ju Juansha itiurkatjik. Ju uunt túrunamun Jerusarénum matsatania nu ashí nékainiatsuk. Wáiti-aiti titin tujintiaji, tiarmiayi. ¹⁷ Tura, ashí aents nekaawarajin tusar yamaik jiajta. "Ju Jesusa naari pachisrum penké jintintiarairap," titiat" tiarmiayi.

¹⁸ Tura árusaṅ Pitruncha Juánnasha shutuapnasha ataksha untsukarmiayi. Tura chicharkarmiayi. "Jesusa naari penké áujmatsairap. Tura Jesusa túramurj penké jintintiarairap" tiarmiayi. ¹⁹ Tutai Pítiur Juanjaj áimkiarmi-ayi "Enentáimpratarum. ¿Yus warinia wakera? ¿Iikia Yus umirtsuk atumí chichameṅ umirkatniukaitiaj? tiarmiayi. ²⁰ Nekaatarum. Iisha íisjinia nu, tura antukjinia nusha ii etsertsuk pujustin tujintiaji." Tu áimkiarmiayi.

²¹ Shutuap péṅker ajasmia nu kuarenta (40) uwí naṅkaamas takakuyayi. Ni péṅker ajasmarin aents nekaawar, "juka aentsti túrachminiaitji" tusar Yusa naarin uunt awajsarmiayi. Tuma asamtai aentsu uuntri Pitruncha, Juánnasha asutiáta tukamá aentsun ashamainiak áyatik chicharkar iniaisarmiayi.

Yus-shuar Yusa kakarmarj seawarmiania nu

²³ Pítiur Juanjaj ankant ajarar ni írutramurjin wakеткиarmiayi. Tura jeawar Israer-patri uuntri tura aentsu uuntrijsa nin tiarmia nuna mash etserkarmi-ayi. ²⁴ Nu ujakam antukar métekrak Yusan áujuk tiarmiayi "Winia Uunt Yusru, Amesha nayaimpisha nunka najanaitme. Nayaantsasha tura juj írunna nusha najanamiam, tiarmiayi. ²⁵ Tura Tawit ámin umirtamin amia nu ju áamtikramiam:

"¿Urukamtai ashí nunkanmaya aents charaatum ajainia? ¿Tura Israer-shuarsha urukamtai ántar chichaman enentáimiania?"

²⁶ Uunt kapitíán ármia nuka chichaman jurusarmiayi Uunt Yusan.

Tura pepu uuntrijsa iruntrar Uunt Yusan kajerkarmi-ayi. Ni anaikiamurjín Krístun nútiksāṅ kajerkarmiayi."

²⁷ Tu áarmaiti, Uunta, tura nekasaiti. Erutis apachi kapi-tíantri Punsu Piratujaj jú péprunam iruntrarmiayi. Ni-isha yajaya shuarjaj tura Israernumiá shuaraim nuim iruntrarmiayi. Ame Uchirmin Jesusan tunaarinchan ka-jerkarmiayi. Jesuska Ame anaikiamiam, winia taka-trun túrat tusam. ²⁸ Tura ame enentáimjaj iwiamam-na nu uminkiatniuiti. Tura apachcha Jesusan kajerainia ásar, Ame iwiamamna tímianak umikiarmiayi.

²⁹ Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichameṅ ii ashamsuk etserkatin ame kakarmaram amasta. ³⁰ Tu-ra ame kakarmarmijjaj jaasha tsuártin amasta. Ame

Uchiram Jesus tunaarincha nujaj̄ ii aentsti túrachmin túratniusha amasta. Aents Yusa kakarmar̄in nekaawarat tusam túrata" tiarmiayi.

³¹ Tura Yúsan tú áujas umikmatai nuiñ irunar pujuini-aiñ úyrkamiayi. Túrunamtai ashí shuara enentáin Yusa Wakaní pimiutkarmiayi. Túmaitkiui ashamtsuk Yusa chichamen etserkarmiayi.

Wíniakete, tícharmiania nu

³² Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, jusha ashí iiniu ainiawai, tiarmiayi.

³³ Tura Jesusa akatramur̄isha, Yus ti yayamu ásar, Yusa kakarmar̄ijaj̄ Uunt Jesusa nantakmar̄in tuke etseras pujuarmiayi. ³⁴ Tura ashí Yus-shuarka nuñkan takakusha jeñ takaku armia nusha, núnaka surukar kuítian itiararmiayi. ³⁵ Tura itiaar Jesusa akatramur̄in súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. ³⁶ Chikichík shuar, ni naar̄i Jusé, nuñkan takakuyayi. Jesusa akatramur̄isha Jusen chikich náar̄in apujtusarmiayi, Pirnapín. Nu náar̄isha, shiir enentáimtikkiartin tawai. Tura Pirnapísha Riwi áentsuyayi. Tura ni akiiniamur̄i núñkenka Chípriiyayi. ³⁷ Niisha ni nuñken surukarmiayi. Tura nu kuítian itiaá Jesusa akatramur̄in súarmiayi.

Ananíasa tunaari

5 Tura chikich áishman, ni naar̄i Ananías, ni nuwe Sapirjaj̄ ni nuñken surukarmiayi. ² Niisha nuñkan suruk kuítian emeenak akanak jukí Jesusa akatramur̄in werí takamtsukea nútikias susamiayi. Ni nuwésa, Sapir, nuna túran nekaamiayi. ³ Túramtai Pítiur chichaak "Ananíasa, ¿urukamtai uunt iwianch enentáimin enkemturmatai, Yusa Wakanín anañkataj̄ tusam nuñka surukam kuit achikiumna nu akankam ikiurmasam? tímiayi. ⁴ Entá, nuñkia nuñka áminiuchukait. Surukumna nu kuitcha áminiuchukait. Nusha, ¿urukataj̄ tusamea tu enentaímprom? Amesha aya áentsnum wáitruachume. Antsu Yusnumsha wáitruame" tímiayi Pítiur. ⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiayi. ⁶ Nú turunamtai áishman tariar Ananías jakan penuararmiayi. Túrawar iwíarsatai tusar júkiarmiayi.

⁷ Tura Ananíasa nuwe arur, menaintiú ura nañkaamasaj̄ támiayi. Túrasha ni áishri jakanka nekaachmiayi. ⁸ Támatat Pítiur nuwan tímiayi "Turuttia. Átum nuñka surukurmena nuñ, ¿kuit itiarumna núnikik surukuram?" tímiayi. Tutai nuwá tímiayi "Ee, núnik surukji." ⁹ Tutai Pítiur tímiayi "¿Urukamtai atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwíarsatai tusar júkiaria nu wininiawai. Tura yamaikia amincha juramkiartatui" tímiayi. ¹⁰ Tutai nu chichamaik niisha imia Pitru wajamunam jaka iniaantmiayi. Aishman wayaj̄ tukamá jaka tepan

wáinkiararmiayi. Túramtai júkiar ni áishriñin ayamach iwíarsarmiayi. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmiayi.

Yusa kakarmar̄ijaj̄ túrawarmiania nu

¹² Tura ashí Yus-shuar Yusa Uunt Jeñ shikir̄in irunin áarmiayi. Nu shikir̄isha, Sarumúnna, tu anaikiamuiti. Tura chikichmamntinkia nuim iruntratniun ashamiarmiayi. Túmainiayatan, ti penker áiniawai, tu wearmiayi. Tura Yus-shuar Yusa kakarmar̄in iniakmasarmiayi. Túra asamtai imiá untsurí aents Yus-shuar ajasarmiayi.

¹⁵ Tura chikich aents ni shuar̄i jainia nuna jintiá amamtikiarmiayi. Peakjaj̄ júkiar, tampunmasha enkeawar júkiar jintiá ayamach áepsarmiayi. Pítiur nañkaamak ni wakan̄sha enkemprutmawainti tusar nu shuar túrawarmiayi. ¹⁶ Núnisan arantiá shuarsha ti untsurí ni shuar̄i jáinian tura iwianchrukuncha nuñ Jerusar̄num itiararmiayi. Tura ashí nuñ táaruka tsuámararmiayi.

¹⁷ Israer-patri uuntri, tura Satuséu aencha niijaj̄ pujuarmia nu suiir iiniak ¹⁸ Jesusa akatramur̄in achikiar enkeawarmiayi. ¹⁹ Túrasha kashi Uunt Yusa suntari nayaimpinmayá tara sepú wáitir̄in uraimiayi. Tura Jesusa akatramur̄in aa jíikiarmiayi. ²⁰ Tura tímiayi "Wetarum. Tura Yusa Uunt Jeñ wajasrum Yusjaj̄ tuke iwiaaku átinia nu etserkatarum" tímiayi.

²¹ Nuna antukar kashin tsawar káshik Yusa Uunt Jeñ wayawar jintintiawarmiayi.

Nu túmainiá Israer-patri uuntri, tura niijaj̄ pujuarmia nusha iruntrararmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramur̄i sepunmayá itiatarum tusar.

²² Tura suntarsha sepunam jeariar Jesusa akatramur̄in wáinkiacharmiai. Atsawai tukam táarmiayi. ²³ Taar chichainiak "Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaj̄i tukamar atsá wáinkiaji" tiarmiayi.

²⁴ Israer-patri uuntri, tura Yusa Uunt Jeñ wainniu uuntri, nu chichaman antukar, "tsej ausha ¿urutiak nunasha iniaisarar?" tiarmiayi. ²⁵ Nu chichamaik áishman taa tímiayi "Aishman átum sepunam enkeamarmena nu, Yusa Uunt Jeñ wajasar áentsun jintintiuk pujuiniawai" tímiayi.

²⁶ Túrunamtai Yusa Uunt Jeñ wainniu uuntri ni suntar̄ijaj̄ wear achik itiararmiayi. Túrasha penké aents kayajaj̄ tukumar̄aj̄ tusar, yajauch awajtsuk itiararmiayi.

²⁷ Tura achik itiaar Israer-shuar naamka pujamunam naka awajsararmiayi. ²⁸ Tura Israer-patri uuntri tímiayi "Tisha atumin chicháa chicharu awajsar, Jesusa naar̄i pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusar̄num átum etserkamu pampañkai. Jes, átum, Jesusan máawarai, in tátsurmek. Nusha in makuutai tusarum tárume" tiarmiayi.

²⁹ Nuyá tutai Pítiur chikich Jesusa akatramur̄ijaj̄ chichainiak "Tikia aentsjainkia iniankasar Yus emka

umirkatniuitji, tiarmiayi. ³⁰ Jesus atumek krúsnum máamurmena nuna ii iwiaaku Yusrj Nin iniantkimiayi. ³¹ Yus ni kakarmarjijaj Nin nankaamantu awajsamiayi. Tura nekas Akupniuiti tusa ni untsuurjñi apujjamiayi. Tura áentsun Uwemtikniuiti. Israer-shuar enentái yapajjáwar tunaarjñi uwemprarat tusa Yus túrait. ³² Nu tuma asamtai iisha nu nekaar étsereaji. Tura Yusa Wakanjsha nuna étsereawai. Túrasha aya Yusa umirkarua nunak ni Wakanjñ súsaruiti" tímiayi Pítiur.

³³ Tutai nuna antukar ti kajerkarmiayi. Túrawar, maatai tusar wakeriarmiayi. ³⁴ Tura nuj Israer-shuara uuntri pujumiayi, ni naarj Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi "Ju áishmañ aq ishichik wajasarti" tímiayi. ³⁵ Nuyásha irunar matsamarmia nuna chicharuk "Israer shuartiram, ju áishmañ tú túratai tu enentáimsarumna nu aneartarum. ³⁶ Enentáimsatarum. Nuik áishmañ Tiútas wantinkiachmakia. Niisha kapitániitjai takui, kuaru siáñtu (400) shuar ne-markarmiayi. Tura ukunam nin maawarmatai, ni né-markamurjsha pisararmiayi. Túrunawar nuní amuukamiayi. ³⁷ Ukunmasha, iruntrar nekapmartin tsawantincha Kariréanmaya Jútas wantinkiachmaka. Tura nincha nútiksañ ti untsurj nemarkarmiayi. Túman máawarmiayi. Nu túrunamtai nútiksañ ni némarkamurjsha pisararmiayi. ³⁸ Jes, tuma asamtai nu áishmañ aq wajainia nu iniaisatarum. Auka pachisairap. Au tumainia nu aya áentsnaketkuñkia amuukattawai. ³⁹ Tura antsu Yúsnaitkuñkia atumsha amuktai tukamarum tujinkiattarme. Aneartarum. Iniaiyachkurmeka nu tumá pujusrum Yusjají máanikchattarmeash" tímiayi Kamarír.

⁴⁰ Tú tutai tímianak umikiarmiayi. Túrasha Jesusa akatramurjñ untsukar asutiáwarmiayi. Tura chicharuk "Jesusa naarj pachisrum penké ishichiksha etserkairap" tiarmiayi. Tú tiar akupkarmiayi. ⁴¹ Jesusa akatramurjsha Israer-shuara uuntri pujamunmaya jíinkarmiayi. Tura wáitsamniaitrumé tusa Yuska Jesusa naarj pachia asakrin ii natsantin wáitsatniun tsañka-tramkaitji tusar ti shiir enentáimsar wearmiayi. ⁴² Tura Jesukrístunun áujmatsatniun penké iniaisacharmiayi. Antsu tuke tsawant Yusa Uunt Jeeñcha tura chíkich jeañmasha páchitsuk etseriarmiayi.

Yus-shuaran yainian siati anaikiarmiania nu

6 Nú tsawantin Yusan umirkaru ti kawenkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. "Tuke tsawantin yurumak súarmena nuj atumí waje ti nukap súarme. Tura íniuka ishichik súarme" tiarmiayi. ² Túruinia Jesusa tuse akatramurj ashí Yus-shuaran irurar tiarmiayi "Tisha Yus-Chicham etserkatin iniaisar yurumak súsachminiaitji. ³ Tuma asamtai yatsurtiram, atumjñia siati áishmañ eáktárum yurumkan súsarat tusarum. Péñker wekainia nu, tura neka shuar, Yusa Wakanj pimiutkamu ainia nu achiktarum. ⁴ Iikia antsu Yus áu-

jkir unuiniakratkir Yusa chichame etserkir wétatji" tiarmiayi. ⁵ Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yúsán tuke enentáimtinuyayi. Tura Yusa Wakanjsha pimiutkamuyayi. Chíkich áishmañkan anaikiarmiayi, niisha Jiripi, tura nuyá Purukuru, Nikianúrsha, nuyá Temuñ, Parmenassha, Nikiurássha. Nikiurássha Antiukía nunkanmayaitiat Israer-nancha ashí umirniuyayi.

⁶ Tura nu siati áishmañkan Jesusa akatramurjñ itiararmiayi. Táarmatai, akatramusha, Yus áujtusar, anaikaji tusar múuknumsha ni uwejen awantsarmiayi.

⁷ Túrasha Yusa chichamenka tuke pampankj wémiayi. Nuj Jerusaréñnumsha Yus-shuar ti kawenkararmiayi. Tura imia Israer-patrisha untsurj Yus-Chichaman umiriarmiayi.

Estepañkan Israer-shuara uuntriñ júkiarmiania nu

⁸ Estepañsha Yusa waitnenkartutairj pimiutkamuyayi. Tura Yusa kakarmarjsha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarjñ nekaawarat tusa túramiayi. ⁹ Israer-shuar iruntai jea, ni naarj Ankantín, ámiayi. Nuyá áishmañsha tura Serini nunkanmaya áishmañsha, tura chíkich nunka Arijiantrjanmayasha, Serisianmayasha, Ásianmayasha, tímian Estepañjají áujmatsatai tusar káutkarmiayi. ¹⁰ Estepañ Yusa Wakanj nekatairijjají tímianak chicháa asamtai, nu áishmañ Estepañjají inkiunaikar nupetkataj tukamá tujinkarmiayi. ¹¹ Tuma asamtai suiir enentáimtuiniak chíkich áentsun Estepañkan tsanumprurarat tusar eákararmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi. ¹² Penké áentsun, tura uunt ainia nunasha, jintintín ármia nujajsha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsamarmia nuj júkiarmiayi. ¹³ Tura wait chichamtinian itiararmiayi. Niisha taar chicharainiak "Yusa Uunt Jeeñ ti péñker ana nu, tura Yusa akupkamurjñcha ju Estepañ tuke yajauch chicharui, tiarmiayi. ¹⁴ Nú arantcha ju Estepañ tímia nu antukji, tiarmiayi. Estepañ chichaak "Nasarénumiá Jesuska Yusa Uunt Jeeñ sááktiatui, tura nuyá Muisais in ikiurtamkimiaj nunasha yapajjáttawai" tímiayi. Nusha Estepañ tímia nu antukji" tiarmiayi. Tura nunasha penké ántar tsanumprurarmiayi.

¹⁵ Nuyásha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuní íran wáinkarmiayi.

Estepañ etserkamiania nu

7 Tuma wáiniak Israer-patri uuntri Estepañkan aniasmiai "¿Ju tuinia nu nekaskait?" tímiayi. ² Tutai niisha áimkiamiayi "Winia úntrutirmesha, yatsurtirmesha anturtuktarum. Ii Waantu Yusrj ii úntrjñ Apraáman wantintukmiayi. Apraámka Misiuputámia-

Kartea nuṅkanam pujaḡ, Aran nuṅkanam wéatsaḡn, nuḡ wantintiukmiayi. ³ Tura wantintiuk tímiayi “Ame nuṅkemsha áminiurmesha ikiukim nuṅka Wi iniaktus-tatjamena nuḡ wetá” tímiayi Yus. ⁴ Tutai Apraám Misi-uputámia-Kartea nuṅkan ikiuki Aran nuṅkanam pujus-taj tusa wémiayi. Nuyá ni aparḡ jakamtai “Arant wetá” tímiayi Yus. Nuna taku ju nuṅkan ii pujajnia juḡ pujsamiayi. ⁵ Túrayat nuṅkan ishichkisha súdachmiayi ju nuṅkanam. Antsu “Ukunam amastatjai. Ame jakakmin ame uchirmin susattajai” tímiayi. Tura Apraama uchirḡ peṅké atsan nuní tímiayi Yus. ⁶ Nuyasha Yus tímiayi “Ame uchirmesha írara núnisaraḡ chíkich nuṅkanam pujusartatui. Nuḡsha emetamu itit awajtai pujuartatui. Kuatru siáḡtu (400) uwí, tímianu uwí wáitsartatui, tímiayi. ⁷ Túrasha, Wi asutiáttajai ame shuárumin wáitkia núnaka, tímiayi. Túram nuyá nú nuṅkanmaya shiákar-tatui. Tura Winia enentáimtursartatui juḡ nuṅkanam’ tímiayi. ⁸ Yus tuke Apraámnasha chicharuk ‘Yamaikia Wíi-shuar asarum tsupirnaktiniaitume. Tuma asam amesha uchiram áishmaḡkach akiiniamtai, Wi tímiajna núnismek, sirkunsisiúḡ tutai, shunichirḡ nuape tsupirkata, tímiayi. Tura chícham Wi yamaikia ámijjaḡ najanaj nu nekas uminkatniuiti tusam nusha túrata” tímiayi Yus. Tuma asamtai ni uchirḡ Isak akiiniamtai, uchu tsawant naṅkaasmatai, Apraám nin tsupirkamiayi. Tura Isaksha ukunam ni tuse (12) uchir-in ii uuntri armia nunasha nútiksḡn túramiayi. ⁹ Tura niisha ni yachḡn Jusen suiir íyarmiayi. Túmainiak Ejiptu nuṅkanam júkiarat tusar surukarmiayi. Túrasha Yus némarkauyayi. ¹⁰ Tuma asa, ashí ni itirchatriniḡ uwemtikramiayi. Tura waitnenkartutairincha nekatair-incha susamiayi. Tuma asamtai Ejiptunam uunt akupin Paraún Ejiptu nuṅkaa akupniurḡ ajasat tura ni jeḡn wáinniurḡ ajasat tusa anaikiamiayi.”

¹¹ ‘Tímiatam tsuka tura itirchatcha ámiayi Ejiptu nuṅkanam. Tura juḡ Kanaḡ nuṅkanmasha núnisaraḡ ámiayi. Tuma asamtai ii uuntri yurumkan peṅké wáin-charmiayi. ¹² Tura Jakup, Ejiptunam yurumak ikiusma awai taman antuk ni uchirḡn akupkarmiayi. Túrasha wekaicha wearmiayi. Wats, ii úuntriun ujaajrume. ¹³ Tura ii uuntri atak Ejiptunam wéenak Jusesha, wíitjai takui ni yachḡ Jusen nekaawarmiayi. Tura Jusé “Yatsur ániawai” takui Paraun, antuk “au shuarapitia” tímiayi. ¹⁴ Nuyḡka Jusé ni yachḡn chicharuk “Apar itiatarum uchirtuk” tímiayi. Nu shuarsha untsurḡ, setenta seṅku (75) matsamarmiayi. ¹⁵ Nuní tutai Jakupsha ni shuarijjaḡ Ejiptunam pujustai tusar wearmiayi. Tura ukunam nú nuṅkanmaḡ jakamiayi. Tura ni uchirḡsha ii uuntri ainia nu, núnisaraḡ nú nuṅkanmaḡ jákarmiayi. ¹⁶ Tura atak ukunam ni shuarḡ Sikiam nuṅkanam ni ukunchḡn júkiar iwiarsarmiayi. Kame Sikiam nuṅkanam Apraámka yaunchu játsuk Amura uchirḡ nuṅken sumakmiayi. Túramtai nuḡ iwiarsarmiayi’ tímiayi.

¹⁷ Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nuṅkanam Israer-aents pampaḡki ti kawḡkarmiayi. ¹⁸ Nu tsawantincha Ejiptunam chíkich akupin naamka ámiayi, tura Jusen nekaachmiayi nii. ¹⁹ Nu akupin ii yaunchu úun-

triḡn anaṅkawar yajauch awajarmiayi. “Atumí uchirḡ kuírchich ana nu ajapa ikiuktiarum” tu wémiayi. Pam-paṅkarḡn tusa tímiayi. ²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurḡ menaintiu nantu takusmiayi. ²¹ Tura nuyá ajapa ikiuktin jeamtai entsá apujsamiai. Uunt Paraun-ka nawantri Muisaisan wainiak jukimiayi. Achik, ni uchirḡnia tímiatrusaḡ jukí tsakatmarmiayi. ²² Tuma asa Muisais unuimiátrauyayi ashí Ejiptu aents nékarmia nuna. Túramurḡsha chichamesha kakarmauyayi.’

²³ Estepaḡ tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarḡ asamtai. ²⁴ Nuyá we Ejiptun-maya áishmaḡ ni shuarḡn máatasa pujurun wáinkiami-ayi. Tura Muisais ni shuarḡn ayamprak Ejiptunmaya áishmaḡkan máamiayi. ²⁵ Wíi turamujjaḡ Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsaraḡ nékaini-awai tu enentáimsamiayi. Túrasha niḡkia nekaacharmiayi. ²⁶ Kashin tsawar Muisais ni shuarḡ jímiar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsum-jajsha yajauch awajniarum?” tímiayi. ²⁷ Tutai emka naṅkaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam?

²⁸ ¿Winiasha maantuátaj tusam wakeramek, yaḡ Ejiptunmaya áishmaḡ máamamna nútiksamkea?” tímiayi. ²⁹ Nuna antuk Muisaiska Matiaḡ nuṅkanam pisar, nú nuṅkanam kuarenta (40) uwí yajaya áintsḡn pujumiayi. Nú nuṅkanam pujus, nuatak, jimiará uchin yajut-marmiayi.’

³⁰ ‘Kuarenta uwí naṅkaamas, nu atsamu nuṅkanam Senai náinnium tíjjuḡch Yusa suntarḡ nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. ³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichameḡn antukmiayi. ³² Yus tími-ayi “Wiitjai Yus. Ame úuntrumḡ Apraáma Isaka, Jakupa Yúsriḡntjai” tímiayi. Tutai antuk Muisaiska ti kuraimiayi sapijin. Tura íistinian tujinmiayi. ³³ Nuyá Uunt Yus tími-ayi “Úuntron shiir awajsataj tusam, ame sapatrum ukuḡnkiam ikiuktia, wajamna nuḡ Wi pujakui. ³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwemtikrataj tusan tarajai. Wats, akupkat-jame ámin. Ejiptunam waketkitia” Yus tímiayi Mui-saisan.’

³⁵ Estepaḡ tuke étseruk: ‘Ju Muisaisan ni shuarḡ “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anaik uwemtikrarat tusa awaiḡki akupkamiayi. Numiniam ni suntarḡ wantintiukmia nuna chichamejjaḡ Yuska Mui-saisan akupkamiayi, tímiayi. ³⁶ Muisaisaiti Israer-aentsun Ejiptunmayan uwemtikramia nu. Yusa kakar-marḡn nekaawarat tusa, aentsti túrachminian untsurḡn túramiayi Ejiptu nuṅkanam. Nuyá Kapaḡantin Nayaantsanmasha, tura nuyá kuarenta (40) uwitin at-samunam pujuiniajsha ti kakarman iniaktusmiayi. ³⁷ Jú

Muisaisak Israer-shuaran chicharuk “Atumíjiniñak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. ³⁸ Jú Muisais Israer-aentsjají atsamunam pujumiayi. Senái nainnium Yusa suntari níjjijajísha pujumiayi. Tura Muisaisa ii úuntrijjají pujumiayi. Níyiyaiti iwiaaku pujustin chichaman sunasmia nu. In ujatmaktinian sunasmiaiyi.’

³⁹ Túrasha ii yaunchu uuntri Muisaisan umirkatniun nakitiarmiayi. Ániuk imiá umirtaint tusar Ejiptunam waketitniun wakeriarmiayi. ⁴⁰ Túmainiak Muisais Yusjají chichastajtsa murá wématai nu shuar Muisaisa yachin Arunkan tiarmiayi “Ti yusrí najanatá, ii nemarsatin. Ániusha Muisaissha Ejiptunmaya in juramkiyatcha tútsuk weruma” tiarmiayi. ⁴¹ Nuyá wáakachia áaniun najanawarmiayi. Túrawar, júiti ii yusrí tusar, kuntinian maantuawarmiayi, nu susatai tusar. Tura ni uwejejjají najanamun íisar ti wararsarmiayi. ⁴² Nuna túruinian wáiniak Yus, iniaisajai taku, niyya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniurí juní áarmiayi:

“Israer-aentsu, kuarenta (40) uwitin atsamunam wekaimiarmena nuí, ¿Winiak kuintin maanturtuamarum? Winia surustai tusarum penké túrachurme, tímiayi Yus. ⁴³ Antsu, Muruk naartin ántar-yusa pujamurín jukimiarme. Tura chíkich ántar-yussha, ni naari Rempan, yaa áanin najanarum nusha jukimiarme. Júkin asakrumin atumí nunkeya jukin, tímiayi Papirúnia nunkan nankaiki akupkatjarne” tímiayi Yus.”

⁴⁴ Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánatá” tímiayi. Tutaí Muisais Yus tímianak umikmiayi. Nu jeñan ii uuntri yaunchu takaku áarmiayi. ⁴⁵ Nu jeñan ni uchirí akintkiar akintkiar wearmiayi. Ukunam, jú nunka achiktin jeamtai, Yuska kapitían Jusuejjají jú nunkanmaya aentsun jiiiki akupkarmiayi. Tura ii uuntri kapitían Jusuejjají winiarmia nu, nu jeñancha jú nunkanam itiararmiayi. Tura Tawit uunt akupin náamtsain, ii úuntri sha nu jeñan takaku áarmiayi. ⁴⁶ Kame Yus Tawitian yájau enentáimtichmiayi. Tuma asamtai Tawit Yus shiir pujustinian jeñan jeamtinian seamiai. ⁴⁷ Túrasha antsu Tawitia uchirí Sarumún Yusa jeñan jeammiayi. ⁴⁸ Túrasha aents jeammanumañ Uunt Yus pujuschamniai. Jes, yaunchu Yusa etserniurí Yus tímia nuna áarchamkia. ⁴⁹ Juna áarmiayi:

“Nayaimpikia winia pujutairuiti. Nunkanmasha nawer tarimiui.

¿Warí jeñan najatruatai tusarme tarum? tímiayi Uunt Yus.

Tura Wi ayampratniusha, ¿tuji aa?

⁵⁰ Wiki winia uwejrújají ashí najanachmakiaj” tímiayi.’

⁵¹ Estepañ tuke étseruk: ‘Tura átumka Israer-shuarmekama atumí enentájjají tuke umichuitrume. Atumí kuishjisha weaktsui tura Yus nékachua núniniaitruume. Yusa Wakaníjjajísha tuke nemasnaikiaitruume. Tura atumí yaunchu úuntrijjají métek túrarme’ tímiayi.

⁵² Tisia, atumí úuntri sha Yusa etserniurín tuke kajerin áarmiayi, tímiayi. Tura nú arant atumí úuntri sha Tunaaríncha tátatui tu etseru wekaan, máacharmakia. Jes, nútiksarmek yamaisha, Tunaaríncha támania nusha atumek ananjarum máachmakuram, tímiayi. ⁵³ Tura Yusa suntari nayaimpinmaya Yusa chichamen susamuitatrum atumsha penké umikchamarne” tímiayi Estepañ.

Estepañka jakamuri

⁵⁴ Israer-aencha Estepañ tu chichaamu antukar imiá kajerkar nain kátetete awajiarmiayi. ⁵⁵ Tura Estepañsha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharín, tura Yusa untsuurínjini Jesusan wajan wáinkiamiayi. ⁵⁶ Tumá wáiniak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurínjini wajan wáinjai” tímiayi. ⁵⁷ Támaitiat niisha kuishjín akiriarmiayi, tura achiktai tusar charáa tiar ashí wajakarmiayi. ⁵⁸ Túrawar, péprunmaya arant júkiarmiayi. Tura antuk etserkarmia nu pushirín áikar, natsa Sauru wajamunam au iisti tusar áeprusarmiayi. Tura máawartai tusar kayajají tukurarmiayi Estepañkan.

⁵⁹ Tura Estepañka tukamaitiat Yúsán áujsamiayi. Tura áujuk “Uuntru Jesusá, winia wakantrusha jurutkitia” tímiayi. ⁶⁰ Tura tikishmar áujuk “Uunta, jú winia túru-tainiana jú makuip” tímiayi. Tura nuna tí iniais, jakamiayi.

Sauru Yus-shuaran kajerarmiania nu

8 Estepañkan máawarmatai Sauru, penkeraiti, tímiayi. Tura áishmañ Yúsán penker enentáimta armiania nu, Estepañka ayashíncha iwiansarmiayi, tura aneenak ti uutiarmiayi. Tura nú tsawantají Yus-shuaran Jerusaréñnum pujuarmia nuna ti kajerkatín nankanamiayi. ³ Sáuruka Yus-shuaran kajerak ti pataat wémiayi. Túmak nuí jeá wayá, nuí wayá áishmañnasha nuwancha wáinkiañka japiki júki sepunam enkeataj tusa túrimiai. Tumakui Yus-shuar Jerusaréñnumiá pisarar Jutía nunkanam, tura Samaria nunkanmasha jeawarmiayi. Jesusa akatramurínkia antsu Jerusaréñnumañ juakarmiayi.

Samaria nunkanam etserkarmiania nu

⁴ Túrasha Jerusaréñnumiá aents pisararmia nu, arant wénaksha tuke Yusa chichamen etserkini yujarmiayi.

⁵ Tura Jiripi Jerusaréñnumiá we tura chíkich péprunam Samaria núñkanam ámiania nuí jeá, chichaak “Yus anaikiamu ana nu Jesusaiti” tu etsermiayi. ⁶ Túrakui aents iruntrar chikichík enentájjají Jiripi étseraemun titiú pujusar antukarmiayi. Yusa kakarmarín nekaawarat tusa aentsti túrachminian túrimia nunasha wáiniarmiayi. ⁷ Ti untsurí aents iwianchruku ármia nuna Jiripi nu iwianchin jiiirki akuptiarmiayi. Tura iwianch jíiniainiak kakantar charáa tiar jíiniarmiayi. Tura ti untsurí emearusha shutuapsha penker ajasarmi-

ayi. ⁸ Tuma asamtai nú péprunmayaanka ashí shuar ti warasar pujuarmiayi.

⁹ Tura nú nuñkanam uwishin Semuñ pujumiayi. Nuikkia wi ímianaitjai tusa Samarianmaya aentsun anañniuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semuñsha Yusa kakarmarijijai áitkiawai.”

¹¹ Tura ti untsurí uwí wawekratmarijijai anañkarta asamtai, umirkarmiayi nu aents. ¹² Túrasha Jiripi Yusa akupeamurjñ, tura Jesukrístununcha shiir chichaman etserkamiayi. Tura, nuna antukar nuwasha áishmansha umikiar imian wearmiayi. ¹³ Semuñsha imia uwishniuitiat Yus-Chichaman enentáimtus imianmiayi. Tura Jiripijijai tsaniñ wekaimiayi. Yusa kakarmarjñ shuar nekaawarat tusa Jiripikia aentsti túrachminian túrimiayi. Nuna wáiniak Semuñ ti enentáimsamiayi.

¹⁴ Tura Jesusa akatramurjsha Jerusarénnum pujuarmia nuí Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juáñnasha nekáa ikiuutarum tusa akupkarmiayi. ¹⁵ Tura Samarianmaya Yus-shuarsha aya Uunt Jesusa náariñ imianiarmiayi. Yusa Wakanjñkia tárachmiayi. Tuma asamtai Pítrusha Juanjajai nuí jeawar Samarianmaya Yus-shuara enentáin Yusa Wakanjñ pim-iutkarat tusan Yusan áujtusarmiayi. ¹⁷ Tura áusua umikiar Pítiur Juanjajai ni uwejeñ nú Yus-shuara awantsarmiayi. Nuiñkia Yusa Wakanjñ taramiayi.

¹⁸ Jesusa akatramurjñ uweje awasmanum Yusa Wakanjñ taramtai, Semuñsha nuna wáiniak, kuitjajai nu kakaram sumaktaj, tímiayi. ¹⁹ Tura Jesusa akatramurjñ chicharuk tímiayi “Winiasha kuitjajai surustarum nu kakaram. Wisha nútiksanak náñkamas aentsnum winia uwejur awantsam Yusa Wakanjñ tarurat tusan tajai” tímiayi. ²⁰ Tutai Pítiur tímiayi Semuñkan “Ámeke kuítrumjajai métek meñkatniuitme. Warí, Yus amaana nu ¿kuitjajai sumaktinkiait? ²¹ Yus esetram enentáimtachu asam nu túramu pachistincha peñké tujinkiamé, tímiayi. ²² Enentáimprata. Túram Yus seata. Enentáimtamna nuna Yus tsañkurtamprashtimpiash. ²³ Néka-jme, tsaañkea áintsañ yapá enentáimin pimiutramkai. Tura tunaarmijñ jinkiamua núniñiaitme” tímiayi.

²⁴ Tutai Semuñ áimkiamiayi “Uunt Yus aujtursatarum. Túrutrumna nuna túrunawajj tusan tajai” tímiayi.

²⁵ Nuyasha Jesusa akatramurjñ Jesusa túramurjñ nú áentsun ujakarmiayi. Tura wésar Samaria nuñkanam pepru ámunmanka Yus-Chichaman nuí etserkiar, nuí etserkiar Jerusarénnum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntarjñ nayaimpinmayan Jiripincha akuptukmiayi. Niisha chicharuk tímiayi “Wátskea. Juya jiiñkim Jerusarénnumiñ jintia Eñkasa péprunam wea nuní weme, anaraanj wetá. Nú jintiaka atsamu nuñkanam nañkaamawai” tímiayi. ²⁷ Tutai Jiripisha wémiayi. Jintiá wesa Itiupianmaya áishmankan wáinkiamiayi. Nú áishmansha Itiupia nuñka akupniurjñ, ni naarj Kantasen takarniuyayi. Kantaseka núwuyayi.

Tura nu áishman ti neka asa nuna kuítrjñ iirniuyayi. Nú áishmansha Yusan áujstataj tusa Jerusarénnum wéu wáketmiayi. ²⁸ Karetanam eñkemar wesa, Yusa etserniurj Isayas aarmia nuna aujki wémiayi. ²⁹ Wats, Jiripi nú jintianam wéakui, Yusa Wakanjñ nin tímiayi “Nú kareta amayáñta.” ³⁰ Tura Jiripisha amayáñ, Yusa etserniurj Isayasa áarmarjñ áujun antuk, chicharuk “¿Aujeamna nu nekamek?” tímiayi.

³¹ Tutai nú áishman tímiayi “¿Itiurak nekaataj? ¿Yaki jintintruat?” tímiayi. Tura antsu iijijai wetái tusa, Jiripincha eñker jukimiayi karetanam.

³² Nu papí áarman áujmia nu júuyayi: “Murikiua áitki-asañ jákatniunam júkiarmiayi. Tura uchich murik, ure tsúpiram chichaatsna núnisañ niisha chichakchamiayi. ³³ Nincha iniatsáarmiayi. Túrasha peñké chichamnaka tútsuk tsañkamakmiayi. Niisha nuñkanam iwiaaku puja maamu asamtai, ¿yaki nuna áujmatkat?” Nuní aarma ámiayi.

³⁴ Kantase takarniurj Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurj níñkik túmama? ¿Chikichnash ta?” tímiayi. ³⁵ Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nañkaamak áishman Jiripin chicharuk “Juí entsá jeaji. Wikia juí imianchamniakaitaj” tímiayi.

³⁷ Tutai Jiripisha tímiayi “Tuke enentáimjajai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. ³⁸ Tura, kareta awajas mai jiiñkiar entsá wearmiayi. Nuí Jiripikia Kantase takarniurjñ imiimiayi.

³⁹ Tura kukar jiiñkiarmatai Uunt Yusa Wakanjñ Jiripin jukimiayi. Tuma asamtai Kantase takarniurjsha Jiripin wáinkiachmiayi. Túrasha niñkia waras wémiayi. ⁴⁰ Jiripisha jeachat Asutu péprunam wantinkiamiayi. Tura nuyá jiiñki péprunam nuí wayá, nuí wayá Yus-Chichaman etserki we, Sesaria peprunam jemiayi.

Sauru Jesusan umirkamiayi

(Túramurj 22.6-16; 26.12-18)

9 Nuna tumaj, Jerusarénnum Uunt Jesusan umirkarmia nuna máataj tusa áujmattan Sáuruka peñké iniaichamiayi. Tuma asa Israer-patri uuntrj iyutaj tusa werimiayi. ² Tura jeari tímiayi “Papí ame naarmijijai áaram surusta. Wi nuna papí jukin timiaj Tamasku péprunam jean, Israer-shuar iruntainiam wayattajai. Túran nú papijijai Jesusan umirkaru ainia nuna, náñkamsan achikiartajai. Túran áishmansha nuwancha achikian jinkian, juí Jerusarénnum eñkeataj tusan ikiaankattajai” tímiayi. ³ Tura papí susam Sauru jintiá wéaj, Tamasku péprunam nuntumsaj nuí aya aneachma nayaimpinmaya tsáapin jiiñsumir téntakmiayi nin. ⁴ Túrunamtai Sauru nuñká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmam-same, waaka sanġanmiak numin ijiuma núnismek” tímiayi.

⁶ Nuyanka Sauru sapijin kuraŋki tímiayi “Nuŋkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

⁷ Tura Sáurujaí irunar wearmia nu, chichaamun antukarmiayi. Tura áentsnaka penċé wáinkiacharmíayi. Tuma ásar ti ashamkarmiayi. ⁸ Nuyá Sauru nuŋká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uweġnum enċekiar júkiarmiayi Tamaskunam. ⁹ Nuí jeá menaintiu tsawant íimtsuk tura yurumtsuk penċé úmutsuk pujumiayi.

¹⁰ Nuí Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nuí wetá. Nujsa Jutasa jeċen jeam, Társunmaya Sáurun enċktaj tusan winijjai, titiá, tímiayi. Niisha Yúsan áujuk pujawai. ¹² Tura juna mesekranam ipiatkamjai Sáurun. Aishman wayá ni uweġjaí ántiawai, ataksha íimit tusa. Nú áishmanċa ámetme, Ananías” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénum ti yajauch awajchakait. Ni yajauch túramurín ti untsurí aents ujatainiawai, tímiayi. ¹⁴ Tura yamaisha Israer-patri chicharniun papirín takakui. Tura nujaí ame náarmin páchiaj nuna achik jukitiaj tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishmanċan winia etserniur atí tusan achikjai Wí. Niisha Israer-shuarchancha tura kapitiánniasha tura Israer-shuarnasha wínian etserin átatui, tímiayi. ¹⁶ Tura Sauru winia náarun páchia asa ti wáitsattana núnaka nin iniktustatjai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uweġen awantas tímiayi “Yatsuru Sauru, Uunt Jesus jintiá wantinturmam-ma nusha ame ataksha íimiat tusa, tura Yusa Wakanísha enentáimin pimiutramkat tusa winia akup-tukai” tímiayi.

¹⁸ Nu chichamaik ni jiiya namaká saepeya áanin ini-aarmiayi. Túrunamtai ataksha íimmiayi. Túruna wajakí we imianmiayi. ¹⁹ Nuyasha yurumámiayi. Tura yurumásha kakaram ajasmiayi. Tura Yus-shuarjaí Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyanka Sauru Israer-shuara iruntairín wayá Jesús túramurín etserkamiayi. Etseruk tímiayi “Nekasaiti, ju Jesus Yusa Uchirínti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmanċa Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniuriin jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarmiayi.

²³ Tura ukunam, Israer-aents Sáurun maatai tusar chichaman jurusarmiayi. ²⁴ Tura Sáurusha nu chicham jurusman nekamamiayi. Israer-aents pepru jiiinmanum tuke tsawajsha, káshisha achikiar maatai tusar jintian akirtiarmiayi. ²⁵ Nuna antukar Yus-shuar Sáurun chíiknium kashi enċeawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusarénum wémiania nu

²⁶ Tura Sauru Jerusarénum jeá Yus-shuarjaí irun-trattsá wakerimiayi túrasha niŋkia ashamiarmiayi. Sáurusha nekas Yus-shuar ajaschaiti tusar ashamiarmiayi.

²⁷ Túmainiaín Pirnapí Jesusa akatramurí matsatmanum jukimiayi Sáurun. Tura nuí eċé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi. ²⁸ Tura Sauru Jerusarénum juákmiayi. Tura Yus-shuarjaí irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjaí áujmat-sarmiayi. Túrasha nu shuar Sáurun itiar máatjik tusar chichaman juriarmiayi. ³⁰ Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

³¹ Tura Jutíanmaya, Kariréanmayasha, Samarianmayasha Yus-shuar shiir tímiajnisaċ ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawenċi kawenċi wearmiayi.

Pítiur Eneasan yáimiania nu

³² Tura Pítiur Yusaj yachi armiania nuí iráa wekaimiayi. Wekaak Yus-shuar Rítianam matsamarmia nujsa iraumiayi. ³³ Nujsa Rítianam jeá áishmanċan Eneas náartinian wáinkiamiayi. Niisha emearu asa wekaicha uchu uwí aya tépenuyayi. ³⁴ Tura Pítiur chicharuk “Eneasa, Jesukrístu tsuármawai. Nantaktia. Tura esek-matairam iwiarata” tímiayi. Tutai Eneas nu chichamaik nantakmiayi. ³⁵ Nuna túman wáinkiar Rítianmaya aents tura Sarunmaya aencha enentáimprar Uunt Yus-san nemarsarmiayi.

Nuwá Túrkas nantakmiania nu

³⁶ Túrasha Jupe péprunam nuwá Yus-shuar pujuyayi, ni naari Tapitia. Tura nusha Kriaku chichamjaínkia Túrkas tuiniawai. Nu nuwasha nuí pujus tuke penċer túriniuyayi. Tura niisha nútiksaċ yaí wémiayi. ³⁷ Nu

tsawantinik Túrkas suñkuran jateemak jakamiayi. Túrunamtai ayashin nijjarar yakí tesaamunam áep-sarmiayi. ³⁸ Jupe péprusha Rítianmayá tǵijǵuch ámiayi. Júpenmayá Yus-shuar Rítianam Pítiur pujan nekaawar jimiara áishmanan akatrar akupkarmiayi, Júpenam wari winití tusar. ³⁹ Nuǵ tutai Pítiur niǵǵajǵ wémiayi. Tura támatai jaka tepemia nuǵ awayáwarmiayi. Nuǵ wayam-tai waje pujuarmia nu úutkiar Pítrun téntakarmiayi. Túrawar pushirǵn, Túrkas iwiaaku pujus najankamia nuna iniaktusarmiayi.

⁴⁰ Nuyañka Pítiur ǵǵ akupkarmiayi ashí. Tura niisha niñki tikishmar Yúsan áujsamiayi. Nuyasha nuwan jaka tepaan iis tímiayi “Tapitia nantaktia.” Tutai niisha íimi Pítiur wajaan wáiniak nantaki pujusmiayi. ⁴¹ Tura Pítrusha nuwan uwejnun achik awajkimiyai. Tura iniais Yus-shuar ármia nuna tura wajencha untsukar Túrkas iwiaaku ajasun iniaktusarmiayi. ⁴² Nu túrunamun ashí aents Jupe péprunmayá nekaawarmiayi. Túrawar untsurǵ aents Uunt Jesusan umirkarmiayi. ⁴³ Tura Pítruka Jupe péprunam untsurǵ tsawant nuapen-iwiarin Semuñka jeen pujusmiayi.

Pítiur Kurniriuǵajǵ

10 Sesaria péprunam Kurniriu naartin suntara kapitántrǵ pujumiayi. Ni suntarǵ Itiaria nunkanmayá ármiai. ² Nu kapitán Kurniriu ni shuarǵǵajǵ, Yuska nankaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksǵn kuítniasha takakchan yáǵntaj tusa Israer-shuaran súuyayi. Tura tuke tsawant Yúsan áujtiniuyayi. ³ Chíkich tsawantǵajǵ, nantu aǵnku ajasǵajǵ Kurniriu íimiarmiayi. Yusa suntarǵ Yus nayaimpinmayá akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarǵn ashamak íimia pujumiayi. Tura “ǵWarimpiait, Uunta?” tímiayi.

Tutai Yusa suntarǵ tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai” tímiayi. ⁵ Tura Yusa suntarǵ Kurniriu tuke chicharuk “Wats, áminiuram Júpenam akupkata. Semuñ, chíkich naarǵ Pítiur, tatí tusam akuptukta, tímiayi. ⁶ Nu Semuñsha chíkich Semuñǵajǵ pujawai. Nuka nuapen-iwiarin Semuñkaiti. Tura ni jeesha nayaantsanam ayaamach pujawai, tímiayi. Nuǵ jeawakmin, ame túratamna nuna Semuñ Pítiur turamtatui” tinia ikiukmiayi. ⁷ Tura Yusa suntarǵ waketkimtai, Kurniriuaka ni takarniurǵn jímiaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. ⁸ Kurniriuasha ni túrunamurǵn ashí ujáa-já awajas Jupe péprunam akupkarmiayi.

⁹ Kashin tsawantǵ Kurniriu suntarǵ Júpenam nuntumsarǵajǵ, tutupin ǵǵ Pítiur jeǵ yakí wáakunam Yúsan áujsatajtsa wakamiayi. ¹⁰ Pítrusha ti tsukamak yurumataj tusa wakerimiayi. Túrasha yurumkan iniarainǵajǵ Pítiur íkiajtiusmak, ¹¹ nayaimp uranmianum wanƵkaram tarachia áanin tura nuna tsakarǵn jǵñkiakman tárun wáinkiamiayi. ¹² Nu tarachnium yajasma irunmiayi. Wekainiusha, nanamtincha, tura napisha enƵkemiarmi-

ayi. ¹³ Tumǵajǵ Yus Pítrun chicharuk “Pítru, wajakim maam yuata” tímiayi.

¹⁴ Tutai Pítiur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka penƵké yúchaitji. Tuma asamtai júnaka wikia yuashtatjai” tímiayi.

¹⁵ Túrasha Pítrun atak Yus chicharuk “Wi, penƵkeraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha tarach ataksha nayaimpiniam wakamiayi. ¹⁷ Nuna túrunan wáiniak Pítiur wariniak áaniuncha wáinkiaj tusa enentáimia pujǵajǵ kapitán Kurniriu ayakma armia nu, anintruiniak jeawariayi. ¹⁸ Tura jeawar kakantar untsummiar “ǵSemuñ, Pítiur, juǵn pujá?” tiarmiayi.

¹⁹ Tura Pítruka íimiarmarǵn tuke enentáimia pujǵajǵ Yusa Wakanǵ chichaak “Menaintiu áishman untsurmainiayi, tímiayi. ²⁰ Wajakim akaikim arantutsuk au nemariarta, Wi akupkamu asamtai” tímiayi.

²¹ Nuna antuk Pítiur taramiayi. Tura áishmanan Kurniriu akupkamia nuna wajainian wáiniak “Wiitjai Pítiur. Átum eǵtrumna núitjai. ǵWarí tarintrum?” tímiayi.

²² Tutai niisha tiarmiayi “Iisha kapitán Kurniriu akupkamu taji. Kurniriuaka áishman penƵkeraiti. Yúsan enentáimtiniiai. Tura Israer-aencha nin shiir enentáimtuiniawai. Níiyǵ winiaji, tiarmiayi. Kame nuik, Yusa suntarǵ, nayaimpinmayá akupkamu, ii kapitántrǵn tímiayi “Pítrun untsukát akupkata. Nii tatí. Tura nii títiatna nu penƵker anturkata” tímiayi. Nuna ii kapitántrǵn takui iisha winiji” tiarmiayi.

²³ Tutai Pítiur jeǵ awayámiayi. Tura nu kashi nuǵ kanararmiayi.

Kashin tsawarar Pítiur niǵǵajǵ wearmiayi. Túrasha Júpenmayá Yus-shuarsha nin nemariarmiayi. ²⁴ Nuyá tsawarar Sesaria péprunam, Kurniriu nákamun jeariarmiayi. Kurniriuaka ni shuarǵn tura ni nekas amikrǵn, nekaatarum tusa untsuk ikiaankamiayi. ²⁵ Tura Pítrusha jeamtai Kurniriu ǵǵ jǵiintiuki Pítrun tikishmatramiayi. ²⁶ Túrasha Pítiur awajki tímiayi “Wajakta. Wisha aya áentsketjai. Ámea núnisketjai” tímiayi. ²⁷ Tura chichasar jeǵ wayáwarmiayi. Tura wayá, untsurǵ aents matsatun wáinkiamiayi. ²⁸ Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsǵajǵ pachiniarchatniuitrume, tura ni jeencha wayashtiniaitrume in jintintraamin tura-mainiayi, tímiayi. Túrasha Yuska ni enentáimsamurǵn wániaka paant iniaktursayi. Túmaitkiui wikia náñkamas áentsun yajauchiiti, tura auka wapikiyai, tíchamnaitjai, tímiayi. ²⁹ Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ǵUrukamtai untsurkamarum?” tímiayi.

³⁰ Tutai Kurniriu tímiayi “Kuatru tsawant nanƵkaamasǵajǵ tura nantusha jǵni ǵǵ, wikia yurumtsuk Yúsan áujsamjai, kǵjarǵ áujsatin ana nuna. Túran chichajǵ, áishman, ni entsatairǵ wincharpatniun, naka wajatran wáinkiamjai, tímiayi. ³¹ Niisha chichartak turutmiayi “Kurniriu, Yus ame áujman anturtamkayi. Tura shuar atsumainia yáǵmamna nunasha nekarmayi, turutmi-

ai, tímiayi. ³² Tuma asamtai, Jupe péprunam akatramuram akupkata. Semuñ Pítrun itiatí. Nu Semuñ Pítrusha, chíkich Semuñjají pujawai. Nuapen-iwiarin Semuñkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai" turutmiai, tímiayi. ³³ Túrutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha juj Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji" tímiayi Kurniriu.

Kurniriu jeen Pítiur etserkama nu

³⁴ Nuyá Pítiur chichaak "Ayu. Yus ímmianum ashí aents métekrak ániawai nekas nékajai, tímiayi. ³⁵ Antsu ashí nuñkanam náñkamas aents Yúsan umirak péñker tura nuna, Yus nú aentsun shiir enentáimtaiwai, tímiayi. ³⁶ Yuska shiir chichaman Israeraentsun akuptukmiayi. Nuñ chichaak "shuar Jesukrístu naarin páchiakka, Yusjají nawamnaikiatin átiniaiti, tímiayi. Nú Jesukrístu ashí shuara Úuntrjntí' tímiayi Yus. ³⁷ Túrasha Kariréa nuñkanam nañkamak ashí Israer nuñkanam túrunamia nu paant nékarme. Imiakratin Juañ imiaak etserak amukmia nú tsawantin nañkamamiayi. ³⁸ Tura juşa nékatsrumek, tímiayi. Nasarétnumiá Jesus, Yus Anaikiamu asa, Yusa Wakaní kakarmarijají péñker túriniuyayi. Iwianchruku wáitias pujuarmia nuna péñker awajsamiayi. Yus Niñ pujurma asa ashí nuna túriniuyayi. ³⁹ Tura Israer-aents matsatkamunam tura imia Jerusaréñ péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. ⁴⁰ Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaji, tímiayi. ⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achirmakmiaj nú áentstiniak wantinturmakmiaji, tímiayi. Au nekas jakamunmayá nantakmiatai iisha Niijjají tsaniñkiar yurumámji, tímiayi. ⁴² Tura Jesussha in akuptamkaitji. Jesuska "Wiitjai Yus Anaikiamun, tímiayi. Ashí áentsun, juka makuumawai, túrasha juka makuumatsui, Wiki títiniaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna títinian" tímiayi Jesus. Nusha átum werum ujatruktarum, Jesus turammaji, tímiayi. ⁴³ Ya shuarak Jesusa náarin pachia nú shuarnaka tunaarin tsañkurattawai, nuna ashí Yúsnan etserniusha yaunchu etseriarmiayi" tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujají, tura chikichcha antú pujuiniaji Yusa Wakaní tarurarmiayi. ⁴⁵ Tuma ásar añkant añkant chíkich chichamjají chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujají táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi ⁴⁷ Túmakui Pítiur chichaak "¿Yaki surimkiat ju aents imiantinian? Warí nincha ínia áintsañ Yusa

Wakaní tarurcharaik" tímiayi. ⁴⁸ Nuyá Pítiur, Jesukrístu náarin imiantiarum tusa akupkarmiayi. Tura nuyasha Pitrunka, niijjají ishichik tsawant pujustinian seawarmiayi.

Ni túrunamurin Pítiur ujakmiania nu

11 Israer-shuarchasha Yusa chichamen umirkarai táman Jesusa akatramurisha tura Jutíanmayá Yus-shuarsha antukarmiayi. ² Túmainiak Pítiur Jerusaréñnum jeamtai, Israer-shuar Yus-shuar ármia nu chichainiak ³ "¿Urukamtia Israer-aents ániachusha iyumam? ¿Tura aujají tsaniñkiar urukamtai yurumámum?" tiarmiayi.

⁴ Tutai Pítiur ashí yámankamtaiknumiá túrunamun ujakmiayi. ⁵ Chichaak tímiayi "Wikia Jupe péprunam pujumjai. Tura nuñ Yusan auju pujusan ímiarmajai. Tura wañkaram tarachia áanin kuatru tsakarín jinñkiakma, nayaimpinmayá táarun wáinkiamjai. Tura wi pujamunam jeartimiai, tímiayi. ⁶ Tura nuñ iyaj tukaman init yajasmañ, napincha, nanamtinniasa eñketainian wáinkiamjai, tímiayi. ⁷ Tura chichaman antukmajai "Pitru wajakim maam yuata" túrutun antukmajai, tímiayi. ⁸ Túrutkui "Atsá, Uunta, áanin wapiknaka, Israeraents yuatin surimkiamu ana núnaka tuke yúchaitjai" tímiyajai, tímiayi. ⁹ Atak nuyá túrutuk "Wi, péñkeraiti, tájana nu, ámeke, yajauchiiti, tiip" turutmiai, tímiayi. ¹⁰ Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. ¹¹ Nuñ túruna pujají menaintiú áishmañ Sesarianmayá akupkamu, winia eñtainiak wi pujamunam tarutiarmiayi, tímiayi. ¹² Tura nuñ Yusa Wakaní chichartak "Arantutsuk aujají wetá" túrutkui, wémajai. Tura juñ sais Yus-shuarjají wi wémajai. Túrunar ashinñkiar Kurniriu jeen wayamji, tímiayi. ¹³ Niisha chichaak "Jeñruñ Yusa suntariñ nayaimpinmayá taa wajan wáinkiamjai, tímiayi. Tura niisha chichartak "Jupe péprunam Semuñ Pítiur tatí tusam áishmañ akatram akupkata. ¹⁴ Pítrusha taa, itiu-rame sha tura áminiurmesha tunaarminiá uwempratam nuna turamtatui." Yusa suntariñ nuní turutmiai" tu ujatkamiayi Kurniriu' tímiayi.

¹⁵ 'Wi chichastasan júarají, Yusa Wakaní tarurarmiayi, yámankamtaik in tarutrampramijá nútiksañ, tímiayi. ¹⁶ Nuñkia Uunt Jesus timian enentáimpramjai. Niisha tíchamka "Juañ entsajajíñ imiakratmiayi. Tura antsu Yusa Wakaníñkia imiantinia áintsañ atumí enentáin eñkemprutmattarme." Nu timian enentáimpramjai, tímiayi. ¹⁷ Atumsha enentáimpratarum. Uunt Jesukrístu umirkamijá nuñ, incha Yuska ni Wakaníñ suramsamijá. Tura in suramsamijá núnisañ Yus nincha ni Wakaníñ súsarmiayi. Nuna tura asamtai, wikia, túrash-tiniiaiti, Yúsan títiniaitjai" tímiayi Pítiur.

¹⁸ Tura Pítiur taman antukar mitiat wáinkiar "Nekasaiti, Israer-shuarchan ni enentáin yapajíáwar-matai tuke iwiaaku átinian Yuska nin súsaruiti" tiarmiayi. Tusar Yusa náarin ti shiir awajsarmiayi.

Yus-Shuar Antiukía péprunam wearmiania nu

¹⁹ Estepañkan máawarmia nuĭ, chíkich Yus-shuar-nasha maatai tusar pataatiarmiayi. Túram chíkichkia pisarar Pinisia nuñkanam, Chipri nuñkanmasha, tura Antiukía péprunmasha wearmiayi. Tura nuĭ jeawar Yus-Chichaman chikichnaka ujatsuk aya Israer-aentsnak ujakarmiayi. ²⁰ Tura niijjaj Chipri nuñkanmayá pisararmia nu Serini nuñkanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramurĭn ujakarmiayi. ²¹ Tura Uunt Jesus ikiakárma ásar, nú nuñkanmayá aents ti untsurĭ yaunchu túrutairĭn iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusaréñnumiá Yus-shuar, ame iyutá tusar, Pirnapín Antiukíanam akupkarmiayi. ²³ Pirnapísha jeá, Yus nú shuaran uwemtikrarma nuna wáiniak warasmiayi. Pirnapísha péñker áishmañkauyayi. Yusa Wakanĭsha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tukenentáimjaj umirkarum Yus nemarsatarum.” Tu chicharak ikiukmiayi. Tura nuĭsha nú arant untsurĭ aents Yusaĭ kawenkararmiayi.

²⁵ Nuna turasua amik Pirnapí Tarsu péprunam wémiayi Sáurun wáinkiatat tusa. Tura wáiniak Antiukía péprunam jukimiayi. ²⁶ Tura nuĭ jeawar, nú péprunmayá Yus-shuarjaj iruntrar chikichík uwí pujusarmiayi. Yus-Chichaman untsurĭ shuáran ujaak pujuararmiayi. Tura nuĭ Antiukía péprunmanka Yus-shuaran émkaka, Kristu shuarĭ, tiarmiayi. ²⁷ Nuyá Yusnan etserin Jerusaréñnumiá táarmiayi Antiukíanam. ²⁸ Túmainiáj chikichík etserin, ni naarĭ Akaapu, Yus-shuar matsatmanum ajapén wajaki chichasmiayi. Tura Yusa Wakanĭ nekatairĭjjaj chichaak “Ti tsuka ashí núñkanam átatuĭ” tímiayi. Tuma asamtai Antiukíanmayá Yus-shuar chichainiak “Jutía nuñkanmayá Yus-shuar ainia nu yáintai” tiarmiayi. Ankant ankant ni wakeriarmia núnik súsarmiayi. Tura nú kuítinasha Jutíanmayá Yus-shuara úuntrĭn akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu pujaj.

Pitrun sepunam enkeawarmiania nu

12 Nu tsawantaj akupin Erutis Yus-shuaran máataj tusa chichaman jurus áentsrĭn ishiakmiayi. ² Tura Juanka yachĭn Jakupun suen tsupirkar máawarmiai. ³ Nuna tura máawarmatai Israer-aents wáinkiar “juka péñkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Nuna ka wakapruachu tanta yuatin nampertin túrawarmiayi. ⁴ Pítruncha achik itiar matai, Erutis sepunam enkeata tusa akupkamiayi. Tura sepunam suntarsha ankant ankant, kuaru kuaru, ashikia tiasisáis (16) irunar Pitrun téntakarmiayi. Tura, ju jísat nañkaasmatai, mantamnatí tusan jĭiktatĭjai aents iruntramunam, tu enentáimsamiayi Erutis. ⁵ Túramu asa Pítruka

sepunam pujumiayi. Tura suntarsha mijjatruitsuk iijarmiayi. Túramunak Yus-shuarka, Pítrun yáinkiat tusar iniaitsuk Yúsan ti áujiarmiayi.

Yusa suntarĭ Pitrun uwemtikramiania nu

⁶ Wats, Erutis, kashin jĭiktaijai takui, nú kashi Pítruka jimiará suntar wajamunam etema tepes kanarmiayi. Tura jimiará jirujaj ĭñkiamuyayi. Tura chíkich suntarka jĭinmanum ii wajarmiayi. ⁷ Tumaj aya aneachma Yusa suntarĭ nayaimpinmayá taa ajapén wajasmiayi. Túrunamtai jeanmanka tsápin ajasmiayi. Tura Yusa suntarĭsha Pítrun páenum antiñ ishintiarmiayi. Tura jirusha Pítru uweyéya sayat atiniarmiayi. ⁸ Tura Yusa suntarĭ tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi. ⁹ Tutai Pítiur nemarsamiayi. Túrasha Pítruka, mesekranmaapi júniaya, tu enentáimsamiayi. ¹⁰ Túrasha emka suntar íimia wajan nañkaikiarmiayi. Tura nuyasha chíkich suntar íimia wajan nunasha nañkaikiarmiayi. Tura nuyasha jĭintiainium jiru waiti ámanum jeawarmatai, nú wáitisha ímia-niñki kuat uranmiayi. Túrunamtai jĭinkiararmiayi. Tura jintiá ishichik wésan, Yusa suntarĭ Pítrun níniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntarĭn nekas akupturkayi. Erutis mantuataj tusan pujurtana nuyá Yusa suntarĭ winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tímiayi. ¹² Nuna tu enentáimias nekáa, Marí jeen wémiayi. Nú Marisha Juan Márkusan nukurĭyayi. Nú jeanam untsurĭ aents irunar Yúsan auju matsatainiáj Pítiur jeamiayi. ¹³ Tura jeá aa wáitin tuntuimiayi, wayataj tusa. Túmakui nuwá uchich, ni naarĭ Ruti, yákit tusa iyumiayi. ¹⁴ Tura jeari, Pítru chichamen anturak ti shiir enentáimsamiayi. Túmak wáitin urattsuk ikiuki, init matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsmek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakanĭ túrat-suash” tiarmiayi.

¹⁶ Tu chichainiain Pítruka tuke tuntuí wajamiayi. Tura wáitin uraj tukamá Pítrun wáinkiar ashankarmiayi.

¹⁷ Ashamak chichainiakui Pítiur, uweje takuí itiatmamtikiarmiayi. Tura nuyá Uunt Yus sepunmayan uwemtikramun ujakmiayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna tĭ ini-ais jĭinki arant wémiayi.

¹⁸ Kashin tsawar suntarsha Pítrun atsá wáinkiar “Chuwa urukakua menkaka. Áyawa urukattajia” tiarmiayi. Pítiur túrunamun nékachu ásar nuna tiarmiayi.

¹⁹ Túrunamtai Erutis chichaak Pítiur eaktarum tusa akupkarmiayi, túrasha wáinkiacharmiai. Túrunamtai Erutis suntaran untsukar, Pítrun ísarmia nuna anisarmiayi “¿Pítiur itiura menkakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmayá tura Setúnmayá áentsjajsha ne-masnaikiarmiayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmayá aents Tirunmayá áentsjaj Erutisa nunkeyan yurumkan súmainia ásar, Erutisjaj nawamnaikiatniun wakeriarmiayi. Tuma asamtai métekrak enentáimsar, Erutisa takarniurj penkerj, ni naari Parastu, niijjaj emka amikmawar nuyá Erutisan weriar shiir matsamsatniun seawarmiayi. ²¹ Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanank áujmatmiayi. ²² Nuĵ pujus chichaakui aents unsumainiak tiarmiayi “Ĵu chichaa pujana ĵuka áenchaiti. Antsu nekaska yúsaiti” tiarmiayi. ²³ Tumaj nuyajk Yusa suntariĵ nayaimpinmayá tarĵ Erutisan jaa awajsamiai. Tuma asamtai nusha aka yuam jakamiayi. Erutissha Yusan waantu awajtsuk niĵki waantu enentáimtuma asa túruna jakamiayi. ²⁴ Túrunamtaisha Yusa chichamenka nú arant pampanki wémiayi. Túmakĵ ashĵ núĵkanam anturamiayi. ²⁵ Tura Pirnapĵsha Sáurusha ni takatrĵn amukar Jerusarénumĵ Antiukĵanam waketaĵniak Juan Márkusĵan júkiarmiayi.

Yus-Shuar Pirnapĵncha Sáuruncha Yus-Chichaman etserkarat tusar akupkarmiania nu

13 Antiukĵanmayá Yus-shuarĵnum Yusnan etserin páchitra ármiayi. Nútiksanĵ Yus-Chichaman ĵintiniurĵsha ármiayi. Pirnapĵsha tura Mukusa Semuĵsha, nuyá chíkich, Serinianmayá Rúsiusha tura akupin Erutisa tsakatkeĵsha, ni naari Manaen, Sáurusha tími-anu ármiayi. ² Tura chíkich tsawantajĵ niisha yurumtsuk Yúsĵan áujeak puĵuiniĵ Yusa Wakanĵ tímiayi “Pirnapĵsha, Sáurusha akanturkitiarum, tímiayi. Wi takatan súsaitĵiana nuna takasarat tusarum túratarum” tímiayi. ³ Tutai ĵiĵarma Yusan aujsua amikiar, shiir wetarum tusar ni uweĵen Sáurun Pirnapĵncha awantkarmiayi. Túrawar Antiukĵanmayá akupkarmiayi.

Chipri nunkanam jeawarmiayi

⁴ Tura nuyanka Yusa Wakanĵ akupkam Pirnapĵsha Sáurusha ĵiĵinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi. ⁵ Juanĵsha yáĵntaj tusa némarkauyayi. Nuĵ Saraminia péprunam jeawar Israer-shuar iruntai jeanam wayawar Yus-Chichaman etseriarmiayi. ⁶ Tura Chipri nunkanam pepru ainia nuĵ wáĵrkutak Papis péprunam jeawarmiayi. Nuĵ jeawar Israer-aents uwishin ni naari Parjesúsĵan wáinkiararmiayi. Ni chíkich náarĵnkia Erimiasauyayi. Niisha uwishniuitiat, Yúsĵan étserējaj, tíniuyayi. ⁷ Akupin Serĵiu Páurujajĵ pujuyayi. Nu akupniusha ti péĵker enentáimniuyayi. Tura Pirnapĵn Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsuk-

miayi. ⁸ Tura uwishin Erimias nuna nakitiak “Auka péĵkerchaiti” tímiayi. Akupniusha Yúsĵan umirkajĵn tusa nuna tímiayi. ⁹ Nuyanka Sauru, ni chíkich naari Papru, Yusa Wakanĵ pimiutkamu asa, nu uwishniun úmamkemmas iis tímiayi ¹⁰ “Ámeke wáitaitme. Anankartinaitme. Yajauchiitme. Maaj, iwianchiitme. Tura ashĵ péĵker ana nuka imiá nakitniuitme. Tsej, ĵurukamtai Yusa ĵintĵ naka ana nu emeskim weam? ¹¹ Paiĵ, yamaikia Uunt Yus asutiámattawai. Yamaikia amesha ĵiĵimi kusurmatai untsurĵ tsawant tsáapnin penké íischattame” tímiayi. Tura nú chichamaik ĵiĵi kusurmatai kirit íimiuk chikichan eamiayi enkeki jurukit tusa. ¹² Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukĵanam etserkarmiania nu

¹³ Nuyá Juan wakетки Jerusarénum wémiayi. Tura antsu Pápruka ni tsaniakmarĵiĵaj kanunam enkemprar Pápus péprunka ikiukiar Pirĵi péprunam jeawarmiayi. Nusha amaini Pampiria nunkanam pujawai. ¹⁴ Nuyá Pirĵi péprun nanĵkaikiar Antiukĵa péprunam jeawarmiayi. Nú Antiukĵasha Pisitia nunkanam pujawai. Nuĵ jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi. ¹⁵ Tura nuĵ Yus-Papinium yaunchu áarman áujas aminkiamtai, Israer-shuar iruntai jeanam íirniurĵ Páprun tiarmiayi “Yatsuru, ĵintĵiatin chicham takakkurmeke yamaik titiarum. Antukarmi” tiarmiayi. ¹⁶ Tutai Papru wajaki uweĵe takuimiayi. Tura chichaak “Israer-shuartiram, tura Yúsĵan umirkataj tusa wakerarmena nu antuktarum, tímiayi. ¹⁷ Ii Yusrĵi ii yaunchu uuntrĵn Israer-shuartin achikmiayi. Tura niisha írara núnik Eĵiptunam matsataĵniĵ Yuska nin páchiniak uunt awajsararmiayi. Yus ni kakarmarĵiĵaj nú nunkanmayá ii yaunchu uuntrĵn uwemtikrarmiayi. ¹⁸ Túrasa atsamu nunkanam ii uuntrĵn kuarenta (40) uwitin Yuska aya kátsuntramiayi. ¹⁹ Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úuntrĵn susataj tusa Yus túramiayi. ²⁰ Nuyanka ii uuntrĵ akupniurĵn, ĵiĵis tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru síĵntu senkuenta (450) uwĵ ejemiayi. Samuersha Yúsĵan etserin náamtsáĵn nuna túrimiayi Yus. ²¹ Tura nuyanka áencha ĵiĵisan nakitiainiak, uunt akupin náamkat tusar Yúsĵan seawarmiayi. Tuĵniakui Yuska Sesa uchirĵn Saúran anaikiamiayi. Nú Saúra úuntrĵnkia Piĵjamĵnkia-ayuyayi. Tura Saúrsha kuarenta (40) uwĵ nú áentsun akupkat tusa Yus tsanĵkatkamiayi. ²² Tura Saúr náamkan ataksha Yus awainĵkimiayi. Tura nuyá iiksan nú nunkanam uunt akupin atĵ tusa Tawitian anaikiamiayi. Tura Yuska ĵuna Tawitnian tímiayi “Isaĵ uchirĵn Tawitian winia enentáir jeamtai achirmakĵai. Tura Winia umirtin átatui” tímiayi. ²³ Wats, Tawit weeanmayá Jesusaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarĵn uminkiat tusa. ²⁴ Jesuska táatsáĵn Juan ashĵ Israer-shuaran tunaarĵniĵ enentáimtumar imiantinian uĵak-

miayi. ²⁵ Tura Juansha ni jákatniurj jeatemamtai, chichaak “Átum enentáimtarmenta núchaitjai. Wikia Yusa anaikiamurj, Kristu tutai, nákarmenta núchaitjai. Antsu Niñkia winia ukunmaruj winittiawai. Tura Niisha wjjañkia ti nankaamantu asamtai wikia sapatrincha atitrataj tíchamniaitjai” tímiayi.’

²⁶ ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íiniuiti, tímiayi. ²⁷ Iis, Jesusa túrunatniurjn Yuska yaunchu ni etserniurjn áamtikrachmakia. Tura ukunam Jerusaréñnumiá shuar ni akupniurjijai tuke sáwartin nuna áujeatskesha penké nekaacharmiayi. Tuma ásar Jesuska Yusa Uchir-ñnti tícharmiayi. Tura, jakatí, tiarmia nuj, Jesusa túrunatniurjn, Yus yaunchu chichakmia nuna, tímia-trusarañ umikiarmiayi, tímiayi. ²⁸ Jesuska penké tunaamkachunak yamaikia mantamnatí tusar Piratun seawarmiayi, tímiayi. ²⁹ Tura Yusa Papirijn ashí Jesusnan tímia nuna tímiannak umikiarmiayi. Tura nuyá krúsnumiá itiaru iwiarsarmiayi. ³⁰ Túramunak Yus jakamunmayaan iniantkimiayi. ³¹ Jesuska jakamunmaya nantaki, yaunchu Kariréanmaya Jerusaréñnum Nijjai irutka wéarmia nuna núkap tsawantin pujus wanti-ntiukmiayi. Nú shuaraiti yamaikia Jesusa túrunamurjn etserainia nu’ tímiayi.

³² ‘Iisha núnisrik shiir chichaman Yus yaunchu ii apachrjn tiarmia nu étsereaji. ³³ Iisha Israer-weeá asakrin, Yuska Jesusan iniantkimia nujai ii apachrjn anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

³⁴ Tura Yuska Jesusa nantakmiarjn jintintiak, tura ni ayashj káurchatniun jintintiak, chíkich Sarmu papinium juna áamtikramiayi:

“Nekas péñkeran Tawitian anajmatramaj nuna atumin amastatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashj káurtincha tsankatkashtatme.”

³⁶ ‘Nekaatarum, yatsurtiram, Yuska Tawitia ayashjn tíchamiayi nuna. Tawitkia Yus tímian amuk jakamiayi. Túrasha ni ayashñkia káurmiayi. ³⁷ Tura antsu Yus iniantkimia nuna ayashñkia penké káurchamiayi. ³⁸ Tuma asamtai, yatsurtiram nekaatarum. Jesusjainkete tunáa asakártin. ³⁹ Tura Muisais yaunchu akupkamia nujai tunáa tsañkurnarchamnia nu, yamaikia Jesusjai tsañkurnartiniaiti. ⁴⁰ Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum pujarmena nuj, aents túrachminian túratajna nusha penkesh nekaashtatrumé, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawajirum, Yusnan etserin aarma tana nútiksañ.” Nuna chichaak amukmiayi Papru.

⁴² Tura nuyá Papru Pirnapíjijai jiinki wéenakui aents chichainiak “Chíkich sáwartincha jútikarmek etserkatarum” tiarmiayi. ⁴³ Tura nuyá iruntsua tseñ-keenak Israer-shuarsha, tura chíkichkia Israer ajararusha, Yúsán umirkatajtsa wakermia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairj enentáimtusum kakartarum” tiarmiayi.

⁴⁴ Tura chíkich sáwartincha nu péprunmaya ti untsurj aents Yus-Chicham antuktai tusar tjakarmiayi. ⁴⁵ Tura Israer-shuarka ti untsurj áentsun tjakarun wáinkiar, suir iiniak, ti kajerarmiayi. Tuma asamtai Páprun katsekkar “Ju chichaana juka ántar tawai” tiarmiayi. ⁴⁶ Tá-maitiat Pápruka Pirnapíjijai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnum tuke iwiaaku pujushamnia ajarurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi. ⁴⁷ Nu túratarum tusa, Uunt Yus akup-tamtujik. Jes, ni Papirijn juna tawai:

“Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi. ⁴⁸ Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajararmiayi. ⁴⁹ Tú tumakj Yus-Chicham nú nunkanam ashí jamarmiayi. ⁵⁰ Túrasha nuwan, Yúsán péñker enentáimtuinian tura péñker wekainian, Israer-shuarka yajauch enentáimtikrarmiayi. Áishman penkerj armia nunasha, yajauch enentáimtikrarmiayi. Túram Páprun Pirnapíncha katsekkar, chichaman iruntur najatawarmiayi. Tú-turukiar ni nunkeya jiki awe-marmiayi. ⁵¹ Túram Papru Pirnapíjijai, ju aentska yajauchiiti tusar, wéenak naweyan nunkan akakekiar ikuiarmiayi. Túrawar Ikiuniu péprunam wearmiayi. ⁵² Yusa Wakanísha pimiútkamu ásar Yus-shuarka ti warasarmiayi.

Ikiuniu Péprunam túrunamia nu

14 Ikiuniu péprunam Papru Pirnapíjijai jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurj Israer-shuar armia nu, Israer-shuarcha armia nusha Yúsán umirkarmiayi. ² Tura chíkich Israer-shuar, Yúsán umirkacharu armia nu, Yus-shuarcha kajerkarat tusar Israer-shuarcha yajauch enentáimtikrarmiayi. ³ Tuma asamtai Papru Pirnapíjijai nú nunkanam ti nukap tsawant pujusarmiayi. Tura Uunt Yúsán enentáimtuinia ásar, arantutsuk Yusa waitnenkratairjn etserkarmiayi. Tura, etserinia nu winia kakarmarjainti tusa, Yuska aents túrachminian najanmamtekiawarmiayi. ⁴ Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurj tuinia nu nekasaiti, tiarmiayi. ⁵ Tura nuyá Israer-shuarchajai Israer-shuarka chichasar pepu uuntrijjai chichasarmiayi. Tura Pa-

pru Pirnapíjiaí katsekkar tura kayajaí tukurar, yajauch awajsatniun nanċkamawarmiayi. ⁶ Túrasha Papru Pirnapíjiaí nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunċanam pujuiniawai. ⁷ Tura Yus-Chichaman etserkarmiayi.

Ristra péprunam Páprun kayajaí tukurarmiania nu

⁸ Ristra péprunam tunamaru áishmañ pujumiayi. Ni akiiniamuriya tuke wekaichauyayi. ⁹ Nú áishmañ Papru chichaamun antúu pujumiayi. Túman Papru úmamke-mas nin íismiayi. Niisha, Yusa kakarmaríjiaí tsuamar-tatjai, tu enentáimiuñ Papru nekaamiayi. ¹⁰ Tura Pápruka kakantar chicharuk “Wajakim wewe ajasam wajasta” tímiayi. Tutai áishmañ wiut kutsuār wajari wekaimiayi. ¹¹ Papru túramia nuna aents wáinkiar Rikiaunia chichamjaí untsumainiak “Yuska áishmañka áanin ajasaru in tarutramarji” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátrirí kukujiñ iwiarkamun, wáakajaí itiamiayi. Tura niisha ni áentsrijaí wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴ Tura Jesusa akatramurí Pirnapísha Páprusha nuna nekaawar, auka nakitaji tusar, ni pushirín jaararmiayi. Túrawar aents írúnmanum pachiniawarmiayi. ¹⁵ Tura tiarmiayi “Shuara, ċurukamtaí áitkiarum? Iisha yúschaitji. Atumea áankiitji, tiarmiayi. Penċé ánrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunċan-cha, nayaantsanċa, tura ashí nuí írúnna nunasha najanaiti, tiarmiayi. ¹⁶ Jes, aents ni enentáimmaríjiaíñ wekasarat tusa Yuska yaunchu tsanċkatkamiayi. ¹⁷ Tuma aiñ shuaran péñker awajsamujaí Wiitjai Nekas Yus tusa paant awajmamsamiayi. Kame yumi yutuktinian nayaimpinmaya akupturmaji. Tura ejemamar warasarmí tusa yurumak nerektinniasha súrarmji” tímiayi.

¹⁸ Túrasha Pápruka tímianu támaitiat, nuna anturt-suk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajaí tukurarmiayi. Tura jakayi tiar péprunmaya japi-ki júkiar arant áepsarmiayi. ²⁰ Túrasha Yus-shuar Páprun tariar téntakarmiayi. Túram nuñkia Papru wajari wé ataksha péprunam wayamiayi. Tura kashin tsawarar Papru Pirnapíjiaí Tirpi péprunam wearmiayi.

²¹ Tírpiniun pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. ²² Wake-tainiak “ashí Yus tana nu tímiatrusrumek tuke umirkatarum” tuñiak Yus-shuaran ikiakáramiayi. Tura nin tiarmiayi, “Yusa akupeamuriñ pachiinkiataj

tákurkia ti wáitsatniuitji.” ²³ Tura Yus-shuar írúnmanum Yus-shuaran wáinniun anaikiarmiayi. Yurumtsuk Yúsan áujsar chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmania nú Antiukíanam waketkiarmiayi

²⁴ Nuyá Pisitia nunċanam nanċkaamakiar Pampiria nunċanam jeawarmiayi. ²⁵ Nuí jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nuí kanunam enċemprar, yaunchu jíinkiarmania nú Antiukía péprunam waketkiarmiayi. Páprusha Pirnapísha tuke jíintsajín nú Antiukíanmaya Yus-shuar chichainiak, Yusa takatrí túrattarmena nuna Yus waitnentramak yáinmakarti, tiar akupkarmiayi nuiki. ²⁷ Nú Antiukíanam jeawar, Yus-shuaran irurar, ashí Yus nin yáinċiarmania nuna ujakarmiayi. Tura nútik-sañ Israer-shuarchan Uunt Yus uwemtikrataj tusa untsukmia nunasha ujakarmiayi. ²⁸ Tura nuyá Yus-shuarjaí Papru Pirnapíjiaí núkap tsawant pujusarmiayi.

Jerusaréñnum Yus-shuara úntríjiaí iruntrarmiania nu

15 Nu tsawantin áishmañ Israer nunċanmaya wear, Antiukíanam jeawar Yus-shuaran jintintinainiak “Muisais tímia nútiksarmek tsupirnaktin ana nu túrachkurmeka uwemprashtatrume” tiarmiayi. ² Tuma asamtai Papru Pirnapíjiaí, núchaiti tusar, nú áishmañ-jaí ti kakaram chicharnaikiarmiayi. Túrasha nuu enentáiniak enentáimsatniun tujinkiarmaniayi. Tuma asamtai Antiukíanmaya Yus-shuar Páprun Pirnapíncha, atumsha chíkích áentsjaí Jerusaréñnum wétarum tusar akupkarmiayi. “Tura nuí Jesusa akatramurísha Yus-shuaran wáinniusha iniasrum itiuarmainkit tusarum péñker nekaatarum” tiarmiayi. ³ Papru Pirnapísha akupkamu ásar wéenak Pinisia nunċanam, Samaria nunċanmasha nanċkaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusaréñnum jeawarmatai Jesusa akatramurísha Yus-shuara wáinniurísha tura penċé Yus-shuarsha itiwarmiayi. Tura niisha túrunamia nuna mash etserkarmiayi. ⁵ Túrasha Pariséu aenċa, Yus-shuar ajasarmiania nu, wajari chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuar-chasha umirkatin áiniawai” tiarmiayi. ⁶ Nuyasha Jesusa akatramurísha Yus-shuaran wáinniusha nu chichaman nekaatai tusar iruntrarmiayi. ⁷ Chichasua umikiarmatai Pítur wajari tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. ⁸ Tura Yus Niñki ashí aentsu enentáin neka asa, Wíi shuar ajasmin áiniawai tusa, ni Wakanín Israer-shuarchanċa susamiayi, in suramsamij nútiksañ. ⁹ Yus inċa aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtu-iniakui, Yuska enentáiyañ ni tunaarín japirarmai, tímiayi. ¹⁰ Tura iikia nékaji niya áantsarik Jesukrístu wait-

nenkartutairijjaj uwempraitji. Nuñkia ¿urukamtia Yus uwempraru áiniawai tajsha, átum Muisais yaunchu akupkama nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsanchakait. Warí, ii úntrjsha tura iisha ashí Muisais tímia nu umiktin tujinkiamji. Tuma asamtai, ¿urukamtai nú káarkasha Israer-shuarchasha áentskatin wakerarum?" tímiayi Pítiur.

¹² Pítiur nuna tutai Pirnapísha Páprusha chichainiak, "Israer-shuarchasha ni kakarmarín nekaawarat tusa aentsti túrachminian túratniun Yuska ti yáinmakmají" tú ujuam mitiat wáinkiar antúu pujuarmiayi. ¹³ Nuna ujasua amikmatai, Jakupusha tímiayi "Yatsurú, antuktarum. ¹⁴ Nuik túrachman Yus túramia nuna ii yachi Semuñ Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti" tímiayi. ¹⁵ Jusha Yúsnan etserin yaunchu áarmia nu tímiatrusañ túrunayi. Júiti aarma:

¹⁶ "Israer-aents meserar, jeə sáanakniua áintsañ áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nuñkanmayə aents, Israer-shuarcha ainia nu, winia náarun pachinia nu, Winia eətkarat tusan túrattajai. ¹⁸ Uunt Yus nuna yaunchu ujakmiayi." Tu áarmaiti' tímiayi.

¹⁹ "Tuma asamtai, yatsurtiram, wi tájarne: Israer-shuarcha Yus-shuar ajasaru áiniana nu, imiatik awajrsachmi. ²⁰ Imiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarín jintintiainiatsuk. Tuma asamtai, áyatik áatratai ju "Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap." Tu áatratai' tímiayi Jakupu.

²² Nuyá Jesusa akatramurjsha Yus-shuaran wáiniusha nuyá ashí Yus-shuaraim enentáimsarmiayi. "Papru Pirnapíjjaj wéakui, shuar niijjaj nenakar Antiukíanam akupkatai" tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áarmiayi. ²³ Tura niijjaj ju papin áarman akupkarmiayi:

"Iisha Jesusa akatramurj tura Yus-shuara wainniurj tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejjainchu atumiin jeartamarai. Túrawar, tsupirnaktin ana nu, tura ashí Muisais akupkama nu túratarum, turamiarne. Nunasha ni chichamejjain turamarmayi. Nu chicham atumsha antukrum nushá enentáimprarum "entá nuyanka iturkatjik" tárume. ²⁵ Tuma asamtai nu nekaar, iisha métekrak enentáimsar, jimiara áishman akupkatin anaikiamji. Ju áishman ii aneamu yachj Páprujaj Pirnapíjjajsha atumin íirmasarat tusar akupeaji. ²⁶ Papru tura Pirnapísha ii Uuntrj Jesukrístunam surumakarmiayi, ni takatrjsha tsuumai aijn túrami tusar. ²⁷ Niijjaj Jútassha tura Sérassha akupeaji. Ii chichaajnia nuna niisha ni wengejjaj atumin ujatmakar-

tatui. ²⁸ Kame túratin asamtai iisha Yusa Wakaníjjaj ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíkichkia nú nankaamas tíchattaji. Tura antsu nu iniaisarmeka, penker áatrume. Ayu, Yus wáitmakarti." Tu áarman akupkarmiayi.

³⁰ Tura Antiukíanam akupkam wearmiayi. Nuñ jeawar Yus-shuaran irurar, papin súsarmiayi. ³¹ Tura Antiukíanmayə Yus-shuarsha nu papin áujsar, penker jintíam chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintinawar, Yus-shuaran ikiakáarmiai. ³³ Tura nuñ ishichik tsawant pujusarmatai, Yus-shuarka, penker waketti-tiarum, tiar akupkarmiayi. ³⁴ Tura Séras juáktinian wakerukmiayi. ³⁵ Páprusha Pirnapíjjaj juakarmiayi Antiukíanam. Niisha chíkich aentsjaj Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín "Ashí péprunam iisha Yus-Chicham etserkamaj nuñ Yusaj ii yachj ainia nusha urukák pujuinia iyutai" tímiayi.

³⁷ Pirnapíkie Juan Márkusan iijjaj winiti tusa wakerimiai. ³⁸ Tura Pampiria nuñkanam Juan Márkussha niisháa weu asamtai tura Yusa takatrj iniaisa asamtai, Pápruka ayatniun nakitramiai. ³⁹ Papru Pirnapíjjaj ti kakannairar kanakarmiayi. Tura Pirnapíkie Márkusan ayaki Chípriniam wémiayi. ⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi. ⁴¹ Tura Siria nuñkanmaani wekaráktak, Yus-shuaran ikiakárkutak Sirisianam jeamiayi.

Páprusha Sérasjaj Timiutéun júkiarmiania nu

16 Papru Sérasjaj Tirpi pepru íirkutak Ristra péprunam jeawarmiayi. Tura nuñ Rístranam Yus-shuaran wáinkiarmai, ni naarj Timiutéu. Ni nukuríñkia Israer-shuar Yus-shuarauyayi. Tura ni aparíñkia Kriaku áentsuyayi. ² Tura Ristra péprunmayə Ikiuniu péprunmayasha Yus-shuar áarmia nu, Timiutéu penker wekaawai, tiarmiayi. ³ Kame Pápruka Timiutéun uyuuntusat tusa wakera asa, Timiutéu aparj Kriaku-apachin nekaawarmatai Israer-shuar nuñ pujuarmia nu yajauch enentáimprarajin tusa tsupirmamtikiamiayi. ⁴ Tura nuyá Papru Timiutéujaj ashí péprunam nuñ sétur nuñ sétur wéenak Jesusa akatramurjsha Yus-shuaran wáiniusha Jerusarénnum nuik jintintian umiktarum tusa ujarkutak wearmiayi. ⁵ Tu ujamu ásar Yus-shuar nú arant Yúsan enentáimturar kakarmiai. Tura ashí tsawant kawenki wearmiayi.

Papru iimiarmia nu

⁶ Tura Yusa Wakaníkie Páprun Yus-Chichaman Asia nuñkanam ujaktinian tsanatkachmiayi. Tuma asamtai Pirijia nuñkanam tura Karasea nuñkanam airkutak, ⁷ Misia nuñka jeatniunam jeawarmiayi. Túrunawar "Pi-

tinia nuṅkanam wetai" tiarmiayi. Túrasha Yusa Wakaní nuṅsha wétinian suritkiarmiayi. ⁸ Tuma asamtai Misia nuṅkanam menantki Truas péprunam pachiniawarmiayi. ⁹ Nuṅ jeawar Papru kashi iimiarmiayi. Masetúnia nuṅkanmaya áishmaṅkan wajan wáinmiayi. Nu áishmaṅ Páprun chicharuk "Winitritia. Yáinṅtkiamnium" tímiayi. ¹⁰ Nuyṅka tu iimiarmatai, wisha Páprujai wetai tusar iwiarnarmiaji. Tura Yus incha nú nuṅkanam ni chichameṅ etserkat tusa ti nekas untsurmakrin wéaji, tímiayi.

Jiripius Péprunam túrunamia nu

¹¹ Tura nuyṅka kanunam eṅkemprar Truas péprunmaya jíinkir Samutrásia nuṅkanam jeamiaji. Tura kashin tsawar nuyṅka katjarar Niápuris péprunam jeamiaji. ¹² Tura Niápurisnumiá náwek Jiripiusnum jeamiaji. Nuṅ Jiripius péprunmanka Rúmanmaya aents matsamsa ármiayi. Tura nú péprusha Masetúnia nuṅkanam nekas uunt pepruyayi. Tura nuṅsha seturmaji. ¹³ Nuyá sáwartin tsawarmatai pepru ikiukir entsá supichik wémiayi. Yus áujsatniun iruntrarmia nuṅ pujusar, nuwá iruntrarmia nu Yus-Chicham ujakarmiaji. ¹⁴ Nuṅ Tiatira péprunmaya nuwá, ni naarj Ritia wáinkiamiaji. Niisha tarach yamakain péṅkeran súrinuiyayi. Yúsnasha shiir awajniuyayi. Yus-Chichaman Papru etserkamia nuna niisha péṅker anturkamiaji. Túman, Uunt Yus Papru chichaamun umirkat tusa ni enentáin takasmiaji. ¹⁵ Túruna nú nuwá níiniurijjai imianmiayi. Tura nuyasha chichaak "Yus-shuar nekas ajasai túrutkurmeka winia jearuṅ winitiarum" tímiayi. Tura nuṅ jawakrin setumtikrampramiaji.

¹⁶ Tura nuyá ukunam Yus aujsatai tusar wekaamar nuwách nekaamin-iwianch eṅkemtuamu inṅkiumkamiaji. Nu nuwáchikia misatkauyayi. Niisha nékamkui nérenniurisha ti kuitriniawarmiayi. ¹⁷ Tura nú nuwách incha Pápruncha pataaturmamiayi. Tura kakantar untsumuk "Jṅ áishmaṅsha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme" tímiayi. ¹⁸ Tura nú nuwáchisha ti núkap tsawant tu wekaimiaji. Titmakui, Papru ayanmar iwianchin chicharuk "Jesukristu naarijjai tájame: jíinkitiá ni enentáiyá" tímiayi. Tutai íwianchkia nú chichamaik jíinkimiayi.

¹⁹ Tura nuwáchi nérenniurisha, íwianch jíiki awematniun nekaawar, Páprun Sérasnasha kajerak achikar pepru uuntri ísarat tusar ajapén júkiarmiayi. ²⁰ Tura pepru úuntriin ejeniar tiarmiayi "Jṅ áishmaṅ Israer-shuar áiniawai. Tura in páchim enentáimtikramainiaji. ²¹ Tura iisha Rúmanmaya aents árin, ii túrachminian, iikia asumprachman jintintramainiaji" tiarmiayi. ²² Tura nuyṅka ashí aents Páprun Sérasnasha kajerkarmiayi. Túramtai pepru uuntri chichainiak "Pushirí áitkiarum numijjai asutiátarum" tiarmiayi. ²³ Tura nuyá ti asutsua amikar sepunam eṅkeawarmiayi. Tura sepú-iinian chicharuk "Ti péṅker iistá pisararain" tiarmiayi. ²⁴ Nu chichaman antuk, sepú-iin ti init awayámiayi, tura nawen numi najanamujai tee chanuntamiayi. Tú tura ikiukmiayi. ²⁵ Tura kashi ajapén Papru Sérasjai Yusan

ájainiak kantampriarmiayi. Tura chíkich eṅkeamusha nuna antúu pujuarmiayi. ²⁶ Tu pujuiniái aya aneachma ti kakantar uṅrkamiayi. Tura sepusha muchitramiaji. Túrunamtai sepú wáitirisha ashí urantrarmiayi. Tura aents jirujai eṅkekar jinṅkiamusha mash atiniakarmiayi. ²⁷ Túrunamtai sepú-iin shintiarmiayi. Tura wáitisha mash uranar aan wáiniak, eṅkeamusha jíiniar shiákchariash tusa ni puniariniak ukuiniak máamattsa pujumiayi. ²⁸ Tura Papru untsuak "Amek yajauch awajmamsaip. Ashí pujuiniaji" tímiayi.

²⁹ Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuraṅki jearmiayi. ³⁰ Tura áá jíiki aniasmiaji "Uunta, ¿warí ititurkattaj uwemprataj tusana?" tímiayi. ³¹ Tutai niisha tiarmiayi "Uunt Jesukristu nekas enentáimtustá. Túrakmeka amesha, tura áminiurmesha uwemprattarme" tiarmiayi. ³² Tura nuyá ashí ni jeen pujuarmia nunasha Yus-Chichaman ujakarmiayi. ³³ Tura tsawant iranṅkai sepú-iincha Páprun Sérasjai numpamnamurin nijiararmiayi. Túramtai nuyasha sepú-iincha nuarijjai uchirijjai imianmiayi. ³⁴ Túramtai nuyasha ni jeen júkiarmiayi. Tura nuṅsha ayurawarmiayi. Tura sepú-iincha níiniurijjai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar suntaran sepú-iin akuptukarmiayi. ³⁶ Tura nuyṅka sepú-iin Páprun tímiayi "Yamaikia pepru uuntri chichaman akupturmakai, átum wétinian. Tuma asamtai yamaikia péṅkerak jíinkitarum" tímiayi.

³⁷ Túrasha Papru suntaran chicharuk tímiayi "Warí, iisha Ruma aents árinin, niisha chichaman iwiartsuk ashí shuar ímiainian asutiámamji. Túrawar sepunam eṅketmamji. Tura zurukamtai yamaikia uṅk akup-tamkataj tusa wakeruinia? Atsá. Antsu uuntcha niṅki taar jíirmaktai" tímiayi.

³⁸ Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar. ³⁹ Túmak ashamainiak Páprun Sérasan weriarmiayi tsanṅkurturtarum titiai tusar. Nuyasha sepunmaya jíikiar "Yamaikia wáitneasrum wetarum" tiarmiayi. ⁴⁰ Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikiukiarmiayi.

Tisarúnikianam charaatum ajarmia nu

17 Papru Sérassha wéenak Ampipuris péprunam Apurunia péprunmasha nanṅkaamakutak Tisarúnikia péprunam jeawarmiayi. Nuṅ Israer-shuara iruntai jeé ámiayi. ² Tura Pápruka nuna tuke túrin asa nu jeṅnam wémiayi. Tura nuṅsha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusaṅ jintintiararmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk "Wi Jesusnan atumin ujaajrumna nusha Yusa anaikiamurin Kristu tútain tájarme" tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujai Sérasjajisha tsaninṅkiarmiayi. Tura Kriaku aencha ti untsurí Yúsan umirkarmiayi. Tura nuwá péṅkeri armia nusha nútiksaraṅ umikiarmiayi.

⁵ Tura Israer-shuarka Yus-shuar ajascharmia nu, Páprun Sérasnasha suiir íisarmiayi. Túrawar chíkich ya-
jauch áishmañ naki yujáu armia nujajī chichasar nu
peprunam charáa charáa ajarmiayi. Tura Páprun
Sérasnasha achikiar aentsu úuntrīn suruktai tusar Ja-
sunka jeēn árenkarmiayi. ⁶ Túrasha Páprun Séras-
nasha awetrar, Jasunkan tura chíkich Yus-shuarnasha
achikiar japirkutak júkiarmiayi. Tura pepru úuntrīn juí-
niak tiarmiayi “Ju áishmañsha ashí nuñkanam charaa-
tum ajá wekarmia nu yamaikia tímiajajī tarutramarji.
⁷ Tura ju Jasun ni jeēn itiaarmiayi. Tura niisha ashí
mash Rúmanmayā uunt akupniu chichamen nakitiaini-
awai, tiarmiayi. Tura jes, chíkich akupin awai, tuini-
awai. Niisha Jesusaiti, turamainiaji” tiarmiayi. ⁸ Nu
chichaman antukar, aents nuī pujuarmia nu, úuntrīmi-
ak charaatum ajarmiayi. ⁹ Tura Jasun chíkich Yus-
shuarjajī Papru nekas awemattaji tusar, pajī, kuit ikiua-
ji, tiarmiayi. Nuna takui pepru uuntri nin akupkarmi-
ayi.

Piríanam

¹⁰ Nuiñkia nú kashi Yus-shuar Páprun Sérasnasha
Piría péprunam akupkarmiayi. Tura nuī jeawar Israer-
shuar iruntai jeñam wearmiayi. ¹¹ Piríanmayā aentska
Tisarúnikianmayā áentsjajīnkia nankaamas péñker
enentáimkia ármiayi. Tuke enentáijijajī Yus-Chichaman
ántiarmiayi. Túrawar tuke tsawant imia niñkisha Papru
tana nuna nekasashit tusar Yusa papirīn ii wearmiayi.
¹² Tuma ásar untsurī shuar Yus-shuar ajasarmiayi. Tura
Kriaku aents nuwā penkerjī armia nusha áishmañsha
umikiarmiayi. ¹³ Túrasha Tisarúnikianmayā Israer-
shuarka Papru Yus-Chichaman Piría péprunam ét-
serun antukar nuī weriar charaatum awajiararmiayi.
¹⁴ Túmainiakui Yus-shuar Páprun árutsuk
nayaantsanam akupkarmiayi. Tura Séraska Timiutéujajī
nuīñ Piríanam juakarmiayi. ¹⁵ Tura Páprun nemari-
armia nu Atenas péprunam nin ejeyarmiayi. Tura ni-
isha waketainiakui, Papru chichaman akatar akup-
kamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha
Timiutéuncha nákamiayi. Nuī nú péprunam ántar-yus
ti írunkui Páprusha kúntuts enentáimmiayi. ¹⁷ Tuma
asa Israer-shuar iruntai jeñam Israer-shuarjajī tura
chíkich aents Yúsan enentáimtiarmia nujajī chichasmi-
ayi. Tura tuke tsawant pepru ajapén aentsjajī inkiu-
naikiar chichasarmiayi. ¹⁸ Nuyá chichaman jintin chí-
kich naarjī, ipikiuriu, armia nu, tura chikichcha, ni naarjī,
estuikiu, armia nusha Páprun áujmatsarmiayi. Chi-
kichcha tiarmiayi “Imiá chichamtincha jusha waritram-
tajik.” Tura chikichcha tiarmiayi “Yajayā yusnan etserni-
uchuashit.” Páprusha Jesusa túrunamurīn tura aents
jakamunmayā nantaktinian étserkui nuna tiarmiayi.
¹⁹ Nuyañka aents iruntainiam, naarjī Ariupaku tá-
manum Páprun júkiarmiayi. Nuīsha tuke irunin ármi-
ayi. Nuī Páprun aniasarmiayi “Iisha ame yamaram tá-

mena nu nekaatai tusar wakeraji, tiarmiayi. ²⁰ Amesha
nusháa chicham jintinaitme. Túmaitkiui ju chichamsha
warintiuak tusar nekaatai tusar wakeraji” tiarmiayi.

²¹ (Atenasnumiā aencha tura chíkich nuñkanmayā
shuar nuī pujuarmia nusha aya yamaram chicham
amia nunak ántiarmiayi. Tura aya nunak áujmatiar-
miayi.) ²² Nuyañka Papru Ariupakunam ajapén wajaki
tímiayi “Atenasnumiā áishmañtiram, wi nékajai,
atumsha atumi yusrī ainia nuyá tsurakchamniaitrome,
tímiayi. ²³ Kame wi nuik atumí yusrī enentáimtutainiam
íistaj tukaman nuī jeāchin iwiamun, JU NEKAACHMA
YUSNAITI, tu áarman wáinkiamjai. Wátsek, ju Yus
átum nékachiattrum tikishmatrumna nuna ujakta-
jrume’ tímiai.

²⁴ ‘Nekaatarum, nu Uunt Yuska ashí nuñkan tura nuī
írunna nuna najanaiti. Tura Niisha nayaimpin nuñkan-
cha nérenniurinti. Tura aents najanamu jeñam nú
Yuska pujuchuiti. ²⁵ Niisha aents yáinkiat tusa atsumat-
sui. Warí, imia-niñki Niisha ii iwiaakmarīn, ii mayāttair-
incha tura ashí írunna nunasha súramtsujik, tímiayi.

²⁶ Nekaatarum. Nuu numpanmayānak ashí áentsun
najanamiayi ashí nuñkanam matsamsarat tusa. Tura
Yuska ii tsawantrīn nekapmaiti; ii pujustinniasha nútik-
sañ nakakmiayi. ²⁷ Winia eátkar wáitkiarat tusa Yus
nuna túrayi. Túrasha Yus jeashtaka pujurtamtujī, tími-
ayi. ²⁸ Jes, iisha Yusjajī iwiaakji. Yusjajī muchitiaji. Tura
Yusjajī ii kakarmarjī takakji. Nútiksañ atumí papí-aintrī
tíchamka “Ashí incha Yus najatmaitji.” ²⁹ Tura iisha Yus
najatma asakrin kuri najanamusha, yúsaiti, tu enen-
táimsashtinaitji, tímiayi. Tura kuit-yussha, kaya-yussha
aents enentáimsar najanamuka, yúsaiti tu enentáim-
sashtinaitji, tímiayi. ³⁰ Aents Yúsan nékainiachuk
túrawarmiania nuna Yuska yáunchuka pachischamiayi.
Túrasha yamaikia Yus ashí aentsun chicharuk “Tu-
naaruminiā enentáimpratarum” túramji, tímiayi. ³¹ Yus-
ka áishmañkan anaikiaiti. Nú áishmañ ashí aentsti, yá-
ki péñkeran túriniait, yáki yajauchin túriniait núnaka
nekarmattaji. Nú áishmañ Yus akupkamun tuke enen-
táimtakui Yus nin anaikiaiti. Tura tsawant nú túrunatin
átatna nuna Yus Niñki achikiuiti. Túrasha nekas anaiki-
ajai tusa, tura ashí áentstiram nekaatarum tusa nú
áishmañkan jakamunmayā iniantkimiayi” tímiayi Pa-
pru.

³² Tura nuna jakamunmayā nantaktinian áujmatun
antukar chikichcha wishikiarmiayi. Tura chíkich “Ya-
maikia máakete. Antsu chíkich tsawantin antukmí”
tiarmiayi. ³³ Tutai Papru iniaisamiayi. ³⁴ Tura chíkich
aentska Papru táman umikiar nin nemarsarmiayi.
Nuīsha Tiuníseu páchitkiauyayi. Niisha Ariupaku
áentsuyayi. Tura nuyásha nuwā, ni naarjī Támaris, tura
chíkich aencha nútiksarañ nemariarmiayi Páprun.

Kurintiu péprunam

18 Nuyañka Papru Atenas péprun ikiuki Kurintiu
péprunam wémiayi. ² Tura nuī Israer-shuaran ni
naarjī Akiran wáinkiamiayi. Akiraka Puntu nuñkanam
akiiniauyayi. Tura ukunam Itiaria nuñkanam pujajī uunt
akupin Krautiu ashí Israer-shuaran Ruma péprunmayā

awemarmiayi. Rúmaka Itiaria nuṅkanmaiti. Nuṅ awe-mamu ásar Akira Kurintiunam nuik támiayi nuwe Pírisírajaj. Tura Pápruka Akiran chichastaj tusa werimi-ayi. ³ Akirasha Páprusha mai juna takau ármiayi, tarach ti núparman jeḡ najantain najanin ármiayi. Tuma asamtai Papru Akiraj seturmiayi nu takat túrawartai tusa. ⁴ Tura tuke sáwartin Papru Israer-shuar iruntai jeḡan wéuyayi. Nuṅsha Israer-aentsun Kriaku-aentsnasha nútiksaraṅ Yus-Chichaman ujakar enentáimtikrarmiayi.

⁵ Tura nuyá Séras Timiutéujaj Masetúnianmayḡ táar-matai Pápruka mijjatrusuk Yus-Chichaman étseruk “Yusa anaikiamurj Kristu, atum nákarmena nu Jesu-saiti” tímiayi. ⁶ Tura támaiatiat nú chichaman nakitiarmi-ayi. Túmainiak Páprun katsekkarmiayi. Tuma asamtai Papru, nuṅkia ikiuajrume tusa, ni pushirjṅ pḡar tími-ayi “Atumek makuumarme. Tura wikia Yusaj maku-umatsjai. Yamaikia Israer-shuaracha ainia nuna Yus-Chichaman ujakartaj tusan werajai” tímiayi.

⁷ Tura nuyajka Israer-shuar iruntai jeḡanmayḡ jiinki, Yúsan enentáimtin áishman Justu jeḡen wémiayi. Ni jeḡenka Israer-shuara iruntai jeḡen ayamach pujumiayi. ⁸ Israer-shuar iruntai jeḡ chicharniurj, Krispu, Uunt Jesusan nekas enentáimturmiayi. Túruna nuarjijaj uchir-jijajsha Yúsan umirkamiayi. Tura chíkich aencha Kurintiu-nmayḡ armia nu nútiksaraṅ Yus-Chichaman antukar, Jesusan enentáimtusar imianarmiayi.

⁹ Nuyá Uunt Yus Páprun mesebran ipiatkumiayi. Chicharuk “Peṅké ímiatik awajtamsachartatui Wi ámi-jijaj pujakui. Ju péprunmasha untsurj aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

¹¹ Tura nuṅ Kurintiu peprunam jimiará uwí ejesattuk Yus-Chichaman étseruk pujumiayi. ¹² Tura Kariun, Akaya nuṅka akupniurj anaikiamu aj, Israer-aents Páprun kakerarmiayi. Tura kakerainiak akupniunam irunturarmiayi. Túrawar Páprun júkiar ejenarmiayi. ¹³ Tu túrawar akupniun chicharainiak “Ju áishman Yúsan umirkatniun Muisais akupkama núnaka íkias ausháa jintíawai” tiarmiayi. ¹⁴ Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuṅkia, tura akupniun umirchakuṅkia, tárumna nuna anturkaintjarme. ¹⁵ Túrasha aya chichamnak tura aya náarjñiak atumí uuntrj akup-kamia nunak tau asamtai, atumek nuámtak íistarum tájarme. Wikia nu chichamnum pachinkiatniun nakitia-jai” tímiayi. ¹⁶ Taku aḡ jíkmiayi. ¹⁷ Tura nuyajka Kriaku aents Israer-shuar iruntai jeḡ úuntrjṅ Sústinisian achikiar awatiarmiayi akupniusha íimmiunam. Túrasha akupin Kariunka túranak peṅké pachischami-ayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeḡen waketkiarmatai, Papru nu péprunam untsurj tsawant pujusmiayi. Tura nuyasha ukunam Yusaj yachi ármiatia nuna áujas ikiuak Pírisírajaj ni aishrj Akirajaj Senkrea péprunam wearmiayi. Nuṅ Is-

raer-shuar túrutain umiak Papru ni intiashin awampramiayi, nuik Yúsan tímiaj nuna yamá umíajai tusa. Nuṅkia kanunam enkemprarmiayi Siria nuṅkanam waketkitiai tusar. ¹⁹ Tura nuyá Ipiisu péprunam jeawar Pápruka Pírisíran tura Akiran ikiuk-miayi. Tura Israer-shuar iruntai jeḡanmayḡ wayá Israer-shuar irunar pujuarmia nuḡaj chichasmiayi. ²⁰ Tura ni-isha Páprun juṅ pujustá tusar seawarmiayi. Túrasha támaiatiat, tujintiajai, tímiayi. ²¹ Nuyajka áujas ikiuak “Wisha Jerusareṅnum námper átatna nuna pachiiin-tiuktinaijtai. Tura Yus akuptakuṅkia atak tatajai atum-in íistaj tusan” tímiayi. Tura kanunam enkemar Ipiisunmayḡ jínkimiai.

²² Nuyá Pápruka Sesaria péprunam jeá, nuyajka Jerusareṅnum wémiayi, Yus-shuaran nuṅ áujataj tusa. Tura nuyá Antiukíanam wémiayi. ²³ Tura Antiukíanam ishichik pujus ataksha weak Karasea nuṅkanam tura Pirijia nuṅkanmaani wekaráktak wémiayi. Tura weak Yus-shuar matsamarmia nuna chicharak ikiakármiai.

²⁴ Tumáa pujaj Arijiántria péprunmayḡ Israer-aents Apurus Ipiisu péprunam jeamiayi. Niisha Yusa yaunchu papirjṅ ti peṅker nekaamiayi. Etserkatniun-cha ti nékauyayi. ²⁵ Uunt Yus tímia nunasha unuimíá-trauyayi. Tura tuke enentáijaj chichasmiayi. Jesusa túramurjṅ peṅker jintinniuyayi. Túrasha aya Juṅ imi-akratmanak nekaamiayi. ²⁶ Ju Apurus arantutsuk Israer-shuar iruntai jeḡanmayḡ chichamiayi. Tura Pírisíra Akirajaj ni étserman anturkar, nincha akanki júkiar Yusa chichamen ni nekaachmia nuna núkap jintin-trarmiayi.

²⁷ Nuyá ukunam Apurus, Akaya nuṅkanam wétaj takui, Ipiisunmayḡ Yus-shuar yáṅkiar papí árar atakas akupkarmiayi. Nú áentsnum peṅkerak jeat tusar túrawarmiayi. Tura Akayanam jeá, nú áentsun Yusa waitnenkratairijaj uwempraru ármia nuna ti yáṅkiarmiayi. ²⁸ Tura Apurus Israer-aentsjai paant chichasmiayi. Túrasha Yusa Papirijaj, Jesussha nekas Yusa anaikiamurjṅti tusa paant jintíak nincha nu-petkumiayi.

Papru Ipiisunam jeamiayi

19 Tura Apuraska Kurintiunam pujaj Pápruka náin-niumaanj wekaráktak, Ipiisunam jeamiayi. Tura nuṅsha Yus-shuaran wáinkiamiayi. ² Tura aniasmiayi “Atumsha Yus-shuar ajasmarmena nuṅ, ¿Yusa Wakanj atumí enentájn enkemturmakaitrum?”

Tutai niisha tiarmiayi “Atsá. Iikia nuka peṅke áyatki-isha ántichuitj Yusa Wakanj awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarimea imianmiarum?” tímiayi.

Tutai niisha tiarmiayi “Juṅ jintinramamij nu iisha enentáimsar imianmijai” tiarmiayi.

⁴ Tutai Papru tímiayi “Juṅsha, tunaarminiḡ enen-táimprarum imiantiarum, tíchamka. Nuyá tíchamka, winia ukurj winittiana nu nekas enentáimtustarum. Niisha Jesus Yusa anaikiamurjṅti, tu ujatmakchamka” tímiayi Papru.

⁵ Nuna antukar niisha Uunt Jesusa náarín enentáim-tusar ataksháa imianiarmiayi. ⁶ Tura Papru ni uwejejái nin antiñmatai Yusa Wakaní tarurarmiayi. Túram chíkich chichamjái chichasarmiayi. Túrunawar Yus-Chichaman etseriarmiayi. ⁷ Nusha tuse (12) áishmañ ármiai.

⁸ Tura nujsa menaintiu nantutin Papru Israer-shuar iruntai jeñam werí Yusa akupeamurín pachis arantut-suk etsermiayi. Túrak nú áentsun ujaak Yúsnan neka-saiti tu enentáimtikrarmiayi. ⁹ Tura chíkichka ni enentáin ti ikiatsuyáarmiayi. Túrunawar umiktinian penké nakitiainia ásar aents ántamunam Yusa jintín penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirariin tuke tsawant Yus-Chichaman ujaarmiayi. ¹⁰ Nuna túruki jimiará uwí etserkamiayi. Túramu asamtai ashí Asia nuñkanmayá aents Israer-shuar tura Israer-shuarcha Uunt Jesusa túramurín antukarmiayi. ¹¹ Tura aentsti túrachminian túrat tusa Yuska ni kakarmarín Páprun susamiayi. ¹² Jáanchniasha pushincha Papru antiñman júkiar, náñkamas jaa shuaran ejetim, nú jaa shuarsha nuna antiñkiar penker ajaarmiayi. Iwianchrusha nuna antiñkiar, íwianch jíinkimtai añkant ajaarmiayi.

¹³ Tura chíkich Israer-aents uwishin ármiai. Tura niisha chíkich chíkich péprunam wear iwianchrunkun iwianchrín jíirki akuptin ármiai. Tuma asa niisha Jesusa náaríjái iwianchin jíiktai tusar, iwianchin chichartuiniak “Nu Jesus Papru ujaana nuna náaríjái jíinkitiarum tájarne” tiarmiayi. ¹⁴ Tura Israer Patri uuntri Es-ewia náartin, siati uchirí ármia nu, nuna túriarmiayi.

¹⁵ Túrusha Jesusa náaríjái jíinkitia, tuiniakui, iwianchcha tímiayi “Jesunaka nékajai. Tura Pápruncha nékajai. Tura atumsha, zyátsukaitrum?” tímiayi.

¹⁶ Nuna tinia iwianchruku áishmañ tsékeñki nú áishmañkan kakaram katsumak nupetkarmiayi. Túram ti katsumam niisha misú tura numpamnawar jíinkiar pis-ararmiayi. ¹⁷ Nusha Ipiisu péprunam túrunamiayi. Túrunamtai Ipiisu péprunmayá Israer-shuarsha tura Israer-shuarchasha nuna túrunamun nekaawar ti ashamkarmiayi. Tura Uunt Jesusa náarín shiir awajarmiayi.

¹⁸ Túmainiai untsurí shuar Yúsán umirkaru Yus-shuar ajatsuk tunáa túrawarmia nuna paant ujakarmiayi.

¹⁹ Tura untsurí uwishniunmawarmia nu, wawekratai papí ármia nuna itiararmiayi. Itiar, júka iniayaji tusar, ashí íimiainiañ áesawarmiayi. Nú papí áesawarmia nuna kuítrísha senkuenta mir (50.000) nañkaamasauyayi.

²⁰ Tu túrunamtai Uunt Yusa chichame pampañki tura nupetmaki wémiayi.

²¹ Tuma asamtai nuyasha Pápruka Masetúnia nuñkanam Akaya nuñkanmasha irautjai tu enentáimsamiayi. Tura nuyasha Jerusarénum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. ²² Masetúnia wétin asa Papru ni tsaniakmarín Masetúnia nuñkanam emka akupkamiayi. Timiutéun Erastujái akupkarmiayi. Tura niñkia Asia nuñkanam seturmiayi.

Ipisiunam ti charaatum ámiania nu

²³ Pápruka tuke Ipisiunam pujái, nuyá aents Yus-Chichaman nakitiainiak charaatum ajarmiayi. ²⁴ Iis, nuí Ipisiunam kaya-yusa jeé ámiayi. Nu yus núwauyayi, Tiana naartin. Tura áishmañ, Timitriu naartin, nú jeñ nakumak uchichin najanniuyayi kuitjái. Tura niisha nú takatjái ti kuítrintin ajasmiayi. Tura chíkich áishmañ nú takatan takarmia nunasha ti kuítrintin awajarmiayi.

²⁵ Timitriusha niijjái takarmia nuna ikiaanak, chikich-nasha niijjái métek-taku takarmia nunasha ikiaanak niijjái charaatum ajarmiayi. Timitriusha tímiayi “Winia írutramutiram antuktaram. Iisha jú takat takaajnia jú-jái ti kuit achíatsjik. ²⁶ Tura atumsha jú Papru wáintrumna nu tura ántarmena nu chichaak “Ashí aents najanamu yuska ántar ániawai” tatsuk. Nuna tau asa, júí Ipisiunam, tura arant ashí Asia nuñkanam, ni yúsrín iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk. ²⁷ Papru tu étserkui, iisha itiurchat pujuschattajik. Kuit ii achiaj nuka meñkakashatuak. Tura nú arantcha ii yusrí Tiana jeen shuar iniaisachartatuak. Tura nuyá Asia nuñkanmayasha tura ashí nuñkanmaya aencha, ii yusrí Tiana shiir awajainia nuna yapajáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsummiarmiayi.

²⁹ Nuñkia aents páchim enentáimprarmiayi. Túmainiak Masetúniannamaya Kayuncha Aristárkuncha Páprun nemanarín ármia nuna achikiar japirkutak iruntai jeñam júkiarmiayi. ³⁰ Tura Pápruka iruntai jeñam wayá chichastaj taun, nuyá Yus-shuar ármia nu, nuna suritkiarmiayi. ³¹ Tura Asia nuñkanmayá uuntri, Páprun amikrí ásar, añkia wayawáñ tusar chichaman akup-tukarmiayi. ³² Túrusha irunar pujuarmia nu, páchim enentáimprar, chíkichka nusháa untsummiarmiayi. Tura chíkichcha nútiksarañ ausháa untsummiarmiayi. Tura chíkichka ti untsurí, nekaachar “wariniak irunturara” tiarmiayi. ³³ Chíkich nuí wajarmia nu charaatum amia nuna Israer-shuaran Arejántrun jintintrar eem shiti-awarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwejeñ takuimiayi. ³⁴ Túrusha aents iruntrar armia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímiainiatainiakua tí nukap pujursarmiayi.

³⁵ Ipiisu pepu papí-aintrísha áentsun itiatmamtik tímiayi “Ipisiu shuártiram antuktaram. Ii uunt yusrí Tiana jeé íistinia íichukaitiaji. Tura ni nakumkamurísha nayaimpinmayá iniarmania nusha íschatniukaitiaji. Tura nunasha ashí aents paant nékainiatsuk, tímiayi. ³⁶ Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi. ³⁷ Ímiatarum. Jú áishmañ átum itiarumna nu, ii yúsrín yajauch chicharkacharai. Tura ni jeen yajauch awajacharai. ³⁸ Wats, Timitriu tura niijjái takainiana nu tunáa túramun ujaktai tusar wakeruini-

akka pepru penkerin werishtinkiait. Nuiñkia máimtek iwiainiakartí. ³⁹ Tura chíkich chicham ákuñkia péñker iruntrarum iwiatarum. ⁴⁰ Kame ju yamáí túrunamun nekaawar Rúmanmayá kapitíán “Ti uunt kapitíántrí ya-jauch awajsatai tusarum túrachurmeash” turamchatjish. Warí, niisha “¿Urukamtaí charaatum ajarum?” takuisha, áimkiatin penké tujinkiattaji” tímiayi. ⁴¹ Tura papí-aint nuna tuasua amik “Áukete. Wétarum” tímiayi.

Papru Masetúnia nuñkanam Krisia nuñkanmasha wémiania nu

20 Charaatum ajasua amikiarmatai Papru Yus-shuaran untsuk Yusnan jintintrataj tusa iki-aankarmiyai. Tura áujas ikiuki Masetúnianam wémiayi. ² Nú nuñkanam wekaráktak, Yus-shuaran jintintrar iki-akármayai. Tura nuyasha Krisia nuñkanam jeamiayi. ³ Nuñ menaintiu nántuk pujusmiayi. Tura nuyañka kanujají Siria nuñkanam wétasa pujus Israer-shuar chícham jurusman anturmamak “antsu nuñkan Masetúnianmaanĵ wetajai” tímiayi. ⁴ Tura Piríanmayá áishmanĵ Súpater naartin Páprun atamprimiyai. Tura Tisarúnikianmayá Aristárkusha Sekuntusha Tírpimayá Kayusha Timiutéusha Asianmayá Tíkikiusha, Trújimiusha ashí nu shuar Jiripius peprunam Páprun atampriarmiyai. ⁵ Túrawar niisha emki wear Trúas péprunam jeawarmiyai. ⁶ Tura iisha wakapruachu tanta yutai jisat amuukamtaí, iisha Jiripius péprunmayá jíinkir, kanunam enkemprar Masetúnia nuñkanmayá jíinkimji. Tura senku tsawant nañkaamasmanum emki wearmia nu amaiyañkarmijai Trúasnum. Tura nuñsha siati tsawant pujusarmijai.

Trúas péprunam túrunamia nu

⁷ Tura tumiñtin kíarai Jesukrístu enentáimtusar yurumátaí tusar iruntrararmijai. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi. ⁸ Tura yakí menaintiu pátaranam, tesaamu ámia nuñ iruntrararmijai. Nuñsha ji ekemarma untsurí irunmiayi. ⁹ Tura nuñsha natsa Eutikiu, áañkamunam ayamas pujusmiayi. Tura Papru ti esaram chichaakui nu nátsasha karĵ pujumiayi. Tumáa pujus kanaki yakí pátanmayá akaiki ini-aamiayi. Tura penké jakan júsarmiyai. ¹⁰ Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. ¹¹ Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiyai Papru. ¹² Eutikiuncha iwiaakun ni jeñ júkiarmiyai. Tura ashí aents shiir enentáimsarmiyai.

Miritiunam wearmiayi

¹³ Wats, Papru Asuñ péprunam nuñkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asuñnum. ¹⁴ Nuñ Asuñnum inkiunaikiar, Páprusha kanunam enkempramtaí, Mitiríniniam jeamji. ¹⁵ Tura nuyá jíinkir, kashin

tsawarar Sámus péprunam jeamji. Tura nuyañka Trujiriunam jear ayampramji. Nuyasha kashin tsawarar Miritiunam jeamji. ¹⁶ Pápruka Jerusaréñnum wari wé-tajtsa wakerimiayi, pintikiustís naartin jístatin pachinkiatataj tusa. Tuma asamtaí, Asia nuñkanam ti núkap pujustinian nakitiak “Ipisiunam wéhattajai” tímiayi.

Papru Ipisiunmayá úuntrin áujsamiania nu

¹⁷ Túrasha Papru tuke Miritiunam pujus, Ipisiunmayá Yus-shuara úuntrin winitiarum tusa untsukarmiyai. ¹⁸ Ni taarmatai Papru tímiayi “Atumsha wi Asia nuñkanam pujusan itiura túraj nu nékarme. ¹⁹ Atumjají tuke tsawant pujumaj nuñ, nañkaamantuchu enentáimtumasan, úutchim winia Úuntrun takatrĵ takasmijai. Tura Israer-shuar yajauch awajtustinian wakerutainiaĵ tuke takasmijai. ²⁰ Ashí péñker ana nu nekaatarum tusan mijatrutsuk jintintiamjarme. Iruntramarmena nuñ tura añkant añkant atumí jeñ pujumarmena nuñsha Yus-Chichaman ujakmajrume, tímiayi. ²¹ Tura Israer-shuarnasha Israer-shuarchancha nútiksanak, enentai yapajjárú Uunt Jesukrístu umirkatarum, tímiajrum. ²² Tura yamáí Jerusaréñnum wéajai, Yusa Wakaní túrutkui. Nuñsha túrunatana nunasha nekamatsuk wéajai. ²³ Tura Yusa Wakaní ini-akturkui juña nékajai, ashí pepru wi jeattajna nuñ enketátaí tusar nákarainiawai. Tura ti wáitsatniun nekapsattajai. ²⁴ Kame wikia jákashtajash. Túrasha warí winia itiurtawa. Wikia Yusa jintiĵin warasan wekasataj tusan wakerajai. Yusaĵi wea-wéakuan jáakun iniaisataj tajai. Tura nuyá takatan Uunt Jesus surusmia nuna péñker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrum. ²⁶ Nekaatarum, ashí Yusa wakeramurĵin wisha penké úurtsuk ujakjarme. Tuma asamtaí atumin títiajtsan wakerajrume, chikichík shuara wakaní jinium wéakuisha wikia penké makuumashtatjai. ²⁸ Tuma asamtaí emka atumek ímiastarum. Túrarum nuyá chíkich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia nú-naka ni numpejajĵin Uunt Jesus sumakchakait. ²⁹ Kame wi wématai, chíkich táartatui. Núnaka nékajai. Tura ni-isha, Yus-shuaran amukartajtsa wakeriartatui, uunt yawaśha murikiun amuinia áintsan. ³⁰ Túrasha nemartusarat tusar wakeruiniak atumiĵiniĵin wait chichaman unuikiartin wantinkiertatui. ³¹ Tuma asamtaí yatsurtiram, aneartarum. Wisha menaintiú uwitin tsawajsha káshisha úutchim añkant añkant unuiniamajrumna nu kajinmatkiirap’ tímiayi.

³² Pai, yamaikia, yatsuru, Yus yáinmakarti. Yusa aneñkrattairĵ nékaitrumna nú chichamsha kakarmaiti. Nú chicham átum katsuğar kakaram wekasatniun yainmakarti. Kame nú chicham atumĵ enentáin pujakui, Yus ni shuarin matsamsatniun anajmatramia nuñ pachinkiatarme. ³³ Wats, wisha chikichík shuara kuĵtrĵin warirĵincha wakerutkachuitjai. ³⁴ Antsu winia

uwejrujaj takasan wi atsummiaj nuna sumarmakmajai. Tura winia írutkamuru atsumamuríncha wiki sumakmijajai. Nuka paant nékarme. ³⁵ Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. “Achiana nu-jajinkia nankaamas, súana nuka shiir waraawai” tíchamka” tímiayi.

³⁶ Nuna tuasua amik Papru tikishmarmiyai. Tura ashí niijijaj iruntrarmia nú shuar Yúsan áujsarmiyai. ³⁷ Tura Papru nuik chichaak “Atakka wáitkiashtatrumé” tiniu asamtai, ti kúntuts pujuiniak, úttchim Páprun miniak-sarmiyai. Túrawar kanunam ejeniarmiyai.

Papru Jerusarénum wémiania nu

21 Tura nuyá Yus-shuar aujsa ikiukir kanunam enkempramji. Tura inkuiasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji. ² Tura nuj Pataranam pujusar, chíkich kanu Pinisia péprunam wea wáinkiamji. Túmakui nuj enkemprar wémaji. ³ Nu wésar Chipri nuñkaka wáinkiamji. Chíprikia menamaaní aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmayá jíinkir péprunam wayamji. ⁴ Nu Yus-shuar wáinkiar nuñ siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiayi. ⁵ Tura siati tsawant nankaamasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujsamji. ⁶ Tura nu amikiar nuñkia áujnaisar ikiukiarmaji. Tura iikia kanunam enkemprakin nuñkia ni jeen waketiarmiyai.

⁷ Iisha Tirunmayá entsak wea-wéakuar Turumáitiam nuñ jíinframji. Tura nuj jearsha Yusaj yachí ármia nu chichasar nuñ chikichí tsawant pujusmaji. ⁸ Kashin tsawarar nuyá jíinkir nuñkan weri Sesaria péprunam jeamji. Nu Jiripi jeen jear pujusmaji. Jiripikia Yus-Chichaman etserniuyayi. Nuik Jerusarénum siati áishmankan Yusa takatrín wáinkiarat tusar anaikiarmia nú Jiripiiti. ⁹ Jiripisha kuaru nawantrín yarumkauyayi nuatnakchan. Niisha Yusa chichamen etserin ármiyai. ¹⁰ Tura iisha Jiripi jeen wárum tsawantak pujarin Jutía nuñkanmayá aents Yusa etserniurj, Akapu náartin támiayi. ¹¹ Niisha taa Papru emenmamkarín achikmiayi. Tura achik nuñki ni nawen tura uwejéncha jinikiamamiayi. Nuna tura tímiayi “Yusa Wakaní tawai, juna emenmamka nérenniurín Israeraents jútikia jinikiáwar Israer-shuarchanum surukartatui, tawai” tímiayi. ¹² Iisha nu antukar Papru tímiayi “Jerusarénumka weep.” Sesarianmayá Yus-shuarsha núnisan Páprun tiarmiayi. ¹³ Tutai Papru tímiayi “¿Urukamtai útkuram winia enentáiruñ kúntuts awajtarum? tímiayi. Wi Jesuana asamtai Jerusarénum jinikiataniakuisha mántuiniakuisha ashamatsjai” tímiayi. ¹⁴ Tura iisha Papru emetatai tukamar tujinkiar “wats, nuñkia Uunt Yus wakera nu tímianak atí” tiarmaji.

¹⁵ Nu tiri iniaisar iwiarnarar Jerusarénum wémaji.

¹⁶ Chíprinmayá yaunchu Yus-shuar Manasuñ ni jeen Jerusarénum takakuya nuna ikiatmastinian wakerimiayi. Tuma asamtai Sesarianmayá ishichik Yus-shuar nemartamainiak Manasuñnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusarénum jeawakrin, nuj warasar Yus-shuar ti shiir áujtamsarmijai. ¹⁸ Tura kashin tsawar Papru ímiak Jakupu jeen wémijai. Nuisha Yus-shuara uuntri matsarmiyai. ¹⁹ Páprusha áujas amik, Israer-shuarchanum ni étsermajaj Yus túramia nuna yá-mankamtaikniumiá jukí chikichkimas ujakar ujakar awajsamiyai. ²⁰ Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú, túrasha Israer-shuar timiá untsurí Yus-shuar ajasu ániayat, “ashí Muisais akupkamia nu umiktinaitji” tuiniawai. ²¹ Nú arant yajayá aents taar, chichartamainiak “Pápruka nusháa jintintiu, turamainiawai. Israer-shuar chíkich nuñkanam pujuinia nuna Muisaisa akupkamurj umirkashtin Pápruka jintintiu, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaiatniun Papru imia Israer-shuaran jintintiu, turamainiawai.” ²² Wátsek, yatsuru, nuñkia itiumainkit. Ame táintrumin aents nekaawarka ju kajertamainiak káutramkachartatuak. ²³ Wats, antsu nuñkia, ju túrata yatsuru. Ju kuaru áishman Yúsan yaunchu tiarmia nuna umiktasa pujuiniawai. ²⁴ Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnis-mek kuítniasha ni susatin ana nu amesha akikmatkarta. Niisha ashí umikiarmatai, ni intiashin awampratin áhattawak. Nu áishmanka intiashin awampran Israeraents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui. ²⁵ Túrasha yatsuru, nekaata, Israer-shuarcha Yus-shuarka papí yaunchu akuptukmijai. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtinaitrume, tímiayi. Tura numpasha umarchatniuitrume, kajemtikramusha yúashtinaitrume. Tura tsanirmashtinaitrume. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiaamarmiyai, Muisais timia nútkisarañ. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiyai. ²⁷ Túrasha nu siati tsawant amusattuk ajatemsaj, Ásianmayá Israeraents Paprun Yusa Uunt Jeen pujan wáinkiamiyai. Túrawar charaatum ajakiar Páprun achikiarmiayi. ²⁸ Achikiar untsumainiak “Israer-shuártiram in yáinmaktarum. Ashí nuñkanam Muisais akupkamuríncha Israer-shuarti túrutairíncha, ju Yusa Uunt

Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujaj yamá jü Jeencha yajauch awajturmají" tiarmiayi.

²⁹ Jes, nuik Ipisiunmayá Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi. ³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya jíikiarmiayi. Túrawar wáitíncha nú chichamaik epentramiayi. ³¹ Tura maatai tusar matsamtuiniáj suntara kapitíántri Jerusarénumiá aents ashí charaatum ajainian antukmiayi. ³² Kapitíáncha ni suntarín tura sarjentuncha irur tseke weriarmiayi aents pujuarmia nu. Aencha sun-taran tura kapitíánin wáinkiar, Páprun asutíniyat ini-aisarmiayi. ³³ Kapitíánka Páprun jeari achikmiayi. Tura jimiará jirujaj jínkiarmiayi. Nuyasha aniasmiayi "¿Niisha yait? ¿Warinia túrait?" tímiayi. ³⁴ Túrasha aencha untsurí chichaman untsummiarmiayi. Túmainiakui kapitíáncha penké nekaachmiayi. Tuma asamtai Páprunka suntar pujamunam júkiarmiayi. ³⁵ Tura suntar pujamunam wáitíniam jeawar Páprun entsaki júkiarmiayi aents imiá kajerainia asamtai. ³⁶ Tura aencha ukunmaaní pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitíánin Kriaku chichamjaj chichaak "Wi ishichik chichasaintjame" tímiayi.

Tutai kapitíán chichaak "Warí, ¿amesha Kriaku chicham chichastin nékamek? tímiayi. ³⁸ Nuiñkia amesha ¿Ejijunmayá shuárchakaitiam? ¿Nuik kuaru mir (4000) aents, mankartin tutai atsamunam yaru-akchamkam? ¿Kapitíánjaj meset najanataj tusa túrachmakum?" tímiayi.

³⁹ Tutai Papru tímiayi "Núchaitjai. Antsu wikia Israer áentsuitjai. Sirisia nuñkanam uunt pepru Tarsu náartin ana nuí akiinaitjai. Tura waitneasam jü aents chichastin tsankatrukta" tímiayi.

⁴⁰ Tura kapitíán, ayu, tutai, Papru watainiam wajas, mitiat pujustarum tusa uwejen takuimiayi. Tura aents itiatkarmatai Israer-chichamjaj chichasmiayi.

Papru áentsun timia nu

22 Papru chichaak juna tímiayi: "Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan títiatjana nu waitneasrum antur-tuktarum" tímiayi. ² Tura Papru Israer chichaman chichaakui, aents nuna antukar nú nankaamas itiatkarmiayi. ³ Nuí Papru chichaak "Wikia Israer-shuaraitjai. Tarsu pepru Sirisia nuñkanam ana nuí akiinaitjai. Túmaitiatnak juí Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii untrí akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijijaj wakerukuitjai. ⁴ Tura Jesusan umirkaru ármia nuna máataj tusan pataatukni

wekaimiajai. Túran áishmanñkan nuwancha achikian sepunam enkeataj tusan túrimiajai. ⁵ Israer-patri uun-trísha Israer-shuara uuntrísha Tamaskunam íi-shuar susatá tusar papin ataktusar akuptukarmia nuna niñkia nékainiawai. Jesusan umirkarun achikia iki-aankan juí Jerusarénum asutniáwarat tusan werimjai' tímiayi.

(Túramurj 9.1-19; 26.12-18)

⁶ "Tura wi jintiá wéaj Tamaskunam jeastatuk ajasaj nantu tutupin aj aya aneachma nayaimpinmayá newaat wajantruntmiayi. ⁷ Túrunamtai wisha nuñká iniaarmajai. Nuyañka chichaamun antukmajai. Chichartak "Sauru, Sauru, ¿urukamtia imiá pataaturam?" turutmiai.

⁸ Takui wi aniasmajai "¿Amesha yáitiam, Uunta?"

Tutai "Wikia Nasarénumiá Jesusaitjai. Ame pataaturmena núitjai" turutmiai.

⁹ Wijijaj pujuarmia nu, newaat wajantun wáinkiar ti ashamkarmai. Túrasha niñkia túrutun antukcharmai.

¹⁰ Tura wi tímiajai "¿Nuiñkia, Uunta, warí ititurkattaj?" tímiajai.

Tutai Uunt chichartak "Wajakim Tamaskunam wetá. Nujsha ame túrattamna nuna ujatmakartatui" turutmiai, tímiayi. ¹¹ Kame wikia nú newaat jakun íisan jiiiru kusurmai. Tuma asamtai winia tsaniakmar enkeki jurukiar Tamaskunam ejetiarmi' tímiayi.

¹² Papru tuke aujmatki wéawai. 'Tura nuí Tamaskunam áishmanñ Ananías pujumai. Niisha Yúsan aneak, Muisais akupkarmia nuna umirkauyi. Tura nú péprunmayá Israer-shuar ármia nu nin péñker enentáimtiarmiayi. ¹³ Nú Ananías winia íirsataj tusa támai. Taa turutmai "Yatsuru Sauru, péñker iimtia." Túrutkui nú chichamaik péñker íimmiájai. Túrunan Ananíasnasha wáinkiamjai. ¹⁴ Tura Ananías chichaak "Iwiaaku Yus, winia wakeramurun nekartuat tusa winia Uchirnasha, tunaarinchaa nuna, íisat tusa, winia chichampruncha antukat tusa ámin yaunchu Yus anaitiamkaiti. ¹⁵ Amesha Papru, Yusna ana nu íisumna nusha antukumna nusha ashí aents ujakartatme. ¹⁶ Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náarí pachisam imiantia" turutmai.'

¹⁷ "Tura Jerusarénum waketkin Yusa Uunt Jeen wémajai Yúsan áujsetaj tusan. Nuí íimiarmajai. ¹⁸ Nuí Jesus chichartak "Juí Jerusarénum Wíi túramur etserkattamna nuna antukchartatui. Tuma asamtai wari jíinkim wetá" turutmiai.'

¹⁹ "Túrutkui wi tímiajai "Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuí matsatun achikian awatin sepunam enkeawarmia nuna nékainiawai. ²⁰ Tura nuyá Áminiu etserniun Estepañkan máiniakuisha wisha wajamjai. Túruiniakui, "péñkeraiti" tímiajai. Nú arantcha ni pushirín íirsamjai" tímiajai.'

²¹ "Túrasha Uunt Jesus winia turutmai "Wetá. Israer-shuarcha matsatainia nuí akupkatjame" turutmai" tímiayi Papru.

Suntara kapitíántrijn túrunamia nu

²² Nuj matsamarmia nu, núnaka antukarka untsu-
tan juáriarmiayi. “Juka mantamnatí. ¿Urukamtaik
iwiakusha pujusat?” tiarmiayi. ²³ Tura aentska Paprun
kajerainiak, ti untsuainiak pushirín tujaat ajapawar
nunancha nan̄kimkiamaikia ajarmiayi. ²⁴ Tura kapitíán
nuna wáiniak Páprun suntar pujamunam awayámiayi.
Tura suntaran chicharuk “Átum asutiárum áimtiki-
atarum. ¿Urukamtaik aents nin kajerainiak imiá
untsuainia? Nekaatarum” tímiayi. ²⁵ Tura Páprun asu-
tiátaí tusar jin̄kiárar awajsam Pápruka kapitíánin
chicharuk “¿Rúmanmaya aents áyatik asutiámniakait,
ni túramurj nekartsuk?” tímiayi.

²⁶ Nuna táman antuk kapitíáncha uunt kapitíánin
ujaktaj tusa werí chichaak “Maaj, túrataj tamena nu
anearta. Ju áishman̄ Rúmanam pachitkaiti” tímiayi.

²⁷ Nuna antuk uunt kapitíán Páprun werí aniasmiayi
“¿Amesha nekasmek Rumanam pachitkaitiam?” tími-
ayi.

Tutai Papru “Ee” tímiayi.

²⁸ Tutai “Wikia ti kuítian akikmakmiajai Rúmanam
pachiinkiatniun” uunt kapitíán tímiayi.

Tutai Papru tímiayi “Túrasha winia aparka Rúmanam
pachitkia asamtai, wisha Rúmanam pachiinkian akiini-
aitjai” tímiayi.

²⁹ Nuna takui Páprun asutiátaí tiarmia nuna wárik ini-
aisar jíiniar wearmiayi. Tura imia uunt kapitíáncha Rú-
manam pachitkian jin̄kiá asa ashamkamiayi.

³⁰ Tuma asa kashin tsawar uunt kapitíán, urukamtaik
Páprun imiá kajerainia, nekaataj tusa wakerak Paprun
werí jin̄kiámun atirmiayi. Tura Israer-patri uuntrjín chí-
kich naamka armia nújajisha ikiaankamiayi. Tura
nuiñkia ni matsatmanum Páprun itiar ajapén awa-
jsamiayi.

Israer-aentsu Úuntrjín Papru timiania nu

23 Papru Israer-patri naamkarin úmamkes iis “Wíi
shuartiram antuktarum. Úchichik tuke yamaisha
Yus íimmianum péñker wekainuitjai” tímiayi.

² Papru nuna takui Israer-patri uuntrj Ananías, ni
suntarjín Papruj ayamas pujuarmia nuna “Wenunam
awatiarum” tímiayi.

³ Tutai Papru tímiayi “Tsej, jimiará chichamtinia íimi-
atá, Yus amincha asutiámtawai. Muisais akupeana
nuna umiatsui tusam yajauch turutattsam pujame. En-
tá, ¿nuiñkia urukamtia Muisais tímia nuka iniaísam
ame suntarum winia asutiátarum tame?” tímiayi.

⁴ Tura nuna takui nuj wajarmia nu Páprun tiarmiayi
“¿Maaj, amesha Patri uuntrj imiá yajauchisha
chichaream?”

⁵ Tutai Papru tímiayi “Yatsuru, wisha Patri uuntrj áut-
skaitia tíchamjai. Nékaitkiunka núnaka tíchajjai. Kame
wisha nékajai, Yus-Chichamnum tawai “Atumí uuntrj
yajauch chicharkairap” tawai” tímiayi.

⁶ Israer-aentsu úuntrjia jimiará írutka árimiayi. Sat-
uséu aents tura nuyá Pariséu aents nusháa írutkan

Pápruka nekaamiayi. Kame Satuséu aentska, jakamun-
maya nantaktincha Yusa suntarjsha aentsu wakanjsha
tura iwianchcha atsawai, tiniu árimiayi. Antsu Pariséu
aentska, nuka ashí awai, tiniu árimiayi. Nuna nekáa Pa-
pru kakantar chichaak “Wikia Pariséu áentsuitjai. Wíi
shuarsha Pariséu áiniawai. Wikia ashí shuar jakamun-
maya ukunam nantaktin átatui tu jintiamun, nekaatai
tusar itiararmiayi” tímiayi. Tura Papru nuna takui
Pariséu aents tura Satuséu aencha nuámtak kajer-
naikiarmiayi. Túrunawar kánasarañ nusháa nusháa
enentáimprarmiayi. ⁹ Nuiñkia ashí aents charaatum
ajarmiayi. Tura Israer-shuara jintinniurj Pariséunam
írutka armia nu wajakiar tiarmiayi “Ju áishman̄ tunaan
pen̄ké túrichuiti. Yusa suntarj chíchich wakancha nin
nekas chichaschamashi. ¿Ya neka?” tiarmiayi. ¹⁰ Ti
charaatum ajainiakui suntara kapitíántrj Páprun achi-
archartimpiash tusa suntaran untsuk, “Jiiktiarum,
túrarum suntar pujamunam awayátarum” tímiayi.
¹¹ Nuyá kashi Papru Uuntrj mesekra ipiatuk “Kakaram
ajasta, Papru. Juñ Jerusaréñnum winia ujakarumna
núnímek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun
maatai tusar chichaman jurusarmiayi. “Papru
máachkurkia yurumtsuk tura pen̄ké úmutsuk matsam-
sattaji. Máachrikia yajauchiniam yumiñkramu atai”
tiarmiayi. ¹³ Nuna tiarmia nuka kuarenta (40) nan̄kaa-
mas árimiayi. ¹⁴ Tura Israer-patri úuntrjín tura Israer-
aentsu úuntrjíncha weriar “Papru máachkurkia pen̄ké
yurumtsuk pujustaji. Máachrikia yajauchiniam yu-
miñkramu atai” taji. ¹⁵ Tuma asamtai ashí Israer-patri
naamkarjijaj suntara kapitíántrj seatarum, Papru tatí
tusarum. “Kashin Papru itiatá, titiarum. Papru tana nu
iisha nekas nekaatai tusar wakeraji” titiarum.
Túrawakrumin iisha maatai tusar niñkia táatsajin
nákaktatji” tiarmiayi.

¹⁶ Tura Papru awé nú chichaman antuk suntar puja-
munam taa Páprun ujakmiayi. ¹⁷ Tuma asamtai Pápru-
ka suntara kapitíántrjín untsuk “Ju uchi uunt kapitíán-
niun jukitia. Niisha chichaman takakui” tímiayi.

¹⁸ Kapitíáncha uchin uunt kapitíánnum eje tímiayi
“Papru en̄keamu pujana nu winia untsurak “Ju uchi
uunt kapitíánnum jukitia. Chichaman takakui” túrutui”
tímiayi.

¹⁹ Uunt kapitíáncha nú uchin en̄keki arantach jukí
chicharuk “¿Warí turuttiaj tame?” tímiayi.

²⁰ Tutai uchi tímiayi “Israer-aents Páprun chichaman
jurusarai. “Papru túramurj ti paant nekaatai tusar
kashin Israer-shuara uuntrjín ejetarum” turamartatui.

²¹ Tura amesha nuna takui anturkaip. Kuarenta (40)
nan̄kaamas jintiá akirtua pujurainiawai. Tura “Papru
máachkurkia yurumtsuk tura úmutsuk matsamsattaji”
tuiniawai. Tuma asamtai yamaisha ámin tití tusa
nákarmainiawai” tímiayi uchi.

²² Tura uunt kapitíáncha uchin chicharuk “Ame túrut-
mena nu chíchich aents pen̄ké ujakaraip” tímiayi. Nuna
tj, uchin akupkamiayi.

Akupin Piriksaj ejetiarmiania nu

²³ Nuyanka uunt kapitíancha chíkich kapitíanin jímiran itia chichaak "Urum, kashi ajapén ajastatuk aj, untsurí suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) nánkijijaj Sesaria nuñkanam wétin iwiarata. ²⁴ Páprusha kawainium ekemkatin iwíarturta. Túrurum péñkerak ejetarum akupin Piriksaj" tímiayi.

²⁵ Tura niijaj jü chichaman áatrar akuptukmiayi:

²⁶ "Ti péñker akupin Píríks, wikia Krautiu Rísias jü papin áatjame. ²⁷ Israer-aents jü áishman kan maatai tusar wakeruiniak achikiarmiayi. Tura niisha Rúmanmayá áentsuitkui wikia nuna nekaan suntarjaj werin jukimjai. ²⁸ Wikia çurukamtaik achikiaruit? tusan Israer-patri naamkarin jukimjai nin. ²⁹ Páprunka ii uuntrj akupkamurj umiatsui tusar nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi. ³⁰ Tura wisha Israer-aents nin máatniun chichaman jurusman nekaan amijn akuptajme. Nuyasha nin kajerainia nunasha tajai "Atumsha Piriksaj werum átum warinma kajerarum nu títiarum" tajai. Ayu. Júchiniak tájame." Nuna tu áatar akuptukmiayi.

³¹ Tura suntarsha ni uunt kapitíantrj tímia nútiksaran Páprun kashi júkiarmiayi Antipatris péprunam.

³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujaj wearmiayi. ³³ Sesaria péprunam jeawar papin Piriksaj súsarimiayi. Tura Pápruncha nuj ejeniarmiayi.

³⁴ Akupniusha papí aujsua amik Páprun aniasmiayi "Amesha, çtuñ akiiniaitiam?"

Tutai "Sirisia nuñkanmayaitjai" tímiayi.

³⁵ Nuna takui akupin tímiayi "Wátskea kajertamainia nu taar turamainiakui anturkatjame" tímiayi. Tura nuyanka uunt akupin Erutisa jeen awayá apujsamiayi, suntar íisarar tusa.

Papru Píríksaj áujmatsamiania nu

24 Tura senku tsawant nankaamasaj Israer-patri uuntrj, ni naari Ananías, Sesarianam támiayi. Tura Israer-aentsu uuntrj tura ti unuimiaru chichamtincha, ni naari Térturu nujaj táarmiayi. Jü aents Páprun kajerainia ásar akupniunam wearmiayi. ² Nuñ Páprun itiaratai Térturu chichatan juarmiayi. "Uunt akupin Píríks, amesha yaimiu asakmin iisha shiir matsatainijaj. Tura imiá neka asakmin ashí aents tímiatrusrik matsatainijaj. ³ Tuma asakmin iisha ashí matsatmanum tuke tsawant ti shiir yuminsamajme, uunta. ⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. ⁵ Jü áishman Papru, sunkura utsukratniua núniniaiti. Niisha ashí nuñkanam mesetan najanatniun Israer áentsun ikiakáiniaiti. Tura Jesusa aentsrj, Nasarénu tunia nuna úntrjnti. ⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntrj tana nujaj métek asutiátaí tusar wakerimji. ⁷ Túrarin

nuyanka kapitían Rísias taa tapit achik jurutramkimijaj. ⁸ Tura atumek akupin Piriksaj werum nuñ aujmatkatarum, turamaji, tímiayi. Tuma asamtai amesha Píríks, Papru aniasta. Nuñkia ii tájinia nu nekasaiti, nu nekaattame" tímiayi Térturu.

⁹ Tura Israer-aents pujuarmia nu "Nekasaiti ashí ni tana nu" tiarmiayi.

¹⁰ Nuyá Píríks, uwejeaj, Papru chichasat tusa iniaktusmiayi. Túram Papru tímiayi "Amesha uunta, jü aentsu akupniurj ti untsurj uwitin pujusuitme. Tuma asamtai nuikia shiir enentáimsan páchitsuk chichastajaj. ¹¹ Wats, wi túramur nekartuata. Yusan áujmataj tusan Jerusarénum wi wémajna nu tuse (12) tsawant nankaamasaj. ¹² Nuñsha yajauch áujmatki weaj wáitkiacharmaj. Yusa Uunt Jeencha tura Israer-shuara aujtaj jeencha tura pepu jintianmasha áentsnum charáa charáa ajá wekaaj penké wáitkiacharmaj, tímiayi. ¹³ Jü aents juñ matsatainia nu wíniaka penké turutchamnia áiniawai. ¹⁴ Túrasha juna paant ujaajme. Jesus yamarman jintiana nuna umíajaj. Kame Israer-aentska wáitaiti tunia nuna wikia umíajaj. Túrasha nuna túran ii uuntrj Yusrj akupkamia nunak umiktasan pujajaj. Jes, ashí Muisais aar akupkamia nuna tura ashí Yúsnañ yaunchu etserin aar akupkarmia nunasha uminiaitjaj. ¹⁵ Tura jakaasha nantaktin átatui, tajaj. Warí, péñker aents nútiksaj yajauch aencha nantakiartatui imia Israer-shuar tuiniatsuk. Tura wisha nútiksanak túrunatniuiti tajaj. ¹⁶ Tura wisha tiniu asan, wikia winia enentáiruj Yus íimmianum makuumatsuk wekasataj tajaj. Tura áentsnumsha nútiksanak penké makuumatsuk wekaajaj" tímiayi.

¹⁷ Tura, uunta, untsurj uwitin chíkich chíkich nuñkanam wekaasuan amikian winia shuaruj támajaj. Kuítrinchan kuítian susataj tusan tura Yusa kuítrincha nin susataj tusan támajaj. ¹⁸ Túran wisha, Muisais jintinmia nútiksanak nijiamaran, Yusa Uunt Jeen pujuumijaj. Untsurj aents charaatum ajainiasha atsumiayi. Nuñ wiki pujaj Ásianmayá Israer-aents wáitkiarmiayi. ¹⁹ Tura wi yajauch túraitkuñkia winia wáitkiarainia nu táchatniukait ámin ujatmaktasa. ²⁰ Túrachkuñkia juñ pujuinia nu, Israer-patrj naamkarj matsatmanum wi pujumajna nuñ yajauch túramun nékainiakka turutiarti. ²¹ Kame, "jakamunmayá nantakminiaiti" tau asamtai makuurtiajtsarum pujarme" matsatmanum tímiaj nuñ turutchartimpiash. Nú arantka yajauch túramun penké nekartuacharmaj" tímiayi Papru.

²² Táman antuk Píríks, Kristu shuarj túramun paant nekáa, áanik iniaisamiayi. "Antsu kapitían Rísias támatatai nuñkia nu chichaman nekaatjai" tímiayi. ²³ Tura nuyá suntara kapitíantrj chichaak "Jü Pápruka tuke emetnati. Tura ishichikia ankant apujsatarum. Tura nuyá ni amikrj taa yáintaj takui suritkiarap" tímiayi.

²⁴ Tura nuyá chíkich tsawantaj ataksha Píríks ni nuwejaj Tursirajaj támiajaj. Núwenka Israer-shuarauyayi. Píríkska "Papru itiatarum" tímiayi. Papru Jesukristunun étserkui antimiyaj. ²⁵ Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiániuiti takui Píríks-

ka ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi. ²⁶ Tura, ankant ajastaj tusa Papru kuítian akirkashtimpiash, tu enentáimias, Píríks tuke untsúu wémiayi, chichastai tusa. ²⁷ Tura nuyañka jimíará uwí nañkaasmatai Píríks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Píríkska, Israer-aents péñker enentáimtursarat tusa wakerak, Páprun sepunam tuke ik-iukmiayi.

Papru Jístujaj áujmatsamiania nu

25 Jístusha akupkatin takatan nañkaamataj tusa Sesaria péprunam támiayi. Tura menaintiú tsawant nañkaasmatai nuyá we Jerusaréñnum jeamiayi. ² Nujsha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi. ³ Tura tiarmiayi “Waitneasam Páprusha Jerusaréñnum akupkata” tiarmiayi. Jintiá maatai tusar wakeruiniak nuna tiarmiayi.

⁴ Tutai Jistu tímiayi “Atsá. Páprusha Sesaria péprunam sepunam eñkeamu pujawai. Tura wikia nuj wárik waketskittijai” tímiayi. ⁵ Nuyá nin tímiayi “Atumsha penkeri árumna nu, wijiá Sesarianam wétiniaitrome. Tura nú áishmañka tunaari ákuñkia nujsha tíniaitrome” tímiayi.

⁶ Jístuka Jerusaréñnum ishichik tsawant pujusmiayi. Kame uchu tsawant tura tias tsawantcha pujuschawash. Nuyá ataksha Sesarianam waketskimiayi. Tura nuj jeá kashin tsawar, akupin pujutainium pujus “Papru itiatarum” tímiayi. ⁷ Tura Papru wayamta, Israer-aents Jerusaréñnumia taarmia nu káunkarmiayi. Túrawar ti nukap chichainiak “Tunáa túraitai Pápruka” tu tiarmiayi. Túrasha penké uyumamtikiacharmiayi.

⁸ Pápruka chichamprumak tímiayi “Wisha tunaan penké túrachuitjai. Israera uuntri áarmaríncha umirkaruitjai. Tura Yusa Uunt Jeñcha yajauch awajsachuitjai. Tura uunt kapitániasha yajauch penké chicharkachuitjai” tímiayi.

⁹ Jístuka Israer-aents péñker enentáimtursarat tusa wakerak, Páprun tímiayi “Wakerakmiñkia Jerusaréñnum wemí. Wisha nuj ame túramurmin nekaatjai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtaí Rúmanmayá uunt akupniun wisha winia túramurun ujaktiniaitjai, nekartuati tusan. ¹¹ Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuñkia wíniaka Israer-shuar-num surunkachminiaitjai tajai. Tuma asamtaí seajme, wíi túramun uunt akupin Sésar nekartuati” tímiayi.

¹² Tutai, nuyá ni írutramurijjai chichasua amik, Jistu Páprun tímiayi “Uunt akupniuj wétaj tusam seame. Tuma asamtaí nuj wétatme” tímiayi.

Papru uunt akupniujaj áujmatsamiania nu

¹³ Tura ishichik tsawant nañkaasmatai akupin Akripia ni nuwejai Pirinisejai Jístun áujsatat tusa Sesarianam wearmiayi. ¹⁴ Tura untsurí tsawant pujusarmiayi. Tura nuj pujuiniaí Jístuka Papru túrunamun akupniun ujaak tímiayi “Juj áishmañ pujawai. Píríks nin achik eñkea ikiukmiayi, tímiayi. ¹⁵ Kame wikia Jerusaréñnum pujaj Israer-patri uuntri tura Israer-aentsu úntrisha, Papru yajauchin túraitai tusar káutrukarmiayi, tímiayi. Mantamnati tusam akupkata, tu seattiararmiayi. ¹⁶ Takui wi tímiajai “Tisha Rúmanmayá áentstikia chícham nékatsuk, mantamnati tusar akupeatsji. Tsanumpru-inia nu, emka táartin áiniawai. Tura nuyá chichamprumatsajin mantamnati tusar akupeatsji iisha” tímiajai. ¹⁷ Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai. ¹⁸ Tura Páprun tsanumprurtai tusar taar chichainiaksha, wi enentáimmiaina núnaka tícharmíayi. ¹⁹ Antsu áyatik Yus umirkar túmairin Papru nuna túrachai, tiarmiayi. Tura nuyasha áishmañ Jesus naartin nantaki iwiaakui tawai Pápruka, tiarmiayi. Nunak tiarmiayi. ²⁰ Tura wikia nú chichaman túratniun nékachu asan, Páprun aniasmajai “¿Amesha Jerusaréñnum wétaj tusam wakeramek? Nuñ nu chichaman nekartamawarti” tímiajai. ²¹ Túrasha “Atsá. Jujin pujustajai. Rúmanmayá uunt akupin Akustu Sésar nekartuati” tímiayi Papru. Takui, “nuñkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

²² Nuyá Akripia chichaak “Wisha itiursanak nu áishmañ chichaamun anturkaj” tímiayi. Tutai Jistu tímiayi “Amesha kashinkia anturkattame”. ²³ Tura kashin tsawar Akripia Pirinisejai taar, iwíaa-iwiarmamu ajas wayawarmiayi. Suntara úntrijjai tura nú péprunmayá úntrijjai wayawarmiayi. Tura nuj Jistu, “Papru itiatarum” tímiayi. ²⁴ Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishmañ íistarum. Ti untsurí Israer-aents Jerusaréñnumsha tura juj Sesarianmasha ju áishmañkan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai. ²⁵ Túrasha wíjiañkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. ²⁶ Tura wariniak uunt akupniun áatratat nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartat nuna nekaatjai. ²⁷ Warí wisha, ni yajauch túramurin áattsuk, uunt akupniunam akupkashtiniaitjai” tímiayi.

Papru Akripiaí chichamprumakmiania nu

26 Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. ² Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha

nékame. Tuma asamtai yamáí wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta' tímiayi.

Papru ni yaunchu túrutairin ujakmiania nu

⁴Wi úchichik winia nuñkaruj tura Jerusarénumsha pujusan wi túramajna nuna ashí wíi aents Israer ainia nu nékainiawai. ⁵Pariséu ajasan, ni akupeamurin itiurchat aijn ashí takamtsuk tuke umirniuitjai. Nunasha nékainiawai tura wakeruniakka etserkamnia aintui. ⁶Túrasha wikia, jakamunmayá nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úuntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákainijai. Tuma asar Yus áujkuri, tsawajisha káshisha nú enentáimtuinijai. Tura wisha nú chichamnak enentáimta asamtai wíniaka kajertuiniawai, uunt Akripia. ⁸Warí, atumsha "Yus jakancha ini-antkimniati" tátsurmek' tímiayi.

⁹Tura wisha yáunchuka Nasarénumiá Jesusnan umirkaruka kajerkatniuiti, tu enentáimniuyajai. ¹⁰Tura Jerusarénum Yus-shuar ármia nuna kajerkarmijai. Israer-patri uuntri chichamejajai untsurí áentsun Jesusnan umirkarmia nuna sepunam enkeamijai. Tura nú shuaran máiniakuisha wikia péñkeraiti tu wémijai. ¹¹Tura Israer-shuara iruntai jeen wayan ti asutiármijai, Jesusnan umirkatniun iniaisarat tusan. Tura imiá kajerkaran chíkich nuñkanmasha pataatu wearmijai achiktaj tusan' tímiayi.

Tamasku jintianam túrunamun ujakmiania nu (Túramurj 9.1-19; 22.6-16)

¹²Tura Israer-patri uuntri tsankatrukmatái, papin ni surusarmia nujaj, Tamasku péprunam wétaj tusan jíinkimijai. ¹³Tura, uunta, nantu tutupin aj, jintiá wéaj newaat ajaki ti tsáapin, tsawái nantujaj nankaamas etsantrurarmiayi. Tura wijajai wearmia nunasha núnisarañ etsantrurarmiayi. ¹⁴Tura túrunamtaí ashí nuñká tepetar wáinkiararmiayi. Wiki Israer-chichamjajai túrutun antukmajai "Sauru, Sauru, ¿urukamtaí imiá pataaturam? Amek enentáimin yajauch awajmamsame, wáaka sankanmiak numin ijiuma núnismek. Wíi aents kajera asam túruname" turutmai.'

¹⁵Túrutkui wisha "¿Amesha yáitiam, Uunta?" tímiyajai. Tutai Uunt turutmai "Wisha Jesusaitjai, ame pataatamna nútjai. ¹⁶Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai. ¹⁷Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. ¹⁸Péñker jintintiata tusan akupeajme. Kame aencha kiritniumiá jíinkiar tsáapnium wekasarat tusan, tura iwianchin umirtsuk

Yúsan umirkarat tusan akupeajme. Tura Winia enentáimtursarmataí Wisha ni tunaarin tsankurattajai. Nuna túran Yusna ajasaru áiniana nujaj apujstattajai." Nuna Jesus turutmai' tímiayi.

Papru mesekrampra umikman ujakmiania nu

¹⁹Tuma asamtai, uunt Akripia, Uunt Jesus nayaimpinmayá wantinturak turutmia nuna umirkataj tusan pujajai. ²⁰Enentai yapajjáwar Yus-shuar ajastinian, emka Tamaskunam pujuarmia nuna ujakarmijai. Tura nuyasha Jerusarénumián, Jutía nuñkanmayancha tura nútiskanak Israer-shuarchancha nuna ujakarmijai. Tura ujainiakun "Yus-shuar ajasmarum paant ajasat tusarum, péñker túratarum" tímiyajai ashí shuaran. ²¹Tura wi Yusa Uunt Jeen pujaj, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²²Yus winia yaintiu asamtai, ini-aitsuk tuke Yus-Chichaman ujainijai. Uunt ainia nunasha, tura péejchach ainia nunasha ujainijai. Tura Muisaissha, Yúsnan etserniusha tiarmia nunak ét-sereajai. Nú arantka tátsujai. ²³Krístuka wáitsatniuyayi, tura jakasha émak nantaktiniuyayi, ii uuntri tiniu ármiai. Tura Krístuka nantaki Yusa chichamen íi áentsun tura Israer-shuarchancha nútiskan ujaktiniuyayi. Nuna tu tiarmiayi. Tura núnaka wisha tu ujainijai" tímiayi Papru.

Papru Akripian Yus-shuar awajsataj tusa wakerimiania nu

²⁴Tura nuna takui Jistu kakantar tímiayi "Maaj, Papru, wáurme. Imiá unuimiatu asam wáurkame" tímiayi.

²⁵Tutai Papru tímiayi "Atsá uunt Jistu, wáurtsujai. Antsu wi tájana nuka ti nekasaiti. ²⁶Wi tájana nuna, uunt Akripia juj pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajaí" tímiayi.

²⁷Nuyá Akripian chicharuk "Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame" tímiayi.

²⁸Takui Akripia chichaak "Maaj, ishichik awajtame Papru, Yus-shuar ajastin" tímiayi.

²⁹Tutai Papru tímiayi "Tura ishichík chichamjajisha untsurí chichamjajisha, amesha uunt Akripia, tura ashí winia anturtukurmena nu, wijajai métek ajasúk tusan wakerajai. Tura antsu wia núnisan jíñkiámua núnaka wakeratsjai" tímiayi.

³⁰Papru nuna tuasua amikmatái akupniusha, uunt kapitáncha, Pirinísesha, tura nuj ashí pujuarmia nu wajakiarmiayi. ³¹Tura arant wear, túrunamun chichasarmiayi. Tura tiarmiayi "Ju áishman mantamnamnian tunaamkachuiti tura penkesha sepunmasha enkeachminiati" tiarmiayi.

³²Tura Akripia Jístun tímiayi "Ju áishman "uunt akupin nekarati" tichaitkuñkia akupmai makuitji" tímiayi.

Páprun Rúmanam akupkarmiania nu

27 Tura Páprun Ruma péprunam akupkatniun enentáimsarmiayi. Rúmaka tímiai, Itiaria nuṅkanam pujawai. Wisha Páprujai wémiajai. Páprun-cha tura chikichnasha achikma ármia nunasha Akustunu tutai suntara kapitíántrijjai nenakar akupkarmiayi. Nú kapitíáni naarí Júriuiti. ² Tura Atramitionmaya kanu Asia nuṅkanam pepru ármia nuí wétasa pujumia nu enkemprarmiaji. Tura Tisarúnikianmaya áishmañ, ni naarí Aristárku, in páchitkiauyayi. Tisarúnikiasha Masetúnia nuṅkanmaiti. ³ Nuí enkemprar kashin tsawarar Sitiun péprunam jeamiaji. Nuí jeawakrin kapitíán Juriu, Páprun waitnentak tímiayi “Ame amikrumiin wetá. Au íirmasarti” tímiayi. ⁴ Tura Sitiunnumiá jíinkir, kanujai wesar nase tukumpramprakrin Chipri núṅkaka menanmaani aa ikiukmiaji. ⁵ Tura nayaantsanam wesar Sirisia tura Pampiria nuṅkanam ayamchik naṅkamakir Mira péprunam jeamiaji. Nuka Risia nuṅkanmaiti. ⁶ Nuí jear nú kanu ikiukmiaji tura chíkich kanu Arijiántrianmaya taa Itiaria nuṅkanam wétasa pujumiayi. Nú kanunam suntara kapitíántrí, enkempratarum, turammiaji. ⁷ Tura untsurí tsawant yáitmataik wewémiaji tura ti wiántkar Nítiunam jeastatuk ajasmiaji. Tura nuísha nase tuke tukumkarta asamtai Sarmuñ nuṅkanam ayamchik naṅkaamakir, Kritia nuṅkanam áawinini ayamchik wémiaji. ⁸ Tura Kritia nuṅkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti. ⁹ Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. ¹⁰ Tura Papru chicharuk “Amikru antuktarum. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjash” tímiayi. ¹¹ Suntara kapitíántrínkia Páprunka anturtsuk, kanú wianniurín kapitíántríncha tura kanú kapitíántríncha chichamen anturkarmiayi. ¹² Tura nuí Shiir Pujutai tutainium yumitin pujustin péñkerchaitkui “Nuínkia juyanka wéartai. Pinise péprunam jeamainchuashit” ashí tiarmiayi. Nú péprusha Kritia nuṅkanam nayaants ayamach pujawai. Nú péprunam yumitin pujustinian wakeriarmiayi, arakia nuṅkaani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nuṅkaaniá tápiriri jakui, ii wétin yamaikia péñkeraiti, tu enentáimsarmiayi. Túmakui kanu emetai jiru júusar jíinkir Kítianam ayamchik wearmiaji. ¹⁴ Túrasha árusaṅ arakia kakaram nase, Nuristi tuinia nu tukumpramiayi. ¹⁵ Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. ¹⁶ Tura Kritia nuṅkanam áawinini naṅkaamakur nuínkia nase ishichik mijiantmatai, uchich kanu japikir wémiaj nu ti takasar uunt kanunam enkermiaji. ¹⁷ Tura enkerar chapikjai uunt kanun jiníkiáarmiayi wewe na-

janatai tusar. Tura náikim mukutniunam, Serti tutainium nase juramkishtajash tusar, kanunam yakí tarach aan itiararmiayi. Nu tarach nase úsuktin tusar nenar-ma ármiaji. Túrawar áyatik nase juramkitiai, tiarmiayi. ¹⁸ Tura kashin tsawarmatai nasesha chíchimisha tímia-trusaṅ kakaram aa asamtai kanunmayan káarak irun-mia nuna nayaantsanam ajapawarmiayi. ¹⁹ Menaintiú tsawant naṅkaasmatai iisha ii uwejéjajin kanunam káarak iruniarmia nusha entsá utsaṅkarmiaji. ²⁰ Tura untsurí tsawant tsawajsha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin at-sawai” tiarmiayi. ²¹ Tura iisha ti untsurí tsawant yurumtsuk matsatu asakrin, Papru ajapén wajakí tímiayi “Amikru winia nuik Kítianmayaṅka jíintsuk antur-tukuitkiurmiínkia yamáí ju ititurchatnum pujutsuk tura emenkatmatsuk pujuajai” tímiayi.

²² ‘Yamáí kashi winia Yusru suntari nayaimpinmaya wantinturkayi. Nú Yúsan umirkaitjiana nu akup-turkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámiijai kanunam enketainia ásar-matai uwempratniun Yus tsaṅkatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui. ²⁵ Wisha winia Yúsrin nekas enentáimtajai. Yusa sun-tari turutainia nuna nekas tu túrunattawai, tajai. Tuma asamtai kakartarum. ²⁶ Tura chíchimisha nuṅka uchich pújakmanum nuí patatmittiaji” tímiayi.

²⁷ Ayu, katurse (14) tsawant naṅkaasmatai nú kashi Atria nayaantsanam jeamiaji. Nuí nase náṅka-mas juram wémiaji. Nuyanka kashi ajapén wiantin armia nu nuṅka ámunam jeateman nekaawarmiayi. ²⁸ Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemaṅ ataksha nekapmamiayi. Nuínkia painti siati (27) mítru nekap-mamiayi. Tuma asa nuṅká anumsatuk ajasun nekaawarmiayi. ²⁹ Tura kayanam ijuukajai tusar ashamainiak kuaru jirun kijinian chapikjai kanú senkarin jiníkiáwar entsá ajunkararmiayi. Kijin asamtai, init tepeámtai nase juramkichmi tusar túrawarmiayi. Tura wake mesekar, tsawarti tusar matsamarmiayi.

³⁰ Tura matsatainiaj wiantin armia nu, iikia uchich ka-nunam enkemprar pisarchatjash tu enentáimsarmi-ayi. Túmainiak kanú nujinia chíkich jirun ajuntai tawa nútiksarau uchich kanun ajuntai tusar pujuarmiayi.

³¹ Tura tuma wáiniak Papru suntara kapitíántrín tura ni suntaríncha ujakmiayi. “Ausha uunt kanunmañ enketainiachkuínkia atumsha uwemprashtatrumé” tímiayi.

³² Tutai suntarsha uchich kanú chapikrin tsupirkar entsá ajunkararmiayi.

³³ Tura kashin káshik Papru ikiakártasa wakerak tími-ayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárú kakaram ajastarum, uwem-prataj tusarum. Iimiata, nekaatarum, imiatkisha tú-matsuk péemkattarme” tímiayi.

³⁵ Nuna tuasua amik Papru apatkun achik Yúsan yumĩnsamiayi ashí íimmiñana. Tura puuk yuamiayi.
³⁶ Tura apatkun yuan wáinkiar, ashí aents shiir enentáimsar yurumáwarmiayi. ³⁷ Nusha ashí aents irurmakajimiará sían̄ nuyá ataksha setenta sais (276) ármiai. ³⁸ Yurumáwar ejemakar, yurumkanka entsá ut-saᅇkarmiayi, uunt kanu wampú ajasat tusar.

Kanu pen̄ké mesermiania nu

³⁹ Tura tsawarmatai wiantin armia nu, nuᅇkan nekaacharmiayi. Túrasha éᅇkentamunam káanmatakan wáinkiar “Aᅇ kanu anuᅇtai” tiarmiayi. ⁴⁰ Nuyá jiru entsá ajuᅇman chapikriᅇn tsupirkar entsá ikiukiarmiayi. Tura kanait jĩᅇkiárma ármia nuna chapikriᅇn tsupirkarmiayi. Tura tarach kanú nuᅇiᅇn amia nuna ne-nakarmiayi. Túram kanu káanmatkanam anumsatuk ajasmiai. ⁴¹ Tura wainchi jímiar ámunam jeá kanu entsá wayá tepeamiayi. Tura kanú seᅇkarĩkia chíchimi yakí takuir ajíamu asa kupintramiayi. ⁴² Suntarsha, achik júamu armia nú shuaran máataj tusa wakeriarmiayi, yukuak pisararaiᅇn tusar. ⁴³ Tura kapitiáncha Páprun uwemtikrataj tau asa nuna túratniun tsauᅇkatkachmiayi. Antsu chichaak “Emka yukuaᅇktin nékarmena nu yukuaᅇkrum péemkatarum, tímiayi. ⁴⁴ Nuyá chíkichkia kanunmayá numi, kame náᅇkamas numi achikrum awamkarum péemkatarum” tímiayi. Tu túrawar ashí iwiaakuk jíinᅇtrarmiayi.

Marta nuᅇkanam túrunamia nu

28 Tura ashí iwiaakuk jíinᅇtrar, nu nuᅇka Marta naartin nekaamiayi. ² Tura nuᅇ matsamin armia nu, shiir awajtamsarmiayi. Tuma asamtai iisha tsetsema asakrin, tura yumisha yútakuí, uunt jinia iki-apármiai. Tura “anamaitiarum” turammaji. ³ Pápruka jinia kukarun ikiaan̄ak jinium pataamiayi. Túmawaj napi tsuéran ashamak jíin̄ki, Papru uweᅇjén nemaramiayi. ⁴ Tura nú nuᅇkanmayá aents, Papru uweᅇjén napi nemanan wáinkiar “Ju áishmaᅇsha shuáran maᅇchuashit, tiarmiayi. Nayaantsanmayá uwempraitaᅇn ni yusr̄i iwiaaku átinian suritiawai” tiarmiayi. ⁵ Páprusha ni uweᅇjén peᅇr napin jinium awaᅇmiayi. Tura peᅇksha yajauch ajaschamiayi. ⁶ Tura niisha éárchatpiash tusar ii puᅇuarmiayi. “Túmatskesha jaka ini-anchatpiash” tiarmiayi. Túrasha ti núkap pujussha pen̄ké najawᅇachmiayi. Túrunamtai, nuᅇiᅇkia nusháa enentáimprar “Pápruka yúschashit” tiarmiayi. ⁷ Nú nuᅇkanam aentsu pen̄ker̄i ámiayi ni naari Pupriu. Nú Pupriu ni jeᅇn in itiaarmamiayi. Tura menaintiú tsawant yurumkancha suramsarmiayi. ⁸ Tura nuᅇ pujarin Pupriu apar̄i tsueᅇr, numpajaī ijiarki jáamiayi. Túmakui Papru werí iyumiayi. Tura Yúsan áujtus amik uweᅇjén nin awantkamiayi. Túram peᅇnker̄i ajasmiai. ⁹ Nu túramun nekaawar, nú nuᅇkanmayá aents jaa armia nu tariar, niisha peᅇnker̄i ajasarmiayi. ¹⁰ Túram incha ti shiir enentáimturmasar núkap ajampramsamiayi. Túram ukunam ii wéᅇtin jeamtai ashí ii atsumamun suramsarmiayi.

Rúmanam jeawarmiania nu

¹¹ Ii wéᅇtsuk nú nuᅇkanam menaintiú nantu pujusmi-aji. Tura nuyá chíkich kanunam eᅇkempramiayi. Nu kanusha Arijiántrianmayá yaunchu tau menaintiú nantu yumi yútakuí nuᅇ pujumiayi. Nú kanu nuᅇiᅇn numiyus najankamu jímiar ekemiarmiayi, ni náariᅇkia Kás-tur tura Púruks. ¹² Iisha nuᅇ eᅇkemprar weri Serakúsa péprunam jeamiayi. Nuᅇ menaintiú tsawant pujusarmi-aji. ¹³ Tura jíin̄kir nuyáᅇnka nayaantsa ayamach weri Ri-jiu péprunam jeamiayi. Nuᅇ kanarmiayi. Tura kashin anariᅇ nase suut umpuunti támiayi. Tuma asamtai nú kashinkia Putiuri péprunam jeamiayi. ¹⁴ Nuᅇ jeawakrin Yus-shuar puᅇuarmia nu, ni jeᅇn juramkimiayi. Tuma asamtai nuᅇiᅇn chíkichkī tumiᅇn pujusmiayi. Tura nuyáᅇnka nuᅇkan̄ Rúmanmaani wémiayi. ¹⁵ Tura Rúmanmayá Yus-shuar, ii jeatniur̄in neka ásar jintiá iᅇkiunmaktai tusar winiarmiayi. Chíkichkia Apiu peᅇru támanum táarmiayi, tura chíkichkia, Menaintiú Jeᅇ tutainium táarmiayi. Nuna káun̄kan wáiniak Papru shiir enentáimias Yúsan yumĩnsamiayi.

¹⁶ Tura ii Rúmanam jeawakrin kapitián Juriu achikia yarumman Rúmanmayá uunt kapitiánin ejetimiayi. Túrasha, Pápruka jeᅇ ikiamas niisháa puᅇustí, tiarmiayi. Tura Páprun íisat tusa chíkichkī suntarnak ni jeᅇn apuj-tusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant naᅇkaasmatai Pápruka Rúmanmayá Israer-aentsu peᅇker̄in untsuk iki-aanak “Yatsurtiram antuktatum. Wisha Israer-áentsun yajauchin pen̄ké túrachmiayi. Tura ii uunᅇrī akup-karmia nunasha yajauch chícharkachmiayi. Tuma aiᅇn Jerusareᅇnum winia achirkar Rúmanmayá áentsnum surutkarmiayi. ¹⁸ Tura nu aencha winia anintsar, akup-katai, turutiarmiayi, wisha pen̄ké yajauchin, mantamnamnia tímianu túrachu asamtai. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiayi. Wikia wíi shuara tunaariᅇn kapitiánin ujaktinian táchaitjai. ²⁰ Tuma asamtai, yatsurtirmin, atumin untsukjarme chíchastaj tusan. Yusa anaikiamur̄i, Israer-shuarti nákaᅇnia nu táwiti wi tu étserkui, juᅇī achikiar jíᅇkiámu pujajai” tímiayi Papru.

²¹ Tutai niisha tiarmiayi “Iisha Jutiá nuᅇkanmayá aentsti, ame yajauch túramu papí pen̄ké wáinkia-achuitji. Tura ii shuar nuyá táarainia nusha “au yajauch túraití” tu uatmakcharmaji. ²² Túrasha ashí nuᅇkanam yamaram chíchaman jintinian yajauch chícharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantai iruntrami tiarmia nú tsawant jeamtai, ti untsur̄i aents Papru puᅇjamunam iruntrarmiayi. Papru jintintiniak Muisais yaunchu aar akupkamia nuᅇjaī tura chíkich Yúsnan etserniu aarmariᅇiᅇsha, Jesus nekas Yusa Anaikiamur̄inti tusa paant jintintia-awarmiayi. Nuna tura káshik naᅇkaama Yus akupea-

munam pachiinkiatniun étse-étserkua k̄jaraj̄ iniaisami-
 ayi. ²⁴ Tura Papru táman antukarmia nu, chíkichkia,
 nekasaiti tusar umikiarmiayi. Tura antsu chíkichkia,
 nekaschaiti tusar umikcharmiayi. ²⁵ Chikichkí enentaik̄
 enentáimsatin atsá asamtai, jiinki weartasa pujuarmi-
 ayi. Túmainiakui Papru chichaak “Nékaseḡ Yusa
 Wakaní yaunchu Yúsnan etserniu, Isayas naartin áar-
 marijjaj̄ ii úuntr̄in chicharuk juna tímiayi:

²⁶ “Ame weme au aents j̄u titia:

“Ántutka ántakrumsha nekaashtatrome,
 Íitkia iyakrumsha wáinkiashtatrome.

²⁷ Warí, au shuara enentá̄i katsuḡarai;
 Kuishijjaj̄ ántaksha ántichua núnin ániawai,
 Jjisha epetkamua áanin ániawai,
 Iyaksha wáinkiaj̄in tusa, ántaksha antukaj̄in tusa

Enentáimkiusha nekaawaj̄in tusa,
 Winí uwempraj̄in tusa, tura Winí tsuamaraj̄in tusa
 túrunayi”.

Nuní áarmaiti. ²⁸ Tuma asamtai, nekaatarum. Yamaikia
 Yusaj̄ uwempratin ana nuna Israer-shuarsha
 susamuiti. Tura niḡkia nekas umikiartatui” tímiayi.

²⁹ Tura Papru nuna t̄i iniaisamtai Israer-shuar nuamtak
 núkap chicharnaiyasua wearmiayi.

³⁰ Tura Pápruka nuḡin jeḡ ikiamsamunam jimiará uwí
 pujusmiayi. Tura ashí aents nin iyutaj tusa wearmia
 nuna ni jeḡen itiaamiayi. ³¹ Tuma asamtai Papru aran-
 tutsuk urukuk Yus akupeamunam ati, Uunt Jesukrístu
 túramur̄incha ashí etserkamiayi. Nútiksaḡ etserkatni-
 uncha Páprun peḡké suritkiacharmiayi.

RÚMANAM

Papru Rúmanmaya Yus-shuaran áatramania nu

1 Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmi-ayi. ³ Nu Chichamnum Yus ni Uchirín áujmatui. Ayashijjiañkia Tawit weeanum akiiniamiayi. ⁴ Tura ni tishiir wakanjjiañkia Yusa Uchirínti. Tura ti kakarmaiti. Jakamunmaya nantakmiajají nekas Yusa Uchiría nu, paant nekanamiayi. Niisha ii Uuntri Jesukrístuiti. ⁵ Ni túramujají Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi. ⁶ Atumsha nuyá shuaraitrume. Tura Jesukrístunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtam-ati un wakerutmarme. Ii Aparí Yussha ii Uuntri Jesukrístusha waitnentramainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsán ti shiir yumisajai. ⁹ Tuke enentáirjají Yusa Uchirín ashí shuarum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. ¹⁰ Ashí tsawant ni wakerutakuñkia íitjarum tusan Yúsán seajai.

¹¹ Nekas íitniun wakerajrume. Nuñ jean wakanmin yainkian Yusjají kanakchamin ajasúk tusan wakerajrume. ¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjarme. Túrasha iyatsjarme. Kame Yus-Chichaman ujaakun chíkich shuaruma áintsañ atumíincha Yus kakaram takasman wáinkiatniun wakerajai. ¹⁴ Wikia Yus akuptuku asamtai ashí shuaran ujákártiniaitjai. Unuimiaruncha tura unuimiaruncha, ti nékainia nunasha tura nékachuncha, métekrak ujakartiniaitjai. ¹⁵ Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmarjijají ti kakaram asa ashí shuaran uwemtikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisañ uwemtikramniaiti. ¹⁷ Nu chichamnum Yus enentáimsamia nu páantaiti. Júiti: Áyatik Yúsán nekas enentáimtuiniakui Yuska “péñkeraitme” tíminiaiti. Yus-Papiniumsha núnisañ tawai: “Yúsán nekas enentáimta nuna Yus “péñkeraitme” tutai tuke Yusjají shiir wekasattawai.” Tu áarmaiti.

Aentsu tunaarij

¹⁸ Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti. ¹⁹ Tura nu shuaraka ashí Yusna nekaamnia nuna Yus paant awajsa asamtai péñker nékainiawai. ²⁰ Kame yámankamtaiknumiã Yus wáinchataitiat ni najanamurijjají juka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsañkurnarchartatui. ²¹ Yúsán nékainiyat shiir awajsacharmiayi tura yumisacharmiayi. Tuma ásar aya ántra nunak enentáimtuiniak ni enentáí tunaajají piakai. ²² Tura ti nekajai tuíniyat enentáimcha núnin ajasarai. ²³ Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmancha nakumkar nuna shiir awajenawai.

²⁴ Nu asamtai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai. ²⁵ Yusna imiá nekasa nuna nakitrar antsu waitchichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnastí” tajai.

²⁶ Nuna túrin ásarmatai Yus natsanmainia nuna wakeruktinian tsañkatkarmiayi. Túramtai nuwasha áishmanjají tsaniñtinian nakitrar nuamtak yajauch awajnainiawai. ²⁷ Núnisañ áishmansha nuwajají tsaniñtinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashí wáit-satniunak sumamawarmiayi.

²⁸ Tura tuke Yúsán nakitiainia asamtai ti yajauch enentáimiainiak péñké túrachminia nuna túrawarti tusa Yus tsañkatkarmiayi. ²⁹ Nu shuar ti tunaajají piaku

ániawai. Tsanirmausha aya kuítniak wakerincha tura yajauch awajin ániawai. Nu arantcha awakmakun kajerniusha maᅇkartincha tuke máanaincha anaᅇkartincha péᅇkercha awajkartincha, tsanumniusha ániawai.³⁰ Nu arantcha chikichnasha yajauch áujmatin ániawai. Yúsnasha nakitiainiawai. Áimniusha ániawai. Tura “péᅇkeraitjai” tiar naᅇkaamantu enentáimtumainiawai. Tunáa túratniun eᅇainiawai. Aparíncha nukuríncha umirainiatsui.³¹ Enentáincha ániawai. Tana nuna umichu ániawai. Anenᅇkartichu ásar waitneᅇkartichu ániawai. Tsanᅇkurcha ániawai.³² Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chíkich yajauch túramtai ti shiir wararenawai.

Shuar tunáa túramun Yus paant nékawai

2 Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame.² Yuska nu tunaan túrin ainia nuna súmamtikiashtinkiait.³ Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá žitiurak uwemprattam?⁴ Yus ti waitnentrama asa nu tunáa ikiukim Nin enentáimtustinian katsuntramuk nákarmawai. Tura péᅇker asa wárik asutiámchakui sumamashtiniaitjai žtu enentáimtumamek? Tu enentáimkium ni waitnentramarj ántar awajsaitme.⁵ Tura tunaarum enentáimtutsuk tuke túrakmeka súmamtikiatin tsawantaj ti tunáa irutmampramujaj ti asutniáttame.⁶ Nu tsawantaj ni túramujaj métek Yus ashí shuaran akirartatui.⁷ Shuar tuke péᅇker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Niijjaj shiir pujustinian sústartatui.⁸ Antsu péᅇkera nuna wakerutsuk antsu aya yajauchin wakeruiniak Yúsan nakitiainia nuna Yus ti kajerak asutiáwartatui.⁹ Nekas Israer-shuarsha tura núnisan Israer-shuarchasha tunaan túrin ániakka ti wáitsartatui.¹⁰ Antsu nekas Israer-shuarnasha tura núnisan Israer-shuarchanacha péᅇker túrin ánia núnaka Yus ti shiir imiatkinchanum apujsartatui.¹¹ Yus ashí shuaran akantsuk mai metek iyawai.¹² Shuar Muisais akupkamun nékatsuk tunaan túraka aya júnisan sumamawartatui. Tura shuar Muisais akupkamun nékayat tunaan túraᅇka nu akupkamujaj sumamawartatui.¹³ Akupkamun aya antukarua nuka Yusaj péᅇker ániatsui antsu antukar umirainia nuna Yuska “péᅇkeraiti” tawai.¹⁴ Israer-shuarchaka Muisais akupkamun takakainiachkusha aya ni enentáijjaj nu akupkamun umirainiak¹⁵ nu umireamujaj Yus nu akupkamun ni enentáin ikiursarua nuka paant nekaamniaiti. Nujaj métek túruiniak shiir enentáimiainiawai. Tura métek túruiniachkuᅇka péᅇkercha enentáimiainiawai.¹⁶ Wi Uwempratin Chichaman étsereaj nuj ashí shuar uᅇkrisha túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawantaj tunaan túrin sumamawartatui.

Israer-shuarsha Muisais akupkamun umircha ániawai

¹⁷ Ámeka “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash.¹⁸ Yus wakeramuncha nékajai. Tura akupkamun nekaan péᅇkera nuna wakerajai, tátsumeash.¹⁹ Wakannium kusuraru ánia nunasha jintintiamniaitjai. Tura tsáapninian nekamtikiawarminiaitjai, tátsumeash.²⁰ Akupkamu ti péᅇker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash.²¹ Pai, chíkichka unuiniaitmesha žurukamtai imia ámeka unuimiatsum? “Kasamkashtiniaiti” tu étsereatsmek. Táyatmesha žurukamtai ámeka kasamam?²² “Tsanirmash-tiniaiti” tátsumek. Enta, žurukamtai ámeka tsanirmam? “Ántar-yusan nakitiajai” tátsumek. žUrukamtai ámeka nu yusa jeᅇniᅇ kasamam?²³ Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek.²⁴ Yus-Papini-umsha núnis áarmaiti: “Átum péᅇker umirchamujaj Israer-shuarcha Yúsan yajauch chicharainiawai.”²⁵ Muisais akupkamia nu ashí umireakmeka nii timia núnismek tsupirnaktin péᅇkeraiti. Tura takamtsuk umireachkumka tsupirnakcha núnisketme.²⁶ Chíkich shuarsha tsupirnakchaitiat Muisais akupkamun umireakka tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui.²⁸ Kame nekas Israer-shuarka aya pátatkechu antsu tuke enentáijjaj Yúsnan wakera núiti. Núnisan nekas tsupirnak-tinkia aya ayashjíjajinchuiti antsu enentáiniam shiir átinia núiti. Nekas akupkamu aya áarchamuiti antsu nekas enentáijjaj umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

3 Núnis ajšha Israer-shuar ainia nu žwarí péᅇker-nak takakainia? Tura tsupirnaktincha žwariniak yayá? ² Ti péᅇkeraiti. Warí, émkaka, Yus ni chichamᅇn Israer-shuaran súsacharmakia. ³ Kame chíkich chíkich umichu ániakui Yus tsanᅇkatkamia nuna nú shuaran súsachmatainᅇka nuikia “Yus umichuiti” žtítinkiait? ⁴ Péᅇkea. Antsu Yuska nekas túratniua nujaj métek ashí túriniaiti. Shuar umichu ániakuisha ni támarin mash umiktatui. Ni tamajaj shuáran wáittrin awajeakka nusha péᅇkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

⁵ Nu arantcha, “Wi tunaan túramujaj Yus imiá péᅇkera nuna paant awajeakka žurukamtai winia asutiua? žNuka péᅇkerkait?” tíchatapash. (Kame aents chichainak núnisnak tajai.) ⁶ Warí, Yus péᅇkerchaitkiun-ka žitiurak ashí shuara tunaarın súmamtikiawarat? Kame imiá péᅇkeraiti.

⁷ Núnisan, “Wi umirkachmajaj Yus tuke umiiniana nuna paant awajeaknaka nuikia nujaj in shiir awajsamtai žurukamtai “tunaitme” túruta?” tíchatapash. ⁸ Warí,

“tunáa túramujaj Yúsan péñker awajeajai,” tú nekas enentáimpramniaitkiuñkia shuar nuñkia “Wats, ashí péñker áti tusar tunáa túratai” tímin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin ániawai.

Ashí shuar tunáa túraitji

⁹ Nuikia Israer-shuartikia chikichjaj nankaamas ¿péñkerkaitij? Penkeshá. Warí, Israer-shuartisha Israer-shuarchajajsha ashí métekrak tunaan túrin ániawai. Núnaka jú áarmajaj paant awajsaitjai. ¹⁰ Yus-Papisha núnisañ tawai:

“Péñkeran túrin chikichkisha atsawai.

¹¹ Yúsnan nekaatniun nakitiainiawai. Yusnasha eñiniatsui.

¹² Yusnumiá kanakiar menkkakatniunam wénawai. Chikichkisha péñkeran túrin penké atsawai.

¹³ Ashí yajauch chichainiak iwiansamu yama urainiua núnisañ ániawai. Ni chichamejaj tuke anañkartin ániawai. Chichame napía áintsañ najamin ániawai.

¹⁴ Aya yajauchin kakaram áujmatin ániawai.

¹⁵ Máataj tusa wárik yujarin ániawai.

¹⁶ Aya ti itiurchat ti yajauch awajin ániawai.

¹⁷ Shiir pujustinian nékainiatsui.

¹⁸ Ishichkisha Yúsan ashamenatsui.”

¹⁹ Yaunchu akupkamun umirkatin ainia nú shuar aya tákamtak umirkatin ániawai. Tuma asamtai ashí shuar umirkachu ásamatai Yus nujaj súmamtkiawartatui. Túrakui niisha pachischamin ániawai. ²⁰ Akupkamuka aya ii tunaarjñ paant awajturmajj. Tuma asamtai akupkamu péñker umirkatniujaj Yus “péñkeraitme” turamchamniaitji.

Aya Yus shiir enentáimtusar uwempramniaitji

²¹ Yus-Chicham yaunchu áarmanum itiura Yus in “péñkeraitme” túramminiaitij nuna paant tawai. Kame akupkamujajñchuiti. ²² Antsu iisha ashí shuarsha núnisañ aya Jesukrístu shiir enentáimtakrin Yus “péñkeraitme” túramminiaitji. ²³ Kame ashí shuarti tunáa túraitji. Tuma asar Yusjaj métek péñker ajastin penké jeatsji. ²⁴ Tura Yus in waitnentrama asa kúitichajaj “péñkeraitme” túramji. Jesukrístujaj uwemtikrampra asa túramji. ²⁵ Tura Krístun akupkamiayi ni jakamujaj ashí tunaan asakátratniun. Túramtai shuar Nin nekas enentáimtuiniakui Yus tsañkuramniaiti. Yaunchu tunáa túramun katsunteak enentáimtuschiayi. Yamái tsañkuramnia nuna yaunchu nekáa, nuna túramniuyayi. ²⁶ Tura yamáiya tunaancha tsañkureak ashí shuar Jesusan nekas enentáimtuinia nuna “péñkeraitme” tuke tíminiaiti. Krístu jakamujaj nuka paant ajasai.

²⁷ Nújajñkia ii péñker ajasjinia nu “winia kakarmarjaj túrunajaj” tíchamnia asar ¿nankaamantu enentáimtumarminkaitij? Penkeshá. Warí, akupkamu umitsuk aya Krístu nekas enentáimtakrin Yus “péñkeraitme” túramji. ²⁸ Nujaj páantaiti. Akupkamu umirtsuk aya Je-

sukrístu shiir enentáimtakrin Yus “péñkeraitme” túramminiaitji.

²⁹ Warí, Yuska Israer-shuarnasha tura núnisañ Israer-shuarchancha mai ni Yúsriñchukait. ³⁰ Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “péñkeraitme” tíminiaiti. ³¹ Shuar Yúsan shiir enentáimtamujaj péñker ajastin ániakui nujaj ¿akupkamu ántar awajsamukait? Atsá. Antsu nuna nankaamas umirkatin awajsamuiti.

Apraámsha Yúsan shiir enentáimtamujaj péñker ajasmania nu

4 Ashí Israer-shuara uuntrj Apraám enentáimtus-tai. Niisha ¿itiurak Yusjaj péñker ajasma? ² Ni péñker takasmajaj Yusjaj péñker ajasuitkiuñka nankaamantu enentáimtumarainti. Antsu Yus-Papí tawai:

“Apraám Yúsan shiir enentáimtakui Yus “péñkeraitme” tímiayi” tawai. Nu túramu asa Apraámsha Yus íimmi-anum nankaamantu enentáimprachminiaiti. ⁴ Shuar íiamna nu takasmatai ¿aya tsañka asam akikchatmek? Warí, ni takasmanum páchitsuk akikchatniukait.

⁵ Antsu shuar ni péñker turamurj enentaimtsuk áyatik “Yus tunáa shuaran péñker awajniuiti” tu enentáimtakui Yuska tsañka asa “péñkeraitme” tawai. ⁶ Tura péñker túrachunak Yus “péñkeraitme” takui nu shuar shiir warasminiaiti. Núnisañ tawai uunt akupin Tawit:

⁷ “Shuar ashí ni tunaarjñ Yus asakátar tsañkuramu ana nuka shiir enentáimpramniaiti.

⁸ Uunt Yus ni tunaarjñ enentáimtachma asa ti warasminiaiti.” Tu tímiayi Tawit.

⁹ ¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “péñkeraitme” tímiayi. ¹⁰ Tura Apraám tuke tsupirnatñ Yus nuna tímiayi. Emka Yus “péñkeraitme” timia nú ukunam Apraám tsupirnakmiayi. ¹¹ Apraám tsupirnatñ Yus shiir enentáimtusmatai Yus “péñkeraitme” tusa “tsupirnaktniaitme” tímiayi. Nújajñkia ashí Yúsan shiir enentáimtuinia nú shuar tsupirnatñkesha Apraám weeá ániawai. Tura nu shuaran Yus “péñkeraitme” tawai. ¹² Tsupirnakusha aya tsupirnakusa asa Apraám weeá ániatsui antsu nu arant Apraámjaj métek Yúsan shiir enentáimtuinia nuka Apraám weeá ániawai. Kame Apraám tuke tsupirnatñ Yus shiir enentáimtusmiayi.

Yus shiir enentáimtamujaj Nii timia nu uminkiattawai

¹³ Yaunchu Apraáman Yus chicharuk “Amincha amée weeá shuarnasha jú nuñkan susattajaj” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “péñkeraitme” taku nuna tsañkatkamiayi. ¹⁴ Kame aya akupkamun umirniun súsatniuitkiuñkia nuikia Yus enentáimtustin ántrai. Tura Yus Apraáman timia nusha ántrai. ¹⁵ Akupkamu akui shuar umirkachka ti asutniáshtatuak. Tura atsakuiñkia ¿asutniátñiukait? ¿Itiurak umirtsuk ikiukñ?

¹⁶ Tuma asamtai Yus ti aneñkartin asa Nin nekas enentáimtuinian ashí tsañkatkaiti. Nújajñkia Apraám weeasha Yus Apraáman timia nuna páchitsuk wáinkiártatui. Iisha Apraámjají métek Yus nekas enentáimtakur ní weeaitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsañkatramkat-taji. ¹⁷ Kame Yus-Papinium Apraám áatramuiti: “Untsurí shuarsha amée weeá ajasartatui.” Nu asamtai iisha Apraámjají métek Yus shiir enentáimtakrinkia Yus incha Apraám weeá áintsañ íirmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksañ nájanui.

¹⁸ Yus “ti pampañtatme” takui Apraám ti uuntach áyat Yus timian enentáimtak yajutmartinian nákasmiayi. Nujají untsurí shuar ní weeá ajasarmiyai, Yus timia áintsañ. ¹⁹ Apraámsha sian (100) uwí takakuitiat tura ní nuwé Sarasha júretsuk uunt ajasmataisha tuke iniait-suk Yus tímia nuna nekas enentáimtusmiayi. “Yus nekasash ta” tútsuk shiir awajsamiayi. Nujajísha nuna nañkaamas kakaram ajasmiayi. ²¹ Tuma asa “nekas Yus tana nuna páchitsuk umiktatui” tu enentáimpramiayi. ²² Nu asamtai Yus “péñkeraitme” tímiayi.

²³ Tura Yus nekas enentáimtamunam Yus “péñkeraitme” tana nu aya Apraámnak áatrachmaiti.

²⁴ Antsu incha túramji. Iisha núnisrik ii Uuntrí Jesus nekas enentáimtakrinkia Yus incha “péñkeraitme” turamratji. Jesuska ii tunaarín jarutramkatniun surunkamiayi. Tura nujají Yus in “péñkeraitrume” taku Jesusan ataksha iniantkimiyai.

Yus “péñkeraitme” túramkurin shíiraiti

5 Tuma asamtai Yus nekas enentáimtakrin Yus “péñkeraitme” túramji. Nujají iisha Yusjají shiir nawamnaikiar pujaji. Núnaka ii Uuntrí Jesukrístu ní jakamujají sumartamkamiaji. ² Tura Nii shiir enentáimtakur Yusaí weankaitji. Tura Kristu jarutramkakrin Yus ti anenmaji. Tura tuke anenma asakrin Niijjají métek shiir ajastin nákakur waraaji. ³ Nu arantcha yamáí itiu- chat pujayatrik nu itiu- chatjají unuimiartatji tusar waraaji. Katsuntratniuncha unuitiamji. ⁴ Tura nu unuimiarar ii katsuntram paant átatui. Tura nuyá Yus ti shiir awajtamsattajnia nuka shiir enentáijjají nákastatji. ⁵ Nu ti shiir enentáimsar nákamujají anañmamtsuji. Yuska ni Shiir Wakanjñ ii enentáin pujurtamuk ni aneñkartutairín ti paant awajturmají. Tuma asamtai Yus túratin nákañnia nu imiá nekas wainkiattaji.

⁶ Iikkia peñké uwemprachmin asakrin tsawant jeamtai Kristu ashí shuara tunaarín jarukmiayi. ⁷ Shuar chíkich shuaran uwemtikratniun ¿jaruktatuak? Péñker shuar aijn jarukchattawai. Kame ti peñkeraitkiuñkia jarukchaintiash. ⁸ Antsu ii tuke tunáa árinñ Kristu jarutramkamiaji. Nujají in ti anenmajnia nuna ti paant in- akturmaji. ⁹ Tura ni numpejají tunaaríncha awajsamu asar imiá nekas Yus asutiámatniua nuyá uwempraitji. ¹⁰ Yusa nemasrj áyatar Yusa Uchirí jakamujají yamaikia Yusjají shiir nawamnaikiar pujaji. Nu arant nuñkia Kristu tuke iwiaaku asa iijjají tsanñkiu asa ashí yajauchin-

mayá uwemtikramar tuke shiir awajtamsattaji. ¹¹ Ii Uuntrí Jesukrístu jakamujají Yusjají shiir nawamnaikia asar ti waraaji.

Atañsha tura Krístusha túrawarma

¹² Ayu. Yámankamtaik emka áishmañ Atañ niñki tunaan túramtai nú tunaajají ashí shuar tunaarintin ajasarmiyai. Tura ashí tunaarintin ajasar mash jákatin áiniawai. ¹³ Akupkamu atsakuñkia umirkachma nekaachminiaiti. Tuma aijn Muisais akupkamu atsajsha tuke tunaan túrin ármiai. ¹⁴ Atañ pujumia nuyá Muisais tuke akupeatsajn shuara tunaarí paantcha aijn ashí shuar tunaan túrawar jákarmiyai. Kame ni tunaarí Atañna áintsachauyayi. Atañka Yus akupkamu paant ujakman umirkachmiayi. Antsu nu shuar Yus akupkamu paant nékainiachiatañ tunaan túrin áiniak jákarmiyai. Tura Atañka Krístujají apatkar enentáimpratai.

¹⁵ Atañ tunáa túramia nujají apatka iisam, Yus in tsankatramaj nuka nañkaamas péñkeraiti. Kame Atañ niñki tunaan túramujají ashí aents untsurí armia nu, tunaarintin áiniak, jákarmiyai. Tura Yus in ti anenma asa chikichik áishmañjají nuna nañkaamas tí shiiran tsañkatramaji. Jesukrístujají untsurí shuaran uwemtikrar ti shiiran tsañkateawai. ¹⁶ Atañka tunaarí imiá yajauch aijn nuna nañkaamas péñkeran Yus tsañkatramkaitji. Iis, aya chikichik tunaan túramujají aents sumamawarmiyai. Antsu Yus uwempratniun tsañkatramaj nújajñkia ti untsurí tunaan asakáruiti, tura “péñkeraitme” túramji. ¹⁷ Chikichik áishmañ tunaan túramujají aents jákatin áiniawai. Tura nuna nañkaamas chikichik áishmañ Jesukrístu túramujají ti shiir pu- justatji. Kame Yus ti anenma asa ii péñker túratsriniñ “péñkeraitrume” túramji. Nu asamtai yamaram iwiaakmanum kakaram ajaji.

¹⁸ Atañ tunaan túramujají ashí tunaarintin ajasar jákarmiyai. Núnisañ Jesukrístu péñker túramujají ashí shuar Yus “péñkeraitme” timia nuka yamaram iwiaakmajají tuke pujusartatui. ¹⁹ Núnisañ chikichik áishmañ umirkachmajají untsurí tunaarintin ajasarmiyai. Tura chikichik áishmañ umirkamujají untsurí shuar péñker awajnasarmiyai.

²⁰ Wats, tunáa ti paant atí tusa Yus ni akupkamurín susamiayi. Túrasa ti tunáa pampaakui Yus nuna nañkaamas waitnentramak nu tunaan asakátramji. ²¹ Shuar tunaan túrin ásar jákatin ármiai. Tura núnisañ ii Uuntrí Jesukrístu túramujají Yus in “péñkeraitrume” túramkurin iisha tuke iwiaaku pujustiniatji.

Krístujají jaka asar tunáa túrachminiaitji tura Krístujají tsanñkiu asar iwiaakuitji

6 Núnisaitkiuñkia Yus nañkaamas waitnentrampratai tusar ¿tunáa túratatjik? ² Péñkea. Warí, iikia tunáa túrashtin jákaitji. Jáka ¿itiurak tunaan túramniait? ³ Imianniutikia Krístujají tsanñkiu asar imianir Ni- ijjají métek jaka áintsar aji. ⁴ Tura imianir Krístujají jaka áintsar métek iwiaarnasuitji. Tura Yus ti kakaram asa Krístun jakan iniantkimia núnisañ incha nu kakarmajají

yamaram enentáijjaj pēnker wekasatniun ini-antamkimiaji.

⁵ Krístujaj tsaniñkiu asar Niijjaj métek jaka áintsan̄ketji. Tura núnisan̄ Niijjaj métek nantaktiniaitji. ⁶ Yaunchu enentáimtaiñkia Krístujaj métek jaka asamtai ii yajauch wakerutain emen̄kátrutmakuitji. Tuma asamtai yamaikia pen̄ké umirkashtiniaitji. ⁷ Kame z̄jákaka itiurak tunaan túrat? Yamaikia an̄kant ajasuitji. ⁸ Iisha nekas Krístujaj jákaitkiurkia Niijjaj métek tuke iwiaaku pujustin enentáim̄ji. ⁹ Kame Krístuka chikichí jaka nantakin asa atakka jákashtatui. Túmaitkiui atakka ajakrachminiaitji. ¹⁰ Krístu chikichí jaka asa ashí tunaajaj itit awajsachmin ajasuítí. Tura yamaikia iwiaaku pujá asa Yúsan shiir awajsatniun pujawai. ¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntr̄i Jesukrístujaj tsaniñkiu asarum iwiaaku pujakrum Yus shiir awajsatarum.

¹² Nu asamtai tunaaka ayash̄miin akuptamkashtiniaitrum. Ayash̄i wakeramur̄i umirkashtiniaitrum. An̄kantaitrum. ¹³ Atum̄i ayash̄i tunaan túrat tusarum ikiasairap. Antsu jakamunmayá nantakin asarum Yus wakeramu túratin surumaktarum. Tura ayash̄misha aya pēnkernak túratí tusarum Yus íktustarum. ¹⁴ Akupkamu umirkatniujaj iwiaaku pujatsrum. Antsu atumin Yus ti anenma asa yamaram iwiaakman suramsaitrum. Tuma asamtai yamaikia tunaaka nu-pettamkachminiaitji.

Tuke umireajnia nuna takarniur̄ntji

¹⁵ Nuikia akupkamu umirtsuk antsu Yus ti anenma asakrin iwiaaku pujakur̄ z̄“Páchitsuk tunaan túramniaitjai” títiatjik? Pēn̄kea. ¹⁶ Tuke umireajnia nuna takarniur̄ntji. Nuka nékatsrumek. Tura ni takar̄in ajasam umirkatniuitme. Tuma asamtai tunáa umirkurkia ni takarniur̄ntji tura umirkar jakattaji. Tura Yus umirkurkia pēnker wekasattaji. ¹⁷ Atumsha yáunchuka tunáa umirniuiatrum ikiukrum yamaikia nekas chicham antukurmena nu nekas atum̄i enentáijjaj umirkaitrum. Tuma asamtai Yus ti yum̄insatniuiti. ¹⁸ Yamaikia tunaanumiá an̄kant ajasu asarum ti pēnker wekasatniunam pachiinkiaitrum. ¹⁹ Paant nekaak tusan takarniun pachisan tájarme. Wats, yaunchu atum̄i ayash̄i muj̄miainian tura ashí yajauchin túrat tusarum tsan̄kamakmarme. Núnisrumek yamaikia atum̄i ayash̄i pēnkeran túrat tusarum tura tuke Yusjaj shiir wekasat tusarum tsan̄kamaktarum. ²⁰ Atumsha tunáa umirniuyarme nuikia pēnker wekaichauyarme. ²¹ Tura nújajsha z̄warí pēnkerna yáinmakmarum? Iista, yamá natsanmainchakait. Nusha jákatniunam júawai. ²² Antsu yamaikia, tunaanumiá uwempra asarum Yus umirniuitrum. Antsu júka Yusjaj shiir wekasatniunam júawai tura nuyá tuke iwiaaku pujustatrum. ²³ Tunáa takarkumka tuke jákatniun akirmaktatui. Antsu Yuska iikia takaatsriniñ pen̄ké ántar tuke iwiaaku pujustinian suramsattaji. Ii Uuntr̄i Jesukrístujaj tsaniñkia pujá asakrin nuna túrutmattaji.

Akupkamujaj an̄kantaitji

⁷ Enentáimpratarum yatsuru. Jákaaka akupkachminiaitji. Aya iwiaakna nu akupkamniaitji. Nu paant nékatsrumek. ² Wats, nuwá nuátkamu ni aishr̄i iwiaakkui niijjaj tsaniñ pujustiniaitji. Tura aishr̄i jakamtai an̄kant ajawai. ³ Tuma asamtai aishr̄i iwiaakaj̄n chíkich áishman̄jaj tsaniñakka tsanirmawai. Tura ni aishr̄i jakamtai chíkich áishman̄jaj páchitsuk nuatnakminiaitji tura nuikia tsanirmatsui.

⁴ Núnisrumek atumsha, yatsuru, Krístu ayash̄i mu-chitmar̄i ajasu asarum akupkamu emettachmin jaka áintsarum ajasuitrum. Túrakrum Krístujaj nuatnaikiatin áintsarum an̄kantaitrum. Niisha jakamunmayá nantakniuiti. Yamaikia Krístunu ajasu asar Niijjaj tsaniñkiar Yus wakeramu pēnker túratniuitji. ⁵ Yaunchu wakerutai umirniuyaj nūj akupkamu enentáimtusar nuna nan̄kaamas yajauchia nu wakerimji tura jákatniunam juramkimji. ⁶ Antsu yamaikia akupkamu emettachmin jaka asar an̄kant ajasuitji. Túrunar akupkamu yaunchu áarma nu iniaisar yamaikia Yusa Wakan̄ijjaj tsaniñkur yamaram iwiaakmajaj pēnker wekasamniaitji.

Winia enentáirūj tunáa ana nu

⁷ Núnisaitkiuñkia “Akupkamu yajauchiiti” z̄titiyajsh? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchajaj. ⁸ Tura nu akupkamun enentáimtakui winia enentáirūj tunáa ana nu ashí yajauchin ti wakerumtikrimiyai. Kame akupkamu atsakui tunaan ti enentáim̄tichaintjai. ⁹ Yaunchu akupkamun nékachkun nán̄kamsanak enentáim̄niuyajai. Tura akupkamun nekaan tunaan nekaamjai tura jaka áintsanak ajasjai. ¹⁰ Tuma asamtai akupkamujaj pēnker wekasatniuititan umirkatniun tujintiaku aya jákatniunam jurukni. ¹¹ Kame tunáa wakerutaiñkia nu akupkamujaj anan̄krua pēnker iwiaaku pujustinian surutsuk nu akupkamujaj jákatniunam jurukmiyai.

¹² Tuma asamtai akupkamuka Yusna asa ti pen̄keraiti. Yajauchichuiti. ¹³ Nuikia z̄pēnkera nu jákatniunam júrawak? Atsá. Antsu tunáa wakeruktin jákatniunam jurukmiyai. Nuna tura asa tunáa imiá yajauchia nu nekaamniaitji. Tura tunáa wakerutai pēnker akupkamujaj jákatniunam jurukmiatai, nūjaj Yus “tunáa wakerutai imiá yajauchiiti” tusa paant awajsamiyai. ¹⁴ Akupkamuka Yúsnaiti. Nu paant nékajai. Antsu wikia ayash̄na nuna wakerakun tunaan umireajai. ¹⁵ Kame túrajna nuna itiurchat enentáim̄tajai. Pēnker túratniun wakeraj nuna túratsjai. Antsu nakitiaj nuna nekaska túriniaitjai. ¹⁶ Akupkamu pēnkeran nekaan umirkatniun wakerajai. Túrayatnak umirchaitjai. ¹⁷ Tuma asamtai wíchaitjai tunaan wakerakun túrajna nuka. Antsu winia enentáirūj tunáa wakerutai pujá asa nu túrumtikriniaitji. ¹⁸ Yaunchu enentáim̄tai winia enentáirūj pujana nu pen̄ké yajauchiiti. Nuna ti paant nékajai. Tuma asamtai pēnker túratniun wakerayatnak pen̄ké tujintiajai.

¹⁹ Pénker túratniun wakerayatnak túratsjai. Antsu tunaan nakitiaj nuna túrajai. ²⁰ Nu asamtai nakitiaj nuna túrakun wíchaitjai antsu winia enentáiruġ tunáa wakerutai pujana nu túriniaiti.

²¹ Júnisaiti. Pénker túratniun wakerakun aya tunaan ínkiuajai. ²² Nekas enentáirġaj Yusa akupkamurġn wakerajai. ²³ Tumaj yaunchu enentáimtai winia enentáiruġ pujurtak nupettawai tura nekas wakeraj nuna akirturuġ.

²⁴ Maa, ti waitiajai. Jú ayash wakeramujaj jákatniunmayá žyaki uwemtikrurat? ²⁵ Yuska ii Uuntri Jesukristujaj túrutmamniaitji. Tuma asamtai Yúsan ti yumínkijajai. Ayu. Winia enentáirġaj Yus akupkamun umirniuitjai. Antsu winia ayashruġaj tunaan umireajai.

Yusa Wakanġajai pénger wekasatin

8 Jesukristujaj tsaniġkiarun Yuska “tunaan túrawar jákatniunam wémin áiniawai” tatsui. Nu shuar ni ayashġ wakerana nuna umirtsuk Yusa Wakanġ wakerana nuna umirainiawai. ² Jesukristujaj tsaniġkiu asakrin Yusa Wakanġ nekas iwiaaku awajtamsaitji. Tuma asamtai tunáa túratniunmayá tura jákatniunmayásha anġkant ajasuitji. ³ Ayash wakerutainġkia, wi akupkamun enentáimtakui, nuna nanġkaamas tunaan wakerumtikrimiayi. Tuma asamtai akupkamuka yáinkichminiuyi. Antsu akupkamu tujinkiamia nuna Yus túrait. Ni Uchirġn ayashtin awajas tunaan jarukat tusa akupkamiayi. Tura nujaj ayash tunáa wakeramun nupetkamiayi. ⁴ Túramtai ii yamaikia ayash wakerana nu umirtsuk tura Yusa Wakanġ wakeramu túrar akupkamu tana nu umirniuitji. ⁵ Ayash wakeramun umirainia nu, ayashnia nunak enentáimtuiniawai. Antsu Yusa Wakanġ wakeramun páchinia nuka Yúsnan enentáimtuiniawai. ⁶ Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusġaj shiir nawamnaikiar tuke pujusartatui. ⁷ Aya ayash wakeramun enentáimtuinia nú shuar Yusa nemasrġ áiniawai. Yus akupeamun nakitiainia ásar ni taman umirkatniun penġké jeainiatsui. ⁸ Tuma asamtai shuar ni ayashġ wakeramurġ warareakka Yúsan shiir awajsachminiaiti.

⁹ Tura átumka ayash wakeramu umirtsuk tura Yusa Wakanġ pujurtamkurmin ni wakeramu enentáimtiniaitrueme. Ashí shuar Krísturtin ainia nu ni Wakanġn takaku áiniawai. Takakchaitkiunġka nuikia Krístunuchuiti. ¹⁰ Tura Kristu atumin pujurtamkurminkia atumí ayashġ tunaajaj jakamnia aġn Yus “pénkeraitme” túramu asamtai atumí wakanġnġkia nekas tuke iwiaakuiti. ¹¹ Yus Jesukristun jakan iniantkimiaayi. Tuma asamtai ni Wakanġ atumí enentáġn pujurtamkurminkia Jesuan iniantkimia núnisaġ nu Wakanġaj yamaram iwiaakmajaj iniantamkittiarne.

¹² Tuma asamtai, yatsuru, ayash wakeramu penġké umirkashtiniaitji. ¹³ Ayash wakeramu umirniuitkiurmeġka jakattarme. Antsu Yusa Wakanġ pujurtamkurmin ayash wakeramu nupetkarmeka pénger wekasarum nekas iwiaaku áatrume.

¹⁴ Ashí shuar Yusa Wakanġ timiajaj métek wekainia nu, nu shuar nekas Yusa uchirġnti. ¹⁵ Yusa Wakanġ in pujurtamkurin Yusa uchirġ ajasar sapiġmiatsuk Yusaj weamkar “Aparú” tímimniaitji. ¹⁶ Nu Wakan “nekas Yusa uchirġnme” ii enentáġn túramji. ¹⁷ Tura ni uchirġ ajasu asakrin Yus tímia núnisaġ ashí Níiniun suramsattaji. Krístun ashí susattana núnisaġ incha suramsattaji. Yamái Krístunu takaakur wáitiakrikia ukunam Krístujaj métek ti shiir awajnastatji.

¹⁸ Maa, yamá ti wáitiakrishia ukunmanġka nayaimpiniam ti shiir pujakur nu wáitsamu kajinmatkittiaji.

¹⁹ Tsawant jeamtai Yus ashí ni shuarġn Niġġaj métek ti shiir awajsartatui. Nuġn nekas Yusa uchirġ ainia nu ti paant nekanattawai. Nu tsawantan wáinkiatniun ashí Yus najanamu írrunna nu ti nákeinawai. ²⁰ Ashí Yus najanamia nuna yámankamtaik ti pénger najanamiayi. Túrashia yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsanġkatkamiayi. Tuma asamtai iwiarnartin tsawantan nákwai. ²¹ Nu tsawantaj ashí Yus najanamu emesnartinniumiġ uwemprartatui. Tura ashí Yus najanamuka shuar Yusa uchirġ ajasarua nujaj métek shiir awajnasar anġkant ajasartatui. ²² Yamaisha ashí Yus najanamu ainia nu, nuwá jatema wáitia nunis ti wáitiainiawai. ²³ Yus najanamuka ashí wáitiainiawai. Iisha Yusa Wakanġ takakiatar ti wáitiaji. Tura Yusa Wakanġ takakkur ashí Yus suramsattajnia nu nékaji achiktin. Tuma asar nekas Yusa uchirġ paant awajnastin tsawant nákwai. Nuġsha ii ayashġsha anġkant awajnastatui. ²⁴ Nu tuke enentáimtuki wéakur takamtsuk uwemprattaji. Yamái nu wáinchiatar tuke nákwai. Warí, žwáinjinia nu nákwajik? ²⁵ Tuma asar tuke waincha asar katsuntrar nákwai.

²⁶ Nu arantcha ii kakarmachu nekapeakrin Yusa Wakanġ yáinmaji. Kame Yus áusjatniusha nékachkurin in yáinmaji. žWarí seattaj tura itiur seatġik? Nu nékatsji. Tura itiurchat pujakur ti wáitiakrincha Yusa Wakanġ in áujturmaj. ²⁷ Tura Yus ii enentáġn enentáimtaj nuna nékaiti. Tuma asa ni shuarġ asakrin ni Wakanġ ni wakeramujaj métek seatramkurin ántawai.

Ti nupetmakuitji

²⁸ Yus anea asakrin ashí nanġkaatamjinia nujaj Yus pujurtamji. Tura nujaj pénger awajtamji. Nu paant nékaji. Tura Ni wakerimia núnisaġ Ní shuar awajtamsaitji.

²⁹ Yámankamtaiknumiġ in nekarmak ni Uchirġ Jesukristujaj métek ajasat tusa achirmakmiayi. Nujaj Yusa uchirġ untsurġ ajasji. Tura Kristu ii iwiaġrinti. ³⁰ Tura Yus achikmia nuna Niiniu awajsamiayi. Tura nu shuaran “pénkeraitrueme” tímiayi. Tura ti shiir awajsamiayi.

³¹ Wats, nuikia Yus in yáinmakrin žyaki in nupetamkattaj? ³² Ni Uchirġncha suritramkachmiayi antsu in jarutramkat tusa akupturmakmiayi. Tura asa ni Uchirġġaj métek ti shiira nuna ashí suramsashtatġik.

³³ Yus achikmia nú shuaran žyaki sumamtikiat? Yus Ápaka “pénkeraitrueme” tiniu asa penġké túrashtatui.

³⁴ Tura žyaki “jinium apenáti” titi? Warí, Kristu penġké

túrashtatui. Antsu nu shuaran jarukmiayi. Tura nantaki Yusa untsuurinj ekemas in áujturmajj. ³⁵ Kristu ti anenma asakrin in akantamkitin atsawai. Wáitiakrishá, itiurchat inkiuakrishá, shuar áinframkurnishá, tsukamakrishá, entsatai atsakuishá, tsúumainjáishá, tura mantamnakrishá, nujaj “Kristu anentsui” tíchamniaitji. Nuka Kristu anenkrattairiyá akantamkitin jeatsui. ³⁶ Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmajj.”

Tu áarmaiti.

³⁷ Tuma ajn Kristu in anenma asakrin Nijijaj ti nupetmakuitji. ³⁸ Kristu anenkrattairiyá akantamkitin penké atsawai. Nuna ti paant nékajai. Jákatniushá, iwiaakmasha, nayaimpinmayá suntarsha, ashí nayaimpinmasha tura nunkanmasha akupin ainia nushá, yamáí írúnna nushá, ukunam átatna nushá, ³⁹ yakí írúnna nushá, nunká írúnna nushá, kame ashí Yus najanmu írúnna nushá Yusa anenkrattairiyá penké akantamkichminiaitji. Yusa anenkrattairiyá ii Uuntrj Jesukristu túrunamujaj paant wainji.

Yus Israer-shuaran ni shuarj arti tusa achikiarmiania nu

9 Yamái tájana nu Kristu shuarj asan imiá nekasán wáitruitsuk tájai. Winia enentáirsha tura Yusa Wakanísha “nekas tawai” turutainiawai. ² Israer-shuaran waitnentakun ti kuntuts enentáimjai. ³ Wíishuar áiniakui Krístunmayá kanakin yuminnaraintjai nujaj wíishuaran yáinminiaitkiunka. ⁴ Israer weeá shuar áiniawai. Tura ni uchirjá áinis Yus achikiaruiti. Yusa wincharísha nijijaj pujumiayi. Yaunchu Chicham ni weatrijaj iwiamuncha tura Muisais akupkamuncha susamiayi. Tura Yusa Jeeñ Nin shiir awajsatniun jintintiamiayi. Tura ukunam shiir tsanatkattana nunasha ujakmiayi. ⁵ Ni weatrin Yusan ti penker enentáimtin irunmiayi. Krístusha aents ajas nú shuarum akiiniamiayi. Krístuka Uunt Yus asa tura ashí akupin asa Niñki tuke shiir awájnastí. Núnisaj atí.

⁶ Kame Yus ashí Nii timia nuna Israer-shuaran súsachmataisha nujaj “Yus timia nu uminkiachuiti” tíchamniaiti. Antsu júnis enentáimpratniuiti: ashí Israer weeá áiniayatan Yusjaj íismaka ashí nekas Israer-shuar áiniatsui. ⁷ Núnisaj Apraám weeá shuarsha ashí nekas ni shuar áiniatsui. Iis, Yus Apraáman tímiayi “Aya Isak pampañma amee shuarum ártatui.” ⁸ Nujaj páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajaj métek akiinia nu nekas Apraám weeá shuar áiniak Yus timian wainkiat-tawai. ⁹ Kame Yus Apraáman tímia nu júiti: “Tsawant jeamtaí jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatrin Isaka nuwé Ripikia jimiampramiayi. ¹¹ Nu uchisha akiiniainiatsajin penker-nasha tura yajauchincha túruiniatsajin Yus Ripikian tímiayi: “Iwiajria nu ni patajn umirkattawai.” Ataksha núnisaj Yus ni Papirijn chichak “Jakupan aneakun Esaun nakitramjai” tímiayi. Nujajinikia páantaiti. Yus

wakerak aya ni enentáijjajin shuaran achikiniaiti. Nu shuar túrunamu enentáimtusuk túramniaiti.

¹⁴ Túriniaitkiui “Yus penkerchaiti” zítiaijash? Atsá.

¹⁵ Yus Muisaisan júnis tímiayi:

“Wi wakerajna nunak waitnentattajai.”

¹⁶ Tuma asamtai shuar ti wakerakuisha tura kakaram takaakuisha aya nujaj Yus waitnentatsui. Antsu aya ní enentáijjajin wakerak waitnentawai. ¹⁷ Ataksha Yus-Papnium tawai “Yus Ejiptu nunka akupniurin tímiayi “Ámijjaj ashí nunkanam winia kakarmarun nekaawat tusan uunt akupniun awajsamjame” tímiayi” tawai.

¹⁸ Tuma asamtai Yus Nii wakera nuna waitnentawai. Túrasa Ejiptu akupniurin túramia núnisaj Nii wakera nú shuaran enentáin kátsuram awajtawai.

¹⁹ Tura “Núnisaitkiuinikia zúrukamtaí shuaran Yus súmamtikia? turutchatapash. Nii wakerakuinikia zíturkat-tajik?” turutchatapash. ²⁰ Warí, aents asam Yusjaj zúnaiminkiaitiam? Nuwá piniñkian nájankui núweka “zúrukamtaí júnis najatam?” tíminkiait. ²¹ Nuwá wakerakka nu nuwejaj amamkuncha tura yukunnasha nushá takakmastinian máí najanachminkait.

²² Yajauch shuar ti asutiátin áiniak emesnartinnium wétin áiniawai. Yus nu shuaran asutiá ni kakarmarin iniaktustaj tayat ti katsuntramiayi. ²³ Tura katsunteak ni anenkrattairin iniakmasmiayi. Nú arant nuikia in waitnentramak shiir enentáijjaj penker awajtamkur ni anenkrattairi ti paantchakait. Nekas shiir enentáijjaj penker ajasat tusa yaunchu iwiampramiayi. ²⁴ Tura incha, Israer-shuarumiyásha Israer-shuaranumiyásha, ni shuarj ajasat tusa achirmakmijai. ²⁵ Núnisaj yaunchu Yúsnan etserin Useas Yus-Papnium tawai: “Wíishuaran Wíishuar awajsat-tajai. Aneachmancha aneamu awajsat-tajai.

²⁶ Tura Yus “Wíishuarachaitrume” tímia nú shuaran “Nekas iwiaaku Yusa uchirínuiutrume” ukunam títiatui.” Tu áarmaiti. ²⁷ Antsu Isayas Israer-shuaran páchis tímiayi:

“Israer weeá ti nankaamas untsurj áiniayat penké ishichik uwemprartatui. ²⁸ Kame Yus yajauchin akupkataj timia nuna takamtsuk wárik umiktatui.”

²⁹ Núnisaj Isayas ataksha tawai:

“Ashí akupeana nú Yus in waitnentramachkurninikia Sutuma péprusha Kumura péprusha takamtsuk jákarmia núnisaj jákajai.”

Israer-shuar uwempratin chichamjaj tujinkiarmaniania nu

³⁰ Wátsek, Israer-shuaracha, Yus iisam ni túramurijjaj “penkeraitji” tu enentáimtumainiachunak, Yuska, Nii enentáimtusam, “penkeraitrume” tímiayi. ³¹ Antsu Israer-shuaraka penker akupkamun umiktinian wakeruiniayatan tujintiainiakui nujaj penker ajastinian tujinkiarmaniyai. ³² zUrukamtaí tujinkiarman? Yusan enentáimtusuk aya ni penker túramujaj penker ajastinian enentáimtuiniak tujinkiarmaniyai. Krístun enentáimtus-tinian nakitiainiak shuar kankapen awankemtuktinia núnisaj iniararmai. ³³ Tura kaya tukumkar iniarman-

niakait. Nu asamtai Yus-Papinium Krístun pachis tími-ayi:

“Seuḡ péprunam kayan ikiuajai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaḡarchartatui” tawai.” Tu áarmaiti.

10 Yatsuru, Israer-shuar uwemprarat tusan ti wakerakun Yúsan áujtajai. ² Maa, uwempratniun nékachiataḡ Yúsan shiir awajsatniun ti wakeruiniawai. ³ Túmaitiat shuáran Yus péḡker awajsatniun nékachu ásar aya ni péḡker túramujáin péḡker ajastinian wakeruiniawai. Tuma ásar Yus péḡker enentáimtamu-jaí péḡker ajastinian jeacharai. ⁴ Aya Kristu enentáimtamu-jaí péḡker ajastin asamtai akupkamu umirkatniujai péḡker ajastin ántraiiti.

⁵ Akupkamujai péḡker ajastinian pachis Muisais tími-ayi: “Nuna takamtsuk umirniuka nujai péḡker pujustatui.” Tu áarmaiti. ⁶ Antsu Krístun enentáimtus péḡker pujustinian pachis shuar júna tíminiaiti: “Ti itirchata áinis “¿Yaki nayaimpiniam waka Krístun itiarat?” tiirap,” tawai. ⁷ Tura ¿Yaki jakamunam we Krístun iniantkit?” tiirap” tawai. ⁸ Tura júnasha tawai: “Yus-Chicham yúpichuch umirkanniaiti. Aya enentáimjai enentáimtakum wenumjai ujaktiniaitme.” Nu Chicham “Yus enentáimtustiniaiti” tawai. Nu Chicham tuke étsereaj núiti. ⁹ Yus Jesusan jakan iniantkimia nu enentáimtakum tura wenumjai “Jesus winia Úntruiti” takum uwemprattame. ¹⁰ Kame Kristu enentáimtakmin Yus “péḡkeraitme” turamtatui nuyá wenumjai “Jesukrístun enentáimtajai” tákum uwemprattame.

¹¹ Ataksha Yus-Papinium tawai: “Nin shiir enentáimtuinia nú shuar natsaḡarchartatui.” ¹² Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí péḡkeran súawai. Tura ashí métek ni Úntrinti. ¹³ Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti. ¹⁴ Tura Krístun enentáimtuini-achusha ¿itiurak Nin áujsarat? Tura Krístun nékaini-achusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniaiti. ¹⁵ Tura akupkachmasha ¿itiurak Yus-Chichaman ujarakat? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamḡ etserki weana nu ti shiirchakait.”

¹⁶ Tura ashí shuar uwempratin chichaman ántuiniayataḡ umirainiatsui. Isayasha yaunchu aak tímiayi:

“Uuntá, ¿yaki ii étserman antukaruit?”

¹⁷ Paantchakáit. Kristu túramu ujakam antuktiniaiti. Tura antukar Krístun shiir enentáimtustiniaiti.

¹⁸ Tura ¿Israer-shuar Yus-Chichaman antukcharu ásarḡ Yúsan enentáimtuscharma? Atsá. Warí, Yus-Papí tawai:

“Ashí nuḡkanam ni chichameḡ antunkaiti.”

¹⁹ Tura “Israer-shuar nu chichamḡ antukariat ¿paant nekaawarmaashi?” inintrusminiaiti. Tura nekas nekaawarmai. Tuma asamtai Muisais tawai:

“Israer-shuarchan nékachu ainiana nuna shiir awa-jeakun akajkattajrume.”

²⁰ Nuyá Isayas ashamtsuk áarmiayi:

“Eḡatkacharu nu wáitkiarmiayi. Inintruiniatsaḡin wanti-ntiukmiajai.”

²¹ Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

Chíkich Israer-shuarsha uwemprartatui

11 Tura Israer-shuar Yúsan umiiniachkui ¿Yus nin iniaisaashit? Péḡkea. Warí, wi Israer-shuar-chakaitiaj. Wi Apraámsha tura Pinjamiḡ weeá akiini-achukaitiaj. ² Yámankamtaiknumiaḡ Yus Israer-shuaran ni shuar arti tusa achikiu asa yamaikia iniaiashtatui.

Ti yaunchu Yúsan etserin Erías Israer-shuaran pachis Yúsan áujtak tímiayi: ³ “Untrú, namaḡ awaḡar Yus sútaincha mash saḡakiarai. Áminiuun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiaji.

⁴ Tura Yus ayak tímiayi “Siati mir (7000) áishmaḡkan Israer-shuarnumiaḡ apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

⁵ Núnisaḡ yamaisha Yus ti waitnentainia asa ashí Israer-shuarnumiaḡ ni shuarin achikiuiti. ⁶ Yus ni enentáijiaḡ waitnentak túraiti. Nú shuar péḡker tura asamtai waitnentatsui. Yus aya péḡkernak waitnentakka nuikia waitnenkratchainti.

⁷ Ayu. Nuikia ashí Israer-shuar péḡkeran eḡkaru aḡin aya Yus achikmia nú shuar wainkiarmiayi. Antsu ni achikchamuka nuna naḡkaamas nekaachmin ajar kusurua núnin awajnasarmiaji. ⁸ Yus-Chichamsha núnisaḡ tawai: “Yus enentáimchatai enentáin súsarmiaji. Wáinmashtai jjincha tura ántushtai kuishniasha súsarmiaji. Yamaisha núniskete.” ⁹ Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

¹⁰ Ni enentáin kusurarti tura wainmakcharti. Itiurchat ana nusha, káarak kijinia áintsḡ, tuke áentskatá.” Tu áarmiayi.

Israer-shuarsha uwempramin áiniawai

¹¹ Watsek, Israer-shuar kayá tukumkar ¿tuke ini-aararuk áinia? Atsá. Antsu Israer-shuar umirkachmajai Israer-shuarsha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui. ¹² Israer-shuar umirkachmajai ashí shuar, Israercha ainia nusha, uwempraminia ajasarmiaji. Nuna naḡkaamas Israer-shuar atak Yúsan enentáimtuiniak uwemprarmatai nujai ashí shuar ti péḡker ajarat-tatui.

¹³ Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai. ¹⁴ Nuna túrakun átum uwemprarmena núnisaḡ niisha, wíshuar ainia nu, nuna íisar uwemprarat tusan wakerajai. ¹⁵ Kame Israer-shuaran

iniaisamujaj ashí shuar Yusjaj shiir nawamnaikiar-mataingia nuikia atak nin achikmajaj jakamunmaya nantaktinia áintsan ti shiir átatui. ¹⁶ Emka apatuk ana nu Yus súakur yuminsamuitkiungka nuikia ashí apatku-nam Yus yuminsamuiti. Núnisanu numí kankapé péñkeraitkiungka numí takamtsuk péñkeraiti.

¹⁷ Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmaya árumninu nu numiniam anujtamkamarme. Nujaj péñker numijaj tsanínkrum nu kakarmajaj iwiaakrume. ¹⁸ Tura kanawé tsupikmajaj nankaamantu enentáimtumasaip. Warí, ame kakarmarmijaj numi wajatsui antsu ni kakarmarijaj iwiaakme.

¹⁹ “Túrasha wi anujnaktinian kanawen tsupikchamka” tíchainmeash. ²⁰ Nekasaiti, túmaitiat niisha Yúsán enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anear-ta. ²¹ Yus nekas kanawé péñkercha túrawarun tsupikkia páchitsuk amincha tsupirmakchamniakait. ²² Iista, Yus atumajaj ti tsánkaiiti tura Israer-shuar umichua nuna ti wari asutiati. Tura péñker wáin-mamkata. Yus tuke nekas enentáimtachkurminkia atumniasha páchitsuk tsupirmaktatrum. ²³ Núnisanu Israer-shuar ataksha Yúsán enentáimtuiniakuí páchit-suk ataksha anujkachminkait. Nekas túrattawai. ²⁴ Túram Israer-shuarcha asam niisháa numinmaya tsupikiar penké numiniam anujnakuitrum. Nuna tura asa nekas ni kanawé tsupikia ajapamun páchitsuk atak anujkamniaiti.

Israer-shuarsha uwempratin áiniawai

²⁵ Yatsurú, nankaamantu enentáimtumarajrum tusan yaunchu nekaachman ujaajrum. Júiti: Israer-shuarnu-miañka chíkich chíkich Yúsán nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. ²⁶ Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprattatui. Tuma asamtai Yus-Papí tawai:

“Señnumiá Uwemtikiartin tátatui. Israernumiá tu-naan asakátrattawai.

²⁷ Jú Chichamnasha niijaj najanattajai: ni tunaarín asakturtatjai.”

²⁸ Uwempratin chicham atumsha nekaatarum tusa Israer-shuaran Yus ni nemasrj awajsaruíti. Tura yaunchu ni weatrín achikiu asa nincha tuke anenawai. ²⁹ Kame Yus amáa nuna ataksha ataatsui. Shuáran achiksha atak iniayatsui. ³⁰ Átumka yaunchu Yus umir-chauyarme. Tura yamaikia Israer-shuar umirainiachkui Yus atumin waitnentrarmarme. ³¹ Núnisanu nii yamaikia Yúsán umirainiatsui. Tura atumin waitnentrarmarum núnisanu nincha waitnentrattawai. ³² Nujaj ashí métek sumamtikiak métek waitnentrar uwemtkrat-tawai.

³³ Maa, Yus imiá shiirchakait. Tí nekachukait. Ni túramu penké nekaachminiatiji.

³⁴ “Uunt Yus enentáimmian zyaki neka? Tura zyá Nin unuiniaruit. ³⁵ Yaki Nin péñkeran susa shiira nujaj yapajniuit?” Tu áarmaiti.

³⁶ Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áini-awai. Yus tuke iniaitsuk shiir awájnástí. Núnisanu atí.

Yusaj surumaktarum

12 Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrum. Yaunchu Israer-shuar ni waakarín maa Yúsán suu árimiayi. Atumsha núnisrumek iwiaaku árumna nuñ Nii túrutataj taku túrutati tusarum tuke enentáijaj Yusaj tsanukamaktarum. Yusaj íisam ti shiir atí tusarum túratarum. Nu túrakrumka pátatkechu antsu ti nekas enentáimajaj Yus shiir awajin átatrum.

² Chíkich shuar aya jú nuñkanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsanukatkarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péñkeraiti.

³ Yus winia waitnentrak akatar akuptuku asamtai ju-na tájarme. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáim-ta asakmin takastinian suramsana nujaj apatkam nekaamata. ⁴ Ii ayashí chikichkiitiat ii muchitmarj untsurjinti. Tura métekrak muchitiáiniatsui. ⁵ Núnisrik iisha, Yus-shuarti, ayashí muchitmarijya áintsarik untsurjítaiatar chikichik ayashtinia áintsar takaaji. Nusha Krístujaj tsanikku asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túrat-niuitme. Yus ni chichamen etserkatniun suramsaitk-iuñkia Yus enentáimtakum unuimiarmam nujaj métek etserkata. ⁷ Chíkich shuar yáinťinian Yus suramsaitk-iuñkia nekas enentáimajaj yáinťá. Unuiniartiniaitki-umka nekas péñker ikiakárta. Súsatniuitki-umka nekas péñker ikiakárta. Súsatniuitki-umka shiir enentáijaj ementutsuk súsarta. Shuaran wáinin atí tusa Yus apujtamsaitkiuñkia ti enentáimsam túratá. Tura shuar iturchat pujuinia nu yáinťinian Yus suram-saitkiuñkia shiir enentáimsam túratá.

Yus-shuar túratniua nu

⁹ Nekas enentáijaj mai anenai ajatarum. Yajauch nakitrarum péñkera nu túratarum. ¹⁰ Nuamtak yachi asarum núnisrum mai anenai ajatarum. Chíkich wijaj nankaamas úuntaiti tu enentáimtunaistarum.

¹¹ Nakittsuk kakaram ajasrum ashí enentáimajaj ii Uunrj wakera nu túratarum.

¹² Ukunam Yus tsanukatramkattajnia nu enentáimtus- rum warastarum. Wáitiakrumsha katsunratarum. Tuke iniaitsuk ashí túrunamujaj Yus áusatarum.

¹³ Yus-shuar atsumainia nujaj yáinťarum. Írarsha péñker itiaatarum. ¹⁴ Yajauch awajtamainia nu shiir

awajsatarum. Yus yajauch yumintsuk nu shuaran péñker túrawarat tusarum seattiarum.

¹⁵ Warainia nujaj warastarum. Kúntuts pujuinia nu jajsha úttiarum.

¹⁶ Chikichik enentájjaj métekrak shiir enentáimtu-naitiarum. Nañkaamantu enentáimtumasairap. Antsu pééjchach ajastarum. “Ti nekajai” tu enentáimtuma-sairap.

¹⁷ Shuar ámin yajauch awajtamkuisha nincha yapajki-ataj tu enentáimsáip. Aents ísam péñker áminia nu amesha tuke túratá. ¹⁸ Ame jeamna nujaj ashí shuarjaj nawamnaikiam wekasata. ¹⁹ Yuska ni Papirijn juna áamtikramiayi: “Wíitjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti. ²⁰ Tura nu arantcha tawai: “Ame nemasrum tsukamakuisha ayurata. Kitiamakuiasha umartin susata. Nu túrakum péñker ajachua nu iniatsaartatme.” ²¹ Yajauch nupet-tamkajin. Antsu péñker túrakum yajauchia nu nupetka-ta.

13 Akupniunka ashí shuar umirkatniuiti. Akupniunka Yus apujsamuiti. Yus apujsamu akupin at-sawai. ² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti. ³ Kame akupniunka péñker shuar sapijmiakarat tusar apujsamu ániawai. Antsu yajauch shuar ashamkarat tusar apujsamu ániawai. Nii ashamsuk pujustin wakerameka péñker túratá. Túrakminkia akupin shiir enentáimturmartatui. ⁴ Yainmakat tusa Yus apujsamuiti. Antsu yajauch túrakmeke akupin nekas ashamkatniuitme. Warí, Yus ántar apujsamuiti. Tunáa shuaran asutiátniun Yus apujsaiti. ⁵ Nu asamtai akupin tuke umirkatniuiti. Aya asutiáwajin tusar umirkashtiniatiji. Antsu shiir enentájjaj wekasatin umirkatniuiti. ⁶ Tuma asamtai núnisañ akupniun kuit súsatniua nu páchitsuk susatarum. Nu takatan pujur-sarat tusa Yus apujsaruiti.

⁷ Ashí túratniua nu túratarum. Akiktiniaitkiumka páchitsuk akikta. Akupniusha uuntcha ashí núnisañ írunka nusha shiir enentáimtikratarum. ⁸ Kuitjaj tu-mashrintin airap. Antsu mai anenai tuke ajatarum. Chikich shuar aneakum nin péñker túrattame. Túram ashí akupkamu páchitsuk umirkattame. ⁹ Akupkamusha tawai: “Tsanirmawaip, mankartuawaip, kasamkaip, chikich shuar tsanumpruraip, chikichna wakerutkaip” tawai. Tura nusha ashí chikichik chichamjajin tíminiatiji: “Ame ayashim aneam núnismek ashí shuar aneata.”

¹⁰ Shuar chikich shuaran aneakka yajauch awajsashtatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmiaj nuj “Ti ti shiir ajarar tuke uwempratin ukunam átatui” tu enentáimprachmashiaji. Antsu yamaikia nu tsawant yuntumsamta ashí túrajnia nujaj shintiarar enentáimpratinuitiji. ¹² Tuke káshiat tsawatemprai. Ii Uuntri Kristu jú tunáa nunkanam tátin ishichik ajasai. Tuma asamtai ii túrutairi kiritniua núnisañ yajauch túrutai ana nuka túrutsuk tsáapnium péñker wekasatin

kakaram ajastai. ¹³ Túratniua nujaj métek wekasatai. Tsawai wekaakur kiritniunam yumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratái. ¹⁴ Ii Uuntri Jesukristu túramia núnisrik túratái. Tura ii ayashí wakeramu umikiat tusar tsanatkashtiniatiji.

Ame yatsum kakantraip

14 Shuar Yúsan ishichik enentáimtana nu itiaatarum tura kakantraip. ² Iis, chikichka ashí yuamniaiti tuiniawai. Tura chikichcha, Yúsnan awajirar, namañ yúashtiniatiji tuiniawai. ³ Tura ashí yúa nuka namañken yúatsna nuna wishikrashtiniatiji. Núnisañ ashí yucha nu ashí yuun kakantrashtiniatiji. Warí, núnaka Yus ni shuarin awajsachukait. ⁴ Ámeka timiataash péñkeraitiam chikich shuar kakantina? Antsu ni únuntri ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

⁵ Chikichcha enentáimpratái. Chikich shuar tsawantan achikar “Jú tsawantaj Yus nañkaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. ⁶ Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsatat tusa túrawai. Yurumkajajsha ashí yúana nu Yúsan yuminkias shiir awajsatat tusa túrawai. Núnisañ ashí yúatsna nusha Yúsan yuminkias shiir awajsatat tusa túrawai.

⁷ Iikkia ii enentájjajin iwiaaktsuji. Tura jáakrishia ii enentájjajin jaatsji. ⁸ Kame iwiaaku pujakrishia ii Uuntri Kristu shiir awajsatat tusar pujurji. Tura jáakrishia tuke Níiniuitiji. Nu asamtai iwiaaku pujakrishia tura jakarsha tuke Kástunuitiji. ⁹ Kame jakancha iwiaakuncha ashí ni Uuntri ajastat tusa Kristu jaka nantakmiayi.

¹⁰ Tura zurukamtaime ame yatsum “yajauchiiti” tame. Urukamtaime nakitiam? Warí, ashí iikia ii túramu paant awajnasat tusar Kristu naka wajastatiji. ¹¹ Nu asamtai Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniatiji” túrtiartatui” tawai.” Tu áarmaiti.

¹² Tuma asamtai iisha chikichik chikichik ashí ii túramu Yus paant ujakartatiji.

Ame yatsum tunaanum ajuraip

¹³ Nu asamtai “yajauch túriniatiji” tu áujmatnaisashiniatiji. Antsu ii yachí tunaanum ajurarchatin ti enentáimturiniatiji. ¹⁴ Jesukristu jintintiamu asan juna nekajai: Yus najanamuka péñkerchaka atsawai. Ashí túramniaitjai. Túrasha shuar chichaak “Nu túrushtainti” táyat nuna túrakka niijaj tunaiti. ¹⁵ Tuma asamtai shuar chichartamuk “Nu yúakminkia Yusjaj péñkerchaiti” taj, ame yúakminkia nu shuar iturchat enentáimsashtatuak. Tura niisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujajin ame yatsum Kristu

jarukmia nu emenkákaip. ¹⁶ Tura “yuamniaitjai” táy-atam wi yúakui yajauch áujmatrusaraj̄n tusam iniaisa-ta. ¹⁷ Kame Yus umirkatin yurumátuiuj̄aj̄sha umartin-jaj̄sha enentáimtuschatniuiti. Antsu Yusa Wakan̄ij̄aj̄ shiir wekasar Yusj̄aj̄ tura shuarj̄aj̄ nawamnaikiar ti péñker wekasatniuitji. ¹⁸ Ashí shuar Krístun núnis umireakui Yussha tura chíkich shuarsha péñker enentáimtuiniawai.

¹⁹ Nu asamtai tuke shiir pujusminia nu túrakur Yusj̄aj̄ kakaram ajastin yáiniaikta. ²⁰ Yus iisam ashí yuamniaitji. Antsu ame yuamna nuj̄aj̄ chíkich shuar tunaanum ajuartin tunaiti. Tuma asamtai ame yuam nuj̄aj̄ Yus nu shuara enentáin takarsamu emesraip. ²¹ Nu túrashtin nuikia namañ yúashtincha karía umarchatniusha péñkeraiti. Warí, túrushtaij̄aj̄ ame yátsum iturchat enentáimtikram tunaanum ajuarchatapash. Tura nu shuar Yúsan nekas enentáimtuschnia ajastatui. Nuka atsutí. ²² Ame Yus nekas enentáimtakum ashí túramniaitkiumka Yúsak wararsata. Shuar Yus ñimminum shiir enentáij̄aj̄ mash túramnia nu nekas shíiraiti. ²³ Tura araantushim yua nuka Yúsan shiir enentáimtusuk yua asa sumamattawai. Kame ashí Yus shiir enentáimtusuk túramu tunaiti.

Chíkich shuar wakeramuk enentáimtustiniaiti

15 Yusj̄aj̄ katsuaru áj̄inia nu iik enentáimtumatsuk kakarmachu ainia nu yáintiniaitji. ² Chíkich shuar wakeramu enentáimtustiniaitji. Tura Yusj̄aj̄ nu nankaamas shiir wekasatniun yáinminiaitkiui túratniuitji. ³ Krístusha ni wakeramun túrachmiayi. Antsu Yus-Chicham tana núnisañ chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiyai.” ⁴ Núnisañ ashí yaunchu Yus-Papinium aarma in jintinramatniun áararmiayi. Nuj̄aj̄ atsan̄tamkurin shiir wáin̄kiattaj̄nia nuka katsuñtrar nákastatji. ⁵ Yus atsan̄tamar katsuñtratniun jintinramji. Tuma asa Jesukrístu túramia áintsañ atumniasha chikichik enentáij̄aj̄ enentáimtusaisar pujustinian yáinmakartí. ⁶ Nuj̄aj̄ ashí métekrak Yus shiir awajsattarme. Niisha ii Uuntri Jesukrístuncha Aparínti.

Israer-shuarshanmasha Uwempratin Chicham etserkamu

⁷ Tuma asamtai chíkich shuarj̄aj̄sha shiir awajnaisatarum. Kristu núnisañ Yúsan shiir awajsat tusa incha shiir awajtamsamaji. ⁸ Juna tajai. Kristu Israer-shuaran yáintaj̄ tusa támiayi. Tura Yus ti yaunchu nuna weat̄rin “túrataj̄” timia nu uminkiat tusa támiayi. Nuj̄aj̄ Yus timia nuna umikmia nu nekaamniai. ⁹ Tura nu arantcha Israer-shuarshasha Yus waitnentartín áarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattarme.”

¹⁰ Tura nu arantcha tawai: “Ashí nuñkanmaȳa shuarteram ashí Israer-shuar Yúsna ainia nuj̄aj̄ warastarum.”

¹¹ Tura ataksha tawai: “Ashí aents ii Uuntriñ shiir awajsarti. Tura ashí shuarsha Nin “Ti úuntaiti” tiarti” tawai.

¹² Isayassha áarmiayi: “Tawitia aparí Isai weat̄riȳa akupin akiinkiatawai. Niisha ashí nuñkan akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíiran suramsattakrin nu shiir nákañ. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakan̄i kakarmarij̄aj̄ ti shiir enentáij̄aj̄ katsuñtrarum, nu nákastarum.

¹⁴ Yatsurú, atumsha anenainiaitrum. Tura ashí Yusna nekaarum nuamtak chicharnaikiatin nékarme.

¹⁵ Tuma añ kajinmatkij̄irum tusan ataksha ti paant áakun jú enentáimtikraj̄ume. Yus winia waitnentrak ni Chichamen etserkat tusa akuptakui nuna áatjarme.

¹⁶ Kame Jesukrístu Israer-shuarshanum Yusa shiir chichamen etserkat tusa akuptakui. Nuna túrakun Israer-shuarshan Yusa Wakan̄ij̄aj̄ shiir awajsamu áarmatai Yusaj̄ juiniajai. Tura Yussha shiir enentáij̄aj̄ itiainiawai.

¹⁷ Jesukrístu yaintiu asamtai Yusna takarsamaj nuna warsamniaitjai. ¹⁸ Tura chíkich shuarj̄aj̄ Kristu túramun pachischattajai. Aya wi chichasmaj̄aj̄sha tura wi túramuj̄aj̄sha Israer-shuarshan Kristu umimtikiamia nunak áujmatsattajai. ¹⁹ Yusa Shiir Wakan̄i kakarmarij̄aj̄ aents tujintiamun túran ashí shuaran Jerusarén pérunam nan̄kaman etserkin Irikiu nuñkanam ejekamjai. Kristu-chichaman ashí nu nuñkanam etserkaitjai. ²⁰ Nuna túrakun chíkich shuar etserkchamanum Krístunun ántichu áiniamunam Uwempratin Chichaman etserkaitjai. Nuj̄aj̄ chíkich takasmanum takarsachuitjai. ²¹ Yus-Papisha núnisañ tawai: “Chichaman péñké antukcharuka nekaawartatui. Nin áujmatman anturkcharusha unuimiarartatui.”

Papru Rúmanam wétaj tawai

²² Nuna pujuru asan íitjarum táyatan íichmajrume. ²³ Tura yamaikia juyá takatrun umikian tura yáunchusha tuke íitjarum tiniu asan ²⁴ Ispania nukanam wéakun íistatjarme. Tura atumíin shiir irasan Ispanianam wéakui atumsha yáin̄tkiarum shiir akuptukchattarpash. ²⁵ Tura yamaikia kuitj̄aj̄ Jerusarénnumīa Yus-shuaran yáintaj̄ tusan wéajai. ²⁶ Masetúnianmaȳa shuarsha tura Akayanmaȳa shuarsha kuítian irurar Jerusarénnumīa Yus-shuaran atsumainia nuna akuptukta tuiniawai. ²⁷ Ti wakeruiniak túrawarmiayi. Nu nekas túrashtinkiat. Israer-shuarnumīa Yus-Chichaman antukaru ásar yamaikia ni kuítrij̄aj̄ páchitsuk yáin̄chatniukait. ²⁸ Tuma asamtai jú kuitian súsan umiran nuikia Ispanianam wéakun íiktiatjarme. ²⁹ Tura nuñ winiakun Kristu Shiir Chichamen nuj̄aj̄ shiir yáintaj̄rum tusan ejeettiaj̄rume.

³⁰ Yatsurú, ii Uuntri Jesukrístunu asarum tura ni Wakan̄i pujurtamkurmin anenia asarum Yus áujtursatarum. Núnisrum wij̄aj̄ métek Yusna takastin yaintkiat-tarme. ³¹ Jutia nuñkanmaȳa Israer-shuarnumīa uwentikrat tusarum Yus áujtursatarum. Tura jú kuit-

ian júajna nunasha Jerusarénumiá Yus-shuar shiir achikiartí tusarum Yus áujtursatarum. ³² Nujaj, Yus wakerakuñkia, péñker wampú enentáimsan warasan íttiajrume. ³³ Yus ti shiir pujustinian súana nu atumjaj tsaniñ pujurtamsati. Núnisañ atí.

Amikmaamun akupramiania nu

16 Ii umai Jépeka Senkrea péprunmayá Yus-shuaran yáiniaiti. Ti peñker Yus-shuaraiti. ² Kristu náariñ shiir wáinkiatarum. Nuamtak yachí wáinkiatniau núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yaiñtarum.

³ Pirisirasha Akirasha wijiñ métek Jesukristunun takasaru ásar amikmaatainijai. ⁴ Niisha winia uwemtikrurtai tusar jániñkiarmiayi. Tuma asamtai yumiñkiniyajai. Tura aya wíkichu antsu ashí Israer-shuarchanumiá Yus-shuar áinia nusha yumiñkiniawai. ⁵ Núnisañ ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nuñkanam emka Krístun nekas enentáimtusmiayi. ⁶ Marisha, atumjaj ti takasua nu amikmaatruatarum. ⁷ Tura wíi shuarsha Antrunikiusha Júniassha amikmaatruatarum. Niisha wijiñ sepunam pujusarmai. Wijiñ emka Krístun shiir enentáimtusar chíkich akatramujaj nankaamas takasaru áiniawai.

⁸ Ámpriassha Krístunam winia aneamu amikiur asamtai amikmaatruatarum. ⁹ Urpanujajsha Jesukristu takatrí tsaniñniuitji. Niisha tura aneamu Estakissha amikmaatruatarum. ¹⁰ Apirissaha amikmaatruatarum. Niisha Krístun ti shiir enentáimtamú ti páantaiti. Núnisañ Aristúpuru shuarsha amikmaatruatarum. ¹¹ Wíishuar Erutiúñsha tura Narsisu shuarsha Kristu shuarí ásarmatai amikmaatruawarta. ¹² Tripiniasha tura Tripiusasha Yúsnan takainia ásarmatai amikmaatruatarum. Núnisañ ii umai Pírítia Yúsnan ti takasu asamtai amikmaatruatarum. ¹³ Rúpusha, nusha ti peñker Yus-shuar, tura nukurísha amikmaatruatarum. Niisha wijiñ nekas winia nukuraa núnisaiti. ¹⁴ Asiñkri-tiusha, Pirikiuntisha, Érmassha, Patrupassha,

Érmessha, tura ashí niijjaj Yús-shuar ainia nu amikmaatruatarum. ¹⁵ Núnisañ Jirurukusha, Júriasha, Néreusha, ni umaijjajsha, Urimpiassha, tura ashí Yus-shuar niijjaj pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Kristu shuarí amikmaatmainiawai. ¹⁷ Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum péñker takastin unuimiarmena núnischaiti. ¹⁸ Nu shuar ii Uuntrí Jesukristunun takainiatsui. Antsu ni wakeramun uminiawai. Tura ti shiir chichasar nékachun anañkenawai. ¹⁹ Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum pujustarum. ²⁰ Yus tuke shiir pujustinian amawa nu ti wárik uunt iwianchin nu-petturmaktatui. Tura ii Uuntrí Jesukristu shiir yainmakarti.

²¹ Timiutéusha, wijiñ takau, amikmaatmarme. Núnisañ Rúsiusha, Jasuñsha, Susipatresha, mash wíishuar ainia nu amikmaatmarme. ²² Wi, Tersiu asan, Papru chichamen ju papinium áateakun Kristu náariñ amikmaajrume.

²³ Káyusha amikmaatmarme. Ni jeen pujaji tura jujsha ashí Yus-shuar irunainiawai. Erastusha ju pepru kuítrín wáinniuiti. Niisha ii yachí Kuártujaj amikmaatmarme.

²⁴ Ii Uuntrí Jesukristu ti shiir yainmakarti. Núnisañ atí.

Yus shiir awajsatai

²⁵ Watsek, Yus shiir awajsatai. Niñki nekas kakaram awajtamsamniaiti. Wi Uwempratin Chichamnum Jesukristunun étsereaj nujaj ikiantamprattawai. Nu chicham yámankamtaiknumiá nekaachmanak Yus yamaikia paant awajsaiti. ²⁶ Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nuñkanmayá shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

²⁷ Yúsak Niñki ti neka asa tura Jesukristu ti peñker tura asamtai Niñki tuke shiir awájnástí. Nuke atí.

1 KURINTIUNAM

Kurintiumaya Yus-shuaran Papru áatramiania nu

1 Wi Pápruitjai, Jesukrístu akatramu. Yus nuna wakerak, ni akatramurj atí tusa anaitiukmai. Wi, ii yachj Sústinisjaj, jü papí akupeaji. ² Ashí Yus-shuar Kurintiu péprunam iruntrumna nu jü papí akupeaji. Átumka Jesukrístujaj tsaniñkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrjnti. ³ Yus ii Aparí tura ii Úuntrj Jesukrístusha waitnentramainia ásar yainmakarti imiatkinchanum tuke shiir pujustinian.

Ii Uuntrj Jesukrístujaj tsaniñkia pujustin

⁴ Yusan ájukun yumñsan atumin shiir enentáimtajrume. Jesukrístujaj tsaniñkia pujakrumin Yus shiir enentáimturmawai. ⁵ Jesukrístujaj tsaniñkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian. ⁶ Kristu juna túramniaiti tíchamkaji. Ashí yamaikia uminkiaiyi. ⁷ Tuma asamtai ashí Yus súramna nu atsumatsrume. Nu túrakrum ii Uuntrj Jesukrístu tatin tuke nákarne. ⁸ Tura iniaitsuk tuke emettamattawai ii Uuntrj Jesukrístu támatai atumi tunaarjñ pachischatin. ⁹ Jesukrístu ii Uuntrjnti. Niijjaj tsaniñkia pujusúk tusa Yus achirmakmarne. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntrj Jesukrístu naarj pachisan, seajrume métek enentáimpratarum tusan. Niísháa níisháa enentáimprairap antsu chikichik enentáijjjaj métek enentáimsa pujustarum. ¹¹ Átum yajauch chicharnaisarum pujarme. Kruí shuarj tu ujatkmatai tájarme. ¹² Kame júnis awai: Chikich “Wi Páprunuitjai” tuiniawai. Chikich “Aporusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristushuaraitjai” tuiniawai. ¹³ ¿Warí, nuiñkia, Kristu akantramakait. Páprusha krúsnum jarutramkamaashi. Tura Papru naarj pachisa imiaimiukaitrum? ¹⁴ Atumin untsurj imiaichu asan shiir enentáimjai. Aya Krispu Káyujaj jímiarchiniak imiaimjai. ¹⁵ Nújajñkia shuar “Papru náarjñ imiaimiuitjai” tíchamniaiti. ¹⁶ Maa, nekas, Estepanasa shuarincha imiaimjai tura chikich wi imiamiu nékatsjai. ¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarajñ tusan.

Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmarjñcha ni nekatairjñcha paant iniakmasmiania nu

¹⁸ Kristu krúsnum jarutramkamu étsereaji. Antsu Yusshuarchaka menkaakatniunam wéana nu, “ántrai ti nu chicham” tu enentáimainiawai. Antsu Yusshuarti, uwempratniunam wéakur, “nu chichamjaj Yusa kakarmarj takusminiaiti” tu enentáimjai. ¹⁹ Núnisañ tawai Yus-Chicham yaunchu aarma: “Jü nunkanmayan ti neka áiniana nuna chichamen emesrattajai; ti unuimiararu áinianak ántar awajsattajai” tawai Yus ni chichamen. ²⁰ Iis, jü nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiartin áiniana nusha, ashí jü nunkanmayan unuimiar ti chichastinian nékana nusha, nu shuar mash “wi tájana nujaj penker pujusam uwemprattame” tu enentáimainiawai. Tura núnaka mash Yus penké ántar najanaiti. ²¹ Aya ni nékamujaj aents Yusan nekaacharmiaiyi. Núnisañ atí tusa Yus túramiaiyi, timiá neka asa. Antsu ashí aentsun Yus ni chichamejjaj uwemtikratniun wakerimiaiyi. Chikich “ántrai ti” tuiniana nu chichamjajñkí Yus Nin enentáimtuinia núnaka uwemtikratniun wakerak túramiaiyi. ²² Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash penker jíikim turuttia wisha métek enentáimprataj” tuiniawai. ²³ Iikia antsu Kristu krúsnum jarutramkamuk étsereaji. Israer-shuarsha “jü chicham natsantaiti” tu enentáimainiawai. Israer-shuarchasha “jü chicham ántrai ti” tu enentáimainiawai. ²⁴ Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutram Yusa kakarmarjñcha ni nekatairjñcha paant iniakmasmiais” tu enentáimjai. ²⁵ “Yusa nekatairj ántrai ti” tuiniawai aents, túrasha imiá nekas penkeraiti. “Yusa kakarmarjñsha jeatsui” tuiniawai aents, túrasha imiá nekas kakarmaiti. ²⁶ Enentáimtumastarum yatsuru. Yus achirmakmarne Niiniu ajastinian, tura jü nunkanam ti neka áinia núnisañ atumjñ ti neka íruntsui. Ti akupniusha ti nankaamakusha atumjñ íruntsui. ²⁷ Antsu jü nunkanam nékachua núnis ana nuna Yus achikiuiti ti neka nuna iniatsáartinian. Tura jü nunkanam kakarmachua núnis ana nunasha Yus achikiuiti kakarma nuna iniatsáartinian. ²⁸ Péejchachincha, nakitsamuncha, ántrachincha, Yus achikiuiti ashí nankaamantu írunka nuna amuktinian. ²⁹ Nújjajñkia

chikichkisha Yusjaj waantu enentáimprachminiaiti. ³⁰ Tura Yus atumin Krístujaj tsanin apujtamsaiti. Tura Kristu enentáimtusar Yus nekas nekatain̄kia nekaattaji. Kristu enentáimtakrin Yus shiir enentáimturmajj, péñker awajtamjji, tura uwemtikramjji. ³¹ Yus-Papinium yaunchu aarma núniskete: “Shuar nan̄kaamantu enentáimprataj tákuñka ii Uuntrj Yus túramun wararsati.”

Kristu krúsnum jakamu etserkamu

2 Wisha, yatsuru, atumjijn jeamaj nuj Yus-chichaman ti neka chichainia áintsan tura iwiasanak ujakchamajrume. ² Tura atumjaj pujakun aya chikichkiniak nekaatniun enentáimpramjaj. Júiti: Jesukrístu, tura Jesukrístu krúsnum jakamu. ³ Nékeyatan kakarmachu sapjmiashím jearmijrume. ⁴ Yus-Chichaman ujaakun ti neka chichainia áintsan nu-petkataj tu enentáimturhamajrume. Antsu Yusa kakarmarj̄ncha tura ni Wakanj̄ncha paant iniakmasan Yus-Chichaman ujakmajrume. ⁵ Aentsu nekatairij̄jaj Yus enentáimtuschatniuiti antsu Yusa kakarmarj̄ paant nekaarum Yus enentáimtustiniaitrume. Nuní asamtai Yus-Chichaman tu ujakmajrume.

Aya Yusa Wakanj̄jaj Yúsnan nekaamniaiti

⁶ Túmaitiat Yusa nekatairj̄ átsuk. Yúsnan unuimiararujaj Yusa nekatairj̄n áujmatjji. Tura Yusa nekatairj̄n̄kia aentsu nekatairj̄ áintsachuiti. Ju nuñkanam akupin ainia nuna nekatairj̄nchuiti Yúsna. Ju nuñkanam akupniuka ishichik pujus amuukachartatak. ⁷ Yaunchu ju nuñka atsañ Yus in uwemtikrampratniun enentáimpramiayi ti shiir pujusarmi tusa. Ju Yusa enentáimmiarij̄ yaunchu nekanachmiayi, tura yamaikia nu nekaar áujmatjji. ⁸ Ju nuñkanam akupniuka nuna pen̄ké nekaacharmiayi. Nékaianiakka ii Uuntrj timiá shiira nuna, krúsnum máacharu aayi. ⁹ Yaunchu Yus-Papinium áarchamukait: “Shuar Yúsan aneana nuna Yus ti shíiran susattawai. Susattana nuka timiá péñker asamtai shuar wáinkiachman, antukchamuncha, enentáimtachmancha Yus susattawai” tu áarmaiti. ¹⁰ Tura Yusa Wakanj̄ ii enentáijn̄ pujurtamuk Yus suramsattajnia nuna yamá paant jintinramjji. Nu Wakan̄cha imia Yus enentáimmiiancha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentáij̄jaj̄n̄ nékatsuk. Núnisan̄ aya Yusa Wakanj̄ Yúsnan paant nékawai. ¹² Ju nuñkanmaya aents enentáimiainia nujaj Yusna nekaachminiaiti. Antsu Yusa Wakanj̄n in súramaj nujaj Yus shiir tsañkatramajnia nu nekaamniaitjji. ¹³ Yusa Wakanj̄ jintinramjji Yúsnan chichastinian Nii wakera áintsan̄. Ni chichamen̄ súramjji. Túramtai ii nékamujaj Yúsna ét-sertsujji. Tuma asamtai imia Yusna nuka Yusjaj péñker wekainia nu jintíajji.

¹⁴ Yus-shuarcha Yusa Wakanj̄niun ántatsui ántraiti tusa. Aya Yusa Wakanj̄ jintintiamniaitkiui Yus-shuarcha nuna pen̄ké nekaachmin̄ ániawai. ¹⁵ Antsu Yusa Wakanj̄n takaku ashí mash iis, péñkera nuna nekaamniaiti. Nii túrana nunasha chíkich shuar súmamtikiach-

miniaiti. ¹⁶ Yus-Papinium yaunchu áarmaiti: “¿Yusa enentáimmiarij̄ ya neka. Tura Yúsan ya jintintiamniait?” tu áarmaiti. Tuma aijn̄ iikia Yus-shuar ájinia nu, Kristu enentáimna núnisrik enentáimjji.

Páprusha Apurussha Yusa takatrj̄n mai tsanin̄kiar takainiawai

3 Tura wikia, yatsuru, nuik aj̄ atumjaj̄ pujakun Yusa Wakanj̄n umirniun chichastinia áintsanak atumjaj̄ chichastinian tujinkiamjai. Antsu ayash wakeramu umirin asakrumin Krístunam katsuarcharujaj̄ chichastinia áintsanak atumjaj̄ chichasmajaj. ² Uchi kuírach namañ ayurachminiaiti antsu aya umuntsatniuiti. Núnisan̄ aya yúpichuchin ujakmajrume, itirchat ana nu tujintiakrumin. Tura yamaisha itirchat ana nu tuke tujintiarume. ³ Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujaj̄ páantaiti átum ayash wakera mu umirniuitrume. Yúsnan enentáimticharujaj̄ métek wekainiaitrume. ⁴ Atumj̄n̄kia shuar “wi Páprunuitjaj̄” tuiniatsuk. Chikichcha “wi Apurusnaitjaj̄” tuiniatsuk. Tu chichaakrum ayash wakeramu umirniuitrume. ⁵ Wátsek. Wi Papru ti péñkeraashitaj. Apurussha ti péñkeraashit. Antsu iisha aya Yusa takarniurj̄ntjji. Yus-Chicham étserkurin ii Uuntrj enentáimtusamkuram. Ii Uuntrj takatan chíkich chíkich suramsamajnia nuke takasmajaj. ⁶ Wi Yus-Chichaman étserkun arakan araktinia áinis takasmajaj. Apurussha entsan ukatramai. Tura Yus nu arakan tsakatmarmaj. ⁷ Arakan araana nusha, entsan ukatna nusha ántrachukait. Antsu Yusak arakan tsakatmaru asa ashí túrachukait. ⁸ Arakan araana nusha, entsan ukatna nusha métek ániawai. Túmaitkiuisha takasmajaj̄ métek Yus akiktatui. Péñker takasmatain̄kia péñker akiktatui. ⁹ Wisha Apurussha Yusa takatrj̄ mai tsanin̄kiar takaaji. Tura Yus atumí enentáijn̄ takaakui atumsha Yusa núñk̄ea áintsaitrume.

Jeasha enentáimpramniaiti. Yus atumjaj̄ takaak jeá jeam̄tinia áintsan̄ takaawai. ¹⁰ Jeá jeam̄ainiak, emka uunt kaya nuñká init ikiursar kaki awajsatin̄ ániawai. Tura nuyañka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nuñká emka ikiustinian nekaan, núnisnak Jesukrístunun emka ujakmajrume. Tura Jesukrístu uunt kaya kaki ikiusma áinis asa Nínkiti nuj̄ jeá ekenkatin. Iis, ashí enentáimtustinia nan̄kaamas Jesukrístu enentáimtustiniaiti. Nu asamtai Jesukrístunun emka ujakmajrume. Yus nuna etserkatniun tsañkatrukuiti. Wi emka, uunt kaya ikiursatniua áintsan, Jesukrístunun ujakmajrume. Tura nuyañka chíkich shuar ekeniar jeammin̄ ániawai. Tura anearti péñker jeam̄tinian. ¹² Tura jeá jeam̄ainiak nii wakerak péñker ana nujaj̄ jeamminiaiti. Nii péñker jeam̄tinian wakerak kuri-j̄j̄aisha, kuítj̄aisha, shíirmach kayaj̄aisha jeamminiaiti. Chíkich jeamkuka numij̄j̄aisha, ken̄kuj̄aisha, nukaj̄aisha jeamminiaiti. Núnisan̄ shuar Yúsnan takaak péñker takasminiaiti túrasha nan̄kamas takasminiaiti. ¹³ Tura amuukatin tsawant jeakui ashí ni takatrj̄ paant átatui.

Nu tsawantajsha Yúsaiya ji átatui tura nu jisha ni takatrij pênkera nunasha tura yajauchia nunasha nekapsattawai. ¹⁴ Tura shiir jeamuka tura nu jeasha esaachmatainkia shiir akinkiattawai. ¹⁵ Antsu nánkamas jeamuka imianiñki jiniumiã uwemprattawai, tura ni jeamma esaa penké atsuttawai.

¹⁶ Enentáimpratarum. Yusa Wakaní atumíjn pujá asamtai Yusa Jee ajasuram nu nékatsrumek. ¹⁷ Shuar Yusa Jeeñ emeseakuñkia Yus nu shuaran emesrattawai. Yusa Jeeñka timiá shiir asamtai túrattawai. Nu Jea atumketrumek.

¹⁸ Ju nuñkanmayan unuimiarua núnisrum “ti nekaitjai” tu enentáimtumasmrum anañmamawairap. Antsu ju nuñkanmayan nékachua áinis ajas Yúsnan ti shiir unuimiártiniaiti. ¹⁹ Ju nuñkanmayã aents nékainia nuna Yus “ántraiiti” tawai. Yus-Papinium áarmaiti:

“Ju nuñkanmayan unuimiarun ni enentáimmiãjain Yus sumamtikiattawai.”

²⁰ Tura nu arantcha áarmaiti:

“Uunt Yuska “unuimiaru enentáimmiãncha penké ántraiiti” tawai.”

²¹ Tuma asamtai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írurna nu atumin yainmaktiniaiti. ²² Páprusha, Apurussha, Pítrusha, ju nuñkanmayasha, iwiakmasha, jákatniusha, yamá írurna nusha, ukunam átatna nusha, mash atumniaiti shiir yainmaktin. ²³ Atumsha Krístunuitrumek, tura Krístusha Yúsnaiti.

Yus akatramu takatrij

4 Júnisañ ashí shuar enentáimturmastiniãitji. Iikia aya Krístu yáintriñtji. Krístu akatramurñtji Yusna yaunchu nekaachma ana nu yamá etserkatin. ² Wátsek, akatramuka tána nujaj métek umiktiniãitji. ³ Wi umikmancha umikchamuncha ii Uuntri Krístu nékawai. Átum enentáimturarmena nusha tura chíkich aents enentáimturainia nusha wíjññkia ántraiiti. Imia wíkisha nekamatsjai. Kame winia tunaarun penké wáintsujai tura aya nujaj “pénkeraitjai” tíchamniãitjai. Niñki Yus iirui. ⁵ Tsawant jeamtaí ii Uuntri Krístu atak tátatui. Tura ashí yamá kiritniunam yúkma nuna tura shuar ashí enentáimprarma nunasha paant awajstattawai. Nu tsawant jeatsajñ shuar umikiuashit tusarum enentáimtusairap. Tura nu tsawantaj Yus ashí pénker umikiarun shiir awajstattawai. Pénker umikiuncha ishichik umikiuncha takasmajaj métek Yus shiir awajstattawai.

⁶ Átum “Ju shuar pénkeraiti tura chíkich pénkerchaiti” tu akannáirarum penké tíchatniuitrumek, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajaj métek enentáimsatarum. ⁷ Ámeka chíkich shuarjaj méteketme. Tura ashí takakmena nusha Yus amasmaiti. Tura Yus amasu asamtaí žitiurak áminiukea áintsam nujaj nañkaamantu ajai tu enentáimtumam?

⁸ ŽTi kuítrinnia áintsan tura ashí takakua áintsan enentáimtsurmek. In nañkaakarum uunt kapitíãñ aja-sua áintsan enentáimtsurmek? Nekas uunt kapitíãñ ajasrumka maak. Nuiñkia iisha atumjaj akupkaintji. ⁹ Chíkich shuar mash nañkaamantu áinis áiniakuisha Yus in ni akatramurñ ashí amúamunam apujtamsaitji. Tu enentáimpramniãitji. “Yajauch áiniãwaj, máatái” tu pujurtamji shuar. Tura Yusa suntarisha ashí juyá shuarsha in ístai tusar káutramkaitji. ¹⁰ Iikia atumjaj jeatsji. Krístu shuar asakrin nékachua áinis enentáimturmaj shuar. Átum antsu Krístunam tí nékachushitrumek. Iikia kakarmachuitji. Átum timiá kakarmaitrumek. Átumka ti penkeraitrumek. Antsu iikia muíjtiañtji. ¹¹ Tuke yamaisha tsukamaji, kitiãmaji, entsartin atsumaji. Katsumpramji. Jeasha atsumaji. ¹² Ii ewejéjaj takaakur ti pimpíãjaj. Shuar katsekramainiaji túrasha iikia shiir chichamjaj aiyajji. Itiurchat awajtamañniakuisha katsunteaji. ¹³ Tsanumprutmakrincha tuke shiir chichajji. Tsuata áintsarik tuke yamaisha ashí yajauchia núnisañ ajapratmatniun enentáimturmainiaji.

¹⁴ Atumin aya iniatsaartajtsan juní áattsujrumek. Antsu winia aneamu uchirua áintsan jintintjarme.

¹⁵ Atumin Yus-Chichaman ujaakun Yus-shuar ajastinian unuiniãmjarumek. Nujaj Jesukrístu enentáimtakrumin atumí aparíã áintsan ajasmajai. Chíkich shuar Krístunun jintinrámatin timiá untsurí ákuisha aya wiki atumí aparíñtjai. ¹⁶ Tuma asamtaí wi wekaajna áintsan wekasatarum atumsha.

¹⁷ Nu túratarum tusan winia aneamu uchirun Timiutéun akuptukmajrumek. Niisha ii Uuntri Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujaj wekaamun ataksha enentáimtikramprattawai. Núiti ashí Yus-shuarum wena jintíãjna nuka. ¹⁸ Papru yamaikia iraishtatui enentáimturainiak chíkich chíkich nañkaamantuitjai tu enentáimtumainiãwaj. ¹⁹ Antsu Yus wakerakuñkia wárik íttjam tusan wakerajai. Nuiñkia nañkaamantu chichameñ antukchattajai antsu wátskea, ni túramurísha ístái. ²⁰ Yus akupeana nú shuar aya chíchainiãtsui antsu Yusa kakarmarñ iniãtuiniãwaj. ²¹ Wátsek, žwarí enentáimprum? Átum tuke núnisañ enentáimkiurminkia wi winin asutiãñtjarme. Tura pénker enentáimkiurminkia, aneakun shiir chichasminiãitjarme. ¿Atumsha túa wakerarum?

Tsanirmamu ti tunaiti

5 Atumíjn shuar ti tunáã tura awaj. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuaranumsha at-sawai. ² ¿Nu tunaajajisha tuke nañkaamantu enentáimprumek? Antsu úttiniãitrumek. Nu shuar tunáã túraka atumíññã akankatniuiti. ³ Ayashur pujachkuisha wi nuj pujáã áintsan nuna tunaarñ paant nekaamjai, tura asutiãñtjarme. ⁴ Tuma asamtaí átum káunkakrumin ii Uuntri Jesukrístu kakarmaríjaj tura wi nuj pujáã áintsanak, ii Uuntri Jesukrístu kakarmaríjaj ⁵ nu shuar uunt iwianchnum surunkatniuiti ni ayashi wakeramurí

amukati tusa. Nujaj ni wakanj uwemprattawai ii Uuntri Jesukristu támatai.

⁶“Tikia péñkeraitji” tárumna nu áñtrai, tunáa atumjín tuke akui. Iis, “Karía ishichik yuminnium enketam mash karimtiktsuk” tiniu ániawai. Núnis átatui ju tunaajaj. ⁷Tuma asamtai nu karía ukartarum yajauch awajturmasajj tusarum. Núnisrum ju tunaanumiá kanakrum péñker átatume. Yaunchu enentái karía núnis amuukatniuiti. Ashí yamarmak yuminia áintsan ajasuitume. Tanta wakapruachusha enentáimpratai. Israer-shuar paskua nampernum aya wakapruachu tantan yuu ániawai. Atumí tunaarj atsakuí atumsha nu námper-tantaa áintsar péñker ajasuitume. Paskua nampertincha Israer-shuar murikiun main ániawai. Núnisan Kristu jaka ii murikrja áinis ajasuiti. ⁸Tuma asamtai iisha paskua námper nájanku pujakur tuke núnisan shiir wekasatniuitji. Tuma asamtai ashí yajauch tunaasha írunna nuka karía yaunchu nawamua áintsan ketete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsan ketete.

⁹Nuik papin áatramajrumna nuí “Tsanirma shuarjajñkia íschatniuitume” tímiajrum. ¹⁰Ju nuñkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin ániatsuk. Nú shuarjajñkia péñké íschatniuitkiurmeka ju nuñkanmayá jñinkintrume. Núnaka tátsujai. ¹¹Antsu wi tájana nu júiti, Shuar “Yus-shuaraitjai” tákuñka tura tunáa túriniaitkuñkia niijaj íschatniuitume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuñkia íschatniuitume. Péñké niijaj yurumáshtiniuitume. ¹²Yus-shuarcha tunaarj pachischatniuitjai. Yus núnaka íistatui. Átumka antsu atumjín Yus-shuar ainia nuna tunaarj íistiniuitume. Tuma asamtai nu shuar tunaarintin atumíyá akankatarum.

Yus-shuar nuámtak itiurchat awajñaisarka Yus-shuar-chajaj nuna iwiarashtin ániawai

6 Yus-shuarka chíkich Yus-shuarjaj itiurchat pujakka kapitianjaj chichas iwiarashtiniaiti Yus-shuar-cha asamtai. Antsu Yus-shuar írunna nujaj iwiarati. ²Enentáimpratarum. Amuukatin tsawantaj Yus-shuar-ka ashí ju nuñkanmayá shuara tunaarj mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum. ³Nu arantcha Yusa suntarj túramurjsha nekaattaji péñkerashit tusari. Nayaimpiniam túrawarma nekaatniuitkiurkia itiura ju nuñkanmayá nu tujinkiatatj. ⁴Pai, itiurchat ákuñkia Yus-shuar péñké tujintianiana nujaj iwiaratarum antsu. ⁵Natsaruk tusan nuna tájarme. Warí, ¿atumjini chíkichkisha atsawak ni yachj itiurchatj péñker iwiamnia? ⁶¿Urukamtai Yus-shuar ni yachijaj itiurchat pujakka Yus-shuarchanum wea iwiaratniun? ⁷Atumí itiurchatj kapitianium jukirmeka nujajñkia átum tujinkiamu páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum?

⁸Antsu átumka nuámtak yachijaj itiurchat awajñai-yarme tura kasárnaiyarme.

⁹Tunáa túrinkia Yus akupeamunam pachiinkiachmin ainia nu nékatsrumek. Anañnawairap. Ashí tsanirma nusha, ántar-yusan tikishmatniusha, nuamtak áishmanjaj tsanirmasha, ¹⁰kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anañkawar atantin ainia nusha Yus akupeamunma nuí péñké wayashtin ániawai. ¹¹Atumíyasha chíkich chíkich nuna túrin armai. Tura yamaikia ii Uuntri Jesusa kakarmarijajisha tura ii Yusrj Wakanj kakarmarijaj atumi enentái shiir ajasuiti, atumsha Yusna ajasurme, tura tuke péñker ajasurme.

Ii ayashj yajauch áchatniuiti

¹²“Ashí túramniaitjai” tiniu ániawai tura nekasaiti. Tuma aijn mash yáñkiashtatui péñker wekasatniun. Nekas ashí túramniaitjai tura náñkamas túratniujaj nu-petnakchattajai. ¹³Junasha tiniu ániawai: “Apatuk wakejainchu tura wake apatkujainchu mai áñtrai.” Apatkujaj wakesha nekas mai metek enentáimpratin ániawai tura Yus mai metek amuktatui. Núnisan ii ayashj ii Uuntri Krístunuiti tura Kristu ii ayashi nérenniuiti. Tuma asamtai ii ayashijaj tsanirmashtiniaiti. ¹⁴Tura Yus ii Uuntri Jesusan iniantkimia núnisan ii ayashíncha nu kakarmarijaj iniantkittiwai.

¹⁵Ashí ii ayashijn Kristu ayashímkiaiti. ¿Nu átumka nékatsrumek? Winia ayashrusha Kristu ayashíyá asamtai ¿itiurak nuna tsanirí ayashín najanattaj? Péñké túrachminiaitjai. ¹⁶Kame ¿yusha nékatsrumek? Áishman tsanirijaj tsaninkiar chikichik ayashtinia áinis ajainiawai. Núnisan Yus-Papinium áarmaiti: Mai chikichik ayashtinia áinis ajasartatui. ¹⁷Tura shuar ii Uuntri Krístujaj tsaninkia mai chikichik wakantin ajainiawai.

¹⁸Tuma asamtai tsanirmatniunmayá yajáyaj wainkiarum tséquentiarum. Chíkich tunáa írunna nu ii ayashínkia ti yajauch awajeatsui. Túrash shuar tsanirmakka ní ayashiniak yajauch awajeawai. ¹⁹Yusa Wakanj ame enentáimin pujurtamu asamtai, ame ayashim ni jeente. Nu Wakanjñkia Yus amasuiti. ¿Nuka nékatsrumek? Tuma asamtai ame ayashmi nérenchaitme. ²⁰Kristu numpejaj sumakma asamtai, ayashmisha wakanmisha Yusna ániawai. Yusna asamtai ayashmijaj péñker túratniuitme, Yus shiir awáñástí tusam.

Nuatkatniusha péñkeraiti, nuatkashtincha péñkeraiti

7 Ayu. Átum áatrurmarmena nuna yamaikia ujaktajrume. Shuar nuattechkusha péñkeraiti. ²Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwá ní áishrñin ini-umkati. ³Áishmanjsha ni áishrñ asa nuwen túratniua nuna umiktiniaiti. Núnisan nuwasha ni nuwé asa ni áishrñ túratniua nuna umiktiniaiti. ⁴Núwaka niñki ni ayashj nérenniuchuiti, antsu ni áishrñiuiti. Núnisan áishmanjsha niñki ni ayashj nérenniuchuiti, antsu ni

nuwénuiti. ⁵ Ni ayashí suritnaikiashtin ániawai. Tura mai itit awajnaitsuk Yus áuj satin wakeruiniak ishichik tsawant kanakmin ániawai. Tura nuñkia atak tsaniñ pujustin ániawai. Túracharmatañkia uunt iwianch, Satanás, tunaanum iniartinian útsutkattawai katsuntratniun tujintiaku.

⁶ Ayu. Tura nuna áarayatan nújajñkia “ashí shuar páchitsuk nuatkatniuiti” tátsujai. Nuatkatniuitkiumka péñkeraiti. ⁷ Túramtai “ashí wijiñ métek nuatkachuitkuiñkia maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpchuch katsuntratniun súsaiti.

⁸ Natsancha wajencha juna tájai, “Wijiñ métek nuattsuk pujusrukma péñkeraiti.” ⁹ Tura katsuntratniun tujinkiarka nuatkarti. Ti katsuntrachmin nekapeakum nuatkatniun péñkeraiti.

¹⁰ Nuatnaikiarun antsu tájai, “Nuwa nuatkamuka ni áishriñ ikiukchatniuiti” tajai. Núnaka ii Uuntri Kristu akupkaiti aya winia chichampruchuiti. ¹¹ Túramtai ni áishriñ ikiukkia niñki atak nuatnatsuk pujustí tura tsaniñ pujustinian wakerakka ataksha ni áishriñ waketikiti. Núnisañ áishmansha ni nuwēn ajapashtini-aiti.

¹² Chíkich shuaran juna tájai wikia, ii Uuntri Kristu ju- na akupkachuiti. Yus-shuara nuwēnka Yus-shuar- chaitkiunka tura ni áishriñ pujustinian wakerakka péñkeraiti; ajapashtini-aiti, tájai. ¹³ Núnisañ Yus-shuara aishri Yus-shuar chaitkiunka tura ni nuwēñ pujustinian wakerakka péñkeraiti; ikiukchatniuiti. ¹⁴ Nu nuwāka “Yus-shuar chajai tsaniñ pujakun Yusjaj yajauch ajastat- jai” tu enentáimprashini-aiti. Antsu nii Yus-shuar asam- tai ni aishri niñjaj pujá asa péñker ajasmini-aiti Yusjaj. Núnisañ núwāka Yus-shuar chaitiat ni aishri Yus- shuaraitkiunka niñjaj tsaniñ pujá asa péñker ajasmini- aiti Yusjaj. Núnisañ ni uchirísha péñker ajasmin áni- awai Yusjaj. Núnischaitkiunka ni uchirí Yus-shuar chaitiat uchirí áintsar ainti. ¹⁵ Tura áishmansha nuwāsha Yus- shuar chaitiat ana nu kanaktinian wakerakka túrati. Yus- shuar nuwāñ ankantaiti. Núnisañ asati. Tuke mániaktin- ian Yus nakitramaji. ¹⁶ ¿Núwāka ni aishri Yus-shuar ajastatna nuna nekas nékawak. Tura áishmansha ni nuwē Yus-shuar ajastatna nuna nekas nékawak? Yus- shuar chaitiat nuna wétinia wakerakka wetí.

¹⁷ Wátsek. Shuarka Yus-shuar ajaska Yus nin najana- ma áintsar tuke átinia-aiti. Pujumia áintsar pujusmini- aiti. Núnaka ashí Yus-shuar num akupeajai. ¹⁸ Iis, Yus- shuar ajasuka Israer-shuaraitkiunka tuke Israer-shuar atí. Tura Israer-shuar chaitkiunka Israer-shuar ajastin enentáimprashini-aiti. ¹⁹ Israer-shuaraitkiunsha tura Israer-shuar chaitkiunsha nuna enentáimtuschatniuiti. Aya Yus tana nu umirkatin nekas enentáimtushtini- aiti. ²⁰ Yus-shuar ajasuka nuik pujumia áintsar pujusmini- aiti. ²¹ Chíkich shuara takarniurí asam ti iturchat pu- jakmesha iturchat enentáimpráip. Tura ankant jíinkimniaitkiunka jíinkitiá. ²² Ankantchaitkiunka ankantaitkiunsha ju enentáimprató. Takarniuka Yus- shuar ajas tuke chíkich shuara takarniurínkiusha shiir enentáimpratinuiiti Kristu nin tunaanumiñ ankant awa-

jsamta. Tura shuar takarniuchua nu, Yus-shuar ajas Kristu takariñ ajasuiti. ²³ Ti wáitsamiayi Kristu in ankant awajtamsatniun. Ni numpeñ sumakma asarum shuar emetamu áirap. ²⁴ Tuma asamta shuar Yus-shuar ajas nuik pujumia áintsar yamaisha pujustí tura Yusñ enentáimtus wekasati.

²⁵ Nuwā natsa túratniua nuna yamaikia áujmatjai. Kristu juna akupkachmai tura Kristu anekratmarí ti nekapsa asamta wi tájana nu antukmini-aiti. ²⁶ Tuma asamta juna tájai. Ti iturchatnum pujá asakrin shuar aya júnisañ nuattsuk pujustin péñkeraiti. ²⁷ Nuatkaitki- umka núwēn ikiukip. Nátsaitkiunka nuwā eñkaip. ²⁸ Tura nuatkumka tunáa túratsme. Nuwāshi iniurtuk- ka niisha tunáa túrachuiti. Túrasa nuatnaikiaru itur- chat ti wáinkiatatui ju nuñkanam. Nú iturchatnu- miñ wi uwemtikraitjai.

²⁹ Yatsuru, juna tájarme. Ishichik tsawant taasai. Juyñka nuatkaru ainia nuka aya ni nuaríñ enentáim- prashini-aiti antsu Yúsna enentáimtushtini-aiti.

³⁰ Núnisañ tuke Yúsna enentáimtusar útainia nusha uutcha áintsar pujustin ániawai. Warainia nusha warascharua áintsar pujustin ániawai. Súmainia nusha sumakcharua áintsar pujustin ániawai. Ju nuñkanmayajñkia itit awajmamsashtini-aiti.

³¹ Núnisañ aya jú nuñkanam péñker pujustin ti takaschatniuiti. Ashí jú nuñkanmayñka amuukat- niuiti.

³² Jú nuñkanmayajñ itit ajaschak tusan wakera- jrume. Nátsaka Yúsna enentáimtushtini-aiti ni wakera nuna umiktinian. ³³ Túrasa nuatkaka ju nuñkanman enen- táimtushtini-aiti ni nuaríñ shiir enentáimtushtini-aiti. ³⁴ Núnisañ nuwā nátsasha nuatkamusha niisháa enentáimtushtini- awai. Nuwā natsa Yúsna enentáimtushtini-aiti ni ayashísha ni wakanísha tuke Yúsñ shiir atí tusa. Tura nuátkamu- ka ju nuñkanmayñ enentáimtushtini-aiti ni áishriñ shiir enentáimtushtini-aiti.

³⁵ Atumin yáñtajtsan juna tájarme. Iturchat awa- jsattsan wakeratsjai antsu shiir wekaakrum itit awajt- suk Yus shiir enentáimtushtini-aiti tusan wakerajai.

³⁶ Tura shuar ni nawantri natsan nuatnaikiati tákuñka péñkeraiti. Nawantriñ natsa tuke apujsatniun nakitiak- ka surukmini-aiti. Nusha tunaachuiti. ³⁷ Tura chíkichka tuke natsan apujsatat tákuñka nekas péñkeraiti. Apu- jsatin iturchatchaitkiunka tura ni nawantri nuat- nakchatniuitkiunka apujsatniuiti. Apujsan nekas péñker túrati. ³⁸ Tuma asamta nuatmamtikianka péñker túrayi tura apujsan nu nañkaamas péñker túrayi.

³⁹ Nuwā aishri iwiaaku pujakuñka tuke niñjaj tsaniñ pujustinia-aiti. Tura ni aishri jakamta ankant ajas ni wak- era nuwā Yus-shuaran iis nuatnaikiamni-aiti, ⁴⁰ tura tuke nuatnatskesha nu nañkaamas nekas shiir pujustatui. Tú enentáimtushtini-aiti wikia tura Yusa Wakanísha métek tát- suash.

Yurumkasha namansha ántar-yusnum susamu

8 Ayu. Yamaikia yurumkasha namansha ántar-yus- num susamun áujmatsattajai. Jujaj túratniua nuna

mash nékaji. Tura shuar “ti nékaitjai” enentáimkiunka nujajñkia “neka asan nankaamantuitjai” tu enentáim-iui. Antsu shuar chíkich shuaran aneakka nin péñker atí tusa yayawai. ² Shuar “ti nékaitjai” tákunka nekas nekaatniua núnaka unuimiarchaiti. ³ Tura Yúsán aneana núnaka Yus péñker nékawai.

⁴ Wátsek. Ántar-yus susamu yúatin junis enentáimpratiuuti. Yuska aya chikichkiiti. Tura chíkich Yus at-sakui, ⁵ aentsu yusrí nayaimpinmasha nuñkasha írunna nuka penké ántar ániawai. Kame aentsu yúsrísha tura úuntrijsa ti írunui. ⁶ Tura iikia nékaji, aya chikichik Yus awai, nusha ii Aparínti. Ashí írunna nuna najanaiti tura ni wakera nuna umikiat tusa najatmamji in. Ii Úuntrijsa chikichkiiti, Jesukrístu. Niijjajñkia ashí najanamuiti. Tura iisha ni kakarmarijjají iwiaaku pujaji.

⁷ Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiruñ yajauch ajasjai” tiartatui. ⁸ Watsek, yuamujají Yus in shiir enentáimtikrampratniun jeatsui. Yuarkia nujají péñker áchattají tura yúachriksa yajauch áchattají. ⁹ Ankantaitme yúatin wakerakmeke. Tura anearta. Ame yúakmin chíkich shuar itiurchat enentáimna nusha ámin wáitmak yúanka ni enentáin tunáa ajastatui. ¹⁰ Íistá. Ámeke neka asam ántar-yusa jeen wayam tura nuñ yúakminkia ame yatsum nuñ wáitmakchanpiash. Tura niisha itiurchat enentáimiat ántar-yus susamun yúashtimpiash. ¹¹ Nújajñkia ame nékamujají ame yatsum Kristu jaka uwemtikramia nu yajauch ajastatui. ¹² Túramtai ame yatsum itiurchat enentáimna nu yajauch awajeakum Krístunmasha tunáa túraitme. ¹³ Nu asamtai winia yatsurun wi yúajna nujají yajauch awajeaknaka namañnaka penké yuashtatjai nii tunáa ajasajñ tusan.

Kristu akatramu túramnia nu

⁹ Ashí Kristu akatramurj túratniua nuna wisha túramniaitjai ni akatramurj asan. Iis, wisha ii Uuntri Jesusan wáinkiaitjai tura wisha Jesukrístu takatrin takaajai. Winia takatrujajñ átumka Yus-shuar ajasuit-rume. ² Chíkich shuar “Kristu akatramurjñchuiti” túrutainiakuisa átumka winia takatrujají Yus-shuar ajasu asakrumin nujají wi nekas Kristu akatramurjñtiaj nu paant nekaamniaiti. Tura tu enentáimtursatniuitrume.

³ Ashí shuar “Kristu akatramurjñchuiti” túrutainia nuna juna tájai. ⁴ Wisha Yus-Chichaman etserkataj tusan shuárnum irakun ashí ajampruinia nuna yuamniaitjai tura umarminiaitjai. ⁵ Tura Pítrusha, Jesusa yachísha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjai. ⁶ Chíkich akatramuka kuit susamujají Yus-Chichaman etserainiawai. Wisha Pirnapísha núnisrik túramniaitjai. Kame ¿aya íichikik takastiniaitjai? ⁷ Suntarka ¿ní kuítrijajímpíash takaa? ¿Tsanimpian aráa nu nuna neren yúatsuk. Wáakan wainiua nusha muntsurjñ úmatsuk? Núnisañ Yus-Chichaman étsera nusha nú takasmanumiñ yurumámniaiti. ⁸ Aya aents

enentáimmian chichaatsjai. Muisais akupkamun-masha métek tawai. ⁹ Muisais akupkamunam áarmaiti: “Turu takaak jiníksa saepen pakartaj tusa nájakui ni nuñ jiníksatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujají. ¹⁰ Antsu in jujají nekaawarat tusa tímiayi. Jiníksain araana nusha tura júukmatai saepen pakaana nusha nuna jiníksain mai yurumáin ániawai. Paant atí tusa Yus nuna áarmiayi. ¹¹ Tuma asamtai Yus-Chicham atumiñ etserkakrin nuyá átum takakrumna nujají in ajamsatniuitrume. ¿Nusha itiurchatkai? ¹² Chíkich akatramu atumiñ irutainiak ajamsamun yuamniaitkuñkia iikia nekas túramniaitjai ii etserkamujají Yus-shuar ajasakrumin.

Tura wikia antsu túrachuitjai. Atsumaknasha ashí itiurchat ana nuna katsuntramjai Kristu shiir chichamen étserkui shuar itiurchat enentáimturarajñ tusan. ¹³ Ashí shuar ni yúsríniun tuke pujurin ainia nu, ni yusrí jeen írunna nuyá yurumáiniawai. Tura yus-tai namañken maawar nuyá yurumáiniawai. ¹⁴ Núnisañ Yus-Chichaman etserniua nuka Yúsán takasu asamtai péñker ajamsatniuiti. Nuna Kristu akupkamiayi. ¹⁵ Tura wisha ajamsamun yuamniaitiatan tuke winia kuítrujají yurumámjai. Tura yamaisha surúsuk tusan áattsujrume. Antsu nuna túrutsuk jakañka maak aintjai.

¹⁶ Uwempratin chichaman wi étserkun aya nújajñ “ti penkeraitjai” enentáimtumsatsjai. Kame Yus nuna túratniun surusuncha itiurkatjak. Nuna túrachkunka ti itiurchat pujusaintjai. ¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. ¹⁸ Tura jujají antsu nekas warasminiaitjai: Wi túramnian iniaisan chikichnan takatsuk aya winia kuítrujajñ uwempratin chichaman étserjai. Nujají waraakun akikma áintsañkete.

¹⁹ Chíkich shuara takarniuchuitiatan ashí shuara takarniuriya áintsañketjai Kristu shuarjñ untsurj ajasarat tusan. ²⁰ Israer-shuarjají pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurj umirkatin ániakui wisha aun umirkashtiniaitiatnak umirniuitjai. ²¹ Tura Israer-shuar-chasha Yus-shuar ajasarti tusan, nu shuar Muisaisa akupkamurjñ umirkashtin ániakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai. ²² Yusjají katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjají métek ajajai ishichkisha Yus-shuar ajasarti tusan. ²³ Ashí wi túraj núnaka uwempratin chicham tuke shiir atí tusan túrajai. Tura nu chichamjají wisha atsumtsuk shiir wekaajai.

²⁴ Shuar nekapnaisatniusha untsurj tsékontin átsuk tura aya chikichik awakmatsuk. Niñki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum. ²⁵ Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentáijají Yus-

na nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjina nú tawasap tuke amuukashtatui. ²⁶ Wikia aya náñkamsan tsékeatsjai. Nasejaí maania áintsan máaniatsjai. ²⁷ Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitrurainti.

Ántar-Yus tikishmatrashtiniaiti

10 Enentáimpratarum, yatsuru. Yus yaunchu ii úuntrín ashí métek yáinmiayi. Nusháa yurañmijai jintian nekapruiamiayi. Tura ashí ii uuntrí nu yurañmin apapekar wearmiayi. Ashí núnisar Kapáaku Nayaantsan Yus akankamunam wekasar katitkiarmiayi. ² Tura Muisaisan umirkar yurañminiam tura nayaantsanam ashí imiimiú áintsan ajasarmiayi. ³ Núnisan ashí mash Yusnumia yurumkan yuawarmiayi. ⁴ Entsancho ashí mash Yus susamunak umararmiayi. Kame Yus kayanmayá entsan akupkamtai ashí umararmiayi. Krístusha, nú kaya áintsan, niijjai tuke weakui ni wakaní atsumamurín Krístunmayan takusarmiayi. ⁵ Tuma aín Yus ti yáinmaitiat ni wakaramun umikcharmiayi. Tura ásar ni nuñkeñ jeatsuk atsamu nuñkanam ti untsurí jákarmiayi.

⁶ Iisha nujai unuimiartiniaitji. Iikia ni wakeriarmia áintsari yajauchia nu wakerukchatniuitji. ⁷ Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakuí Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

⁸ Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantaj jákarmiayi. ⁹ Iisha tunáa túrar “Yus asutiúashtatui” tu enentáimprashstiniaitji. Niisha nuna túrawar napijjai esaim untsurí jákarmiayi. ¹⁰ Yussa yajauch áujmat-sashtiniaiti. Nuna túrawarmatai Yus ni suntarín akupak untsurín maawarmiayi.

¹¹ Yaunchu ii úuntríjjai túrunamu in amúamu tsawantnum pujajnia nuna jintintramat tusa áarmaiti. ¹² Tuma asamtai shuar “Tunaanum iniaarchattajai” tákuñka anearti. Anearchamka iniaarminiaitme. ¹³ Tura ame iturchatrumka aya amek nekapeatsme. Chíkich shuarsha nu iturchatjai métek nekapsatin áiniawai. Jysha ti enentáimpramniaiti. Ame katsuntratin tujintiamna nuna nañkaamas iturchatan Yuska péñker asa tsankatramatsui. Antsu iturchat tarutrammatai, nu iturchatnum pujamin Yuska uwempratniun jintintramattawai. Nújainkia katsuntrattame.

¹⁴ Nu asamtai aneamu yatsuru péñke ishichkisha ántar-yus enentáimtusairap. ¹⁵ Atumsha nékatsrumek. Wi tájana nu nekaschakait. ¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujai Kristu numpé métek enentáimtaji taji. Tura apatkusha púurarí tura métek yuarí nujai Kristu ayashí in jarutramkamu métek enentáimtaji taji. ¹⁷ Apatkusha chi-

kichkiitiat púuram untsurí ajatsuk. Iisha núnisrik untsuríjitiatar nu apatuk métek yuarí métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai namañken yuinia nu, métek yuawar Yusan métek enentáimtuiniatsuk. ¹⁹ Núnisan Yus-shuarcha ántar-yus sutai namañken suiniak nekas-Yusan suiniatsui antsu yajauch wakanin suiniawai. Kame ántar-yus áiniak péñké ántar áiniawai, iwiaakuchu áiniawai. Nu namañsha sutai namañketiat péñker namañkete, yajauchichuiti. Aya junak tajai. Yus-shuarcha ántar-yus sutai namañken suiniakui amesha niijjai métek yuamka yajauch wakanniasha niijjai métek enentáimtaji tame. Nu antsu yajauchiiti. ²¹ Kristu numpen nakumea nu úmakrum íwianch susamua nuka umarchatniuitrume. Kristu ayashín nakumea nu yúakrumka íwianch susamua nuka yúashtiniaitume. ²² ¿Warí, Yus akajkatin wakeramek. Iisha nin nupetkamniashitaj?

Aya aneakur takastiniaitji

²³ “Ashí túramniaitjai” tiniu áiniawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin. ²⁴ Nú arantcha chíkich yáintincho enentáimpratniuitji. Aya íniuk pachischatniuitji.

²⁵ Namañ súnakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. ²⁶ Ashí ju nuñkasha tura ashí írunna nusha Yúsnachuk ainia. Tuma asamtai péñker áiniawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. ²⁸ Tura chíkich chichaak “Jyka ántar-yus susamu namañkete” túramkuñkia nuikia yuawaip. Yúakminkia nu shuar iturchat enentáimprattawai.

²⁹ Ame páchitsuk yuamniaitkiumnisha nii antsu yúachmin asa iturchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitaj. ³⁰ Wi Yúsan yumíñsan yúakuisha urukamtia iturchat enentáimturainia. Yus yumíñsachmakait?” tíchatameash. ³¹ Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá. ³² Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji. ³³ Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11 Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwá Yusa jeen túratin

² Yatsuru, átum winia tuke enentáimturarum wi tími-ajrumna nu umirniuitrume. Tuma asakrumin shiir enentáimtajrume. ³ Nu arantcha ujaajrume. Yus Apa Krístun akupea áintsan Kristu ashí áishmankan akupeawai. Núnisan áishmansha ni nuwen akupeawai.

⁴Íjjaj̄inkia shuar Yus áujenak tura núnisañ Yus-Chichaman étserainiak áishmañ etsen̄krukchatniuiti antsu nuw̄a múuknum nukumaktiniaiti. Tuma asamtai áishmañ nūj̄ etsen̄krakka natsantaiti. Tura nuw̄a múuknum nukumakchañka natsantaiti. Intiashin tsupimiarua áintsan̄kete. ⁶Nuw̄a múuknum nukumaktinian nakitiakka intiashin tsupirtí nuikia. Watsek, nuw̄a ni intiashin tsupirtinian nakitiakka, tura awampratniun natsam̄akka múuknum nukumakti nuikia. ⁷Áishmañkka Yúsana nakumeawai. Yusna shiir ana nuna nakúm̄káttsa Yus áishmañkan najanamiayi. Tuma asamtai áishmañkka etsen̄krukchatniuiti. Antsu nuw̄anka áishmañna shiir ana nuna nakúm̄káttsa Yus najanamiayi. ⁸Iis, Yus áentsun najaneak nuw̄anmayan áishmañkan najanachmiayi antsu áishmañka ukunch̄íjjaj̄i nuw̄an najanamiayi. ⁹Nuw̄an yáinkíat tusa áishmañkan najanachmiayi antsu áishmañkan yáinkíat tusa nuw̄an najanamiayi. ¹⁰Tuma asamtai núw̄aka múuknum nukumaktiniaiti, nayaimpinmaȳa aencha ísarti tusa. ¹¹Ayu, tura áishmañ nuw̄aj̄aj̄in̄chu atsuinti tura nuw̄asha núnisañ áishmañj̄aj̄in̄chu atsuinti. Yus j̄u nuñkan núnisañ atí tusa najanaiti. ¹²Iis, Yus nuw̄an áishmañnumīa najanamiayi tura áishmañsha nuw̄anmaȳa akiiniaiti. Tura Yus mai najanaiti.

¹³Enentáimpratarum atumsha. Nuw̄a múuknum nukumatsuk Yus áuj̄satin ¿pén̄kerkai? ¹⁴Ii shuartinkia áishmañ intiash ajakin natsantchakait. ¹⁵Antsu núw̄aka intiash ajakin pén̄kerchakait. Múuknum nukumaktinian susamuiti. ¹⁶Watsek, shuar tuke umiktinian nakitiakka j̄una nekaati, iisha tura ashí Yus-shuartisha aya tu enentáim̄ji.

Kristu jakamu enentaimtustin nampernum yajauch túramu

¹⁷Yamáí áarattajrumna nuj̄aj̄in̄ shiir enentáim̄tatsjarme. Atum irunkuram yáiniaiktiniatrum tuke pén̄ker wekasatin. Átum antsu iruntrarum yajauch awajnaiyarme. ¹⁸Wats, Yusa J̄eñ irunkuram atumsháa enentáim̄pratarum kanakurme. Kame tu ujakarmai. Nekaschashit. ¹⁹Tuke tupartatrumek Yúsna ti nekana nu shuar paant nekanat tusarnea. Antsu kajernaikar kanaktin pén̄kerchaiti. ²⁰Kanakin asarum Kristu jakamu enentaimtustin nampernum atum iruntrarum yúarmena nu nekas Yúsna hui. ²¹Iis, ashí ní yurumken itiaawai āj̄ yurumáttsa tura chikichan nákat-suk niá niá wari yuattsa wakerawai. Chikichkia ishichik itiaana nu tsukamawai tura chikichcha nampekarai. ²²Yurumkan ishichik itiaana nu iniatsáarchamek. Atum áitkiarum núnisañ Yusa j̄eñ yurumáshtiniaiti. Natsantaiti. Warí, chikich j̄ēa átsuk āj̄ yurumátin. ¿Warimpait. Juj̄aj̄i shiirash áuj̄satjarum? Átsá. Juj̄aj̄i shiir áuj̄sachmini-aitjarme.

Kristu jakamu enentaimtustin námper

²³Ii Uuntr̄j̄ Kristu jintintruama núnaka ujakmajrume. Jút̄as tuke súratsaj̄in̄, nu kashi ii Uuntr̄j̄ Jesus apatkun jukí ²⁴Yusan yumiñsamiayi. Nuyá puur tímiayi “Yu-

atarum. Jysha winia ayashruiti; atumin jarutramkatta núiti. Jy yúakrum Winia enentáim̄tursatarum” tímiayi. ²⁵Núnisañ yurumá umik piniñnasha achik tímiayi “Jy piniñ Yamaram Chichamaiti. Tura winia numpar puár-matai Yamaram Chicham nekas uminkiat̄awai tawai. Jy tuke úmakrum Winia enentáim̄tursatarum’ tímiayi. ²⁶Tuma asamtai j̄u apatuk yúakrum tura piniñsha úmakrum ii Uuntr̄j̄ Kristu jakamur̄i enentáim̄tarme. Kristu táatsaj̄in̄ j̄u tuke túratniuitrum.

Shiir enentajij̄aj̄i Kristu jakamu enentaimtustin nampernum yuatniuiti

²⁷Tuma asamtai shuar Yusana enentáim̄tutsuk j̄u apatkun yuawar tura j̄u piniñnumīan̄cha umarar Kristu ayash̄in̄cha ni numpen̄cha yajauch enentáim̄ta asa tunáa túrait. ²⁸Nu asamtai ashí shuar j̄u apatkun yútsuk tura j̄u piniñnumīan̄cha úmutsuk ni enentáin̄ iwiaratniuiti Yusj̄aj̄i. ²⁹Kristu ayash̄í jakamu enentáim̄tutsuk yúakka tura úmakka nuna tura asa asutniát-tawai. ³⁰Atumsha tura asarum jaarne tura pimpiruitrum. Chikichcha jákaru ániawai. ³¹Ímia-iik ímiakrinkia Yus in asutiám̄chaint̄j̄i. ³²Tura ii enentáin̄ Yus yajauchia nuna wáiniuk asutiám̄ji. Túrachkuñka ashí Yus-shuarhaj̄aj̄i súmamtikramawaint̄j̄i.

³³Tuma asamtai, yatsuru, iruntrar yurumáttsa matsatkurmeka nákastarum métek yurumátin. ³⁴Shuar tsukamakka ni j̄eñ̄iñkí yurumáti. Núj̄aj̄in̄kia yajauchi-j̄aj̄i irunchakrumin Yus asutiám̄shatrum. Ayu, chikich áatrum̄mena núnaka wi āj̄ jean iwiarat̄aj̄aj̄i.

Yusa Wakaní ni shuar̄in̄ susamu

12 Yusa Wakaní ashí ni shuar̄in̄ súana nuna yamáí ujakat̄jarme. Nekaatarum, yatsuru. Yus-shuar shiir takasarti tusa Yusa Wakaní j̄una súsaiti.

²Yaunchu átum Yus-shuar tuke ajatsuk chikich shuarj̄aj̄i métek ántar-yus tikishmatrumarme. Niisha ántar-yus ásar áuj̄matt̄ramsachmin ármiai. ³Tura j̄uj̄aj̄in̄ shuar Yusa Wakaní kakarmar̄ij̄aj̄i chichaana nu nekaamniaiti. Yusa Wakaníjj̄aj̄in̄kia shuar “Jesus yajauchiiti” tíchamniaiti. Núnisan aya Yusa Wakaníjj̄aj̄in̄ “Jesus winia Úuntur asa akuptuk̄tiniaiti” tíminiaiti.

⁴Yusa takatr̄j̄i íruntsuk. Tura Yusa Wakaníñkí ashí nuna takastinian súsaiti. Tura shuar Yus-shuara Uuntr̄j̄i chikichik āj̄in̄ ashí Yusa takatr̄j̄in̄ métek takaatsui. Antsu chikichkin ashí nañkaamas pén̄ker takaawai. Yusa Wakanísha nuna shiir takasat tusa súawai. Tura Nii wakera nuna Niñkí ni shuar̄in̄ chikichik chikichik ni-isháa niisháa súawai. ⁶Yúskete ashí ni shuar̄in̄ niisháa takamtikeana nu. Niñkí ashí ni shuar̄i enentáin̄ takaak takatnasha shiir takamtikeawai. ⁷Yusak túratin súam Yusa Wakaní kakarmar̄j̄i paant átatui nu takasmanum. Tura ashí shuar ní takatr̄j̄ij̄aj̄i yáiniaiktin ániawai. ⁸Júnaka Yus takamtikeawai. Nékana nu shuarnasha, unuimiarua nunasha Yúsna ujak̄tinian súawai. Tura mai shuaran Yusa Wakaní kakarmar̄ij̄aj̄i nuna túratniun súsaiti. ⁹Chikichnasha Yúsna áujenak Yúsna ti enentáim̄tumar nekas itirchat ana nuna iwiaratniun súawai.

Nincha Yusa Wakaní kakarmaríjaj nuna takastinian sú-saiti. Chikichnasha jaan tsuártinian súawai. ¹⁰ Chikichnasha aents niñki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia péñker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintiátniun súawai. ¹¹ Tura ashí shuara enentáin nu Wakanik takaawai. Tura Nii wakera nuna aḅkant aḅkant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsari ayashímkiaitji. Kristu ayashí muchitmarísha írunui. Niisha túmaitiat chikichik ayashíniyai. ¹³ Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarsha, ti itiuarchat takaana nusha, aḅkant ainia nusha, ashí yamá chikichik ajasuitji. Tura Yusa Wakaní pimiutkamuitji Niijaj tsaniñkia pujakur.

¹⁴ Ayashi muchitmarí aya chikichikuiti. ¹⁵ Tuma asamtai, winia nawer uwejruchuitiat tuke winia ayashrunuiti. ¹⁶ Winia kuíshrusha jíiruchuitiat tuke winia ayashrunuiti. ¹⁷ Wátsek winia ayashur aya jíitkiuiñkia ¿itiurak antukaintiaj? Winia ayashrusha aya kuíshkitkiuiñkia ¿waríjajin nekapsaintiaj? ¹⁸ Nu asamtai Yus winia ayashru muchitmarí ni wakeramunam ikiusuiti. ¹⁹ Chikichik muchitmajaj ¿ayash áminkiait? ²⁰ Antsu untsurí muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umíaji.

²¹ Winia jíiru péñker aḅ winia uwejrúncha wakerishatjak. Winia muukarsha péñker aḅ winia nawernasha wakerishatjak. Núnisan Yus-shuar shiir enentáimtumak ni yachin “atsumatsjame” tíchamniait. ²² Antsu ii muchitmarí ishichik enentáimtajnia nu atsakuñkia ti atsumawaintji. ²³ Chíkich muchitmasha, íimiancha nu, shiir iwiarmamtaji. Tura nu muchitmaka shiir íisminia nujaj nañkaamas péñker wainji. Iis, shiircha nu antsu péñker wainji. Yus ii ayashin núnisan atí tusa najaniamiayi. ²⁵ Nujajñkia ayashí muchitmarí máanaitsuk métek yáiniainiawai. ²⁶ Chikichik muchitmaram najaimiakum ashí ayashnium wátiatsmek. Núnisan chikichik muchitmaram ayap ajakum ashí ayashnium shiir átsumek.

²⁷ Núniskete Kristu ayashíjaj ayashímkiaji nu. Tura chíkich chíkich ni muchitmarí aji. ²⁸ Ayashnium muchitma írunna áintsan Yus ni shuarin untsurí takatan sú-saiti. Emka Yus akatramu, nuyá ni chichamen etserin, nuyá jintinkartin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjaj chicharin, mash írunui. ²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túrinia ainia. ³⁰ Ashí tsuákratinuk ainia. Ashí niisháa chichamjaj chichamtiniak ainia. Ashí niisháa chichamjaj chichasman jintinkratniuk ainia? Atsá. Túmachuiti. ³¹ Túmaitkuñkia péñkera nu takastin wakeruktarum. Tura imiá péñkera nuna juj jintintiatjarne.

Aneatin

13 Ju nuñkanmayá aentsu chichamen untsurí chichayatnak tura nayaimpinmayá aentsu chichamencha chichayatnak aneḅkratchaknaka tampur meserua áintsanak aya ten-ten ajajai. Peñké ántan chichaajai. ² Yus-Chichamnasha ti shiir étseriatnak, túrasha ashí yuḅmancha tura ashí nekaamniancha nékayatnak, túrasha Yúsán ti enentáimtusán murá umuchiayatnak, aneḅkratchaknaka peñké ántraitjai. ³ Ashí wi takakjana nuna atsumainian súayatnak tura Yus shiir awajtsatsan winia ayashrúncha áesawarti tusan surumayatnak tura aneḅkratchaknaka ántan chichayatnak.

⁴ Aneḅkartaka wari kajeatsui, tsáñkaiti, chíkich shuaran shiir awajniuiti, péejchach asa waantu enentáimtumatsui. ⁵ Aneḅkartaka natsanta nuna túrichuiti, níiniunak enentáimchaiti, kajechuiti, páchichuiti. ⁶ Chikicha tunaarín wararchaiti antsu péñker shuaran wararniuiti. ⁷ Aneḅkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸ Aneḅkrattainkia tuke amuukashtiniyai. Antsu ju nuñka amuukmataisha Yus-Chicham etserkatin atsutawai, tura niisháa chichamjaj unuimiatsuk chichastincha amuukattawai, tura ashí nekanamtai unuimiartincha atsuttawai. ⁹ Kame yamaikia aya ishichik nékaji. Yus-Chichamsha amutsuk étserajai. ¹⁰ Túra ukunam mash nekanamtai yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. ¹² Núnisrik yamá ju nuñkanam Yus paant wáintsuji. Íspik kusurunam íimsatniua áintsan ketete. Antsu ukunam mai métek paant wainni-aikiattaji. Yamaikia aya ishichik nékajai. Nuḅ antsu Yus winia nékara áintsanak nekaattajai. ¹³ Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura aneḅkrattai. Ju menaintiunmasha aneḅkrattainkia ashí nañkaamakuiti.

Niisháa chicham unuimiatsuk chichastin

14 Nu asamtai, aneḅkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatin péñkeraiti. ² Nujajñkia niisháa chichamjaj unuimiatsuk chichastin péñkerchaiti. Iis, nu shuar chíkich shuarjaj chichatsuk aya Yusjaj chichaawai. Ni chichame peñké antukchamniait. Yusa Wakaní nin chichastinian súawai túrasha tana nu nekaachminiai. ³ Antsu Yus-Chichaman étsera nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. ⁴ Niisháa chichamjaj unuimiatsuk chichaana nuka aya niñki katsuartinian yáinmamui. Antsu Yus-Chichaman étsera nuka ashí Yus-shuaran ikiatsuáwai.

⁵ Atumsha ashí mash niisháa chichamjaj chichastinian wakerajrume. Túrasa nuna nankaamas Yus-Chicham etserkatniun wakerajrume. Aya chichastinjajnkia ju imiá péñkerchakait. Kame chichasma jintiákmeke maak. Nujaj Yus-shuar tsakarartatui. ⁶ Enentaimpratarum, yatsuru. Nu iraakun aya niisháa chichamjaj chichaaknaka žitiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarume. Yus-Chichamnasha tura ashí Yúsnancha jintinkiuncha yáintatjarume.

⁷ Peemsha tura tumaŋsha wi tájana áintsan áiniawai. Péñker tuntuíyamuka paant nekaamniaiti. Tura péñker tuntuíyachkuinkia, nu tuntuíyamu nekaachminiaiti.

⁸ Suntarsha mesetnum wéenaku ni kapitiantri ni wakeramun ujaktinian kachun umpuawai. Paant umpuakuinkia suntarsha ni wakeramun nekaawartatui. Tura paant umpuachkuinkia suntarsha žitiurak mesetnum wétinian iwiarat? ⁹ Atumjajsha núniskete. Nekaachmin chichamjaj chichaakminkia žtámena nuna itiru nekaawartata? Nase chichartsumeash. ¹⁰ Ju nuñkanmayá chichamka ti untsurj irunui. Nu chichaman nékaka ashí antukmin áiniawai. ¹¹ Tura chikich shuara chichamen ántachkunka níjjajnkia yajaya apachia áintsanak ajajai. Niisha wíjjajnkia yajaya apachia áintsanċete. ¹² Tuma asamtai, Yusa takatři ti wakera asarum ashí Yus-shuaran iċjarartatna nú takat nekas wakeruktarum.

¹³ Nu asamtai niisháa chichamjaj chichaitkiumka chichasumna nu jintiartin Yus seata. ¹⁴ Niisháa chichamjaj Yusan áujeaknaka nekas winia wakantrujaj áujeajai tura áujsajna nuna nékatsjai. ¹⁵ Antsu wikia júnisan enentáimjai. Yusan áujeakun winia wakantrujajsha áujsattajai tura enentáimtsuk áujsashtajai. Kantamkuncha kantamaj nuna enentáimkiun winia wakantrujajsha kantamattajai. ¹⁶ Amesha shuar iruntramunam aya wakanmijaj niisháa chichamjaj Yus shiir yumŋsakmincha nekaachmin asamtai nékachuka ámijaj métek áujsatniun jeatsui. ¹⁷ Ti shiir Yus yumŋsam áujeatsmeash tura chikichka Yusjaj ikiakáatsme. ¹⁸ Ashí átum nusháa chichamjaj chicharmena nuna nankaamas wikia chichaajai. Nuna Yusan yumŋsajai. ¹⁹ Túmaitiatnak untsurj chichamjaj chichasan ántumtikiashtinjajnkia nankaamas Yus-shuar iruntramunmanċa aya senċu chichamchijjaj tiintjai, paant jintintiawartaj tusan.

²⁰ Yatsuru, uchia áintsarum enentáimprairap. Kuirchia áintsarum tunáa túrashtin enentáimpratarum tura chikich irunna nujaj uunt enentáimpratniua áintsarum enentáimpratarum. ²¹ Yus-Papinium áarmaiti:

“Yajaya shuaran akupkan niisháa chichamjaj chichasattajai. Tura nújjajsha anturtukchartatui” tawai Yus.” Tu áarmaiti.

²² Nújjajnkia páantaiti, nusháa chichamjaj chichastinkia Yus-shuaran ashamtikar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuaran enentáimtiktsuk Yus-shuaran yáintinian súsaiti. ²³ Tu-

ma ajn, nékachusha tura Yus-shuararchasha Yus-shuar iruntramunam wayanċa tura ashí niisháa chichamjaj chichainianak wáñċianċa “mash waurka ajasara” enentáimturmarchartatuak. ²⁴ Tura Yus-Chicham étserkurminkia nékachusha tura Yus-shuararchasha nu wayanċa ashí tárumna nujaj ni tunaarjn ímias enentáimturtatui. ²⁵ Nújjajnkia ni enentáin úumak ana nuna paant wániak tikishmatar Yusan shiir awajsattawai. Tura “nekas Yus atumjaj pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátiniuncha, jintintiatniuncha, Yus iwiainiakman ujaktinniasa, nusháa chichamjaj chichastinniasa, nusháa chichasman jintiatniuncha, ashí Yus-shuar Yusjaj tsakararti tusar juna mash takasarti. ²⁷ Nusháa chichamjaj chichainiakka chikichik chikichik chichasarti. Tura jimiarchik menaintiuchiksha chichasarti. Tura ni timianka jintiartiniaiti. ²⁸ Jintiartin atsakuinkia nusháa chichamjaj iruntramunam chichaschatniuiti. Antsu niñki Yusjaj chichasti. ²⁹ Núnisan jimiarchiksha menaintiuchiksha Yus-Chichaman etserkarti. Tura chikich shuar nu iruntrar ni etserkamun enentáimprarti péñkerashit tusar. ³⁰ Tura chikichik chichaakui Yus chikichan nu pujana nuna yamaram chichaman súakuinkia emka chichaa nu iniásatí. ³¹ Núnisrum Yus-Chicham etserkatin wakerarmena nu chikichik chikichik chichasum ashí jeattarme. Nújjajsha Yus-shuar unuimiarar kakarartatui. ³² Yúsnan étserainia nuka tuke enentáimprar chichastin áiniawai. Enentáimtsuk náñkamsan chichasmin ániatsui. ³³ Yuska pachimtak chichaman nakitiak shiir chichasmanak wakerawai.

Chikich nuñkanmasha ashí Yus-shuar iruntramunam túrainia áintsarum túratniuitrume atumsha. ³⁴ Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin áiniawai. ³⁵ Inintrustinianian wakerakka ni jeċen wakatkin ni aishrjn nu aniasti. Ashí iruntramunam nuwá chichastin natsantaiti.

³⁶ Jusha enentáimpratarum. Yus-Chicham atumjaj nanċamnachmai. Núnisan aya atumjijn Yus-Chicham jeartamchaiti. Chikich nuñkanmasha Yus-shuarti túrtai enentáimpratniuitrume atumsha. ³⁷ Atumjijn shuar “Yus-Chichaman tuke etserniuitjai” enentáimtumatsush. Tura chikich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí. ³⁸ Tu táchakuinkia niisha ántar áiniawai.

³⁹ Nu asamtai, yatsuru, Yus-Chicham etserkatin wakeruktarum. Nusháa chichamjaj unuimiatsuk chichastincha surimkiarap. ⁴⁰ Túmaitiat antukchamin awajtsuk ashí shiir túratarum.

Kristu nantakmia

15 Ataksha, yatsuru, uwempratin chichaman wi etserkamaj nuna atumin enentáimtikratsan wak-

erajrume. Nu chichamsha atumsha enentáimturarum tariarurme. ² Nu chichamsha átum ántar enentáimtachkurmeka uwemprairume. Wi ujakmajrum nu tuke enentáimtaikturmeka nekas uwemprairume.

³ Winia ujakmunak ujakmajrume. Nu chichamsha ashí nan̄kaamas úntaiti. Júiti nu chicham: Ii tunaarín asakártasa Kristu jarutramkamiayi, Yus-Papinium tana núnisañ. ⁴ Tura jakamtaí iwiansarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisañ. ⁵ Nantakisha Pítrun wantintiuksiayi, nuyá ni akatramurín wantintiuksiayi. ⁶ Nuyañka kiniantusa (500) nan̄kaamas Yus-shuaran wantintiuksiayi. Nú shuarnumiasha ishichik jákaru ániawai tura untsurí tuke pujuiniawai. ⁷ Nuyasha Sán-tiakun tura nuyá ashí ni akatramurín wantintiuksiayi.

⁸ Ashí amúamunmasha winiasha wantintiuksiayi, wi yajauch wekaa añ. ⁹ Wisha Yus-shuaran ti yajauch awajsa asan chíkich Yus-akatramujai ímianchaitjai. Nekas winia péñkerujai ni akatramuríntjai tíchamniaitjai. ¹⁰ Antsu Yus ti shiir anentak winia enentáiruí pujurtus péñker najataiti. Nu asamtaí winia kakarmarjai takaschaitjai, antsu Yus, anekartin asa, winia enentáiruí takaakuí ashí ni akatramurín nan̄kaamas takasuitjai. ¹¹ Tura wi takaakuisha tura ni takainiakuisha mai péñkerkete. Nu chichamka mash étserējai tura nu chichamsha átum enentáimtusmarme.

Jákaru nantakiartatui

¹² Iisha “Kristu jakamunmayá nantakniuiti” tu étserējai. ¿Itiur nuikia shuar jakamunmayá nantakchatniuiti tuinia? ¹³ Jakamunmayá nantakchatniuitkiuñkia nuikia Krístusha nantakchaiti. ¹⁴ Tura Kristu nantakchaitkiuñkia ii uajnia nu péñké ántrait, atumsha Kristu enentáimtarmena nusha ántrait. ¹⁵ Núnisaitkiuñkia iisha “Yus Krístun iniantkimiayi” tákur waitrumaji. Iis, nekas jakamunmayá nantakchamniaitkiuñkia nuikia nekas Yus Krístun iniantkichiuiti. ¹⁶ Jaka nantakchatniuitkiuñkia imia Krístusha iniantkichmaiti. ¹⁷ Tura Kristu iniantkichmaitkiuñkia átum Kristu enentáimtamusha péñké ántrait. Tunaarmisha asakárchamu ániawai. ¹⁸ Núnisaitkiuñkia Yus-shuar jákaru aini nu tuke meñkaru ániawai. ¹⁹ Iikia Kristu enentáimtusar tuke Niiijai shiir pujustin nákaí. Tura aya jú nuñkanam pujustiniaitkiurkia Kristu ántar enentáimtakrin ashí nan̄kaamas waitnentrampnatniuitji.

²⁰ Antsu imiankas Kristu jakamunmayá nantakniuiti. Ashí ukunam jakanmayá tuke jákashtinian nantakiartatna nuna Nii émtukuiti. ²¹ Yaunchu Atañ tunáa túramtaí ashí shuar jákatin ániawai. Núnisañ yamaikia Krístujaiñ tuke atakka jákashtinian nantakiartiniaiti. Iis, chikichik áishmanjaiñ jákatin nan̄kamnamiayi. Nuka Atañkayayi. Núnisañ chikichik áishmanjaiñ nantaktin nan̄kamnamiayi. Nuka Krístuiti. ²³ Yus wakerana nuí Yusna nu mash nantakiartatui: Kristu emka-juukma áintsañ émtukim nantakniuiti tura atak jú nuñkanam tara ashí ni shuarín júuktinia áintsañ iniantkittiawai. ²⁴ Nuiñkia mash amuukattawai. Nuí Kristu ashí kapi-tiánniasha, ashí akupniuncha, ashí núnisañ jú

nuñkanam írunna nunasha nupetak emesrattawai. Krístusha ashí mash ni Aparín susattawai. Tura Yus Apa ashí akupin átatui nuikia. ²⁵ Iis, júnisañ átatui. Emka Yus Apa ashí ni nemasrín nupetak Krístun susattawai akupin atí tusa. ²⁶ Tura ni nemasrín nupetak ashí amúamunam jákatniuncha nupetkattawai. ²⁷ Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti. ²⁸ Tura Yus Apa ashí mash ni Uchirín Krístun nekas susamtaí Kristu nuikia ashí akupin ajas atak ni Aparín mash awantuki núnisañ surumaktatui. Nuiñkia Yuska tuke ashí nan̄kaamantu átatui.

²⁹ Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtaí imianainia?

³⁰ Iikia ¿urukamtaí tuke jáñkiaruitiaí? Nantakchatniuitkiuñkia ántara wáitsaintji. ³¹ Atsá, péñké áintsachuiti. Nu asamtaí átum ii Uuntrí Jesukrístu enentáimtakrumin wi shiir enentáimtajrume. Tura wisha tuke tsawantin ti itiurchat pujakun jákatniua áintsan pujajai. ³² Jakamunmayá nantakchatniuitkiuñkia wi ántanak kajen shuarjai Ipisiunam máaniakuitjai. Maa, uunt yawáa áinis kajen ármai. Wats, núnisaitkiuñkia antsu “yurumár nampektai, kashin jákashtatjik” titiai nuikia.

³³ Anan̄nawairap. “Péñkeraitiatam yajauch shuarjai tsaniñka wekakmeka yajauch máatrattame” tiniu ániawai. ³⁴ Tunáa ikuakrum péñker wekasatin shiir enentáimpratarum. Iis, shuar Yúsán nékainiachu tuke awai. Atumin natsaáruk tusan tájarme.

Iniantkimiuyu ayash átatna nu

³⁵ Shuarsha inintruschaimpiash ¿jákarusha itiurak nantakiarat. Nantakiarsha warí ayashniak takusarat? ³⁶ Enentáimtsuk inintrawai. Jiñkiaí araamsha jaka áintsañ amúatsuk. Túrayat tsapaatsuk. ³⁷ Tsapaitniurísha araatsme antsu trikiu jiñkiaichisha chíkich áraka jiñkiaichirísha araame. ³⁸ Nuyá tsapaakuisha Yus wakerana núnisañ ní tsapaitniuríncha súawai. Tura añkant añkant tsapaitniuríncha súsaiti. ³⁹ Núnisañ ashí ayash métekcha ániawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa ániawai. ⁴⁰ Nayaimpiniam yaa írunui tura jú nuñkanam írunna nujai nusháa ímtin ániawai. Nayaimpinmayasha nuñkayasha shíimari nushaiti. ⁴¹ Etsá wincharísha nantunusha yáanusha mash nushaaiti. Nuamtak yaaksha chikicha wincharíñkia chikichnajañkia nushaaiti. ⁴² Núniskete jaka nantaktincha. Káurtinnium iwiansam jákashtinnium nantaawai. ⁴³ Antra nu iwianawai, shiira nu nantaawai. Kakarmachua nu iwianawai, kakarma nu nantaawai. ⁴⁴ Juyá ayash iwianawai, nayaimpinmayá ayash nantaawai. Juyá ayash átsuk. Núnisañ nayaimpinmayá ayashsha awai.

⁴⁵ Yus-Papinium nuní áarmaiti:

“Emka áishman ni naari Atañ, aents ajas iwiaaku ajasmiayi.” Tu áarmaiti.

Ukunmaṅka, yamaram Ataṅka áintsan, Kristu, wakan asa, ashí áentsun nekas iwiaaku átinian susamniaiti. ⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu. ⁴⁷ Emka áishmaṅ nuṅkajai najanamu asa nuṅkayaiti. Ukunmaya áishmaṅsha ii Uuntrí Kristu asa nayaimpinmayaiti. ⁴⁸ Ataṅka áintsan ainia nusha juyá ayashtin áiniawai. Kristu áintsan ainia nusha nayaimpinmaya ayashtin áiniawai. ⁴⁹ Yamái juyá áiniakur ukunam nayaimpinmaya ayashtin ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nu, wayachminiaiti. Iis, káutaṅkia káurchatniunam wayachminiaiti. ⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. ⁵² Tura puseri muítsarniṅ ti wárik yapajniáttaji. Tura ashí amuukai tusa umpuarta-tui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuṅ yapajniáttaji. ⁵³ Jú kautaiṅkia yamá jákatniuiat káurchamnia ajastiniaiti. Túrasha jákachmin átatui. Nu túrunam-taisha Yus-Papinium aarma uminkiattawai:

“Jákatniun Yus nupetak amukuiti. ⁵⁵ ¿Itiur jákatjik yamáia. Jákatniusha itiur nupettamkaṅ mantamataj?” Tu áarmaiti.

⁵⁶ Yaunchu Yus akupkamu tiniu asamtai shuar tunáa tura jákatniuiti. ⁵⁷ Yamái antsu ii Uuntrí Jesukrístu túramujai jákatniunka Yus nupetkaiti. Tura incha nujai uwempratniun amaakui shiir yúmiṅkijai.

⁵⁸ Nu asamtai, aneamu yatsuru, kakaram ajasrum yawetsuk naṅkaamas Yusa takatrí takastarum. Ii Uuntrí Krístujai tsaniṅkia takaarum nuka penké ántrachuiti. Nu paant nékarme.

Yusa kuitrj irurtin

16 Yusa kuitrj irurtinkia, Yus-shuaran Karasea nuṅkanam tímiaj núnisnak atumniasha tájarme. ² Ashí tumiṅtin, Yus súramna áintsam akankam ikiusta. Nújajṅkia wi jeattaj nuṅ yaunchu akankamu mash irurmin átatui. ³ Nuṅ jeancha átum anaiyarmena nu shuaran papijjai Jerusarénum akupkattajai. Tura atumí kuítrumin aisha ii yachin súsartatui. ⁴ Wisha wéminiaitkiuṅkia wijjai wéartatui.

Papru irastatna nuṅ

⁵ Wi Masetúnia nuṅkanam wétiniaitjai tura nuyá Kurintiunam jeattajai. ⁶ Nuṅsha untsurí tsawant pujuschatjash. Ishichik nantusha wéchamnianum pujuschatjash. Tura wi atak wéakui atumsha yáintkiarum shiir akup-tukchattarpash. ⁷ Aya wárik naṅkaamaktinian nakitiajai. Antsu Yus wakerakuṅkia untsurí tsawant atumjai pujustaj tajai. ⁸ Tura juṅ Ipisiunam pintikustis nampernum pujustajai. ⁹ Juṅkia Yusa takatrí tí shiir takastinawai. Tura untsurí shuar wi takaamun nakitiainiawai.

¹⁰ Timiutéu nuṅ jeamtajṅkia, shiir awajsatarum; sapijmiakajṅ. Niisha wijjai métek Yusa takatrín takaawiti.

¹¹ Nu asamtai nakitairap. Antsu yáinṅkrum winí shiir akupkatarum. Chíkich yachijjai tatí tusan nákaikai.

¹² Apurusnasha chíkich yachijjai winí írmasartí tusan ti seamjai tura penkesha nakiarmai. Kame nii aṅkant aku nuṅ winishtimpiash.

Áujmamsamu

¹³ Aneara tariarum Yus nekas enentáimtustarum. Áishmaṅchakaitrum, kakaram ajastarum. ¹⁴ Aneṅkaramujai mash túratarum.

¹⁵ Ayu, yatsuru. Estepanasa shuari ashí emka Akaya nuṅkanam Yus-shuar ajasarmen nékarme. Niisha Yus-shuaran yáintajtsar tuke takainiawai. ¹⁶ Niisha tura ashí niijjai métek yáinṅkiar takainia nú shuar seatmana nu tuke túratarum. ¹⁷ Estepanassha Jurtunátusha Akaikiusha atumíya táarmatai shiir waraajai. Átum yajá pujakrum tujintiarmena nuna túrawarmai. ¹⁸ Niisha winia shiir enentáimtikrurarai. Núnisan shiir enentáimtikramprattarme. Nuní aents tuke shiir enentáim-tustiniaiti.

¹⁹ Asia nuṅkanmaya Yus-shuar amikmáatmainiawai. Akirasha ni nuwé Prisirajajisha ashí Yus-shuar ni jeen Yus-Chichaman irunturarusha Jesusa náariin amikmáatmainiawai. ²⁰ Ashí ii yachisha amikmáatmainiawai. Nuámtaksha shiir awajnisrum amikmáaniatarum.

²¹ Wi Papru asan júchiniak winia uwejrui áaran amikmaajrume.

²² Ii Uuntrí Jesukrístun aneachuka yajauchiniam yumiṅkramu atí. “Ii Úuntrí, wari tatá.”

²³ Ii Uuntrí Jesukrístu yainmakarti. ²⁴ Jesukrístunu asakrumin atumin ashí ti aneajrume. Nu atí.

2 KURINTIUNAM

Kurintiunmaya Yus-shuaran Papru áatramiania nu

1 Wi Pápruitjai Jesukrístu akatramu. Yus nuna wakerakui ni akatramurj anaikiamuitjai. Ii yachj Timiutéujaj Yus-shuar Kurintiu péprunam íruntrumna nuna áatjarme. Kame ashí Akaya nuñkanam Yusna ajasurmena nunasha áatjarme. ² Apa Yussha, ii Uuntri Jesukristusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamurj

³ Ii Uuntri Jesukrístu Aparj, ii Yusrj ana nuna naarj uunt awajsatai. Niisha ii Aparínti. In waitnentrámaji. Tura Niisha ii Yúsrjnti. Tuma asa in tuke atsañtamj. ⁴ Ii wáitajnia nuj Yuska in atsañtamj. Tura in atsañtamjnia nútiksarik iisha chíkich shuar wáitainia nuna atsañkrarat tusa túrutmaji. ⁵ Warí, Kristu wáitsamurj núkap pachiinkiaitjnia núnisrik ni atsañkramurj núkap pachiinkiaitj. ⁶ Tuma asamtai, wáitajnia nu, Yusa uwemtikrampratniurj tura ni atsañkratniurj atumsha takustarum tusar wáitajji. Tura Yus in atsañtamprámjnia nu, Yusa uwemtikrampratniurj tura ni atsañkratniurj átum takustarum tusar atsañkramuitjji. Wats, átum uwemtikramu tura atsañkramu asarum, ii wáitsajnia nútiksarmek wáitaiyatrum shiir enentáimsarum katsuntramniaitrum. ⁷ Tura “túratwawai” tu enentáimtajrume. Warí, átum iijjaj métek wáitsaitrum. Núnisañ iijjaj métek Yus atsañtamtsurmek.

⁸ Yatsurtiram, iikia Asia nuñkanam ti itiurchat wáinkiamjnia nu nekaatarum tusar wakeraji. Imiá itiurchat wáinkiar iikia katsuntratin jeachmaji. ⁹ Nu itiurchatnumiá “iwiaaku jíinkisatjji” tu enentáimsamj. Túrasha “iikia tujinchaitjji” tu enentáimtumatsuk, antsu jakamunmayan iniannia nú Yúsan enentáimtusarat tusa nu túrunamj. ¹⁰ Jakamnia itiurchatnumiá Yuska uwemtikramprámj. Tura yamaisha uwemtikrampratajtsa pujurtamj. Tura atumsha in Yus áujtakrumniñkia “Yuska tuke uwemtikramprattaji” taji. Tura untsurj shuar Yus aujsa asakrumin, ii uwempra asakrin untsurj shuar Yúsan yumisartatui.

Kurintiunam wau wéchatniun Papru ujakmiania nu

¹² Yatsurtiram, ju nekaatarum tusar wakeraji. Ju nuñkanam pujusar tura nekaska atumjaj pujusar anañtsuk tura Yus umirkar wekaimj. Aya ii nekatairijjaj wekaichamj. Antsu Yus in waitnentrama asa péñker wekasatniun yainmakmaji. Nu nekaar shiir

enentáimj. ¹³ Áatjarmena nu páantaiti. Átum áujsarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. ¹⁴ Ishichik nékayatrumek nú núkap tuke nekaki wetarum tusan wakerajrume. Nuiñkia Jesukrístu tátinia nú tsawantaj átum winia shiir enentáimtursatjarme. Tura átum péñker wekasa asakrumin shiir enentáimtustatjarme. ¹⁵ Tura ii shiir enentáimtiaj nuna nékakun ataksha Yusá waitnenkartutairj nekap sak tusan ataksha atumiñ irastinian wakerimjai.

¹⁶ Masetúnia nuñkanmaani wéakun írkuta nañkaikitjarum tusan enentáimtiajai. Tura wáketkuncha ataksha ístajrum tusan wakerimjai. Túramtai wi Jutía nuñkanam weakui átum yáintkiatarum tusan atumin ístinian wakerimjai. ¹⁷ Nuiñkia ¿urukamtai túrachmaj? ¿Péñker enentáimtsukek “wetajai” tímiaj? ¿Wi Yusshuarcha nunisañ, jimiara chichamtinai, tú enentáimtursarumek? ¹⁸ Núchaiti. Yus tana nuna tímiatrusañ umiana nútiksarik iikia ii chichame umiktai tusar wakeraji. Jú chichamaik, “Ee, atsa” tátsuji. ¹⁹ Wisha Serpanujaj Timiutéujaj Yusa Uchirj Jesukristunun ujakmajrume. Niisha jú chichamaik, “Ee, atsa” tíchaiti. Antsu nii tana nuna tuke umíawai. ²⁰ Niijjajsha Yus tana nu tímiatrusañ uminiui. Tuma asamtai Jesukrístu enentáimtakur “nii tana nuna nekas túratwawai” tu enentáimj. Tu enentáimsar Yusa naarj shiir awajeaji.

²¹ Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamj. ²² Tura ukunam ii achiktatjnia nuna, nekas amastatjai tusa Yus ni Wakanin ii enentáin apujturmajji. Nujaj Niiniuitjji tusar paant nékaji.

²³ Atumiñ itirchatan wáinkiajj tusan nakitiakun atumí péprurj Kurintiunam jeachmajai. Wáitakuñkia “Yus iirsati” tajai. ²⁴ “Aya wi tájana nútiksarmek Yus enentáimtustarum” waantu enentáimtumasar nu titin nakitajji. Yus nekas enentáimtusmaajaj kakaarme. Antsu nekas warastarum tusar wakeraji.

2 Tuma asamtai, atak kúntuts awajsajrum tusan nakitiakun, “atumí tunaarj íwiartsurminin jeashatjai” tímiajai. ² Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitrum. ³ Wi jeakun atumí tunaarj íwiartsurminin kúntuts enentáimsaj tusan nakitiakun, nu papin áarmaj nútiskanak áarmajai. Warí, atumketrume winia waramtikrustin. ⁴ Nekaatarum. Nu papin áarmiajai. Kúntuts awajjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsan̄kuratin

⁵ Túrasha kúntuts awajtusmia nu, aya wíniak kúntuts awajtuscha mai. Antsu atumniasa ishichik kúntuts awajtusai. Patasa chichasaj̄ tusan “ishichik” taji. ⁶ Kame nu áishman̄kan iruntra chicharkarum wáitkiasmarum nuke máakete. ⁷ Antsu yamaikia tsan̄kuratniutrume. Shiir enentáimtikratniutrume. Niisha imiá kúntuts pujus nú arant ajasáin̄ tusarum túratniutrume. ⁸ Túrakrum nii nekas anearmena nu paant iniaktustarum tusan seajrume. ⁹ Kame “aajna nuna umirtukartimpiash” tímiakai. Kame nuna nekaataj̄ tusan wakerakun nu papin nuik áatramjarme. ¹⁰ Átum tsan̄kurearmena nú shuaran wisha núnisnak tsan̄kureajai. Tura tsan̄kuratin ákuin̄kia, wi tsan̄kurajna nu ashí atumnian enentáimtusana, Kristu íimmianum túrajai. ¹¹ Kame uunt iwianch Satanás in emestampratajtsa wakerana nusha nékaji. Tuma asamtai, túrawaj̄n̄ tusar tsan̄kuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti péñker takastinian wáinkiamjai. ¹³ Túrasha ii yachí Titiun wáinkiachu asan, shiir enentáimsatniun tujinkiamjai. Tura asamtai Trúasnumiá aentsun áujsan ikiukiaran Masetúnia nuñkanam wémiakai.

Krístujaj̄ nupetkamniatiji

¹⁴ Kristu Jesusjaj̄ Yuska incha nupetmamtikramak ewekatmasuitji. Tuma asamtai Nincha ti shiir yúmin̄sa pujajai. Tura kukujī kuñkúakui, ashí nékainia núnisan̄ ii etserkamujaj̄ Kristu shiir chichamen Yuska ashí aentsun nekamtikianiawai. ¹⁵ Kristu in pujurtamu asamtai Yusjaj̄ nekapsamka iikia kuñkúaji. Ii kuñkúajnia nuna uwemtikramu ainia nusha tura uwemtikramama ainia nusha nekapramnia ainia. ¹⁶ Men̄kakatniunam weena nuka ii kuñkúajnia nuna jakamnia mejea nekapramji. Tura iwiaaku átinnium weena nuka iwiaaku átin kuñkúa nekapramji. Maa, nu túratniuncha zyaki jeá?

¹⁷ Kame untsurí aents kuítian achiktaj̄ tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus íimmianum anant̄suk esetsar étserajai.

Yamaram chícham najanamu

3 ¿Nu tákurnin̄kia, “ataksha nin̄ki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman̄ nekas Yus-Chichaman etserin áiniawai” tusa papí aarma atumin iniaktustinkiaitaj̄? ¿Chíkich iniaktustin nú papí atumin seatniukaitaj̄? ² Atsá. Átumka ii papirija núniskechukaitrum. Ii enentáin̄ nu papí áarmaiti. Tura nú papí áujsatniua núnisan̄ ashí aents atumi túramur̄i wáinkiar̄ ii etserkamaj̄ nu, Papru nekas Yusa takatr̄in̄ takaawai tusa nekaamnia áiniawai. ³ Iis, tátsujak. Papí aarma

núnisketrume. Nu papí Kristu áarmaiti tura iisha nú papí atumin súaji. Tíntiajaj̄in̄chu antsu iwiaaku Yusa Wakan̄jaj̄ áarmaiti. Kayanmasha áarchamuiti; antsu shuara enentáin̄, auka, áarmaiti.

⁴ Kame Krístunu asar, Yus enentáimta asar, nusha tíminiatiji, taji. ⁵ Ju nékaji; imia iik pen̄ké tujinkiaitji. Antsu ii túrajnia nu Yus ni kakarmar̄in̄ súramkurin̄ túrajai.

⁶ Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakan̄jaj̄ yamaram wekasatniun súramji. Yusa kakarmar̄ijaj̄ nu chicham étserji. ⁷ Yaunchu chichamnaka kayanam aar Yus Muisaisan susamiayi. Susamia nu, Muisaisa yapi ti wincha ajasmiai. Túrunamta Israer-shuar ni yapin íistinian tujinkiarmai. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuaran ejemiayi. Túmayatan̄ winchajaj̄ susamuyayi. ⁸ Tura yamaram chichaman Yusa Wakan̄jaj̄ súramna nu, nujaj̄ nan̄kaamas shíiraiti. ⁹ Kame mesertinnium ejeana nú chicham winchajaj̄ susamuyayi. Tura nujaj̄ nan̄kaamas Yúsnum ejeana nú chichamka Yus íimmianum péñkeraiti. ¹⁰ Iista; yamaram ana nu imiá shiir asa, yaunchu wincha amia núnaka mushatmamtkiui. ¹¹ Núkap arur pujuschamnia nu wincha áchamkia. Kame tuke átinia nuke nujaj̄ nan̄kaamas shíiraiti.

¹² Nu nékatur ti paant étserji. ¹³ Muisais túramia nútiksarik túratsji. Ii uuntri Israer-shuar ni yapin wincha ajas men̄kaan wáinkiaraj̄n̄ tusa tarachjaj̄ ni yapin Muisaiska nukumakmiayi. ¹⁴ Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarmai. Tura yamaisha núnisan̄ yaunchu aarma chichaman áujsam antukar nekaatniun tujintiainiawai. Kristu enentáimtuschatin ni enentáin̄ nukukma nu yapajjáchmaiti. Aya Krístujaj̄ nuka yapajjáimniatiji. ¹⁵ Yamaisha Muisaisa áarmar̄in̄ áujsar nékainiatsui, ni enentáimmar̄j̄ nukurkamu asa. ¹⁶ Tura aencha ni enentáin̄ yapajjá Uuntna ajasmataikia ni enentáimmar̄ij̄a nukurkamu ana nu jusamuiti.

¹⁷ “Uunt” tájinia nu, Yusa Wakan̄jaj̄. Uunt Yusa Wakan̄jaj̄ pujana nuj̄ ant̄kant ajastiniatiji. ¹⁸ Nuke asamtai, iisha ii yapí tarachjaj̄ nukukchamu asar íspikia núnisketji. Uunt Kristu péñker̄j̄ iniakmaji. Kristu péñker̄j̄ nú núkap takaki wéakur, Krístujaj̄ métek ajastasa pujajai. Yusa Wakan̄jaj̄ nuna túrawai.

4 Yus in waitnentrama asa ni chichamen etserkatniun ataktamsaitji. Tuma asamtai yawetsuk takaa-ji. ² Uyka túratin ana nuyá tura natsanmaj̄ ana nuyasha kanakmiaji. Anankatai tusar wekaatsuji. Tura Yus-Chichamjaj̄ nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túrajai. Wi tájana nuna Yus nékawai. ³ Uwemprat̄in̄ Chicham ii étserjinia nu páantaiti. Áyatik men̄kakatniunam weena nu “páantchaiti” tuíniawai. ⁴ Uunt iwianch, ju nuñká uuntri

ana nu, nu aentsu enentájn ukusturuiti. Uunt Krístunu shiir chichaman ii étsermajaj tsáapnin enentáim-praraj̄n tusa ukustawai. Nu Kristu Yúsán ímiatrusan nakumui. ⁵ Iisha étserkur, Jesukristu ii Úuntr̄nti tu ét-sereaji. Iikia atumí úntr̄nt̄ji tátsuji. Antsu, Jesus ii uuntr̄i asamtai, atumí yáintr̄nt̄ji, taji. ⁶ Yaunchu kiritin aan Yus tsáapin ati tusa tsáapnin awajtsachmakia. Nú Yúsaiti ii enentáin tsaapnin awajtsamsamia nu. Nu tsaapnij̄aj̄ ni shiirmar̄in, Jesukristu iniakmia nuna, ashí aents nekaawarat tusar Jesukristunun étseraeji.

Yusak enentáimtusar wekasatin

⁷ Nu tsáapin imiá péñker ana nuna ii ayash̄ijn Yus ikusuiti. Tura ii ayash̄i kakarmachu, nuwe najanamua áanin asamtai, warí, kakaram ájnia nu Yúsnumi-achukait. Ii aj̄ nuna nekaawarat tusa Yuska ni tsáapnin-tr̄in ii ayash̄ijn ikusuiti. ⁸ Tuma asamtai ii itiurchatr̄i árentmaku áriniñ tuke jiinkimniait̄ji. “Itiurkat̄jik” taji, túrasha Yus yáinmaji. ⁹ Aents pataaturmainiakrincha Yus ikiurmats̄ji. Emesrataj tukamá tujintiainiawai. ¹⁰ Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Kristu kakarmar̄i ii ayash̄ijn iniakmaji. ¹¹ Iisha Jesusna ajasu asar wekaajnia nuñ̄i tuke tsawant tsúumainium jasattuk ajaji. Túrar ii ayash̄i jakamniait̄iat nu ayash̄nium Jesusa iwiaakmar̄i paant iniakmaji. ¹² Iisha Yus-Chicham étserkur ii ayash̄ijn jasattuk ajaji, tuma aj̄n atumsha umikiu asarum nekas iwiaaku atin wáinkiar̄me.

¹³ Yus-Papinium yaunchu áarmanum: “Yúsán enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. ¹⁴ Yus kakarmaiti. Uunt Jesusan jakamunmaȳan ini-antkimiayi. Incha núnisan̄ Jesus̄aj̄i iniantamkittiaji. Tura atum̄aj̄i métek ni pujamunam juramkittiaji. Nusha paant nékaji. ¹⁵ Atumsha untsur̄i aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yum̄nsarum pujarme. Nuj̄aj̄ Yusa naar̄i uunt awajsamuiti. Nu nekaar wáitsatin ashams̄ts̄ji. ¹⁶ Tura yaw̄eats̄ji. Ii ayash̄i amuiki wéakuisha ii enentáin̄kia yamaram ajaki wéawai. ¹⁷ Warí, ukunam tuke shiir pujustat̄jnia nu enentáim-takrikia, jū nuñkanam wáitiajnia nu, ti itiurchatait̄iat, aya yamaiȳa asa tiikia itiurchatchaiti, tura wárik nan̄kaamawai. Túrasha ii itiurchatr̄ij̄aj̄ Yuska ti shiir ana nuna amuukachmin ana nuna núkap suramsattaji. ¹⁸ Tuma asamtai wáinjinia nu ti enentáimtats̄ji. Antsu wáintsujnia nu nekas enentáimtaji. Wáinjinia nusha aya yamaiȳaiti. Antsu wáintsujnia nuka tuke amuukachminiaiti.

⁵ Wats jū nékaji. Nayaimpiniam ii shiir pujustinian amuukachmin ayash̄in Yus najanamun ikiurtamsait̄ji. Aents najanachmaiti nu. Tuma asamtai ii ayash̄i emesnakuisha warí itiurtamajia. Nuka aaka núnisan̄ amuukamniaiti. ² Jū ayash̄nium pujusar wáitiaji, taji. Yamaram ayash̄ nayaimpiniam pujana nu achiktai tusar wakeraji. ³ Ayash̄tichu ajas̄aj̄j̄ tusar, yamaram ayash̄tin ajastait̄sar wakeraji. Pushíá núnik yamaram

ayash̄ in nukurmaktai tusar wakeraji. ⁴ Tura jū ayash̄aj̄i pujusar wáitsar pujakur shiir enentáimtus̄uji. Arut pushí áiktinia núnisrik jū ayash̄ ikiuktiaitsar tátsuji. Antsu yamaram pushí entsartinia núnisrik yamaram ayash̄nium tuke pujusmí tusar taji. Iista, jū ayash̄ amuukachminkiait. Yamaram ayash̄nium pujusar tuke iwiaaku pujustat̄ji. ⁵ Yamaram ayash̄intin ajastinian iwiar̄tur-maruit̄jnia nu Yúsaiti. Tura nekas túrattaj̄i tusa ni Wakan̄in suramsait̄ji.

⁶ Jū nékaji. Jū ayash̄nium pujajnia jūin̄kia Uunt Jesus̄aj̄i pujats̄ji. Tuma asamtai, wáinjinia nu ti enentáimtut-suk Yus enentáimtusar tuke shiir enentáimsar wekaaji. ⁸ Tura jū ayash̄niumīa j̄in̄kir Uunt Jesus̄aj̄i tuke pujus-tait̄sar wakeraji. Tura túrattaji tu nékaji. ⁹ Tuma asam-tai jū ayash̄nium pujakrish̄a tura jū ayash̄ ikiukrish̄a Uunt Jesus̄a tuke waramtik̄satai taji. ¹⁰ Warí, jū ayash̄aj̄i ii túramajnia nu ujakam, “péñkeraiti”, “yajauchiiti” Kris-tu turutit tusar, ashí iisha Uunt Kristūi jeatniuit̄ji. Tura ii túramuj̄aj̄ métek akirmaktat̄ji.

Krístun waramtik̄sataj taji

¹¹ Tuma asamtai jū nékaji: Uunt umirkashtin ti tsúu-mainti. Nu nekaar ashí shuar Yus-shuaran awajtsataj tusar ti takaaji. Tura incha Yus nékarmaji. Tura ii túramur̄i átumka atumí enentáin̄ paant nékarme, tajai. ¹² Ataksha, “wi péñkerait̄jai” tusar nu tátsuji. Antsu, ii túramu nekáa asakrumin enentáiniam ana nuna enentáimtusuk aya pátat̄kea nuj̄aj̄ warainia nú shuar tsanumprutmainiakui yaintkiatarum tusar taji. ¹³ “Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáin̄tai tusar túraj̄i. ¹⁴ Kame ashí ii túrajnia nu Kristu anenkrat-tair̄ij̄aj̄i túraj̄i. Kame jū nékaji: Kristu ashí shuaran jaruku asamtai, Yus íimmianum ashí iisha jaka núnis-sait̄ji. ¹⁵ Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia jū, iik warar-mamtsuk, Kristu umirkatniuit̄ji. ¹⁶ Tura yamaisha aya ni ayash̄i íirsar, “nu shuar péñkeraiti” tura “nu shuar ya-jauchiiti,” titin tujintiaji. Kame yaunchu aya ni ayash̄i íirsar “Kristu yajauchiiti” tu enentáimsamajia. Tura yamaikia yapaj̄j̄ar, esetsar enentáimkiur “Kristu Yusa Uchir̄nti” taji.

Krístuj̄aj̄ yamarmait̄ji

¹⁷ Tuma asamtai, Krístunu ajasúka yamaram najanamuiti. Yaunchu enentáimtaīri men̄kakayi. Antsu núnika íikias ni enentáimtaīri nekas yamarmaiti yamaikia. ¹⁸ Nunasha Yus túrait̄i. In nawampramkatts̄a Krístun akupturmakuit̄ji. Tura nu etserkatniun incha ataktamsait̄ji. ¹⁹ Yuska in tunaar̄inniutin asutiámatniun nakitiak Krístuj̄aj̄i nawampramkamajia. Tura incha Yus-shuartin nu ujaktinian ataktamsait̄ji. ²⁰ Krístunu ataksamu asar, Yuska “winia Uchir̄j̄aj̄i nawamnaikiatarum” tusa ii wen̄-jaj̄i atumin seatmarme. Tuma asakrin, Kristu náar̄ijn̄ “túratarum” tájarme. ²¹ Krístuka tunaan pen̄ké túrach-miayi. Túmanak ii tunaar̄ijn̄ Yus Krístun makuumiayi. Nuna tura Krístunam makuuchmin awajtsamsamajia.

6 Ni Papiriin Yus yaunchu Isayasan juna tímiayi: Tsawant jeamtai, ame seatmena nuna anturkamjame. Uwempratin tsawant jeamtaisha yainmajme. Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrín pachitki-ajnia nu, Yusa anenkrattairí péñker achiktarum tusar seajrume. ³ Tura “Papru etserkamurí áñtrairí” tíarajín tusar chíkich yajauch enentáimtiktsuk péñker wekaaji. ⁴ Nekas Yusa takarniuríntji nuna paant nekaawarat tusar wáitiayatrik, atsumayatrik, itiurchatnum pujayatrik shiir katsunteaji. ⁵ Ju ítiurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti ítiurchat takasmiaji; kanutsuk pujumiaji; tura tsukasha ti tsukammiaji. ⁶ Tunáa nakitrar wekaaji; Yus-Chicham unuimiátraitji; shiir enentáijjají katsuntrar wekaaji. Chíkich shuar péñker awajeaji; Yusa Wakaní pujurtamkurin shuar nekas aneaji; ⁷ nekas chicham ana nu étsereaji; tura Yusa kakarmarísha nú paant iniakmaji. Tura ni nemasrín nupettukajín tusa suntar ni tantarín júana núnisrik iisha ii nemasrí iwianch nupettamkajj tusar ii Yusrí tuke umirkar wekaaji. ⁸ Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjají shiir wekaaji. “Wáitruiniawai” turamainiakrincha tuke nekas chichaaji. ⁹ “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitriatrik mantamnatsji. Yusa takarniuríntiaj nu ashí nujají paant nekaamniaiti. ¹⁰ Kúntuts pujayatrik ii enentáinkia waraaji; kuítrinchatiatrik chíkich shuar kuítrintin awajeaji; peñké takakchiatrik ashí wáinji.

¹¹ Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme.

¹² Wikia atumin paant chichastajtsan wakerajrume; antsu átumka anenttsuk paant chichastin nakitrarme.

¹³ Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujatkatatum tusan seajrume.

Yusa jeentji

¹⁴ Yus-shuar Yus-shuarchajají tsanínktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjají métek enentáimiainiawak? ¿Tsáapnisha kiritjají máimtek áminkiait? ¹⁵ ¿Kóstuka uunt iwianchjají nawamnaikiamniakait? ¿Yus-shuar Yus-shuarchajají tsanín shiir pujusminkiait? ¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrumé. Yus Niñki ni Papiriin juna tíchamka: Niijijají tsanínkia pujusan, niijijají wekasartatjai tura ni Yusrí átatjai; tura niisha Wíi aents ajasartatui.

¹⁷ Tuma asamtai junasha tímiayi:

Nii matsatainia nuyá jíinkitiarum, tura niijya kanaktiarum, tawai Uunt Yus; tura yajauch ana nu antínki-airap. Túrakrumninkia awayattajrume.

¹⁸ Tura atumí Aparí átatjai; átumka winia uchir átrume. Nuna Wi imiá kakaram uunt Yus asan tajai. Tu áarmaiti.

7 Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasajín tusar, ashí tunáa ana nuyá kanaktiniaitji. Túrar “Yusak nekas ii úuntrínti” takur, ii ayashísha, ii enentáisha takamtsuk tuke tsawant Yus íiktustiniaitji.

Kurintiunmayá shuar enentáimprarmatai Papru warasmiaji

² Ataksha nawamnaikiatai. Iikia shuar yajauch awajsachmaji; yajauch jintintrachmaji; anañkachmaji.

³ Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme. ⁴ Araantutsuk áatjarme; shiir enentáimjai. Itiurchatnum pujayatnak, atumin enentáimtusar enentairuí kakaram enentáimsan waraajai.

⁵ Juí Masetúnianum peñké ayamprachmaji. Antsu ti wáitsamji. Áentsnumiá ititurchat wáinkiamji, tura ii enentáijjajínkia ashamkamji. ⁶ Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujají winia enentáirun ikiakármai. ⁷ Tura átum nii ikiakármarumna nuna Titiu ujatkamai. Nuna antukan ti warasmajai. Títiuka átum íirsatin wakerarmena nuna ujatkamai; túrunamia nuna kúntuts enentáimmarumna nusha, tura winia anentu asarum enentáimturumna nuna ujatkamai. Nuna antukan nú nañkaamas warasmajai.

⁸ Papí nuik akupkamaj nu áujсарum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujсарum ishichik kúntuts enentáimprarumna nuna nekaan waraajai. ⁹ Kame kúntuts enentáimprakrumin waraatsjai. Antsu atumí tunaarj nekaarum kúntuts enentáimprarum atumí enentáij Yusjají yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjají yajauch awajsachji.

¹⁰ Nekaatarum. Yus wakerana nútiksaj kúntuts katsunteakka ni enentáij Yúsnum yapajjáawai. Nuiñkia ni tunaaríya uwempraiti. Nuka “túrumainchu túraitjai” tíchamniaiti. Antsu Yusan enentáimtusuk kúntuts pujakka ni enentáij yapajjáshatui; yapajjíttsuk ni tunaaríya uwemtsuk jakattawai. ¹¹ Tura iistarum; Yus wakerana nútiksarmek atumí kúntutsrj katsuntearme. Tuma asarum wi áatjarmena nu esettsarum enentáimtusurme. Atumí túramurí ujatkatatjtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin péñker túrarmena nu, paant iniakmarme. ¹² Kame yajauchin túramia nuna ni tunaarín iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nañkaamas átum Yúsnum in anearmena nu nekamatarum tusan áatramjarme. ¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nañkaamas shiir

waraaji. ¹⁴ Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi. ¹⁵ Tura Títiuka atumin enentáimturmas ti waraawai. “Jiatmaktajtsa winiat-suash” tusarum ti ashamkachurmek. Túmayatrum, nii péñker tati tusarum pachischarmek. Tura nii taa seatmarmar nu umikiurme. Títiuka nuna enentáimias waraawai. ¹⁶ Tura wikia, átum péñker túramurmin nekaan tura péñker túrawartatui tu enentáimsan waraajai.

Yus-shuarti ii kuitrj súsatin

8 Yatsurtiram, Masetúnia núnkanmayá Yus-shuaran Yus waitnentainia nuna yamá ujakat-jarme. ² Ti itiurchatnum nekapsamu ainiawai. Túmay-atañ warainiawai. Tura ti kuítrinha áiniyatañ emeen-tutsuk kuítrinnia núnisañ suiniawai. ³ Juna wi paant nekaan ujaajrume. Niisha wakeramujá súsatniun jeainia nuna súiniawai; tura nú nañkaamassa súini-awai. ⁴ Yus-shuaran kuítrinchan súsartaitsa ti wakeru-
iniak, nu túratniun ti seatmarmaji. ⁵ Tura ii enentáim-
mij nú nañkaamas túrawarmiayi. Emka Yúsnum niñki
sumamawarmiayi. Tura Yusa wakeramurj túrattaji
tusar incha “yáñtajrume” turammiaji. ⁶ Tuma asamtai,
“Masetúnia nuñkanam kuit júuktin nañkamamamna
nu, Kurintiu peprunmasha amukta” tusar Titiu seamia-
ji. ⁷ Atumsha ashí péñker túratin ti nékarme. Yus enen-
táimtustincha, unuiniartincha, jü nuñkanmayá nekaat-
niusha, in aneatniusha nuka ashí nékarme. Wats,
jusha túratarum. Yus-shuar kuítrincha ainia nu
achikiarat tusarum Titiu támatai núkap susatarum.

⁸ Kame atumí úuntrja núnisnak akupeatsjarme, túratniuitrume tusan. Antsu chíkich shuar ni kuítrjñ susartasa ti wakeruinia nuna atumin ujakan, atumí anenkrattairj nekaspashi tusan nekapsatajtsa pujajai. ⁹ Ii uuntrj Jesukristu waitnenkartutairj nékarme. Ashí takakuyayi, tura atumin anenma asa kuítrincha núnisañ ajasmiaji. Jü nuñkanam kuítrincha núnis ajas-matai átum nayaimpiniam kuítriniak tusa túramiaji.

¹⁰ Juna enentáimjai. Nuik uwitin, “yáñtatji” tíchamkarum. Tura nu túratin ti wakerimiarme.

¹¹ Nañkamamarmena nu yamaikia amuktarum. Nuik ti wakerimiarmena núnisrumek yamaisha súsatin jea-
rmena nu susatarum. ¹² Iistarum. Ni kuítrjñ Yúsán
nekas susatajtsa wakerakuñkia, nii jeana nuna susat
tusa Yus wakerawai. “Jeana nú nañkaamas susati” tát-
sui Yus.

¹³ Chíkich ti núkap susarum atumnia táasat tusan tát-
sujai. ¹⁴ Antsu ashí métek takusarat tusan tajai. Iis
atumsha yamaikia ti nukap takakrume; nujañ atsuma
nu súsatniuitrume. Ukunam chíkich tsawantaj átum
atsumashtarmeash. Nuñkia niisha atumin suramsarti.
Nu túratin ákuñkia ashí métek takustin átatui. ¹⁵ Yusa
Papijñ yaunchu áarman núnis tátsuk:

Núkap takusmia nu ampirchamiai; tura ishichik takusmia nu atsumachmiai.

Titiu chíkich Yus-shuarjái Kurintiunam wetin ármiai

¹⁶ Tura wi aneajrumna núnisañ atumin aneatniun Yus Titiun susamiai. Tuma asamtai Yúsán yumñsan puja-
jai. ¹⁷ Iis, wi takui wétinian wakerimiayi. Tura nú
nañkaamas, atumin anenma asa, ni enentájjiañ
wéawai.

¹⁸ Tura chíkich Yus-shuar Titiujá akupkatajtsa pujaji. Nu shuar Yusa Chichamñ ti péñker etserainakui, ashí Yus-shuar iruntramunam nin péñker áujmatainiawai.

¹⁹ Tura nú shuarnaka ii tsaniakmarj atí tusar ashí Yus-shuar iruntramunam nuna anaikiarmiayi. Iijjaj kuítian jukiarti tusar anaikiarmiayi. Iis Yusa náarñ ashí aents uunt najanawarat tusar tura ashí shuar atumí tsañkar-
ñ nekaawarat tusar nu takat túratsjik. ²⁰ Iis, jü kuit ii
jukittiajnia nu, núkap asamtai, aents tsanumprut-
mawaraj tusar, Titiujá tura jü shuarjáisha wéaji. ²¹ Yus
ímmianumsha, aents ímmianumsha ii naka wekaaj-
nia nuna nekaawarat tusar túrajai.

²² Nu jimiará shuarjái chíkich Yus-shuar akupeaji. Yusa takatrñ takastasa ti wakerana nu nekas nékaji. Tura átum yáñtin ti wakerarmena nuna nekáa niisha atumjñ jeataj tusa ti wakerawai. Nuna túmak Yusa takatrñ takastinian wakerana nuna paant iniakmawai. ²³ Tura ajsha chíkich shuar Titiun nekaataitsar anintru-
iniakuisha, “Titiu Papru tsaniakmarjñti. Incha yáñmak-
tajtsa Páprujá takaawai” titiarum. Chíkich Yus-shuaran
nekaataitsar anintruiniakuisha, “Yus-shuar akupkamu
áiniawai, tura Kristu náarñ shiir awajin áiniawai”
titiarum. ²⁴ Tura atumí anenkrattairj ashí Yus-shuar
nekaawarat tusarum, nu shuar péñker itiaatarum. Nu
túrakrum, atumnia ii shiir tímiaj nu nekasaiti tu iniak-
tustatrume.

Yus-shuaran kuítrinchan súsarmia nu

9 Kame átum Yus-shuar kuítrincha súsatin waker-
arme; nuna nékajai. Tuma asan núnaka áatrach-
miniaitjarme. Atumsha súsatin wakera asakrumin wi
nunasha shiir enentáimsan, “Akaya nuñkanmayá
shuar nuik uwitinia wakerusmatak yáñtinian wakeru-
iniawai” tusan Masetúnianmayá shuáran ujaajai. ³ Tura
“kuítniasha súsatniun ti wakeruiniawai” tímiaj nuna,
“wáitaiiti” tírajñ tusan nakitiajai. Tuma asan, kuit susa-
tajtsa wakerarum nu iwaratarum tusan nu menaintiu
Yus-shuaran nuna yáñmakarat tusan emka akupena-
jai. ⁴ Wi ukunam Masetúnianmayá shuarjái atumjñ
jean, kuit súsatin tímiarmena nuna iwarachman
wáinkian natsarajñ tusan, tura atumsha natsarajñrum
tusan túrajai. Warí, “súsatniun ti wakeruiniawai” tuke
tu wéatsjak. ⁵ Nu tuma asamtai, au takui súarme tu
enentáimsarajñ tusan jü Yus-shuaran emka akupena-
jai. Niisha nu kuítian iwaratniun yáñmakarti, tajai.
Nuñkia wisha Masetúnianmayá shuarjái ukunam
jeawakrin, nu kuit atumsha nekas atumí enentájjiañk
súsatin wakerarmena nu nekaamnia átatui.

⁶ Tura júnasha paant tájarme: ishichik araana nu ishichik júuktatui. Núkap araana nusha núkap júukta-

tui. Kuit súsatniusha núniskete. ⁷ Tura ashí shuar ni enentáin enentáimsana nunak susati. “Nakitiyatnak susatjai” tíchamniaiti. “Turutainiakui susatjai” tíchamni-aiti. Shiir enentáimias súana nuna Yuska shiir enentáimtai. ⁸ Ashí péñker ana nuna suramsatniun Yus tujintiatsui. Nujají átum atsumashtatrum. Tura chichan yáin̄tin núkap takustatrum. ⁹ Yus-Papiniun jü aarma awai:

Kuítrinchan núkap susayi;
nuna tura, tuke túratin átatui.

¹⁰ Arakmaun arakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujají péñker túratatum tusa araakrumin ipiampartatui. ¹¹ Tuma asamtai núkap juukma takaku asarum, núkap súatin jeattarme. Nuiñkia súarmena nuna ii uwejeýan chíkich Yus-shuar achikiar Yúsan yumiñsartatui. ¹² Warí, jü kuit Yus-shuar kuítrincha súakrin ni atsumamuríncha atsumachartatui. Tura nú nan̄kaamas Yúsan ti yumiñsartatui. ¹³ Nu shuar yáin̄tai tusarum tura ashí Yus-shuar yáin̄tai tusarum súatsrumek. Nujají Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarín uunt awajsartatui. ¹⁴ Kame Yus atumin ti waitnentra-mainiakui kuítrum súatsrumek. Sua asakrumin nu shuar atumin ti anenmainiak Yúsan ájurturmasartatui. ¹⁵ ¡Tura ashí iisha ii Yusri ti yumiñsatniuitji! ¿In súramjinia nuna yaki jintíartinian jeá?

Papru nekas jintintiamniaiti

10 Wats, “Papru iijjají pujak pééjchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjají juna seatjarum tusan pujajai. ² Atumí weatkamuriyá shuar chichainiak “Papru ni tsaniakmarijjají jü nuñkanam akupin ajastai tusar wakeruiniak jintintiniawai” turutainia nuna kíishtumaktajtsan enentáimjai. Wisha atumíin jean kakaram chichaschataj tusan, nu antukairap tu seajrume. ³ Áentstañka nuñkanmayá áentsuitji, túrasha jú áents maania aintsar máaniatsji. ⁴ Jü nuñkanmayá nan̄kijjají máaniatsji antsu ii nan̄kirí Yusa kakarmarinti. Nujají iwianchi kakarmarí núpeteaji. ⁵ Jü nuñkanmayá aentsu jintíamuriñkia tura waantu enentáimtumamuriñkia, Yus nekaatniun itit awajea nuka, nu nan̄kijjají núpeteaji. Tura ashí jü nuñkanmayá enentáimsatin yapajniak, emetamu áintsan, Kristun umirkarat tusar nu nan̄kijjají núpeteaji. ⁶ Nekas umirkatin átum jeawakrumniñkia nuiñkia umirkatniun tuke nakitiainia nu, Yusa kakarmarijjají asutiáttaji, tajai. ⁷ Atumsha aya pátatek ana nu iiyarme. Wats, shuar nekas Kristunu ajasman nekamaka, núnisan winiasha Kristunuiti tu enentáimtursatniuiti. ⁸ Yusa kakarmarijjají akupeaji tuke tákuncha natsaamatsjai. Nu kakarmar atumin péñker jintintiatatum tusa Kristu suramsaitji. Kame atumin emesratniun suramsachuitji. ⁹ “Ni áarmarijjají awaktamkatajtsa wakerutmaji” tátsurpash. Núchaiti. ¹⁰ “Papru áarmarí ti kakaram áiniawai, tura jü pujak kakarmachuiti; tura etserkatniuncha nékat-

sui” turutainiawai. ¹¹ Wats, tuinia nuka júnasha nekaawarti. Yajá pujakur kakaram áajinia núnisrik atumjají pujakrishá kakaram túratatjai.

¹² “Wiki imiá péñkeraitjai” tuinia nujají méteketji tátsuji. Ní shuaraitji tátsuji. Warí, niisha imia niñki nekapmainiawai. Tura ni ají íisar “nu nan̄kaamas péñkeraitjai” tu wéenawai. Nuna túruiniak netse túruiniawai.

¹³ Antsu iikia, ii nekamatin jeajnia nú nan̄kaamas waantu ajaschattaji. Ii takastatjinia nuí Yus Niñki jintin-tramji. Nu arant wéatsji. Kame atumíin takastinian Yus tsan̄katramkaitji. ¹⁴ Tuma asamtai, tájinia nu Yus tsan̄katramka nú iniañkas túratsji. Warí, iisha emka Kristu chichamejají atumíin jeachmakaji. “Emka jeamji” tájinia nu ánrar tátsuji. Kame Yus tsan̄katramakrin jeamji. ¹⁵ Chíkich takasmanum iikia waantu enentáimtumasar, “ii takatrínti” tátsuji. Antsu yamáí enentáimtarmana nú nan̄kaamas Yus enentáimtustarum tusar wakeraji. Nu túrakrumninkia atumíin tuke takasmini-aitji. ¹⁶ Nuyásha chíkich takaana nuí takatsuk átum pu-jarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íiniuiti” tíchattaji.

¹⁷ Tura péñker enentáimtumastaj tusa wakerakka, Yúsnaitjai tusa péñker enentáimtumasti. ¹⁸ Warí, niñki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

Ántar etserniun Papru áujmateawai

11 Waurua núnisnak chichastatjana nu anturtukaintrumeash. Ee, anturtukatum tusan sea-jrume. ² Atumniasha Kristunak anajmamtikrajrume. Tura nuwá chíkich áishmañkan nékatsuk ni áishrijjajíni nuatnaiya núnisrumek átum chikicha chichame umirt-suk aya ni chichameñki umiakrumin Kristuí ejetaj tusan wakerajrume. Nuna túratat tusan atumin akasmatajrum. Nu akasmaktinian Yus surusuiti. ³ Túrasha íwianch ni nekatairijjají emka nuwá Epan anañkamia nútiksañ atumniasha Yusa jintiyá awajimtikramar Kristu aneashtinian enentáimtikramprarmatai anañkamu ajrum tusan tsuutajrume. ⁴ Warí, chíkich shuar Jesusnan nusháa étserkamujají táiniakuisha péñker ántarme. Tura nusháa wakan achikiam, nusháa chicham-jají uwempramniaiti tu etserainiakuisha, nekasapitia tárume. ⁵ Kame “Yúsnumiá akatramu asar etserkatin imiá nékaitji” tuinia nujají nan̄kaamas nékaitjai, tu enentáimjai. ⁶ Ti péñker chichastinian nékachiatnak winia nekaatairsha taamtsui. Núnaka ii túramurijjají tuke paant iniakmaji.

⁷ “Akirkata” tútsuk Yus-Chichaman atumin ujakmarumna nuí ¿tunáa túrajak? Átum an̄kant ajastarum tusan wikia pééjchach ajasu asan, “etserkamunam akirkata” tíchamjarme. ⁸ Antsu atumin yáin̄taj tusan pujakun chíkich Yus-shuarnumiá kuítian suruiniakui achikmiajai. Nuna túran ni kuítrín emeentukmiajai. ⁹ Tura atumjají pujusan atsumaknasha atumniaka seachjarme. Masetúnianmayá Yus-shuar taar, wi atsummiajna nuna surusarmiayi. Nu tuma asamtai tájarme, seachjarme tura seashtatjarme. ¹⁰ Ashí Akaya

nunƙanam nuna ujaktinian suritrukchartatui. Nuna tákun Kristu nekasrijjaj tajari. ¹¹ ¿Urukamtaí nuna taja? ¿Atumin aneachu asanak taja? Atsá. Aneajrumna nuna Yus nékawai.

¹² Túrasha wi túrajna nuna tuke turu wétatjai. “Papru túrana núnisrik túrají” tuinia nuna tírajin tusan túrat-tajai. ¹³ Warí, niisha Yúsnumiá akatrachma ániawai. Anankartin ániawai. “Kristu akatramurjntji” tumá átaj tusar wekainiawai. ¹⁴ Nusha urukaku túmait tíchamni-aiti. Warí, imia Satanáskesha “nayaimpinmayá akatramuitjai” tumá átaj tusa wekaatsuk. ¹⁵ Nuinkia imia ni suntarjsha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujaj métek nekapmá asutiátin átatui.

Papru wáitsamia nu

¹⁶ Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsanƙatruktarum. Ishichik waantu enentáimtumastaj tusan wakerajai. ¹⁷ Tura waantu enentáimtumastaj tájana nu, Uunta tsanƙatramurijjaj tátsujai. Antsu waurka núnisnak chichaajai. ¹⁸ Untsurí ju nunƙanam uunt ajasar ti waantu enentáimtumainiakui wisha ishichik waantu enentáimtumastatjai. ¹⁹ Imiá nékayatrum waurka ainia nu shiir enentáimtusurum ánturearme. ²⁰ Niisha atumin takamtikramainiakui sha, kasartamainiakui sha, atumí nérenniurj ajainiakui sha, yajauch chichartamainiakui sha, yapimin awattamainiakui sha ashí nu katsuntearme. ²¹ Natsamayatnak tájarme jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.) ²² Niisha Ipríu-shuar ániakuisha wisha núnisnak Ipríu-shuaraitjai. Israer-shuar ániakuisha wisha núnisnak Israer-shuaraitjai. Apráama weeatrj ániakuisha pai, wisha núnisnak. ²³ Kristu takarniurjntji, tuiniawai. Wikia aujaj nanƙaamasaitjai. Kame nuna tákun waurka núnisnak chichaajai. Kame niijjaj nanƙaamas takasuitjai; niijjaj nanƙaamas asutiá-muitjai; niijjaj nanƙaamas sepunam enkeamuitjai; ti núkap jánikiamjai. ²⁴ Israer-shuar chikichkí achirkacharmai. Antsu tímiajni senku jea achirkarmai. Tura emka achirkarmia nuí awa-awatatkua trainta nuí-wi ejeyarmiayi. Tura nu tímiajni senku jea achirkarmia nuísha nútiksan nujaj métek awatturarmiayi. ²⁵ Numijjaj menaintiú awatturarmai. Kayajajsha mantuatai tusar chikichkí tukurarmai, kanusha menaintiú wayamai wi enkempran wekaimiaj nuí. Tura nayaantsanam ajapén chikichik kashi nuí pujusan tsawarmajai tura nu tsawantcha tuke pujusmajai. ²⁶ Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjajsha, wíi shuarjajsha tura yajaya shuarjajsha tsúumainian wáinkiaitjai. Péprunmasha, kam-puniunmasha, nayaantsanmasha tsúumainian wáinkiaitjai. Wait Yus-shuarsha yajauch awajustaj tusar wak-eriarmai. ²⁷ Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamak-nasha, kitiamaknasha wáitsaitjai. Ti ijarmaitjai. Pushir táasmatai tsetsekrúí wáitsaitjai.

²⁸ Tura nuna nanƙaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. ²⁹ Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitiajai. ³⁰ Maa, waantu chichastin ákuinkia, antsu winia kakarmachu awajtu-inia nuna ujakan waantu ajasaintjai. ³¹ Yus, ii Uuntrj Jesukristu Aparj ana nu (ni naarj tuke shiir awajsamu atí) wi wáitratsjana nuna nékawai. ³² Tamasku péprunam pujaj nu nunƙanmayá akupin winia jinkia juruktiaj tusa wakerak pepru tanish téntakma wáitirjin suntaran apujsamiai. Aretas uunt kapitian pujaj túramiai. ³³ Túrasha uunt chankinnium enketawar pepru aa tanishrj áanƙamunam jiki itiararmiayi. Tu uwempramiai.

Papru wáinkiamia nu

12 Kame wiki shiir chicharmamsatniun nakitiajai. Túmayatnak ímjarjana nuna tura uunt Yus iniaktursamia nuna ujaktinaitjarme. ² Krístun umirin ana nú áishmanƙan nékajai. Nu áishman jimiaraí nayaimpin nanƙaikin menaintiú nayaimpiniam juna kniuiti. Nusha katurse uwí nanƙaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴ Yus-shuara wakaní shiir pujutainium junakmiayi. Nuísha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. ⁵ Nu áishmanƙa túrunamurj nanƙaamakuiti tajari. Tura wikia nanƙaamakuitjai túmamtsuk, kakarmachuitjana nuna paant ujaajai. ⁶ Nanƙaamakuitjai túmamtiaj tusan wakeraknaka nekas tímianiaitjai, ántan tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujaj métek enentáimtursatarum tusan wakerajai.

⁷ Wi nayaimpiniam wáinkiamajna nu timiá péñker asamtai ántar waantu enentáimtumashatniun, janƙi mesertinia núnisan winia ayashruj najaimiatniun sunasmiajai. Nuka wi wáitsatin Satanásnumiá akupkamuiti. ⁸ Nuka jurutkitia tusan Úuntan menaintiú seamjai. ⁹ Tuma aiñ Uunt winia turutmiayi “Atsá. Jaa pujayatmek winia waitnenkartutairjaj shiir pujame. Shuar kakarmachun winia kakarmarun Wi suakui ashí aents nu shuara ayashijn winia kakarmarun wáiniainiawai.” Tuma asamtai, Kristu kakarmarj winia ayashruj paant ati tusan kakarmachuitiatnak araantatsjai. ¹⁰ Tuma asamtai, wi Krístun aneakui shuar katsekruiakuisha, kajertuiniakuisha, winia kuítrusha, kakarmarsha atsajin waraajai. Kame ashí itiurchat ana nuí kakarmachuitiatnak kakaram nekapeajai.

¹¹ Wi “péñkeraitjai” túmamkun waurua núnisnak chichaajai. Tura atumsha winia péñker chichartusmini-aitiatrumek, túrachu asakrumin tu chichasjai. Warí, wi penké ántraitiatnak, “ti péñker akatramuitjii” tuma-mainia nú nunƙaachichuitjai. ¹² Atumjaj pujumiaj nuí, itiurchat ámanman katsuntran takasmiajai. Yuska ni

kakarmarj̄n iniakmastaj tusa ti uuntan aents tujintiamun túratniun surusmiayi. Nujaj̄ “Papru nekas winia akatramuruiti” tusa paant iniakmasmiayi. ¹³ Warí, chíkich Yus-shuaran yáinmij̄ núnisnak atumniasha yáinmajrume. Áyatik atumin “kuit surusta” tíchamjarme. ;Nu yajauchiitkiuñkia tsan̄kurturtarum!

Papru atak tátinrj̄n ujakmiania nu

¹⁴ Jújaj̄n̄kia menaintiú iwiarnarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuítrj̄n wakeratsjai. Antsu atumin wakerajrume. Warí, winia uchirchakaitrum. Uchisha aparj̄n kuítian ikauntukchatniuiti. Antsu aparj̄ ni uchirj̄n kuítian ikauntuktiniaiti. ¹⁵ Atumniasha yáin̄taj tusan ashí takakjana juna ajapawaintjai, tura winia kakarmar-nasha ashí emen̄kákaintjai. Wi ti wakeramaitiatrum átumka ishichik wakerutarminiñ túrawaintjai.

¹⁶ Túrasa chíkich shuar chichainiak “Nekasaiti; Papru niñki ii kuítrj̄n jurutramkichmaji. Túrasa anan̄kar-tuatniun neka asa in anan̄kramachmiashia” turutainiatsuk. ¹⁷ ¿Nusha itiura? ¿Shuáran wi akupkamaj nujaj̄ kuítrum in achikjak? ¹⁸ Atumin írmasat tusan Titium “wetá” tímiajai. Tura nin atampriat tusan chíkich Yus-shuaran akupkamjai. ¿Titiusha kuítrum in jurutramkimkiarum? ¿Wisha niisha mai metek enentáimsar métek takaschamkaj?

¹⁹ ¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájina nu atumin Yúsnum ikiakártajrum tusar taji. ²⁰ Wi atumij̄n jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrume, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, niñki enentáimtumastinniasha, tsanumpratiuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai. ²¹ Tura wi jeaknasha, átum yajauch túratniusha, tsanirnatniusha tura yajauch ti wakerarmena nu, yaunchu túriniarmena nu, untsurí shuairam iniaisachurmena nuna nekashtajash. Tura enentáim yapajitsuk tuke tura asakrum in úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13 Jujaj̄ menaintiú ístajrum tusan winiajai. Ashí iwiaratin ana nu, jimiará tura menaintiú shuara chichamejaj̄ iwiarnartatui. ² Wi atumjaj̄ pujachiatnak, atumjaj̄ pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tími-ajrumna nuna ataksha tájarme, wi atak tana tunaarum iwiareachkurminkia iniaisashtatjarme. ³ Nuiñkia wi Kristu kakarmarjij̄aj̄ chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai. ⁴ Kristu nekas kakarmachua nútiksañ krúsnum máamuítat, Yusa kakarmarjij̄aj̄ iwiaakuiti. Ayash-nium Kristu kakarmachu nekapmia núnisrik iikia kakarmachuitji. Túrasa Yusa kakarmarjij̄aj̄ ni takatj̄ takaaji. Nu atumin iniakmastatji.

⁵ “Nekas Yúsan umirniuashitiaj” tusarum neka-matarum. Ímiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme. ⁶ Tura iikia ántar Yus-shuarchaitji nu nekaatarum tusan wakerajai. ⁷ Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar ániawai” túrampriniñ, átum péñker wekasatarum tusar wakeraji. ⁸ Warí, Yusa nekas chichamej̄ emesratin tujintiaji. Antsu ii túrajna nu Yusa nekas chichamejaj̄ túrajai. ⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. ¹⁰ Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atumij̄n jeaknaka kakaram chicharkaj̄j̄rum tusan winitsuk j̄u papin áatjarme.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprati. Chikichík enentáik enentáimsatarum. Shiir awajnaisarum pujustarum. Tura Yus anenmarmena nu, shiir enentáimtikramna nu atumjaj̄ pujurtamsattarme.

¹² Yúsnum shiir enentáimtunaisrum amikmaanaisatarum. ¹³ Ashí Yus-shuar ainia nu amikmaatmarme.

¹⁴ Uunt Jesukrístu waitnenkartutairj̄, Yusa anenkrattair-isha atumij̄n pujurtamsati. Tura Yusa Wakan̄isha tuke nemartamsarti. Nu atí.

KARASEANAM

Karaseamaya Yus-shuaran Papru áatramiania nu

1 Wi Pápruitjai, Yus akatramu. Yúsak winia akaturuiti. Shuarka akatturchamai. Yussha chíkich shuáran akupturak akatturchamai, antsu Nuṅki, Yus Apa, Jesusan jakamunmaya iniantkimia nu, tura Jesussha winia akatturarmayá Yusa shiir chichamen etserkatniun. ² Wisha, ashí Yus-shuar wijiáj pujuinia nusha, ju papí akupeaji. Ashí Yus-shuar Karasea nuṅkanam pujarmena nu áujsatarum tusan ju papin akuptajrume.

³ Yus Apa tura ii Uuntrj Jesukristusha waitnentra-mainia ásar yainmakarti imiatkinchanum tuke shiir pujustinian. ⁴ Yus ii Aparj nuna wakera asamtai, Jesus ni ayashin surumak wáitsamiayi ii tunaari asakártinian. Nuna tura ashí tunáa ju nuṅkanam ana nuyá ankant awajtamsatai tusa in yáinmaji. ⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kris-tu in ti anenma asamtai Yus ni shuari ajastinian in anaitiamkamji. Urukamtatsuk nuikia imiá wárik ni chichame inaisamarum nusháa chicham umikrum uwemprataj tusarum. ⁷ Wátsek, nekas chíkich chicham penké atsawai shuar umikar uwempratin. Antsu yajaya shuar atumijn taar péñkercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. ⁸ Tuma asamtai Yus nin yajauchiniam yuminkrattawai. Wisha Yus-Chicham yapajiamun etserkamtañkia Yus winia yuminkrurtatui. Nayaimpinmayá suntarsha nusháa chichaman wi etserkachmaj nuna étserkuiñkia nunsha yuminkrattawai. ⁹ Paant ujakjarme túmaitiatnak ataksha ujaajrume: Náñkamas shuar niisháa uwempratin chichaman, wi etserkachmaj nuna étserkuiñkia Yus yuminkrattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeru-inia nuna enentáimsan chichaajak? Nuna enentáimki-unka Kristu wakera nuna umirkachaintjai.

Papru júnis Yus akatramu ajasmiai

¹¹ Antsu nekaatarum, yatsuru. Uwempratin chichaman wi étserjana nuka áentsnumiñchuiti.

¹² Aentska ujakchamai. Unuitiutnasha unuitiurcharmai. Antsu Jesukristuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútik-sanak wisha takasmajai. Tuma asan Yus-shuaran ti kakerkan tuke pataatukmajai amuktaj tusan. Nusha nékarme. ¹⁴ Tura kakaram ajasan, ii uuntrj yaunchu tiarmia nuna yawetsuk umiktinian ti enentáimpramjai. Tura untsurj shuaran wijiáj métek uunt armia nuna nañkaamas Yúsnan takasmajai. Túmaitiatan aya winia úuntrun chichamen ti umirniuyajai. ¹⁵ Túrasha wikia akiintsajñ Yus winia achirkamiayi, tura ti anekratmar-ijiáj winia anaitiukmiayi. ¹⁶ Nuikia shiir enentáimiuk ni Uchirñ paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. ¹⁷ Uunt péprunmasha, Jerusaréñnumka, wéchamjai winí emkaru Yus akatramujáj chichastinian. Antsu wárik Arapia nuṅkanam wémajai. Tura nuj Yúsan enentáimtasuan atak Tamasku péprunam waketikmijai. ¹⁸ Tura menaintiú uwí nañkaamasmatai, nuyá Pítrujáj áujmattsataj tusan Jerusaréñnum jeamjai. Tura jimiará semanachik pujusmajai Pítrujai. ¹⁹ Tura Jakupun-cha, ii Uuntrj Jesusa yachja nuna, wáinkiamjai. Nú arantka chikichnaka Yus akatramunka wáinkiachmajai. ²⁰ Yus iirui. Wi tájana nu nekasaiti, wáitchaiti.

²¹ Nú ukunmasha Siria nuṅkanmasha, Sirisia nuṅkanmasha wémajai. ²² Tuma asamtai ashí Yus-shuar Jutía nuṅkanam pujuarmia nu winia nekaracharmajai. ²³ Aya antukarmajai. “Yaunchu in ti áintrammiaj nu yamaikia Yus-Chichaman étseruk wekaawai. Yáunchuka in amutmaktinian wakeriniaitiat yamaikia iniaisaiti” tiarmajai. ²⁴ Túrawar winia enentáimtursar Yúsan shiir yuminsarmajai.

Chíkich Yus akatramu Paprun shiir enentáimtuiniawai

2 Tura katurse uwí nañkaamasmatai wisha Pírnapijáj Jerusaréñnum wémajai. Titiuncha jukimjai wijiáj. ² Yus akupta asamtai Jerusaréñnum wémajai. Tura nuj jean aya Yus-shuara úuntrijajajñ áujmattsamjai. “Júnisnak ashí Israer-shuarchan Yus-Chichaman ujainiagai” tímiajai. Takasmajna nusha tura tuke takastin enentáimjiana nusha ántar ajñ tusan tu áujmattsamjai. ³ Niisha Yus-shuara úuntrjñtiat itiurchat enentáimpracharmajai. Antsu chíkich shuarka Titu Israer-shuarchaitiat wijiáj pujakui niisha Israer-shuar ajastí tusa tsupimiamtikiatniun wakeriarmajai. Túrasha tujinkiarmai. ⁴ Tura nu shuar ántar yachi ániak antuktai tusar wayawarmajai. Tura ii chichamen antukar itiurchat awájtámsatai tusar wakeriarmajai. Iis, Kristu Jesus

in uwemtikrampra asamtai ti shiir iisha Yus yúpichuch umíajji. Tura nuna nekaawar, atakka, aya yáunchu akupkamu itiurchat ana nujaj̄ uwemtikrampratniun wakerutmakarmaji. ⁵ Túrasha penké ishichkisha umikchamji. Antsu atumíin Yus-Chicham yapajniátsuk métek jeartamat tusar ni chichame penké anturkachamaji. ⁶ Nu arantcha Yus akatramu uuntriñkia yamaram túratniunka suruscharmái. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuaran mash métek iyatsuk. ⁷ Yus akatramu uuntriñsha Yus winia Israer-shuarchan Yus-chicham ujaktinian akup-tukma nuna nekarawarmái. Tura Pítruncha akupkamai Israer-shuaran Yus-Chicham ujaktinian. ⁸ Pítrun Israer-shuarum akupkama nú Yusak winiasha akuptukmai Israer-shuarchanum. ⁹ Tuma asamtai Jakupusha, Pítrusha, Juansha, Yus akatramu uuntriñ ásar, Yus winia ti paant akuptan nekaawar, winiasha Pirnapínsha, “Ayu, átum, Israer-shuarchanum Yus-Chicham etserkatarum, tiarmái. Iisha Israer-shuarum Yus-Chicham etserkattaji” tiarmái. Túrawarmatai shiir áuj-naisar ii uwejejjaj̄ achirnaikiamji métek enentáimji tusar. ¹⁰ Áyatik “Kuítrincha enentáimtusrum tuke yáin-tarum” tiarmái. Wisha núnaka ti wakerakun tuke túriniaitjai.

Papru Pítrun chicharkamai

¹¹ Tura nú ukunam wi Antiukía péprunam pujaj̄n Pítiur tamai. Tura nuj̄ yajauch túramtai, Yus-shuara úuntriñiak chicharkamjai. ¹² Iis, Israer-shuar tuiniawai, “Israer-shuaracha Muisais timia núnisan̄ tsupirnakcha asamtai, nu shuarjjaj̄ yurumáshtiniaiti” tuiniawai. Tú-maitiat Pítiur yurumámnian nékak̄, emka Sántiak shuar táatsaj̄n Israer-shuarchajaj̄ yurumámai. Tura nuyá Sántiak shuar Jerusarénnumiá Antiukíanam jeawarmatai Pítiur ashamak tsupirnakcha shuarumia kanakin yurumáchmai. “Tsupirnakhtiniaitme” tiniu ainia nuna ashamak túramai.

¹³ Tuma asamtai chíkich Yus-shuar, Israer-shuar armia nu, Pítrujaj̄ métek emka yurumáwaru áiniayat jimiará enentai takusar ukunam iniaisarmái. Pir-napísha neka áyat nútiksaj̄n nupetnakmai. ¹⁴ Tura nuna íisan ashí íimiainiaj̄n Pítrun chicharkamjai. Yus Shiir Chicham tana nujaj̄ métek wekasachu ásarmatai tímia-jai “Ame Israer-shuaraitiatam Israer-shuarti ikiukim tsupirnakchajaj̄ yurumám Israer-shuaracha áintsamek túrame, tímiajai. Nuikia “Israer-shuaracha Israer-shuar-tijaj̄ métek wekasatin áiniawai” tiip” tímiajai.

Israer-shuarsha Israer-shuarhasha mai métek Yúsan enentáimtusar uwemprattatui

¹⁵ Iikia nekas Israer-shuaraitji. Israer-shuaracha, tunáa ainia áaniuchuitji. ¹⁶ Túmaitiatar ju nékaji. Akupkamu umíamujaj̄ uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajaj̄nchu atai tusar. Aya Kristu nekas enentáimtusar penker átatji.

Akupkamu takasar umirkarsha tuke nujaj̄ penker ajaschattaji. Akupkamunka shuar umiktaj táyat, chí-kichkí shuarkesha nujaj̄ penker ajaschamniaiti. Nu nekaar antsu Jesukrístu nekas enentáimtusmaji penker ajastai tusar. ¹⁷ Tura Israer-shuar enentáim-prashtimpiash, “Wátsek, núnisaitkiuñkia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashtiniaiti. ¹⁸ Antsu yaunchu, wi túrashtiniaitjai tímiaj nuna awaíkin túratniuitjai tákunka nuikia nekas tunaitjai. ¹⁹ Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjjaj̄ iwiaaku pujajai ni wakera nuna umiktin-ian. ²⁰ Wisha Krístujaj̄ krúsnum jákaitjai. Tuma asamtai yamaikia wikia iwiaaktsujai wi wakeraj nuna túratniun antsu Kristu winí iwiaaku ni wakera nuna túratniun. Tura ju ayashniun pujayatan aya Kristu enentáim-takun iwiaakjai. Krístusha Yusa Uchiríntiat winia ti anentuk jarutkamiayi. ²¹ Yus ti penker asamtai itiurak “Kristu ántar jakamiayi” títiaj. Iis, aya akupkamun umirkan penker ajasminiaitkiuñkia, nuikia Kristu ántar jákaj̄yi.

Yus akupkamu tura Yus enentáimtustin

3 ¿Wariñ aa Karaseanmayatirmea. Wawea-mukaitrum netse enentáimprarum Yus tama umirkashtin. Kristu krúsnum máamun ti paant ét-serkun atumin iniaktuschkamajrum? ² Wátsek, anias-tatjarme, enentáimpratarum. ¿Warijjaj̄n Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram? ³ ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarjjaj̄ umiktin enentáimprarmek. ⁴ Penké ántarmek wáit-samarum tura antsu ishichkisha unuimiarchamkarum? ⁵ Naka enentáimpratarum. Yus ni Wakaní súrantsuk tura aents túrachminian atumíin ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

⁶ Yaunchu ii uuntriñ Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, penker-eritme” tímiayi” tawai.

⁷ Iis, nujaj̄ páantchakait. Ashí shuar Yúsan enentáimtu-inia nuka Apraámjjaj̄ métek enentáimpraru ásar, ni uchiría áintsaj̄n ajasaru áiniawai. ⁸ Yamái páantaiti. Yus ashí Israer-shuarchancha tawai “Aya winia enentáim-tursarum penker átratume”. Israer-shuarhasha nujaj̄ penker ajastinia nuna ti yaunchu neka asa, Apraáman ujakmiayi,

“Ámijjaj̄ ashí aents ti shiir ajasartatui.”

Tu ujakmiayi. ⁹ Tuma asamtai ashí shuar Yúsan enentáimtuinia nuke Apraámjjaj̄ métek penker ajasar shiir warasartatui.

¹⁰ Antsu ashí shuar “akupkamun umirkan uwemprat-tajai” tuinia nuka yajauchiniam yumiṅkramu ániawai. Yus-Papinium áarchamukait

“Ashí shuar Yus akupkamun ashí aarma nuna takamt-suk umirkachka yajauchiniam yumiṅkramu ániawai.” Tu áarmaiti.

¹¹ Nújajṅkia páantaiti. Akupkamu umirkatniujajṅ péṅker ajaschamniaiti Yusjajṅ, antsu aya Yus enentáimtusam péṅker ajasam uwempratame. ¹² Shuar akupkamu umirkatniun enentáimna nuka aya nujajṅ péṅker ajastinian enentáimui; Yúsan enentáimtak péṅker ajastinian enentáimtsui.

¹³ Tura Kristu yamaikia uwemtikrampramji. Akupkamun umirkachu yumiṅkramuiti tana nuka in túramtsuji. Antsu Kristu in yainmaktin krúsnum jaka yumiṅkramu ajasmiayi. Kame áarmaiti:

Shuar jakati tusa numiniam nenasma yumiṅkramuiti. ¹⁴ Tuma asamtai Jesukristu jakamujajṅ ashí Israer-shuarchasha Apraámjajṅ métek péṅker shiir warasartatui. Iisha núnisrik nu shuarjajṅ Yusa Wakaní, Yus akupkataj timia nusha, achiktatji Yus enentáimtusar.

Yus akupkamu tura Yus túrattana nu anajmarma

¹⁵ Iis, yatsuru, Yus Apraáman Chichaman najana anajmatuk,

“Ámijjajṅ tura amée weeá akiinkiatana nujajṅsha ashí aents ti shiir ajasartatui” tímiayi.

Kame ‘amée weeá akiinkiatana nujajṅ’ tíchamiayi, antsu ‘akiintiatta nujajṅ’ tímiayi. Nuna taku chikichik átinia nuna enentáimpramiayi. Nusha Krístuiti.

Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajṅtsuk umiktiniaiti. Umitsuk iniaisachminiaiti. Patattasha patattsachminiaiti. ¹⁷ Wátsek, Yus núnisan Chichaman Apraámjajṅ najana, ukunam umitsuk iniaisachminiaiti. Tura Chichaman najanamia nú ukunam, kuaru siaṅtu nuyá trainta (430) uwí naṅkaamasmatai, Yus ni akupkamuriṅ Muisaisan susamiayi. Túramaitiat nujajṅ Yusa yaunchu Chichamen yapajṅáchmiayi iniaisatniun. ¹⁸ Tuma asamtai Yus timia nuka tuke uminkiatatawai, Yus yaunchu Apraámjajṅ Chichaman najana asamtai. Nújajṅkia páantaiti, péṅker ajastajtsar akupkamu umikrikia shiir pujuschartatji antsu Yus timia nujajṅ iikia takatsuk shiir pujustatji. Nuna tsanṅkatkamiayi Yus Apraámjajṅ Chichaman najaneak.

¹⁹ “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsajṅ Yus tímia nu uminkiachminiuyayi. Tuma asamtai nii táatsajṅ ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntariṅ ju akupkamun ashí iwiarar Muisaisan susar akatrarmiayi Israer-shuaran susárti tusar. ²⁰ Antsu chikichik shuar niṅki takastinian enentáimkiuṅka chikichan atsumatsui. Tura Yus aya chikichikiiti. Niṅki chikichan akattsuk ashí aentsun Apraámjajṅ péṅker awajsatniun Apraáma anajmatar niijjajṅ Chichaman najanamiaiyi.

Yus akupkamu itiúrkátin

²¹ “¿Tura Yus jimiará chichamjajṅ chichaawak, tíchaintmeash. Emka Apraáman “Jujajṅ uwempratame” tíchamkia, nuyá Muisaisan ni akupkamuriṅ súsachmakia?” tíchaintmeash. Tura áintsachuiti. Nekaata, akupkamu umirkatniujajṅ Yusjajṅ tuke péṅker pujusmini-aitkiunka nuyá aya akupkamujajṅ uwempram tunaa-jajṅchu ajasaintme. ²² Tura Yus-Chicham paant “Ashí tunáa ániawai” tawai. Nu asamtai yamaikia ashí Jesukristu enentáimtuinia nú shuar, aya Yus timiá asamtai, uwempratataui. ²³ Tura Kristu táatsajṅ Nin enentáimtusachamniauyayi. Tuma asamtai Nii táatsajṅ akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji. ²⁴ Akupkamu, nuika, in waitmakmaji uchin kuírchin wainnia áintsajṅ. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsajṅ péṅker ániawai. ²⁵ Yamái Kristu nekas enentáimtusiniaiti tuma asamtai yamaikia akupkamu kuirchia áintsajṅ wáitmatsji. ²⁶ Antsu Jesukristu enentáimtusar, nujajṅ Yusa uchirí úuntmaru ajasuitji. ²⁷ Ashí Kristu náariṅ imiaimtiurmeka Kristu áintsajṅ ajasuitrume. ²⁸ Jesukristujajṅ tsaniṅkiu asari imiá métek aji. Israer-shuar, Israer-shuarcha, ankantainia nu, ankantcha ainia nu, áishman, nuwá, ashí mash Jesukristunuitkiuṅkia yamaikia “niishaaiti” tu enentáimprashiniaiti. Ni shuar mash chikichik áinijai. ²⁹ Tura Krístunuitkiurmeka Apraám weeá áintsajṅ ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4 Kuítrinniu uchirí ashí ni aparí takakna nuna niiniu áchattawak ukunam. Tura uchichitkiuṅka ni aparí takarniuriya núkete. ² Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti. ³ Núnisrik iisha úchichik asarkia ashí aentsu akupkamuriṅ umirkatniuji. ⁴ Tura tsawant jeamtai, Yus ni Uchirí akupkamiayi ju nuṅkanam. Niisha Yúsaitiat nuwánam akiiniamiayi. Tura aents ajasmiayi. Tura aents ajas yaunchu akupkamuncha umirkatniuyayi. ⁵ Nujajṅ ashí aents akupkamun umirkatin armia nuna uwemtikrataj tusa támiayi. Tura iisha yamaikia nujajṅ ni uchirí uunt ajasminiaitji. ⁶ Atumsha nekas ni uchirí ajasakrumin Yus ni Uchirí Wakaní atumi enentáin akupturmakuiti. Tura nu Wakan atumí enentáiyá Yúsan “Aparú” tawai. ⁷ Tuma asamtai yamaikia aya takarniuchitme antsu Yus ni uchirí najatmaiti ámin. Tura ni uchirí asakmin ashí Yus takakna nuna amastatui Krístuiyá.

Papru nu Yus-shuaran yáintinian wakerawai

⁸ Yaunchu átum nekas Yus nékachkuram, ántar-yus íranna nu umirkarmene nekascha yúsak. ⁹ Tura yamaikia nekas Yus nékarme, kame Yus atumin nekar-marme. Núnis asamtai itirtsuk atak aentsu akupkamuriṅ umirkatin enentáimprum. Nujajṅ kakaram

ajaschamniaitme tura umikmesha yainmakchattawai uwempratin. ¹⁰ Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusan. ¹¹ Ashamajai, atumjín ántrankeash takasmaj tusan. ¹² Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuj pujakui ishichkisha yajauch awajtusshamarme. ¹³ Antsu nekamarme ayashruj ititurchat pujayatan Yusa shiir chichamen emka ujakmajrume. ¹⁴ Tura winia suñkur ti yajauch awajtajín atum winia nakitrurum mujrukchamarme, antsu Yusa suntaríá áintsarmek itiamarmeme. Jesukrístu anturkatniua áintsarum anturtukmarme. ¹⁵ Maa, wi nékajai, nuik atumí jjiimi ukuinkiarum surusaarme, túramniaitkiurme. Tura shiir enentáimpramarmena nusha itiuirt-sukait yamaisha. ¹⁶ Yamaikia nekas chichaman étserkun ¿atumí nemasrj ajasjak? ¹⁷ Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winiya akantamkitiai tusa wakerutmainiawai, winia antsu shiir enentáimurtsat tusan. ¹⁸ Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjaj pujajinsha tura pujatsajinsha. ¹⁹ Uchirú, nuwá jurertaj tana núnisnak ataksha wáitijai Kristu atumjín paant atí tusan. ²⁰ Atumjaj pujaknaka maak aintjai. Yamái pujaknaka nekas nusháa chichasaintjarne. Iturkatjarmetsuk nékatsjai.

Akarsha, Sarasha jimiará Chichaman nakumainiawai

²¹ Ayu, “akupkamu umirkatniuiti” támena nu nekaata; akupkamuka júnisai. ²² Aarma awai: Apraám jimiará uchirtiniuyayi. Emka ni takarniurj jurermiayi Ismaeran. Nuyá Apraáma nuwé jurermiayi Isakan. Ismaera nukurj Apraáma takarniuriyayi. Tura Apraám Yusan enentáimtutsuk niijjaj kanarmatai, ni takarniurj jurermiayi. Tura antsu Isaka nukurjñkia takarniurjñchuyayi, antsu nekas ni nuwé áuyayi. Niisha ti úuntchiniak, Yus “jurertatme’ tímiayi. Tuma asamtai Yus timiajaj Isakan jurermiayi. ²⁴ Ayu. Yamái tájana nuka Yusa Chichamen jimiaran nakumui. Ismaera nukurj Akar chikichik Chichaman nakumui. Yaunchu Senái muranam Yus ni akupkamurjñ áarmiayi Israer-shuar, takarniua áintsan, umirkarti tusa. ²⁵ Senái murasha Akara nuñkē Arapianam wajaawai. Akarsha Senái muran nakumak, ashí Israer-shuaran “Akupkamujaj uwempramniaiti” tuinia nuna nakumui. Yamaisha Israer-shuara uuntri Jerusaréñnum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. ²⁶ Antsu ashí Yus-shuarti uwempra asar imiankas ankant pujaji. Nayaimpinmayá Jerusaréñnumiá áentsuitji. Nuyá áentsti tuke ankant pujuinijai. Nuyá aents asakrin, nu yakiyá Jerusaréñka ii nukurjía áintsan enentáimpramniaiti. ²⁷ Júnis áarmaiti:

Warasta, misurma, uchi takakchiatmek;
Ti shiir warasta, uchi najawé nékachiatmek.

Nuwá ajapamu uchin jurertatui;

Nuwá áishrinnia núnaka nankaamas uchirtin átatui.

²⁸ Iisha, yatsuru, Isaka áintsari, Yus timiajaj akiinaitji.

²⁹ Yaunchu Ismaer Isakan kajerak ititurchat awajsamiayi. Núnisan yamaisha Ismaera áintsan aya ayashnumiá ainia nú aents Yusa Wakaníya akiinia nuna yajauch awajenawai. ³⁰ Tura Yus-Papinium áarmaiti:

“Takarniusha, ni uchirijjaj, ajapam awemata. Nekas péñker nuwá uchirijjaj tsanin pujuschamniaiti. Aparj kuítríncha achikchamniaiti,” tawai Yus-Papí.

³¹ Ayu, yatsuru, nekaatarum. Takarniu uchirjñchuitji antsu ankant pujaji nekas péñker nuwá uchirj asari.

Yusjaj tuke ankant atarum

5 Kristu uwentikrampramijai tuke ankant átinian. Tuma asamtai kakaram ajasam tuke ankant pujustá. Ataksha nu ititurchatnum waketkip.

² Wi Papru asan ujaajrume. Átum Muisais timia núnisrumek tsupirnakrumññkia ¿Kristu nuikia warí itiuirtamkamniait? ³ Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti. ⁴ Atum “Akupkamu umiakmin Yus shiir enentáimturmastatui” tárugna nu, nu shuartiram Krístuiya tupañniuitrume. Yusa anenkrattairiya kanakniurme.

⁵ Iikia, antsu, Yusa Wakaníjaj tura Yus enentáimtakrin Yus shiir enentáimturmastatji, tu enentáimji. ⁶ Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujaj péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin? ⁸ Nú enentai Yúsaiyanchuiti. Niijjaj wekasatniunka Yus achirmakuitrume. ⁹ Ju enentáimpratarum: Karía ishichik yu-minnium enketam mash' karimtiktsuk. Aneartarum atumsha. ¹⁰ Ayu, Yus yáinmakrumin wi tájana nu nusháa enentáimprashtratume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíkiá, yatsuru, yamaisha “tsupirnaktiniaiti” tuke tákuñkia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuñkia kajertukcharainti. ¹² Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtam-sarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. ¹⁴ Ju chichamjaj ashí akupkamu mash uminkiattawai: Ame ayashim aneamna áintsamek chíkich shuarsha aneata. ¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶ Júná tájarne: Atumí ayashj wakerana nu umikijaj tusan Yusa Wakaní kakarmarjijaj wekasatarum.

¹⁷ Yusa Wakaní wakera nuna ame ayashim nakitiawai.

Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. ¹⁸ Tura Yusa Wakaní jintinframkuñkia, aentsu akupkamurijjaj itit áchattame.

¹⁹ Wats, ayash túramu ti paant ániawai. Ju ániawai: tsanirmatin, wapik túratin, yajauch túratin, ²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nañkaamantu enentáimtumastin, aya niisháa niisháa enentáimstartin, níiniunak íistin, ²¹ yajauch enentáimtu-naistin, mañkartuatin, nampektin, nampernum aya ti yurumin, tura ti nampen átin. Chíkich nujaj métek ániawai. Nuik ujakmajrumna núnisnak ataksha tájarme: Shuar nuna túrakka Yusaj pujustinian penké tujinkiat-tawai.

²² Ayu, yamaikia Yusa Wakaní kakarmarijjaj túratin enentáimsatai. Yusa Wakaní ii enentáin pujak, péñker túratniun nerektinia áintsan neremtikramji. Ju ániawai: aneatin, shiir enentáimsatin, Yusjaj tura shuarjaj nawamnaikiar wekasatin, shiir enentáijjaj katsunratin, chíkich shuar shiir awajsatin, tsañka átin, tana nuna tímiatrusan umiktin, ²³ pééjchach ajastin, iik íimiasar tunáa túrashtin. Ju túratniuncha yaki surimia?

²⁴ Shuar Jesukrístunu ainia nu, ni ayashí wakeramurincha tura nunisan ni túramurincha surimiak wekaawai. Ni ayashí krúsnum maatniua áintsan túraiti.

²⁵ Yusa Wakaní kakarmarijjaj Yus-shuar ajasu asar, núnisrik Yusa Wakaní kakarmarijjaj wekasatai.

²⁶ “Wats, nekapnaisatai. Wi imiá péñkeraitjai” nuámtak túnaitsuk, yajauch enentáimtunáischatniuiti.

Yáinniaiktarum

6 Túrasha, yatsuru, Yus-shuar tunáa túrashtimpiash. Atumsha nekas Yusjaj wekaarum-na nu, nu wáinkurmeka, yátsum Yusjaj iwiarat tusarum yáintárum. Tura nañkaamantu enentáimtumatsuk túratatum. Tura amesha nekamata. Tunaanum iniarajj tusam aneam wekasata. ² Káarak kijin akui nuámtak yáiniaiktin átsuk. Núnisrumek atumsha, itiurchatrj akui nuámtak yáiniaiktatum. Túrakrumka Kristu akupeamurj umíarme.

³ Shuar tujintiyat “nañkaamantuitjai” tákuñka anañmamui. ⁴ Shuar ní túramuriniak enentáimtumastiniaiti. Níiniunak enentáimtumakuñkia tura péñkeraitkuñkia

chíkicha túramurj iirtsuk, antsu níiniun péñker iis wararsattawai. ⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintiana nuna ashí takakna nujaj yáintí.

⁷ Anañmamawairap. Shuar Yúsán anañkatniun tujintiawai. Ame araamna nuna nereñ júuktatme. Chíkich nere áchattawai. Atumi enentáincha núniskete. ⁸ Iista. Shuar ni ayashí wakeramunak tuke enentáimtakka, jataj nere áintsan araaiti. Nerekmataj jákatniun júuktatui. Tura Yusa Wakaní wakera nuna tuke enentáimtakka Yusjaj tuke shiir pujustinian júuktatui. ⁹ Nu asamtaí péñker túratin yawetkishtiniaiti. Tura pimpitsuk takasar júuktin tsawant jeamtaí, páchitsuk júuktatj. ¹⁰ Tuma asamtaí yáinmin ákuñkia ii jeajnia nu túratniuitj nekaska ii yachj yáinmartin, Yus-shuar ainia nu. Tura ashí shuarsha yáintinaiti.

Jesukrístunu ajarar yamaram akiiniatin nekas péñkeraiti

¹¹ Íimsakua, winia uwejrújaj urutá uuntna áatjarum.

¹² “Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuñkia itiurchat awaj-tusarajj tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan tsupirnaktiniaiti. ¹³ Pai. Tura nú shuar tsupirnakú ániayat ashí akupkamun umiiniatsui. Muisais timia nuna ajapén ikiuniawai. Túmaitiat tsupirnakuk tusa wakerutmainiawai. Áyatik atumin “Pai, niisha tsupimiatkiakji” titiai tusar wakerutmainiawai. ¹⁴ Wikia, antsu, aya ii uuntrj Jesukrístu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nuñkanmayá ana nuna jaka áintsan páchiatsjai; tunaanum winia útsutkatin at-sawai. ¹⁵ Krístunu ajasrikia tsupirnaktincha tsupirnakchaitkiursha mai ántrai antsu yamaram akiiniatin nekas péñkeraiti. ¹⁶ Ashí nekas Yus-shuaran, wi tájana nujaj métek wekainia nuna, Yus shiir enentáimias yáintí tuke shiir pujustinian.

¹⁷ Yamaikia itiurchat najatawarajj. Jesusa takatrj takaakui asutiuawarma paant ayashruj chimikma írunui.

¹⁸ Yatsuru, ii uuntrj Jesukrístu atumin shiir yainmakarti. Nuke atí.

IPISIUNAM

Ipisiunmaya Yus-shuaran Papru áatramiania nu

1 Yus nuna wakerakui Jesukrístu akatramuitjai. Jesukrístu nekas enentáimtusrum Yus-shuar ajasrum Ipisiunam pujarmena nuna ju papin áatjarme.

² Yus ii Aparísha tura ii Uuntri Jesukrístusha waitnentramainia ásar imiatkinchanum shiir pujustinian yainmakarti.

Krístujaj tsaniñkiu asakrin Yus ti shiira nuna tsankatramji

³ Ii Uuntri Jesukrístu Aparí Yus nekas shiir awajustiniaiti. Iisha Krístujaj tsaniñkiu asar ii enentáin ashí nayaimpinmaya ana nujaj warasminiaitji. Túmaitkiui Yus nu waratain ashí suramsaitji. ⁴ Krístujaj uwemprarti shiir tunaajainchu Nijijaj pujusarat tusa Yus, ju nuñka atsajsha, anaitiamkiamiaji. ⁵ Yámankamtaiksha incha ti anenmak Jesukrístu túrunamujaj ni uchirí ajasat tusa wakerutmakmijai. ⁶ Ni aneamu Uchirijijaj tsaniñkiu asakrin nekas ti anenmaji. Nu enentáimsar ti shiir awajsatniuitji. ⁷ Yus ti anenmakrin ni aneamu Uchirí numpé puarmatai, nu jakamujaj ii tunaarín akikmatramak uwemtikrampraitji. ⁸ Tura ti anenmak ni enentáimtirin tura nekatairíncha suramsamijai. ⁹ Nujaj shiir enentáimturmak in uwemtikrampratniun wakerutmakmijaj nuna, yaunchu nekaachman, yamá paant awajturmajai. ¹⁰ Ashí ju nuñkanam írúnna nunasha tura nayaimpiniam írúnna nunasha Kristu ashí akupin ati tusa Yus tsanatkattawai. Nunasha Yus yaunchu enentáimturmu asamtai tsawant jeamtai ashí uminkiatkawai.

¹¹ Iisha Krístujaj tsaniñkiu asakrin Yus yaunchu achirmakmijai ashí Niiniu ana nuna tsankatramkatniun. Nunasha, ashí Nii túrana núnisañ, aya Nii wakera asa túramiyai.

¹² Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awajsamín ániawai. ¹³ Núnisañ atumsha nekas uwempratin chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanín akuptuktaj timia nuna akupturmakmai. Nuna tura “nekas Wíi shuaraitrume” tawai.

¹⁴ Yamái Yusa Wakaní ii enentáin pujuruk tuke uwemtikramji. Tura takas umik nu tsawantaj ashí tsankatramkattajai. Tura ii enentáin pujá asamtai Yus ukunam Nijijajsha ashí tsankatramkattaj nu paant nékajai. Maa, Yus ti penker asamtai Nin ashí ti shiir awajjarti.

Papru Yus-shuaran áujtusmiania nu

¹⁵ Átum ii Uuntri Jesukrístu nekas enentáimtamuncha tura ashí Yus-shuarajaj shiir awajnaiyamuncha antukjai.

¹⁶ Túran shiir enentáimkiun Yúsan áujkun tuke yúmiñkijajai. ¹⁷ Ii Uuntri Jesukrístu Aparí Yus ti shiir asamtai Nin áujeakun ni Wakaní ni nekatairín suramas ashí jintintramawarti tusan seajai. Nujaj nuna nankaamas Yus nekaattarme. ¹⁸ Tura enentáimíncha paant enentáimtikramprarti tusan seajai. Nujaj shiir túrutmataj tusa achirmakuitrum nu nekaattarme. Nu arantcha imiá shíira nu, Yus ni shuarín ashí tsankatkatana nusha nekaattarme. ¹⁹ Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai ²⁰ nujaj Krístun jakamunmaya iniantkimiayi. Tura nayaimpiniam jukí ni untsuuriní akupin pujutainium apujsamiai. ²¹ Tura ashí ju nuñkanam akupin ainia nújajsha tura ukunam nuñka átatna nu akupin áminia nújajsha tura ashí akupin ainia nújajsha tura ashí naarí nékamu ainia nujajsha Yus Krístun ashí nankaamas akupin najanamiayi. ²² Tura ashí írúnna nu, Krístun umirkartin ániawai. Tura Yuska Krístunak ashí Yus-shuara Akupniurí awajsamiai. Túramtai Kristu ni shuarí muuké áintsanquete. ²³ Tura ashí nuñkanam Yus-shuar ainia nu Kristu ayashí najanainiawai. Tura Kristu ashí ni ayashín pimiutkaiti tura nu arantcha ashí írúnna nunasha pimiutkaiti.

Yus anenma asa uwemtikramji

2 Átum yajauch túrakrum tunaanum tuke wekaakrum Yúsnumiá kanakin asarum jákauyarme. ² Nu tunaanum ju nuñkanam pujuinia nujaj métek tuke wekainiuyarme. Túrarum uunt iwianchi wakeramurí umirniuyarme. Uunt iwianch ashí Yúsan umirainiatsna nuna akatenawai. ³ Ashí iisha núnisrik yaunchu nu shuarajaj métek ii ayashí wakerakmu umirniuyaji. Tura íi enentáin wakeramusha umirniuyaji. Tuma asar tura tunaajaj akiinia asar chíkich shuarajaj métek ti kajernakmijai. ⁴ Antsu Yus ti waitnentkartin asa in ti anenmamijai. ⁵ Tuma asa ii tunaanum tuke jaka pujarnin Krístujaj métek iwiaaku awajtamsamijai. Aya ti anenkartin asa uwemtikrampramijai. ⁶ Tura Krístujaj métek iniantamkimiayi. Nuyá Jesukrístujaj métek, akupin pujutainium yamaisha apujtamas tuke nu petkatniun tsankatramkaitji. ⁷ Nujaj ni ti anenkratmaríncha tura Kristu túrunamujaj waitnentrampramuncha tuke iniaktusmin átatui. ⁸ Jesukrístu nekas enentáimta asakrumin Yus waitnentramar uwemtikrampraiti. Ju ka

átumkeka túrunachuitrume. Antsu Yuska Niŋki kuítchajaj suramsaitrume. ⁹ Shuar ni takatríjjaj uwempratiuitkiunŋa naŋkaamantu enentáimsainti winia kakarmarjaj uwemprajaj tusa. Nu enentáimsatniuka atsutí tusa Yuska átumka takaatsrumniŋ uwempratniun suramsamiarme. ¹⁰ Yus najanamuitji. Kame Jesukrístujaj tsaniakrin yamaram iwiaakman suramas tuke péŋker túratniun najatmamji. Yáunchuk nuna enentáimturmasmiaji.

Krístujaj tsaniŋkiu asar shiir nawamnaikiar pujajaj

¹¹ Nuik ámarum nu enentáimpratarum. Ashí Israer-shuar ni ayashín tsupirnaku ásar ashí Israer-shuarchan, tsupirnakcha ániakui, peŋké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. ¹² Nuik Krísturtinchauyarme. Israer-shuarcha asarum ashí ni túrutairjsha tura ashí Yus nin tsanŋkatkarmasha nekaachuyarme. Tura jú nuŋkanmayá asarum nekas Yusa nu enentáimtichuyarme tura shiir pujustin náŋkamsarum enentáimpramarme. ¹³ Antsu yamaikia Krístujaj tsaniŋkiu asarum, yaunchu Yusaíya yajá pujuwitiatrum, yamaikia Kristu numpé puármatai ni jaru-tramkamujaj tántaitrume. ¹⁴ Israer-shuarjaj Israer-shuarchajaj nemasmanaikiar ajapén péenŋkramu ámiaji. Tura Kristu nuna sáaki nawamnaiktikramkamiaji. Tura chikichik shuar najatmamiaji. ¹⁵ Nuik aya Israer-shuar Muisais akupkamu untsurí armia nuna umirkatin ániak nujaj chíkich shuarjaj nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamiaji. ¹⁶ Núnisan ámiai. Kristu krúsnum jaka nemasjaj mai apattamak chikichik awajtamas Yusjajsha nawamnaiktikramkamiaji.

¹⁷ Kristu taa nawamnaikiatniun chichaman Israer-shuaran ujakmiai. Tura nu chichamnak atumin Yus nékachuyarmena nunasha ujaktinian akupkamiayi. ¹⁸ Yamaikia Israer-shuartisha tura Israer-shuarchasha mai metek Kristu túrunamujaj tura Yusa Wakanj takaku asar Yusaj jeatniuitji. ¹⁹ Tuma asamtai yamaikia chíkich shuarchaitrume, antsu ashí Yus-shuarjaj métek ajasuitrume. Nekas Yusa shuarjaintrume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan yaunchu Yúsnan etserniusha tura Kristu akatramurjsha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujaj naŋkaamas Jesukrístu enentáimtustiniaiti. ²¹ Jea apujtukmarj Kristu asamtai Nij ti peŋker ekeniar jea jeamnakí wéawai. Tura ii Uuntrj Krístujaj Yusa Jee ti shiir átatui. ²² Núnisrumek atumsha Krístujaj tsaniŋkiu asarum átum ashí Yus-shuarjaj Yusa Jeeya áintsan ajasuitrume. Tura Yusa Wakanj ashí Yus-shuara enentáin pujj asamtai nekas Yusa Jeeŋte.

Papru Israer-shuarchanum Yus-chichaman etserkatniuya nu

3 Nu asamtai atumin Israer-shuarchatirmin yáintaj tusan Jesukrístunu étserkun sepunam pujajaj. ² Yus anentak Yus-Chichaman atumin etserkatniun akatar akuptukuiti. Nu nékatsrumek. ³ Yus nuna túrutak yaunchu nekaachmancha paant awajtursamiayi. Núnaka ishichik átraitjarne. ⁴ Nu ájusarum Krístunu yaunchu nekaachman yamaikia paant nékajna nu nekaattarme. ⁵ Nú chichaman yáunchusha chikichikkesha ujankachmiayi. Túrusha yamaikia Yusa Wakanj Kristu akatramurjsha etserniurjsha nu chichaman paant awajtusarai. ⁶ Nu chicham juiti: Uwempratni chichaman umirkar Israer-shuarcha Israer-shuarjaj métek Krístujaj tsaniŋkiaru ásar chikichik shuar ajasartatui. Tura nu arantcha Yus ni shuarjaj ashí shíiran tsanŋkatkatniun anajmatrama nu métek pachinkartatui. ⁷ Yus ni kakarmarjaj winia yáintiuk tura ti anentu asa nu uwempratni chichaman etserkat tusa akatturmiayi. ⁸ Ashí Yus-shuarjaj naŋkaamas wi péŋkercha aŋ Israer-shuarchanum shiir chichaman etserkat tusa Yus tsanŋkatrukmiayi. Krístujajŋkia kuitjaj naŋkaamas péŋker, enentáimtustin jeatsjinia nu, takakji. Nusha ti shiir chichamaiti. ⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. ¹⁰ Yamaikia ashí nayaimpiniam pujuinia nuka Yus ni shuariin túrunamun íisar Yuska imiá neka asa ashí enentáimniua nuna paant nékainiawai. ¹¹ Yus jú-nis túratniun yáunchuk enentáimpramiayi. Tura ii Uuntrj Jesukrístujaj mash uminkiamiayi. ¹² Tura Krístujaj Yusaj yúpichuch jeaji. Tura Nin nekas enentáimtusar sapijmiatsuk Njin tantamniaitji. ¹³ Tuma asamtai tájarne, atumin yáintaj tusan sepunam pujakui kúntuts enentáimprairap. Antsu nujaj Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asamtai ii Uuntrj Jesukrístu Aparin tikishmatran áujtajrume. ¹⁵ Ashí nayaimpinmasha tura nuŋkasha Yus-shuar ájnia nu nekas ni shuarjaj ániaji. ¹⁶ Yus ti kakaram asa ni Wakanjaj atumí enentáin pujureak ashí ni kakarmariyan atumin suramsarat tusan áujtajrume. ¹⁷ Yus nekas enentáimtakrumin Kristu atumí enentáin pujusat tusan áujtajrume. Tuke yapajtsuk anenkratin átarum tusan áujtajrume. ¹⁸ Túrakrum ashí Yus-shuarjaj Kristu anenkrattairj nekaattarme. Imiá uunt asa naŋkantsuk tuke amuukachminiaiti. ¹⁹ Nu anenkrattai ashí takamtsuk nekaachmin aŋ nekaatarum tusan áujtajrume. Nujaj Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna naŋkaamas tura enentáimprachminia nunasha naŋkaamas iin pujurtamuk ashí túramniaitji. ²¹ Ashí Yus-shuarjajsha tura Krístujajsha Yusa péŋkeri

tuke paant wantinin atí. Yus tuke iniaitsuk shiir awaj-nasti. Núnisaᅇ atí.

Yusa Wakaníjaj tsaniᅇkiar pujakur túratin

4 Atumsha ni shuarí ajastin Yus achikma asarum péᅇker wekasatarum tájarme. Ii Úuntriᅇniun ét-serkun sepunam pujakun seajrume. ² Nekasmiancha ajasrum aneniakrum katsunnairatarum. ³ Yusa Wakaní chikichik shuar awajtamkurmin shiir awajnisarum pu-justarum. ⁴ Yusa Wakaníᅇkia chikichkiiti. Tura ashí métek Yus achikma asar métek Niijaj shiir pujustin enentáimji. Iisha Kristu ayashí ayashíᅇmkia asar chikichik ayashkiiti. ⁵ Ii Uuntri chikichkiiti. Niᅇki nekas enentáimtusar métek imiantiniatji. ⁶ Chikichkiiti Yus, ashí Yus-shuarti ii Aparínti. Ashí akuptamniuitji. Ashí nu shuariᅇn pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Kristu wakerimia núnisaᅇ suramsaji.

⁸ Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíran susamiayi.”

Tu áarmaiti.

⁹ Tura “wakamiayi” tana nu ¿warintia? Kristu nayaimpiniam pujá asa yakí wákaᅇka emka tárashtinkiait. Nekas nuᅇká taramiayi. ¹⁰ Niᅇki ataksha nekas nayaimpiniam wakamiayi. Nuna tura asa ashí ni shuarᅇn pimiutkarmiayi. ¹¹ Tura nujaj chikichan akatramun awajsamiayi. Chikichnasha Yúsna etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi. ¹² Túramtai ashí Yus-shuar ni takatrijaj yáiniakiar ti péᅇker shuar ajainiakui Kristu ayashí takamtsuk katsᅇarartatui. ¹³ Nujaj Yus nekas enentáimtatum Yusa Uchirí ashí métekrak péᅇker nekaattaji. Nu túrakur katsukir Krístujaj métek péᅇker ajastatji. ¹⁴ Tura uchía áintsar áhattaji. Úchikia ashí yamaram chichaman antukar wari yapajíniawai. Tura anaᅇkartinia chichameᅇn antukar waaku ániawai. Kame nu anaᅇkartin shuar ti paant chichayataᅇn ni shiir chichamejaj anaᅇkatniun pujurenawai. ¹⁵ Antsu nekas aneniakur nekas chicham ujanaiktiniatji. Túrar Krístujaj tsaniᅇkiar tuke tsakakir ashí péᅇker túratniujaj Niijaj métek ajastatji. Krístuka ashí ni shuarí muuké áintsᅇkete. ¹⁶ Tuma asa ni ayashᅇn wáinkui ashí nuna muchitmarí péᅇker yáiniakiar ashí ni túratniurᅇn shiir takasartatui. Nujaj nu ayashniun muchitmarí chíkich chíkich péᅇker takainiak métekrak shiir tsakartatui. Tura anenainiakui nu ayashsha péᅇker úuntmartatui.

Krístujaj tsaniᅇkiu asar yamaram iwiaakmanum wekaaji

¹⁷ Ii Uuntri Kristu íimmianum juna akatjarme: Chíkich aents Yúsna nékachu ásar ántar ni enentáimmiájajᅇn wekainia núnisrum wekasairap. ¹⁸ Ni enentáin kusuru

ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiat-sui. ¹⁹ Nu arantcha, ni túramurijaj natsᅇmtichu ásar ti yajauchiniam surumakar ashí tunaan wararainiak túrin ániawai. ²⁰ Antsu átumka núnisrum enentáimtustin unuimiarcharmame. ²¹ Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmame. ²² Yaunchu enentáimtairmeka ayash wakeramu anaᅇkramin ainia nujaj piaku asa imiá yajauchiiti. Nu enentáimtairmesha yaunchu túrutairmesha ajapa iniaisatarum. ²³ Túrarum péᅇker enentáimsarum wakannium yapajáatarum. ²⁴ Tura yamaram enentáimtairam emetatarum. Nuka Yusjaj métek najanamu asa nekas péᅇker tura shiira nuna tuke túriniaiti.

²⁵ Nu asamtai chikichik ayashi muchitmarí asarum wáitrutsuk nekas chicham chicharnaisatarum.

²⁶ Kajeakrum tunáa túrawairap. Tura nu kajekmasha tsawant takamtsuk áchatniuiti. ²⁷ Uunt iwianch yajauch awajtamsatin tsᅇkatkaip.

²⁸ Kasasha kasamtsuk kakaram takakmasti. Tura ni uwejéjaj péᅇker takaak atsumainia nú shuarnasha susati.

²⁹ Muíjmia chicham chichasairap. Antsu chichastin akui péᅇker chicham, chíkich shuar péᅇker awajsamnia nu chichastarum. Anturtuinia nuna yáintaj tusarum nu chicham ujaktarum. ³⁰ Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

³¹ Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí. ³² Antsu shiir awajkartin ajasrum waitnennairarum, Kristu jakamujaj Yus atumí tunaarᅇn tsᅇkurtampra nútiksarmek tsᅇkurnairatarum.

Yus-shuar túratin

5 Nekas Yusa Uchirí aneamu asarum Nii tura núnis túratin wakeruktarum. ² Kristu in anenmaj núnisrum anenaitiarum. Kame ii tunaarᅇn akikmaktaj tusa jákatniunam surumakmiayi. Túramtai Yus shiir enentáimtusmiayi.

³ Yusna asarum tsanirmatniusha yajauch túratniusha tura jú nuᅇkanmayᅇn ikiaᅇkatniusha ishichkisha enentáimtuschatniuitrume. ⁴ Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yumᅇsatniuiti. ⁵ Shuar chíkich nuwajaj tsanirmakka tura ashí yajauchin wakerakka tura jú nuᅇkanmayᅇn ikiaᅇkatniun wakerakka Yusaj Kristu akupea nuí péᅇké pachíinkiachminiaiti. Kame jú nuᅇkanmayᅇn ikiaᅇkatin ántar-yus tikishmatratniua nujaj méteketi. ⁶ Nu túramniaiti tusar ántar chichamjaj anaᅇkramacharti. Warí, nuna túruiniakui Yúsna umirainiachun Yus ti asutiáwartatui. ⁷ Tuma asamtai nu shuar péᅇké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujaj tsaniᅇkiu asarum péᅇker tsáapninium wekaarme. Shuar tsáapninium wekainia

nujaj métek wekasatarum. ⁹ Tsáapninium wekainiaka shiir awajkartincha tura nekas chichamtincha tura péñker túrin áiniawai. ¹⁰ Ii Uuntrj Kristu wakeramu nekaatin wakeruktarum. ¹¹ Kiritnium wekainia nu túramu pachisairap. Antsu nu shuar tsáapninium enkeatarum. ¹² Ni yúk túruinia nu áujmatsatin natsanmañiaiti. ¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk. ¹⁴ Nu asamtai Yus-Papinium tawai:

“Kananuitme nu shintiártá. Jakamunmayá nantáktiá. Tura Kristu tsáapin awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu péñker enentáimprarum wekasatarum. ¹⁶ Péñker túratin tsawant wasúrkáip. Tunáa ti pampaatsuk. ¹⁷ Enentáincha áirap. Ii Uuntrj Kristu warinia wakera nu enentáimtustarum. ¹⁸ Nampekairap. Nampeakmek aya yajauch ajame. Antsu Yusa Wakanj winia enentáiruñ takamtsuk pujurtusti, tu enentáimsatarum. ¹⁹ Túrarum Yus shiir enentáimtakrum Yus-kanta kantamkirum shiir áujnaisatarum. ²⁰ Ii Uuntrj Jesukristu náarjijaj ashí irunna nu Yus Apa tuke yumiñsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Kristu shiir awajsattarme.

²² Núwaka Krístun umirna núnisan ni áishrjncha umirkatniuiti. ²³ Kristu ni shuarjn akupeana núnisan áishmansha ni nuwen akupkatniuiti. Kristu ni shuarjn ayashimiak ni muuké áintsangete. Tura nin uwemtikiartiniaiti. ²⁴ Nu asamtai Yus-shuar Krístun umirin áiniawai. Núnisan ashí ana nujaj nuwá ni áishrjn umirkatniuiti.

²⁵ Kristu ni shuarjn ti aneak nin yáintaj tusa jákatniun surumakmiayi. Núnisrumek áishmanñtirmesha atumi nuwé aneatniuitume. ²⁶ Kristu ashí ni shuarjn ni Chichamejaj tura entsajaj nijjar ní shuar péñker árat tusa jakamiayi. ²⁷ Nujaj ashí ni shuarjn tunaarinniuchu tura yajauch máatrachu antsu ti péñker shiir awajas Niini ejetaj tusa túramiayi. ²⁸ Núnisan áishmanñ ni ayashjn anea núnisan ni nuwen aneatniuiti. Shuar ni nuwen aneak nujaj ni ayashjncha aneawai. ²⁹ ¿Yaki ni ayashjn nakitniuit? Antsu péñker wáiniuk áyureatsuk. Kristu núnisan ni shuarjn wainiui ³⁰ ni ayashj asamtai. Kame ni ayashj muchitmarintji. ³¹ “Tuma asamtai áishmanñ ni aparjncha nukurjncha ikiukin ni nuwejaj tsaninñkiar chikichik ayashtin ajainiawai.” Tu áarmaiti. ³² Nusha Kristu ni shuarjijaj tsaninmán tawai. Nuka yaunchu nekaachma yamaikia nekanaiti, tura ti enentáimturiniaiti. ³³ Tura núnisan ashí áishmanñtiram atumi nuwé atumá ayashja nútiksarmek aneatniuitume. Nuwasha ni áishrjn umirkatniuiti.

6 Uchitirmesha, Yus-shuar asarum apasha nukusha umirkatarum. Nuka ti péñkeraiti. ² Emka akupkamu “umirkam nekas shiir átatme” tana nu júiti: “Apasha nukusha umirkata.

³ Túrakmek a shiir átatme tura jú nuñkanam untsurj tsawant pujustatme” tawai.

⁴ Atumsha, uchirtintirmesha, atumí uchirj ántarum akajkairap. Antsu Yusan shiir enentáimtusarat tusarum ti péñker jintinkirum tsakatmartarum.

⁵ Takakmautirmesha, atumí uuntrj ju nuñkanam pujuinia nu ti péñker umirkatarum. Kristu umirkatniua áintsarum wishiksuk ashamakrum tuke enentáijijaj takarsatarum. ⁶ Aya wáitmakui shiir enentáimtursat tusarum péñker takarsairap. Antsu Kristu takarniurja núnisrum ashí ame enentáimjaj Yus wakera nu túratarum. ⁷ Aya shuárnak yayá nútiksarum takasairap. Antsu ii Uuntrj Kristu takarsatniua nútiksarmek ásump enentáijijaj takastarum. ⁸ Kame chíkich chíkich ni takasmajaj métek akinkiertatui. Ii Uuntrj Kristu nu shuar péñker túramujaj métek akiktatui.

⁹ Tura atumsha, iniamniutirmesha, atumí takartamu wakanj mántutsuk shiir enentáijijaj iniatarum. Nekas enentáimpratarum. Ii Uuntrj nayaimpiniam pujana nuna niisha atumjaj métek umirainiawai. Tura Yuska ashí shuaran akantsuk métek iyawai.

Yusa kakarmarjijaj íwianch taritatarum

¹⁰ Wátsek, yatsuru, ii Uuntrj Yusjaj tsaninñkiu asarum ni ti kakarmarjijaj iwianchjaj máanaiktin kakaram ajastarum. ¹¹ Apach máanainiak jiru entsarua núnisrum Yus susamujaj entsartarum. Nujaj íwianch nupetamkui tariartatme. ¹² Kame Yusna takáa asar péñké áentsjaj máaniatsji antsu yajauch wakan kakaram írurina nujaj máaniaji. Niisha ju nuñkanam, kiritniuma áintsan, tunaanum wekainia nuna akupin áiniawai. ¹³ Jiru entsartinia áintsarum Yus súramna nu entsartarum. Nu entsarmajaj itiurchat tsawant taritra nupetkarum tuke tariarum wajastatume. ¹⁴ Wats, nekas tariartin nekas chicham emenmamatarum. Tura péñker túratniujaj jatairum ajaktarum. ¹⁵ Suntar iwiarnak sapatán aweá áintsarum Yusa shiir chichame etserkatin iwiarnartarum. ¹⁶ Nuyasha ashí nankaamas, tantar takustinia áintsan, Yus tuke nekas enentáimtusatarum. Nujaj íwianch eketrámkamusha uwemturtatme. ¹⁷ Múukem ajaktincha Kristu uwemtikrampramu múukmijn etsenkrutarum. Tura Yus-Chicham puniáa áintsan achiktarum. Nuka nekas Yusa Wakanj puniarjnti. ¹⁸ Yusa Wakanjijaj Yus áujeakrum tuke seatniuitume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. ¹⁹ Núnisan winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiirchichaman yaunchu nekaachma paant awajsat tusarum áujtursatarum. ²⁰ Yus nu chichaman etserkatniun akuptukuiti. Nuna túrakun sepunam pujajaj. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachj, Tíkikiu, ashí wi túramun ujatmatatui. Niisha Ii Uuntrj Krístunu etserkatniun ti péñker

yáinniuiti. ²² Tuma asamtai ii juí pujamun ujatmak ikiantamprarat tusan akuptajrume.

²³ Yus Apasha tura ii Uuntri Jesukrístusha ashí Yushuairmin anenmak shiir imiatkinchanum pujustin-

ian suramsarti. Tura Nin tuke nekas enentáimtustinian suramsarti. ²⁴ Ashí ii Uuntri Jesukrístun tuke enentáijjaj aneana nuna Yus shiir yáintí.

Nuke atí.

JIRIPIUSNUM

Papru sepunam pujus Jiripiusnumiã Yus-shuaran áa-tramiania nu

1 Wi Papru Timiutéujaj Jesuskristu takarín asar ashí Yus-shuar Jiripius péprunam pujarmena nu ju papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisañ Yusna asarum tura Jesukristujaj tsaniñkiu asakrumin ju papí áateajrume. 2 Yus ii Aparísha Jesukristu ii Uuntrísha atumin waitnentramainia ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

3 Ashí tsawant atumin enentáimtakun Yúsan tuke shiir yúmiñkijaj. 4 Yúsan áujeaknasha ti warasan seatjarme. 5 Kame iikia yámankamtaiknumiã Yus-Chicham métek yáiniákiar iniaitsuk takasuitji. 6 Yus atumíin ti péñker awajsatniun nañkama asa núnisañ Jesuskristu táatsañ tuke shiir awájtámki nekas péñker najatmat-tarme. Nuka ti nekasaiti. 7 Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti aneñkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti peñkeraiti. 8 Jesukristu aneñkrattairijijaj wi atumin aneamun Yussha paant nékarui. 9 Yúsan áujeakun anearmena nú nañkaamas aneak tusan seatjarme. Tura nújajsha ti neka ajasrum 10 ashí péñkera nu achikiuk tusan Yúsan áujtajrume. Atumin nu túrunamtañkia yamaisha tunáajainchu pujustatrum tura Kristu támatai sumamashtatrum. 11 Núnisañ Jesukristu kakarmaríjaj ashí péñker túrin átatrum. Tura nújaj ashí shuar Yúsan ti shiir enentáimturartatui.

Wi ju nuñkanam aya Krístunak enentáimtakun pujajaj

12 Winin túrunamu itiurchat añ nujaj uwempratin chicham nekas pampaawai. Nu nekaatarum tusan wakerajrume, yatsuru. 13 Iis, uunt akupniu suntarísha tura ashí shuarsha wi Krístunon etseru asan sepunam pujamun paant nékainiawai. 14 Ti untsurí Yus-shuar wi sepunam eñketman nekaawar ii Uuntrí Jesusan nekas enentáimtusar sapijmiatsuk Yus-Chichaman etserainiawai.

15 Kame shuar awai winia kajertuiniak tura nañkaamantu enentáimtumainiak Krístun páchiniawai. Antsu chíkich shuarka nekas enentáijaj Krístun etserainiawai. 16 Yajauch shuarka Krístun shiir enentáimtutsuk antsu ashí shuar ní chichameñak anturkar wíi shuar

ajasarat tusar etserainiawai. Túruiniak wisha sepunam pujakui nu arant itit awajtustinian wakerutainiawai.

17 Antsu péñker shuar Krístun nekas aneenak etserainiawai. Nu uwempratin chicham imiá peñkeraiti wi titin asamtai winiasha anentainiak shiir etserainiawai. 18 Wats, mai metek chíkich yajauch enentáijaj tura chíkich shiir enentáijaj Krístun etserainiakui shiir enentáimjai.

Tura nuna nañkaamas shiir enentáimprattajaj.

19 Kame Yus áujtursa asakrumin tura Jesukristu Wakanísha yaintiu asamtai ti péñker uwempran jiinkit-tijaj. 20 Nekas juna wakerajaj: Natsamtsuk uunt akupniun Jesukristun paant ujakartinian wakerajaj. Nujaj winí Kristu kakarmarí pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarín winí nañkaamas nekaawarat tusan wakerajaj. 21 Wíjajñkia ju nuñkanam iwiaaku pujakun aya Krístunak enentáimtakun pujajaj. Tura jákatniusha juí pujajnia nuna nañkaamas péñkeraiti. 22 Ju nuñkanam pujakun Uunt Jesusan takasminiaitjai. Nu asamtai tunatsuk achiktaj nékatsjai. 23 Wíjajñkia itiurchataiti mai achiktin. Jákatniuncha wakerajaj Krístujaj tsaniñkian pujustaj tusan. Wíjajñkia nu imiá péñkeraiti. 24 Túrasa atumin yáintaj tusan tuke ju nuñkanam iwiaaku pujusminiaitjai. 25 Kame tuke pujustatjai nékajaj. Núnisnak atumjaj pujakun Yus nekas enentáimtakrum nañkaamas waraakrum tuke kat-suñruk tusan yáintatjarme. 26 Nu asamtai wi atumjaj pujakui Jesukristu yumiñsarum shiir warastatrum.

27 Kristu chichame ti peñker asamtai atumsha aya péñkera nuke túratarum. Wi atumjaj pujaknasha tura yajá pujaknasha átum ti shiir túrarmena nuna antuk-tinian wakerajaj. Ashí shuar uwempratin chichaman nekaawar umirkarat tusarum chikichik enentáijaj kakaram ajastarum. 28 Atumí nemasrísha ishichkisha sapijmiamtikramkarajñ. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisañ atí tusa Yus túrait. 29 Krístunu asarum wáitsatniusha Yus anenma asa tsañkatramkaitrum. 30 Yus-Chicham pamparat tusar maimetek ti takáa asar wáitiaji. Wi nuik ti takas-maj nu nekamarme. Tura yamá tuke takaaj nusha ántarme.

Kristu péechach ajasmatai Yus ti uunt awajsamiayi

2 Kristu ikiantamkuisha, ni aneñkrattairj atsañ tamkuisha, ni Wakaní atumjaj pujakuisha,

anenkratniuitkiurmesha, waitnekratniuitkiurmesha² waramtikrustarum. Métekrak takastarum. Mai metek anenaitiarum. Yusa Wakanj atumí enentájn pujá asamtai chikichik enentáik enentáimsatarum.³ Átum wakeramuk túrawairap. Nankaamantu ajastaj tíirap. Antsu péechach ajasrum chíkich shuar atumjaj nankaamas péñker enentáimtusta.⁴ Aya níniak péñker átatna nunak shuar túrashti. Antsu chíkich shuar yáinminia nuna túrati.

⁵ Kristu Jesus enentáimpramia núnisrum enentáimpratarum.⁶ Niisha Yúsaitiat ju nunkanam winiak tuke Yusjaj métek átinian emettsuk⁷ antsu nuna ikiuak aents ajas péechach asa ashí aentsu takarjn ajasmiai. Tura aentsu ayashjn ayashimiak tura Yúsan umireak jákatniuncha surimiakchamiayi. Maa, imiá tunaarinnua áintsan krúsnum natsanmainium jakamiayi.⁹ Túramtai Yus nekas nankaamantu awajsamiayi. Ni náarjncha ashí paant awajsamiayi.¹⁰ Tuma asamtai ashí nayaimpiniam írrunna nusha, nunká írrunna nusha, tura iwiarsamusha Jesusa náarjn antukar tikishmatraratui.¹¹ Tura ashí shuar Jesukristu ashí akupin ajasman paant nekaawartatui. Nújajnkia Yus Apá kakarmarisha paant nekanattawai.

Yus-shuar kiritniunam keeák tsáapin awajeana áintsan áiniawai

¹² Nu asamtai, aneamu yatsuru, wi atumjaj pujaku umirtukmarmena nuna nankaamas yamaikia arant pujakuisha umirtuktarum. Iis, Yus atumí enentájn takaak ni shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajastarum Yus ti péñker awajtamsatniun wakera nu túrunati tusarum. Tura péechach enentáimprarum awajirminiaitjai tusarum aneara wekasatarum.

¹⁴ Ashí yajauch tunaitsuk tura jianaitsuk wekasatarum.¹⁵ Túrakrum makuumatsuk tunaajajinchu áatrume. Antsu Yusa uchirj áatrume. Ju nunkanmasha shuar imiá tunaan túrinjajsha máatrachu asarum kiritniunam ji keeá áintsan ketrum.¹⁶ iwiaaku pujustin chicham paant awajeakrum. Nújaj Kristu támatai atumjaj antran takascha asan ti shiir wararsattajrume.¹⁷ Winia takatrujaj Yus-shuar ajasakrumin wi jákatniuitkiuncha nújajsha warasaintjai. Atumsha wi waraajna ju nínisrumek warastarum tusan wakerajrume.¹⁸ Atumsha waraakrumin métek wararnaisatai.

Timiutéuncha Epaprutíiuncha Papru ujatkamiania nu

¹⁹ Ti Uuntrj Jesus wakerakujnkia Timiutéun íirmainiarat tusan ti warik akuptuktatjarme. Tura átum shiir pujamu ujateakui warastatjai.²⁰ Kame Timiutéu wijjaj métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarume.²¹ Chíkichka Kristu wakeramun iniaisar ní wakeramunak páchiniawai.²² Túrasha átumka Timiutéu tuke péñker túramu nékarme. Uchi ni aparjaj takaana áinis Yusa shiir chichame etserkatniun yáintkiai.²³ Winia itiurtukartjn nuna nekaan Timiutéu íir-

mainiarat tusan akuptuktatjarme.²⁴ Kame Kristu yáintkiui wíkisha wárik íimniaitjarme.

²⁵ Wi atsumaj nuna íirsati tusarum Epaprutítiu akupturkamarme. Wijjaj métek tsanin takasuiti. Tura métek wáitsaitji. Áunkesha akupkamnia enentáimjai.²⁶ Nii jaawai taman átum antukman nekáa, íirmaitniun ti wakerutmarme.²⁷ Maa, nekas ti janiñkiamai. Túrasha Yus nin waitnentramai. Kame winiasha wi ju wáitiakun nii jakamtai nu arant ti kuntuts pujuschatniun waitnentrurmai.²⁸ Tuma asamtai akuptuktinian wakera-jrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme.²⁹ Kristu yuminsarum ti shiir warasrum wáinkiatarum. Chíkich shuar niijaj métek péñker Yus-shuar ainia nusha shiir enentáimtustarum.³⁰ Kristu takatrn takaak ti janiñkiamai. Átum yáintkiachminia nuna winia yáintkiataj tusa pujus janiñkiamai.

Kristu nekaatin ashí nankaamas péñkeraiti

3 Ayu. Warastarum, yatsurtiram, ii Uuntrj Kristu ti péñker asamtai nuik áatramajrum nuna ataksha títiatjarme. Ataksha ujam yainmakminiaitkiuñkia wijjajnkia itiurchatchaiti atak enentáimtikratin.² Yajauch shuarjaj aneartarum. Nu shuar Muisais timia núnis tuke yamaisha tsupirnaktinaitrume tuiniawai.³ Antsu iikia ayash tsupirnakmajaj péñker átiniaitji tu enentáimtatsji. Iikia antsu ii wakanjaj Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji.⁴ Ju nunkanam írrunna nujaj waantu enentáimpramniaitkiuñkia ashí shuarjaj nankaamas wikia waantu enentáimtumaraintjai.⁵ Israer-shuar asan Muisais timia núnisan wi akiiniamtai uchu (8) tsawant nankaasmatai tsupirtukarmiayi. Israer-shuarnum Pinjamjn weejitjai. Winia aparsha nukursha mai Israer-shuar áiniakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tujintrin ármiayi. Tura Pariséu asan Kristu-shuarin ti kajerkan áintramjai.⁷ Ashí nujajnkia waantu enentáimtumauyajai. Antsu yamaikia Krístujajnkia penké ántar áiniawai tajai.⁸ Ashí enentáimpramnia ákuisha winia Úuntur Jesukristu shiir enentáimtustin nekas péñkeraiti. Nu asamtai Krístunu ajakun wi takusmaj nu muijmiai ajasmatai núnaka iniaismjai.⁹ Nuna túran Niijaj tsaniñkian pujajai. Tura akupkamu umirkatniujaj péñker ajaschaitjai antsu Krístun enentáimtakui Yus “péñkeraitme” túrutui.¹⁰ Tuma asamtai ashí nankaamas wakeraj nu júiti: Krístun péñker nekaan nekas enentáimtustinniasha tura ni iniantkimi kakarman takustinniasha wakerajai. Tura Niijaj métek ajastinian wakerakun ni wáitkiamunam tsaniñtinniasha tura Nii jakamia núnisan jákatniuncha wakerajai.¹¹ Túraknaka Krístujaj métek jakamunmayá nantaktiaj tusan wakerajai.

Papru kakaram ajasmiai Kristu wakeramun umiktin-ian

¹² Kame wakerukuitjia nuna mash umirkachuitjai. Kristujaj métek nekas péñker shuar ajaschaitjai. Túrasha Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaajai. ¹³ Yatsuru, wisha nuj jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. ¹⁴ Tura nuna umikmatai nayaimpiniam Jesukristujaj tsaniñkian shiir pujustinian Yus surustatui.

¹⁵ Ashí shuar Yusjaj katsuaru ájina nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikrampratarme. ¹⁶ Tura aneartarum. Naki pujutsuk jeajnia nujaj métek umirkatin pimpitsuk takastiniaitji. ¹⁷ Yatsuru, wisha tura chikichcha wijjaj métek péñker túrajnia nu wáinkuram atumsha núnisrumek túratarum. ¹⁸ Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsum jakamun mujjainiawai. ¹⁹ Tuma ásar emesratniunam akupnakartatui. Ni ayashí wakeramun, ni yusrja áintsan, tuke umirainiawai. Natsanmainian túruiniayat wararainiawai. Tura ju nuñkanmayanak enentáimtuiniawai. ²⁰ Antsu iikia nayaimpinmayá shuar asar ii Uuntri Jesukristu in uwemtikrampra asamtai nayaimpinmayá tatí túsar náka. ²¹ Nii taa, ii yajauch ayashin yapajjá ni ayashíjjaj métek ti shiir awajsattawai. Ashí uunt akupin ajas nu kakarmajaj túrutmattaji.

Kristujaj tsaniñkia wekáa asarum warastarum

4 Nu asamtai, aneamu yatsuru, ii Uuntri Kristujaj tsaniñkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

² Ewautiancha tura Séntikincha, ii Uuntri Kristu shuarj ásar, mai metek enentáimsarat tusan seajai. ³ Amincha, winia ajrú, nu nuwá yáinhta tusan seajme. Niisha wi iwiaaku chichaman étsereakui wijjaj métek takasarmái. Tura Krimintisha tura chikichcha wijjaj métek takasarmái. Nuna náarjn iwaaku átinium Yus átraiti.

⁴ Nu asamtai Uunt Jesusjaj tsaniñkia pujá asarum warastarum. Ataksha “warastarum” tájarne. ⁵ Uunt Jesus tátin ishichik ajasai. Tuma asamtai tsanaka enentái takakrum nu paant nekanati.

⁶ Itiurchat enentáimsatin atumjaj penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata. ⁷ Nuiñkia atumí enentáj ankant átinian, áentstikia penké nekaachminia nuna, Yus amastatui. Yus atumin ankant awajtamasa asa atumí enentájn tura atumí enentáimsamurjncha yajauch wayawajjn tusa shiir waitmaktatrumé Jesukristujaj tsaniñkiu asakrumin.

Ashí péñker ana nu enentáimsatarum

⁸ Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chíkich shiir anturkamnia ana nusha enentáimsatarum.

⁹ Wi unuiniarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumniñkia Yuska ankant átinian amastaj tusa pujurtamsattarme.

Jiripiusnumiá Yus-shuar Páprun kuítian akuptukarmia-nia nu

¹⁰ Ii Uuntri Kristu anea asarum winiasha ataksha enentáimturum asakrumin ti waraajai. Kame kajinmatrukmiarme tátsujai antsu kuítium atsakui yáintkiatin tujinkiamarme. ¹¹ Tura kuítian atsumakun tátsujai. Antsu wi takakjana nujajjn warastinian unuimiáruitjai. ¹² Kuítinchati pujustinia nuna nékajai tura ti nukap takustinia nunasha nékajai. Tsukamaknasha jéemarnasha, itiarar takustinniasha tura penké takutsuk pujustinniasha unuimiáruitjai. ¹³ Kristu ni kakarmarjn surakui ashí túramniaitjai. ¹⁴ Tuma ajn atumsha wi atsumamu akupturkarum ti péñker túramarme.

¹⁵ Jiripiusnumiá shuartiram, ju ti penker nékarme. Masetunia nuñkanam Yus-Chichaman etserumtai aya atumek kuit akupturkamiarme. Wi etserkamujaj atumí wakanjn yáinma asamtai yuminsarum akupturkamiarme. ¹⁶ Atumek wi Tisarúnikia nuñkanam atsumakun pujajsha kuit akupturkamiarme. ¹⁷ Aya kuit akupturkakrumin tu enentáimtsujai. Antsu nu kuit Yusaj kawentramkaku tusan wakerajrume. ¹⁸ Eprutíuiujaj akupturkamarum nujajsha atsumamaj nuna nankaamas tiaruncha wáinkiajai. Akupturkamarum nusha ti kuñkuin Yus susamua áinis ti shiir auyi. ¹⁹ Winia Yúrusha ti péñkeran núkap takakui. Atumsha Jesukristunu ajasu asarum Yus seamniaitrumé. Tura Yuska ti takakna nujaj ashí atsumarmena nuna suramsattarme. ²⁰ Ii Aparj Yus tuke shiir atí. Nuke atí.

Amikmaamu

²¹ Winia náarujsa tura Jesukristu náarjncha ashí Yus-shuar ainia nu chícham ujatruktrum. Niisha shiir pujusarti. Wi írutramusha núnisan shiir pujusarti tusa akupturmainiawai. ²² Tura ashí akupin Sésaraj pujuinia nuyá Yusna ajasaruka tura chíkich Yus-shuarsha shiir pujusarti tusa chichaman akupturmainiawai.

²³ Ii Uuntri Jesukristu atumniasha ti shiir yainmakarti. Nuke atí.

KURUSENAM

Kurusenmayá Yus-shuaran Papru áatramiania nu

1 Wi Pápruitjai. Yus wakerutak Jesukrístunun etserkat tusa akatra akupkamuitjai. Wisha ii yachj Timiutéujaj 2 ju papí áarar nuj Kuruse péprunam Kristu péñker umirkarum Yusna ajasuitrumna nu akuptaji. Yus ii Aparj atumin wáitnentaimiturma asa yainmakarti imiatkinchanum tuke shiir pujustinian.

Papru Yus-shuaran Yúsan áujtasmianis nu

3 Iisha atumin Yus áujtakur ii Uuntrj Jesukrístu Aparj Yus ashí tsawant yúmiñkijai. 4 Atumsha Jesukrístu ti shiir enentáimtamusha tura ashí Yus-shuar aneamusha antukji. 5 Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatatí tusarum nákarne. 6 Nu chicham ashí nuñkanam pampaakui shuara enentáin nereá áinis nusháa ajarar yamaikia péñker túrin áiniawai. Núnisañ atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai. 7 Nu chichaman Épapras ujatmakmarne. Niisha iijjaj métek takasu asamtai ti aneamuiti. Atumniasha Kristu takatrjñ ti shiir takartamsaiti. 8 Niisha átum Yus-shuar asarum mai anenai ajamun ujatmakmaji.

9 Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáimtaijijaj ashí Níiniun paant nekaatniun Yus jintinramat tusar seaji. 10 Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti péñker nekaak tusar seaji. 11 Yus ti kakaram asa ikiantamprat tusar seaji. Nujaj ashí itiurchat ákuisha páchitsuk ti shiir warasrum kat-suntrattarme. 12 Yus ni shuarjñ tsáapninia nuj ashí péñkeran susattawai. Tura incha nuj pachiiinkiatniun tsankratramka asakrin Yus Apa yumisamniaitrum. 13 Yus iwianchin nupetak íwianch akupeana nú kiritniunmayá uwemtikramar ni aneamu Uchirj akupeana nuj wearmakmaji. 14 Ni Uchirj krúsnum jaka ii tunaarjñ nijjar tsanjkurtamar uwemtikrampramaji.

Kristu jakamujaj Yusjaj nawamnaikiar shiir pujustin

15 Yus wáinkiachminiaitiat ni Uchirj akiiniamai tura ayashimkiamiayi. Túmaitiat ashí najanamua nuna yaunchu pujú asa ashí akupniuiti. 16 Niijjaj Yus ashí nayaimpiniam írrunna nunasha nuñká írrunna nunasha,

ashí wáiniaj nunasha núnisañ wáintsuj nunasha mashi najanamiayi. Nu arantcha ashí akupin ju nuñkanam írrunna nusha, nayaimpiniam írrunna nusha, iwianchnium írrunna nusha, ashí Niijjaj najanamua áiniak Nin umirkarti tusa najanamua áiniawai. 17 Ashí najanamua nuna yaunchu, Krístuka tuke pujuwiti. Ashí najanamua írrunna nuna emestsuk wáinniuiti. 18 Ashí Yus-shuar métekrak chikichik ayashtinia áinis enentáimkiumka nuna muuke Krístuiti. Tura nu ayashjñ ni iwiaakmarijjaj iwiaaku átinian súsaiti. Niisha ashí jakamunmayá nantakniujaj imiá nankaamantuiti. Nújajñkia ashí enentáimpramnia írrunna nunasha akupniuiti. 19 Yus ashí takamtsuk Kristuj shiir pujumiayi. 20 Núnisañ Yus Kristu krúsnum jakamujaj ashí nayaimpinmasha tura ju nuñkanmasha írrunna nuna Niijjaj nawamnaikiar shiir pujusarat tusa wakerukmiayi.

21 Atumsha nuik tunáa túrin asarum atumí enentáin Yusa nemasrj ámarne. Tuma asarum yajá wekaimiarme. Antsu Kristu, aentsu ayashjñ ayashimiak, krúsnum wáitias jakamujaj ii tunaarj asakármatai yamaikia Yusjaj nawamnaikiar shiir pujaji. Nujaj Kristu in péñker ajasuncha tunaan máatrachmancha tura sumamachuncha Yúsaj ejetamtatji. 23 Tuma asamtai Jesukrístu shiir enentáimtusrum kakaram ajasrum kat-suartiniaitrum. Tura uwempratin chicham antukuitrum nuyá kanakchatniuitrum. Ju uwempratin chichaman ashí nuñkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

24 Atumin wáitiaknasha ti shiir waraajai. Kristu ni shuarjñ nekas péñker awajsat tusa wáitiana nuj pachinkia asan waraajai. Ashí Yus-shuar Kristu ayashj áintsañ áiniakui Yus-shuaran yáinjtajtsan ayashrujaj wáitiakun shiir enentáimjai. 25 Atumin yáinjkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáinrintjai. 26 Yámankamtaiknumiá nekaachman Yus yamaikia ni shuarjñ paant awajsaiti. Nu chichamnasha ujakarai tusa winia akatar akuptukuiti. 27 Nu chichamsha júiti: Kristu atumí enentáin pujak Niijjaj métek ti shíiram awajtamsattawai. Nu imiá shiir chichamnum Israer-shuarchasha pachiiinainian Yus ashí ni shuarj nekawaarat tusa wakerimiayi.

28 Iisha Kristu étsereaji. Túrar ashí enentáimtikrar péñker nekaawarat tusar jintintiaiaijai. Nujaj Krístujaj tsanjkijar ashí péñker tsakarartatui. 29 Tuma asamtai Kristu ni kakarmarjñ tí surakui nekas kakaram takaajai.

2 Nekaatarum, yatsuru. Yus-shuaran yáíntaj tusan ti takaajai. Tura atumíncha, Rautiséanmaya shuar-nasha, tura ashí winia waitcha ainia nunasha yáíntaj tusan ti takaitjai. ² Ashí shiir enentáimtikratniun ti takaajai. Núnisan aneniarum chikichik enentáijjaj métekrak wekasatarum tusan wakerajrume. Nu arantcha, ashí Yusna ti penker nekaarum tuke kat-suṛuk tusan takaajai. Nujaj Kristu ti penker nekaattarme. Tura yaunchu nekaachman Yus yamá paant awajsaiti. Nuka Kristuít. Tura Nii nekaatin nekas shíiraiti. ³ Tura kakaram ajasam Kristu penker nekaam ashí shiir enentáimpramnia nusha tura ashí Yusna nekaamnia nusha nekaattarme. ⁴ Atumin chikich shuar niisháa chichamjaj shiir chichartamas anaṅkra-mawarajin tusan nuna tájarme. ⁵ Wi nuí atumjaj pu-jachkuncha nuí pujajna áintsanak enentáimtajrume. Tuma asan átum métek enentáimprarum tura kakaram ajasum Kristu nekas enentáimturumena nuna ísnaka shiir enentáimjai. ⁶ Nu asamtaí átum ii Uuntri Jesukristu nekas enentáimtusum Yus-shuar ajasmarmena núnisrum yamaisha Nii nekas enentáimtusum Niijjaj tsaniṅkrum ashí túratarum. Nu túrakum Nii enentáimtakum tuke tsakaki wéatrum. Tura te tariara wajasum Yusjaj kanakchattarme. Yus-Chicham núnisan etsernakmatai neka-marme. Tuma asarum Yus tuke yuminsarum, núnisan penker wekasatarum.

Kristujaj yamaram iwiaakma takakji

⁸ Aneartarum atumsha. Shuar aentsti enentáimmi-ajaj ashí ju nuṅkanmayan enentáimprar tura Kristun enentáimtutsuk niisháa chichaman áujtamainiak nekaschajaj anaṅkramataj tusa wakerutmainiawai.

⁹ Kristunam Yus ashí takamtsuk pjuwiti. ¹⁰ Túmakui atumsha Kristujaj tsaniṅkiu asarum ni iwiaakmarj takamtsuk takakuitrume. Kristusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti. ¹¹ Nu arant átum ayashniun tsupirnatskesha Kristu shuarj ajasakrumin ashí ayash wakeramun, tsupirkatniua áintsan, Kristu ajapamiayi. ¹² Tura atumsha Yus ni kakarmarjjaj Kristu jakan iniantkimia nu enentáimtusum imianmiarme. Túrarum Kristujaj métek iwianarmarme. Tura núnisrumek Kristujaj métek nantakmiarme. ¹³ Nuikkia átumsha tsupirnatsuk atumí tunaarij tuke akui atumí wakanjin jákauyarme. Tura yamaikia Jesukristujaj tsaniṅkiu asakrumin Yuska atumí tunaarij tsanṅkur yamaram iwiaakman suramsaitrume. ¹⁴ Tura ashí ii tumashrin sumamtikramatin amia nuna japiruiti. Kristu krúsnum jakamtaí ashí akupkamujaj sumamtikramamun tsanṅkurtampramijaj. ¹⁵ Núnisan Kristu krúsnum jaka, iwianchnium ashí akupin ainia nuna nupetak ashí íimiainaj iniatсарarmiayi.

Nayaimpiniam írunna nu enentáimtustarum

¹⁶ Akupkamunmaya Yus aṅkant awajtamsamtaí chikich shuar ame túramujaj yajauch enentáimturmarajin.

Yúamna nujaj, úmamna nujaj, uwitíncha, nantutíncha, tura tsawantíncha nampermam nujaj chikich shuar yajauch áujmatramkuisha ¿warí urukatin? ¹⁷ Nu nampernum Israer-shuar Kristu túrattana nuna nakumainiak túrin ármiayi. Tura Kristu taa imia Niṅki pujá samtai nakumkamuka ántrai. ¹⁸ Tura shuar “Péejchach ajasam Yus áujtsuk aya Yusa suntarij shiir awajsatniuiti” túramkuinṅkia anturkairap. Nu shuar mesekranam wáinkiamun áujmatenak ántar naṅkaamantu enentáimtumainiawai. Aya aentsti enentáimian chichainiawai. ¹⁹ Tuma ásar Kristujaj tsaniṅkiar wekainiatsui. Kristu ashí akupin asa ni shuarin Yúsna jintintia shiir tsakarat tusa penker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Kristujaj jaka asarum aya aentsti enentáimtai ikiukniuitrume. Nuikia ¿urukamtaí ju nuṅkanmaya ana nu tuke páchiarum? Nii tuinia nu umirkash-tiniati. ²¹ “Ju antinchatniuiti, tuiniawai. Ju yúashtiniati. Tura ju achikchatniuiti” tuiniawai. ²² Nusha ¿warí, takasam amuukashtatuak? Kame áyatik aents akupka-mu ániawai. ²³ Shuar nu akupkamu umiiniak Yúsna ni nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájaj tu enentáimtumainiawai. Túrasa ayash wakeramunka nupeteatsui.

3 Nuikia Kristujaj nantakin asarum nayaimpinmaya írunna nu wakeruktarum. Nuí Kristu pujawai Yusa untsuuri. ² Ju nuṅkanam ana nu enentáimtsuk aya nayaimpinmaya ana nu enentáimtustarum. ³ Atumsha Kristujaj tsaniṅkrum jakamarme. Tuma asarum Kristujaj tsaniṅkrum Yusjaj iwiaaku pujarme. ⁴ Kristukete ii iwiaakmarj. Nii nayaimpinmaya wantinkiuisha atumsha Niijjaj métek wantinkiattarme. Tura Niijjaj métek ti penker átatrum.

Yaunchu iwiaakmasha tura yamaram iwiaakmasha

⁵ Tuma samtaí ju nuṅkanmaya ana nu ajakratniua áintsarum iniaisatarum. Tsanirmatniusha, tunáa wakeruktíncha, tura takakna nujaj naṅkaamas wakeruktíncha ántar-yus tikishmatratniua áintsan samtaí iniaisatarum. ⁶ Shuar Yúsna umirtsuk aya nuna túrin ásarmatai Yus nin kajerak ti asutiáttawai. ⁷ Atumsha núnisrumek túriniuyarme. ⁸ Tura yamaikia jusha iniaisatarum: kajektíncha, yajauch wakeruktíncha, yajauch túratniusha, katsekmaktíncha, yajauch chicham chichastíncha, mash iniaisatarum. ⁹ Yus-shuar ajasum yaunchu enentáimtairam iniaisarmarme. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. ¹⁰ Yaunchu enentái, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna naṅkaamas Niijjaj métek shiir atí tusa. Túramtaí Yus ti penker nekaki wéaji. ¹¹ Kristuka ashí írunna nujaj naṅkaamas ashiyaiti. Niiniun pujurui. Tuma samtaí ashí ni shuarj enentáin pujá samtaí nusháa enen-

táimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarín ainia nusha tura ankant ainia nusha, Kristu ashí ni enentáin pujakuí nusháa enentáimtunairchatniuiti.

¹² Yus atumin anenmak Niiniu arti tusa achirmak-marme. Túrutma asamtai jujají shiir iwiarmampratniua áintsarum tuke túrin atarum: waitnenkartin, shiir awajkartin, péejchach átin, émtin áchatin, tura katsuntin átin. ¹³ Kristu atumí tunaarín tsaᅅkuramia núnisrumek nuamtak tsaᅅkúrnáiratarum. Chíkich yajauch awajtamkuisha shiir katsuntram yapajniaitsuk tsaᅅkúrnáiratarum. ¹⁴ Tura ashí nankaamas anenaitiarum. Túrakrumka chikichik ajasrum mash péᅅker túrat-tarme. ¹⁵ Kame chikichik ayashtinia áintsarum ajas-tarum tusa Yus ni shuarí ajasat tusa achirmakmarme. Tuma asamtai Yusa shiirí atumí enentáin pujurtamsati. Nujají Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárum tuke enentáijijají Yus yuminsarum shiir awajatarum. ¹⁷ Tura takaakmesha, chichaakmesha, kame ashí túramna nuka Jesukristu shiir awajataj tusam ni kakarmarjijajín túrata. Túrakum Kristujají Yus Apa yuminsata.

Yus-shuar túratniua nu

¹⁸ Nuwatiram, atumí aishri umirkatarum Uunt Yus nuna wakerakui. ¹⁹ Áishmantiram, atumí nuwé aneatarum. Atumí nuwejají kajernaikiairap. ²⁰ Uchitiram, ame apa nukusha tuke umirkatarum. Nu túrakrum Yus shiir enentáimtikstattarme. ²¹ Uchirtintiram, atumí uchirí ti kakantrairap. Ti kakanteamka uchisha ti kuntuts pujus péᅅker wekasatniun nakitchanpiash. Nu túrunawajín tusarum ántarum atumí uchirí kakantrairap. ²² Takarniutiram, atumí uuntri shiir umirkatarum. Ju nunkanmayá uuntri ajín aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke péᅅker takastiniaitrume. ²³ Ashí túramna nu asump enentáijijají takakmasta. Aya aentsuk yáintinia áintsachu antsu nayaimpinmayá Úuntrum yayá áitkiasrum takastarum. ²⁴ Ame Úuntrum Kristu asa nayaimpiniam ashí shiir takustinian tsaᅅkatramkattawai. ²⁵ Antsu tunáa túrin ni yajauch túramujají métek akinkiáttawai. Yus ashí áentsun métek iyawai.

4 Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk péᅅker iniatniaitrume.

² Yus áujkuram Nii yuminsarum asummiarum iniait-suk áujstarum. ³ Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir ankant etserkat tusarum áujtursatarum. ⁴ Tura wi paant etserkatniuitiaj núnisan etserkat tusarum áujtursatarum.

⁵ Yus-shuarhajají shiir túratarum Yus-Chichaman yajauch enentáimturarajín. Kakaram ajasrum tsawant ántarum iniaᅅkasairap. ⁶ Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachi Tíkikiu ashí wínian ujatmaktrume. Niisha wijají métek Yúsnan pimpitsuk ti péᅅker takasuiti. ⁸ Nu asamtai ii juí pujajnia nuna ujatmak ikiantamprarat tusan akuptajrume. ⁹ Núnisaᅅ ii aneamu yachi Unisemu niijají winiawai. Niisha atum wééaiti, tura Yusjají shiir wekaawai. Nu shuar ashí juí túrunamun ujatmaktatrume.

¹⁰ Aristarku wi sepunam tsanikia pujamur amikmaatmarme. Núnisaᅅ Markus, Pirnapí kaná yachia nu, amikmaatmawai. Niisha nuí jeamtai antukmarum núnisrum péᅅker wáinkiatarum. ¹¹ Justu Jesus náartin amikmaatmarme. Júchik áiniawai Rúmanmayá Israer-shuar winia Yúsnan etserkatin atutkaru ainia nu. Túmainiak ti shiir ayantikruiniawai. ¹² Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjají kakaᅅrum tuke shiir Yus wakera nu túrak tusa seatramprume. ¹³ Wissha Épapras atumin ti enentáimturman nékajai. Núnisaᅅ Rautiséanmayá shuarnasha tura Irapurisnumiá shuarnasha ti páchiniawai. ¹⁴ Rukas, aneamu tsuákratin, núnisaᅅ Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisaᅅ Nímpiassha tura ni jéᅅn irunainia nú Yus-shuarsha amikmaatruatarum. ¹⁶ Átum juí papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisaᅅ Rautiséanmayá papí támatai atumsha áujstarum. ¹⁷ Tura juí Arkipiui titiarum: "Ti Uuntri Jesus ni takatrín suramsa nu péᅅker umikta" tawai, titiarum.

¹⁸ Wi, Papru, winia uwejrújají júchiniak áatkun amikmaajrume. Sepunam pujajna juí enentáimturatarum. Yus shiir yainmakarti.

Nuke atí.

1 TISARÚNIKIANAM

Papru ni tsaniakmarijjaj Yus-shuaran áatramiania nu

¹ Wikia Pápruitjai. Wisha Serpanujaj tura Timiutéujaj Tisarúnikianmayá Yus-shuar ajasuitrumna nuna áatjarme. Atumsha Yus-shuar asarum Apa Yús-naitruma, tura Uunt Jesukrístunuitruma. Ii Aparj Yus, tura ii Uuntri Jesukrístu waitnentrama ásarmatai, ti shiir imiatkinchanum pujustarum, tu wakerajrume.

Tisarúnikianmayá shuar Yus nekas enentáimtusar umirkatniun jintintiarmanianu nu

²Iisha Yus áujkurkia atumniasha tuke enentáimtusar Yus shiir yumingsaji. ³Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Aparj Yus áujkur, nusha ashí enentáimsar áujtajrume. ⁴Yatsurú, Yus anenmarme. Anenma asa Winia arti tusa achirmakurmena nusha nékaji. ⁵Enentáimpratarum. Iisha Yúsaj Uwempratin Chicham atumin ujakmajnia nusha aya chíchamjajin tíchamji. Antsu nú arant, nu chicham nekasaiti tusar Yusa Wakanj kakarmarijjaj tímiaji. Tura átum péñker matsamsarat tusar atumjaj pujusar shiir iruntrar wekasarmiaji. Nusha paant nékarne.

⁶Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat ajn Yus-Chicham umikiurme. Tura wáitiatrumek Yusa Wakanj shiir enentáimtikramkui warasrum pujarme. ⁷Nu túrakrum ashí Masetúnia tura Akaya nunkanmayá Yus-shuarsha shiir wekasatin jintintiarne. ⁸Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunkanmayá shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui. ⁹Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji. ¹⁰Tura nuyasha Yusa Uchirj Jesus jakamunmayan Yus iniantkimia nu, nayaimpinimayá tatí tusarum átum nákamuncha ujatmainiaji. Iis, Jesus Nínkiti Yusa kajetáirj tsawantrj jeattana nuyá uwemtikrampratin.

Yus-chichaman paant ujakarmiania nu

² Atumsha nékarne, yatsurú, iisha ántar atumjaj jeachmaji. ²Antsu itiurchat wáinkiaitiatar arantut-suk shiir Uwempratin Chichaman ujakmajrume. Iis,

nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti péñker nékarne. ³Warí, iisha Yus-Chicham atumin ujakmiaj nu nekasauyi. Tura yajauch enentáimsan, anankatjarum tusan tíchamjarme. ⁴Antsu Yus in péñker enentaimturmas Uwempratin Chicham et-serkatarum tusa akatrampramajai. Tuma asamtai núnisrik étseraeji. Túrasha aya aents waramtiksatatit sar étsertsuji. Antsu Nínki Yúsak ii enentáin nekartamin asamtai, shiir enentáimtiksatatit sar túraji. ⁵Átumka nékarne, péñkesha shíirmach chichasan anankachjarme. Nuyasha, kuit achiktai tusar ántar chichaschamji. Núnaka Yus nékawai. ⁶Iisha Kristu akatramurjntji. Tuma asar ni kakarmarijjaj akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷Antsu uchi kuírchin ni nukurj péñker iis tsakatmana áintsarik iikia atumniaka shiir íismajrume. ⁸Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachajaj, atumín ti anea asari. ⁹Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarne. Iis, Yus-Chicham étserkur, tsawaisha káshisha takasmiaji. Nusha, akirkata, tíj tusar takakmasmiaji.

¹⁰Yatsurú, atumjaj pujumiaj nu iisha Yus wakerana nu túrimiaji, tura yajauch túrutsuk shiir wekasamiaji. Nujaj incha chikichkisha yajauch chichartamkatniusha atumiaji. Nuka atumsha nékarne tura nú arant Yus nékawai. ¹¹Tura atumniasha ankant ankant Yúsnum ikiakármajrumna nu nékarne. Tura uchin ni aparj átsankeana nútiksarik shiir enentáimtikramajrumna nusha nékarne. ¹²Tura Yúsaj shiir wekasatarum tímiajruma. Yus nankaamas uunt asa ashí akupeawai. Tura Yus-shuaraitrumna nuna, Winin pachiiinkiarat tusa, Yus untsurmarme. Yus untsurma asamtai Níiniuitruma. Ni-iniu asarum Yusa uchirja núnisrumek wekasatniuitruma.

¹³Yus-Chicham ii étserma antukrum, aya áentsnumi-anchaiti tímiarme. Yúsnumiáiti tímiarme. Nu tiniu asarum umirkarmarme. Kame nekas tárume. Ii étserjinia nu nekas Yusa chichamente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúminkiaji. ¹⁴Yatsurú, ju nekaatarum. Aya atumek wáitiatsruma. Ashí Jutía nunkanam Israer-shuar, ni shuarin ketiat,

Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuárin wáitkiarmainiawai. Nujají Jutía nunkanmayá Yus-shuarajají métekrak ajasurme. ¹⁵ Niisha Israer-shuaraitiatan Yus-Chichaman etserin armia nuna nuamtaketiat máawarmiayi. Tura nú weeák Uunt Jesusnasha máawarmiayi. Tura incha áá jjiiki akuptamkarmiaji. Maaj, niisha Yúsan shiir enentáimtikiaiainsui. Tura núnisan ashí áentsun kajerainiawai. ¹⁶ Warí, Israer-shuarcha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nujajinikia nankaamas yamaikia túrawarai. Pai, túrasha yamaikia Yusa kajetairijí imiá tsumají ana nuj pujusarai.

Papru ataksha Tisarúnikianam irautajtsa wakerimiania nu

¹⁷ Iisha, yatsuru, ishichik tsawant atumijya kanakir jeachat pujayatrik, atumjajisha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji. ¹⁸ Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji. ¹⁹ Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesusukrístu tátintri shiir enentáimsar nákaaji. Nii támatái imiá warastatji. Atumin Yus-shuar awajsa asar, Nii támatái atumsha iijjají Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

³ Iisha ataksha atumin ístaitсар ti wakerimji. Tura tujintiatur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristují Uwempratin Chicham etsermiaj nuj, Timiutéuka iijjají métek takasuiti. Tuma asa niisha Yusa takatrin takáa asa atumniasha Yusají kakartarum tura marti tusar akupkamji. ³ Tura nú arant, itiurchatan wáiniuk iniaisarajin tusa ikiakátmararti tusar Timiutéu akupkamji. Yatsuru, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itiurchatnum pujarme, Yus-Chicham umirka asarum. ⁴ Iimiatarum, atumjají nuik tuke pujumjinia nuj “iisha wáitsartatji” tíchamkajrum. Iis, túrunachaik. Nuka nékarme. ⁵ Tura atumin íwianch tunaanum ajunmarchariash tusan, wisha kúntuts enentáimsamijajai. Tura ántar takaschajiash tu enentáimsamijajai. Tuma asamtai nekaataj tusan ti wakerakun, wisha ti nukap tsawant nákaschamijajai. Antsu wárik Timiutéun akupkamijajai. Yúsají péñkerash wekainia tusan, “nu inintrusam ikuuuta” timiajai.

⁶ Tura yamaikia Timiutéu Tisarúnikianmayá waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitсар wakerajnia núnsrumek atumsha incha írmaítai tusarum wakeramuncha Timiutéu ujatmaji. ⁷ Tuma asamtai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸ Atumsha Yúsají tariara weká asakrumin, shuar jaa

pénker ajas enentáí chinkiana áintsarik enentáimji. ⁹ Yus pénker umirka asakrumin, iisha shiir waraaji. Warasu asar ii Yusri ti yúminjiaji. ¹⁰ Incha Yus akuptamkurninikia atumijn tímiajaik jeartiai tusar wakeraji. Túrar Yusna nekaatin mash nékatsrum nu jintintiatái tusar tuke ti seaji.

¹¹ Atumijn weri ístinian ii Aparí Yussha tura ii Uuntri Jesukrístusha in yáinmaktái tusar wakeraji. ¹² Atumin ii aneajnia núnisan Yus atumniasha mai anenai ajatniun tura chikichcha aneastinian enentáimtikramprartí. Tura nú nukap anekrattain Yus amasartí tusar wakeraji. ¹³ Yus ikiakátmakui átum tunáa túrutsuk Yus umirkarum wekasatarum tusar ii Aparí Yus seaji. Ii Uuntri Jesus Níniurijjají winiak pénker wekaarmin tati tusar taji.

Pénker túratniun Yus wakerana nu

⁴ Iikia Uunt Jesus akupkamuitji. Tuma asar nu kakarmajají atumniasha ju túratarum tusan akupeajrume. Atumsha iwiaaku pujarmena nuj Yus shiir waramtiksataram tura tuke pénker túrukum wetarum tusar seajrume. Iisha nuik atumin unuiniarmajrumna nútiksarmek túratarum. ² Uunt Jesusa akupeamurijjají tura nu kakarmajají atumniasha nuik unuiniarmajrumna nu átumka nékarme. ³ Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”. ⁴ Yus-shuarcha ainia nu, Yúsan nékainiachu ásar, aya niniki enentáimtumasar aya ni ayashí wakeramunak umiktinian wakeruiniak nuwan enentáimtuiniawai. Atumsha núnsrumek túrawairap. Antsu atumsha atumí nuarí pénker enentáimtusrum shiir aneasrum ayastarum. ⁶ Nú arant, amesha ame yatsum anankam ni nuarí yajauch awajtusaip. Nu túrakrumninkia ii tímiajrumna nútiksaj Uunt Yus ti kakaram asutiámawartatui. ⁷ Warí, Yus incha pénkercha yajauch túratarum turamchaitji. Antsu aya pénkerak túratarum turamji. ⁸ Tuma asamtai shuar ju chichaman nakitiakka áentsun nakitiatsui, antsu Yúsan nakitraití. Tura nu Yussha ni Wakanin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niniki Yus atumin mai anenai ajatniun jintinramawarmatai nékarme. ¹⁰ Iis nútiksarmek aneniatsrumek ashí Masetúnianam matsatainia nujají. Túrasha, yatsuru, atumí anekrattairí nú nukap ajasti tusan, seajrume. ¹¹ Yamaikia tímiaj nútiksarmek, yayauchin túruinia nuj wekatsuk, chikich shuarna pachittsuk, atumí takatrin shiir ankant pujusrum atumí uwejeajin takakmá pujutarum. ¹² Átum táasajrum tusan tájarme. Túrakrumninkia atumniasha chikich shuar pénker enentáimturmasartatui.

Kristu tátintri

¹³ Yatsuru, Yus-shuarcha ni shuarí jakamtai “atakka wáinkiashtatjai” tusa ti kúntuts enentáimainiawai. Tuma asamtai atumsha nútiksarmek kúntuts enentáim-

saj̄rum tusan juna tájarme. Jákaru ainia nu urukawartinkit paant nekaatarum. ¹⁴ Jesus jákayat nantakchamkia. Núnisañ Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. ¹⁵ Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka iki-uakur émkištati. ¹⁶ Antsu Yus akupeakui, Yusa suntarí uuntri untsumkui tura Yusa kachurj̄n umpuarmatai Uunt Jesukrístu untsumuk Yus pujamunmayā taratawai. Nuiñkia Krístunu ajarar jákaru áiniana nu iwiarsumunmayā nantakiartatui emka. ¹⁷ Tura nuyá iisha Yus-shuar tuke iwiaaku pujajnia nu Krístujaj̄ yurañminiam ajapén iñkiunaikiartatji. Nuní ashí nayaimpiniam ii Uuntri Jesukrístujaj̄ tuke iwiaaku pujusartatji. ¹⁸ Tuma asamtai ju shiir chicham atumin ujakjana jujaj̄ mai ikiakánai ajatarum.

5 Túrasha, yatsuru, ni tátintri waritj̄ tura warí tsawantaj̄, nuka áatratin atsumatsrume. ² Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisañ nákatsuk pujuiniaj̄ Uunt Kristu tsawantri jeattawai. ³ Ashí shuar “Pai, yamaikia ti nekas shiir péñker pujuiniaj̄” tu matsatainiaj̄, aya aneachma nuñka mesertin tsawant jeattawai. Nuwā ajamtin aya aneachma jatema áintsañ, nékachmanum átatui. Túmakui pisartin peñké atsuttawai. ⁴ Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsañ tarutrámashatui. ⁵ Enta, átumka tsáapninium wekáa asarum Yus-shuairmeka nékairume. Iikia kiritniumiñchuitji. ⁶ Nu tuma asar, chíkich uruka núnisrik, ii enentájn kanartinia núnisrik “Warí, winia itiurtawa” tíchami. Antsu naka enentáimsar anearmi. ⁷ Iis, kashi kanarchatniukait. Tura nampeena nu kashi nampeenawai. ⁸ Túrasha iikia shiir tsáapninium wekainiaj nuka naka enentáimprar tuke nampetsuk pujustiniatji. Suntar ni nemasrj̄ anañkruawaj̄n tusa anear wekasatniuiti. Tura iisha núnisrik íwianch yajauch awajtamaj̄ tusar anearmi. Yus enentáimtusar aneetniuitji. Tura núnisrik iisha, ju nuñkanmayā uwemprar Yúsaj̄ tuke pujustatji, tu enentáimprar wetái. ⁹ Páantchakait. “Jinium wéchatniuitrume” Yus incha túramji. Antsu ii Uuntri Jesukrístujaj̄ uwempratniun tsan̄katramkaitji. ¹⁰ Niijjaj̄ métekrak iwiaaku ami tusa Jesukrístu in jarutramkamiaji. Nu tuma asamtai iisha ii ayashij̄aj̄ iwiaaku pujakrishá Niijjaj̄ iwiaakji, tura ii

ayashij̄aj̄ jáakrishá Niijjaj̄ tuke iwiaakji. ¹¹ Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjaj̄ pujuinia nú shuar Yúsnan takakmainiakui shiir enentáimtustarum. Jintintramuk chichartamainiakui umirkatarum. ¹³ Yúsnan takainia ásarmatai ti péñker enentáimtusrum aneestarum. Tura yajauch awajnaitsuk ti shiir nawamnaikiarum matsamsatarum. ¹⁴ Tura junasha seajrume, yatsuru. Takastinian nakitiana nusha chicharkatarum. Tura yawēna nusha ataksha enentáimtikrarum ikiakártarum. Kakarmachu ana nusha yáñtarum. Tura ashí shuarjaj̄ kajetsuk katsuntrarum wekasatarum.

¹⁵ Aneartarum, yatsuru. Chíkich yajauch túrutmamtai amesha nútiksamēk yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nuñkanmasha ashí shuarsha nútiksarmek túratarum. ¹⁶ Tuke shiir warasrum pujustarum. ¹⁷ Tuke tsawant iniaitsuk Yus áuj̄satarum. ¹⁸ Péñker pujakmesha, itiurchat pujakmesha ashí warí wáiniam nuñsha Yus shiir yumisatarum. Kristu Jesusaj̄ Yus-shuar ajasutiram nu túratniun Yus wakerawai.

¹⁹ Ji ikiajniaktinia núnisañ Yusa Wakaní enentáimin keana nuka tunaajaj̄ téenmamtikiarum ikiajniakairap.

²⁰ Yus jintintrar akupkamu asa péñker chichaman etserainia nu nakitirairap.

²¹ Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. ²² Ashí yajauch ana nuyāñka kanaktiarum.

²³ Yuska, imiatkinchanum wekasatin amaana nu, atumin takamtsuk shiir awajtamartí. Tura ii Uuntri Jesukrístu táatsaj̄n, atumí wakaní atumí enentaj̄ tura atumí ayashj̄sha mash métek tunaajaj̄in chu awajtam-sati. ²⁴ Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵ Ashí yatsurtiram winiasha Yus áuj̄tursatarum.

²⁶ Ashí Yus-shuar árum nu, amikmaaniatarum. ²⁷ Winia Uuntru Jesukrístu chichamejaj̄ juna tájarme. Ju papí ashí Yus-shuar antukarti tusarum ashí iruntramunam áuj̄satarum. ²⁸ Ii Uuntri Jesukrístu atumin yáinmákartí. Nu atí.

2 TISARÚNIKIANAM

Papru ni tsaniakmarijjaj Yus-shuaran áatramiania nu

1 Wikia Pápruitjai. Wisha Serpanujaj tura Timiutéujaj iruntran atumin Tisarúnikianmaya Yus-shuar árumna nuna ju papin áatjarne. Atumsha ii Aparj Yusna tura Uunt Jesukristunu ajasuitrume. ² Tuma asakrumin ii Aparj Yus tura ii Uuntri Jesukristusha waitnentra ma áarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsurú, átum péñker matsatu asakrumin iisha Yus tuke yúmiñkijai. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yumiñsatniuitji. ⁴ Átum Yus-shuar asakrumin chíkich shuar atumin yajauch awajtamainiawai. Tura itirchat wainiu asarum ti wáitiarme. Nu tuma aijn átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. ⁵ “Yusa akupeamurjn pachiinkiamniaitrume” Yus túramprume. Nuñ pachiinkiatat tau asarum ju nuñkanam wáitiarme. Tura wáitiakrumsha nuna nañkaamas iwiarnaruitrume nuñ pachiinkiatin. Kame nújajñkia Yus atumin achirmak péñker túrait, nuka páantaiti. ⁶ Núnisan atumin wáitkiarmainia nunasha Yus tímiatrusañ wáitkiasartincha nekas péñkeraiti. ⁷ Tura wáitiarmena nusha Yus íijjajsha ayantikramprartin péñkeraiti. Ii Uuntri Jesukristu ji keana ímianisan kakaram suntaríjjaj nayaimpinmaya tara wantinkiamtai, nu tsawantaj Yus ayampratniun suramsartatji. ⁸ Tura nú tsawantajsha Yúsán nékainiatsna núnaka ii Uuntri Jesukristu ti asutiátajtsa tátatui. ⁹ Taa, nincha menkakatiunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nuñ akupeajrume, átum winia umirtukcha asakrumin” nin tiartatui. ¹⁰ Kame Uunt Jesukristu tátin tsawantri jeamtai, ni shuarj, ni enentáj péñker awajsarú áinia nu, ni náarjn shiir pachisartatui. Tura Yúsán umikiaru ásar, ti shiir enentáimsar Jesukristun íisartatui. Ii ujakmajrumna nu antukrum umirka asarum atumsha nuñ pachiinkiatarme. ¹¹ Nu tuma asamtai ii Yusrjn atumin tuke áujtajrume. Yus atumin achirmakuitrume. Nuñkia Yuska atumí enentájn takas Nii wakera nujaj métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusum péñker túratin wakerarme. Tura wakerarmena nu umiktin Yuska ni kakar-

maríjjaj yáintí, tu áujtaji. ¹² Átum péñker wekasa asakrumin chíkich shuarsha ii Uuntri Jesukristu náarjn nañkaamantu enentáimtusartatui. Nusha auka ii Yusrj tura ii Uuntri Jesukristu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

Tuke Tunaarintin wantinkiatana nu

2 Tura, yatsuru, ii Uuntri Jesukristu tátatna nuna tura Níjjaj inkiunaiktatjinia nunasha ujaktinian wakerajrume. ² Chíkich shuar anañkramawar “Uunt Jesukristu tsawantri jeayi” tu ujatmaktaj tusar wakeruiniawai. “Íimiarmaj nujaj nékajai” turamainiakui sha, “chícham étserman antukmaj nujaj nékajai” turamainiakui sha, tura “Papru papí áarmarj nuna takui nékajai” turamainiakui sha, páchim enentáimprairap. Tura sapijmiakairap tusan seajrume. ³ Peñké anañnawairap. Nekaatarum. Nu tsawant jeatsajñ Yúsnumiã kanaktin átatui. Tura nú arant, Tuke Tunaarintin, emesnartatna nu wantinkiatawai. ⁴ Niisha aya wíniak enentáimtusar tusa wakerak, ántar-yusnasha tura nekas Yús-nasha shuar tikishmatrarajñ tusa ti nakitrattawai. Niñki ti nañkaamantu enentáimtusum, Yusa nuke ajas, Uunt Yusa Jeeñ wayáã pujustatui. “Júiti Yus” shuar turutiarat tusa mash túrittawai. ⁵ Yatsurtiram, wi atumjaj pujakun nuna ashí ujakmajrume. ¿Nuka kajinmakniurmek? ⁶ Yámaikikia, ni tsawantri jeatsajñ, Tuke Tunaarintin wantinkiajn tusa surimia nu nékarme. ⁷ Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. ⁸ Nuñkia nu Tuke Tunaarintin wantinkiatawai. Tura Uunt Jesus ni wenejaj umpuú aun máattawai. Tara ni wincharíjjaj nuna amuktatui. ⁹ Nu Tuke Tunaarintin, iwianchi uuntri Satanás akupkam tátatui. Ni kakarmarj iniakmastaj tusa, aentsti túrachminian túrak anañkawartatui. ¹⁰ Jinium wémin ainia nú shuaran ashí tunáa ana nujaj anañkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai. ¹¹ Iis, nekas ana nuna nakitia áarmatai, ti anañmamawar wait-chichaman umirkarat tusa Yuska tsañkatkattawai. ¹² Warí, niisha ni tunaarjn wararainiak, nekas ana nuna nakitraru áarmatai, Yuska “jinium wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusrj yumíñsaji. Átum nekas ana nuka umikiurme. Tuma asakrumin Yusa

Wakaní atumí enentáin péñker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume. ¹⁴ Nu túrunat tusa Yus wakerutmarme. Krístujaj Uwempratin Chicham ii ujakjinia nujaj Yus untsurmakmarme. II Uuntrj Jesukrístu ti péñker pujana nuj pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjaj katsuqartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. ¹⁶ Ii Uuntrj Jesukrístusha tura ii Aparj Yussha ti péñker ásar incha anenmatsjik. Tura waitnentrama ásar incha shiir enentáimtikramji. Tura nú nankaamas ii tuke péñker pujustinian ikiurtamsaitji. ¹⁷ Nu tuma asamtai, péñker chichastarum tusa, tura péñker takastarum tusa Jesukrístuka shiir enentáimtikramar ikiakátmarartí.

Papru “áujtursatarum” tímiania nu

3 Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nuñkanam wakerukartí tusarum Yus seatarum. ² Tura yajauch shuar, péñker ana nuna ti nakitiainia nu, incha yajauch awajtam-sachartí tusarum Yus áujkartustarum. Kame chíkich aents Yúsan umirkacharu áiniawai. ³ Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anañkramataj takui kíishturmaktatrume. ⁴ Kame Yus atumin yainmaktatrume, taji. Ii tájinya nu yamá umíarme. Tura tuke umirkattarme. Nusha nekaar shiir enentáimji. ⁵ Uunt Yus yainmakartí ni aneñkrattairin nekaatniun. Krístu itiurchatan katsuntramia núnisan atumniasha katsuntratniun Yus yainmaktí.

Takastiniaitji

⁶ Yatsurtiram, antuktarum. Ii Uuntrj Jesukrístu chichamejaj ju taji: “Nuyá Yus-shuar wi jintinramun nakitiak aya wékana nu ikiuktiarum.” ⁷ Ii túrajnia núnisrumek túratin nékarme. Júiti: atumjaj pujusmaj nuj tuke takakmasmaji. Atumí yurumkarj iisha akik-makar yurummiaji. Atumjaj itiurchat áchatí tusar tsawajsha káshisha tuke takakmasmaji. ⁹ Kame iisha, Krístu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamaji. ¹⁰ Warí, atumjaj pujumaj nuj “Takastinian nakitiana nuka yurumáshti” tíchamkaj. ¹¹ Iis, atumjiniá weeá, náñkamas enentáimainiak tura náñkamas túruiniak péñké takatsuk pujuiniawai, túramainiaji. ¹² Nú shuáran ii Uuntrj Jesukrístu chichamejaj “Tákamtak shiir takakmasartí” taji.

¹³ Yatsurtiram, yawetsuk shiir túratarum. ¹⁴ Ju papiniun ii tájinya nuna, shuar umiktinian nakitiakuñkia “umichuiti” tákuram, ni natsarat tusarum ikiuktiarum. ¹⁵ Túrasha “Yus-shuara nemasrinti” tiip. Áyatik jintintra-ta, tura Yúsaj enentáimtikrata, ame nekas yatsumea áitkiasmek.

Papru aujsua ikiuamu

¹⁶ Uunt Yuska, imiatkichu enentái susamniaiti. Jú Yus, itiurchatnum pujarminiñ atumin tuke imiatkichu enentáimtikramsarti. Uunt Yuska atumin pujurtamsarti, taji.

¹⁷ Ju wi Papru juna aajai. Wi papin akupeaj nuj júnisnak winia náarun áaran apujeajai, wíniaiti tusan. ¹⁸ Ii Uuntrj Jesukrístu atumin ashí yainmakarat tusan wakerajrume. Nu atí.

1 TIMIUTÉUN

1 Wi Papru Jesukrístu akatramurintjai. In uwemtikkiartin Yussa tura ii Uuntri Jesukrístusha winia akuptuku ániawai. Jesukrístujaj métek ti shiir ajastai tusar náka. ² Timiutéu, ju papin áteajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukrístusha ti anenma ásar waitnentrainiak imiatkinchanum ti shiir pujustinian yainmakarti.

Wait chichamjaj anearta

³ Masetúnia nuñkanam wéakun “Ipisiu péprunam pujuuta” timiaj núnisnak tájame. Shuar nuñ waitchichaman jintin ainia nu suritkiarta. ⁴ Niisha Israer-shuara weatrin áujmatsamunak tura ni weatrin naari ti untsurí irurtinniak Yus-Chichamjaj nañkaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusa Nin shiir umirkatniun yáinmatsji. Tuma asamtai nusha suritkiatá.

⁵ Yus-shuar tuke enentáijijaj Yúsana shiir enentáimtusar tura tunáa túrutsuk aya péñkera nuna wakerukar aneñkartin ajastin ániawai. Núnisana péñker ajasat tusar Yus-Chicham étsereaji. ⁶ Chíkich shuar juna iniaisar ántar chichaman áujmatainiawai. ⁷ Yúsana nékachiat “jintinniuitjai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji.

⁹ Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsasha tura ashí Yúsancha nakitiainia nunasha, aparin mánniasha, nukurin mánniasha, kame mañkartinniasha, ¹⁰ nuwancha tura áishmanasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai. ¹¹ Núnisana tawai ti shiir uwempratin chicham Yus suramsamajnia nu. Nu chichamnaka etserkatniun Yus péñker asa tsañkatrukuiti.

Yus waitnenkartin asamtai Papru yumisamiayi

¹² Ii Uuntri Jesukrístu shiir enentáimturu asa Níiniun etserturkat tusa kakarman surusuiti. Túruta asamtai yúmiñkijaj. ¹³ Wi Yúsana imiá yajauch chicharniuyajaj. Yus-shuarnasha áintrarmiajaj. Yusnasha katsekniuyajaj. Túrin aijn Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu

enentáimchauyajaj. ¹⁴ Tura ii Uuntri Jesukrístu ti nekas waitnentrurmiayi. Tura Jesukrístujaj tsaniñkia pujakui Yus nekas enentáimtustinniasha tura aneñkartin ajastinniasha surusuiti.

¹⁵ Ju chicham ti nekasaiti. Tunáa shuaran uwemtikrataj tusa Jesukrístu ju nuñkanam taramiayi. Nunasha ashí shuar nekaatin ániawai. Tura wikia ashí shuarjaj nañkaamas tunáan túriniaitjai. ¹⁶ Ti tunáa aijn Jesukrístu ti aneñkartin ana nu paant nekanati tusa Yus winia waitnentrurmiayi Tuma asamtai chíkich shuar, wijijaj métek, Yúsana nekas enentáimtusar Niijijaj tuke iwiaaku pujusartatui. ¹⁷ Yus tuke jacha asa tuke iniaitsuk akupniuiti. Wáinchataitiat imiá nañkaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisana tuke atí.

¹⁸ Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútiksam yamaikia kakaram ajastá. Nii timia enentáimsam suntara áintsam Yúsana kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam aneamam túrata. ¹⁹ Chíkich shuar tunaajaj anearcharu ásar Yúsana ikiukiarmaj. ²⁰ Iminíusha tura Arejántrusha núnisana Yúsana ikiukiarmatai uunt iwianchnium surukarmajaj. Nuñjaj Yúsana ti yajauch chicharsacharat tusan túraitjai.

Yus áujsatin

2 Wátsek, emka seajrume Yus áujeakum Yus yumisam ashí shuar yaiñkiat tusam áujtusarta.

² Imiatkinchanum pujusar Yusjajsha tura áentsjajsha shiir túratai tusar tura ashí akupin ainia nusha péñker akupkarat tusar Yus áujtustiniatjai. ³ Áitkiasar seatin péñker asamtai, uwemtikramajnia nú Yus wakerawai. ⁴ Ashí shuar nekas chichaman nekaawar uwemprarat tusar wakerawai Yus. ⁵ Aya chikichik Yus awai. Tura Jesukrístu aents ajas Yusjaj áentsun nawamnaimtikartiniatjai. ⁶ Ashí shuara tunaarjin akimatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuaranum etsernaktiniuyi. ⁷ Nuna túratniun Yus winia akatar akuptukuiti. Israer-shuar-cha nekas chichaman enentáimtusarti tusa Yus akup- tukmiayi. Krístunu asan wáitrutsuk nekas tajaj.

⁸ Nu asamtai áishmañkka kajetsuk yajauch tunaitsuk antsu péñker enentáijijaj uweje takuiniar Yúsana áujsar- ti. ⁹ Núnisana núwaka iwiarmamuk nekasmiancha péñker enentáijijaj entsararti. Chíkich shuar nu nuwán iis temashmarmarjinch, sháukrincha, kurimkiamuncha, iwiarmampramurjinch núnaka enentáimtutsuk antsu

ni péñker túrunamun enentáimtusarti. Núnisañ áchatniukait nuwá Yús-shuar ainia nujaj. Ni péñker túramujaj nekas shiir awajmamsashtinkiait. ¹¹ Núwaka takamtak pujusar umiiniak unuimiararti. ¹² Nuwanka ashí iruntramunam unuiniartinniasha tura ni áishrin akupkatniuncha suritijaj. Antsu takamtak pujustiniaiti. ¹³ Yus emka áishmankan Atangkan najanamiayi. Nuyá nuwan Épan najanamiayi. ¹⁴ Tura Yus timian umirkach Atangka anagnachmiayi. Antsu Épa anagna asa tunaan túramiayi. ¹⁵ Túmaitiat jurertin asa, emesnartinniumiá uwempraiti. Tura Yúsán nekas enentáimtak anekartiniaitiuk tura esetar enentáimiuk péñker wekasatniuiti.

Yus-shuaran wáinin

3 Shuar Yus-shuaran wáinkiatniun wakerakka péñker takatan achikiuiti. Nuka nekasaiti. ² Tura Yus-shuaran wáinin ajastinian wakerakka chíkich shuar nin yajauch áujmattsachmin átiniait. Nuwá apatka áchatniuiti. Niisha péñker esetar enentáimin naka wekasatniuiti. Íraran ni jeen ti shiir itiaatniuiti. Péñker jintinkratin átiniait. ³ Nampechusha tura suiir enentáimtichusha átiniait. Aya kuítian ikiaunkatniun enentáimtuschatniuiti. Antsu tsangka átiniait. Kajechusha átiniait. Chikichnancha wakerutkashtiniaiti. ⁴ Ni shuarin shiir akupeakui ni uchirísha umin tura shiir awajkartin ártiniait. ⁵ Kame ni shuarin akupkachminiaitkiunka žitiurak Yus-shuaran wáinkiat? ⁶ Yus-shuaran wáinniuka yama Yus-shuar ajasu áchatniuiti. Túmaitkiunka ti nankaamantu enentáimtumak iwianchjaj métek tunaan túrak sumamattawai. ⁷ Yus-shuarchasha nin shiir enentáimtustin ániawai. Núnischaitkiuinkia nin yajauch chicharainiakui íwianch wárik tunaanum ajuartatui.

Yus-shuaran yain

⁸ Núnisañ Yus-shuaran yaincha péñker asamtai ashí shuar nin shiir enentáimtustin ániawai. Nii tana nuna tímatrusañ umin átiniait. Nampechu átiniait. Aya kuítian ikiaunkatniun enentáimtuschatniuiti. ⁹ Yúsán ti péñker nekaatniuiti. Tura esetar enentáimsatniuiti. ¹⁰ Emka péñker íistiniait nuyá péñker wekaakka Yus-shuaran yain átiniait. ¹¹ Nuwasha péñker asamtai ashí shuarsha nin shiir enentáimtustin ániawai. Tsanumni-uchu antsu esetar enentáimiar nii chichaa ímatrusañ umin átiniait. ¹² Yus-shuaran yainkia nuwan apatkachu átiniait. Tura ni uchiríncha ni shuaríncha ashí shiir akupin átiniait. ¹³ Yus-shuaran yayak nekas péñker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

Yusna ana nu imiá nankaamas péñkeraiti

¹⁴ Wárik íitniun wakerajme. Túmaitiatnak sétaknasha Yus-shuarjaj takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. ¹⁶ Maa, imiá neka-

saiti, Yus iwiainturmakma ashí nankaamas ti péñkeraiti. Tura júiti:

Yuska aents ajas jú nuñkanam paant wantinkiamiayi. Yus Wakancha "ti shiiraiti" Nin tímiayi. Yusa suntarísha Nin wáinkiarmaiayi. Ashí nuñkanam nu etsernakmaiayi. Túramtai ashí nuñkanmayá shuar umirkarmaiayi. Tura nayaimpiniam waketkimiayi.

Amuukatin tsawantin

4 Yusa Wakanj ti paant tawai, amuukatin tsawant jeakui untsurj aents Yus enentáimtustinian ini-aisar antsu yajauch wakanin nemarsar íwianch jintíamun anturkartatui. ² Yajauch shuaran anturkartatui. Nu shuar ni enentáj narúa áinin ásar ni tunáa túramun péñké enentáimtichu ániawai. Tuma asa shiir chichainiyatāñ wáitrin ániawai. ³ Nu shuar nuatnaikiatniun suritiainiawai. Núnisañ chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsán yumisnar páchitsuk yuámin ániawai. ⁴ Ashí Yus najanamu péñker asamtai nakittsuk antsu Yusan yumisnar yúatniuiti. ⁵ Yus-Chicham tana nújajisha tura yuiniak Yúsán yuminkias áusamujaj ashí péñker ajasuiti.

Jesukristu péñker takarín

⁶ Wi tájamna nu chíkich Yus-shuar jintintiakmeka Jesukristu péñker takarín átatme. Tura ashí Yus-Chicham péñker jintíamu unuimiaru asam nujaj kakaram ajastatme. ⁷ Antar chichamsha tura netse chichamsha enentáimtutsuk nekas Yusna ana nu túratin kakaram ajasta. ⁸ Kame ayash kakaram awajsatniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái jú nuñkanmasha yáinmaji tura ukunmasha Yusjaj pujustin asakrin nankaamas péñkeraiti. ⁹ Nu imiá nekas asamtai ashí shuar nuna enentáimtustiniaiti. ¹⁰ Nekas iwiaaku Yus ashí shuaran uwentikramniaiti, tura ashí Nin enentáimtuinia nú shuaran nekas uwentikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintiakum akupkatniuitme. ¹² Ti úntchaitkiumnisha nakitrampraraj. Antsu péñker túrakum Yus-shuar unuiniarta. Chichammijajisha, túramurmijajisha, anekratmarmijajisha, nekas Yus enentáimtamujajisha, tura esetra enentáimsam Yusna péñker túramujajisha niisha túrawarat tusam iniaktusarta. ¹³ Wi jeatsajin Yus-Chicham áujeakum shuar jintintiata. Túram Yus-shuar ikiakárarta. ¹⁴ Yus-shuara uuntri Yúsán takastin anaitiamak uwejen awantramsarmai. Nuna túramainiak "Jú shuar kakarman Yúsnumian takustatui" túramarmia nu, kakaram ajasam tímia-trusam túratá.

¹⁵ Tuke enentáimjaj wi tájamna nu enentáimtakmin ame péñker túruki wéamun nekaawartatui. ¹⁶ Túramna nusha tura unuiniamna nusha péñker wáinmamka-

ta. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

Yus-shuarjaj itior túratniuit

5 Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajsarta. ² Nuwá úuntchisha nekas ame núkua nútiksamek shiir awajsarta. Nuwá nátsasha nekas ame umaimia nútiksam shiir enentáimjaj péñker awajsarta.

³ Wajé nekas atsumin ainia nusha yáñkiarta. ⁴ Tura waje uchirtiniaitkiuñkia tura tiranñrinniuitkiuñkia, nu shuar wajen wáinkiariti. Emka ni shuarin péñker wáinkiatniun unuimiararti. Ni aparí anemia núnis awañtuiniak shiir wáinkiariti. Núnaka Yus ti shiir enentáimtaiwai. ⁵ Nekas waje niñki pujana nu Yúsan enentáimtak tsawáisha káshisha iniaitsuk Yúsan áujeawai. ⁶ Antsu aya wárastiniak wakera nuka iwiaakiat jaka áintsanñkete. ⁷ Tura wajenka ni shuarj wáinkiariti. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta. ⁸ Shuar ni jeen pujuinia nuna nekaska wáinkiatniuiti. Tura nuyá chíkich shuár-nasha yáñtiniaiti. Túrachkuñka Yus tana nuna umíatsui, tura Yus-shuarcha nujaj nañkaamas yajauchiiti.

⁹ Yusa kuítrijaj yáinniaiktiniaitkiuñka waje sesenta (60) uwí nañkaamas takustiniaiti. Tura chikichik aishriniak takusu átiniaiti. ¹⁰ Ti paant péñker túrin átiniaiti. Ni uchirñ péñker tsakatmaashit, íraran péñker táata tíniuashit, nekasmiancha enentáimtummar Yus-shuaran yáiniaashit, wáitainia nuna waitnenniuashit, tura chikichnasha péñker túriniaitkiuñka maak.

¹¹ Tura sesenta (60) uwí takakchaka chíkich wajejaj iruraip. Ni ayashj wakeramurj Krístuiya kanamtikiaini-awai tura ataksha nuatnaikiatniun wakeruiniawai.

¹² Tura emka enentáimtiarmia nuna iniaisar sumamainiawai. ¹³ Nu arantcha nakimiainiak ántar irauwear chíkicha itiorchatrin áujmatsachminia nunasha áujmatin ániawai. ¹⁴ Nu asamtai waje úchipiak ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurijaj in kajertamainiaj nú shuar yajauch enentáimturmarcharti.

¹⁵ Kame nuik chíkich chíkich waje Krístuiya kanakiar iwianchin nemarsaru ásmatai nuna tájai.

¹⁶ Áishmansha nuwasha Yus-shuar ainia nu ni shuarjin waje ákuñkia Yusa kuítrin seatsuk nii yaiñtí. Nujaj chíkich wajén nekas atsumainia nuna Yusa kuitrj yáñtatui.

¹⁷ Yus-shuara uuntrj Yus-shuaran péñker wáinkiarua nu, nekas shiir enentáimtustin ániawai. Tura akinkiamniasha ániawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimtustiniaiti. ¹⁸ Yus-Papiniumsha núnisañ áarmaiti:

Jiñkiaia saepen pakartaj tusa turu takaak nájakui ni nují jiñkiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chikichik shuarak Yus-shuara uuntrj tunaarjn etsertukmatañkia anturkaip. Antsu jímiarsha menain-tiusha tsanumtsuk métek tuiniakui anturkata. ²⁰ Chíkich shuarsha ni tunaarjn ikiuktinian nakitiainia nu, ashí iruntramunam chicharkarta. Chikichcha, nuna íisar, ashamkarti. ²¹ Yussha ii Uuntrj Jesukrístusha tura nayaimpinmaya suntarsha íimiainiamunam "túrata" tájame. Ashí shuarjaj niisháa enentáimtusuk métekrak túrata. ²² Yus-shuara uuntrj atí tusam wárik anaikiaip. Wárik túramka chíkicha tunaarjn sumamattame. Ashí tunaanum penké pachiinkiaip.

²³ Wakemjaj jau asam aya éntsak úmutsuk karía ishichik pachimpram umarta.

²⁴ Chíkich shuara tunaarj wáitsatin imiá paant ániawai wáitsatin tsawant jeatsañ. Tura chíkich shuara tunaarñkia paantcha ániawai antsu ukunam paant nekanawatatui. ²⁵ Núnisañ péñker túramusha ti paant ániawai. Tura yamá páantchaitiat tuke paantcha áchamniaiti. Páchitsuk nekanawatawai.

6 Takarniutirmesha, atumí uuntrj ti shiir umirkatarum. Túrachkumñkia chíkich shuar Yus-nasha ii unuiniamuncha yajauch áujmattsartatui.

² Atumí uuntrj Yus-shuar ániakka aya Yusjaj yatsum asamtai nakiarchatniuitrume. Antsu nuna nañkaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³ Shuar ti shiir naka chichaman ii Uuntrj Jesukrístunu ana nuna nakitiak antsu niisháa chichaman étserkuñka ⁴ nu shuar nañkaamantu enentáimtumayat ántraití. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjaj nu-petmaktaj tusar nañkaamas áujmatainiak kajernaikiar tura katseknaikiar péñker enentáimtunaisuk ⁵ tuke kakannainiawai. Tura tu aujmatnaisatniun wakeruini-ana nú shuar nekas-chichaman nékachu ásar aya tunaan enentáimtin ániawai. "Yusna ana nujaj kuítrintin ajasminiaiti" tuiniawai. Nu shuar pachisaip. ⁶ Shuar takakna nujajñ waraakka Yusna ana nujajsha waraak ju nuñkanmasha tura nayaimpinmasha nekas kuítrin-niuiti. ⁷ Iis, ju nuñkanam misuk támaji; núnisar misuk jiinkittiaji. ⁸ Tuma asamtai yurumkasha tura entsa-taisha takakkurkia nujajñ warasa pujustiniaitji. ⁹ Antsu kuítrintin ajastaj tuinia nu, tunaanum awañkemkar iniainiawai. Tura antra nuna wakerukar itiorchatan wáiniainiawai. Nujaj emesratniunmasha jeainiawai. ¹⁰ Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian ini-aisar ti itiorchatjaj yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsunrata.

¹² Yusna nu túrunat tusam kakaram ajástá. Tuke

amuicha iwiaakma emetata. Nu túratniun Yus anaiti-amkaiti, tura ame Yus nekas enentáimtamu untsurí shuar iruntramunam etserkaitme. ¹³Yuska ashí iwiaaku átinian súwiti. Jesukrístusha Punsiu Piratuí nekasa nuna ti paant ujakmiayi. Tuma asamtai Yussha Jesukrístusha írainiamunam nuna tájame. ¹⁴Ii Uuntri Jesukrístu táatsajin wi tájamna nu yapajítsuk tura yajauch chicharnakchamnia péñker umiktá, tájame. ¹⁵Tsawant jeamtai Jesukrístu tatí tusa Uunt Yus, imiá péñker asa, akupkattawai. Nínkíti Yus. Akupniuncha Akupniuiti. Uuntjají nankaamas Úuntaiti. ¹⁶Iwiaaku átinia nérenniurí Nínkíti. Ti tsáapninnium pujakui nuntumtuachminiaiti. Wáinchatai asamtai shuar péñké wáinkiacharu ániawai. Niñki ashí shiir awajsatniuiti tura Niñki tuke ashí akupin atí. Núnisañ ati. ¹⁷Jú nuñkanam kuítrintin ainia nusha nankaamantu enentáimtumascharti. Kuitcha yúpichuch meñkakam-

nia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti. ¹⁸“Péñker túratarum” tiarta. Tákumin niisha shiir enentáijjají ni takakman ajamsarti. Nuyá nú péñker túramujají Yusají ikiáunkartí. ¹⁹Nuna túruiniak kuítriniawartatui. Núnisañ tuke iwiaaku átinian wáinkiertatui.

Amuak Timiutéun akatramu

²⁰Timiutéu, ashí ame túratniua nu tuke enentáimtura. Jú nuñkanmayá ántar chichainia nu anturkaip. Tura wáitruiniak “wi imiá nékajai” tuinia nusha anturkaip.

²¹Chíkich shuar nuna umirkar Yusaiyá kanakiarai. Wátsek, Timiutéu, Yus shiir yainmakti. Nuke atí.

2 TIMIUTÉUN

Papru Timiutéun áatramiania nu

1 Wi Pápruitjai. Yus wakerakui Jesukrístu akatramurj ajasuitjai. Ashí Jesukrístujaj tsaniñkiarun “Nekas iwiaaku átinian susattajai” tñiuiti Yus. Tuma asa nuna etserkat tusa akuptukuiti. ² Aneamu uchiru, Timiutéu, jü papín áateajme. Yus Apasha tura ii Uuntrj Jesukrístusha ti anenma ásar waitnentramainiak imi-atkinchanum shiir pujustinian yainmakarti.

Krístunu takastiniaitjnia nu

³ Tsawajsha káshisha Yúsan áujeakun ámin tuke enentáimtusan ti shiir Yúsan yúmiñkijai. Winia weatur túrawarmia nútiksanak Yúsan enentáimtakun ti shiir awajeajai. ⁴ Kanakmijaj nuj eñtramiam nuna tuke enentáimtajme. Ataksha wararnaisatai tusan ítniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujaj atak kakaram takasta. ⁷ Yus sápij enentáin suramsachuitji. Antsu kakaram ajastinniasha anenainiuncha péñker wekasatniuncha suramsaitji. ⁸ Ii Uuntrj Jesukrístunu etserkatin natsantraip. Níiniun étserkun sepunam pujamusha étserkun natsantruraip. Antsu Yus kakaram awajtamkui ame étseream nujaj shuar yajauch túramainiakui surimiamtsuk wáitsatin enentáimtumarta. ⁹ Ii péñker túrichu árinij Yus in anenma asa uwemtikramar péñker túratniunam apujtamsaitji. Iisha Jesukrístujaj tsaniñkiaru asakrin tura Yus nuna túratniun wakerak túramiai. Yaunchu jü nuñka at-sajsha in tuke waitnentrampramijaj. ¹⁰ Turá yamá in Uwemtikkiartin Jesukrístu támatai nu anenmam paant ajasuiti. Niisha jákatniun nupetak emesramiai. Tura uwempratin chichamjaj jáchatai iwiaakman paant awajturmajj.

¹¹ Nuna etserkat tusa Yus anaitiukmijaj. Tura akattur Israer-shuarchanum akuptukmijaj. ¹² Túruta asamtai ti wáitijaj. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsajin ashí wínian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukrístujaj tsaniñkiu asar Yus nekas enentáimtaji tura nujaj anenkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakanj in pujurtamaj nuna kakarmarijaj túrata.

¹⁵ Asia nuñkanmayá shuar mash iniaitiusarmai. Nu nekaachmaashum. Nu shuarnumiá Pijirusha Ermujenessha armai. ¹⁶ Antsu Unisépuru niisháa shuar amai. Ti nukap shiir enentáimtikrumai. Tura wi sepunam pujamuncha natsantruchamai. Ii Uuntrj Kristu ni shuarincha waitnentrarti. ¹⁷ Rúmanam taasha natsantrutsuk eñtak wáittsuk iniaitiuschamiyai. ¹⁸ Ipiisu péprunam pujarin ti yainmakmijaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

Kakaram ajasta

2 Amesha, uchirú, Jesukrístujaj tsaniñkiu asam nu kakarmajaj kakaram ajasta. ² Untsurj ántuiniamunam wi etserkamaj nu, shuar umikmin ainia nu jintintiaawaram chikichnasha jintintiaawarat tusam akupkarta.

³ Ame ti péñker Jesukrístu suntarj asam wáitsatin katsunrata. ⁴ Suntarka ni uuntrj tana nunak umiktin asa chíkich takatan pachintiukchatniuiti. ⁵ Núnisan nakurincha nakurustinia nujaj métek nakurachkuñka nekas péñkeran awakmakun súsatniua nuna achikchamniai. ⁶ Ataksha núnisan shuar ajan takaana nu, ashí shuara nañkaamas nuyán yúashtinkiait. ⁷ Wats, jü menaintiu métek-taku chicham ániawai. Péñker enentáimtakmin ii Uuntrj Kristu paant awajturmastatui.

⁸ Jesukrístu jaka nantakmia nu enentáimprata. Tura Uunt akupin Tawit ni weatrij asamtai Jesussha uunt akupin átiniait. Núiti wi uwempratin chichaman étseereaj nu. ⁹ Nuna étseereakun sepunam jirujaj jinñkiamu pujakun wáitijaj. Túrasha Yus-Chicham jinñkiachminiait. ¹⁰ Ashí shuar ni shuarj arti tusa Yus achikiarua nuna yáñtajtsan ashí itirchatan katsunteajaj. Nujaj Jesukrístujaj tsaniñkiaru ásar uwemprar tuke shiir pujusartatui Yusjaj.

¹¹ Jü imiá nekasaiti: Jesukrístujaj jákaitkiurkia Níijjajshu tuke iwiaaku pujustatji.

¹² Wáitiakrishu Níijjaj akupkattaji.

Natsantakrinkia Niisha natsantramprattaji.

¹³ Umichuitkiurniisha Niñkia tuke uminiait. Warí, Yuska ni enentáimmiyajaj yapajniátsuk tuke umiktiniait.

Yusaj natsarajj tusam ashi túrata

¹⁴ Shuar jintintiakum jü enentáimtikrata. Ii Uuntrj Yus íimmianum chichamjaj yajauch tunaiyarajj tusam chicharkarta. Nu tunaitin péñké áantraiit antsu ántuiniiana nuna yajauch awajenawai. ¹⁵ Yus-Chicham tuke

enentáimjaj péñker unuimiátram shiir jintintiwarta. Túrakum Yus péñker írsat tusam péñker takarin atá. Túramka Yusaj natsaarchattame. ¹⁶Jú nuñkanmayanak ántar áujmatin ainia nuñaj kanaktia. Shuar nuna áujmatainiak tunaanum nuna nañkaamas wáiniawai. ¹⁷Ni jintiniamusha suñkurjaj métek pampaawai. Iminíusha tura Piritiusha nu shuar áiniawai. ¹⁸Niisha nekas chichaman iniaisar tura ashí Yus-shuar nantaktincha nañkaamasai tuíniakui chíkich chíkich shuar Yúsán naka enentáimtuiniatsui yamaikia. ¹⁹Túrasha Yus ashí nañkaamas enentáimtustinia nuna paant awajsaiti. Júnisaiti: “Uunt Yus ni shuarín nékainiawai,” tura nuyá “Ashí Kristu shuarí ainia nu tunaanumiá kanakiarti.”

²⁰Kuítrinniu jeen kurijajaj najanamusha kuitjaj najanamusha írunui. Nújajajaj ti shiira nu takastin áiniawai. Tura numijajaj najanamusha nuwejjaj najanamusha írunui. Antsu nújajajaj nekasmancha ainia nu takastin áiniawai. ²¹Núniskete Yusa takatríjjaj. Ashí tunaanumiá kanakir péñker wekasar shiira nu takasmin átatji. Kame ashí péñkera nu takasmin asakrin ii Uuntrí Jesukrístu wakerak péñker takata nuí apujtamsamniaitji.

²²Natsá wakerutai iniaisar esetram péñker wekasata. Amesha ashí shuar shiir enentáijaj Yúsán áujena nuñaj Yus nekas enentáimtakum aneniakum ti shiir pujustá. ²³Enentáimtsuk chichainiak aya ántar tunaitin-ian chichainia nu pachisáirap. Nusha aya némasman-ainiawai. ²⁴Ii uuntrí Jesukrístu takarniuka chíkich shuarjaj nekasmanaiashtiniaitai, antsu ashí shuarjaj péñker nawamnaikiatniuiti. Tura waitnentáimturar péñker jintintiatniuiti. ²⁵Tura umircha shuarnasha Yus ni enentáin yapajtiakui nekas chichaman shiir enentáimturarat tusa péñker enentáijajaj jintintiatniuiti. ²⁶Nujaj iwianch ni wakeramu túrawarat tusa achik-maitiatan uwemprartatui.

Amuukatin tsawant jeatemamtai aents ti tunaan túrawartatui

3 Amuukatin tsawant jeakui ti itiurchat átatui. ²Shuar aya niñki enentáimtumasarartatui. Kuítian ti wakeriartatui. Nañkaamantu enentáimtumasarartatui. Yúsánasha yajauch chicharsartatui. Aparíncha umirkachartatui. Yumínsatniuncha nékachu ártatui. Ashí Yúsáncha enentáimtuschartatui. ³Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasrí ártatui. ⁴Amikríncha surukartatui. Arantsuk tunaan túrawartatui. Waantu enentáimin ártatui. Yúsán nakitrar aya ni wakeramunak enentáimtusartatui. ⁵Yusa kakarmarí “ántrai” tuíniak péñker umirkachartatui. Túrasha Yúsán umirua núnisar túrawartatui.

Nu shuar péñké pachisáip. ⁶Nu shuarsha shiir chichayatan anañkawar jeá wáiniawai. Tura nuwá esetar enentáimchan nekas tunaarinniu anañkainiawai. Nu nuwá ashí yajauch wakeramujaj anañnainiawai. ⁷Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. ⁸Yaunchu Ejiptu nuñkanam Muisais uunt akupniujaj

chichaakui jimiará iwishin, Jánissha Jámprissha, Mui-saisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachú ásar Yúsán naka jintiatniun péñké tujintiainiawai. ⁹Túrasha nuna nañkaamas kuakchartatui. Shuar ti paant ni netse túruiniamurín nekarawartatui. Núnisan nu jimiará iwishniujaj túrunamiayi.

Amúak Papru Timiutéun akatramiania nu

¹⁰Tura ámeke wi tímiaj nu umireame. Wi Yusaj shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsán enentáimtakun tura aneñkratun shiir enentáijajaj katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntrí uwemtikurmiayi. ¹²Nekasaiti, shuar Jesukrístujaj shiir túratay tákuñka ni nemasrí ántiam ti wáitsatniuiti. ¹³Tura ashí anañkartin ainia nusha kame ashí yajauch shuarsha nú yajauch túrukiar wétatui. Iwianchjaj anañkamu ásar chikichnasha anañkiar weartatui.

¹⁴Antsu ámeke unuimiam nu imiá nekasaiti tu enentáimtakum tuke emetata. Jintintramawarmia nú shuarsha wáitrichua nu nékame. ¹⁵Úchichinmayan Yus-Chicham nékame. Yus-Chichamka uwempratniun jintintramamniaitai. Nusha “Jesukrístu nekas enentáimtakum uwemprattame” tawai. ¹⁶Ni Papirín áarat tusa Yus ni shuarín áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá peñkeraiti. Tunáa túrajnia nu Yus-Papíjjaj neka-matniuitji. Tura awajakrincha Yus-Papí núnaka paant jintintramjai. Nuyá naka wekasatniun jintintramjai.

4 Ii Uuntrí Jesukrístu amuukatin tsawantaj Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaat-tawai. Tuma asamtai Niisha tura Yus Apasha íimiainiamunam juna akateajme. ²Uwempratniun chicham etserkata. Yúpichuchia nuñsha tura itiurchata nuñsha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. ³Ukunmanka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekapea áintsan, nañkaamas unuimiaru atai tusar, náñkamas unuikiartinian ti untsurí eñkartatui. ⁴Nekas shiir chichaman iniaisar ikiuiniak ántar áujmatsamun enentáimtusartatui. ⁵Antsu ámeke tuke péñker túratin wakerakum ashí itiurchat kat-suntrata. Uwempratniun chicham étserkum takatrum péñker umikta.

⁶Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai. ⁷Shuar kakaram maanainia núnisnak tuke kakaram takasmajai. Tséken péñker tsekea áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai. ⁸Tuma asamtai tawasap nukajaj najanamu tsékena susamua áintsan wisha péñker túramu-

nam akinkiattajai. Tura aya wíniak akirkashtatui. Antsu ashí ni tátinian shiir enentáijjají nákania nunasha nekas péñkera nuna akikiartatui.

Timiutéu túratin akatmamturma

⁹ Wárik iiraitin enentáimturata. ¹⁰ Témas aya jú nuñkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nuñkanam weyi. Núnisañ Títiusha Tarmasia nuñkanam weyi.

¹¹ Túrawarmatai aya Rúkas wíjjají pujawai. Márkus eñka wáinkiam ame itartitia. Juí ti péñker yainkiamnaiti.

¹² Tura Tíkikiunka Ipiisu péprunam akupkamjai. ¹³ Tura winiakum nuparam pushí Trúas péprunam Karpu jeen ikiukmíaj nu takurtuktia. Núnisañ nuparam papísha tura nekaska péñké papí takurtuktia.

¹⁴ Arejánruka jirujají takawa nu ti yajauch awajtusuiti. Túrutaitkiuisha ni túramujají métek Yus akiktí. ¹⁵ Nu amesha péñker wáinkiatá. Ii étsereamun péñké nakitiawai.

¹⁶ Emka akupniunam ayamprumaktaj tusan chichaakui chikichkisha yáintkiacharmiayi. Antsu sapi-

jmiainiak ikiurkiarmiayi. Yus nu shuaran yajauch enentáimturchara maak. ¹⁷ Tura ii Uuntrí Jesukrístu ni kakarmarín surus yaintkiamiayi. Nujají uwempratin chichaman ashí nuñkanam Israer-shuarcha antukarti tusan etserkamjai. Tura núnisañ akupniunmayasha ii Uuntrí uwemtikrurmiayi. ¹⁸ Tura núnisañ ashí yajauchia nuyá uwemtikrurmatai Nii akupeana nuí nayaimpiniam jeattajai. Niñki tuke shiir awajnasti. Núnisañ atí.

Amikmaamiania nu

¹⁹ Piriskancha ni áishrí Akiranacha amikmainiajai. Núnisnak Unisépuru shuaríncha amikmainiajai.

²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmíajai. ²¹ Michá nantu jeatsajín iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntrí Jesukrístu ámíjjají tsaniñ pujustí. Tura Yus ashí péñker waitmakarti.

Nuke atí.

TITIUN

Papru Titiun áatramiania nu

1 Wikia Pápruitjai Yusa takarniurĭ. Tura Jesukrístu akatramurĭntjai. Yus achikma ainia nú shuar ni-isha antukar Yúsan umirkarat tusan akatramuitjai. Shuar nuna nekaawar péñker wekasartatui. ² Tura nú arant, nú shuarsha tuke iwiaaku pujusarat tusan ét-sereajai. Nú shuarnasha, nuñkan najantsuk, “uwemtikrattajai” Yus tímiayi. Tura Niisha wáitruatniun tujintiawai. ³ Tura yamaikia, tsawant jeamtai, nuna nekaawarat tusa ii Yusrĭ uwemtikkiartinia nu, winia chichamur ujakarta tusa, winia akatturmiayi.

⁴ Titiu, wi Yusna étserma umikiu asakmin winia uchirua áitkiasnak papin áateajme. Iis, iijĭaj métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Aparĭ Yussha, ii Uuntrĭ Jesukrístusha, Uwemtikkiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nuñkanam ikiukchamkajam. Tura “ashĭ péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti péñker wekasatí. Tura chikichik nuwentin átiniaiti. Tura ni uchirĭsha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti.

⁷ Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiaú áchatniuiti. Tura anañma kuítrintin ajastaj tusa wakerukchatniuiti. ⁸ Antsu shuar ni jeen írar winiana nuna itiaatniuiti. Tura ashĭ péñker ana nuna wakerin, esetas enentáimin átiniaiti. Tura jĭ nuñkanmayá akupeamuncha, núnisañ Yús akupeamuncha umirkatniuiti. Tura niñki íimiastiniaiti. ⁹ Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnu-miá nekas chichaman, nii unuimiátramiania nuyá kanakchatniuiti. ¹⁰ Nekaata. Umichu ti irunui. Niisha ántar chichau ásar anañmau áiniawai. Israer-shuar weenam ti irunui nú shuar. ¹¹ Niisha kuítian achiktaj tusar wakeruiniak, yajauch unuiniarchatniua nuna unuiniawai. Nuna túruiniak untsurĭ shuáran, ni írutkamurĭjĭaj yajauch enentáimtikiainiawai. Tuma asamtai auka, ni wenę epetkatniuiti, ántar chichainiakui.

¹² Warĭ, imia Krétanmayá chichaman etserin juna tíchamka: “Krétanmayá aentska tuke wáittrin áiniawai. Tura nákitiat ti yurumin áiniawai. Yajasma núnisañ áiniawai.” Nuna tíchamka. ¹³ Maa, niisha nékasañ tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartĭ tusam, tura nekas chichaman nakitiana nuna akupeamurĭn umirkachartĭ tusam, antsu Yúsan nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentáĭ chamir ajasu ana nuka, ashĭ ni wainnia nuna péñkernak enentáimtai. Tura chíkich shuar, Yúsan umirkachu asa, ni enentáĭ wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai. ¹⁶ Tura niisha “Yus-shuaraitjai” tuíniayatañ, Yúsan umirtsuk niisháa túruiniawai. Tuma ásar mujmiaĭ áiniawai niisha. Umichu ásar péñkeran túratniun peñké tujintiawai.

Péñker jintintiatin

2 Tura amesha, Titiu, péñker chicham etserkata. Yus-Chicham tátsuna nu etserkaip. ² Antsu áishmañ katsunt Yusna ainia nu, jĭ jintintrata. Nampechu, náñkamas enentáimcha, esetas enentáimin arti. Yus tana nuna umirin tura anenain arti. Ni itiurchatrĭñ Yúsan enentáimtusar katsuntin arti. ³ Tura núnismek nuwá katsunt Yusna ainia nusha jĭ jintintrata. Niisha núnisañ Yus-shuarta túramnia nuna péñker túrawartĭ. Tsanumin tura nampen áchartĭ. Antsu péñker wekasatniun unuinin arti. ⁴ Niisha yama nuatnakua nuna ni áishrĭñ ni uchirĭncha nekas aneetniun unuiniartĭ. ⁵ Júnasha jintintrartĭ. Esetas enentáimin, péñker wekain ártiniaiti. Ni takatrĭñ péñker takastin áiniawai. Ni áishrĭñ umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarĭñ tusar túrawartiniaiti. “Tu jintintrarta” titiá.

⁶ Nuyá, Titiu, natsa áinia nu “náñkamsar enentáimsarum wekasairap” titiá. ⁷ Tura amesha, Titiu, ashĭ tsawant péñker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” tĭñ tusam, esetsam enentáimsam, Yus-Chicham tana nu ímiatrusmek jintintiatia. Nú túrakmiñkia, Yus-Chichaman nakitiana nu shuar “Titiu náñkamas chichaawai” títiaj tukamá, natsağmak tujintramkattawai.

⁹ Takarin ainia nu, ni takartairĭñ umirkarat tusam jintintrarta. “Shiir enentáimsarum, yajauch áimtsuk

shiir umirkatarum" titiá. ¹⁰"Kasamkairap, tura anaŋkawairap. Iis, péŋker túrakrumka, takarniuitiatrum, shiir tura asarum ii Uwemtikramin Yusri chichamen shíiraiti, tu enentáimtikrattarme" titiá.

¹¹Yus in waitnentrama asa ashí áentstin uwemtikramprataj tusa wakerutmaji. ¹²Kame Yus waitnentrama asamtai, tunáa ana nu iniaiatniuitji, nu nékaji. Tura ju nuŋkanmayá yajauch ana nu wakerukchatniuitji. Tura antsu ju nuŋkanam pujayatrik esetsar enentáimsar anaŋma wekatsuk tuke tsawant Yus anear wekasatniuitji. ¹³Túrar ii Yusri Jesukrístu, uwemtikramajnia nu, imiá shiir iwiarnar tatí tusar nákastiniaitji. ¹⁴Jesukrístuka in jarutramkamiaji, ii tunaariniá uwemtikrampratajtsa. Tura, Winia ajarar tuke enentáijjaj péŋker túrawarat tusa, ii tunaariniá japirtampamiaji.

¹⁵Tituu, anaikiamu asam arantutsuk nu jintintrata. Yajauch ana nuna túrawarajniá tusam chicharkata. Péŋkeran túruinia nu ikiakárta. Tura yajauch chicharkarajniá tusam tuke péŋker wekasata.

Yus-shuarti túratin

3 Tituu, shuar enentáimtikrarta. "Ashí akupin ainia nusha tura chikich uunt akupena nusha antukrum umirkatarum" titiá. ""Péŋkeran túratin ana nuna páchitsuk túrattajai" títiniaitrum" titiá. ²"Tsanumprairap, kajernaikairap, antsu shiir enentáimtunaistarum" titiá. Naŋkaamantu enentáimtumatsuk ashí shuar péŋker awajatarum tusam tu jintintrarta. ³Warí, iisha núnisrik Yus-shuar ajatsuk náŋkamsar wekaimji, Yuska umirtsuk. Tura íwianch emetamu pempée wekaimji. Tura ii ayashj wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. ⁴Túrasha Yus in uwemtikiartin ana nu, aneŋkratin asa, ni aneŋkrattairniá ashí áentsun iniaktus in

uwemtikrampramiaji. ⁵Yus in waitnentrama asa, iikia júkesha péŋker túrachma ajni uwemtikrampramiaji. ¿Itiurak uwemtikrampramiaji? Ii tunaariniá asakátrampramiaji, nijiaiktinia áintsan. Tura Yusa Wakanj pujurtamkurin, ii iwiaakmariniá yamarman amasmaji. ⁶Jesukrístu jakamujaj Yus in emeenturmatsuk ni Wakanj suramsamiaji. ⁷In anenma asa nuna túramiayi. Nuŋkia iisha yamaram awajsamu asar tuke iwiaaku átin, ti wakerimij ni íniuiti. ⁸Nuka ti nekasaiti. Tuma asamtai Yúsar umirkarmia nu, péŋker túratniun tuke wakerukat tusam tuke jintinki wetá. Wi tímiajna nu, péŋker asamtai, ashí aents nuna nekaatniun atsumainiawai. ⁹Shuar netse áujmatainiakui amēja pachisaip. Tura "aya winia úuntruk péŋker áiniawai" tu chichasaip. Tura Israer-shuara akupkamurj ititurkit tusa shuar ti áujmatainiakui nusha pachisaip. Ántraiti nuka. Péŋker wekasatniun yayatsui.

¹⁰Shuar tsanumprur yajauch enentáimtumaimtikiana nu chicharkata. Ántachkuŋkia ataksha chicharkata. Tura penké tujinkiamka jjiiki akupkata. ¹¹Nujaj juna nekaamniaitme: nuna tura asa awajiruiti. Tura ni tunaariniá jakattui.

Papru wakerana nu

¹²Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Juŋj Nekapurisnum yumí nantu asamtai seturan pujuttajai. ¹³Senas, chichaman ti unuimiaru pujana nu, amikiur Apurusjaj jeamtai, nii atsumtsuk shiir weartí tusam, ame túratin jeamna nu yainá. ¹⁴Iini Yus-shuar ainia nusha péŋker túratniun tura atsumainia nunasha yáin-tinian nekaawartí. Ántar pujusarajniá tusan nuna tajai.

¹⁵Ashí wijjaj pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

JIRIMIÚŃKAN

Papru JirimiúŃkan papin áatramiania nu

1 Wi Papru ju papin áaran akuptajme ámin, Jirimi-
uŃká. Ii yachi Timiutéusha ju na akupturmawai. Wi
Jesukrístu takaru asan sepunam pujajai. Ame iijjaj
tsaniŃkia takáa asakmin ju papin akuptajme. ² NúnisaŃ
ame jeemijin Yus-shuar irunainia nunasha tura ii umaj
Apiancha tura Arkipiuncha iijjaj ti kakaram takasu
asamtai ju papin akuptajrume. ³ Yus ii Apari tura ii
Uuntrj Jesukrístu shiir enentáimturma ásar yainmakar-
ti imiatkinchanum tuke shiir pujustinian.

JirimiúŃ pėŃker Yus-shuar ámiayi

⁴ Ame Uunt Jesus shiir enentáimtakum ashí Yus-
shuar ainia nusha aneamun antukjai. Nuna antukan
ámin ti shiir enentáimtakun Yúsan áujeakun yúmŃkia-
jai. ⁶ Áujeakun chíkich shuarsha ámijjaj métek Yúsan
nekas enentáimtuiniak ashí pėŃker ana nuna ti paant
nekaawarat tusan seajjai. Ashí pėŃker ana nuka Je-
sukrístu shiir awajsamujaj takakji. ⁷ Wisha ame
aneŃkratmajaj ti shiir enentáimtakun waraajai. Yat-
surú, ámijjaj ashí Yus-shuarsha shiir enentáimiaini-
awai.

Papru Unisemun waitnentratniun JirimiúŃkan seami- ani nu

⁸ Nu asamtai kakaram tátsujme. Kame wakeraknaka
Kristu akatramu asan “Ju túrata” tímíniaitjame. ⁹ Antsu
aneakun aya júnisan tájame. Wi Papru úuntach asan
tura Krístun takarkun sepunam pujakun ¹⁰ Unisemu
waitnentraí tusan seajme. Niisha wi ujakmajaj Yus-
shuar ajasu asa winia uchirua áintsanĳete. Sepunam
pujayatan ni aparjya áintsanak ajasjai.

¹¹ Nuikkia Unisemu ántrauyi antsu yamaikia amini-
isha winiisha yáimniuiti. ¹² Ataksha awaŃtajme. Wi ti

pėŃker aneamu asamtai pėŃker itiaata. ¹³ Wi Yus-
Chichaman étserkun sepunam pujajai. Túmakun ame
yaja pujakum yáintkiatin tujintiakmin nii antsu wiji-
aj pujus yáintkiat tusan wakerimjai. ¹⁴ Túrasha ámin u-
jat-
suk túrachmin enentáimpramjai. Kame ame waker-
akum útsukchamujaj “pujust” tákumniŃkia maak.
¹⁵ Júnissha enentáimpramniaiti. Unisemu ishichik
tsawant menĳakamai tura yamaikia waketki ámijjaj
tuke pujustatui. ¹⁶ Kame yamaikia emetachma antsu
ame aneamu yátsumeá áinis átatui. Nuka ti pėŃker-
chakait. Wisha nin ti aneajai. Tura yainmakmin asamtai
tura Krístunam ame yatsum ajasu asamtai winia ini-
ankattsam aneashtapash.

¹⁷ Wisha ti pėŃker amikrumchakaitiaj. Tuma asam
winia itiaarua nútiksam shiir awayáta. ¹⁸ Yajauch awaj-
tamkaitkiuŃkia tura ámijjaj tumashitkiuisha wi akiktat-
jai. ¹⁹ Wi Papru nekas winia uwejrujaj ju na áaran ti
nekas akiktatjame tájame. Túrasha winia tumashit-
mena nuna páchittsujme. Kame wi ujakam Yus-shuar
ajaschamkum. ²⁰ Wátsek, yatsurú, amesha Yus-shuar
asam wi seajme jú túrutata. Kristu enentáimtakum shi-
ir enentáimtikurta.

²¹ Ti pėŃker uminiaitme nuna nékakun júnisan áat-
jame. Tura wi seajmena nuna naŃkaamas túrattamna
nuna nékajai. ²² Ayu. Átum Yus áujturkurmin Yus winia
tsanĳkatruktatui atumijin iiraitniun. Tuma asamtai wi
nuj jean pujustin iwiarturata.

Amikmaamiania nu

²³ Épaprassha niisha Jesukrístunu étseruk sepunam
wiji-
aj pujus amikmaatmarme. ²⁴ NúnisaŃ Márkussha
Aristárkusha Témassha tura Rúkassha Yus-Chichaman
etserkatniun yáintiainia nusha amikmaatmainiawai.

²⁵ Ii Uuntrj Jesukrístu atumniasha ti shiir yainmakarti.
Nuke atí.

ISRAERNUM

Yus ni Uchiríjǵaj ni chichamēn ujatmakji

1 Yáunchuka Yúsnan etserniujǵaj chichas Yus ni enentáimmian ii úuntrǵn ujakmiayi. Tura untsurǵ nuᅇkanmasha tura untsurǵ uwitincha niisháa niisháa chichas ujakmiayi. ²Antsu jǵ amúamu tsawantǵkia ni Uchirǵ Jesukrístujǵaj ashí Niiniu ana nuna ujatmakji. Yus Niijǵaj ashí írúnna nuna najana asa mash Nin sú-saiti. ³Níyaiti Yúsan imiá métek nakumeana nu. Tura Níyaiti Yus naᅇkaamas shiira nuna paant awajeana nu. Niisha aya ni chichamejǵaj kakarma nujǵaj ashí írúnna nuna wáiniuk emeta pujurui. Tura ii tunaarǵn nijiatra-mak akupin pujutainium, Yusa untsuurini, pujusmiayi.

Nayaimpinmayǵa suntarjǵaj Kristu naᅇkaamantuiti

⁴Yusa Uchirǵ nayaimpinmayǵa suntarjǵaj imiá naᅇkaamantu awajnasuiti. Tura ti naᅇkaamantu asamtai Yus nayaimpinmayǵa suntar naᅇkaamas Nin ti shiir awaj-tawai. ⁵Wátsek, nayaimpinmayǵa suntaran chikichkinesha jǵna tútsuk Krístun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisaᅇn tímiayi:

“Wi ni aparǵ átatjaj, tura Nii winia uchir átatui.”

⁶Tura jǵ nuᅇkanam ni Iwiaǵrǵn akupeak tímiayi:

“Ashí Yusa suntarǵ tikishmatrarti.”

⁷Nayaimpinmayǵa suntarnan jǵnis chicharui:

“Nayaimpinmayǵa suntarǵn takartursarat tusa nasea áintsᅇn awajsaiti. Ni suntarǵn chárpia áinis akupeawai.”

⁸Antsu ni Uchirǵniun tímiayi:

“Ame, Yusá, tuke akupniuitme. Ame akuptairmeshia aya péᅇkeraiti. ⁹Péᅇkera nu anenaitme, tura yajauchia nu muǵjniuitme. Tuma asamtai ashí shuar shiir warar-tamu asamtai Yus, ame Yúsrum, ashí akupniujǵaj nankaamas uunt awajtamsaiti.”

¹⁰Nu arantcha tawai:

“Uuntá, yámankamtaik Ame jǵ nuᅇka najanamiamē. Túram ame uwejmijǵaj nayaimpisha najanaitme.

¹¹Nusha mai amuukarmataisha Ame tuke pujuttame. Tarachjǵaj métek mamurartatui. ¹²Tura ipijram ikius-tatme. Pushiya áintsam yapajǵátame. Túrasha Ámeka núnismek átatme. Játsuk tuke pujuttame.”

¹³Ataksha tímiayi:

“Akupin pujutainium, winia untsuuruini, pujusam nákarstatá. Ame nemasrumin nupetkan Ámin umir-tamkarti tusan amastatjaj.”

Núnisaᅇn nayaimpinmayǵa suntaran péᅇké tíchamiayi.

¹⁴Antsu Yusa suntarǵ wakan áiniak ashí shuar uwem-

prartatna nuna yáinǵkiarat tusar Yus akupkamu áini-awai.

Anearta. Uwempratin Chicham nakitrashtiniaiti.

2 Nuikia Kristu ti uunt asamtai ashí Niiniu antukaj-nia nujǵaj kanakchatin ti enentáimtustiniaitji.

²Yaunchu nayaimpinmayǵa suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi. ³Antsu ii Uuntrǵ Krístuka Uwempratin Chichaman emka itiami-ayi. Tura imiá nekas tuíniak Nin anturkaru in ujat-makarmaji. Tuma asamtai Uwempratin Chicham naki-tiakrikia nuna naᅇkaamas uwemtsuk asutniáttaji.

⁴Kame nu arantcha, Uwempratin Chicham ujatmaini-akrin imiá nekas tuíniawai tusa aents túrachminian kakarman Yus iniakmasmiayi. Núnisaᅇn ni Shiir Wakani ni wakerana núnisaᅇn niisháa niisháa kakermajǵaj takamtikeawai. Nujǵaj Yus-Chichama nu paant nekanamniaiti.

Jesukrístu aents ajasmiania nu

⁵Ayu. Nuik áujmatkur “jǵ nuᅇka amuukattawai” taji. Tura yamaram nuᅇkanam nayaimpinmayǵa suntar akupkachartatui. ⁶Antsu ii akupkattajnia nu, Yus-Pap-inium áarmaiti:

“¿Shuarti warimpiaitaj ame imiá enentáimtitniusha? Kame, ¿shuar warí asamtai pujursataj tamea?

⁷Ishichik tsawant nayaimpinmayǵa suntarjǵaj péejchach awajsamiame. Túram ti shiir naᅇkaamas uunt awajsat-tame. Ame najanamun ashí akupkati tusam tsᅇkatkattame. ⁸Ashí nin umirkarti tusam susat-tame.” Tu áarmaiti.

Yus “ashí nin umirkarti” takui nin umirkashtinkia at-sawai. Túrasha yamaikia ashí umirainiaka wáintsuji.

⁹Tura wáinjinia nu Krístuiti. Niisha aents ajas ishichik tsawant nayaimpinmayǵa suntarjǵaj péejchach ajasmi-ayi. Yus ni shuarǵn ti aneak jarukarti tusa wakerimiayi. Tura ni wáitias jakamujǵaj yamaikia ti shiir naᅇkaamas Uunt awajsamuiti.

¹⁰Ashí írúnna nu Yus najanamun ásar ni wakeramun umiktin ainiawai. Tura ashí ni uchirǵsha ni shiirmarǵn pachinkiarat tusa wakerawai. Tuma asa Yuska Je-sukrístun, nu shuaran Uwemtiknia nuna, ni waitsmujǵaj nekas Uwemtikkiartin awajsamiayi. ¹¹Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparǵnti. Nu asamtai Yusa Uchirǵ nu shuaran “yatsur” títinian natsantatsui.

¹²Yus-Papinium núnisaᅇn tawai:

“Ame náarmin winia yatsurun ujakartatjai. Ashí irun-tramunam kantampruattajme.”

¹³ Ataksha ni shuarijijaj métek enentáimtamun tawai: “Yúsan ti shiir enentáimtustatjai.”

Tura ataksha:

“Yus surusmia nú uchirjaj Yúsan umirkun pujajai” tawai.

¹⁴ Tura nu uchi aents ásarmatai núnisan Jesussha aents ajasmiayi. Tura aents ajas jaka, iwianchin, jatai nérenniurin, ashí emesramiayi. ¹⁵ Tura ti untsurí shuaran uwemtikrarmiayi. Nu shuar yaunchu jákatni-nin ashamainiak tuke wáitin ármiai. Antsu ni jakamujaj yamá ankant ániawai. ¹⁶ Maa, imiá nekasaiti, nayaimpinmayá suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. ¹⁷ Túratin asa penké métek ni yachá áinis ajasmiayi. Nujaj in tuke waitnentrampramniatiji. Tuma asa Yúsnan pujurniu uuntrí ajas Yúsan tuke péñker chichartamsamniatiji. Núnisan murikiun maa Yus súsatniua áintsan ni jakamujaj ashí shuara tunaar-in tsankurniuiti. ¹⁸ Tura imia niñki waitsa asa tura íwianch nekapsamu asa yamaikia iisha wáitiakrincha tura íwianch nekaprakurnisha yainmakminiatiji.

Jesus Muisaisjajsha nankaamantuiti

3 Tuma asamtai, péñker yatsuru, atumniasha Ni-iniu atí tusa Yus achirmakuitrume. Tuma asarum Kristu Jesus péñker enentáimtustarum. Niisha Yus nekas Akatramuyayi. Tura ashí Yus-shuar ajasarua nujaj Yúsnan pujurniu uuntrí núnisaiti. ² Nu atí tusa Yus anaikiamiayi. Túramtai Kristu nuna ti péñker takasuiti. Núnisan Muisais ashí Yusa aentsrin, Israer-shuar armia nuna ti shiir wainkiamiayi. ³ Túrasha Muisaisjaj nankaamas Kristu ti shiir awajnasuiti. Jējaj nankaamas jēj jeamniuka nekas péñkerchakait. Núnisan Kristu Muisaisjaj nankaamas péñkeraiti. ⁴ Kame ashí jēan shuar jeamtsuk. Tura Yus ashí íranna nuna najanaiti. ⁵ Wats. Muisais Israer-shuaran wáiniuk Yusa Jēen takastinia áintsan péñker takarniuyayi. Tura ni takaak ukunam Yus títiatna nuna etserkatniuyayi. ⁶ Túrasha Kristu Yusa Jēen takarniuchu asa antsu Yusa Uchirí asa nuj ashí akupeawai. Nu jēasha iitji. Tura tuke iniaitsuk kakaram ajasar Yus suramsattaj nu wararsar nákastiniatiji.

Yusa shuarí shiir pujustin

⁷ Nu asamtai, Yusa Shiir Wakaní Yus-Papinium tawai: “Yamaikia, Yus tana nu ántakrumka ⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsan nekapsar akajkarmiayi. ⁹ Túramtai Yus tímiayi “Nuj atumí uuntrí nekapsar akajtukarmiayi. Kuarenta (40) uwitin wi kakaram túramun ísarsha nakitrurarmiayi. ¹⁰ Tuma ásarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiyai. ¹¹ Tura kajerkan nekas takun

“Wijaj shiir pujustinian penké tsankatkachartatjai” tímiyai.”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap. ¹³ Kame kashinkia tunaajaj ananmam enentáimin Yúsnan naki-trashtapash. Tuma asamtai yamaik tura ashí tsawant ikiakánairatarum. ¹⁴ Yámankamtaik Kristu shiir enentáimtusmaj núnisrik tuke iniaitsuk émeteakrikia Kristujaj shiir tsaninkiar pujustatiji. ¹⁵ Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

¹⁶ Muisais Ejiptu nunkanmayá jikmia nú shuar Yusa chichamen anturkariat nakitrarmiayi. ¹⁷ Tura umiiniachkui kuarenta uwí kajerkarmiayi. Tunaan túrawaru ásar untsurí shuar aents atsamunam kajinkarmiayi. ¹⁸ Kame umirkacharunka Yus “Wijaj shiir pujustinian penké tsankatkachartatjai” tímiayi. ¹⁹ Iis, Yúsan enentáimtachu ásar Niijaj shiir pujustinnium wayatniun tujinkarmiayi.

4 Nu asamtai, ii wayatin tsankatkamu áyatar Yusjaj shiir pujustinnium páchitkiachu aij tusar anear-tiniatiji. ² Yaunchu nu shuaran ujakarmia núnisan incha Uwempratin Chichaman ujamakuitiji. Nu shuar Yúsan enentáimtutsuk antukaru ásarmatai nu chicham yáincharmiayi. ³ Antsu iikia ni chichame enentáimta asar Yusjaj shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijaj shiir pujustinian penké tsankatkachartatjai” tímiyai” tímiayi. Kame Yus jú nunkan najana umik nuyá shiir pujus ayampramiayi. ⁴ Yus-Chichamnum ayampramun júnis tawai.

“Yus sais tsawant takakmas nuyá tsawantaj ayampramiayi.”

⁵ Tura ataksha tawai:

“Wijaj shiir pujustinnium wayá ayamprashtatui.”

⁶ Shuar nuj wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. ⁷ Nu asamtai ataksha Yus wayatin tsawantan áanturmaitiji. Nusha yamá tsawantaiti. Wats, Israer-shuar ni nunké Yus susamunam wayáwarmiayi. Tura nuna ukunam Uunt Tawit timiajaj Yus ni chichamen ujamaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitántrí Jusué Israer-shuaran ni nunkeen awayá ayamtikraitkiuinikia Yus ukunam ataksha tsawantan áanturmachajaji. ⁹ Nujaj páantaiti, ashí Yus-shuar Yusjaj shiir pujusar ayampratin tuke awai. ¹⁰ Yusjaj ayampra nu, ni kakarmarijaj takastinian ayampraiti Yus ni takatrijaj ayampramia núnisan. ¹¹ Nu asamtai iisha Yusjaj shiir pujustinnium pachiinkichaj tusar Yus shiir enentáimtusar kakaram ajastiniatiji. Israer-

shuar yaunchu Yus taman nakitrarua núnis ajaschatniuitji.

¹² Yusa chichame iwiaaku chichamaiti, imiá kakarmaiti. Puniá mai érea núniyai. Tuma asa shuara enentáin inít wayá ashí ni enentáimmian tura wakermurín ti paant awajtawai. ¹³ Yus najanamuka penké Nin umprukchamniaiti. Ashí írúnna nu Yus íimmianum misúa áintsan paant áiniawai. Tura ii túramu ashí paant ujakartatji.

Jesus nekas Yúsnan pujurniu úuntri

¹⁴ Jesus Yusa Uchirí nekas Yúsnan pujurniu uuntri ajas Yusaj wayá iiniun chichartamji. Nu asantai iniait-suk tuke nekas enentáimtustiniatji. ¹⁵ Niisha iijjaj métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrín waitnentramniuitji. Tura Yúsnan pujurniu uuntri asantai ¹⁶ Yús-akuptainium shiir enentáijjaj sapijmiatsuk jeamniatji. Tura Yus in anenma asa waitnentramak itiurchat pujajnia nu jainmaktatji.

5 Tura Yúsnan pujurniu úuntri nekas shuar anaikiamuiti tura ni takatrí jímiairaiti. Yusaj shuánnan chicharsatniuiti. Nuyasha Yus súniyamun súsatniuiti tura núnisan naman ken maa Yúsán súsatniuiti shuara tunaarín asakátratniun. ² Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentramniaiti. ³ Tura niisha tujintia asa ni tunaaríncha chíkichnaja métek tsan kurnarat naman ken maa Yúsán súsatniuiti.

⁴ Shuar ni enentáijjaj nekas Yúsnan pujurniu uuntri ajaschamniaiti. Antsu Yus nu shuara anaikiatniuiti. Núnisan Arun kan anaikiamiayi. ⁵ Núniskete Krístujaj. Niisha ni enentáijjaj Yúsnan pujurniu uuntri ajaschamiayi. Antsu Yus Nin anaik nujaj shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakeajme.”

⁶ Tura ataksha Yus-Papinium júnis tawai:

“Mirkisetékka Yúsnan pujurniu amia núnismek Amesha tuke Yúsnan pujurniu átatme.”

⁷ Kristu jú nun kanam pujak kakantar úutuk Yúsán ti seamiayi. Nin jákatniunmayá uwemtikramnia asantai seamiayi. Tura Yusa wakermurín tuke enentáijjaj enentáimtakui Yus anturak ti yáinmiayi. ⁸ Nujaj Kristu Yusa Uchiríntiat ni wáitsatniujaj umirkatniun unuimiarmiayi. ⁹ Nujaj ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsantikrarminiait. ¹⁰ Túramtai Yus Nin Yúsnan pujurniu uuntri Mirkisetékajaj métek awajsamiayi.

Anearta. Yusaj kanakchatniuiti.

¹¹ Ju ti nukap áujmatsatin awai. Túrasha ántichu asakrumin mashí ujakchamniatjarme. ¹² Átumka yaunchu mash nekaamaintrume. Túmaitatrum ataksha yaitiás Yúsnan jintintruat tusarum atsumarme.

Warí, kuirchia núniyai. Kátsuram yútsuk muntsu muntsúatniuitrume. ¹³ Kuírchikia Uwempratin Chichaman áujenak penker unuimiainiatsui. Tinkiamnumiá ásar tujintiainiawai. ¹⁴ Apatuk kátsurman aya uunt yuámmiati. Uunt ainia nuka penkernasha tura ya-jauchincha apatkar paant nékainiawai.

6 Uunt ajastai. Krístunu ana nuyá aya yúpichuchia nuke enentáimtusuk nu arantcha unuimiartai.

Kame emka unuimiartinia nu ju áiniawai: shuar ni tunaarín jákatniunam júana nuna kúntuts enentáimtur Yúsán shiir enentáimtustincha, ² imiantinnium nekaatniuswai:

“Mirkisetékka Yúsnanha, Yus-shuar yainmanum uwe-jé awantsatniusha, jakamunmayá nantaktincha, tura sumamtikiatin tsawanta nu nekaatniusha. ³ Tura Yus yainmakrin nuna nan kaamas nekaattaji.

⁴ Shuar Yusna nuna nekaanka tura Yus susamun takakun ka tura Yusa Shiir Wakaní kakarmarín nekasaitkiun ka ⁵ tura Yusa chichamencha penkeraiti nekaanka tura Yusa kakarmarí ukunam nun ka yamarmanum takastatna nuna yamá nekapeakka, ⁶ nu shuar nuna nakitiak kanakniaka atak ni tunaarín enentáimtak ikiuktinian wakerachuk tujinkiatawai. Warí, ní enentáijjaj Yusa Uchirín krístunum máiniyai túrak ashí ímiainiaj natsanmain awajeawai. ⁷ Nu shuar yajauch nun ka áintsan áiniawai. Yumi yútakui penker nun ka arakan penker tsapatmakka arakmaun yayawai. Túramtai Yus shiir enentáimiui. ⁸ Antsu jan kí nupan tsapatmakka nu nun ka yajauchiiti. Yus áeseak emes-rattawai.

Yus tsan katramkattajnia nu enentáimtakur kakaram ajaji

⁹ Aneamu yatsurú, tu chicharkursha, nú shuar-chaitrum nu nékaji. Antsu uwempra asarum nú penker túrattarme. ¹⁰ Yus ti penker asa átum takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme. ¹¹ Tura nuik túrarmena núnisrumek tuke iniait-suk kakaram takasrum ashí Yus tsan katramkatta nu wáinkiatarme. Núnisan atí tusar wakeraji. ¹² Nakimtsuk kakaram ajastarum. Niiniua nuna Yus ni shuarín susattawai. Tura shuar Yúsán enentáimtak shiir enentáijjaj nákakka nuna wainkiattawai. Tu takastarum tusar wakeraji.

¹³ Yus yaunchu Apraámjaj chichaak “Ti nekas shiir awajsattajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Niijjaj nan kaamas uunt atsakui imia Niñki pachimias tumammiayi. ¹⁵ Tutai Apraám yáitmataik nákas Yus timia nuna wáinkiamiayi. ¹⁶ Shuar “nekas tajai Yus íirui” tákun ka chíkich niijjaj nan kaamas úuntan páchiawai. Tura tu chichasmatain ka nuyán ka imiá nekas tana nu nekaamniaiti. ¹⁷ Tuma asantai Yuska “ti nekasan yapájtsuk túrattajai” tusa imia Niñki pachimias tumammiayi. Nujaj ni tsan katkamun júkiartatna nu shuar Yus ti nekas umiktatna nuna nékainiawai. ¹⁸ Yus penké wáitruachmin asa áyatik ni tamajaj nekasaiti. Nuna arant nuikia imia Niñki pachimias ti ikiakátmaji

in. Nujaj iisha uwempratai tusar Niini weamkatikia tsankatramkattajnia nu ti shiir enentáimsar wáinkiatin nákaji. ¹⁹ Nu enentáimsar kakaram ajaji. Yusaiya in umuchtiamkamnia penké atsawai. Yusaj áchitkia asakrin ti kakaram emettamji. ²⁰ Jesussha emka Yusaj wayá mash iwiarturmaji. Tura Mirkiseték amia núnisan Niisha yamá tuke amuukashtinian Yúsnan pujurniu uuntri ajasuiti.

Mirkiseték amia núnisan Jesussha Yúsnan pujurniu uuntri ajasuiti

7 Nu Mirkisetéksha Sarem nuñkanam akupniuyayi. Tura ashí nañkamas kakaram Yúsnan pujurniuyayi. Apraám chíkich akupniun mesetjaj awakak tá-matai Mirkiseték jiintiuki inkiun ti shiir awásamiayi. ² Túramtai Apraám nupetmakar kuit jukimiun tias (10) akantuk susamiayi. Mirkisetéka naari tana yuka “ti penker uunt akupin” tawai. Tura Sarema “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupin” tawai. ³ Nukurisha aparisha Yus-Chichamnum atsawai. Núnisan ni uuntri sha atsawai. Ni akiiniamurincha ni jakamurincha ujaatsui. Tuma asamtai Yusa Uchirja áintsan tuke ini-angnakchatniun Yúsnan pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi. ⁵ Tuma asamtai Apraám nañkaamas úuntaiti. Muisais akupkamujaj Riwi weeáka Yúsnan pujurin ániawai. Niisha ashí Israer-shuarjaj métek Apraám weeá ániawai. Túmaitiat penké Israer-shuar ni waririn tias akantuk Riwi shuaran suu ármiai. Muisais tu akupkamiayi. ⁶ Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsankatkamuitiat Mirkisetékan niijjaj uunt asamtai susamiayi. Túram Mirkiseték Apraáman shiir awajsamiayi. ⁷ Imiá nekas Mirkiseték Apraáma nañkaamas páantin asa Apraáman shiir awajsamiayi. ⁸ Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham penké ujaatsui. ⁹ Yamái Riwi weeá shuar kuit akankamun achiktin ániawai. Túrasha Apraám Mirkisetékan súakui Riwi weeá nujaj susa ániawai. ¹⁰ Apraám weeá ániak ni ayashía áinis enentáimtusmin ániawai.

¹¹ Muisais akupkamunam Riwi-shuarnumiá aya Arun weeá shuar Yúsnan pujurin ármiai. Niisha Muisais akupkamu timia nujaj métek penké shuarjaj takasarmiayi. Tura Riwi-shuarnumiá Yúsnan pujurniu takarrijaj tunáa nekas asakárminiatkiuinikia Yúsnan pujurin yamarmak, Arun weeachu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniun anaikiai. Nusha Arun weeachuiti. ¹² Tura Yúsnan pujurin yapajniámtai Muisais akupkamusha yapajniátniuiti. ¹³ Nu arantcha, ii Uuntri Jesukristu Riwi-shuarcha antsu Jutá-shuarauyayi. Tura Muisais akupkamujaj Jutá-shuarnumiá Yúsnan pujurin atsutniuiti. Antsu nuna takarjin penké túrashtiniuyi. Tuma asamtai nujajisha Muisais akupkamu yapajniátniuiti.

¹⁵ Nú páantcha awajsamniai. Wats, Yúsnan pujurin yamarma nuka Mirkisetékaj méteketete. ¹⁶ Niñkia Riwi shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiayi. ¹⁷ Tuma asamtai juna Yus Jesusan áujmatui: “Mirkisetékka Yúsnan pujurin amia núnismek Amesha iniañnatsuk Yúsnan tuke pujurin átatme.” ¹⁸ Nujaj yaunchu akupkamu penkercha ajasmatai japirmaiti. ¹⁹ Muisais akupkamuka shuáran penker awajsachminiuyayi. Antsu Yus in ti shiir awajtamsattajnia nu nákaji. Nujaj Yusaj ti shiir jeeáitji.

²⁰ Nunasha Yus “nekas tajai” tusa Niñki pachiiimas tumamiayi. ²¹ Riwi-shuarnumiá Yúsnan pujurin Yusa naari pachitsuk anaikiamu ármiai. Antsu jú Yúsnan pujurniunka Yus imia Niñki pachiiimas anaikiamiayi. Tura Nin júnis tímiayi:

“Uuntka imia Niñki pachiiimas tiniu asa penké yapajjáshtatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

²² Tuma asamtai Jesuska nekas uwemtikrattajai tusa yaunchu amia nujaj nañkaamas penker Chichaman iwiarturuiti. ²³ Yaunchu Yúsnan pujurin untsuri ármiai. Chíkich jakamtai chíkich tuke takaarmiayi. ²⁴ Antsu Jesus tuke jákashtin asa chikichan ikiurkishtatui. ²⁵ Tuma asa tuke iwiaaku pujak ni shuarin tuke Yúsan áujtusminiai. Tuma asa shuar Nin enentáimtusar Yusaj weankarun tuke uwentikramniai.

²⁶ Tuma asa Jesus Yúsnan penker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmayá kanakniuiti. Tura Yusaj métek Uunt ajasuiti. ²⁷ Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsan suu ármiai. Nujaj emka ni tunaarjin nuyá ashí shuara tunaarjin asakátin ármiai. Tura Jesuska jákatniunam chikichí surumak ashí shuara tunaarjin asakátramiayi. ²⁸ Muisais akupkamuka penké shuarnak tuke penkercha ajin Yúsnan pujurniu uuntrin anaikiai. Tura nu ukunman-ka Yus, nekas niñki pachiiimas, ni Uchirin, tuke penkera nuna, Yúsnan pujurniu uuntrin anaikiai.

Nañkaamas penker Chichaman Jesus takartamji

8 Nekas juna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuuniri nayaimpiniam pujusuiti. ² Nekas Yusa Jee nayaimpinma nu aents najanachma antsu Yus najanaimuiti. Nuj Jesus Yúsnan pujurui. ³ Ashí Yúsnan pujurniu uuntri ainia nu, shuar Yúsnan susamuncha tura namañ maar Yus sútaincha Yúsan ashí súsatin ániawai. Núnisan Jesukristusha Yúsan súsatniuiti. ⁴ Juyá Yúsnan pujurin Muisais timia nuna Yúsan yamaisha susamin akui Jesus ju nuñkanam pujakka Yúsnan pujurin áchainti. Antsu nayaimpiniam takaawai. ⁵ Yus yaunchu Muisaisan nayaimpiniam íranna nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana

nuna nakumkamujajin takainiawai. ⁶ Antsu Jesus ti nekasa nujaj nayaimpiniam takaawai. Muisais akupkamuka shuáran péñker awajsachminiaiti. Antsu Yus in ti peñker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti peñker áiniawai. Tuma asamtai nankaamas péñker Chichaman Jesus takartamji.

⁷ Kame Emka Chicham, Yus Muisaisjaj yaunchu najanamia nu, nekas péñkeraitkiuinikia Yamaram Chichaman najanachaayai. ⁸ Antsu péñkercha áiniakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajai. ⁹ Yaunchu ju shuara uuntrin Ejiptunmayá yaruakmiaj nu Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniais-armajai.” Núnis tawai Uunt Yus. ¹⁰ Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrartatjai. Nuyá ni Yusrí ártatjai tura niisha Wíi shuar ártatui. ¹¹ Nujsha Yúsán nekaat tusa jintinnaiyachartatui. Kame ni ajsa ni yachisha kame ashí shuar, uchisha uuntcha, ashí nekarawartatui. ¹² Tura ashí ni tunaaríncha tsanukuraran ni yajauchirín atak peñké enentáimtuschartatjai” tímiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman najaneak pujurui. Tura yajauch ajasua nuka wárik ajapnattawai.

Yusa Jee nayaimpinmasha tura ju nunkanmasha

⁹ Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmayá Yusa Jee weriar Yús shiir awajsatniuyayi. ² Nu Jee sha júnis tesakmauyayi. Nékatka Shiir Tesaamu tutainti. Nu asutin ekeemakar tsáapin awajtaisha tura misasha Yus iniaktusma tantajaj pujuyayi. ³ Nuyá-tesaamuka Imiá Shiir Tesaamu tutainti. ⁴ Nu kunkuin ekeemataisha kurijaj kuerma tura Chicham Aarma Chumpitiaisha pujuyayi. Nusha ashí kurijaj kuérmauyayi. Tura init kurijaj najanamu ichinkian maná yurumak enkemniuyayi. Nuyá Yúsán pujurniu uuntri Arunka ushukrutairi yaunchu tsapaak janukmia nusha enkemniuyayi. Nuyá Yus najanamu Chicham Muisais kayanam aarmasha enkemniuyayi. ⁵ Nuna úkurin Kirupin, nayaimpinmayá suntara nu, kurijaj nakumkamu wajarmiayi. Nusha Yusa shíirmarin nakumkarmiayi. Tura ni nanapéjaj shuara tunaarín ayamprutain nukúakuyayi. Nuna arantka yamá etserkatin atsumatsji.

⁶ Núnis aa asamtai Shiir Tesaamunam ashí Yúsán pujurin tuke wáiniak Yúsán takasarmiayi. ⁷ Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsanukurarat tusa Yus súsatniu namanké numpen juu ámiayi. ⁸ Yusa Wakaní núnis atí tusa nuna mash iwiamiyayi. Tura asa júna paant awajturmajai. Jú

nunkanmayá Yusa Jee pujakui tura aya nuin Yus shiir awajsamniaitkiuinikia nekas Imiá Shiira nu Yus pujamunam wayatin tuke iturchat ainti. ⁹ Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suiniaksha nu shuar ni tunaarijaj tuke itit enentáimtumainiawai.

¹⁰ Warí, aya yurumátniusha umartincha nijartincha tura ashí núnisan túratniujaj aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asamtai yapajiat-sajin túratin áiniawai.

¹¹ Tura yamaikia Kristu táwiti tura Yúsán pujurniu uuntri ajas Yamaram Chichamnum Yus ti peñkeran túrutmatniua nuna pujurturmaji. Niisha ti shiir Yus Jee aents najanachmanum takaawai. Nu Jee ju nunkanmayanchuiti. ¹² Tura Kristu Imiá Shiir Tesaamunam namanke numpéjaj wayachuiti antsu ni numpejajin' wayaiti. Tura aya chikichik wayá ii tunaarín asakturmar tuke uwentikrampramijai. ¹³ Nekas namanké numpesha tura áisamu yun kunmirisha tunáa shuar-num pátatek ukatkamu aya pátatek shiir awajsamniuyi. ¹⁴ Túrasa Kristu numpé ii tunaarín peñké asakáruiti. Túramtai yamaikia tunáa jákatniunam júana nujaj itit enentáimtumatsuk nekas iwaaku Yus shiir umirkamniaitji. Kristu peñké tunaaríncha asa tuke jákashtin Wakaní kakarmarijaj jákatniunam Yusaj surumakmiayi.

¹⁵ Nu asamtai Jesukristu Yamaram Chichaman shiir takarniuiti. Yaunchu Chichamjai tunáa nekas tsanukurachma asamtai Kristu jaka nu tunaancha tsanukurarmiayi. Nujaj ashí Yus-shuarti Yus achikma asar Yus tsanukatramajnia nu wáinkiar tuke wararsattaji.

¹⁶ Shuar ni kuítrin akantrattak chichaman najanatniuiti. Tura jáatsajin nu kuit akantrashtiniaiti. Aya nii jakamtai nu chicham najanamu uminkiatniuiti. ¹⁸ Nu asamtai Emka Chicham Muisaisjaj najanamusha maamu numpé ukatramujaj akupkamuyayi. Nujajsha namán máatniuyayi. ¹⁹ Muisais nu akupkamun ashí shuáran ujakarmiayi. Nuyá ure kapaakujaj tura nupajajsha namanké numpé entsajaj pachimpramujaj ayak akupkamu papincha ashí shuarnasha ukatkarmiayi. ²⁰ Tura tiarmiayi “Ju numpajaj “Chicham Yus akupturmarmena nu nekas umiktiniaiti” tawai.” ²¹ Nuyá nu numpajaj Yusa Jee ncha ashí nu takastin irunmia nunasha ukatkarmiayi. ²² Nu akupkamujaj peñké ishichik numpajajin chu shiir awajsamniaiti. Túrasa numpajajin chu tunáa peñké asakárchamniaiti.

Kristu jakamujaj tunáa asakármniaiti

²³ Tuma asamtai Muisais najanamu nayaimpiniam ana nuna aya nakumkamu ásar namanké numpejaj shiir awajsamu ármiai. Antsu nayaimpiniam nekas írunna nu, nankaamas kakaram numpajaj shiir awajsatin áiniawai. ²⁴ Kristuka yaunchu Yusa Jee aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmajai. ²⁵ Yaunchu Yúsán pujurniu uuntri ni numpejajin chu

ashí uwitin Imiá Shiir Tesaamunam wain ármiayi. Tura Krístuka untsurí wayachuiti. ²⁶ Kame untsurí wayatniuitkiuñkia ni numpejajin^k wayá asa yámankamtaiknumiá untsurí jákaayi. Antsu yamaikia ju nuñka amúamunam Kristu chikichí jákatniunam surumak tunaan ashí asakáruiti. ²⁷ Ashí shuar chikichí jakar nuyá ni túramun Yusaj nekamatniun nantaktin áiniawai. ²⁸ Núnisan^o Kristu chikichí jákatniunam surumak shuara tunaarjn asakáruiti. Tura atakka tunaan asakártinian wantinkiashtatui. Antsu ni tátrin^o nákainia nuna uwemtikkrratssa wantinkiattawai.

10 Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin namañ maar Yus sútaijijajsha shuara tunaarjn asakátrachminiaiti. ² Kame asakátraka shuar nekas shiir awajsamniaitkiuñkia Yus namañ maar súsatniun atsumachuk iniaisarajayi. Iis, mash tsankura-muitkiuñka ni tunaarjijaj itit enentáimtuscharainti. Túrawar namañ maar Yus súsatniun iniaisarainti. ³ Antsu namañken maar ashí uwitin tuke suñiak nujaj ni tunaarjn tuke enentáimtuiniawai. ⁴ Warí, namañké numpejaj ii tunaarj penké asakárchamniaiti.

⁵ Nu asamtai Kristu jú nuñkanam taa Yúsan chicharuk tímiayi:

“Namañ maar sutaisha penké nakitrume. Antsu ayash iwiamur surusuitme. ⁶ Namañ áesamusha tura tunaan asakártin namañ susamusha wakeratsme. ⁷ Tuma asamtai “Yusrú, tímiajai. Winia áatrurma núnisan^o ame wakeramurmin umiktajtsan táwitjai” tímiajai” tímiayi.

⁸ Emka, Muisais akupkamu ajn, namañ susamuncha, tunaan asakárat tusa namañ maar susamuncha, namañ áesamuncha Yus ashí nakitraitit tawai Kristu.

⁹ Nuyá “Yusrú, ame wakeramurmjn umiktajtsan táwitjai” tawai. Nuna taku namañ maar sútain “Asakáiniaiti” tawai. Tura chikichan ikuawai. ¹⁰ Jesukrístu Yúsan umiruk jákatniun chikichí surumakmatai Yus in tunaarinchá shiir awajtsamaitji.

¹¹ Tura Israer-shuarnumiá Yúsnan pujurin ashí tsawantaj nú namañnak máawar tunaan asakáchunak Yúsan ti suu áiniawai. ¹² Antsu Jesukrístuka jákatniunam chikichí surumak ashí shuara tunaarjn asakár atakka penké jákashtiniaiti. Nuna tura Yusa untsuuringi nekas akupin pujutainium pujusuiti. ¹³ Tura Yus ni nemasrjn nupetak nin umirkarti tusa súsartatna nuna nákwai. ¹⁴ Chikichí jakamujaj ni shuarjn tuke tunaarinchá awajtsaruiti. ¹⁵ Yusa Wakanjsha núnisan^o tawai. Emka tímiayi:

¹⁶ “Yamaram Chichaman najanattaj nuka júnisaj^o átatui: Wi akupeaj nuna ni enentáin paant enentáimtikrattajai.” ¹⁷ Nuyásha tawai: “Ni yajauch tunáa túramurjn penké enentáimtuschatatai.”

¹⁸ Tuma asamtai, ii tunaarj tsankuramu asamtai atak in jarutramkatin atsumatsji.

Yus tuke shiir enentáimtusar Yusaj jeartai

¹⁹ Tuma asamtai, yatsurú, Jesukrístu numpejaj penker awajsamu asar sapijmiatsuk shiir enentáijijaj Imiá

Shiira nuj, nekas Yus pujamunam wayamniaitji. ²⁰ Nuj wayatniuka Kristu jaka Yusa Jeeñ tesaamun júsatniua áintsan ánturmamiajai. Yamaisha tura tuke wayamnia átatui. ²¹ Jesus Yúsnan pujurniu uuntri^o asa ashí Yushuartin wáitmak pujurtamji. ²² Tuma asamtai, tuke enentáijijaj Yus imiá nekas enentáimtusar Yusaj jeartai. Ii enentáin Kristu numpejaj niijarma asamtai nekas enentáimtakur ii tunaarjijaj itit enentáimtusmaschatniuitji. Tura ii ayashisha penker entsajaj imianniuitji. ²³ Yus tsankatramkattajnia nu shiir enentáimtamun iniaitsuk kakaram ajasar tuke emetatniuitji. Yus tsankatramkaitji nuna umiktatui. ²⁴ Penker anenain tura penker túrin ajasartai tusar mai yainiaikiartiniaitji. ²⁵ Yusa Jeeñ Yus-shuarjaj tuke iruntratin iniaisastini-aitji. Chíkich iniainiakuisha iikia tuke iruntratniuitji. Nuj irunkurkia ikiakánairtiniaitji. Tura Kristu tátrin tsawantri ishichik ajasu asamtai nú nukap túratniuitji.

Anearta. Ti tsúumainti iwiaaku Yusa kakarmarjijaj asutniátin.

²⁶ Túrasa shuar nekas chichaman nékayat wakera-murijijaj^o tunaanum wekaakka Kristu jakamun nakitia asamtai chíkich atsawai ni tunaarjn asakátratniun.

²⁷ Áyatik ashamak ti tsuumai sumamatin tsawantan nákasminiaiti. Nu tsawantaj Yus ni nemasrjn ti kajerak asutiak mash emesrattawai. ²⁸ Shuar Muisais akupkamun umikchamtai tura jímiar shuar menaintiusha etserkarmatai waitnentsuk máatniuyayi. ²⁹ Núnisaitkiuñkia shuar Yusa Uchirjn wishikiainiakka ni numpencha nakitiainiakka tura Yus nin anea nuna Wakanjinchá katsekainiakka nuna nankaamas asutniáchartatuak. Warí, nii nakitiana nu numpajaj Yamaram Chicham nekas umirkatin awajsamuyayi. Tura nújajsha nii ti penker awajnastiniuyayi. ³⁰ Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wii shuara tunaarjn ti paant nekarattajai.” ³¹ Ti tsúumainti iwiaaku Yusa kakarmarjijaj asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme. ³³ Chíkichtirmeka katseknakmarme tura ashí íimiainiamunam yajauch awajnsarmarme. Chikichcha nu shuarnum pachitkia asarum itit awajnsarmarme. ³⁴ Atumsha sepunam pujuinia nusha waitnentrarmarme. Tura shiir warasrum kuítrumin atantramainiakkuisha katsuntramarme. Nayaimpiniam tuke amuukashtin kuit pachiktin asarum túramarme. ³⁵ Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiattarme. ³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme. ³⁷ Kame Yus-Chichamnum áarmaiti:

“Tátinia nu ishichik ajasai. Wárik tátatui. ³⁸ Shuar Yúsan nekas enentáimtak penker wekaak uwemprat-tawai. Tura iniaiyakuñkia nin warawsashtajai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

Yus nekas enentáimtustin

11 Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji. ² Yaunchu ii uuntri Yúsan nekas enentáimtuiniakui Yus “péñkeraitme” tiarmiayi.

³ Aya Yus enentáimtakur ju nékaji: Yus aya ni chichamejajin ashí nuñkan najanamiayi. Túramtai ashí wáiniainiaj nu wáinchataijjaj najanamu áiniawai.

⁴ Apir Yúsan nekas enentáimtak Kaínjaj nankaamas péñkera nuna Yúsan susamiayi. Túramtai Yus “péñkeraitme” taku shiir yumisamiayi. Tuma asamtai Apir jákaitiat tuke enentáimtikramji.

⁵ Euksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Euk júnat-suk Yúsan ti shiir enentáimtikniuyayi” tawai. ⁶ Tura Yus nekas enentáimtachkumka žitiurak Nii shiir enentáimtiksatam? Nekas enentáimjaj Yúsan weantuktaj tusam wakerakmeke, emka, Yus iwiaaku pujawai, tu enentáimpratniuitme. Nuyásha, Wi Yúsan ežakuinžia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai” tiniu asamtai, Nu-aisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajaj métek uunt kanun najana ni shuarincha uwemtikramiayi. Tura Yúsan nekas enentáimta asamtai Yus “péñkeraitme” tímiayi. Tura ni umirkamujaj chikich shuar Yúsan enentáimtachun súmamtekiawarmiayi.

⁸ Tura Apraámsha Yúsan nekas enentáimtak Yus “núñkem ikiukim wetá” tutai shiir umikmiayi. Yus tuke nin súsatniua nú nuñkanam wémiayi. Turasha ni nuñken ikiuak ni jeatniun nékatsuk jiinkimiayi. ⁹ Yúsan shiir enentáimtak nú nuñkanam Yus nin tsanatkamuitiat írara áinis pujusmiayi. Nuap jeanam pujuyayi. Núnisañ ni uchirí Isaksha tura ni tirañkí Jakupsha nuñ tsanatkamuitiatan írara núnisar pujuarmiayi. ¹⁰ Kame Apraámka nayaimpinmayá ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachminiaiti.

¹¹ Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchín takusmiayi. ¹² Tura nujaj Apraám ti úuntchitiat ti pampanmiayi. Nii chikichkitiat ni pampanmarj ti untsurj ajasar yaajaj métek tura náikmijjaj métek nekapmarchamnia ajasarmiayi.

¹³ Ashí nu shuar Yus tsanatkamun wáintsuk jákarmiayi. Túrasha Yúsan nekas enentáimtuiniak arantiž wáinkiar warasar shiir enentáimtiarmiayi. Túrawar “ju nuñkanam nekas aya íraraitji” tiarmiayi. ¹⁴ ‘Íraraitji” tu chichainiak chikich nuñka ežamun páant awajainiawai. ¹⁵ Niisha matsatu winíarmia nuj atak waketkitniun wakeruiniakka páchitsuk waketkiaražayi. ¹⁶ Tura antsu niisha nuna nankaamas péñker nuñkan nayaimpinmayá nuna enentáimtiarmiayi. Túmainiakui Yuska péprun iwiartur susa asa “wi ni Yusrintjai” títinian natsantatsui.

¹⁷ Ataksha Apraám Yúsan nekas enentáimtak “chikich uchi amasmaj nu, namankea áitkiasmek maam surusta” takui Apraám Isakan ni uchirín Yus susatniun penké suritkiachmiayi. ¹⁸ Kame Yus “Isakjaj ti pampan-tatme” tau asamtai ¹⁹ Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatni-unmayá uwempran nantakniua áintsan wáinkiamiayi.

²⁰ Isaksha Yúsan nekas enentáimtak ni uchirín Jakup-nasha Esauncha ukunam ni túrunattana nuna ujakarmiayi. ²¹ Núnisañ Jakup Yúsan nekas enentáimtak jatsuk ni tirañkín, Jusé uchirín, shiir túrunattana nuna ujakarmiayi. Tura ti uuntach asa máshtunkrín ushukruma Yúsan shiir awajsamiayi. ²² Tura Jusesha jákatniurj ishichik ajatesmatai Yúsan nekas enentáimtak Yus ukunam Israer-shuaran Ejiptu nuñkanmayá júkiartatna nuna ujakarmiayi. Tura jíiniainiak ni ukunchín júkiar Yus tsanatkamu nuñkanam iwiarsarat tusa akupkamiayi.

²³ Muisaisa aparísha nukurísha Yúsan nekas enentáimtuiniak Muisais ti shíirmach asamtai suntar máawarajin tusa akiiniamunmayá menaintiu nantu úukarmiayi. Tura uunt akupin akupkamun ashamkacharmiayi. ²⁴ Muisaissha Yúsan shiir enentáimtak uunt ajas Ejiptunmayá uunt akupniu nawantrj uchirí ajastinian nakitramiayi. ²⁵ Antsu Ejiptu nuñkanam ishichkisha tunaan warartsuk Yusa shuar-ijjaj métek wáitsatniun nankaamas wakerukmiayi.

²⁶ Nujaj Krístun yajauch awajsarmia núnisañ niisha wáitsatniuyui. Túrasha ashí Ejiptu nuñkanam péñker irunmia nuna nankaamas Yus nin ukunam tsanatkatta nuna shiir enentáimtusmiayi. ²⁷ Niisha Yúsan shiir enentáimtak uunt akupin kajeramu ajin ashamsuk Ejiptu nuñkanmayá jiinki wémiayi. Yúsan wáinchiat shiir enentáimtamujaj wainiua áinis kakaram ajas ashí katsuntramiayi.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajaj ni wáitirín kuérat tusa akupkarmiayi. Nujaj Yus timia núnisañ nayaimpinmayá suntar nuna iis nu jeanam iwiairín máatsuk nankaikit tusa tímiayi.

²⁹ Israer-shuarsha Yúsan shiir enentáimtuinia ásar Kapantín Entsa nakaakamtai ajapén ti penker kukar-num katiñkiarmiayi. Ejiptunmayá suntarsha núnisañ katiñtai tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun tén-takarmatai až tanish sánákmiayi. Nujaj ti yúpichuch nupetkarmiayi. ³¹ Raapsha nu péprunam pujak, Yúsan nekas enentáimtak tsanirmataj áyat Israera suntarín mamikmak wekaan ti penker itiaa asa chikich shuar Jerikiúnam matsatua nujaj jákachmiayi.

³² Nu arantcha Yúsan shiir enentáimtin ti írunui. Jeteñsha, Paraksha, Sañsunsha, Jiptísha, Tawitsha, Samuersha, Yúsnan etserniusha nu shuar ármiayi. Mash ujaktinian jeatsjai. ³³ Niisha ashí Yúsan nekas enentáimtuinia ásar Yusa kakarmarín niisháa niisháa iniaktusarmiayi. Nuna túruiniak chikich chikich

nuṅkanmaya aentsun nupetkarmiayi, nuṣha péṅker akupkarmiayi, tura Yussha ni timia núnisaṅ yaṅkiarmiayi. Uunt yawanḅha kajeḅu awajsarmiayi, ³⁴ uunt jini-asha ikiajniaarmiayi, puniajaj mantamnatniunḅha uwemprarmiayi. Kakarmachusha kakaram aḅasar mesetnumsha ni nemasrṅnḅha nupetkarmiayi.

³⁵ Nuwasha ni uchirṅ jakan iniantkimiun wáinkiararmiayi.

Chikichḅha wáitias mantamnowarmiayi. Ti shiir pujustinnium nantaktiai tusar nú tsawantaj uwempratniun nakitrarmiayi. ³⁶ Chikichḅha katseknakarmiayi, asutniáwarmiayi, jirujaj jṅkiawar sepunam eṅkenawarmiayi. ³⁷ Kayajaj tukú mantamnowarmiayi, jímiaPETEK tsupinkiararmiayi, Yúsan iniaisar tusa nekapnasarmiayi, puniajaj mantamnowarmiayi. Aya wékainiararmiayi, kuṅtrinḅha ásar nuapen entsararmiayi, shuar ninḅha áinṅtrar wáitnenmai awajiararmiayi. ³⁸ Atsamunmasha, nainḅha, wáṅnḅmasha, ashí nuṅkanam wekain ármiai. Nu shuarjajṅkia ju nuṅkanmaya shuar imiá yajauch ásar niijaj pujumainḅha ániawai. ³⁹ Nu shuar Yúsan shiir enentáimtuiniakui Yus “péṅkeraitrume” tiarmiayi. Túmaitiat ni tsanḅkatkamun wáinkiacharmiai. ⁴⁰ Yuska nuna naṅkaamas péṅkeran iwiarturaru asa tura in yamáí pujajnia juṅna enentáimturma asa niisha iisha mai metek tsanṅkiar ti péṅker aḅasarti tu enentáim-samiayi.

Jesus tuke enentáimtusar tsékeṅtiaí

12 Ashí ju nuṅkanam túrajnia nuka shuar nakuruniak tsékena nujaj nakumkamniaiti. Ashí shuar yaunchu Yúsan shiir enentáimtusaruka téntakar iir-mainiaji. Tuma asamṅtai ashí kijin ana nusha tura ashí tunaaka itit awajtamaḅ nusha ajapa iniaisar tura katsuṅtrar tsékeṅkir jeatai. ² Túmakur Jesus tuke enentáimtusar tsékeṅtiaí. Ashí shuarjaj naṅkaamas Jesus Yúsan ti nekas enentáimtak aya péṅkernak túramiai. Tuke nekas awakmakmiayi. Imiá tunáa shuáran krusnum máatin aṅṅ núnisaṅ natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuṅtramiayi tura nuyá Yusa untsuurinṅ akupin pujutainium pujusuiti.

³ Tunáa shuar Jesusan wáitkiasarmia nu enentáimpratarum. Túrarum pimpitsuk katsuṅtratarum. ⁴ Átum tunaajaj máaniakrum Jesus túramia áintsarum numpemsha puárchaitrume tura jákachuitrume. Nuṣha katsuṅtrarum jeatniuitrume. ⁵ Yus nekas ni uchirṅ chicharkatniua áinis túramprum nu kajinmatkíchmarshuram. Júnis tawai:

“Uchirú, wi jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintiniawai. Tura ni uchirṅ aḅasat tusa achána nuna asutiawai.”

⁷ Tuma asamṅtai Yus ni uchirṅ áinis asutiámkuisha katsuṅtratarum. Warí, ashí apa ni uchirṅ chicharkashtat-uak. ⁸ Tura ashí uchin chicharkatniua núnis Yus atumin chichartamchakrumṅṅkia nekas ni uchirṅchuitrume. Antsu chikichnaitrume. ⁹ Nu arantḅha ii aparṅ uchich árinṅ chichartamkurin umirniuyaji. Nu arant nuikia nekas ii Aparṅ nayaimpiniam pujana nu shiir umirkar

tuke shiir pujustin wakerishtatjik. ¹⁰ Ii aparṅ ishichik ni enentáijaj wakeramu chichartamniuyaji. Antsu Yuska ti péṅker awajtamsataḅ tusa nekas atsumajnia nujaj métek chichartamji. ¹¹ Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujaj unuimiaj nuka péṅker túratniun tura shiir pujustinian yáinmaji.

Anearta. Yus tana nu nekas antuktiniaiti.

¹² Nujaj pimpirarusḅha tura kakarmachu ainia nusha ikiaḅartarum. ¹³ Túrarum péṅker esettsa enentáim-sarum wekasatarum. Túrarum tujintiania nusha shiir wekasatin yaṅtarum.

¹⁴ Ashí péṅker túrakrum ashí shuarjaj nawamnaikiarum péṅker wekasatarum. Tunaan túrinkia Yusaj péṅké jeashtatui. ¹⁵ Aneartarum. Shuar nakitiakuṅkia Yus nu shuáran shiir yaṅtinian tujinkiat-tawai. Nu shuar yajauch enentáimiuk chikich shuáranasha itit awajas tunaanum útsukartatui.

¹⁶ Tsanirmawairap.

Yusna nusha nakitrairap. Isaka uchirṅ Esau péṅkera nuna nakitrarmiayi. Yus “iwiajṅn núkap súsatniuiti” timia nuna enentáimtuschiarmiayi. Tura asa aya ishichik yurumkajaj yapajjámiayi. ¹⁷ Tura nuyá ni aparṅ ukunam túrunattana nuna takui Esau ti péṅkeran wakerimiayi. Tura ti útkuisha ni aparṅ nin nakitrarmiayi tura ni chichasman yapajjátniun tujinkiamiayi.

¹⁸ Atumjajṅkia Yusna enentáimtusminia nuka yaunchu Israer-shuarjaj ashammam amia núnischaiti. Yáunchuka Yus ni akupkamurṅ Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi. ¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi. ²⁰ Kame Yus chichaak “Shuarsha taṅkusha ishichkisha nú muranam najarmatai nuka kayajaj tukurar tura naṅkijajisha máatniuiti” tímiayi. Nu akupkamu ti ashammai asamṅtai “chichaschati” tiarmiayi. ²¹ Wáinkiaromia nu ti tsuumai asamṅtai imia Muisaissa “Ashamakun kurajaj” tímiayi.

²² Antsu atumjajṅkia Yusna enentáimtustin nujaj naṅkaamas péṅkeraiti. Átumka nayaimpinmaya Seun náinnium, Jerusarḅn iwiaaku Yus pujutai péprun nakumeana nuṅ jeeáitrume. Nuṣha ti untsurṅ nayaimpinmaya suntarsha ²³ ashí Yus-shuarsha shiir iruntrar ániawai. Yus-shuarka ashí nayaimpiniam ni naarṅ anujtukma ásar ni uchirṅ ániawai. Nuṣha Yus, ashí shuaran ti nékana nu, pujawai. Niisha shuáran ti péṅker awajsamṅtai nu shuar jákar ni wakanṅ nuṅ shiir pujuiniawai. ²⁴ Nuṣha Yamaram Chichaman in takartamajnia nu, Jesus, pujawai. Nuna numpe ukatramujaj ashí shiir awajsaiti. Nu numpasha Apira numpejaj naṅkaamas péṅkeraiti. Kame Apir ántar máamu asamṅtai yapajmatrukta titinia áintsanṅ enentáimtaji. Antsu Jesus tunáa shuáran péṅker awajsartaj tusa jakamiayi.

²⁵ Nuka ti péṅker asamṅtai Yus chichartamprumna nu nekas anturkatniuitrume. Yaunchu Yus jú nuṅkanam murá chichaamun anturkachar asutniátniunam uwem-

pracharmiayi. Nuĭkia Yus nayaimpinmaya chichar-tamkurin ántachkurkia ishichkisha uwemprashtatji. ²⁶Yaunchu Yus chichameĵajĭ nuŋkan úŷrmamtikiarmiayi. Tura yamaisha tawai “Ataksha aya núŋkankechu antsu nayaimpinmasha úŷrmamtikiattajai.” ²⁷“Ataksha” tana nuĵajĭ “ashí muchitrámnia nu amuukartatui” tawai. Tura muchitrachminia nu juakartatui. ²⁸Yus in akupkatniun tsanċatramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. ²⁹Maa, ii Yúsriŋkia kajerkaŋka uunt jía nuke áesaa mash emesramniaiti.

Yus shiir enentáimtiksatĭn

13 Nuamtak yachĭa núnisrum tuke mai anenai ajatarum. ²Tuke íŷrar shiir itiaatarum. Nuna túruiniak shuar nékachminiak nayaimpinmaya sun-taran itiaawaruiti.

³Sepunam pujuinia nusha atumsha niijĵajĭ puĵáa núnisrumek waitnentrarta. Wáitkiasarma nusha wisha núnisnak wáitsamniapitĵia tusarum waitnentratarum.

⁴Nuatnaikiatin péŋkeraiti. Shuar ni nuweĵajĭ tsaniŋ puĵustin péŋkeraiti. Tura nuatkamu ainia nusha chikichan eċkchatniuiti. Tsanirmana núnaka Yus asutiát-tawai.

⁵Aya kuítia enentáimtusam puĵusaip. Yuska “Kanakchattajai tura peŋké ikiukchattajme” túramui. Tuma asamtai ame takakmena nuĵajĭ shiir enentáim-sam “maakete” titiá. ⁶Tiniu asamtai arantutsuk ju tíminiaitĵi: “Winia yainnia nuka Uunt Yúsaiti. Nu asam-tai shuar túrutamnia nuna ashamkashtatĵai.”

⁷Atumin Yus-Chichaman jintinramawarmia nu enentáimtustarum. Yúsán shiir enentáimtuiniak péŋker wekasarmia núnisrumek atumsha túratarum.

⁸Jesukrístuka tuke yapajĵtsuk nuikiya núnisaŋ ya-maisha tura ukunmasha tuke núnisaŋ átatui. ⁹Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajajĭ enentáiruĵĭ kakaram ajastaj táyat peŋké yáinċhaiti. Yurumeaj núĵajĭnchu antsu Yusa aneŋkrattairijĵajĭ ii enentáin kakaram ajasminiaitĵi.

¹⁰Yáunchu Yúsán pujurin namaŋ maar Yus susamunmayan yuu ármiayi. Tura iikia Yus-sutajĭ nusháa ana nu súaji. Nusha Kristu jakamu asamtai

yaunchua nu Yúsán pujurin nuĵĭ pachiiŋkiachmin áini-awai. ¹¹Israer-shuarnumiá Yúsán pujurniu uuntri tu-naan asakártaj tusa namaŋké numpen júkiar Imiá Shiir Tesaamunam waŷn ármiayi. Tura nu namaŋ arant áe-satniuyayi. ¹²Núnisaŋ Jesussha péprunam arant wáitkianas mantamnamiayi. Nuĵajĭ ashí shuara tunaar-in ni numpeĵajĭ nijiatkaiti. ¹³Núnisrik iisha péprunmaya arant wétinia núnisrik Jesusajĭ weri Niijĵajĭ métek wishik-main katsuntutai. ¹⁴Kame ju nuŋkanam amuukachmin pepru atsawai. Antsu ukunam ti shiir pepru átatna nu nákaĵi. ¹⁵Tuma asar namaŋ maar Yus sútsuk antsu shiir chicham súakur tuke Yus shiir yúmiŋkijai. Tuke núnisar túratai. ¹⁶Péŋker túrakrum takakrum nu ajam-naisatin kajinmatnaikiirap. Nusha ti shiir Yus sútainti.

¹⁷Yus-shuaran akupin ainia nu umirkarum shiir enentáimtikratarum. Ni takatrin Yúsán ujaktin ásar atumí wakanin shiir wainiainiawai. Niisha itiurchatcha antsu wakerumainian túrawarat tusarum shiir yáin-tarum. Nu túrachkumka ĵitiurak yainmakarat?

¹⁸Incha Yus áujsatarum. Iisha ashí péŋker túratin wakeraji. Túraĵi enentáimĵi. ¹⁹Tura Yus áujkuram Yus ataksha atumĵajĭ wainniaikiatniun wari tsanċatrukut tusarum seatritiarum.

Amúak shiir chichaawai

²⁰Imiatkinchanum apujkartinia nú Yus, Jesukrístun jakamunmaya iniantkĵimia nuka, ni numpé kakarmar-ijĵajĭ ashí péŋker ana nuna suramsarti. Nuĵajĭ ni wakera-mu túrattarme. Tura Jesukrístu kakarmarijĵajĭ ashí ni wakeramun in pujurtamas takasti. Ii Uuntri Jesukrístu ashí Yus-shuaran ti peŋker Wáinniuiti. Tura ni numpe-ĵajĭ Yamaram Chichaman kakaram awajsamiayi. Nu Chichamsha tuke meŋkakashtatui. Aya Kristu tuke shiir awajnasti. Núnisaŋ atí.

²²Yatsurú, kakaram chicharkajrumna ju shiir enen-táimĵajĭ anturkatarum. Kame ti wárik áatrajrume. ²³Yamaikia ii yachi Timiutéu sepunmaya ĵiinki aŋkant aja-sai. Nuna ujaajrume. Wárik támatanċkia atumin íitĵaj tusan winiakun niijĵajĭ winittĵajai.

²⁴Atumí úuntriŷsha tura ashí Yus-shuarsha amik-maatarum. Itiaria nuŋkanmaya shuarsha amikmat-mainiawai.

²⁵Ashí Yus ti shiir yainmakarti. Nuke atí.

SÁNTIAK

Sántiak aarmiania nu

1 Wi Sántiak Uunt Yúsan tura núnisañ ii Uuntrj Jesukristun umirin asan ju papin aajai. Ashí Yus-shuairmin ashí nuñkanam tsakiñmakarum matsatrumna nuna amikmaajrume.

Nekatañkia Yúsnumiñiti

² Yatsuru, ashí itirchat wáinkuirmesha tuke waras-tarum. ³ Iis, itirchatnum pujakrum nekas Yus enentáimtaikurmeka katsuntratín unuimiartatrum. ⁴ Tura tuke páchiachkuram, tuke katsunteakrum, nuikia Yús-jají ti peñker katsuñtatrum. Peñké atsumashtatrum.

⁵ Átum náñkamsarmek nekaatin tujintiakrumka Yusa nekatairj seata. Shuar seakuñ Yuska kajetsuk tura ementutsuk antsu patatas súawai. Tuma asamtai seakminkia suramsattawai. ⁶ Túrasha Yus nekas enentáimtusam, “túrapiash” tútsuk seata. “Cha, nékatsjai surustimpiash” tu seakmeka áñtram seame. Nayaantsa tsukaturj juní taa, atúu waketki ajatsuk. Amesha áintsamek túmame. ⁷ Enentáimiñ núnisketkuñkia, seamna nuna Yus peñké suramsashtatui. ⁸ Shuar jimirá enentáimna nuka shiir wekasatniun tujintiawai.

⁹ Yus-shuar, ju nuñkanam kuítrincha ainia nu, Yus shiir awajsamu nuñají warasti. ¹⁰ Tura Yus-shuar kuítrin-niutkuisha péechach enentáimtikramsha warasti. Iis, nupá kuáñkam tura nantu ti sukuam kaar miniatsuk. Kuítrinniuka ántska áñtram seame. Nayaantsa tsukaturj juní taa, atúu waketki ajatsuk. Amesha áintsamek táñkete. Tuke súrutnak pujurkusha itirchat wáiniuk wárik amuukattawai.

Ii itirchatrj ana nu

¹² Shíiraiti shuar ni itirchatrjñ nekas katsunteana nuka. Nekapsam jíinkuñka akinkiatniun wáinkiat-tawai. Iwiaaku átinian, tawasap achiktinia núnisan, wáinkiat-tawai Yus ni aneam tsañkatka nuna. ¹³ Shuar tunáa túramnia nekapeakka “Yus nuna útsutrutui” tu enentáimprashtiniaiti. Yuska yajauch túramnia enentáimtsui túrasha Niisha peñké chikichinkesha tunaanum útsuchuiti. ¹⁴ Antsu ni wakeramurjñ aents tunaan niñki ikiatmamkaiti yajauch túratniun. Nú-jajñkia tunaanum útsukmaiti. ¹⁵ Nu yajauch wakeramunmayá tunáa akiiniui. Tura nu tunáa mash amuukamtai jákatin akiiniui.

¹⁶ Yatsuru, aneakun tájarne, anañmamawairap. ¹⁷ Ashí peñker ana nu, ashí shiir ana nusha nayaimpin-mayá Yusak amasuiti. Yus ashí tsáapninia nuna na-

janaiti. Tura Niin kiritin atsaiñ yapajítsuk tuke tsáapni-iti. ¹⁸ Nii wakera asa ni nekas chichamea nuñají ni uchirj najatmamji. Tura ashí ukunam átatna nuñají ii émkaitji.

Yus nekas shiir awajsatin

¹⁹ Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisañ wárik kajekaip. ²⁰ Kajena nuka Yus peñker wakeramun túratsui. ²¹ Nu asamtai, ashí peñkercha nu tura ashí yajauch írúnna nusha iniaisata. Tura tuke enentáijñ Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

²² Yus-Chicham umikta. Aya ántukaip. Aya ántakmeka amek anañmamattame. ²³ Shuar íspikia íimiak ni yapñ wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nuñají méteketete. ²⁵ Yus tana nuñají añkant ajasminiaiti. Shuar íspikia iimia áintsañ nekas Yus peñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

²⁶ “Nekas Yúsan shiir umirjai” tana nu tura eseer chichaachkuñka imia niñki anañmamui tura “Yúsan shiir umirjai” tana nuna ántar tawai. ²⁷ Nekas Yus Apa awajitsuk shiir umirkatin júiti: mitiaikiasha wajesha itirchatnum pujuiniakuisha yáñtiniaiti tura ju nuñkanam ashí tunáa ana núñajisha máatrashtiniaiti.

Shuar antra akantrashtin

2 Yatsuru, ii Uuntrj Jesukristu ti shiir nañkaamantua nu enentaimtatirmeka shuar akantratin enentáimsairap. Shuara enentáim enentáimtsuk antsu aya pátatke wáinmena nuñají aents akantram niisháa enentáimturairap. ² Iis, iruntrumna nuñ shuar kuítrintin kurí aniyu aweera tura peñker iwiarmampra wayashtimpiash. Tura núnisañ chíkich kuítrincha aruta entsaru wayashtimpiash. ³ Tura kuítrinnia nu “Peñkera juñ pujusta” tíchatameash. Tura kuítrincha “Atu wajauta, túrachkumsha juñ nuñkañsha pujusta” tíchatameash. ⁴ Nu tákumka yajauch enentáimpram jimirá enentáijñ aents enentáimtame.

⁵ Aneamu yatsuru, antuktarum. Ju nuñkanam kuítrincha ainia nuna Yus achikiuiti Ní shuar ajarar Nin nekas enentaimtin ajasartinian. Tura ashí nayaimpiniam írúnna nunasha Yus nin tsañkatkattawai. Ashí shuar Yúsan aneena nuna anajmatra asa nin tsañkatkattawai. ⁶ Átum antsu kuítrincha natsant awajearme.

Iista, kuítrinnia nuka timiá itiurchat awajtamainiat-suk. ¿Nuikia níichuk ainia achirmak kapitáinnium japiki júramprumna nu? ⁷ ¿Nínkichuk ainia Kristu naarí shiira nuna ántar pachikiar penké yajauch áujmataina nu? Tura átumka nuna naarí tuke shiir awajkurmin, ashí shuar “Kristu shuarí” túramainiawai.

⁸ Yus-Chichamnum jú akupeamu nekas péñkeraiti: “Ame ayashim aneamna núnismek ame írutramuram aneeta.”

Nu nekas umirniuitkiurmeka maak. ⁹ Nú enentáijjají kuítrinniuujají chichasminiaiti. Tura nuyá kuítrinchájjají shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamuríjjají amek sumamame. ¹⁰ Chíkích akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume. ¹¹ Iis, Niñki Yúsak chichaak tíchamka “tsanirmawaip.” Tura chikichnasha “mañkartuawaip” tímiayi. Nu asamtai, shuar tsanirmatsuk túrasha mañkartakka ni wakeramun umirtsui. ¹² Kristu añkant awajtamsamtai ii yamá ni akupeamurí yúpichuch umirkamniaitji. Nu asamtai nu akupkamujají métek wekakurniñkia Yus “péñker túraitme” turamatjají. Tura umikchakriñkia “péñker umikchaitme” turamatjají. Tura nu enentáimsar péñker chichasar takasar wekasatniuitji. ¹³ Chikichan waitnentachkuñka waitnennatsuk asutniáttawai. Tura waitnenkratniuitkiurniñkia tsawant jeamtai Yus in waitnentramprattají.

Yus enentáimtustin tura umirkatniusha

¹⁴ Yatsuru, shuar “Yusan shiir enentáimtajai” táyat tura péñker túrachkuñkia péñkerashit. Nujají uwemprat-tawak. ¹⁵ Wátskea, Yus-shuar, áishmañsha nuwasha, entsátáirjín tura yurumken atsumashtimpiash. ¹⁶ Tura ame nékayatmek ayashí atsumana nu sútsuk tíchata-pash “Péñker wetá, entsatai entsaram túram péñker yurumáta.” ¿Nu sútsuk tákum péñkerkait? ¹⁷ Núnisañ takatsuk Yus enentáimtustin ántraiiti.

¹⁸ Tura shuar tíchanpiash, “Chíkích takaawai tura chikichcha Yúsán shiir enentáimtawai. Mai péñkerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu péñker takatrujjají Yus enentáimtamun paant inaktus-tatjají. ¹⁹ Nekas Yus chikichkiiti tu enentáimtame. Nuka péñker túrame. Túrasha iwianchcha nunasha nékaini-awai. Tura umircha ásar ashamainiawai. ²⁰ Netse enentáimpraip. Ashí Yus wakera nu takaachkumka, Yus enentáimtustin ántraiiti. ¿Nu nekaatin wakeramek? Iista. ²¹ Apraáman Yus chicharuk “Winia ti shiir awaj-tusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritki-acham Yus “Péñkeraitme” tímiayi Apraáman.

²² Páantchakait. Apraám Yusa shiir enentáimtak umirkamiayi. Umirtsuk Yúsán enentáimtakka nuikia ántar enentáimtiaayí. Tura umirak Yus enentáimtamun umikmiayi. ²³ Nujají Yus-Chicham aarma nu uminkiami-ayi. Jujiti:

Apraám Yúsán shiir enentáimtusmiayi tura Yus chicharuk tímiayi “Máakete. Nújajíñkia tuke péñker túraitme Wijjají” tímiayi. Apraámsha nekas “Yusa Amikri” tu náamkamiayi.

²⁴ Páantchakait. Shuar aya Yúsán shiir enentáimta-mujajinchuk tura péñker takasmajajísha Yus nin shiir enentáimtawai. ²⁵ Núnisañ Raap tsanirmatajyayi. Tú-maitiat Israeran suntarín mamikmauta tusar akupka-mun ni jéen itiaawar tura úykar chíkích jíntianam aku-pak uwemtikrarmiayi. Nuna túramtai Yus “péñker-eraitme” tímiayi nincha. ²⁶ Ayash wakantichuka jákachukait. Núnisañ Yus enentáimtustin tura ni wak-eramu takaachkurkia, jaka ántsañ ántraiitji.

Ii iniaj

3 Atum untsurí jintiñkiartin ajastin wakerukairap. Yus in, jintiñkiartin ájinia núnaka, nañkaamas neka asar, awajiakrin nañkaamas Yus asutiámattají. ² Iis, ashí mash ti awajiatjsjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashíñsha tuke péñker ana nuna túriniaiti. ³ Kawaisa enentáimpratai. Jiru wenuchiniam ikiursam ni ayashí ashí ayantaatsuk. ⁴ Kanusha ti úuntaitiat tura kakaram wéayat ishitiapach wiantaijjají shuar wakera nuj ayantarminiaiti. ⁵ Núniskete ii iniaj. Timiá ishitiapchitiat awakmaktinia tímianu chichaatsuk. Ji ishichik kapajají ashí numi tsaruaku ekeemakchamniakait. ⁶ Ii iniajsha jijjají méteketete. Ashí tunáa piákuiti. Tura ii ayashíñ tunáa túratniun útsut-mají. Túñkuranmaya jijjají ikiapármaiti tura ashí ii wekajnia nuj émesewai. ⁷ Shuar ashí yajasman nawamkamin áiniawai. Ashí kajen írúnna nunasha, nanamtincha, napincha, tura entsayancho ashí nawamkaruiti. ⁸ Tura iniaikia penké nawamkachmini-aiti. Ti yajauch asa penké nupetkachminiaiti. Iniaikia ti taráa tseasaiti. ⁹ Nu iniaijjají Yus Apa shiir awajeaji tura nu iniaijjajíñ aentsti yajauch chichárnaiyaji. Áentsun Yus Niijjají métek-taku najanamaitiatar yajauch chichárnaiyaji. ¹⁰ Nu iniaijjajíñ péñkersha tura ya-jajuchisha chichaaji. Yatsuru, nuka penké atsutniuiti. ¹¹ ¿Púkuniñmaya entsa sáawijjají kusuku jíinkimniakait? ¹² Yatsuru, ¿Kushiñkiap shuinian nereawak. Munchisha kushiñkiapen nerektatuak? Núnisañ púkuniñmaya entsa sáawijjají kusuku jíinkichminiaiti. Ii iniaijjají núnisañ aya péñkera nu chichastiniaitji.

Yusa nekatairí

¹³ Shuar ti neka enentái takakna nu, péñker túrat-tawai. Nekas nékaitkiunka péejchachia núnis tuke péñker ana nuna túratstawai. ¹⁴ Antsu atumí enentáijjají penké yajauch enentáimtumairum tura atumek péñker pujustin enentáimtumarum, nékaitiatam péñker túrachiatam “péñkeraitjai” tiip. Nuka wáitrame. Nekas-ka núchaiti. ¹⁵ Nú enentaikia Yúsajyanchuiti. Antsu jú nuñkanmayajiti, shuara enentáiyajiti, núnisañ iwianchn-umijiti nú enentaikia. ¹⁶ Shuarsha yajauch enentáimtu-nairar tura niñki enentáimtumainiakui, nujají ashí

meseawai tura ashí yajauch ti awai. ¹⁷ Antsu Yusaiya enentái takakua nu júnisaiti: ashí nan̄kaamas emka eseeratin, nuyá nawamkartin, shiir ajá, péñker anturnain, waitneñkratin, ashí péñker takáa tura anan̄tsuk naka chichamtin. ¹⁸ Eseera enentáimsatniusha shiir takawai ashí shuar péñker ana nuna túrawarti tusa.

Ju nuñkanam írunna nu aneashtin

4 ¿Urukamtaitsuk tuke kajernaikiarum ti máanaisrum pujarum. Mesetnumsha urukamtai wéarum? Júnisaiti: Atumin yajauch enentái katsuntrachmin útsutmakrumin tuke máaniarme. ² Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujaj itit enentáimtuniarme tura atajitin tujinkiam máanaitrume. Wakerarmena nusha Yus seachu asarum wáintsurme. ³ Tura seakrumsha yajauch searme. Atumí péñkerijijaj warastin enentáimiu asarum searmena nusha wáintsurme. ⁴ Jú nuñkanmayá wakerakum Yusa nemasrijijaj tsanirma áintsan̄ketrumek. Nékatsumek atumsha. Ju nuñkanmayáñ wakerakikia Yusa nemasr̄ntj̄. Shuar ju nuñkanmayáñ wakerakka Yusa nemasr̄ ajawai. ⁵ Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai. Tura nuna ¿ántran̄keash ta? ⁶ Tura anenma asa ti yáinmaji. Tuma asamtai Yus-Chicham tawai:

Kajemtinian Yus íistatui tura péejchachin Yus nin aneak ti shiir yáin̄tatui, tawai.

⁷ Yusaj̄ ikiumastarum, tura íwianch taritratarum. Túrakrumin íwianch ikiurmaktiatui. ⁸ Yúsaj̄n̄i weamkata tura Nii atumin wearmaktatrumek. Tunáa shuartiram Kristu numpejaj̄ nijiamartarum. Tura átum, Yussha tura ju nuñkanmayásha mai métek wakerarmena nu, atumí enentái naka eseeratarum. ⁹ Atumí tunaarj̄ enentáimsarum kúntuts enentáimpratarum. Nu kúntutsaj̄ ti úttiarum. Nuik shiir enentáimprarum wishikmiarumna nuka iniaisarum kúntuts enentáimprarum úttiarum. ¹⁰ Yusjaj̄ péejchach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yach̄in yajauch áujmatas tura yach̄j̄ tunaarj̄ tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántraiti, umirkashtiniaiti” tawai nu shuar. Nujaj̄ nu shuar umirtsuk Yus akupkamu nan̄kaamas enentáimtumawai. ¹² Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwemtikratniun tura emesratniunam akupkatin jea nu. Amesha yáitiam chikicha tunaarj̄ íistincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nuj̄ chikichik uwí takasar kuit achik-

tatj̄” tíchattarpash. ¹⁴ Ishichkisha pen̄ké nékatsumek kashin átatna nu. Ju nuñkanam ii iwiaakmarj̄ wárik amúatsuk. Yuran̄kim utsanar tura nantu sukuam mash wárik men̄kaatsuk. Núnisketji. ¹⁵ Antsu júnis tímini-aitrume: “Yus wakerakuñkia iwiaaku pujakrikia nusha túratatj̄” titiarum. ¹⁶ Túrachkurmeka átumka Yusjaj̄ nan̄kaamantu enentáimprume. Tura ashí nu enentáikia yajauchiiti. ¹⁷ Shuar péñker túratniun nékayat, túrachkuñkia, nuka tunaiti.

Kuítrintin enentáimpratniua nu

5 Kuítrinnitiram ju antuktarum. Ti úttiarum. Ti wáitsatin asarum ti kakantra úttiarum. ² Kuítrum mash mamukarai tura iwiammampramurmesha mash tin̄kishap yúkayi. ³ Kurimesha tura kuítrumsha ashí ijiakmamkarai. Ijiakmampramurj̄sha ame péñkercha túram nuna paant iniakmawai. Tura jinium áesamua áintsan̄ ame kuítrum yajauch awajtamsattawai ayash̄m̄in. Amuukatin tsawant jeamunam anearchamame antsu ame kuítrum ikiañkamame. ⁴ Ame takat iniararam ementushim akirarmamna nu “akirkati” turamainiawai. Anearta. Yakij̄yá Yus, nayaimpinmayá sun-tara uuntrj̄, nu takartamniu chichamen antukai. ⁵ Ashí ju nuñkanam írunna nu wararsaruitrume. Tuma asarum kapuñka nuke machararme tura yamaikia máatin tsawant jeayi. ⁶ “Nu shuar tunaiti” tíirum tunaachu tsanumprurum máamarme, tura niñkia surim-iakcharmai.

Yawetsuk takastin tura Yus áujsatin

⁷ Nu asamtai, yatsuru, nu páchitsuk ii Uuntrj̄ Kristu tatin nákastarum. Arakmausha ni arakrj̄ péñker tsapaiti tusa yumi yutuktinian shiir enentaijijaj̄ nákat-suk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk. ⁸ Núnisan̄ atumsha katsuntsatarum tura yawek̄iirap. Kristu tatin yuntumtemayi. ⁹ Yatsuru, nuámtak “ju yajauch túrutui” tunainirap. Tákurminkia Yus íirmastatrumek. Niñkichukait nuna íistin tura anearta nu Yúsak tíj̄iuch wajatramui. ¹⁰ Yatsuru, yaunchu Yúsnan etserin enentáimpratarum. Tuke ii Uuntrj̄ Yus timia nuna shiir etserkarmiayi. Túmaitiat wáitsarmiayi túrasha pachischarmiayi. Núnisrumek enentáimsatarum. ¹¹ Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naarj̄ Jup. Tura ni itiurchatrj̄ nan̄kaasmatai Yus ti núkap kuítr̄in susamiayi. Nu nékatsumek. Ii Uuntrj̄ Yus ti waitneñkratchakait.

¹² Ju ashí nan̄kaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumñkia Yus íirmastatui. Nu asamtai nayaimsha nuñkasha ashí írunna nusha páchitsuk, aya támena nu tuke nekas atí.

¹³ Wáitakmeka Yus áujсата. Waraakmeka, warasam kantamám Yus shiir awajsata. ¹⁴ Yus-shuartiram, shuar jáakka, Yus-shuara úntr̄in untsukti. Tura niisha taarti. Tura Jesusa naarj̄ pachikiar asuitijijaj̄ jaa shuaran

ishichik kuerarti. Túrawar Yúsan áujtusarti nu shuaran.
¹⁵ Tura “Yus nuna nekas anturtamkattaji” tu enentáim-
 sar áujtsarti. Túrawarmatai jaa shuar péñker ajastatui.
 Yus nin tsuártatui. Tura tunaan tura asa jáakuin̄kia Yus
 nu tunaan tsan̄kurattawai. ¹⁶ Nu asamtai, atumí tu-
 naarí paant etsertunaiktarum. Túrarum Yus áujtunais-
 tarum atumí tunaarí tsan̄kurnarat tusarum. Péñker
 shuar Yúsan tuke enentáijjaj̄i áujeamur̄in̄kia ti kakar-
 maiti. ¹⁷ Yaunchu Yus-Chichaman etserin ámiayi, ni

naarí Erías. Niisha iijjaj̄i méteketiat yumi yutukaj̄i tusa
 Yusa áujtsamtai menaintiu uwí nuyá nan̄kaamas yu-
 tukchamiayi. ¹⁸ Ataksha yutukti tu áujtsamtai ataksha
 yutukmiayi tura araksha ataksha tsapainiarmiayi.
¹⁹ Yatsuru, shuar eseera wekatainmaja kanaakuin̄kia
 chíkich nin waketkitniun yaiñti. ²⁰ Shuar tunáa shuaran
 yajauch wekaan awakeakka jákatniunmaja
 uwemtikrattawai tura ti untsurí tunaarí tsan̄kurnarta-
 tui.

1 PÍTIUR

Pítiur Yus-shuaran áatramiania nu

1 Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakimkarum chíkich chíkich nuñkanam matsatrumna nuna áatjarme. Puntu nuñkanmasha, Karasea nuñkanmasha, Kapatúsea nuñkanmasha, Asia nuñkanmasha, Pitinia nuñkanmasha pujarmena nuna áatjarme. ² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejajsha atumí enentájn atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntrj Jesukrístu Apari ana nuna naari shiir awajsatai. Yusha ti waitnentrama asa, atak akiinatniun suramsaitji. Jesukrístu jakamunmaya nantakin asamtai, iikia atak akiinjar tuke iwiaaku pujustiniaitajnia nu arutramji. ⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiti. Tura nusha yajauchichuiti. ⁵ Yus nekas enentáimta asakrumin ni kakarmarjijai wearmarme. Tura tuke uwemtikrampratniun, nuñka amuuamunam paant iniakmastatna nu achikmintrum tusa tuke tsawant ni kakarmarjijai wáitmarme.

⁶ Nu enentáimsarum wararme. Kame ju nuñkanam pujakrum itirchat wáinkiashtarmeash. Tura ju nuñkanam pujustin ishichkichukait. Ukunam péñker pujustaj tu enentáimsarum wararme. ⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia aijn túruiniawai. Atumsha, itirchat wáinkiarmenta nujaj, Yusan nekas enentáimtusartimpiash tusa nekapsamuitrume. Nu enentáimtamur kurijjai nankaamas péñkeraiti. Ukunam, Jesukrístu támatai, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nuñkanam nekapsamuitrume, itirchat wáintrumna nujaj.

⁸ Jesukrístu wáinchaitiatrum anearme. Tura yamá wáinchiatrumek nekas enentáimtarume. Tuma asarum ti wararme. Nu warastin nayaimpiniam warastajnia

núniskete; nuka paant titin jeatsji. ⁹ Iimiatarum. Uwemtikrurat tusarum Yus umirkachurmek. Nu uwempratrin wainiu asarum waraarme.

Krístujaj ii uwempratniun yaunchu etserkarmiayi

¹⁰ Yus áentsun waitnenta asa, uwemtikrataj tusa tuke wakerimiayi. Núnaka Yúsnan etserin etseriarmiayi. Kristu Wakanj ni enentájn pujuriarmia nu, túruntsajin Kristu wáitsatniurjn jintiarmiayi. Tura ukunam ni ti shiir pujustintrincha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi. ¹² Tura nii pujuiniainkia túrunashtinian, antsu ti ukunam, ii pujajnia juj túrunatniun Yus nekaamtikiarmiayi. Núnaka Yusa shiir chichamen ujatmakarmia nú shuar nekaprutmarme. Nú shuar Yusa Wakanj, nayaimpinmaya akupkamu ana nuna nekatairijjai ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

Péñker wekasatin

¹³ Tuma asamtai, péñker enentáimsarum tura péñker ímiasrum wekasatarum. Tura Jesukrístu ukunam wantiniak waitnentramprattana nu yawetsuk nákastarum.

¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum.

¹⁵ Ashí túramurmijjai timiá péñker wekasatarum. Yus, untsurmakuana nu, péñker asamtai, átumka ni shuari asarum péñker wekasatarum. ¹⁶ “Wi péñker asamtai atumsha péñker wekasatarum” Yus tana nu ni Papirijn áarchamukait.

¹⁷ “Yus winia Aparuiti” tárumsa nu aneartarum. Ashí aentsu túrutairjn métek Yus nekaattawai. Nu neka asarum, ju nuñkanam pujarmena juj Yus ashamkatarum. ¹⁸ Warí, ánta wekasatniun atumí uuntrj jintintramarmena nuyá Yus uwemtikramprarme. Túrasha kurisha kuitcha amuukamnia ainia nujaj uwemtikrachmaitrume. ¹⁹ Antsu Kristu numpe ti shiira nujaj uwemtikramuitrume. Nu nékarme. Yaunchu, shuar tunáa túrakui, Yus tímia, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarjn tsankurattajai” tniuyayi. Núnisan Kristu in jarutramka asa ii tunaarjnia uwemtikrampraitji. ²⁰ Nuñkan nájantsuk áentsun jaruktinian Krístun anaikiarmiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi. ²¹ Niijjai átumka Yus umi-

irume. Yuska Krístun jakamunmayan iniantki nankaamantu awajsamiayi. Yus nekas enentáimtakrum, aya péñkernak túrawai titiarum tusa túraiti. ²² Yus nekas tana nuna, Yusa Wakanj yainmakui, umirka asarum atumí wakanjin péñker ajasuitrume. Yus-shuarjaj yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. ²³ Nekaatarum. Yusa chichame umirka asarum atak akiiniaitrum nuka ju nuñkanmayanchuiti. Antsu Yusa chichame iwiaaku tuke amuukachmin ana nú chichamjaj tuke iwiaaku átiniaitrum.

²⁴ Ju ayash tuke pujuschamniaiti. Yusa Papirjin junis áarmaiti:

Ashí aentsti nupáa áaniuitji. Ii péñkerisha kukujja áaniuiti. Nupa wárik kaawai. Kukujsha núnisan wárik ini-aawai. ²⁵ Tura Yusa chichamesha tuke amuukachmini-aiti.

Nu Chichamjaj uwempramnia asamtai atumin etser-nakuiti.

2 Tuma asamtai, ashí yajauch ana nu iniaisatarum. Anankatin, ántar-chichamtin átin, chikichna wakeruktin, ashí tsanumpratniusha iniaisatarum. ² Antsu, Uunt Jesukristu waitnenkartutairj nekapsa asarum, uchi yama akiinia muntsun ti wakeruinia áintsarmek, Yusa chichame aya peñkerkea nu ti wakeruktarum. Yusa chichamejaj tuke tsawant tsakakrum tuke uwemprami tusarum túratarum.

Iwiaaku kaya

⁴ Ii Uuntrj Kristu kayáa áantsanckete. Tura shuar kayan yajauchin nakitiainia núnisan Jesukristun nakitrarmiayi. Tura kayan ti peñkeran wakeruinia núnisan, Yuska, “winia Uchir ti peñkeraiti” tusa Jesukristun achikmiayi. Atumsha Jesukristu weantuktarum. Nii iwiaaku kayaiti. ⁵ Atumsha iwiaaku kaya áantsancketrume. Tuma asarum Yus wijiñ ni jeen jeamti tusarum tsanckamaktarum. Tura nútiksarmek Jesukristuj atumí iwiaakmarj tsanckamaktarum, Yus wakera nuna túrutati tusarum. Jesukristujaj tura asarum Yus shiir enentáimtikrume. ⁶ Jesukristunun Yusa Papirjin junis áarmaiti:

“Iistarum. Kayan ti peñkeran achikjai” Yus tímiayi. Jeñ emka apujtuamurj atí tusan Seunnum apujeajai.

Nin enentáimtana nu ántar enentáimtatsui. Aarma ana nu peñké kayan chichaatsui. Antsu Jesukristun tawai. ⁷ Yus umirkaitrumna nu, “kaya ti peñkeraiti” tarume. Tura Yusan umirainiatsna nuka Yusa Papirjin tana nujaj métek ániawai. Ju áarmaiti:

Jeñ jeamin nakitarmia nú kaya jeñ emka apujtuamurj atí tusa apujamuiti.

⁸ Tura jusha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, zenentáinium itiri péñker wekasat?

Wats, nú shuar, Krístun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, winian pu-jurtursarat tusa yajauchinmayá Uunt Yus akan-tamkaitrume. Yusna asarum péñker enentáimin ajasurme. Tura Yus sumakmaitrume. Niisha winia péñkerun etserturkarat tusa túraiti. Kame kiritniunmayá jñinkirum ni tsáapnintrin wekasatniun achirmakurme. ¹⁰ Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumniñ, ¿ya waitnentrampramia? Antsu yamaikia Yus waitnentramuitrume.

“Yúsnaítjai” tu enentáimsatin

¹¹ Yatsurtirmin tájarne, Yusna ajasrum, ju nuñkanam írar matsatu asarum, atumí ayashj wakerana nu tsanckatkairap. Ayashim wakerana nu túrakmiñkia ame enentáim nujaj yajauch ajastatui. ¹² Yus-shuarchanum péñker wekasatarum. Túrakrumniñkia niisha yamá “Yus-shuar yajauch túruiniawai” ántar tuiniayatan, ukunmanka, Yusjaj inkiunaiktin tsawant jeamtai, péñker wekarmena nuna enentáimturmasar, nú shuarsha Yusan shiir awajsartatui.

¹³ Kristu atumí Uuntrj asamtai, ju nuñkanam akupin áiniana nusha umirkatniuitrume. Uunt akupin ashí akupin asamtai umirkatarum. ¹⁴ Tura ni akupeamurj ainia nusha tunaan túruinia núnaka asutiáti tura péñkeran túruinia núnaka shiir awajsati tusa uunt akupin akupkamu ásarmatai umirkatarum. ¹⁵ Nekas peñker wekaamurmijjaj enentáimcha ainia nu netse chichamurj itiatmamtikiatarum tusa Yus wakerawai.

¹⁶ Tunaanumiñ ankant ajasu asarum péñker wekasatarum. Túrasha wi ankant ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum. ¹⁷ Chikichcha shiir enentáimtustarum. Yus-shuar ainia nusha aneetarum. Yus péñker asamtai ashamkatarum. Uunt akupin shiir awajsatarum.

Yus-shuarti katsuntratin

¹⁸ Takarniutirmesha ame úuntrum péñker shiir enentáimturmakui sha tura yajauchiitkuisha umirkatarum.

¹⁹ Nekaatarum. Ántar wáitkiarmainia nuj, “Yus iirui” tu enentáimsa katsunteakrumka, ti peñkeraiti. ²⁰ Yajauch túrawakmin asutiámamtai katsunteakmekka nujsa warin ati. Antsu péñker túrawakmin asutiámamtai katsunteakmekka ju ka ti peñker túrame Yusaj. ²¹ Núnisan túrunatin achikmaitrume. Kristu waitrutmasmiarme nuj, Wi túraj núnisan túrawarmi tusar wáitsamiayi.

²² Krístuka tunaan peñké túrachmiayi. Tura chikichkeshka peñké anankachmiayi. ²³ Kátsekeamsha Niñkia katsekachmiayi. Wáitkiamsa “yapajmiaktaj” tíchamiayi. Antsu “winia Apar Yus iistí” tímiayi, Yus péñker túrin asamtai. ²⁴ Kristu Niñki ni ayashjin ii tunaarín entsaki krúsnum jarutramkamiaji. Tunáa enentáimtusajirum tusa, antsu Yusaj péñker wekasamniuram tusa jarutramkamiaji. Atumí enentáin tsuártaj

tusa Kristu asutniámiayi. ²⁵ Murik ni pujutairiijn waketchitniun nékatsna ántsarmek atumsha menkaka wekaimiarme. Tura yamaikia atumí wáitmaurriijn waketchintrume. Atumí wáitmau Krístuiti, atumí enentáin wáinnia nu.

Nuatnaikiaru itiuur túratniuit

3 Tuma asamtai, nuwätiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeke chichaatsminiñ, niisha Yus-shuar ajastinian wakerittiawai. ³ Nu asamtai aya pá-tatek iwiarmampratniusha ti enentáimtusairap. Intiash ti péñker iwiaratniusha, kuriijaí iwiarmampratniusha, pushí ti kuitjaí entsartincha ti enentáimtusairap. ⁴ Antsu, “nekas shíirmach ajastaj” tákumka, enentáimin “shíir kajeche átajai” tu enentáimsatarum. Nuka sakarchattawai. Tura nuka Yúsnumka ti péñkeraiti. ⁵ Yaunchu núnisarañ nuwá Yúsán enentáimtusarmia nu, tura Yúsán shíir enentáimtikratniun wakeriarmia nu, ni áishriñ umirkar nujaí ni enentáin shíirmach ajarar pujuarmiayi. ⁶ Atumí weatři Sara ni áishriñ Apraáman umirmiayi. Umirin asa, “winia uuntru” tñi-uyayi nin. Atumsha péñker túrakrumka tura sapijmiatsuk wekaakrumka, Sarajaí métek átratrume.

⁷ Tura áishmantirmesha Yus wakerana nu nekaarum atumí nuwe shíir enentáimtusrum tsaniñtarum. Nuwemsha, nuwá asa, áishmanjaí métek katsuntrachminiaiti. Tura niisha, ámijjaí métek Yusa waitnenkartutairijjaí tuke iwiaaku átinian takusminiaiti. Tu enentáimta asam ame núwem shíir enentáimtustá. Yus ájukuram itiuurchat atsuti tusarum túratarum.

Yúsnum péñker wekasatin

⁸ Nuyasha ashí Yús-shuartermin tájarme, aya chikichik enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáñtaj tu enentáimsatarum. ⁹ Yajauch turamainiakuiasha “yapajkiataj” tiirap. Katsekramainiakuiasha “iikkiataj” tiirap. Antsu “Yus winia shíir awajtusuiti” tu enentáimsarum, yajauch turamainiana nu péñker awajsatarum. ¹⁰ Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna naki-trawai. Tuma asamtai, shíir pujustaj tákuñka tura tuke tsawant warastinian wakerana nu, péñker ímiastí, yajauch chichakaj tusa tura wáitruawaj tusa. Tunaanumiá kanaki péñkeran túratí. Tuke enentáijjaí shíir átinian eakti. Tu áarmaiti.

Itiurchat aijn péñker túratin

¹³ ¿Yaki yajauch túrutmat péñker turamnisha? ¹⁴ Túrasha péñker túrayatmek wáitiakminkia Yus shíir enentáimtikramprattarme. Tuma asamtai ashamkartutsuk, sapijmiatsuk wekasatniuitrume. ¹⁵ Tura “Kristu

winia Úuntruiti” tu enentáimtustarum. Tura “¿urukamtia Yus-shuar ajasuitiam?” turamainiakuiasha, péñker áimkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata. ¹⁶ “Yúsjaí péñker wekasataj” tu enentáimsarum wekasatarum. Yus-shuar asakrumin chikich shuar ántarar áujmatramainia nu ni ántar áujmatramsamun nekaawar natsaárarat tusarum Yúsjaí péñker wekasatarum. ¹⁷ Yajauch túrakur wáitsatniujajñkia nankaa-mas, Yus wakerakuñkia péñker túrakur wáitsatniuka ti péñkeraiti.

¹⁸ Kristu ii tunaarñ asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuitiat, ii tunáa asakrin wáitrutmasmiaji, Yúsnum ejetamtai tusa. Ayashijñkia jakayat ni wakaníjjaí ni ayashí ataksha iwiaaku ajasmia-ayi. ¹⁹ Ni wakaníjjaí jakáa wakanñ emetamu armia nuna etserkataj tusa wémiayi. ²⁰ Nusha yaunchu Nuai uunt kanun nájanuk siañtu painti (120) uwi pujurmia nuí Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijjaí uwemtikrarmiayi. ²¹ Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentáí péñker atí tusar Yus sear imianji. Nujaí iisha uwemji. Jesukrístu nantakin asamtai, nujaí uwempraitji. ²² Tura Niisha nayaimpiniam we akupin pujutajñium Yusa untsuurñni apujsamuiti. Túramtai nayaimpinmaya sun-tarsha, tura ashí kakaram akupin áiniana nusha Jesukrístun umirainiawai.

Ju nuñkanam wáitsatin

4 Kristu ni ayashijn wáitsa asamtai atumsha núnisrumek wáitsatin ákuisha, katsuntratjai titiarum. Ni ayashijn wáitiana nú shuar yajauchin páchiatsui. ² Antsu “iwiaakjana nuñkia Yusa wakeramurñ tuke umirkatjai” tu enentáimui. Ni ayashí wakerana nuna yamaikia páchiatsui. ³ Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekum ti yurumárum, enentáincha ajarum charaatum ajatniusha, ántar-yusa namperiijn yajauch ana nu najanatniusha nusha ashí wakerimiarme. ⁴ Tura surimiatsuk yajauch túrimi-armena nu iniaisa asakrumin, yaunchu atumjaí nuna túrin armia nu, “urukamtai iniaisara?” tusar yajauch áujmatramprume. ⁵ Túrasha ukunam nu aents ni túramurñ etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtiki-awartatui. ⁶ Túrasha jaka armia nu Yusa shíir chichame ujankarmiayi. Ni ayashijn ashí shuarjaí métek jakamni-aitiatañ Yus iwiaaku pujana núnisarañ ni wakaníí iwiaaku pujusarat tusa ujankarmiayi.

Shuar yáñtiniaitji

⁷ Ashí amuukatin jeatemayi. Tuma asamtai péñker enentáimsatarum; túrarum anearum Yus auju puju-

tarum. ⁸ Aneniamujaj untsurj tunaasha tsankuratin awai. Tuma asamtai ashí nankaamas nuamtak ane-naistarum. ⁹ Kajé-kajejainchu atumí jeen itiaaniátarum. ¹⁰ In ankant ankant shiir awajtamsatniun Yus ti núkap takakui. Tura in shiir awajtamsamujaj chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujaj ame írutramuram yaintá. ¹¹ Etserkatniun Yus amasuitkiuinikia ame tamena nu, Yus tana nujaj métek atí. Chíkich shuar yáintiniaitkiumka Yus amaana nú kakarmajaj túrata. Ashí túramna nu Yusa naarj shiir atí tusam Jesukrístu náarijaj túrata. Jesukrístun ashí aents shiir enentáimtusartí. Tura ashí áentsnum ni kakarmarj tuke atí. Nuna tajai.

Yus-shuarti wáitsatin

¹² Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtaí waitsa pujaj?” tu enentáimsairap. Kame túrunamniai. ¹³ Tuma ajñ shiir enentáimsatarum. “Kristu wáitsamurjñ métek-taku wáitiakun péñkeraiti” tu enentáimsatarum. Ukunam Kristu wincharj wáinkiarum timiá warasmi tusarum túratarum. ¹⁴ Krístunu asakrumin katsekkramkachartimpiash. Túmaitkiuisha Yusa Wakanj shiir ana nu atumijñ pujurtamkui shiir awajsamuitrume. Katsekkramainia nú shuar imia Yusa Wakanj yajauch áujmatainiawai. Tura átumka Yusa Wakanj shiir awajearme. ¹⁵ Túra atumsha yajauch túrawajrum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjajñkia nu wáitsatniuka atsutí. ¹⁶ Tura antsu Krístunuiti tusar wishikramuk wáitkiarmainiakui natsagrarairap. Krístunu asam wáitiyatmek, natsamtsuk Kristu naarj shiir awajsata. ¹⁷ Yuska ni shuarjñ nekapsatajtsa nanakamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartijñ. Ti asutniáwartatui. ¹⁸ Imia Yus umirjinia nu uwempratniurjñ itiurchataitkiuisha tunaan túruiniana nusha urukawartijñ. ¹⁹ Tuma asamtai Yus wakeramujaj wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

Yus-shuara uuntrj túratin

5 Yamaikia Yus-shuara úuntritiram, jintintjiarme. Wisha núnisnak Yus-shuara úuntrjñtjai. Kristu wáitsamurjñ wáinkiaitjai wisha. Tura ukunam ti shiir átatna nuj chíkich Yus-shuara uuntrja núnisnak wisha pachiiñkiattajai. ² Yus-shuar ame ístiniaitmena nu, péñker iistá, murikiu wáinin ni murikrjñ wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrattajai”

tútsuk tura nujaj kufrintin ajastin enentáimtsuk nekas wakeritia, Yusa takatrj asamtai. ³ Turasha, “Yús-shuara uuntrj ajasan, Yus-shuaran akuptiaj” tu enentáimsaip. Antsu shiir túramurmijaj Yusa murikrj jintintiata. ⁴ Nuiñkia murikiu wainniu Uuntrj taa wantiniak iwiarmamtaí tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úuntrum ámin suramsattana nuka penké mamurchattawai.

Yus-shuarti umirnaikiatin

⁵ Tura natsatirmesha atumí uuntrj umirkatarum. Kame yaunchu Yús-Papinium aarma asamtai ashí Yus-shuairam nankaamantu enentáimtumatsuk umirnaikiatarum.

Waantu enentáimtuma núnaka Yus nakittiwai. Antsu nankaamantuchu enentáimtuma nuna Yus waitnentak yayawai. Tu aarmaiti.

⁶ Wats, Yus timiá kakaram asamtai, amek nekamam, péejchach enentáijijaj enentáimtumasta. Nuiñkia tsawant jeamtaí ni wakerak Yus ámin penkerj awajtamsattawai. ⁷ Yus ámin ti enentáimturmakui ame itiurchatrum ainia nu Yus ashí iiktusta.

⁸ Aneartarum tura ímiastarum. Íwianch atumí nemasrj ana nu, uunt yawáa nuke, yanak emesraintiaj tusa eajak tentaa wekaawai. ⁹ Tura tuke Yus nekas enentáimtusrum surimiaktarum. Ashí nuñkanam Yusnum atumí yachj ainia nu átum wáitiarmena núnisaran wáitiainiawai. Nusha kajinmakchatniuitrume.

¹⁰ Wats, ishichik tsawant wáitsarmena nu nankaamasmatai Yus ataksha péñker awajtamsattarme. Tura numi wewe wajana núnisanj ikiakátmartatrume. Tura Yus ikiakárma asarum ni jintijñ tuke péñker wekasattarme. Ju Yus tuke in waitnentramtsujik. Tura iisha Jesukrístunu asakrin Nijijaj métek Yus ni shiir pujutainium tuke shiir pujusmintrum tusa achirmakuitji. ¹¹ Nú Yúsnasha ashí aents shiir enentáimtusartí. Tura ashí áentsnum ni kakarmarj tuke atí. Nuke ati.

Amiak áujmamsamu

¹² Serpanujaj ju papin ishichik áarmaj nuna akupeajai. Serpanu Yusjaj péñker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijaj. Tura tuke ni waitnenkartutairjñ wekasatarum tájarme.

¹³ Papirúnianmayaj atumjaj métek Yus achikma áinia nu amikmaatmarme. Winia uchir Markus núnisanj amikmaatmawai.

¹⁴ Yusaj yachj ajasu asarum anenaisrum shiir awaj-naisatarum. Jesukrístunu ajasuitrumna nuna Yus imi-atkinchanum pujustinian suramsarat tusan wakerajai. Nu atí.

2 PÍTIUR

Pitiur Yus-shuaran áatramiania nu

1 Wikia ju papin aajna ju Semuñ Pítruitjai. Jesukrís-tu akatramu asan ni takarniuríntjai. Ii Yusrj tura in Uwemtikramin Jesukrístu umirumna nuna atumniasha juña áatjarme. Niisha ashí áentsun métekrak enen-táimtin asamtai atumsha iijjaj métek Niiniu ajasurme. Nuka ti peñkeraiti. ²Yus, tura ii Uuntri Jesussha nékar-mena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisañ atí tusan wakerajrume.

Yusaj páchitkia atin

³Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴Niisha uunt asa tura tujinkiachu asa ni chichamēn suram-saitji. Nu chichamsha ti kakarmaiti tura ti peñkeraiti. Nu chichamjaj atumsha atumí ayashj yajauch waker-ana nuyá uwemprarum, Yusaj páchitkia átinian suram-saitrum. ⁵Yus umirkarme. Yamaikia juña túrataj tusarum kakartiniatrum. Ti peñker wekasat-niuitrum. Nuyá Yusna nekaatniuitrum. ⁶Nuyá yajauch túrashtin íimiastiniatrum. Nuyá katsuntrat-niuitrum. Nuyá Yus shiir enentáimtusum wekasat-niuitrum. ⁷Tura nuyá ashí shuar shiir enentáimtus-tiniatrum. Tura nu nañkaamas ashí shuar aneat-niuitrum.

⁸Ashí nu túrakrumka, tura tuke túrukum wéakrum-ka, nakiarchattarme. Túrarum ni takatrj émamkesrum takastatrum. Tura ii Uuntri Jesukrístu nekas nekaat-tarme. ⁹Tura nuna túruiniatsna nuka, kusurua áanin áiniawai. Jesukrístu wakeramurj enentáimtuiniatsui. Ni tunaariya uwemprarmia nuna kajinmatainiawai. ¹⁰Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka peñké iniarhattarme. ¹¹Tura ii Uuntri Je-sukrístu uwemtikramprajnia nu, Nii tuke akupeana nuj, nakittsuk shiir awaintiamattarme.

¹²Tuma asamtai nékarminiñ tura Yusna nekas ana nuyá kanaatsrumniñ tuke enentáimtikratjarme.

¹³Nekaatarum. Winia jákatniurun jeatema nuna ii Uuntri Jesukrístu ujat kayi. Tuma asamtai iwiaaku pujaj-na juj atumin tuke enentáimpratarum tusan jintin-tratniuitjarme, tu enentáimsajai. ¹⁵Tura wi jakamtai, wi

aajna juña tuke kajinmatkijrum tusan, wi jeajna nuna túrattajai.

Kristu waantu ajasun wáinkarmia nu

¹⁶Ii Uuntri Jesukrístu kakarmarj tura ni táratniurj et-serkamajnia nu, aya áentsnumia ántar chichamchauyi. Antsu imia ii jiiijaj Uunt Jesukrístu waantu ajasu wáinkia asar ujakmajrume. ¹⁷Tura Apa Yus Jesukrístun shiir waantu awajsamia nuj, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.” ¹⁸Iisha naint “Yusna” tájinia nuj Niijjaj pujá asar nu nayaimpinmaya chichaamu paant antukmajj.

¹⁹Tura nuna nañkaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsajñ kiritniunam ji keak tsáapin awa-jeana áintsañ asamtai, peñker enentáimta asarum peñker túrarme. Tura Kristu taa, yáñkuam etsantea núnisañ atumí enentáin ashí paant awajsattawai. Tura nu tsawant jeatsajñ nu étserma tuke péñker enen-táimtustarum. ²⁰Tura ju emka nekaatarum. Shuar aya ni enentáimmarijjajñ, Yusa Wakaníjjajñchu, Yus-Chicham urukamtañ tu chicháa nuna nekaatniun jeat-sui. ²¹Warí, Yúsnan etserin yaunchu etserkarmia nu, aya ni wakeramurijjajñ tícharmiayi. Nu áishmankan enentáin Yus pujursarmiayi. Tuma asa ni tiarmia nuna Yusa Wakaní jintintiam tiarmiayi.

Wait chichaman unuiniainia nu

(Jútas 4-13)

2 Tura Israer-shuarum wait chichaman et-serniusha páchitkiarmiayi. Atumijñcha wait chichaman unuiniaw páchitkia ártatui. Niisha awa-jimtikrampratniun wakeruiniak wáitjan ti yajauchin uñkar unuiniartatui. Tura “Uunt Jesus uwemtikrur-mia nusha ántraití” tiartatui. Nuna takui ni amuukatni-urjsha wárik jeartiatui. ²Tura untsurj shuar ni yajauch túruiniamurjñ írsar métek túrawartatui. Iis, “Yus-Chichaman unuiniatjai” tuíniayatañ imiá yajauch túru-iniakui untsurj aents “Yus-Chicham ántraití” tiartatui. ³Kuítian ti wakeruiniá ásar, wait chichaman unuiti-amprar akíam kuítriniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantrj jeatemayi. ⁴¿Warí? Yuska ni sun-tarj nayaimpiniam pujuarmia nunasha peñké tsañku-rachmiayi. Antsu nayaimpinmaya jinium akupkarmiayi. Tura nekapsatin tsawant jeatsajñ kiritniunam jinkiamu emetamu pujuiniawai. ⁵Yáunchuya shuarnasha Yus tsañkurachmiayi. Antsu amuukarat tusa amaarkatniun

akuptukarmiayi. Antsu aya Nuain, Yusjaj wekasatniun etserin asamtai ni shuarj siati armia nujaj uwemtikramiayi. ⁶ Enentáimpratarum. Sutuma pépruncha tura Kumura pépruncha nayaimpinmayaj jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi. ⁷ Tura Yus Ráutan uwemtikramiayi. Péñker shuar asa, Sutumanmayaj shuar imiá yajauch ásar tunáa túruiniakui, Raut kúntuts enentáimsamiayi. ⁸ Péñker áishman asa, nuyá shuara yajauchirin wáitiainiak, ni enentáj péñker asamtai tuke tsawant kúntuts enentáimiuk wáitmiayi. ⁹ Tura incha tunaan iniakturmakrin, nu tunaanum nupetnakchatu tusa Uunt Yus uwemtikrampramniatiji, ni umirka asakrin. Túrasha yajauch shuár-naka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakeramurjín túruinia nunasha Yuska nekas asutiáttawai. Enentáimcha ániawai. Tura ni wakeramurjiniak wakeruiniawai. Niijjaj nañkaamas akupin ainia nuna yajauch áujmatainiawai. ¹¹ Warí, imia Yusa suntarj Yusaj matsatainia nu, nuna túratniun tsúumainiawai. Nañkaamas kakaram tura nañkaamas uunt ániayat nu akupniun katsekainiatsui.

¹² Nu áishmansha enentáincha yajasma núnin ániawai. Achikiar mantamnatniuk akiinia ániawai. Enentáimtsuk náñkamsar yajauchin chichainiawai. Tuma ásar yajasma núnisan jákartatui. ¹³ Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjaj irunar yurumáiniayatan atumin anañkramawar warainiawai. Nuka natsantaiti.

¹⁴ Nuwan wakerutskeka íiniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru ániawai.

¹⁵ Yúsnumaanj naka wétsuk awajirarai. Peura uchirj Paraam Yúsnan etserniuitiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi. ¹⁶ Tura niisha tunáa túratajtsa weaj Yuska umpuurun chichachun aents chichaana nujaj métek chichamtikiamiayi. Nuñkia umpuuru timia nujaj Yúsnan etserin ni netse túratniurj enentáimiar iniaisamiayi.

¹⁷ Nu áishmansha yumirmat kuyua núnis ániawai. Tura núnisan yurañmisha kíariat nase umpuim menkaana nu, yumi ajuarcha ásar, penké ántar ániawai. Warí, Yus-Chichamjaj áentsun yainiainiatsui. Niisha imiá kirit ámanum tuke pujustin ániawai. ¹⁸ Niisha ti chichainiyat ántar chichainiawai. Yajauch túratniujaj tura ayash wakera nújajisha páchim túriarmia nuyá kanakiarua nú shuaran ataksha tunaanum ajuarajtsa wakeruiniawai. ¹⁹ “Iiya núnis túrakrumka ankant átatrume” tu wénawai. Túrasha imia niñki ni tunaarjin emetamu ániawai. Páantchakait. Shuar warí tunaa-jajim nupetnaka, nuna emetamurjinti. ²⁰ Kame shuar, uunt Jesukristu uwemtikiartin ana nuna chichamen

nékainiak ju nuñkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújajinkia nañkaamas yamá imiá yajauch pujuiniawai. ²¹ Yusa akupkamurjín imiá péñkera nuna Yus nú shuarnasha súarmiayi. Túrasha nékainiayat tunaanum waketkiaru ásar ti asutniáwartatui. Tuma asamtai, nekas jintia nekaachuitkiunka maak árainti. ²² Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajkimui.” Nu áishmansha núnisan yajauchiniam ataksha wáketainiawai.

Uunta tátintri

3 Aneamu yatsurtiram ju papin jimiará áatjarme. Mai papinium winia jintintiamurjaj atumí chamir enentáin enentáimtikratjarum tusan wakerajrume. ² Yúsnan etserin, péñker wekain armia nuna etserkamurj enentáimturatarum. Tura ii Uuntrj akupkamurjín ni akatramurijjaj ujatmakarmia nusha enentáimpratarum. Jesukristu uwemtikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurjín túrusar wekasartatui. ⁴ Tura juna tiartatui. “¿Kristuka “wi atak tátatjai” timia nusha urukuit? Warí, ii uuntrj yaunchu kajinikarmia nuyá yapajjáchmaiti. Yus yaunchu ju nuñkan najanamia nuyá yamaisha tuke núniskete” tiartatui. ⁵ Túrasha nuñkancha nayaimpincha Yus yaunchu najanamia nuna nekaatniun nakitiainiawai. Yusa chichamejaj nuñka entsayaj jinkimiayi tura nuñkasha entsá nanatrawai, Yus timia nujaj métek. ⁶ Tura ukunam nu nuñkan amaarkamujaj Yus emesramiayi. Ashí nuna nekaatniun nakitiainiawai. ⁷ Tura Yus tiniu asamtai nayaimpisha nuñkasha yamáya nuka jijjaj emesnarat tusa ikiusma ániawai. Yus áentsun nekapsattana nu tsawantaj yajauch aents emesnantatui; tura jisha nu tsawantaj nuñkancha nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Kristujajinkia chikichik tsawant mir uwiya núniskete; mir uwisha chikichik tsawanta núniskete.

⁹ Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai wau taatsua? In áentstin nákmaji. Shuar chikichikisha menkakajin tusa nakitiawai. Antsu ashí shuar enentáin yapajjáwarat tusa wakerawai.

¹⁰ Túrasha Uunta tsawantrj aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nuj ashí írúnna núurtiuk esaawartatui. Tura nuñkasha tura ashí írúnna nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusurum, takamtsuk umirkarum wekasatniuitrume. ¹² Yusa tsawantrj wárik tati tusar, jintiá íimprasar nákastiniatiji. Nu tsawantaj nayaimpisha esáa emesnantatui, tura ashí írúnna núurtiuk ti tsuer ajas entsamnattawai. ¹³ Tura iikia ya-

maram nayaimpisha, yamaram nuṅkasha ati tusar nákaji. Nu átatui, tímiayi Yus. Tura nuṅsha aya péṅkerak átatui.

¹⁴ Nu tuma asamtai, aneamu yatsurtiram, ju túrunati tusarum nákarmena nuṅ, imiatkinchanum wekasam chamir enentáimjaṅ makuuchmin Yus wáitkiati tusarum wekasatarum. ¹⁵ Ju nekaatarum. In uwemtikramprataj tusa Yus ti nákarmaji. Ii aneamu yachi Páprusha núnisaṅ Yus ni nekatairṅ susamia tímiatrusaṅ áatramprarmeme. ¹⁶ Ashí papí aarmia nuṅ Pápruka wi tajana nuna chichaawai. Kame ni áarmariṅ chíkichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha

Papru áarman yapajáwar nusháa jintintiainiawai. Tura chíkich chichamsha Yus-Chichamnumiṅ ana nuna núnisaṅ túruiniawai. Túmainiakka niṅki emesmamainiawai.

¹⁷ Wátsek, aneamu yatsurtiram, túruntsaṅ ujakjar-mena nu neka asarum, yajauch shuar anaṅkramattsa wakerutmainiak awajimtikruraṅ tusarum, tura Yusaj tariarurmena nuyá iniarajṅ tusarum anearum wekasatarum. ¹⁸ Tura ii Uuntriṅ Jesukrístu in Uwemtikkiartin ana nu, yamáí nékarmena nú naṅkaamas nekaatarum. Tura enentáimin nú naṅkaamas tariarum wetarum. Yamaisha tura tuke, ii Uuntriṅ Jesukristu náarṅ uunt awájsartí. Nu atí.

1 JUAN

Tuke iwaaku átinia nérentin Chicham ana nu

1 Ashí naŋkamamia nú yaunchu Yusa Uchiri tuke pujuuyayi. Nusha iisha anturkaitji. Nekas ii jiiijai wáinkiaitji. Wáinkiarsha ii uwejejaisha antiŋkiuitji. Niisha Yúsán ti paant awajeak, Chícham tíminiaiti. Tura tuke iwiaaku átinia nérennuiti. Nuna áateajrume. ²Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniuri asa tuke Yus Apajai pujuyayi. Tura yamaikia iini paant ajatramsakrin atumniasha ujaajrume. ³Ii Yus Apajai sha ni Uchiri Jesukristujai sha tsaniŋkiar nekas chikichík ajaji. Tura atumsha núnisrumek iijjai chikichík ajasuk tusar wáinkiamajnia nuna anturkamajnia nunasha ujaajrume. ⁴Ti shiir warastarum tusan juna áatjarume.

Yus tsáapniniaiti

⁵Yus imiá tsáapnin asamtai kiritin Niŋkia penké asawai. Nu chichaman Jesukristu in unuitiamprakrin nuna atumniasha ujaajrume. ⁶“Niiijai tsaniŋkia pujaji” táyatar kiritniunam pujustinia áintsar tunaanum pujakrikia wáitraji tura nekas penker ana nu túratsji. ⁷Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchiri Jesukristu numpéjai ashí ii tunaari japirtamji. ⁸“Wi tunaan túrichuitjai” tákurkia ímia iik anaŋmamaji. Nekas ana nu nékatsji. ⁹Antsu ii tunaari Yus paant ujakrinkia Yuska tsanŋkurtamprattaji. Tura ii tunaarin asakátramprattaji. Yuska ti penker asa Nii tana nuna tímiatrusan umikmin asa túrattawai. ¹⁰Kame “Tunaan túrichuitjai” tákurkia nujai “Yus wáitriniaiti” taji. Ni chichamesha ii enentáin pujurtamtsoji.

Jesukristu in Yúsán áujturmaidji

2 Yus-shuartiram, tunaanum iniaarairum tusan ju papí áateajrume. Túrasha Yus-shuar tunáa túramtaŋkia Apa Yusan ii áujturmau awai. Nuka Jesukristuiti. Niisha ti penkeraiti. Niisha Yúsán áujturmakui Yusjai ataksha iwiaarar pujustaji. ²Jesukristu ii tunaarin asakártaj tusa jarutramkamiaji. Túrasha aya íini-unkechu antsu ashí shuara tunaarin asakártaj tusa jarukmiayi.

³Yus tana nu umirkurkia nuikia Yus nekas nékaitji. ⁴Tura shuar “Yúsán nékaitjai” tayat Yus tana nuna umirchakka wáitrawai. Nekasa nuka ni enentáin asawai. ⁵Antsu shuar Yus tana nuna umireakka Yúsán ti

shiir aneawai. Túrakur Niiijai tsaniŋkiar pujamu nékaji. ⁶“Yusjai tsaniŋkia wekaajai” tana nú shuar Jesukristu wekasamia núnisar wekasatniuiti.

Yamaram akupkamu

⁷Yatsuru, yamaram akupkamun áattsujrume. Áyatik yámankamtaiknumia antukmiarum nunak tájarume. Ashí atumin jintintiamu yaunchu akupkamuiti. ⁸Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumjincha nu akupkamu nekas paant awajsamuiti. Nujai kiritin menkaatemka asamtai tura nekas tsaapniŋkia paant tsaapnirtasa pujakui nu akupkamun ataksháa áateajrume.

⁹Shuar “tsáapninium pujajai” táyat chikich Yus-shuaran nakitiakka tuke kiritniunam wekaawai. ¹⁰Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarchamniaiti.

¹¹Tura shuar chikich Yus-shuaran nakitiakka kiritniunam tuke wekaawai. Tura kiritniunam iimiu asa itiu-raani wea nuna nékatsui.

¹²Uchitirmincha, Jesukristu jakamujai atumí tunaari tsanŋkurnaru asakrumin juna áateajrume. ¹³Úntirmincha yámankamtaiknumia tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. ¹⁴Úntirmincha yámankamtaiknumia tuke pujuuya nu nekáa asakrumin juna áatjarume. Únmarutirmincha atumí enentáijjai Yus-Chicham umirkarum kakaram asarum íwianch nupetka asakrumin juna áatjarume.

¹⁵Aya áentsnumia ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura naŋkaamantu ajastin. Nuka ju nuŋkanmayá áiniawai. Shuar aya nunak wakerak Yúsna aneatsui. Kame ju nuŋkasha amuukattawai. Ashí nu wakeruktincha ti nekas amuukattawai. Túrasha shuar Yusa wakermurin umiana nu tuke iwiaaku pujustatui Yusjai. Nu asamtai atumsha ju nuŋkanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurj Kristu nemasri wantinkarmatai amuukatin tsawant jeatemayi. ¹⁹Nusha ii weeak ármayi. Túmaitiat nekas

Yus-shuar ácharmaysi. Nekas Yus-shuar ániakka tuke iijjaj irunar pujuarāyay. Tura jiinkiar matai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakanin Kristu suramsamta ashí paant nékarme. ²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha penké nushaachuk ainia.

²² Wáittrin júiti: Jesusan “Yus anaikiamuka Krís-tuchuiti” tana núiti. Núiti nekas Kristu nemasrj. Yus Apancha ni Uchirincha nakitia asa Kristu nemasrjinti. ²³ Yusa Uchirin nakitiainia nu Yus Apajajsha tsanin pu-jatsui. Tura Yusa Uchirin shiir awajea nu, Yus Apajajsha tsanin pujawai.

²⁴ Yámankamtaiknumiā antukmiarum nu atumí enentáin pujurtamsati. Nu túrakrum atumsha Yusa Uchirijjajsha Yus Apajajsha tuke tsaninkrum pujustatrume. ²⁵ Jesukrístusha Niijjaj tuke iwiaaku pujustinian tsankatramkaitji.

²⁶ Anañkartin írunkui juna áatjarme. ²⁷ Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakan ashí jintintramprume. Ni jintintrammasha imiá nekas asa wáitchaiti. Tuma samtai Nii jintintramna áintsarum Krístujaj tuke tsaninkrum pujustarum.

²⁸ Yamaikia, uchiru, Krístujaj tuke tsaninkrum wekasatarum. Nu túrakriki Nii támatai natsamtsuk ti shiir inkiunaiktatji. ²⁹ Atumsha Jesukrístu ti penkera nu nékarme. Núnisañ ashí shuar penkeran túruinia nuka Yusa uchirj ániawai. Nusha nekaatarum.

Yusa uchirj ániiana nu

3 Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirjinti. Tuma asakrin jú nuñkanmayá Yús-shuarcha nekarmainiatsji. Kame Yusnasha nékainiatsui. ² Aneamu yatsurtirmea, juna tájarme: nekas Yusa uchirj ajasuitji. Kame ukunam urukuk átaji nusha nékatsji. Túrasha jú paant nékaji: Jesukrístu támatai imia Nii paant wáinkiar Niijjaj métek ajastatji. ³ Tura shuar shiir enentáijjaj nuna náakka imia niniki shiir awajmamui Jesukrístujaj métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. ⁵ Jesukrístu ii tunaarj asakártaj tusa jú nuñkanam támia nu nékarme. Tura Niñkia tunaan túrichuyay. ⁶ Tuma samtai shuar Niijjaj tsanin wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisañ nékachuiti. ⁷ Uchiru, shuar anañkramawairap. Penker túrinkia Kristu ti penker samtai niisha penkeraiti. ⁸ Antsu shuar tunaanum wekaana nu iwianchnaiti iwianch tuke tunaan túrin samtai. Yusa Uchirj jú nuñkanam táwiti ashí iwianch túramun emesrataj tusa.

⁹ Shuar nekas Yusajjaj akiinia nu tunaanum wekaatsui. Yusa uchirj asa Yusa iwiaakmarijjaj wekaawai. Tuma asa tunaanum tuke wekaatsui. ¹⁰ Shuar penker túrat-

sna nuka tura Yus-shuaran kajera nuka Yus-shuar-chaiti. Nujaj Yusa uchirj ainia nusha tura iwianchi uchirj ainia nusha paant nekaamniaiti.

Mai anenai ajatin

¹¹ Atumsha yámankamtaiknumiā chicham antukmiarum nu júiti: mai anenai ajartin. ¹² Iisha Kañkia ánin áchatniuitji. Iwianch-shuar asa ni yachin máamiayi. Tura ¿rukamta maamia? Enentaimprata. Nii yajauch asa tura ni yachi penker samtai máamiayi.

¹³ Yatsurtiram, jú nuñkanmayá shuar nakitramainiakui ti enentáimsairap. ¹⁴ Iikia jákatniumayá uwempra asari nekas iwiaaku pujaji. Túmakur Yus-shuar ainia nu aneaji. Nujaj yamaram iwiaakma takakjina nu imiá páantaiti. Shuar Yus-shuaran aneachkunka tuke jákatniumam wekaawai. ¹⁵ Shuar Yus-shuaran nakitiakka mañkartinia núnisaiti. Tura mañkartinkia tuke amuicha iwiaakmanum pujuiniatsui. Nuka nékaji. ¹⁶ Jesukrístu in jarutramka asakrin nujaj nekas in anenmaj nu nékaji. Iisha núnisrik Yus-shuar ainia nu ti aneakur ni yaintai tusar jarukmin átiniaitji. ¹⁷ Túrasha shuar chíchik Yus-shuar atsumana nuna takakiat waitnetchkunka nekas ni enentáijjaj Yúsana aneawash. ¹⁸ Uchiru, aya chíchamjaj anenain áchatniuitji antsu nekas aneniakur penker túrar yáiniaiktiniaitji.

Yusaj natsamtsuk jeamniaitji

¹⁹ Jujaj ii Yúsaj sapijmiatsuk jeatniusha tura nekas Yus-shuaraitji nu nekaatniusha nekampampramniaitji. ²⁰ Ii enentáij yajauch túramun enentáimtikramkurnisha Yus iijjaj nankaamas ashí mash nékatsuk. ²¹ Tura, aneamu yatsurtiram, ii enentáij yajauch túramun enentáimtikramchakrinkia Yúsaj sapijmiatsuk jeamniaitji. ²² Tura ni wakeramu túrakriki tura ni chichamesha umiru asakrin ashí ii seaj nuna suramsattaji. ²³ Júiti Yus akupkamu: ni Uchirj Jesukrístu nekas enentáimtustin tura Kristu timia áintsarik shuartisha mai anenai ajartin. ²⁴ Shuar ni chichamen umia nuka Yusaj tsanin wekaawai tura Yus niijjaj tsanin wekaawai. Mai chíchik ajasu ániawai. Tura Yusa Wakanjaj ii enentáin pu-jaj samtai nujaj Yus iijjaj tsanin wekaana nu nékaji.

Yusa Wakanjsha tura Kristu nemasrj wakancha

4 Aneamu yatsuru, untsurj shuar wáitruiniak “wi Yúsna etserniuitjai” tuiniawai. Tuma samtai ashí shuar “wi Yusa Wakanin takakkun chichaajai” tuinia nu penker nekapsuk enentáimtusairap. Antsu íisrum nekas Yusa Wakanjpiashit tura chíchik wakaniashit nu nekaatarum. ² Jujaj nekapsarum ya nekas Yusa Wakanin takaka nu nekaattarme: Shuar “Jesus Yusa Uchirj Krístuait nekas aents ajas ayashimkiamiayi” tana nu Yusa Wakanin nekas takakui. ³ Tura Jesusan tu enentáimtatsna nuka Yusa Wakanin takaktsui antsu Kristu nemasrj wakanin takakui. Kame Kristu nemasrj wakanin tátin tama ántichukaitrum. Nu wakan yamaikia jú nuñkanam táwiti.

⁴ Uchiru, átumka Yusna asarum Yus atumí enentáin pujawai. Tura ju nuñkanmaya shuara enentáin íwianch pujawai. Atumiin pujana nuka niijjaj nañkaamas kakaram asamtai wáitrin ainia nu nupetkaitrume. ⁵ Ni-isha ju nuñkanmaya ásar aya ju nuñkanmayaan áuj-matainiawai. Túmainiakui ju nuñkanmaya shuar ti peñker anturainiawai. ⁶ Antsu iikia Yúsnaitji. Tuma asakrin Yúsan nékainia nu anturtamainiaji. Tura Yúsnachu ainia nu anturtamainiatsji. Nujaj nekas Wakanin takakusha tura wáitrin wakanin takakusha nekaamni-aiti.

Yus tuke aneñkratniuiti

⁷ Aneamu yatsuru, anenaitin Yúsnumiá asamtai mai anenai ajartai. Shuar aneñkratniua nuka Yusa uchirj asa Yúsnancha nékawai. ⁸ Shuar aneñkratcha nuka Yúsnanka nékatsui. Kame Yuska tuke aneñkratniuiti. ⁹ Tuma asa ni Uchirj chikichkiniak ju nuñkanam akup-turmakmiaji. Iisha ni túrunamujaj nekas iwiaaku pujaji. Nujaj Yus in yáinmak ni aneñkrattain paant iniaktur-masmiaji. ¹⁰ Ujjaj nekas aneñkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitaŋ Yuska ti anenma asa ni Uchirj ii tunaarin asakarat tusa akupturmakmiaj nujaj nekas nekanamniaiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai. ¹² Chikichkisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Niijjaj métek aneñkratin ajaji. ¹³ Yus ni Wakanin suramsa asakrin Yus iijjaj tsanin wekaana nusha tura ii Niijjaj tsaninkia wekaajnia nusha, nujaj nékaji. ¹⁴ Yus Apa ni Uchirj ashí shuaran uwemtikrarat tusa ju nuñkanam akupkamia nu wáinkia asari étsereaji. ¹⁵ “Jesus Yusa Uchirinti” tana nu shuarjaj Yus tsanin wekaawai tura niisha Yusjaj tsanin wekaawai. Mai chikichik ajasu áiniawai.

¹⁶ Yus in anenmajnia nu ti nekas nékaji. Yus tuke aneñkratniuiti. Tuma asamtai shuar aneñkartakka Yus-jaj tsanin wekaawai tura Yussha niijjaj tsanin wekaawai. Mai chikichik ajasu áiniawai. ¹⁷ Núnisar ti peñker aneñkartin ajaji. Túrarí súmamtikiatin tsawantaí natsamtsuk wajastatji. Kame ju nuñkanam pujayatrik Jesukristujaj méteketji. ¹⁸ Nekas anenaiyamunam sápij atsawai. Antsu nekas anenaiyamunam sápij meñkaawai. Aya asutiátin akui sapijmiaktinaiti. Tuma asamtai ántar sapijmiana nu nekas aneñkratchaiti.

¹⁹ Yus emka in anenma asakrin iisha Nii aneaji. ²⁰ Tura shuar “wi Yúsan aneajai” táyat chíkich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka žitiurak Yusan wáinchasha aneat? ²¹ Yus incha juna turammiaji: Yúsan anea nu shuar chíkich Yus-shuarnasha aneatniuiti.

Ju nuñkanmaya írunna nu núpeteaji

5 Ashí “Jesus Yusa Uchirj Krítuiti” tu enentáimtana nú shuar Yusa uchirinti. Tura aparj aneakrikia ni uchirjsha aneattaji. ² Yus Apa aneakur tura Nii wakera

nu umirkur Yusa uchirjsha ashí aneattaji. ³ Yus aneakur Nii tana nu umikratji. Ashí Yusa uchirija nu Yúsan nekas enentáimta asa, ashí ju nuñkanmaya írunna nuna núpeteawai. Nu asamtai Yus tana nu umirkatin itiurchatchaiti. ⁵ Aya “Jesus Yusa Uchirinti” tu enentáimtana nú shuar ju nuñkanmaya ana nuna awakkamniaiti.

Jesukristu “Yusa Uchirinti” tu etserainia nu

⁶ Jesukristu ju nuñkanam taa entsajaj imiankui Yus nayaimpinmaya chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajaj imianin ni takatrin nañkamamiayi túrasha in jarutramak ni takatrin amukmiayi ju nuñkanam. Chikichkinkia túrutsuk mai metek túra asamtai Yusa Uchirija nu paant nekanamniaiti. Yusa Wakanjsha tuke nekas tiniua nu métek tawai. ⁷ Nu asamtai menaint “Yusa Uchirinti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nuñkanmasha Yus Wakancha, entsasha tura numpasha. Mash métekrak tuiniawai. ⁹ Aents étsereainiakui ántureaji. Nuna nañkaamas Yus ni Uchirj tana nu nekas anturkatniuitji. ¹⁰ Yusa Uchirj enentáimtana nú shuar ni enentáincha nékawai. Antsu Yus ni Uchirj timian enentáimtatsna nú shuar Yúsan enentáimtachu asa Yúsan “wáitriniaiti” tawai. ¹¹ Yus ni Uchirj timia júiti: Tuke iwiaaku pujutai nérenniuiti tura nu iwiaakmancha in suramsaitji. ¹² Yusa Uchirijaj tsanin wekaana nú shuar, nu iwiaakmajaj iwiaaku pujuiniawai. Tura Yusa Uchirijaj tsanin wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

¹³ Yusa Uchirj nekas enentáimtakrum tuke amuicha iwiaakmajaj iwiaaku pujarme. Nu nekaatarum tusan juna áatjarme.

¹⁴ Yus wakeramujaj métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtaji.

¹⁶ Tunáa awai jákatniunam júana nu. Shuar nu tunaan túramtainkia Yus áujtustin ántrait. Tura shuar chíkich tunaan túrakuiñkia nuka nekas Yus áujtustini-aiti. Nekas jákatniunam júatsna nú tunaan túraitkuiñkia iwiaaku átinian Yus susattawai. ¹⁷ Ashí yajauchí ana nuka tunaiti. Tura jákatniunam júatsna nú tunaasha awai.

¹⁸ Nekas Yusjaj akiinia nú shuar tunaanum tuke wekaatsui. Antsu Yusa Uchirj nin ti peñker wainkui íwianch antiñkiachminiaiti.

¹⁹ Iikia nekas Yúsnaitji tura ashí ju nuñkanmaya shuar iwianchnia áiniawai. ²⁰ Yusa Uchirj ju nuñkanam taa nekas-Yus aa nuna paant jintinramji. Yusa Uchirj Jesukristujaj tsaninkia wekaakur nekas-Yusa nujajsha tsaninkiar wekaaji. Nekas-Yus asa tuke iwiaaku átinia nuna nérenniuiti. ²¹ Uchirú, ántar-yus írunna nú pachi-inkiairap. Antsu nujaj aneartarum.

Nuke atí.

2 JUAN

Nekasa nunasha tura anenaitniuncha ujaawai

1 Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. ² Nekas-chicham tuke amuutsuk ii enentáin pujá asamtai aneajrume. ³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittiarme. ⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. ⁵ Yamaikia, umaru, tájame: mai anenai ajartai. Yamaram akupkamun áattsujme antsu yámañkamtaik antukmiaj nunak tájame. ⁶ Nekas anekartinia nú shuar Yus akupkamun uminiati. Tura Yus akupkamuka “anekartin tuke atarum” tawai. Nusha yámañkamtaiknumia antukuitrume.

Anekartincha írunui

⁷ Ju nuñkanam anekartincha ti írunui. Jesukristu nekas aents ajas akiiniamia nuna enentáimtuiniatsui.

Nu shuar anekartin ásar Kristu nemasri áiniawai. ⁸ Nu shuarjai aneartarum. Yajauch shuar ántar yayakrumin Yus átum takasman métek akirmakchamniati. Antsu aneara takasakrumin Yus métek akirmakarmi.

⁹ Ashí shuar Kristu jintámun iniais “nañkaamas nékajai” tana nu, Yúsnachuiti. Antsu Kristu jintámun umiana nu shuar Yus Apajajsha tura ni Uchirijajsha mai tsaniñ pujawai. ¹⁰ Shuar Kristu chichamen jintáchu atumí jeen írmástaj tusa jeakui awayáwairap tura “shiir taume” tiirap. ¹¹ Kame nu shuar “shiir taume” tákumka nu shuar yajauch jintámu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai. Nuke atí.

3 JUAN

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. ² Aneamu yatsurú, Yusjaj penker wekaakum ame wakanim penker pujana núnisañ ame ayashmisha penker atí tusan Yúsán áujtajme. ³ Ame nekas chicham umirman shuar ju taar ujatarmayi. Tura nuna antukan ti warasmajai. ⁴ Yus-shuar nekas chichaman umiiniakui imiá shiir enentáimtuiniajai. ⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti. ⁶ Nu shuar ame nekas anenamun ju taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame. ⁷ Nu shuar Jesukrístun takarsatai tusar wekainiawai. Túrawar Yus-shuarcha ainia nuna kuítrijijai yurumátniun nakitrarmatai ⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yaiñkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nañkaamantu enen-

táimtumak ii tájinia nuna umiktinian nakitiawai. ¹⁰ Nu asamtai nuj jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsán takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjaj iruntratniun surimiawai.

¹¹ Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsán nékachuiti.

Timitriu penker túriniaiti

¹² Imiá nekas penker shuar asamtai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

Umíamu chicham

¹³ Wi ti nukap títinian wakerajme. Túrasha ju papinum mashi áatrashtatjame ¹⁴ wárik ítin asan. Nuj jean chichasmi.

¹⁵ Shiir pujustá. Juyá amikrum amikmaatmainiawai. Ii amikrisha chikichik chikichik amikmaatruata.

JÚTAS

Jútas Yus-shuaran papin áateawai

1 Wi Jútas Jakupu yachintjai. Jesukrístu takarin asan ashí Yus Apa ni shuarí átinian achikma ainia nuna ju papin áateajai. Jesukrístujai tsaninkiaru ásamatai Yus nin wainiainiawai niijijai kanakchatniun. ² Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui

(2 Pítur 2.1-17)

³ Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumíin pachinkiarmai. Niisha “Yus ti anekartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntrj Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajíáshtinian ashí Yus-shuar akasmatkarat tusar susamuiti. Wátsek, kakaram ajas-tarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi. ⁶ Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jinikiá sepunam apujas pujurainiawai. Tura Uunt Tsawant jeamtai súmamtikiawartatui. ⁷ Núnisan Sutuma péprusha Kumura péprusha tura tíjiuch péprusha áishmanjajsha nuwajajsha ti yajauch nuamtak tsanir-manainiakui ti tunaan penké túrachmin ana nunasha túrin ármiai. Túmainiakui ashí shuar ashamkarat tusa Yus amuicha jinium asutiáwarmiai.

⁸ Ayu. Atumíin yajauch shuar ainia nu, yaunchu túrunamun enentáimtsuk tuke yajauch enentáimiaiainiak ni ayashin yajauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai. ⁹ Antsu Mikiar, nayaimpinmaya suntara kapitántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi. ¹⁰ Túrasha ju shuar-ka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajsha imia niñki yajauch emesmamainiawai.

¹¹ Maa, anearartí. Kaín yajauchin túramia núnis tura ásar jákartatui. Tura Parama áinis kuítian ti wakeruiniak imia niñki tunaanum tsankamakarua áiniawai. Tura Kurea áinis ashí akupniun nakitin áiniak kajinikiartatui. ¹² Átum nuamtak anenaitiai-jisat nájankurmin nu shuar chikichan enentáimtsuk Yusnasha ashamtsuk imia niñki enentáimtumainiawai. Penké ántar áiniak yumi kíar tee ajasua núnin áiniawai. Tura nase umpuim yútutsuk nankamainiawai. Árak nerektin nantutin nerechua áanin áiniawai. Tuma ásar uwemu penké jaka áanin áiniawai. ¹³ Entsa nujan Krak saurjín ajekeawai. Nu shuarsha núnisar ni natsantrjín natsamt-suk ajekeawai. Tura yaa waakua áanin áiniawai. Tuma ásar nekas kiritniunam tuke menkakatin áiniawai.

¹⁴ Atańka tirankiyayi Eruk. Ti penker Yúsnan etserin asa juna tímiayi “Uunt Yus ti untsurí ni shuarijijai winit-tiawai. ¹⁵ Nuyá ashí shuar túrawarman nekaattawai. Tura ashí yajauch shuar nasha ti tunáa túrawarua nujai tura Yúsán yajauch áujmatsarua nújajsha súmamtiki-awartatui” tímiayi Eruk. ¹⁶ Nu shuarka péńkera nujai waratsuk “yajauchiiti” tuiniawai. Aya ni ayashí wakera-munak wakeruiniawai. Nankaamantu enentáimtu-mainiak chichainiawai. Tura chikich shuaran shiir chicharainiaksha aya nii wakera nuna túrutati tusa péńker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntrj Jesukrístu akatramurj yáunchu “aneartarum” tiarmiania nusha enentáimtustarum. ¹⁸ “Amúamu tsawant ishichik ajatesmatai shuar Yúsnan wishikrar nakitrartatui. Tura ni yajauch wakeramurjiniak umíi pujuartatui” tiarmiayi. ¹⁹ Nu yajauch shuar atumín akantamenawai. Ju nunkanmayanak páchiniak Yusa Wakanjín takakainiat-sui.

²⁰ Tura átumka, aneamu yatsurú, tuke Yus nekas enentáimtusum kakaram ajastarum. Yusa Wakanj kakarmarijijai ashí Yus seatarum. ²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntrj Jesukrístu in waitnentrama asa tuke shiir Niijijai pujustinian amastatji. Nu tsawant naká pujutarum.

²² Mai yapaji ajá ainia nu naka enentáimtikratarum. ²³ Chíkich shuarsha jiniumia júsatniua áitkiasrum uwemtikratarum. Tura chikichcha ti yajauch ásamatai anearum waitnentatarum. Tura ni pushirjsha ni tu-naarijijai maatra asamtai mujkiatniuiti.

Yúsan shiir awajeawai

²⁴Yus chikichkiiti. Ti nekaiti. In uwemtikkiartin asa ni kakarmarijijai yainmakminiaiti tunaanum iniarchatni-un. Tuma asa tunaajai máatrachu awajtamas ni ti shiir-

marin ejetamtatume. Túrutma ti waramtikramsattarme. Ii Uuntri Jesukristu túrunamujai Yuska Niŋki shiir awajsatniuiti tura naŋkaamantu enentáimtustina-aiti. Yáunchusha, yamaisha, tura tuke ashí akupin atí. Núkete.

APUKARÍPSIS

Jesukristu paant awajsamu

1 Jú áarman Jesukristun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukristu ni suntarin akupak ashí winia paant awajtursamai. Wisha Juánkaitjai. ²Yus timia nunasha tura Jesukristu ujatkamia nunasha tura wi íis-maj nunasha ti paant aya nekasa nuna tájai. Penké wáitratsjai.

³Jú papin áujea nu shuarsha tura núnisan juna án-tana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴Wi, Juan, Asia nuñkanam siati (7) péprunam Yus-shuar írunun ju papin áateajai. Yus anenma asa imi-atkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti.

⁵Núnisan Jesukristu shiir yainmakarti. Nii tana nu imiá nekasaiti. Niisha emka jakamunmayá yamaram iwiaak-majai nantakniuiti. Tura ju nuñkanmayá akupniu Uun-trinti. In anenma asa ni numpejai ii tunaarin nijia-tramkaitji. ⁶Túrutma akupin awajtamsaitji. Tura ni Aparj Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

⁷Wats, Krístuka yuranmijjai winittiwai. Tura jiuarmia nusha tura ashí shuarsha nuna wáinkiertatui. Túrawar ashí sapijmiainiak útiartatui. Maa, nekas nunnis átatui.

⁸Krístuka “yámankamtaiknumiá amúamunmasha ashí nérenniuitjai, tawai. Wisha A rétranmayá Y ré-tranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹Wi Juan atumjai métek waitia asan atumí yachintjai. Núnisan nayaimpiniam, Yus akupeana nuj, métek jeat-taji. Tura katsuntrar nákastinian Jesukristu mái métek súramji. Yus-Chichamnasha tura Jesukristu timiancha étsereakun nayantsa ajapén atentramunam Pátmus nuñkanam sepunam apujsamua núnisan pujumjai.

¹⁰Tumai tumin tsawantaj Yusa Wakanj pujurtakui winia úkuruiní kakantar antsumman antukmajai. Kachu umpúamua núnis ti kakarmauyayi.

¹¹Tura turutmiai “Wiitjai. Yámankamtaiknumiá amúamunam ashí nérenniuitjai. Wisha A rétranmayá Y ré-tranam ashí retra áintsaitjai, tímiai. Tuma asamtai wáinmena ju, papinium áaram Asia nuñkanam siati péprunam Yus-shuar írunna nu akuptukarta. Ju peprunam akupkarta: Ipisiusha, Ismirnasha, Pírka-musha, Tiatirasha, Sártissha, Piratírpiasha, tura Rautiséasha.” Tu turutmiai.

¹²Túrutkui yaki túruta tusan apajasan íikman siati shirikip ikiutain kurijjai najanamun wainkiamjai. ¹³Tura nu ajapén Aents Ajasua núninan wajan wáinkiamjai. Tura pushirísha nawea timiai nuntuaru entsaruyi. Emenmamkesha kúrinia netsepnum emenmamaui.

¹⁴Tura ni muuke intiashísha murikiu uré nijiamua núnisan tura micha núnisan ti puju chírauyi. Tura ni jiiisha jiya núniskeyi. ¹⁵Ni nawesha ti wincha asa jiru yanikutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. ¹⁶Ni untsuurinj siati yaan takakuyi. Tura ni weneniasha puniá áinis tsakatskat mai ere awajsamu jiiinmiai. Ni yapísha etsa ti etsantuk íischamnia núnisauyi.

¹⁷Nuna wáinkian jaka áintsanak naween iniaarmajai. Túrusha ni untsuurí uwejen awaantus turutmiai, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai. ¹⁸Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirin takakkun nérenniuitjai, timiai. ¹⁹Tuma asamtai wáinkiamna jusha, yamá wáinmena nusha, tura ukunam átatna nusha aartá, timiai. ²⁰Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuurujinj siati yaa wainkiam nu, siati péprunmayá Yus-shuaran wáinniun nakumenawai, turutmiai.

Ipisiunam chícham áatramu

2 Nuyá turutmiai ‘Ipisiunmayá Yus-shuaran wáinin ju áatratá: Siati yaan untsuurnum takakna nu tura núnisan siati shirikip-ikiutai kúrinman ajapén atenta wekáa nu, tawai: ²“Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme. ³Ti wáitiatmek katsuntram yawetsuk Winia ti takartusuitme. ⁴Túrin ámini juna títiatjame. Yus aneakum yámankamtaik ti penker wekainiuyam núnisam túratsme. ⁵Tuma asam ikiuknium nu enen-

táimpram yaunchu túriniuyam núnismek ataksha túrata. Túrachakminkia ame shiripkirmin wari jurustatjame. ⁶ Tura ju péñker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitiajai. ⁷ Kuíshtinia nu shuar Yusa Wakanj ashí Yus-shuaran timian antukti: Nupetmakunka tuke iwiaaku pujutai numi nerēn yúatniun tsañkatkattajai. Nu numi Yus pu-jana nuj wajaawai.” Tu áartá’ turutmiai.

Ismirnanam chícham áatramu

⁸ Nuyá turutmiai ‘Ismirnanmayá Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisañ jaka nantakmia nu, tawai: ⁹ “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusaiñkia ti kuítrinniuitme. Tura shuar uunt iwianch Satanás shuari ániayat “Israer-shuaraitjai” tuíniak ya-jauch áujmatramena nuna nékajai. ¹⁰ Ti wáitsattamna nu ashamkaip. Íwianch ashí nekapramsataj tusa atumiññan sepunam enkeattawai. Nuñ tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. ¹¹ Kuísh-tinia nu shuar Yusa Wakanj ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

Pírkamunam chícham áatramu

¹² Nuyá turutmiai ‘Pírkamunmayá Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: ¹³ “Ashí ame túram nuna nékajai. Uunt iwianch Satanás akupea nuñ pujayatmek tuke shiir enentáimturmena nuna nékajai. Winia shiir umirtíñian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai. ¹⁴ Túrin áminin juna títiatjame. Atumijiniá shuar yaunchu Yús-nan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitán Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisañ ti tsanirmatniun jintintiamiayi. ¹⁵ Atumijiniá shuarsha Nikiurás jintíamuncha, Wi nakitij nuna, iniaiatniun nakitiainiawai. ¹⁶ Wats, enentáimpram iniaisata. Túrachakminkia Wi wari winin winia wenuriyja puniá jiniia nuñ máníaktajai. ¹⁷ Kuíshtinia nu shuar Yusa Wakanj ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naarj aarma átatui. Nunasha chíkich shuarka penké nékatsañ aya achía nuke nekaattawai.” Tu aartá’ turutmiai.

Tiatiranam chícham áatramu

¹⁸ Nuyá turutmiai ‘Tiatiranmayá Yus-shuaran wáinin ju áatratá: Yusa Uchirí jii jijijai métek keena nu tura

núnisañ nawē jiru yañkutaku jiamua núnis néwar ajawa nu, tawai: ¹⁹ “Ashí ame túram nuna nékajai. Yus shiir enentáimtakum aneam nuna nékajai. Tura kat-suntram péñker takaamna nuna nékajai. Yáunchujai nañkaamas péñker túrame yamaikia. ²⁰ Túrin áminin juna títiatjame. Nu nuwá Jesapír awematsme. “Yús-nan unuiniajai” tinia Wíi shuaran ti anañkenawai. Tura ti tsanirmatniuncha tura ántar-yus-sutai namanken maar yúatniun jintintiainiawai. ²¹ Niisha ni tunaarín enentáimiar iniaisat tusan nákasuitjai. Tura nakitiawai. ²² Wátsek, suñkurmatkiakan peaknum áepsattajai. Tura chíkichcha nijijai tsanirma ainia nunasha nijijai métek ti wáitkiastatjai. Ni tunaarín enentáimiar iniaisacharmatañkia túrattajai. ²³ Ni uchiríncha mantúat-tajai. Nuñai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik takasmajai métek akiktatjarme. ²⁴ Tura chí-kich shuar Tiatiranmayatiram, nú chicham enentáim-tuscharmena nu, “nekas iwianchnia uukma” tútaiya nu nékachu asakrumin atakka túratniun patatkashtat-jarme. ²⁵ Tura Wi jeatsañ takakrum nu emetatarum. ²⁶ Nupetmakunka Wi wakeraj nunak tuke initsuk túrana nuna untsurí nuñkanam akupkatniun tsañkatkattajai. ²⁷ Winia Apar tsañkatrukmiá núnisnak akupkatniun tsañkatkattajai. Tura nuwē najanamu jiru-jai awati ijiakratniua áinis ti kakarmajai akupkattawai. ²⁸ Yáñkuam káshik jiniia nuna susattajai. ²⁹ Kuíshtinia nu shuar Yusa Wakanj ashí Yus-shuaran timian antukti.” Tu aartá’ turutmiai.

Sártisnum chícham áatramu

³ Nuyá turutmiai ‘Sártisnumiá Yus-shuaran wáinin ju áatratá: Siatí Yusa Wakanj takakna nu tura núnisañ siati yaan takakna nu, tawai: “Ashí ame túram nuna nékajai. Iwiaakua ántsañ wekayatmek Wijjainkia jákaitme. ² Shintiarta. Kajinia nu umpuím ekeemakta. Kame Yusjái ísam péñker túrichuitme. ³ Yus-Chicham ti shiir enentáijijai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumññkia kasa núnisnak nékatsmin jeartiatjame. ⁴ Tura Sártisnum shuar ishichik pushirj wapik máacharu pujuiniawai. Nusha ti penker ániak pushí pújun entsarar Wijjái wekasartatui. ⁵ Nupetmakuka pushí pújun entsartatui. Tura iwiaaku átinia nu papiniumiá ni naarj áarman japirash-tatjai. Antsu winia Apar tura ashí nayaimpinmayá sun-tar íimmianum shiir áujmattsattajai. ⁶ Kuíshtinia nu shuar Yusa Wakanj ashí Yus-shuaran timian antukti.” Tu aartá’ turutmiai.

Piratírpianam chícham áatramu

⁷ Nuyá turutmiai ‘Piratírpianmayá Yus-shuaran wáinin ju áatratá: Ti shiir túrin tuke nekasana tana nu, uunt akupin Tawitia yawirj takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Juna tawai: ⁸ “Ashí ame túram nuna nékajai. Kakarmachuitatmek winia chichamur shiir

enentáimtakum Winia initieschaitme. Tuma asakmin wáitin uratjame. Nuna chíkich penké epenchamniaiti. ⁹Wátsek. Shuar wáitruiniak "Israer-shuaraitjai" tuíniyat uunt iwianch Satanás-shuar ániawai. Nu shuáran, nekas ámin aneajna nuna nekaawarat tusan amíini tikishmatkiarartatjai. ¹⁰Katsuntrata tímiaj nu, shiir umirka asakmin Wisha ti wáitsatin ashí nuñkanam átatna nuyá uwemtikrattajme. Nu wáitsatniujají ashí nuñkanmayá shuar nekapnasartatui. ¹¹Wárik winittiajai. Takakmena nu emetata. Akinkiatniuitmena nuna chíkich shuar atantramkiarajin. ¹²Nupetmakunka winia Yusru jeé tañkirin awajsattajai. Tura nuyá penké jíin-kichartatui. Tura nin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmayá yamaram Jerusaréñka Yúsnumiá tára núiti. Núnisañ winia yamaram náaran nin áatrattajai. ¹³Kuíshinia nu shuar Yusa Wakaní ashí Yusshuaran timian antukti." Tu aartá," turutmiai.

Rautiséanam chícham áatramu

¹⁴Nuyá turutmiai 'Rautiséanmayá Yus-shuaran wáinin ju áatratá: Wáitrusuk nekasa nunak tiniua nu tura núnisañ ashí Yus najanamun Úuntriya nu, tawai: ¹⁵"Ashí ame túram nuna nékajai. Tura michaash míchachuitme. Núnisañ tsuërsha tsuérchaitme. Míchaitkiumsha tura tsuéráitkiumsha maak. ¹⁶Kame míchachu tsuërcha antsu aya tsuétsetak asakmin imiutkattajme. ¹⁷Iis, "Kuítrinniuitjai, ti irumpraitjai, warinkisha atsumatsjai" tame. Túrasha ashí yajauch, wáitnenmai, kuítrincha, kusuru, tura misú iyajme. ¹⁸Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Péñker ímprataj tusam jíiniam enketai enkeeta. ¹⁹Aneajna nuna chichareajai. Nu asamtai kakaram ajasam tunaarum enentáimpram iniaisata. ²⁰Enentáimprata. Shuar wáitiniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan amíijají yurumáttajai. Tura amesha Wijíají yurumáttame. ²¹Nupetmakuka akupin pujutainium Wijíají pujustatui. Wisha núnisnak nupetmaku asan winia Aparjají akupin pujutainium pujusuitjai. ²²Kuíshinia nu shuar Yusa Wakaní ashí Yusshuaran timian antukti." Tu áartá," turutmiai.

Nayaimpiniam Yúsan shiir awajenawai

4 Nu nañkaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujají métek kakaram chichartukma nu turutmiai "Juí yakí wakatá. Ukunam átatna nuna iniaktustatjame" turutmiai.

²Nu chichamaik Yusa Wakaní akantukmiai. Túrutamtai nayaimpiniam akupin pujutainium pujan wainkiamjai. ³Niisha jaspi kayasha tura kurnarínia kayasha nujají métek ti winchayui. Akupin pujutain tuntiak téntakuyi. Nusha ismirarta kayajají métekeyi. ⁴Chíkich paintikua-tru (24) akupin pujutain nu pujutain téntakarun

wainkiamjai. Tura paintikua-tru uunt púju entsarainian tura kurin etsenkrakainian, nuí pujuinian wainkiamjai. ⁵Akuptainiumiá peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakaní. ⁶Núnisañ nu pujutainium naka nayaantsa áanin ti saar amai.

Nu pujutainium wakenmaanisha niisháa tañku kua-tru téntakar ármiai. Ukurínisha tura eemsha jíi irunmiai. ⁷Emka tañku úunt yawáa áanniuyi. Chíkichka tura uchichia áanniuyi. Tura chíkichcha shuara yapia áanniuyi. Tura chíkichka churuwia nanamua áanniuyi. ⁸Nusha sais nanamtin áрмаi. Tura jíisha ti irunainiak ashí wainmarmai. Káshisha tsawaisha tuke iniaitsuk júna tiniu armai:

"Ti nekas péñkeraiti Uunt Yus. Ashí nañkaamas kakarmaiti. Tuke yaunchu pujuyayi. Núnisañ yamaisha pu-jawai. Tura ataksha juke winittiwai" tiniu armai.

⁹Tura uunt pujutainium pujana nu tuke iwiaaku pujú asamtai nu tanku ti shiir awajsar yúmiñkiak pujuriarmai. ¹⁰Túruiniakuí paintikua-tru uunt tuke iwiaaku pu-jun tikishmatainiak ni etsenkrutairin naka áepriuniak tuiniawai:

¹¹"Úuntá, ii Yúsriñme. Tuke shiir awajmainme. Ashí nankaamas kakarmaitme. Amek ashí irunna nu najanaitme. Tura aya wakerakum najanamame. Ame wakerakmin irunainiawai" tuiniawai.

Murikkia papin urakminiaiti

5 Nuyá akupin pujutainium pujuya nuna untsurín papí penuarma áanniun wainkiamjai. Nu papisha iniaianisha tura pátatkesha áarmauyi. Tura urakchamnia atí tusa siati anujtukmajají kaki peekmauyi. ²Tura nayaimpinmayá suntar ti kakarma nu, ti kakantar inintran wainkiamjai. Niisha tímiai "¿Ya akupniuk ju papin kaki anujkamun jaak urakminiait?" ³Tura nayaimpinmayásha nuñkanmayásha tura jakamunmayásha chikichkisha nu papin urakmin atsumiayi. Áujtsuk íistinni-asha tujinkiarmai. Tímianu akupin atsumai. ⁴Nu papin uraktincha tura áujsatniusha, kame íistincha atsakuí ti úutmiajai. ⁵Nuyá chikichik uunt turutmiai "Ti úutíp. Israer-shuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti."

⁶Nuyá uunt pujutaiya nuí tura kua-tru tañkunam ajapén tura úuntnum ajapén Murik wajan wainkiamjai. Maamua áintsanketiat iwiaakuyi. Kachurísha siátiyi. Ni jíisha siátiyi. Nusha Yusa Wakaní siati ashí nuñkanam akupramua nuuyi. ⁷Nu Murik we nekas uunt Akupniun untsurínian nu papin achikmiayi. ⁸Tura papin achikmatai kua-tru tañkusha tura paintikua-tru uunt arma nusha Murikiun tikishmatrarmiayi. Ashí uunt arpa tuntuítaiin takaku armai. Tura ashí kuñkuin enketain kuri najanamun takaku armai. Nu kuñkuin Yus-shuar áujsamuiti. ⁹Ju yamaram kantancha kantampriarmai:

"Amek imiá nañkaamas akupniuitme. Amek papí achikiam anujtukmarí jaakminiaitme. Yus-sutai namañkea áinis mantamna asam túramniaitme. Ashí

nun̄kanmaya shuarnumiasha Yusna árat tusam ame numpem̄jai in sumakmiame.

¹⁰ Turam akupin awajkartusuitme tura núnisañ ii Yús-riniun pujurin awajkartusuitme. Tuma asakmin akupin ajasar j̄u nun̄kanam akupkattaji.” Tu kantamainiawai.

¹¹ Tura untsurí nayaimpinmaya suntar uunt pujutaincha tañkuncha tura úuntnasha éñkekawarun wainkiamjai. Nusha nekapmarchamnia ti untsurí armia nu ¹² kakantar tiarmai:

“Murik mantamnamia nu akupin ajas ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yumingsar Nin ti shiir awajsatin ániawai.” Tu tiarmai.

¹³ Núnisañ ashí Yus najanamu, nayaimpiniam írunna nusha, nun̄kanam írunna nusha, nun̄ká inít írunna nusha, nayaantsanam írunna nusha, tuíñian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiñiawai.

¹⁴ Tura kuaru tañkusha “Tuke núnisañ atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

Murikkia siati anujtukman jāakmai

6 Wi iyakui Murikkia chikichík anujtukman jāakmai. Túramtai chikichík tañku ipiamtajai métek kakan-tar untsumon antukmajai. “Winim iitiá” turutmiai.

² Túrutkui kaway pújun wainkiamjai. Nūi ekeemia nu tíshimkiun takakuyi. Aukuptai tawaspasha susamuyi. Tura tuke nupetmaktinian j̄iinkimiai.

³ Nuyá Murik anujtukma jímiaran jāakmatai tañku jímiara nu “Winim j̄itiá” turutmiai. ⁴ Túrutkui chikich kawai kap̄āakun wainkiamjai. Nūi ekeemia nuna puniá úuntan susamuyi. Nusha shiir pujuscharat tusa ashí j̄u nun̄kanmaya shuaran máanaimtikiatniun akupkamuyi.

⁵ Nuyá Murik anujtukma menaintiun jāakmatai tañku menaintiua nu “Winim iitiá” turutmiai. Túrutkui kaway mukusan wainkiamjai. Nūi ekeemia nusha kijin nekapmatain takakuyi. ⁶ Tura kuaru tañku ajapeniá chichaa-mun antukmajai. “Tsawant takamtsuk takaakmesha apatkuka peñké ishichik sumakmin átatme. Tura núnisañ machasha nijiamchisha amuukacharat tusam peñker wáinkiata.” Tu timiai.

⁷ Nuyá Murik anujtukma kuátrun jāakmatai tañku ku-atrua nu “Winim iitiá” turutmiai. ⁸ Túrutkui kaway yañkun wainkiamjai. Nūi ekeemia nusha Jákatín náartiniuyi. Tura nuna úkurin̄ Jatai nemark winimiai. Nusha ashí nun̄kanmaya shuar kuaru akankamunmaya chikichkin máatniun akupkarmauyi. Nusha mesetj̄aish̄a tsukaj̄aish̄a sun̄kurj̄aish̄a tura yajasmajai máawarmai.

⁹ Nuyá Murik anujtukma s̄eñkun jāakmatai Yus-sutai kun̄kuin ekemtai wakenmaan̄i íismajai. Túran Yus-Chichaman etserainiakui máawarma wakan̄in wainkiamjai.

¹⁰ Nusha kakantar untsumainiak tiarmai “Uuntá, ti peñker asam tám̄ena nu umiátsmek. ¿Urutiak nun̄ká

pujuinia nú shuar ii mantamnamunam yapajmiátruk-tam?” tiarmai.

¹¹ Tuíñiakui pushí pújun susar tiarmai “Chikichcha Krístunun etserainiakui mantamnatin ániawai. Nu náakrum ishichik ayampratarum” tiarmai.

¹² Nuyásha Murik anujtukma sáisan jāakmatai ti úyurun wainkiamjai. Tsawai-nantusha itiurchat ajasua áintsañ mukusa ajasmai. Kashí-nantusha numpá áintsañ ajasmai. ¹³ Tura yaasha wampú nere nase umpuim ti majuywa áintsañ kákekarmai. ¹⁴ Nayaimpisha papí penuara júamua áintsañ meñkakamai. Tura naintcha yajá apujnasarmai. Tura nun̄kasha nayaantsanam ajapén atentrainia nusha yajá apujnasarmai. ¹⁵ Tura j̄u nun̄kanam akupin ainia nusha náinnium wear kayá wáñnam uumkarmai. Niijj̄aish̄a ashí shuar, uuntcha, kuítriniusha, suntara kapitián-tr̄isha, ashí kakaram ainia nusha, tura takarniusha añkant ainia nujai náinnium wearmai. ¹⁶ Túrawar náin-niasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukrata-ta. Túrarum Murik ti asutiámat̄aj nuyásha tura akupin pujana nuyásha uukratkatá” tiarmai.

Israer-shuarnumiá anujturma armia nu

7 Nu nan̄kaasmatai kuaru nayaimpinmaya suntar, nunkaa kuaru yantam̄en wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajatiarmai. ² Kame kukarsha tura nayaantsanmasha yajauch awajsatniun akupkamu armai. Tura chikich suntarnasha nantu tátainmaaniá winian wainkiamjai. Tuke iwiaaku Yusa anujtutairin takakuyi. Nusha kuaru suntaran kakantar untsuak tímiai, ³ “Ii Yusri takarin̄ ainia nu nijia-ainium áarar anujtatsriniñ kukarsha, nayaantsasha, tura kampunniusha nasej̄ai yajauch awajsairap” timiai.

⁴ Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik siañtu kuarenta kuaru mir (144.000) armai. ⁵ Jutá weeanmaya tuse mir (12.000) anujtukma armai. Rupin̄ weeanmayasha tuse mir anujtukma armai. Kat weeanmayasha tuse mir anujtukma armai. ⁶ Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai. ⁷ Semeuñ weeanmayasha tuse mir anujtukma armai. Riwí weeanmayasha tuse mir anujtukma armai. Ísakar weeanmayasha tuse mir anujtukma armai. ⁸ Sapurún weeanmayasha tuse mir anujtukma armai. Jusé weeanmayasha tuse mir anujtukma armai. Pin̄jamín weeanmayasha tuse mir anujtukma armai.

Ti untsurí shuar pújun entsararu

⁹ Nuyá ti untsurí shuaran wainkiamjai. Ashí nun̄kanmaya nusháa shuaraim iruntrar̄u ásar nekapmarchamnia armai. Tura nusha uunt akupin pujutainium tura Murikniun naka wajaarmai. Tintiuki nuk̄ea áaniun

takaku armai. Tura ashí pújun entsaru armai. ¹⁰ Ashí kakantar untsumainiak tiarmai:

“Ti Yusrî uunt akupin pujutainium eketna au tura Muriksha imia Niŋki Uwemtikin ániawai” tiarmai.

¹¹ Tura nayaimpinmaya suntarsha uunt akupin pujutaincha, kuaru taŋkuncha, tura úuntnasha téntatkar armia nu piniakum nuŋká tepersar Yúsan shiir awajsar ¹² tiarmai

“Nekasaiti. Tuke iniaitsuk ii Yusrî ti shiir awajsatniuiti. Niŋki ti neka, ti kakaram, ti akupin, tura ti peŋker asamtai tuke yuminsatniuiti. Núnisaŋ atí.”

¹³ Nuyá chikichik uunt inintsamai “Pújun entsaru ainia jusha zya ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Jû shuar ti waitsaru ániawai.

Túrawar Murikiu numpéjajî ni pushirî nijiamawar puju awajsaru ániawai. ¹⁵ Nuna túrawaru ásar yamaikia Yusajî naka pujusar tsawajsha káshisha Yúsnan ni Jeeŋ takainiawai. Tura akupin pujutainium eketna au tuke wainkiartatui. ¹⁶ Yamaikia tsukajajîsha kitiakjajîsha wáit-sachartatui. Tura etsasha sukuiniak yajauch awajsachartatui. ¹⁷ Murik, akupin pujutainium naka wajana au, ni murikrîŋ wáiniuk áyureak ti peŋker púkuni entsa waana nuí apusartatui. Tura Yus ni neajkincha ukuŋtiurartatui.” Tu túrutmiai.

Anujtukma siatia nu jaakma tura kuŋkuin ekeematai- jijajî túrunamu

8 Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. ² Nuyá siati suntar Yusajî naka wajainia nuna wainkiamjai. Nusha siati kachun susamu armai. ³ Nuyá chíkich suntar kuŋkuin eŋketain kurijijajî najanamun itiamai. Tura Yus-sútainium ayamas wajasmatai núkap kuŋkuin sunasmai. Nu kuŋkuin ashí Yus-shuar áu-jsamujajî métek kuŋkuin ekeematainimum ekeemaktini-uyi. Nu ekeematai kurijijajî najanamuyi tura uunt akupin pujutainium naka pujumai. ⁴ Tura suntar ekeemakmatai kuŋkuinia mukuintiurî Yus-shuar áu-jsamujajî métek Yúsan amainkiamai. ⁵ Nuyá nu kuŋkuin eŋketain suntar achik ekeematainimaya ji kapaan kájrîŋ áimiak jû nuŋkanam ukaamai. Túramtai ipi-amtasha untsummasha, peemsha, tura uusha armai.

Kachu umpuarma

⁶ Nuyá siati suntar kachun takakainia nu umpuarta tusar iwiarnararmai.

⁷ Emka suntar kachun umpuarmatai micha kákekamai. Nunasha ji numpajajî pachimpramuncha nuŋkanam ajapawarmai. Túmakui maintiu nakakma jeeán numincha tura ashí írunna nuí ekeemakmai. Tura ashí nuŋkanam chírichrin takamtsuk ekeemakmai.

⁸ Nuyá suntar jímiaara nu kachun umpuarmatai uunt naintia áanin kean nayaantsanam ajunmai. Túramtai maintiu nakakma jeeá nayaants numpa ajasmai.

⁹ Núnisaŋ maint jeeá nayaantsanam matsatainia

jákarmai. Tura maint jeeá uunt kanua nu emes-nararmai.

¹⁰ Nuyá suntar maintiu nu kachun umpuarmatai ti uunt yaa nayaimpinimaya kapaŋ kákekamai. Tura entsasha tura púkuninmasha maint nakakam jeeánum kákekamai. ¹¹ Nu yaasha Yapá-numi náartini-uyi. Tura maintiu nakakam jeeá entsa yapá ajasarmai. Túrunamtai ti untsurî shuar nu entsa yapá ajas-májajî jákarmai.

¹² Nuyá suntar kuarua nu kachun umpuarmatai maintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawajsha káshisha maintiu nakakam jeeánum tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar untsumuk timiai “Maa, chíkich maintiu suntar umpuniakui nuŋkanam pujuinia nu ti wáitsartatui.” Tu timiai.

9 Nuyá suntar seŋkua nu, kachun umpuarmatai yaan nayaimpinimaya nuŋká kákeran wainkiamjai. Tura nu yaan tunáa shuar jákaru matsamtai yawirîŋ susamuyi. ² Tura uraimtai nu náŋkatkachu wáŋnmayá ti mukuint jijnimiai uunt jiniumiá áintsan. Tura etsan-cha tee awajsamai, yuraŋmincha tee awajsamai. ³ Nuyá nu mukuintiummaya manchi jíntrar nuŋká ti yujaarmai. Tura jû nuŋkanmaya titiŋkia áinis najamin ajastinian susamu armai. ⁴ Chírichrincha ashí arakmancha ashí numincha yajauch awajsatin suritkiamuyi. Antsu áyatik shuar nijiainium Yusa naari árar anujtukchamunak yajauch awajsatin armai. ⁵ Túrasa ajaksuk seŋku (5) nántutin wáitkiastin susamu armai. Kame titiŋ, shuaran ijiú, najawęa núnis najawęatin susamu armai. ⁶ Nuj shuar wari jakataj tuíniayatan jákachartatui. Ti wakeruiniayatan jákatniun tujinkiaratui.

⁷ Manchisha ísam mesetnum weena nu kawaiiya áinis armai. Kurí tawaspa áinis etsenkraku armai. Yapisha shuarna áinis armai. ⁸ Intiashísha nuwánua núnis armai. Najsha úunt yawá naiya núnis armai. ⁹ Netsepén namaka saepea áinis jiru péeramuyi. Tura nanamenaksha kaway karu japiiniak mesetnum tsékeena núnisaŋ téter ajarmai. ¹⁰ Ujukésha titiŋki ujukęa áinis asa janŋki ajakin armai. Nujajî tuke seŋku nantu yujarsar shuaran íjiuar wáitkiastin armai. ¹¹ Ni uuntriŋsha náŋkatkachu wáŋ uraimia nuyajî. Nusha Is-raer-chichamjajî Apatún tutainti. Tura Kriaku-chicham-jajîŋkia Apuriún tutainti. Nuka Yajauch Awajkartin tawai.

¹² Jujajî emka wáitsatin naŋkaamasai. Túrasa tuke jímiaar taasai.

¹³ Nuyá suntar saisa nu kachun umpuarmatai chichaman antukmajai. Yusajî naka kuŋkuin ekeemaka Yus-sutai kurimpramu amai. Tura ni kuaru yantame kachu jijnimiai. Tura nuyá chichaak ¹⁴ suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.” ¹⁵ Túramtai nu kuaru suntar wear maintiu nakakam untsurî shuaran maatai tusar weriarmiayi. Kame nuna

túrawarat tusar ikiusma armai. Tura nu uwitin, nu nantutin, nu tsawantin, tura nu úratin atáatin ikiusma armai. ¹⁶ Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirurín antukmajá. Nusha jimiará sian̄tu miyuñ (200.000.000) armai.

¹⁷ Tura íimiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapáaku wiñkia tura yañkú armai. Tura kawaisha úunt yawáa muuke áinin armai. Tura ni wenyasha jisha, mukuintiusha, asuprisha ti tsuēr keá nu jíniarmai. ¹⁸ Nu maintiu ti yajauch wáitsamujá maintiu nakakam shuar untsurí jákarmai. Jijjáisha, mukuintiujaisha, asuprijjáisha jákarmai. ¹⁹ Nujá ni kaway ni wenejá shuáran wáitkiasarmai. Tura ni ujuké napí múukeya áinin áрмаi. Nújáisha shuaran wáitkiasarmai.

²⁰ Tura nujáisha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijjáisha, kuítjáisha, jiru yañkutakujáisha, kayajáisha, numijjáisha najanamu ásar wainmaktinniasha, antuktinniasha, tura wekasatniuncha tujintiainiawai. ²¹ Núnisañ mañkartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

Papichin suntar takusmia nu

10 Nuyá chíkich kakaram suntar nayaimpinmayá táarun wainkiamjai. Nusha yurañkim amuyámu tura múuknum tuntíak téntakmauyi. Yapísha etsajá métek wíanchauyi. Tura kujapésha ji keá áintsañkeyi. ² Nusha papin urak takakauyi. Tura imiá uunt asamtai ni nawé untsurnumaní nayaantsanam tura menaariñi kukar tarimias wajasmai. ³ Tura úunt yawá kakar shiniak chicháa áinis ti kakaram untsumkamai. Nujá siati (7) ipiamtasha chichasarmai. ⁴ Nii chichasarmatai ni chichamen áartiniujai tura nayaimpinmayá chichartak “Áaráip, túrutmiai. Jyka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsuurín nayaimpinmaani takuimiai. ⁶ Tura timiai “Peñké ishichik ajasai. Suntar siatia nu umpúakuñkia Yus ashí yaunchu enentáimpramia nu uminkiatatawai. Emka ujatsuk ukunam ni shuarín Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nuñkancha, nayaantsanacha, tura ashí nu jírunga nunasha najanaiti” timiai.

⁸ Nayaimpinmayá “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuurín papin urak takakna nu achiktá” turutmiai. ⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakemíñkia yapamprattame” túrutmiai. ¹⁰ Nuyá papichin suntarnumiá jukin yuamjai. Tura nii turutmia núnisañ wenuruñkia ti yumin

nekapramjai. Tura antsu yuan wakeruñkia yapampramjai.

¹¹ Tura nuyá turutiarmai “Waketkim ataksha ashí nuñkanmayá shuaran tura ni kapitáin̄tríncha Yus tana nu ujakartiniaitme.” Tu túrutmiai.

Jimiará shuar Yusaiya akupkamu

11 Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram namañ-maa-Yus-sutaisha nekapmartá. Tura nu júsán shiir awajeena nusha nekapmartá. ² Antsu jea áarínkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusaréñkan kuarentitús (42) nantu nu j akupenak mash yajauch awajsatatui. ³ Túruiniakui Wikia Wii-shuaran jímiaran akatran akupkattajai. Nusha chikichik mir jimiará sian̄tu sesenta (1.260) tsawant pujusar Winian etserkartatui. Nuka maintiu uwí nañkaamasaiti. Úutkur-entsatai pushin entsaru ártatui.” Tu turutiarmai.

⁴ Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nuñká Uuntrí Yusai wajainiak, jímiar akatramua nú shuaran nakumainiawai. ⁵ Shuar nin yajauch awajsatatui ni weneniá jinia jiki nemasri ashí áesatniuiti. Núnisañ nin yajauch awajsatniun wakera nuka jákartatui. ⁶ Nu aentska Yúsnan áujmatainiak yumi yutukáip títinian kakarman takakainiawai. Núnisañ entsanacha numpa awajsatniun kakarman takakainiawai. Tura ashí yajauchia nujá aentsun wáitkistinian takakainiawai. Nuna ashí ni wakeruinia nu j páchitsuk túramin áiniawai. ⁷ Tura ni takatrín umikiarmatai Ti Kajen Yajasma náñkatkachu wáñmayá jiniia nu mesetan najata nupetak máawartatui. ⁸ Tura iwiarnatsuk ni ayáshí uunt pepru jintíin ajapén tepeartatui. Nu péprunmasha ii Uuntrí Jesukrístuncha máawarmiayi. Nu péprunmayá shuar tuke tunaan túrin áarmatai Ejiptu tuíniak tura núnisañ Sutuma tuíniak nu péprun páchiniawai. ⁹ Tura maintiu tsawant nuyá nañkaamas ashí nuñkanmayá shuar jaka tepan íisar iwiarnascharti tíartatui. ¹⁰ Nu jákarmatai ashí nuñkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitkiasaru áarmatai ti warasarmai. ¹¹ Nuyá maintiu tsawant nuyá nañkaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmayá kakaram untsumman antukarmai: “Jui yakí wakatarum.” Tu untsummiai. Tutai ashí ni nemasri íimiainiain̄ yurañkim amuyam nayaimpiniam wákarmai. ¹³ Túmainiái ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujá. Chíkichkia sapijmiainiak Yus nayaimpiniam pujana nuna shiir awajsarmai.

¹⁴ Jímiar wáitsatin nañkaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntrj Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yusai naka pujuarmia nu piniakum tepersar Yúsan shiir awajenak tiarmai:

¹⁷ “Uunt Yusá, ti kakaram asam Ámijijaj tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijijaj nekas akupkatin juarme yamaikia. Tuma asakmin yuminsajme, tiarmai. ¹⁸ Ashí shuar kajertamkaru ajij yamaikia amesha kajerkatin tsawant jeayi. Jákarusha iniantkim ni túramurj íisartatme. Turam amée shuarka shiir etser-turmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nuñkan emesniuka ashí emesratniunam akupkattame.” Tu tiarmai.

¹⁹ Tuíniakui Yusa Uunt Jee nayaimpiniam ana nu uranmiatai wakenmaanj Chícham Aarma Chumpitai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

Nuwasha tura Ti Kajen Yajasmasha

12 Nuyá nakumkamu ti enentáimpramnia nayaimpiniam wantinkiamai. Nuwá etsajaj penuarma wantinkiamai. Nawasha nantunam ekeemai. Tura múuknum tuse yaan etsenkrakuyi. ² Nu nuwá ajamtin asa jurertaj tusa wáitiak ti kakantar uutmiai.

³ Tumaj ataksha ti enentáimpramnia nayaimpiniam wantinkiamai. Ti Kajen Yajasma kapagaku wantinkiamai. Muukasha siati asa siati akuptai tawaspan etsenkraku áрмаi. Tura kachurjsha tiásauyi. ⁴ Menaintiu nakakam jeeán yaan ni ujukéjaj japiki akakermai. Tura nuñká utsamai. Nu Ti Kajen Yajasma nu nuwá jatema nuj wajasmai. Júreremataik yuruataj tusa wajattsamai. ⁵ Tura nuwasha áishmankan jurermai. Nu uchi uunt ajas ashí nuñkanam ti kakaram akupkatin asa, nu uchi akupin pujutainium Yus pujana nuj junakmiai. ⁶ Tura núwaka atsamunam pisarmai. Nuj pujustinian Yus iwiarturmai. Tura chikichik mir jimiará siantu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

⁷ Nuyá nayaimpiniam meset amai. Nayaimpinmaya suntara kapitántrj Mikiar ni suntarijijaj Ti Kajen Yajasmajaj máanaikiarmai. Ti Kajen Yajasmasha ni suntarijijaj ti máanaikiarsha ⁸ nupetmakcharmai. Túramtai nayaimpinmaya jiji akupkamuyi. ⁹ Núnisan Ti Kajen Yajasma ashí ni suntarijijaj nuñká akupnakmai. Nu Yajasmasha iwianchi kapitántrj Satanás tutainti. Yáunchuyá-napiiti niisha. Ashí nuñkanmayá shuaran ananjiuiti.

¹⁰ Nuyá nayaimpinmaya kakaram untsumman antukmajai. Tura timiai:

“Uunt iwianch ii yachin yajauch áujmatin jiji akupkamu asamtai yamaikia ii Yusri uwemtikratniusha tura ni kakarmarj iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yachin tsawaisha káshisha iniaitsuk Yusaj yajauch áujmatniua nuna ¹¹ íksan ii yachi nupetmakarai. Yus-susamu murikiu numpea áinis Jesukristu numpejaj nupetmakarai. Niisha jákatniuitkiusha surimiatsuk nekas-chichaman páchtsuk etserkarmai. Nujajisha uunt iwianchin nupetkarmai. ¹² Tuma asamtai nayaimpiniam pujarmena nusha warastarum. Antsu nuñká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantrj ishichik ajatesman nekáa ti kajekuiti.” Tu timiai.

¹³ Nuyá Ti Kajen Yajasma nuñká ajapna nuwá áishmankan jurerma nuna áinramai. ¹⁴ Turakui nuwan uunt nanapen churuwia nanapea áinis sunasmai. Nujaj nanamuk yáunchuyá-napiyá pisar atsamunam wemai. Tura ni ayuratniunam menaintiu uwí nuyá sais nantu pujusmai. ¹⁵ Nuyá nu napi ni weneyá entsá jiji nujanakrumamai nuwan ajekrataj tusa. ¹⁶ Túrasha nuñka nuwan yayak nakaak nu entsan mash ukuyámai. ¹⁷ Túramtai nuwan ti kajerak ni weeá chikich irunna nujaj máaniaktaj tusa wemai. Nu shuarsha Yus akupkammun umirainiak Jesusan ti shiir áujmaténakui, niijijaj máaniaktaj tawai.

Nuyá Yajasma jímiara nu

13 Nuyá nayaantsa káanmatkariin wajasan nayaantsanmaya Yajasma jiniun wainkiamjai. Muukasha siátitiat kachurj tias tura akuptai tawas-pasha tias armai. Ashí muuken Yúsan yajauch chicharin tu áarmauyi. ² Nuj wainkiamaj nu Yajasma nekas uunt yawáa áinniuitiat nawenka chaj nawea áinniuyi. Wenasha nekas kajen yawáa áinniuyi. Tura Ti Kajen Yajasma Entsayá Yajasma ni kakarmarj incha tura ni akupkatniurj incha susamai nujaj ti kakaram akupkati tusa. ³ Entsayá Yajasma muuké chikichkin jakamnia awatmian wainkiamjai. Túrasha péñker awajnasmai. Túramtai ashí nuñkanmaya shuar nuna íisar ti enentáimturar nemarsarmai. ⁴ Túrawar nin tikishmatrar shiir awajsar “¿Yaki jujajisha jeá. Imiá kakaram asamtai yaki niijijaj máanaikminiait?” tiarmai. Tura Ti Kajen Yajasma ni kakarmarj in Entsayá Yajasma susa asamtai ashí shuar nincha tikishmatrarmai.

⁵ Núnisan nu Entsayá Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. ⁶ Núnisan túrak Yúsan yajauch áujmatuk ni náarj incha ni jeeñcha tura ashí ni shuarj nayaimpiniam pujuinia nunasha katsekkarmai. ⁷ Tura Yusna ainia nujaj mesetan najana nupetkatniun tsankatnakmai. Tura ashí nuñkanmaya shuaran akupkatniun tsankatnakmai. ⁸ Túramtai ashí shuar tuke iwiaaku átinia nu papinium ni naarj yámankamtaiknumiá anujkam at-

súarma nuka nu Yajasman tikishmatrarmai. Nu papincha Murik jaka nantakmia nu takakui.

⁹ Shuar juna ántakka enentáimprati:

¹⁰ “Shuaran emetá juinia nusha emetnattawai.

Núnisañ shuaran nan̄kijjaj mainia nusha nan̄kijjaj mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin ániawai.

¹¹ Nuyá chíkich Yajasman kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi. ¹² Niisha Entsaya Yajasma kakarmarín súam akupniuyi. Tura ashí nuñkanmayá shuaran “Entsaya Yajasma penké jaa tsuarma nu, shiir awajnasti” tímiai. ¹³ Núnisañ shuarti túrachminian ti turin asa ashí shuar íimiainañ nayaimpinmayá jinia nuñká ajuarmai. ¹⁴ Tura Entsaya Yajasma súam aents túrachminian ti turak ashí nuñkanmayá shuaran anañkawarmai. Túrak Entsaya Yajasma nakumkamurín najanawarat tusa akupkamai. Túramtai puniajaj penké jakamnia awatmia penker ajasma nuna nakumkamurín najanawarmai. ¹⁵ Kukariá Yajasma kakaram sunasmai. Nujaj Entsaya Yajasma najanamun iwiaaku awajsatniua áintsañ ichachkiamai. Túram ashí níniak shiir awajeacham máatniun susamai. ¹⁶ Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha an̄kantcha an̄kantchasha ashí ni nijjaincha tura wakerakka untsuurincha anujtuktiniuyi. ¹⁷ Entsaya Yajasma náarín tura wakerakka ni náari núnirurín anujtuktiniuyi. Túrachuka sumatnasha sumakchamniuyi, surutnasha surukchamniuyi. ¹⁸ Wats, wi tájana ju nekaatniuka ti nekas enentáimtustiniati: Entsaya Yajasma núnirurí áishman̄ka núnirurí asa sais siañtu seséntisáisaiti (666). Ashí ti neka ainia nú shuar Entsaya Yajasma núnirurín nekapmar nin nekaati.

144.000 shuar Yúsán kantampruawarma

14 Nuyá Murikiun Seuñ náinnium wajan wainkiamjai. Níjjajisha siañtu kuaréntikuátru mir (144.000) shuar wajaarmai. Nusha nijjaj Murikiu náaríncha tura ni Aparí náaríncha anujtukma aarmai. ² Ti untsurí árapan nayaimpiniam túntuiniak teer awajenak kanusa uuntri nujan̄krak téter ajá núnisañ antukmajai. Ti kakaram ipiamta núnis amai. ³ Nu tuntuiyamujaj siañtu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuatru tañkunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu siañtu kuaréntikuátru mir shuarka jú nuñkanmayá shuarnumiá uwempraru ásar nu kántan kantamiarmai. ⁴ Nu shuarsha nuwajaj ya-jauch ajascharu ásar ti shiir ániawai. Túrawar Murik weana nuñ nemarainiawai. Ju nuñkanmayá shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisañ

armai. ⁵ Nu shuar penké wáitruachu ásar Yúsajsha ti shiir tunáa máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nuñkanam pujuinia nú shuaran ujakartiniuyi.

⁷ Nusha ti kakantar untsumuk tímiai: “Yus ashamkatarum. Niñki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nuñkancha nayaantsancha ashí entsancha najana asamtai shiir awajsatarum.”

⁸ Nuyá chíkich suntar, jímiara nu, taa tímiai: “Pai, Uunt Papirúnia pépruka penké meserai. Niisha tuke tsanirmaua núnisañ ashí shuaran anampratniua núnisañ utsuurmai. Tuma asa niisha nú shuarjaj nu-petnak tuke emesnarai.”

⁹ Nuyá chíkich suntar, menaintiua nu, taa tímiai: “Shuar Entsaya Yajasmancha tura ni nakumkamuríncha shiir awajeakuñkia tura nijjainiumsha uwe-jnumsha ni naari anujtukmaitkuñkia ¹⁰ Yus nin kajerak ti asutiáttawai. Yapá pachimprachman áartinia áintsañ ti kajerakattawai. Túramtai asupri ti tsúer keá nujaj jini-um wáitsartatui. Yusa suntarj tura Murik íimmianum apenáwar jinium wáitsartatui. ¹¹ Ni wáitsatniurj ji esaak kajintsuk tuke mukuñtia nuniskete. Entsaya yajasma tura ni nakumkamurín shiir awajeenak ni naari anujmamainia nuka tsawajsha káshisha ayamtsuk wáitsartatui. ¹² Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantaj itirchatnum pujuiniak katsuntratín áni-awai.”

¹³ Nuyá nayaimpinmayá chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” tímiai.

“Núnisañ Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiatatui” tawai” turutmiai.

Jú nuñkanam arakma juukma

¹⁴ Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijjaj najanamun etsenkrakuyi. Tura machit-ian éren takakuyi.

¹⁵ Tura chíkich suntar Yusa Uunt Jeeñia jiinki yurañminiam eketun kakantar chicharuk tímiai “Árak júuktin tsawant jeayi. Machitrumjaj tsupiram juuktá.”

¹⁶ Tutai yurañminiam eketu ni machitrijjaj nuñká arakman tsupir juukmai.

¹⁷ Nuyá chíkich suntar Yusa Uunt Jeeñ nayaimpiniam ana nuyá jíinkimiai. Niisha ni machitri éren takakuyi.

¹⁸ Tura chíkich suntar namañ maar Yus-sútainmayá jíinkimiai. Niisha jinia wáinniuyi. Tura máchit ti éren takakun kakantar chicharuk tímiai “Machitrum ti érea nujaj uwa nuñká arakma nu tsupiram juuktá. Mash tsamakarai.” ¹⁹ Tutai suntar ni machitrijjaj ashí nuñkan-

mayá uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiáta nuna nakumeawai. ²⁰ Tura uunt péprunmayá arantach ijiurarmai. Tura neketainmayá numpa jíinkimiai. Nu numpa tres sian̄tu (300) kirumitrua nu pajamar kawayu nujjijai métek ajasmai.

Nayaimpinmayá suntar amúamunam wáitkiastinia nuna piniñnumiñ ukainiawai

15 Nuyá ashammian ti enentáimpramian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nuñkanam yajauch shuáran ti wáitkiasar Yus kajeamun umirtatui.

² Nuyá antumiñka áiv 20 Tura uunt péprunmayá aranntsñ ti saar jijiai pachimpramun wainkiamjai. Ni káanmatkarincha Entsayá Yajasma tura ni nakumkamurincha nupetkarma nu nuñ wajaarmai. Tura nin arpa tuntuitian Yus súsarmai. ³ Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme. ⁴ Uuntá, zyaki ashampromkachat? Aya Amek ti shiir tunaarinchaitme. Ashí nuñkanmayá shuar ame ti shiir túramun wáinkiar Aminiak jeartamar ti shiir awajtamsartatui.” Tu kantamáwarmai.

⁵ Nuyá atak Yusa Uunt Jeñ íisan, Ti Shiir Tesaamun uranniun wainkiamjai. ⁶ Tura Ti Shiir Tesaamunmayá siati suntar siati wáitkiastinjai jíinkiarmai. Niisha ti shiir pújun entsaru armai. Netsepnunsha kurin emenmama armai. ⁷ Nuyá kuaru tan̄kunmayá chikichik kurí piniñkian súsarmai. Nu piniñ tuke iwiaaku Yusa kajetairijai piaku armai. ⁸ Tura Yusa kakarmari ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuiniatsajin Yusa Jeñ wayachminiuyi.

Wáitkiastin piniñ ukararma

16 Nuyá Imiá Shiir Tesaamunmayá ti kakaram chichaamun antukmajai. Nusha siati suntaran tiarmai “Nuñká werum Yusa kajetairi siati piniñnum ana nu ashí ukartarum.”

² Tutai emka suntar we, piniñnumiñ kukar ukarmai. Túramtai ashí shuar Entsayá Yajasma náarin anujmamprar ni nakumkamurin shiir awajiarma nuna ti najamin kuchap jiintiarmai.

³ Nuyá chikich suntar jímiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuñ pujuinia nu kajin̄kiarmai.

⁴ Nuyá suntar menaintiua nu, entsanam tura púkuninmasha ukarmai. Túramtai ashí numpa ajasarmai.

⁵ Nuyá suntar entsá wáinnia nuna chichamen antukmajai. “Uuntá, amek ti penker Yus asam jútikiamé.

Yáunchusha tuke pujú asam ti shíiraitme. ⁶ Iis, nu shuar amée shuárumincha tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

⁷ Tutai namañ-maa-Yus-sútainmayá chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuarua nu, tsawai nantunam ukarmai. Túramtai jijiai shuáran esaamujai wáitkiastin kakaram sunasmai. ⁹ Tura shuar ti sukuám wáitiamia nu, nu wáitkiastinian nérenniun Yusan yajauch chicharkarmai. Tura ni tunaarin enentáimtsuk Nin shiir awajsatniuncha penké nakitrarmai.

¹⁰ Nuyá suntar senkua nu, Entsayá Yajasma akupin pujutairin ukarmai. Túramtai ni nuñkeñ ashí kashi ajasmai. Tura shuar ti najaimiainiak iniañincha esamiarmai. ¹¹ Tura nújajisha yajauch túratniuncha iniaisacharmai. Antsu kuchaprijajisha tura ti najaimiainiak wáitaiainiak nayaimpinmayá Yusan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniñ akupin taarti tusa jintiamnamai.

¹³ Tura nuyá juna wainkiamjai. Ti Kajen Yajasma weneyasha, Entsayá Yajasma weneyasha tura núnisan penké Kukariñ Yajasma ántar yúsnan etserniua nuna weneyasha puachia núnin yajauch wakan menaint jíiniarmai. ¹⁴ Íwianch áiniak aents tujintiamun túruiniak ashí nuñkanmayá akupniun irurarmai. Ti Tujincha-Yusaj ni uunt tsawantri jeamtai mesetan najanatai tusar weriarmai. ¹⁵ (Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairin péñker wáinia nú shuar ti shiir átatui. Misuchu asa natsaarchattawai.” Tu tawai.) ¹⁶ Tura yajauch wakan uunt akupin ánian Armajetún nuñkanam irurarmai. Israer-chichamnum nu nuñka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmayá Yusa Uunt Jeñiñ ti kakaram chicham Yus akupin pujutainmayá chichaak “Mash uminkiai” timiai.

¹⁸ Tura nuyáñka peemsha, chárpisha, ipiamtasha ajamai. Tura nuñkasha ti kakaram úyrkamai. Maa, aents jú nuñkanam yámankamtaik pujuarmia nuyá júnis úyrkamuka atsuwiti. ¹⁹ Ti Uunt Péprusha menaint nakantramai. Ashí nuñkanmayá péprusha saanakiarmai. Nuñsha Yus ti kajerak Papirúnia pépruncha kajinmattsuk ni kajetairin yapá umutaia áintsañ aarmai.

²⁰ Entsá ajapén atentrasha tura murasha menkaramai.

²¹ Núnisan nayaimpinmayá uunt kaya núnisan micha kákeramai. Ti uunt áiniak kintiarjai métek kijin armai. Shuarsha nuñjai ti wáitaiiniayatan áyatik Yusan yajauch chicharkarmai.

Tsanirmatai nuwá asutiámu

17 Nuyá siati suntar numiñ chikichik taruti turutmi-ai “Winiñiá. Tsanirmatai nuwá ti asutiátniun ini-

aktustatjame. Nu nuwá nayaantsanam uku eketui.
² Ashí ju nuŋkanmayá akupin niijjají tsanirmawaru áni-
 awai. Núnisaŋ ashí ju nuŋkanmayá shuar, nu nuwá
 tsanirmatniun tsan̄kateam, nijiamanch umartinia
 áintsar niijjají ti yajauch túrawar nampekarmai.” Nuna
 taku Yusnumiá kanaktinian nakumkamai. ³ Nuyá
 mesekranam kampuntin atsamunam jurukmiai. Tura
 nuj Yajasma kapaáakunam nuwá eketun wainkiamjai.
 Nu Yajasma nasha ashí Yúsan yajauch chichareamu
 áatramuyi. Muuké siátitiat kachurj tiásauyi. ⁴ Nu
 nuwásha tarachin yamakai kapaáakujajísha ti shiir
 iwiarmamar entsaruyi. Kurijjajísha, shíirmach kayajajísha, ti
 shiir sháukjajísha iwiarmamprauyi. Kurí pinin̄kian
 muj̄miainniasha tura ashí ni tsanirmatairj imiá ya-
 jauch armia nunasha piakun ajaamak takakauyi. ⁵ Niji-
 ajin̄iumsha ni naarj áintsan̄ yúpichuch nekaachminia
 nu júnis áarmauyi: UUNT PAPIRÚNIA, Ashí Tsanir-
 mauncha tura Ashí Ju Nuŋkanam Muj̄miainian Túrinia
 Nunasha Nukurinti. ⁶ Nu nuwásha Yus-shuar Krístunon
 etserkar máawarma ainia nuna numpen nampekuyi.
 Nuna wáinkian ti enentáimturmajai. ⁷ Túrunamtai
 nayaimpinmayá suntar túrutmiai “¿Urukamtai imiá
 enentáimtam? Wats, ashí nuwánu paant ujaktatjame.
 Núnisan̄ yajasma ekenak júana nunasha paant ujak-
 tatjame. Muukésha siátichukait tura kachurjsha
 tiáschak áinia. ⁸ Nu yajasma wáinkiam nuka yaunchu
 pujuwiti tura yamaikia juj̄ pujachiat amúamunam tuke
 játsuk nán̄katkachu wáanmayá j̄inkíttiwai. Shuar
 nuna wáinkiar ni naarj tuke iwiaaku pujutai papinium
 yámankamtaiknumiá anujtukchamua nuka nu yajas-
 man ashamkartatui. Nu yajasma yaunchu pujú ya-
 maikia atsayat atak wantinkiatwawai’ turutmiai.
⁹ Nekas neka ainia nu juna enentáimturarti: Siati
 muukéŋka siati náintian nakumui. Nu nuwá nuj̄ eketui.
¹⁰ Núnisaŋ ni siati muuké siati akupniun nakumui.
 Kame seŋku akupniuka nan̄kaamasaru ainiaawai. Chi-
 kichik tuke akupniuiti tura chíkichka tuke taatsui. Nii
 taasha núkap tsawant akupkashtatui. ¹¹ Nuyá ashí
 ukunmaŋka yaunchu amia nú yajasma wantiniak nuj̄ají
 uchu akupin ajastatui. Túmaitiat chíkich siati akupni-
 ujjají iruram métek enentáimpramniaiti. Tura nu yajasma
 yamaikia atsayat wantiniak akupak umik tuke emes-
 nartinnium wétatui’ turutmiai.
¹² Tias kachurj wáinkiam nuka tias akupin tuke aku-
 peenatsna núiti. Niisha nu yajasmajají métek peŋké
 ishichik tsawant akupin ajasartatui. ¹³ Ju tias akup-
 niusha métekrak enentáimiainiak ni kakarmarj̄n yajas-
 man sústartatui nuj̄ajísha akupkat tusar. ¹⁴ Murikjajísha
 mesetan najanawartatui. Túrasha Murik nupetkartatui.
 Niisha uuntjají nan̄kaamas Uunt asa tura núnisaŋ
 akupniujají nan̄kaamas Akupin asa nupetmaktatui. Tu-
 ra Niijjají írutraa nu, Yus Winia atí tusa achikma ásar tu-
 ra Nin tuke umirin ásar Niijjají nupetmakartatui.’
¹⁵ Suntar tuke chichartak turutmiai ‘Tsanirmatai
 nuwá nayaantsanam uku eketu wáinkiachumek. Nu
 nayaantsaka ashí nuŋkanmayá shuáran nakumeawai.
¹⁶ Tura tias káchuka yajasma num wáinkiam nu, tsanir-
 matai nuwá naktirar ajapawar misú ikiukiartatui. Ni

ayashíncha yuawartatui tura áesawartatui. ¹⁷ Nu akup-
 niu enentáin Yuska ni wakeramurj̄n apujsaiti. Nii timia
 nu umintsaj̄n akupniusha métekrak enentáimprar ni
 kakarmarj̄n takamtsuk yajasma sústartatui enen-
 táimtikramai. ¹⁸ Nuwá wáinkiam nuka ashí nuŋkan-
 mayá akupniun akupeana nu pépruiti.”

Papirúnia emesramuiti

18 Nuyá nayaimpinmayá suntar táarun wainkiam-
 jai. Ti kakaram akupin asa nuŋkancha tsáapin
 awajsamai. ² Tura ti kakantar chichaak timiai “Pai, Uunt
 Papirúnia peŋké meserai. Tura yamaikia íwianch mat-
 samtaisha ashí yajauch wakanj̄ pujutairj̄sha ajasai.
 Muj̄miai nanamtincha tura ashí yajauch nanamtin
 ainia nusha nuj̄ pasun̄mainiawai. ³ Nu péprunmayá
 shuar tuke tsanirmawau núnisaŋ ashí nuŋkanmayá
 shuaran anampratniua núnisaŋ ni ti yajauch turamuj̄ají
 utsuurmai. Núnisaŋ ashí j̄u nuŋkanmayá akupin Yúsan
 iniaisar niijjají tsanirmawarua áinis áiniawai. Tura
 shuarsha ni yajauch wararmajají ti kufrintin ajasaruiti.”
 Tu timiai.

⁴ Nuyá nayaimpinmayá ti kakantar chichaman antuk-
 majai. “Wíi shuaraitrumna nuka nú peprunmayá j̄inki-
 tiarum. Túrachkurmeka ni tunaarj̄ jumamkirum ni
 wáitsatniurj̄ncha pachiinkiatarme. ⁵ Ni tunaarj̄sha ti
 piak nayaimpiniam jeastatuk ajasai. Tuma asamtai Yus
 ni tunaarj̄n kajinmatkichuiti. ⁶ Ni tunáa túramuj̄ají
 métek akikiam ataksha nuna nan̄kaamas métek
 patattsata. Ni yajauch túramu nijiamchin ashí áararma
 núnisaŋ nuna nan̄kaamas ti wáitsatin nijiamanch
 pachimpruram susata. ⁷ Waantu enentáimtumak ya-
 jauchin wararsama nuj̄ají métek ti wáitkiastá yamaikia.
 Tunáan ti túriniaitiat ni enentáinkia enentáimias “Uunt
 Akupniuitjai. Wajechu asan peŋké wáitsashtiniaitjai” tu
 enentáimtumawai. ⁸ Tuma asamtai ti wárik chikichik
 tsawantaj̄ ni wáitsatniurj̄n tarittiwai. Jákatniusha ti
 wáitsatniusha tura tsukasha tarí ashí j̄ijjají eke-
 mankattawai. Uunt Yus ashí Tujincha nu kajerkamu
 asa nuj̄ají asutniáttawai.” Tu timiai.

⁹ Ashí nuŋkanmayá akupin niijjají tsanirmawaru ainia
 nu ashí yajauchin niijjají wararsaru ásar nu pepru
 esaak múkuint ajakui eáararmai. ¹⁰ Ti esaak wáitiakui
 nuj̄ pachiinkiar wáitsatniun ashamainiak arant wajasar
 tiartatui “Maa, Papirúnia ti uunt pépruitiat nekas wáit-
 nenmai ajawai. Imiá wárik ni wáitsatniurj̄n tarini.”

¹¹ Núnisaŋ ashí nuŋkanam súrin ainia nusha nu
 péprun ti kuntuts enentáimturar eáartatui. Ni suru-
 tain itiamun ¿yaki sumarkat? ¹² Kame juna itiaru áini-
 awai: kurincha, kuítniasha, kaya shíirmachincha, ti shi-
 ir sháuknasha, ti peŋker tarachniasha, akupin entsatai
 shiirmachin yamakaincha kapaáaniuncha, sétancha,
 itiaru áiniawai. Núnisaŋ ashí kuŋkuin numincha, ti shiir
 awara najanamuncha, ti shíiram numincha, yan̄kú
 jiruncha, peŋké jiruncha, mármur kayancha itiaru áini-
 awai. ¹³ Núnisaŋ ishpin̄nasha, nusháa kuŋkuinniasha,
 mira kuŋkuinniasha, umutaincha, asuitincha, trikiu
 nerencha, tura trikiu ti peŋker neken̄mancha itiaru
 áiniawai. Núnisaŋ áintstai tan̄kuncha, murikniasha,

kawaincha ni kárurijjaj, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí nerēn ti wakeruk sú-mauya nu yamaikia nuī atsawai. Ashí ni kuítrisha tura ashí ni péñkerjsha tuke peñké amuukayi.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar eǵartatui. ¹⁶ Túrawar tiartatui “Maa, uunt pépruiat ti wáitnenmai ajakai. Nuwā ti peñker iwiarmampra áinis nuyá shuar akuptai tarachin yamakaijjaj kapaǵaku entsarmai. Kurijjajsha kaya ti shíirmachijjajsha tura ti peñker sháukjajsha ti shiir iwiarmampraruyi. ¹⁷ Ti wárik ashí ju kuit amukaiti.” Tu tiarmai.

Ashí uunt kanú kapitántrisha, ashí nayaantsanam katiinia nusha, ashí kanú wíánniusha, tura ashí kanú nérennurjsha árantak wajasarmai. ¹⁸ Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” ¹⁹ Tiar ti kuntuts pujuiniak awatmamar kakantar úutainiak tiarmai “Maa, ti uunt pépruiat ti wáitnenmai ajakai. Ashí uunt kanu nérentin nayaantsanam niijjaj takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujaj warastarum. Nu wáitsamujaj atumin yajauch awajtamsamarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisan uunt pepru Papirúnia emesnar atakka wainniakchatin tuke meñkakattawai. ²² Tura atakka jantsemma piñkiuisha tampursha shakapsha antunkashtatui. Nu arantcha nuñkia shuar peñké takakmaschartatui. Túramtai nekeamusha antunkashtatui. Ashí mitia áta-tui. ²³ Shiripkincha ekeemakchartatui. Nuatma nam-persha antunkashtatui. Nuikkia ni shuarj súrin arma nu ashí nuñkanam nañkaamantu armai. Tura ashí nuñkanmaya shuaran waweatniua áintsan níya núnis ajasarat tusa anañkawarmai. Túrasha núnisan ti kakarmaitiat ju mash túrunayi.” Tu timiai.

²⁴ Kame ni akupkamujaj péñker shuar ti mantam-nawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura péñker shuar ashí nuñkanam maamu ainia nuna numpesha nu paant wáinkiamniaiti.

19 Nuyá nayaimpinmaya ti untsurí aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nañkaamaku átinniasha, tura ashí kakarmancha nekas nérenniuiti. ² Niisha aya nekas péñker túratniua nuna túrin asa ti nukap tsanirmaun ashí shuaran tsanirijjaj utsuun ti asutiáyi. Nin ti wáitkias ashí ni shuarj máawarman yapájmíatkaiti” tiarmai.

³ Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuíniakui paintikuatru uunta nu tura kuaru tañkusha nuñká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. ⁵ Akupin pujutainimaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitánitkiurmesha péejchachitkiurmesha, ii Yusrj tuke shiir awajsatarum.” Tu timiai.

Murik nuatnaikiatin namperj

⁶ Nuyá ti untsurí aents chichainiak kanusa uuntri nu-jañkrak téter ajá núnisan antukmajai. Ti kakaram ipiamta núnis amai.

“Tí shíiraiti, tiarmai. Ii Uuntri Yus ashí tujincha asa ashí akupkatniun nañkaamayi. ⁷ Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai. ⁸ Murikiu anajmarmariñkia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

⁹ Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Ju ka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintriñtjai ámijjaj métek tura yatsumjaj métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

Kaway pújunam eketna nu

¹¹ Nuyá nayaimp uranniun wainkiamjai. Nu kaway puju wantinkiamai. Nu kawaynium ekeema nuna naarj Ti Peñker Umin tutaiyi. Núnisan Ti Nekas Turin tutaiyi. Ti peñker Akupin asa aya nekas péñker túrak mesetan najanaiti. ¹² Ni jjiisha jijjaj métek keeármaj.

Múuknumsha akuptai tawaspan untsurí etsenkrakuyi. Nu ni naarj Yus Chicham áarmauyi. Túrasha tana nuna Niñki takamtsuk nekaamai. Numpajaj enkerman entsaruyi. ¹⁴ Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmaj. ¹⁵ Nu suntara Uuntri weneeyā, ashí nuñkanmaya yajauch shuaran máatin, puniá mai ere tsakatskatin jíinmiai. Tura jirujaj asutiát-niua áintsan ti kakaram akupkattawai. Túrak Ashí Tujincha Yusa kajetarij ti kakarma nujaj shuáran asutiát-tawai. Uwa nekenkar ijiuratniua áitkiasan wáitkiasarta-tui. ¹⁶ Ni pushirjñcha makuñcha ni naarj áarmauyi: Ashí Akupniun Akupin tura Ashí Uunta Uuntri.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperjñ yurumáitarum. ¹⁸ Akupniu namañkésha yuítarum. Sun-

tara kapitántri namañkéssha, kakaram suntara namañkéssha, kaway namañkéssha tura eketainia nuna namañkéssha, kame ashí shuara namañkéssha nañkaamantu ainia núnasha tura penké shuar ainia núnasha yuítiarum." Tu untsukmai.

¹⁹ Tura nuyá Entsaya Yajasmacha tura jú nuñkanam akupin ainia nunasha ashí ni suntarijijai wainkiamjai. Niisha kawainium eketka nujai tura nuna suntarijijai mesetan najanatai tusar iruntrarmai. ²⁰ Tura nu mesetnum Yajasmasha tura Kukariá Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmarin súam nu Kukariá Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarin apujmamsar ni nakumkamurin shiir awajсарmai. Tuma asamtai Entsaya Yajasmacha tura Kukariá Yajasmacha íwiakuk asuprijijai ti kea nu ji-antumi-annum apeáwarmai. ²¹ Chíkichka kawainium eketkanumiá puniá tsakatskatin weneya jiiimia nujai mantamawarmai. Túramtai nanamtin ni ayashin yuawar ejemakarmai.

Kristu mir uwí jú nuñkanam akupkattawai

20 Nuyá nayaimpinmaya suntar táarun wainkiamjai. Nusha náñkatchu waa yawirin tura jin-kiatat jirun kampurman takakuyi. ² Nu suntarsha Ti Kagen Yajasma jiru kampurmajai jinkiamai. Nu Yajasma iwianchi kapitántri Satanas tutainti. Yáunchuya-napiti niisha. Tura nu iwianchin jinkia mir uwí pujusat tusa ³ náñkatchu waa nam epenimiai. Tura waiti uraichminian anujtukmai. Mir uwí nañkaamatsajin ashí nuñkanmaya shuara anañkawarajin tusa túramai. Antsu mir uwí nañkaamasmatai ishichik tsawant añkant akupnaktinaiiti.

⁴ Nuyá akupin pujutainium pujuinian wainkiamjai. Tura shuara túramurin írsarat tusa kakaram sunasarmai. Tura núnisan muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armái. Niisha Entsaya Yajasmacha ni nakumkamurincha tikishmatrachu armái. Núnisan náarincha nijiajini-umsha tura uwejnusha anujmamprachu armái. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nañkaamatsajin nantakcharmai. ⁶ Antsu emka nantaktin tsawantnum pachiinkiarua nú shuar, ti penker áimak, ti shiir warasmin ániawai. Nu shuarka jimiará jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujai métek mir uwí akupkartatui.

⁷ Tura mir uwí nañkaamasmatai uunt iwianch urani akupnaktatui. ⁸ Túram ashí nuñkanmaya shuáran anañkawartaj tusa jiiinkitiawai. Kuk nuñkanmasha tura Makuk nuñkanmasha ashí pujuinia nuna anañkawartatui. Tura mesetan najanataj tusa ni suntarin nekapmarchamnia ti untsurí irurtatui. ⁹ Tura ashí nuñkan enetak Yus-shuar matsamtaincha tura Yus ti

aneamu pépruncha mash éñkekarmai. Túramtai Yus nayaimpinmaya jinia akuptuk mash áesawarmai. ¹⁰ Tura iwianchi kapitántri, nin anañkawarmia nu, asuprijijai keá ji-antumiannum apenámai. Nu yaunchusha Entsaya Yajasmasha tura Kukariá Yajasmasha, penké ántar yusan etserniua nu, nuí apenáwarmai. Nuísha tsawajsha káshisha iniannatsuk ti wáitsartatui.

Ashí amúamunam súmamtkiatin tsawant

¹¹ Nuyá akupin pujutain úntan tura ti pújun wainkiamjai. Tura nuí pujancha wainkiamjai. Niisha ti kakaram asamtai nuñkasha nayaimpisha aya menkarar tuke atsúarmai. ¹² Tura túrunatsajin nayaantsanam jákarua nusha jiiinkiarmai. Núnisan iwiansamunam jaka pujuinia nusha jiiinkiarmai. Tura jákaruncha, nañkaamantu arma nunasha tura penké shuar arma nunasha, ashí wainkiamjai. Tura Yusai naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamurj paant nékaneakui súmamtkinawarmai. Tura chíkich papisha tuke iwiaaku pujustin papí urankamai. ¹⁴ Nuyá jákatin amuukati tusa ji-antumiannum apenámai. Nu ji-antumiannum wétin jimiará jákatin tútainti. ¹⁵ Tura ashí shuar ni naari tuke iwiaaku pujustin papinium atsúarma nusha nuí apenáwarmai.

Nayaim yamaram tura yamá nuñka

21 Nuyá nayaimpisha tura nuñkasha menkaramtai nayaim yamarman tura yamá nuñkancha wainkiamjai. Tura nayaantsasha atsumai. ² Wi, Juan, ti shiir péprun, Yusnumiá yamaram Jerusaréñkan nayaimpinmaya táarun, wainkiamjai. Anajmarma ni áshrin inkiuntaj tusa ti shiir iwiamampra áintsan ti penker iwiamamuyi. ³ Nayaimpinmaya ti kakantar chichaamun antukmajai. "Íisía, Yus yamaikia aentsajai pujawai. Tuke niijjai pujaku ashí ni shuari ártatui. Tura niijjai tuke pujak nekas tuke ni Yusri ártatui. ⁴ Yus ni neajkin ujujturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai."

⁵ Tura akupin pujutainium ekema nu "Íistá, Wi ashí penké yamarman nájanjai" timiai. Nuyá nu arantcha turutmiai "Juka imiá nekas asamtai aartá. Nekas enentáimtustiniati." ⁶ Ataksha turutmiai "Yamaikia mash uminkiyi. Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiama núnaka tuke iwiaaku pujutai entsan penké kúitichajai áartatjai. ⁷ Nupetmakunka ashí yamarma juna mash susattajai. Wisha ni Yusri ártatjai. Núnisan niisha winia uchir ártatui. ⁸ Antsu sápijkia, Yusan enentáimtichusha, yajauchin máatrasha, mañkartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijijai keá ji-antumiannum apenáwartatui. Nuka jimiará jákatin tútainti."

Yamaram Jerusarén

⁹ Nuyá siati suntar piniñ amúamunam wáitkiastinjai piakun takakua nuyá chikichik taruti túrutmiai “Winitia. Murikiu anajmarmarjñ iniaktustatjame.” ¹⁰ Taku mesekranam naint yakí juruki Yusnumiã ti shiir Jerusarén pepru nayaimpinmayã táarun iniaktursamai. ¹¹ Nu péprusha Yusa wincharijjajñ tsáapniniuyi. Nu tsáapninja kaya ti shiirmachia núnis jaspi kaya nuni saar asa ti tsáapniniuyi. ¹² Pepru yantamesha ti yakí péñkramuyi tura wáitirj tuse amai. Tura nu wáitinium suntar wajatiarmai. Nu wáitinmasha Israer-shuara uuntrj tuse armia nuna naarj áarmauyi. ¹³ Nantu tá-tainmaanñ menaintiu waiti amai. Nantu akatain-maanjsha menaintiu waiti amai. Nuñkaanjsha menaintiu waiti amai. Arakaanjsha menaintiu waiti amai. ¹⁴ Ti uunt kaya tuse apujsamu armiai. Tura nuñ ekenir péñkramuyi. Nu tuse kayanam Murikiu akatramurj tuse armia nuna naarj áarmauyi.

¹⁵ Suntar wijjajñ chichaua nu, nekapmatain kurin takakuyi. Nujajñ pépruncha, wáitirjñcha, tura péñkramurjñcha nekapmartiniuyi. ¹⁶ Pepru esantjsha wançantjsha yakirjsha mash métekrak armiai. Suntarsha péprun nekapmataijjajñ nekapmaram esantjsha wançantjsha tura núnisanñ jeamkamu yakirjsha jimiará mir jimiará sianču (2.200) kirúmitru amai. ¹⁷ Nuyá péñkrjñcha nekapmarmai. Suntar aents nekapmataijjajñ nekapmaram sesentikuatru (64) mitru amai. ¹⁸ Nu péñkramusha jaspi kayajajñ najanamuyi. Péprusha aya kúrikiyi. Nu kuri ti penker sáarauyi. ¹⁹ Pen apujtukma kayasha ti shiir kaya ainia nujajñ najanamu asa ti shiir iwiamuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kua-trua nusha ismirátauysi. ²⁰ Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatista káyauyi. Ti kayaim apujsamu asamtai ti shiirmachiiyi. ²¹ Pepru wáitirj tuse ainia nu, ti shiir nayaantsanmayã shaukjajñ chikichik najanamu armiai. Pepru jintjsha aya kúrikiyi. Nu kuri ti penker sáarauyi.

²² Yusa Uunt Jeeñcha wainkiachmajai. Antsu nu peprunam Uunt Yus ashí tujincha nu tura núnisanñ Muriksha nu péprun pímiutkui takamtsuk Níiniuyi. ²³ Nu péprunmasha tsawaí-nantusha kashí-nantusha atsumchamai. Antsu Yusa wincharj tsáapin awajmiai. Núnisanñ Muriksha tsáapin awajmiai. ²⁴ Nu tsáapnijjajñ ashí nuñkanmayã shuar wekasartatui. Tura ashí nuñkanam akupin ainia nusha nuñ yujainiak ni péñkerijjajñ nuna shiir awajtuiniawai. ²⁵ Tura kashi atsá asamtai tuke tsawaiti. Tuma asamtai wáitirj tuke epenchamu ártatui. ²⁶ Tura ashí nuñkanam péñker ana nuna nuñ itiaartatui. ²⁷ Tura yajauchikia penké wayashatatu. Muñjmiainian túrincha tura anañkartincha penké wayachartatui. Antsu áyatik shuar tuke iwiaaku pujutai papinium naarj aarma ainia nuke wayawartatui. Nu papincha Murik takakui.

22 Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmayã ti saawi jijnmiai. Nu pujutaisha Yusna tura Muriknauyi. ² Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukeshashí nuñkanmayã shuar tsuámatainti. ³ Ashí yajauchia nuka atsuttawai. Uunt akupin pujutai, Yúsnasha Murikniasha, nuñ aa asamtai ni shuarj ti paant wainiainiak tikishmatrartatui. Tura nijjajñcha ni naarj anujmamkartatui. ⁵ Tura káshisha atsuttawai. Nuñ pujuinia nuka shiripkincha etsancha atsumchartatui. Uunt Yúsak tuke tsáapin awajtiatui. Tura ni shuarj tuke iniannatsuk akupkartatui.

Jesukrístu tátinrj penké nuntumsai

⁶ Nuyá suntar turutmiai “Ju chicham ti nekas asa nekas enentáimtusminiaiti. Uunt Yus yaunchu níiniun etserniun ni chichamen enentáimtikramia núnisanñ ya-maikia ni suntarjñ akuptuk wárik túrunatta nuna ashí ni shuarjñ ujakuiti.”

⁷ “Ti wárik winittijajñ” tawai Murikkia.

Shuar ju papinium Yusa Chichame áarman umirna nuka shiir warasminiaiti.

⁸ Wi, Juanñ, juna mash íisan mash antukmajai. Tura mash íisan antukan nayaimpinmayã suntar iniaktursama nuna shiir awajsataj tusan tikishmatramjai. ⁹ Túram turutmiai “Penke áinkiaip. Wisha Yusa yáinrjñtjai ámijjajñ métek tura yatsumijjajñ métek. Yúsnan etserin ásar tura ju papinium áarma nuna umirainiak Yusa yáinrjñ ániawai niisha. Yúsak shiir awajsatniuiti.”

¹⁰ Nuyá ataksha turutmiai “Ju papinium aarma Yusna asamtai úukam ikiusaip. Ashí túrunatin tsawant ishichik ajatesai. ¹¹ Nu jeatsajñkia yajauch shuarka tuke yajauch túruki wetí. Núnisanñ muñjmiainian túraka tuke túruki wetí. Antsu péñkeran túraka péñkeran túruki wetí. Núnisanñ esetar enentáimniusha tuke esetar Yusjajñ wekasati.”

¹² Muriksha tawai “Eta, ti wárik winittijajñ. Túran ti shiirmachin ashí péñker túramujajñ métek súsatniua nuna takukin winittijajñ. ¹³ Wíitjajñ. Yámankamtaiknumiã amúanmasha tuke pujuwitjajñ. Wisha A rétranmayã Y rétranam ashí retra áintsaitjajñ.” Tu tawai.

¹⁴ Ni pushirj péñker nijiamatniua núnisanñ péñker túrinia nú shuar shiir warasminiaiti. Nu shuar nu pepru wáitirjñcha wayamniaiti. Túrar tuke iwiaaku pujutai numinmayã yuamniaiti. ¹⁵ Tura antsu Yúsan enentáimtachuka, wawekratniuka, tsanirmatan pujurainia nuka, mañkartinkia, ántar-yus tikishmatniuka, tura ashí shuar wáitan wararainiak tuke túrin ainia nuka aã matsatainiak penké wayachmin ániawai.

¹⁶ “Wi, Jesus, ashí Yus-shuaran ujararat tusan winia suntarun akupkajajñ. Wikia Tawit Weeitjajñ. Túrasha Tawitia Úunrjñtjai. Wikia ti tsáapin yaa, yáñkuamia áintsanñketjajñ.” Tu tawai.

¹⁷ Yusa Shiir Wakanjsha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuítchajaj umartí.

¹⁸ Ashí shuar ju papinium Yus-Chicham aarma nuna antukarun juna ujaajai: Shuar juí áarman chikichan pataakka Yus nin ti wáitsatin juí aarma nuna patattsat-tawai. ¹⁹ Núnisañ shuar juí aarman emeneakuñkia Yus ni naarin iwiaaku pujutai papiniumiã japirattawai. Tura

ti shiir péprunam wayatniun suritkiattawai. Nu péprusha tura nu papisha juí paant ujakma áiniawai.

²⁰ Jú papí áantratniun ujakua nu tawai “Eta, ti wari winittiajai.”

Pai, núnisañ atí. Wari winitia, Uunt Jesusá.

²¹ Ii Uuntrí Jesukrístu atumniasha shiir yainmakarti. Nuke atí.